

四库全书 太平治迹统类 (宋) 彭百川 撰

钦定四库全书

史部五

太平治迹统类

杂史类

提要

(臣)等谨案太平治迹统类三十卷宋彭百川撰百川字叔融眉山人是书凡八十八门皆宋代典故文献通考载前集四十卷又后集三十三卷载中兴以后事此本乃朱彝尊从焦竑家藏本抄传但有前集不分卷数又中间讹不胜乙彝尊尝谓焦氏本卷帙次第为装订者所乱佣书人不知勘正别用格纸以致接处文理不属是也初绍兴中江少虞作皇朝事实类苑李攸又作皇朝事实与百川此书皆分门隶事少虞书采摭虽富而俳谐琐事一一兼载体例颇近小说攸书于典制特详记事颇略惟此书于朝廷大政及诸臣事迹叙述颇为赅备多可与史传相参虽传写久讹而规模终具阙其断烂之处而取其可以考见端委者固与李心传建炎以来朝野杂记均一代记载之林矣

乾隆四十六年十月恭校上

总纂官 (臣)纪昀 (臣)陆锡熊 (臣)孙士毅

总校官 (臣)陆费墀

●钦定四库全书

太平治迹统类卷一

(宋) 彭百川 撰

圣宋仙源积庆符瑞

赵氏之先自造父为周穆王御封赵城因氏焉其后与韩魏分晋列为诸侯至汉赵广汉居涿郡中遂为郡人皇高祖讳眱以儒学为业歷永清文安幽都三县令皇曾祖讳珽亦儒学世其业歷藩镇从事累官至兼御史中丞皇祖讳敬慷慨有大志事刘仁恭父子歷营蓟涿三州刺史周显德中赠左骁卫上将军皇考讳弘殷事唐庄宗掌飞捷禁军踰二十年歷汉周累以功迁至检校司徒赠太尉【此条通畧例云云】先是唐贞元壬午岁有五色云见长安太史张璇曰以日宿推之在宋分后一百六十年有圣人兴其地至后唐天成丁亥岁上生于洛阳夹马营有神光满室异香经宿不散上讳匡胤晋天福中两浙儿童聚戲多以赵字为语助开运末宋州有异人指其地曰不二十年有帝王由此建号上雄伟沉厚而多大畧尝客遊至汉东而刺史范阳董宗本之子遵诲每见城上有紫云如盖及上去紫云渐散周祖西征得上以置左右世宗嗣位命上掌禁军刘崇寇泽潞世宗亲帅师与崇遇于高平大将樊爱能等未战而遁世宗躬自督战上即大呼跃马径犯其锋万众披靡周师复振崇众大溃还授殿前都虞侯世宗征淮南命上领亲骑翼从败淮人万余於涡口伪将皇甫晖及姚凤率众号十五万塞清流關上击走之晖将

保滁州上追至城下擒之获凤遂下滁州时侍卫马军帅武安韩令坤平扬州吴将陆孟俊据蜀冈以逼其城令坤惧欲退师世宗命上领兵趋六合据之败李景之弟达于六合东杀万余众禁兵有不用命者必阳为之趣战奋剑破其皮笠以明日索斩之自是人皆死战皇考崩踰月起复授殿前都指挥使世宗复征淮南命上率殿前诸军以下寿州还领义成军节度世宗征濠泗上率精骑为前锋破吴人于十八里滩乘胜攻泗州范再遇以城降及征楚州上亲冒矢石麾兵登城拔之改忠武军节度世宗北征上先至瓦桥關降其将卢龙姚内斌又败北骑数万遂平關南世宗一日于文书囊中得木长三尺余题曰点检作天子世宗异之时曲阳张永德为殿前都点检命上代之累迁归德军节度一日上梦从世宗遊池上世宗取印视之回顾梁王弗与而授于上上尝从布衣辛文悦肄业辛文悦亦梦邀驾既拜乃上也又有青衣童子据床而坐曰宋州官家教我来忽不见其幽显符应如此时周帝幼冲故内外密有推戴之意

### 太祖受禅

建隆元年春正月辛丑北汉兵自上门东下与契丹入寇命诸将御之太祖自殿前都虞侯辅政凡六年士卒服其恩威数从世宗征伐人望固已归之壬子鎮寧节度慕容延钊先发时都下謹言将以出兵之日策点检为天子万民恐怖争为逃匿之计惟内庭晏然不知癸卯大军出爱景门纪律严甚众心稍安军校河中苗训者号知天文见日黑光久相磨荡指谓太祖亲吏宋城楚昭辅曰此天命也是夕次陈桥驿将士相与聚谋曰主上幼弱未能亲征我辈出死力为国家破贼谁则知之不如先立点检为天子然后北征未晚也都押衙上党李处耘具以其事白皇帝弟及节度掌书记蓟人赵普语未竟诸将突入称说纷纭普及匡义各以事理逆顺晓譬之曰太尉忠赤必不见从诸将相顾亦有稍稍引去者已而复集露刃大言曰军中偶语则族今已定义太尉若不从则我辈亦安肯退而受祸普察其势不可遏与匡义同声叱之曰策立大事固宜审圖尔等何得便肆狂悖乃各就坐听命普复谓曰外寇压境将莫谁何盍先攘却归始议此诸将不可曰方今政出多门若俟寇退师还则事变不可知也但当急入京城策立太尉徐引而北破贼不难太尉苟不受策六军决亦难使向前矣普谓匡义曰事既无可奈何政须早以约束因语诸将曰兴王易姓虽云天命实系人心前军昨已过河节度使各据方面京师若乱不惟外寇愈深四方必转生变若能严勅军士勿令剽劫都城人心不摇则四方自然寧谧诸将亦可长保富贵矣皆许诺乃共部分夜遣衙队军使郭延赞驰告殿前指挥使浚仪石守信殿前都虞侯洛阳王审琦守信审琦皆素归心太祖者也将士环列待旦太祖醉卧初不省甲辰黎明四面叫呼而起声震原野普与匡义入白太祖诸将已擐甲执兵直扣寝门曰诸将无主愿策大尉为天子太祖惊起披衣未及酬应则相与扶出听事或以黄袍加太祖身且罗拜下称万岁太祖固拒之众不可遂相与扶太祖上马拥逼南行匡义立于马前请以剽劫为戒太祖度不得免乃揽辔誓诸将曰汝等自贪富贵立我为天子能从我命则可不然我不能为若主也众皆下马曰唯命太祖曰少帝及太后我

皆北面事之公卿比肩之人也汝等无得辄加凌暴入城不得侵掠擅劫府库汝等用命有厚赏不然当族诛诸校皆禀命时上母南阳郡夫人杜氏在城中上忧之遣楚昭辅先入问起居时石守信严兵守左掖门昭辅至纳之昭辅见上母具陈士众拥戴之状琅琊夫人王氏侍侧有惧色上母言笑自若曰吾儿生时神异吾知其必享天命上整军自仁和门入秋毫无所犯先遣客省使大名潘美见执政谕意时宰相早朝未退闻变范质【见开运元年】下殿执王溥手【溥见干佑二年】曰仓卒遣将我辈之罪也爪入溥手则出血溥噤不能对太平节度使同平章事侍卫马步军副都指挥使在京巡检太原韩通【通见显德二年】自内庭皇遽奔归将率众备御散员都指挥使蜀人王彦升遇於路跃马逐之至其第第门不及掩遂杀之并其妻子诸将翼太祖登明德门太祖令军士解甲还营太祖亦归公署释黄袍俄而将士拥质等俱至太祖呜咽曰吾受世宗厚恩为六军所逼一旦至此惭负天地将若之何质不肯拜列校太原罗彦环挺剑而前曰我辈无主今日必得天子太祖叱之不退质等不知所为乃言古有受禅之礼今可行也因具陈之且曰太尉既以礼受禅事太后当如母养少主当如子勿负先帝旧恩上许诺质等降阶列拜【质言受禅礼通略载长编以为未入城时议已定今并录出】呼万岁奉上诣崇元殿行禅代礼召文武百官就列至晡班定周帝下制禅位宣徽使引太祖就龙墀北面拜受宰相扶太祖升殿易服东序还即位羣臣拜贺奉周帝为郑王太后为周太后迁居西京乙巳诏因所领节度使州名定国号曰宋改元大赦常赦所不原者咸赦除之内外马步军士等第优给命官分告天地社稷遣中使乘传赍诏谕天下节度使又别以诏赐焉辛亥石守信高懷德张令铎王审琦张光翰赵彦徽官爵阶勋并从超等酬翼戴之勋也乙未遣使往诸州赈贷丁巳天雄节度使守太尉兼中书令魏王宛丘符彦卿上表乞呼名诏不元彦卿宿将且前朝近亲皇弟匡义汝南郡夫人又彦卿女也上每优其礼遇云先是镇安节度使侍卫马步军都虞侯武安韩令坤领兵巡北边慕容延钊复帅前军至真定上既受禅遣使谕延钊与令坤各以便宜从事两人皆聽命己未加延钊殿前点检昭化节度使同平章事壬戌归德节度判官寧陵刘熙古为左谏议大夫枢密直学士宋亳为观察判官安次吕余庆为给事中端明殿学士摄观察推官太康沈义伦为户部郎中甲子以皇弟殿前都虞侯匡义领睦州防御使赐名光义尊帝母南阳郡夫人杜氏为皇太后同平章事范质加侍中右仆射王溥加司空枢密使太原吴廷祚同中书门下二品三月乙巳改天下郡县之犯御名庙讳者壬戌追尊祖考为帝高祖眇谥曰文献庙号僖祖陵曰□陵高祖妣崔氏谥曰文懿曾祖兼御史中丞珽谥曰惠元庙号顺祖陵曰□陵曾祖妣桑氏谥曰惠明皇祖涿州刺史敬谥曰简恭庙号翼祖陵曰定陵祖妣刘氏谥曰简穆皇考右厢都指挥使岳州防御使弘殷谥曰昭武庙号宣祖陵曰安陵陵名号谥皆翰林学士礼部侍郎兼太常寺事渔阳窦俨所撰定俨仪弟也有司言国家受周木德木生火当以火德王色尚赤腊用戌从之上既即位欲阴察羣情向背颇为微行或谏曰陛下新得天下人心未安今数轻出万一有不虞之变其可悔乎上笑曰帝王之



兴自有天命求之亦不可得拒之亦不能止周世宗见诸将方面大耳者皆杀之然我亦终日侍侧不能害我若应为天下主谁能圖之不应为天下主虽闭门深居何益既而微行愈数曰有天命者任自为之我不汝禁也由是中外慑服

### 太祖平泽潞李筠

李筠并州太原人也善骑射后唐秦王从荣判六军诸卫募勇士为爪牙筠操弓矢求见弓力及百斤府中无能挽者从荣令筠射引满有余力再发皆中遂隶麾下周祖朝为昭义军节度加检校太傅世宗即位加侍中恭帝即位加检校太尉建隆元年四月兼中书令筠在镇逾八年恃勇专恣招集亡命阴为跋扈之计周世宗每优容之及上即位遣使諭以受禅筠即欲拒命左右为陈历数乃僂俛下拜既延使者升阶置酒张乐遽索周祖画像置厅壁涕泣不已宾佐惶骇告使者曰令公被酒失其常性幸毋怪时北汉主知筠有异志潜以蜡书诱筠筠虽具奏而反谋已决筠长子守节涕泣切谏筠不听上手诏书慰抚因除守节为皇城使筠遣守节入朝且伺朝廷动静上即曰太子却何故来守节矍然以头击地曰陛下何言此必有谗人间臣父子也上曰吾亦闻汝数谏老贼不汝听不复顾借故遣尔来欲吾杀汝可盍归语而父我未为天子时任汝自为之我既为天子汝独不能小让我耶守节驰归且以告筠反谋愈急癸未执监军亳州防御使周光逊闲廐使李廷玉遣其教练使刘继冲判官孙孚送於北汉纳款求援光逊德威子廷玉嗣昭之孙皆有旧北汉主俱释之厚赐遣还第筠又遣众杀泽州刺史张福据其城从事间丘仲卿说筠曰公以孤军举事其势甚危虽倚河东之援恐亦不得其力大梁兵甲精锐难与争锋不如西下太行直抵怀孟塞虎牢据洛邑东向而争天下计之上也筠曰吾周朝宿将与世宗义同昆弟禁卫皆吾旧人必将倒戈归我况有儋珪枪拨汗马何忧天下哉儋珪筠爱将有勇力善用枪拨汗马筠骏马也丙戌昭义反书至枢密吴廷祚言於上曰潞城岳险且阻太行彼若固守未可以岁月破然李筠素骄易无谋宜速兵击之彼必恃勇出鬪但离窠穴即成擒矣上纳其言戊子遣侍卫副都指挥使石守信殿前副都点检高懷德帅前军进讨上敕守信等曰勿纵筠下太行急引兵扼其隘破之必矣丙申上召三司使清河张美调兵食美言懷州刺史马令琮度李筠必反日夜储峙以待王师上亟令授令琮团练使宰相范质曰大军北伐方藉令琮供亿不可移他郡戊戌升懷州为团练使以令琮先充使五月庚子命宣徽南院使高唐咎居润赴澶州巡检殿前都点检镇寧节度使慕容延钊彰德军留后太原王全斌率兵由东路与石守信高懷德会北汉主遣内园使李弼以诏书金帛善马赐李筠筠复遣刘继冲诣晋阳请北汉主举军南下已为前导北汉主将谋於契丹继冲道筠意请无用契丹兵北汉主从之即日大阅倾国自将出团柏谷羣臣餞之汾水左仆射赵华曰李筠举事轻易事必无成陛下扫境内而赴之臣未见其可也北汉主瞋目谓华曰朕志已决卿安能知其必无成耶卿有长策固当何如华未及对北汉主拂衣上马行至太平驿筠身率官属耆老迎谒北汉主命筠赞拜不名坐于宰相卫融之上封西平王赐马三百疋及服玩珍异甚众筠所献亦畧与所

赐等及文武大臣皆有赂筠见北汉主仪卫寡弱不似王者内甚悔之北汉主数召筠筠自言受周氏恩不忍负之而北汉主与周世仇也闻筠言亦不悦筠将还别赐马及甲铠具装遣宣徽使卢赞监其军筠心益不平筠有马三千匹日夕教阅欲直趋大梁赞尝见筠计事不应顾左右曰大梁兵皆我昔时部曲也见我则降耳赞怒拂衣而起北汉主闻赞与筠有隙遣卫融军中和解之筠留其长子守节守上党自率众三万南出癸卯石守信破李筠众於长平斩首三千余级又以兵攻拔其大会寨甲辰诏削夺李筠官爵丁巳诏亲征以枢密使吴廷祚为东京留守端明殿学士知开封府吕余庆副之皇弟殿前都虞侯光义为大内都点检侍卫马步军都指挥韩令坤率兵屯河阳己未帝发大梁壬戌次荥阳召西京留守河内向拱与语拱劝上济河踰太行乘贼未集而击之稽留浹旬则其锋益炽矣枢密直学士赵普亦言贼意国家新造未能出征若倍道兼行掩其不备可一战而克上纳其言甲子次河阳丙寅次怀州丁卯前军都部署石守信副都部署高怀德破贼军三万余众於泽州南获北汉河阳节度使范守圖杀卢赞筠遁入泽州婴城自固六月己巳朔上至泽州督诸军攻城初吐浑府都留后汾州团练使王全德帅所部从李筠战泽州南既败走入潞与筠子守节为拒守计及上围泽州全德大惧与亲信数十人犯關来奔龙捷指挥王廷鲁亦自潞州相继出降贼势转蹙矣泽州城踰月不下召控鹤左厢都指挥使马全义赐食御坐问以计策全义请并力急攻且曰缓之恐复生变上即命诸军奋擊全义率敢死士先登飞矢贯臂流血被体全义拔镞进战士气益奋上亲帅卫兵继之辛巳克其城李筠赴火死获北汉宰相卫融命掩尸骼禁剽掠放泽州民今年田租乙酉进攻潞州丁酉筠子守节以城降上赦其罪升单州为团练用守节为使是日车驾入潞州宴从臣于行宫辛卯德音降死罪囚流以下原之潞州城近三十里内勿取今年田租北汉主闻筠败自太平驿遁还晋阳谓赵华曰李筠无状卒如卿言吾幸全师以归但恨失卫融卢赞尔由是重文学之士久之华请老使食其赋终身丁酉上发潞州秋七月戊申至京师戊子宴韩令坤於礼仪讲武殿赐袭衣器币勒马有差赏平泽潞之功也

### 太祖亲征淮南【李重进】

建隆元年九月上巳平泽潞淮南节度使兼中书令沧州人李重进周太祖之甥也始与上俱事世宗分掌内外兵权而重进以上英武出己右尝心惮之恭帝嗣位重进出镇扬州领宿卫如故上即位以韩令坤代重进为马军都指挥使上欲与相见谓翰林学士李□草诏云君为元首臣作股肱君臣之分方契永圖修好诏下愈不自安乃招集亡命会李筠举兵泽潞重进遣其亲吏翟守珣往潞阴结李筠守珣素识上往还京师潜诣枢密承旨李处耘求见上召问曰我欲赐重进铁券彼信我乎守珣曰重进终无归志矣上厚赐守珣许以爵位且令说重进稍缓其谋无令二凶并作分我兵势守珣归劝重进养威持重重进信之上将经畧淮南戊申徙重进为平卢节度使重进心增疑惧庚戌又遣六宅使陈思海赍铁券往赐以慰安之思海至淮南重进即欲治装随思海入朝左右

沮之重进犹豫不决又自以前朝近臣恐不得全乃拘留思诲益治反具遣使求援于唐唐主不敢纳扬州都监左屯卫将军安友规知重进必反踰城来奔重进诸将皆不附己乃囚军校数十人军校曰吾辈为周室屯戍公苟奉周室何不使吾辈效命重进不听悉杀之己未重进反书闻上命马步军副都指挥使归德节度使石守信为扬州行营都部署兼知扬州行府事殿前都指挥使义成节度使王审琦为副都宣徽北院使李处耘为都监保信节度使宋延渥为都排陈使帅禁兵讨之上谓左右曰朕于周室近臣无所猜间重进不体朕心自怀反侧今六师在野朕当自抚慰之癸卯诏削夺李重进官爵冬十月乙酉上问枢密副使赵普以扬州事宜普曰李重进守薛公之下策昧武侯之远图恃恃长淮缮修孤垒无诸葛诞之恩信士卒离心有袁本初之强梁计谋不用外絶救援内乏赀粮急攻亦取缓攻亦取兵法尚速不如速取之上纳其言丁亥下诏亲征十一月戊戌次宿州甲辰次泗州上命诸将鼓行而前丁未至大义驿石守信遣使驰奏扬州即破请上亟临视是夕次其城下实时攻拔之李重进尽室赴火死陈思诲亦为其党所害上购得翟守珣补殿直俄迁供奉官而重进性鄙吝未尝有觞酒豆肉及其士卒下多怨者己酉赈给扬州城中民【上与赵普见太祖圣政门】庚戌诏重进家属听自首

### 太祖征荆南【高继冲】

建隆元年八月荆南节度使贞懿王高保融寝疾以弟行军司马保勗总判内外融迂缓御军治民皆无法度母弟保勗体瘠而口吃文献王甚爱之虽盛怒见之必释然而笑荆南人谓之万事休郎君二年九月甲子以荆南行军司马寧江节度使保勗为荆南节度使上初闻保融之丧遣兵部尚书李涛往吊及还上问保勗堪其事否对以为可任而保勗贡奉亦数至及受节钺保勗性淫恣日召市娼集府署择士卒之壮健者使相媾狎勗与姬妾帷帘共观笑之又好营造台榭极土木之功军民咸怨记室孙光宪谏曰宋有天下四方诸侯莫不屈服凡下诏书皆合仁义此汤武之君也公宜克勤克俭勿替勿僭上以奉朝廷中以嗣祖宗下以安百姓若纵佚乐非福也保勗不从三年十一月保勗寝疾召内牙都指挥使长安梁延嗣谓曰我疾遂不起兄弟孰可付之后事者延嗣曰公不念贞懿王乎先王舍其子继冲以军府付公今继冲长矣保勗曰子言是也即以继冲权判内外军马事甲戌保勗卒干德元年正月庚申以山东道节度使兼侍中慕容延钊为都部署枢密李处耘为都监发诸郡兵会襄阳讨张文表先是卢怀忠使荆南上谓曰江陵人情去就山川向背我尽欲知之怀忠使还报曰高继冲甲兵虽整而控弦不过三万年穀虽登而民困于暴敛南通长沙东距建康西迫巴蜀北奉朝廷观其形势盖日不暇给取之易耳於是上召宰相范质等谓曰江陵四分五裂之国今假道出师因而下之蔑不济矣壬戌李处耘辞上遂以成筭授之庚辰以荆南节度副使权知军府事高继冲为荆南节度使二月上闻高继冲托以供亿王师贷民钱帛下诏止之继冲自以年幼未知民事政刑赋役委节度使判官孙光宪军旅调度委衙内指挥使梁延嗣曰事事得中无人间言吾何忧也李处耘至襄州时慕容延钊被酒诏令肩輿即戎事先遣合门使丁



德裕喻继冲以假道之意请具给薪水继冲与其僚佐谋以民庶恐惧为辞愿供刍饩百里外处耘又遣德裕往光宪及延嗣请许之兵马副使李景威说继冲曰今王师虽假道以收湖湘然观其事势恐因而袭我景威愿効犬马之力假兵三千於荆门中道险隘处设伏候其夜行发伏攻其上将王师必自退却回军取张文表以献於朝廷则公之功业大矣不然且有摇尾求食之祸继冲曰吾家累岁奉朝廷命此事尔无过虑况尔又非慕容延钊曰旧传江陵诸处有九十九州岛自武信王之初江心深浪之口昨此州已自不存并可忧汝峡江一民尔安能识成败混一天下之志圣宋受命伐文表如以山压卵尔湖湘何能为惟早以疆土归朝廷去荆楚可免祸而公亦不失富贵继冲不能行出而叹曰大事去矣何用生为继冲遣延嗣与其叔父掌书记保寅奉牛酒来犒师且觐师之所为壬戌师次荆门处耘见延嗣等待之有加礼谕令翌日先还延嗣喜驰使报继冲以无虞荆门距江陵百余里是夕延钊召延嗣等宴饮於其帐处耘将轻骑数千倍道前进继冲初但俟保寅延嗣之还遽闻大军奄至即皇恐出迎遇处耘於江陵北十五里处耘揖继冲令延钊率亲兵先入登北门比继冲与延钊俱还则王师已分据冲要布列街巷矣继冲大惧即诣延钊纳牌印遣客将王昭济等奉表以三州十七县十四万二千三百户来归庚子荆南表至上复命继冲为节度使遣枢密承旨王仁贍赴荆南巡检辛亥以梁延嗣为复州防御使孙光宪为黄州刺史王昭济为左领军卫将上闻李景威之谋曰忠臣也命王仁贍厚恤其家十二月甲子赦荆南进羣臣阶勋爵有差己未以荆南节度使高继冲为武寧节度使先是继冲上表乞陪祀许之因举族归朝乃命易镇继冲镇彭门几十年委政僚佐部内亦治年三十一卒高氏据有荆南归峡之地传袭三世五帅凡四十年

### 太祖平湖南【周保权】

周保权汝南郡王行逢之子尽心为治凡辟官属必取廉洁教民亲贤馆礼名士然性多猜忌左右少有忤意者必置於法有学士徐仲雅者性滑稽时行逢多补蛮酋为司空太保一日谓仲雅曰吾奄有湖湘兵强俗阜四邻其惧我乎仲雅曰公部内司空满天太保徧地孰敢不惧行逢不悦斥之建隆元年上登极加行逢兼中书令三年病革召其将吏以子保权属之曰吾起陇畝为团兵同时十人皆诛张文表【郎州人】独存常怏怏不得行军司马吾死文表必叛当以杨师璠讨之如不能则婴城勿战自归朝廷可也师璠与行逢乡里姻戚事行逢为亲军指挥使数有功行逢委信之行逢卒保权领留务冬十月张文表闻周保权立怒曰我与行逢俱起微贱立功名今日安能北面事小几乎会保权遣兵更戍永州路出衡阳文表遂驱以叛伪縞素若将奔丧武陵者过潭州时行军司马廖简知留后素轻文表不为之备方宴饮外白文表兵至简殊不介意谓四坐曰文表至则成擒何足虑也俄而文表率众径入府中简醉不能执弓矢但箕踞大骂与坐客十余人皆遇害文表取其印绶自称权留后事具表以闻保权即命杨师璠悉众御文表告以先人之言感激涕泣师璠亦泣顾谓其众曰汝见郎君乎年未成人而贤若此军

士奋然皆思自効保权又遣使求援於荆南文表以上疏自理二月丁亥以武平节度副使权知郎州周保权为武平节度使甲辰遣中使赵璠等赍诏宣谕潭郎听张文表归阙且命荆南发兵助周保权【会兵讨文表见平荆南门】 干德元年癸亥命太常卿边光范权知襄州户部判官滕白为南面军前水陆转运使丙寅以张勋为南面行营马军都监卢怀忠为马步军都监丙子诏荆南发水兵三千人赴潭州杨师璠之讨张文表也兵稍失利相持既久文表出战师璠大败之遂取潭州执文表初文表闻王师来伐潜送款于赵璠且言奔丧朗州为廖简所薄因即私鬪实无反心璠自以奉诏谕文表得其归顺甚喜即遣使慰抚之师璠既入城纵火大掠而璠亦继至明日享将吏於延昭门指挥高超语其众曰观中使之意必活文表若文表至阙圖害郎州我辈无遗类矣乃斩文表於市尽腐其肉及宴罢璠召文表超曰文表复谋为乱已斩之矣璠太息久之二月王师既收荆南即日趋郎州周保权惧召观察判官曰凡所以请援於朝者诛文表耳王师不还必将尽取湖湘之地李观象谓保权曰我所恃者北有荆渚以为唇齿今高氏束手若幅巾归朝幸不失富贵从富等不可乃与为拒守先路安抚德裕至郎州从富等拒而不纳尽撤部内桥梁沉船舫伐木塞路德裕不敢与战延钊以闻上遣使谕周保权及将校曰尔请大军以拯尔难今妖孽既殄是有大造於尔也何为反拒王师自取涂炭重扰生聚保权为左右牵制执迷不复遂进讨之慕容延钊遣战棹都监武怀节分兵趋岳州大破贼军於三江口获船七百余艘斩首四千余级遂取岳州三月张从富等出军於澧州南与王师遇未及交锋贼军望风而溃李处耘遂北至敖山寨贼弃寨走俘获甚众处耘择所俘体肥者数十人令左右分食之少健者悉黥其面令先入朗州会宿於寨中迨次日黎明延钊继至所黥之俘得入城悉言被擒者为王师所啖食贼众大惧纵火焚州城驱掠居民奔窜山谷壬戌王师入朗州擒张从富於西山下梟其首贼将汪端劫保权并家属亡匿江南岸僧舍李处耘遣麾下将田守奇往捕之端弃保权走守奇获保权以归於是尽复湖南旧地凡得州十四监一县六十六户九万七千三百八十八戊寅湖南捷书至羣臣称贺夏四月甲申德音减荆南潭朗州地死罪囚流以下释之蠲三年以前逋税及场院课利管内文武官吏并依旧仍加恩立功者优其秩壬辰遣中使赐湖南行营将士茶药及立功将士钱帛有差七月甲戌保权诣阙待罪诏释之以为右千牛卫上将军

### 太祖平蜀【孟昶】

孟昶初名仁贇及僭位改焉是时石晋之后汉祖起并州中原旱蝗昶益自大君臣奢僭 建隆三年冬蜀主命官磨勘州县逋税别行追督龙遵令成都田淳上疏谏其畧曰今甲子欲交阴阳变动天运人事合有变更如采厚敛之末议必乱经国之大伦此犯天意者一也四海财货尽属至尊散在民间积为赘产或有科索谁敢抵非陛下何不舍小蓄以成大有乎蜀主不能用闻者皆为之恐淳议论自若或谓淳曰如君之才固堪重寄宜稍低回便至金銮玉堂淳曰吾安能附狗鼠哉盖指枢密使王昭远也 干德元年



四月庚子以华州团练使张晖为凤州团练使兼西面行营巡检壕寨使晖前在华州治有善状上既诛李筠将有事河东召晖入覲问以计策晖曰泽潞疮痍未瘳军旅游兴恐不堪命不若戢兵育民俟富庶而后圖之上慰劳遣还於是始谋伐蜀徙晖凤州晖尽得其山川险易因密疏进取之策上览之大悦五月丁丑明德门口蜀相李昊言於蜀主曰臣观宋氏启运不类汉周一统海内其在此乎若通职贡亦保安三蜀乏长策也主将发使枢密使□塘等率兵屯峡江马军都指挥使张廷翰等引兵与守谦战猪头铺守谦败走廷翰等乘胜登其城廷让率大军继至彦俦以所部将出拒战而廷翰等已入其中矣彦俦仓皇失次左右皆散去彦俦奔归府第判官罗济劝令单骑归成都彦俦曰我昔已失秦川今复不能守夔州纵不忍杀我亦何面目可见蜀人乎济又劝其降彦俦曰老幼百口俱在成都以一身偷生举族何负今日止有死耳即解符印授济曰君自为计乃反拒其户整衣冠望西北再拜登楼纵火自焚后数日光义等得骨於煨烬中以礼葬之王全斌以蜀人断栈大军不得进议取罗川路入蜀康延泽潜谓崔彦进曰罗川路险众难并济不如分兵修栈约会大军于深渡可也彦进遣白全斌全斌许之不数日阁道成遂进擊金山寨又破小漫天寨而全斌亦以大军由罗川至深渡与彦进会蜀人依江而阵彦进遣步军都指挥使张万友等擊之夺其桥会暮夜蜀人退保大漫天寨明日彦进延泽万友分兵三道击之蜀人悉其精锐来拒又大破之乘胜拔其寨擒寨主王州刺史王审超监军赵崇渥及三泉监军刘延祚都统王昭遠都监赵崇韬引兵来战三败退奔至利州北昭遠等遁去渡桔柏津焚桥梁退保剑门壬申晦全斌等入利州获军粮八十万斛诏西军行营所克复州县伪署将士有窜匿皆限一月於所在陈首释其罪是月京师大雪上设毡帷於讲武殿衣紫貂裘帽以视事忽谓左右曰我被服若此体尚觉寒念西征将士冲犯霜雪何以堪处即解裘帽遣中黄门驰赐全斌仍諭诸将以不徧及也全斌拜赐感德初上诏令孙遇等指画江山曲折之状及兵寨戍守之处道里遠近俾画工圖之以授全斌等因谓曰西川可取否全斌等对曰臣等仗天威遵庙算克日可定也龙捷右厢都指挥使史延德前进奏曰西川若在天上固不可到在地上到即平矣上嘉其果敢慰勉之又谓全斌等曰凡克城寨止籍其器甲刍粮悉以钱帛分给将士吾所欲得者其土地耳蜀主闻有北师以王昭遠为北面行营都统左右卫圣马步军都指挥使赵崇韬为都监山南节度使韩保正为招讨使洋州节度使李进为副招讨使帅兵拒战蜀主谓昭遠曰今日之师卿所召也勉为朕立功昭遠好读兵书颇以方畧自任始发成都蜀主命宰相李昊等饯之城外昭遠手执铁如意指挥军事自比诸葛亮酒酣攘臂谓昊曰吾此行非止克敌当领此二三万雕面恶少儿取中原如反掌耳冬十二月刘光仪入峡路连破松木三会巫山等寨杀其将南光海等死者五千余人擒战棹都指挥使袁德宏等千二百人夺战舰二百余艘又斩获水军千余众初蜀于夔州鑿江为浮梁上设敌棚三重夹江列礮具光仪等将行上出池圖指其处谓曰泝江至此切勿以舟师争胜当先遣步骑潜擊之俟其稍却乃以战棹夹攻必取也光仪等未至鑿江三十里舍舟步

进先夺其桥复引舟而上遂破州城悉如上计时大将刘廷让顿兵白帝庙西及师至彦俦谓副使赵崇济监军武守谦曰东军远涉而来利在速战宜坚壁以待之守谦曰何待也独领麾下以出口口崇韬败乃免胄弃甲投东川匿仓舍下悲嗟流涕目尽肿惟诵罗隐诗云运去英雄不自由俄亦为追骑所获蜀主大惧出金帛募兵令其子玄喆统之李廷珪张惠安为其副以守剑门玄喆素不习武廷珪惠安皆庸懦无识玄喆离成都但携姬妾乐器及伶人数十辈晨夜嬉游不恤军政至绵州闻剑门已破即日弃军西还所过尽焚其庐舍仓廩而去太子玄喆亦奔还昶益惶骇不知计将安出有老将石奉頽者对曰东兵远来势不能久请聚兵坚守以疲之蜀主叹曰吾父子以丰衣美食养士四十年一旦遇敌不能为吾东向放一箭今虽欲闭壁谁肯效死者司空兼武信节度平章事李昊劝蜀主封府库以请降蜀主闻之命昊草表已笄遣通奏使宣徽北院使太原伊审征奉降表诣军前初前蜀之亡也降表亦昊所为蜀人夜书其门曰世修降表李家当时传以为笑庚辰诏行营所经州府长吏以牛酒犒师乙酉王全斌等次魏城伊审征以蜀主降表至全斌受之遣先锋都监通事舍人田钦祚乘驷入奏又遣康延泽领百骑趋成都见蜀主谕以恩信慰抚军民留三日乃还初刘光仪等发夔万施开忠等州刺史皆迎降及遂州知州事少府少监陈愈亦降光仪入城尽以府库钱帛给军士诸将所过咸屠戮以逞曹彬禁之乃止故峡路兵始终秋毫不犯上闻之喜曰吾任得其人矣赐彬诏褒之辛卯王全斌等至升仙桥蜀主备亡国之礼见於军门全斌承制释之蜀主复遣其弟保宁节度使雅王仁贇奉表求哀丙申田钦祚至自西川孟昶降表以其先人坟墓及老母为请上优诏答之并谕西川将吏百姓等皆安堵如故丁酉赦蜀管内蠲干德二年逋租赐今年夏税之半凡无名科役及增益赋调令诸州条析以闻当除之伪文武官将校奉昶来降者并委全斌奏其名亡命羣盗一月内许陈首有怀才挺操耻事伪庭者所在搜访先贤丘陇并禁樵采前代祠庙咸加营葺自全斌等发京师至昶降才六十六日凡得州四十五县一百九十八户五十三万四千三十有九全斌等既入成都后数日刘光仪始至昶馈遗光仪等及犒师之礼并如初已而诏书颁赏诸军亦无差降两路将士争功始相疾矣先是全斌受诏每制置必与诸将议因是各为异同虽小事不能即决全斌及崔彦进王仁贇等日夜宴饮不恤军士下掠子女夺财货蜀人苦之曹彬屡请旋师全斌等不听全斌遣右神武大将军王继涛与供奉官王守讷部送孟昶归京师继守讷以白全斌言继涛问昶求宫伎金帛乃留继涛不遣以吕余庆权知都府枢密直丙午诏以西师所过民有调发遣戍皆襄荆南均房等州今年夏租免光化汉阳军十之二居坊郭者勿输伪蜀官并遣赴阙赐装钱有差治行清白为众推者所在州府以名闻庚申孟仁贇至自成都孟昶亦上表有自量过咎尚窃忧疑等语诏答之其畧曰既自求於多福当尽涤於前非朕不食言尔无过虑所答诏仍不名又呼昶母为国母诏自嘉眉忠万至荆南沿江分置驿船以济行李三月孟昶与其官属皆挈族归朝由峡江而下夏四月上遣使以御府供帐迓孟昶於江陵且命有司为昶官属治第又遣使至江陵分给军马鞍

乘乙酉昶至进郊皇弟开封尹光义劳之玉津园丙戌大陈诸军於阙前昶与弟仁贇子玄喆玄班宰相李昊等三十三人素服待罪明德门外诏释罪赐昶等袭衣冠带上御崇元殿备礼见之礼毕御明德门观诸军按部还营遂宴昶等於大明殿赐物有差六月甲辰以孟昶为开府仪同三司检校太师兼中书令秦国公庚戌孟昶卒上为辍五日朝赠尚书令追封楚王谥恭孝初昶母李氏随昶至京师上数命肩輿入宫谓之曰国母善自爱无戚戚怀乡土异日当送母归李氏曰使妾安往上曰归蜀耳李氏曰妾家太原傥获归老并州妾之愿也时上已有北征意闻其言喜曰俟平刘钧即如母所愿因厚加赐赉及昶卒李氏不哭举酒酹地曰汝不能死社稷贪生至今日吾所以忍死为汝在耳今汝既死吾安用生因不食数日亦卒始周世宗克關南议讨而未果至太祖平之昶父子据有全蜀三十一年至是国除

### 太祖平广南【刘鋹】

刘鋹其先蔡州上蔡人晟之长子也性昏愚委政宦官龚澄枢及才人卢琼仙每详决可否皆琼仙指之鋹日与宦人波斯女等遊戲内宫晟时宠任中官已至千人至鋹时为三师三公者数十人女官已有师傅令仆之号日百官为门外人淫刑暴斂建隆元年内侍邵廷珣言于鋹曰汉乘唐乱居此五十年幸中国有故干戈不及而汉益骄于无事今兵不识旗鼓人主不知存亡夫天下乱久矣乱久而治自然之势也今闻真主已出其势非一天下不能已劝鋹修兵为备不然遣使通好鋹懵然莫以为虑干德初王师既克郴州获其内侍十余人有余延业者人质么么上问曰尔在岭南为何官对曰为护驾弓箭手官授以弓矢延业极力控弦不开上因笑问汉南政事延业具言累世奢侈残酷之状上惊骇曰吾当救此一方之民於是道州刺史王继勋言刘鋹为政昏暴民被其毒又数出寇边请王师南伐上犹未欲亟加以兵乃命唐主谕意令南汉主先以湖南旧地来献唐主遣使致书南汉主不从三年八月唐主复令知制诰潘佑作书数千言谕南汉主以归欵於中国遣给事中龚慎仪往使南汉主得书大怒遂囚龚慎仪驿书答唐主言甚不逊唐主以其书来上始决意伐之九月己亥朔以潭州防御使潘美为贺州道行营兵马都部署朗州团练使尹崇珂副之道州刺史王继勋为行营马军都监仍遣使发诸州兵赴贺州城下先是南汉旧将多以谗死宗室剪灭殆尽掌兵者惟宦人数辈城壁壕隍但饰为宫馆池沼楼舰器甲輒腐败不治及王师次於白霞刘鋹贺州刺史陈守忠遣使告急内外震恐南汉主遣龚澄枢驰驿往贺州宣慰时士卒久在边多贫乏闻澄枢至以为必大加赏赉皆喜而澄枢出空诏抚谕众皆解体王师拔冯乘前锋至芳林澄枢惶惧乘轻舸遁归是月癸丑王师遂围贺州南汉主召大臣议皆请以潘崇彻将兵拒王师崇彻自罢兵柄常怏怏於是辞以目疾汉主怒曰何须崇彻伍彦柔独无方略耶遂使彦柔将兵来援戊午王师闻彦柔至退二十里潜以奇兵伏南乡岸彦柔夜泊南乡舡舟岸侧迟明挟弹登岸踞胡床指挥伏兵超彦柔众大乱死者十七人擒彦柔斩之梟其首以示城中城中人犹坚守弗下随军转运使王明言於潘美曰当急擊之恐援兵再至



则为所乘我师老矣众颇犹豫明乃躬擐甲胄率所部护送輜重卒百余人丁夫数千畚鍤皆作堙其堑直抵城门城中人大惧遂开门以纳王师王师督战舰声言顺流趋广州南汉主忧迫计无所出乃加潘崇彻为内太师马步军都统领众三万屯贺江会王师径趋韶州崇彻但拥众自保而已冬十月辛巳曲赦贺州管内囚王师破南汉开建寨杀数千人擒其将靳晖昭州刺史田行稠弃城遁桂州刺史李承进亦奔还遂取韶州桂州十一月王师克连州南汉招讨使卢收率其众退保清遠南汉主闻之谓左右曰昭桂连贺本属湖南今北师取之足矣其不复南也十二月美等长驱至韶州都统李承渥领兵数万阵莲叶山下南汉人教象为阵每象载十数人皆执兵仗凡战必置阵前以壮军威至是与美遇美尽索军中劲旅布前以射之象奔蹠乘象者皆坠反践承渥军遂大败承渥仅以身免陷韶州擒其刺史辛延渥渥遣使劝南汉主降国中震恐汉主顾诸将无可使者宫倡梁鸾真荐其招讨使与大将植廷晓统众御王师距番禺纒百余里 四年正月王师克英雄二州南汉都统潘崇彻来降是月王师次陇头南汉主遣使请和且求缓师陇头山水险恶潘美等疑有伏兵乃挟其使而速度诸险甲子至栅口乙丑至马径屯双女山直瞰郭崇岳营遊骑数十挑战崇岳不出但坚壁自守昼夜祷祠鬼神而已南汉主取船十余艘载金寶妃嫔欲入海未及发宦官乐范与卫兵千余盗其船以走南汉主惧乃遣右仆射萧灌等中书舍人卓惟休奉表诣军门乞降潘美即令部送赴阙灌等俱入不反汉主益惧复令崇岳戒严二月又遣其弟保兴率兵来拒植廷晓谓崇岳曰北师乘席卷之势锋不可当吾士旅虽众然伤残之余不驱策而前坐受其弊矣庚子廷晓乃领前锋据水而阵令崇岳殿后御其奔冲既而王师济水廷晓力战不胜遂死之崇岳奔还其栅潘美谓明曰彼编竹为栅若篝火焚之必扰乱因其扰乱夹击之此万全策也遂分遣丁夫人持二炬间道造其栅会暮夜万炬俱发天大风烟埃坌起南汉军大败崇岳死于乱兵保兴逃归龚澄枢李托与内侍中薛崇誉等谋曰北军之来利吾国中珍寶今尽焚之使得空城必不能久驻当自还也乃纵火焚府库宫殿一夕皆尽辛未王师至白田汉主素服出降潘美承制释之遂入广州俘其宗室官属九十七人与南汉主皆縻於龙德宫保兴初匿民间后乃获之有阉工五百余辈请见美曰是■〈才豕〉人多矣吾奉诏伐罪正为此等命悉斩之美以露布告捷乙丑至京师庚寅羣臣称贺遂赐宴凡得州六十县二百四十户十七万二百六十三辛卯赦广南管内州县常赦所不原者伪置官并仍旧无名科敛咸蠲除之三月诏岭南诸州长吏察伪政有害於民者以闻当悉除之四月壬申以南面行营都部署潘美副部署尹崇珂同知广州潘美遣使部送刘鋹及其宗党官属献於京师鋹至公安邸吏龐师进迎谒学士黄德昭侍鋹因问师进何人德昭曰本国人也鋹曰何为在此德昭曰高皇帝居藩日岁贡大朝輜重皆歷荊州乃令师进置邸於此造车乘以给馈运耳鋹叹曰我在位十四年未尝闻此言今日始知祖宗山河乃大朝境土也因泣下久之既至舍於玉津园上遣叅知政事劾问翻覆及焚府库之罪鋹归罪於龚澄枢李托薛崇誉上复遣使问为谁之谋皆俛首不对谏议王珪谓托曰昔

在广州机务并尔辈所專火又自内中起今天子遣使案问尔复欲推过何人遂唾而批其颊澄枢等乃引服翊日有司以帛系銀及其官属先献太庙太社上御明德门遣摄刑部尚书卢多逊宣诏责銀銀对曰臣年十六僭伪号澄枢等先臣旧人每事臣不得專在国时臣却是臣下澄枢等却是国主遂伏地待罪上命摄大理卿高继申引澄枢托崇誉斩於千秋门外释銀罪并其官属祜王保兴等各赐鞍马有差寻以保兴为左监门卫率府率以左仆射萧灌为太子中允中书舍人卓惟休为大仆寺丞余并署诸州上佐县令主簿擢授王明为秘书少监领韶州刺史广南诸州转运使王师南征明知转运事数万众仰给无阙每下郡邑颇亦参预军画上嘉其功故擢用焉辛丑宴銀於崇德殿六月壬午以銀为右千牛卫大将军外封恩赦侯俸外别给钱伍万米麦五十斛銀体质丰硕眉目俱疎有口辨性絶巧在国时多置酖以毒臣下一日上乘肩輿从十数骑幸讲武池从官未集銀先至诏赐卮酒銀欵之奉杯泣曰臣承父祖基业拒违朝廷劳王师致讨罪固当死陛下不杀臣今见太平为大梁布衣足矣愿延旦夕之命以全陛下生成之恩臣未敢饮此酒上笑曰朕推心置人腹安有此事命取銀酒自饮之别酌以赐銀銀大惭顿首谢十月丙戌诏岭南诸州刘銀日前烦苛赋敛并除之民为兵者释其籍流亡者招诱复业 五年四月上按岭南图籍州县多而户口少命知广州潘美转运王明度其地里并省以便民五月丙寅诏废岭南道媚川都选其少壮者为静江军老幼者听自便仍禁民不得以采珠为业先是銀於海门镇募兵能采珠者二千人号媚川都凡采珠者必以石绳索系於足而没焉深或五百丈溺死者甚众銀所居栋宇皆饰以玳瑁珠翠穷极奢靡及王师至并府库悉皆焚之於是潘美等於煨烬中得所余玳瑁珍珠来献且言采珠危苦之状上降诏罢之 八年十二月己未以銀为左监门卫上将军封彭城郡公去恩赦侯之号 九年十一月封银为卫国公太宗即位常俸外加以他给会将讨晋阳召近臣宴刘銀预会自言朝廷威灵及遠四方僭伪之主今日尽在坐中旦夕平太原刘继元又至臣率先来朝愿得执挺为诸国降王长太宗大笑赏赐甚厚其诙谐皆此类也銀子守节守正皆至崇仪使幼守平守素咸平中为侍禁甚贫乏真宗闻之赐白金千两因语宰相曰诸伪主子孙率多窘迫僭侈之后不知稼穡艰难之所致也銀卒上闻其家贫其妻陈氏诏日以（阙）

### 太祖平江南【李景】

李景父升为杨行密将徐温养子冒姓徐氏及升僭号自云唐室后复姓李国号唐世宗征淮南屡破其众景惧称臣 建隆元年上受命遣使谕之十一月上亲征景遣仆射严续来犒师复遣其子从镒尚书冯延鲁来贡金买宴上厉色谓延鲁曰汝国王何故与叛臣交通延鲁曰陛下知交通不知预其反谋时使者至国主令臣谕曰男儿不得志固有反但有不可尔上曰虽然诸将皆劝吾乘胜济江如何延鲁曰陛下御六师以临小国蕞尔江南安敢抗天威然国主侍卫数万皆先帝亲兵誓同生死陛下若能弃数万之众与之血战则可矣且大江风涛苟进未克城退乏粮道亦大国之忧也上笑曰聊试卿

尔岂听卿遊说耶上使诸军习战舰於迎銮唐主惧甚其小臣杜着颇有辞辩伪作商人由建安渡来归而彭泽令薛良坐事责授池州文学亦挺身来奔且献平南策唐主闻之益惧上命斩着於下蜀市良配隶庐州牙校唐主乃少安终以国境蹙弱遂决迁都之计二年二月丁丑唐主景遣使来贺长春节已知遣通事舍人王守正使江南劳唐主之迁都也是月唐主始迁於南都立吴王从嘉为太子监国留左仆射严续知枢密院事汤悦佐之悦即殷崇义池州人也始犯宣祖韩改焉三月唐主至南都城邑迫隘官府公廨十不容一二力役虽繁无所施巧羣臣日夜思归唐主悔怒欲诛始谋者枢密使给事中唐镐发病卒闰三月壬申唐主遣使贡金器二千两银器万两罗绮二千段谢生辰之赐也六月唐主景殂於南都秋七月以丧归金陵有司议梓宫不宜复大内太子从嘉不可乃殡於正寝从嘉即位改名煜尊母鍾氏为太后立妃周氏为国后封弟邓王从善为韩王莒公从镒为邓王从度为昭平郡公从信为文阳郡公右仆射严续为司空平章事吏部尚书门下侍郎知枢密院汤悦为右仆射枢密使大赦境内文武进位有差七月复句容尉张泌上书陈十事其一举简要二畧繁小三明赏罚四重名器五择贤良六均赋役七纳諫诤八究毁誉九节用十屈己唐主嘉纳擢为监察御史八月甲辰唐桂阳郡公徐邈奉其主景遗表来上九月壬戌唐主煜遣中书侍郎冯谧来贡谧即延鲁也唐主手表自陈本志冲淡不得已而绍袭事大国不敢有二邻於吴越恐为所讒上优诏以答焉初周世宗既取江北贻书江南如唐与回鹘可汗之式但呼国主而已上因之於是始改书称诏戊子遣鞍辔库使梁义吊祭王召见面赐约束因谓左右曰朕今谕以谨飭盖闻鲜克由礼遼人无所观型又曰齐之以刑岂若令其自飭冬十月癸巳唐主以皇太后葬遣户部侍郎韩熙载太府卿田霖来助葬江南以康王新立往申庆赐口善为司徒兼侍中诸道兵马口南都留守令诸司无职事者日二员待制於内殿仍各上封事三两条时皆喜其言得达多所开陈而迄莫施众始告病唐主煜追谥其父景为明道崇德文宣孝皇帝庙号元宗陵号顺陵盖因冯谧以请於上而为之二年四月乙未诏奉使江南者毋得将其国所用钱过江北唐主虽通职贡然亦增修战备开寶四年十一月癸巳朔江南国主煜遣其弟郑王从善来朝贡於是始去唐号改印文为江南国印赐诏乞呼名从之先是国主以银五百两遗宰相赵普普告於上上曰此不可以不受但以书答谢少赂其使者可也普叩头辞让上曰大国之体不可自为削弱当使之勿测及从善入覲常赐外密赉白金如遗赵普之数江南君臣闻之皆震骇服上伟度五年二月上既平广南渐欲经理江南因郑王从善入贡遂留之国主大惧是月始损制度下令称教改中书门下为左右府内史尚书省为司会府御史台为司宪府翰林为修文馆枢密院为光政院从善为南楚国公从镒为江国公从谦为鄂国公宫殿悉除去鵠吻闰三月癸未以江南进奉使李从善为泰寧节度使赐第京师国主虽外示畏服修蕃臣之礼而内实缮甲募兵阴为战守计上使从善致书风国主入朝国主不从但增岁贡而已南都留守兼侍中林仁肇有威名朝廷忌之赂其侍者窃取仁肇画像悬之别室引江南使者观之问何人



使者曰林仁肇也曰仁肇将来降先持此为信又指空馆曰将以此赐仁肇国主不知其间鸩杀仁肇 六年四月辛丑遣翰林学士卢多逊为江南国主生辰信使多逊至江南得其臣主欢心及还舩舟宣化口使人白国主曰朝廷重修天下图经史馆独阙江东诸州愿各求一本以归国主亟令缮寫命中书舍人徐锴等通夕讎对送与之多逊乃发於是江南十九州岛之形势屯戍遠近户口多寡多逊尽得之矣归即言江南衰弱可取状上嘉其谋始有意大用 七年秋七月卢多逊既还江南国主知上有南伐意遣使愿受封策上不许於是复遣合门使梁迥使焉迥从容问国主曰朝廷今冬有柴燎之礼国主盍来助祭国主唯唯不答迥归上决意伐之初江南人樊若水举进士不中第上书言事不报遂谋北归先钓鱼采石江上小舫载丝绳其中维南岸而疾棹抵北岸以度江之广狭凡数十往返而得其丈尺之数遂诣阙言江南可取上令学士试赐及第授舒州军事推官告上以母及亲属皆在江南恐为所害上即召国主护送国主听命于是遣使诣荆湖如若水之言造千艘将浮江以济师也大元帅钱俶遣府判官黄夷简入贡上谓之曰汝归语元帅常训练兵甲江南倔强不朝我将发师讨之元帅当助我无惑人言云皮之不存毛将安傅也特命有司造大第於薰风门外连亘数坊棟宇宏丽储待什物无不悉具因召进奉使钱文贄谓之曰朕数年前令学士承旨陶穀草诏比于城南建离宫今赐名礼贤院以待李煜及汝主先来朝者以赐之且以诏草示文贄遂遣文贄赐俶羊马谕旨於俶戊寅俶遣其行军司马孙丞佑入贡丁亥辞归上厚赐俶器币且密告以师期九月癸亥命颍州团练使曹翰领兵先赴荆南丙寅复命宣徽南院使曹彬侍卫马军都虞侯李汉琼判四方馆事田钦祚同领兵继之上已部分诸将而未有出师之名欲先遣使召李煜入朝择羣臣可遣者先是左拾遗知制诰开封李穆与叅知政事卢多逊同门生上尝谓多逊曰穆性仁善文辞之外无所据多逊曰穆操行端直临事不以生死易节仁而有勇者也上曰诚如是吾当试之丁卯遂遣穆使江南穆至谕旨国主将从之光政使门下侍郎陈乔曰臣与陛下皆受元宗顾命今往必见留其若社稷何臣虽死无以见元宗於地下矣清辉殿学士右内史舍人张洎亦谓不宜入朝时乔与洎俱掌机密国主委信之遂称疾固辞且言谨事大国者盖望全济之恩今若此有死而已穆曰朝与否国主自处之然朝廷兵甲精銳物力雄富恐不易当其锋也宜熟计虑无自貽后悔使还具言其状上以为所谕要切江南亦谓穆言不欺已是日又命山南东道节度使潘美侍卫步军都虞侯刘遇东上合门使梁迥等同领兵赴荆南冬十月江南国主复遣其弟江国公从镒水部郎中龚慎修重币入贡且买宴上皆留之不报曹彬与诸将入辞上谓彬曰南方之事一以委卿切勿暴生民务广威信使自归顺不须急擊也且以匣剑授彬曰副将而下不用命者斩之潘美等皆失色不敢仰视自王全斌平蜀多杀人上每恨之彬性仁厚故专任焉丁酉以吴越王俶为升州东南面行营招抚制置使仍赐战马二百匹遣客省使丁德裕以禁兵步骑千人为俶前锋且监其军甲辰以曹彬为州西南面行营马步军战棹都部署潘美为都监曹翰为先锋都指挥使初王师直趋池州缘江屯戍皆谓每

岁朝廷所遣巡兵但闻坚壁自守遣使奉牛酒来犒师寻觉异於他日池州守将戈彦遂弃城走闰十月己酉曹彬等入池州先是上遣八作使郝守浚率丁匠自荆南以大舰载巨竹緦并下郎州所造黄黑龙船於采石矾跨江为浮梁或谓江阔水深古未有浮梁而济者乃先试於石牌口既成命前汝州防御使陆万友往守之遇江南兵战於铜陵败之获战舰二百余艘丁卯曹彬等败江南二万余众获千余人及马步军副步署杨収等获战马三百余匹初江南无战马朝廷岁赐之至是驱为前锋以拒王师观所获马印文皆岁赐者也十一月诏移浮梁置采石三日而成不差尺寸王师过之若履平地唐主初闻朝廷作浮梁以语张洎洎对曰载籍以来长江无为梁之事唐主曰吾亦谓此儿戲尔于是遣郑彦华督水军万人杜真领步军万人同逆王师将行国主诫之曰两军水陆相济无不捷矣戊子吴越王俶遣修贡谢招抚制置之命也国主遗书於俶其畧曰今日无我明日岂有君明天子一旦易地酬勋王亦大梁一布衣尔郑彦华杜真与王师遇真以所部先战彦华拥兵不救真众败十二月金陵始戒严下令去开寶之号公私记籍但称甲戌岁益募民为兵民以财及粟献者官爵之 八年正月庚寅曹彬等进攻金陵行营马步军都指挥使李汉琼率所部渡淮南取巨舰实以葭苇顺风纵火攻其水寨拔之斩首数千级初次秦淮江南兵水陆十余万背城而阵时舟楫未具潘美下令曰美提骁果数万人战必胜攻必取岂限此一衣带水而不径渡乎遂率所部先济全师随之江南兵大败江南复出兵将泝流夺采石浮梁美旋擊破之擒其神卫都军头郑宾等七人五月初陈乔张洎为江南国主谋请所在坚壁以老王师师入其境国主弗忧也日于后苑引僧及道士诵经讲易高谈不恤政事军书告急非徐元瑀等皆莫得通师传城下累月国主犹不知时宿将皆前死神卫统军都指挥使皇甫继勋年少国主委以兵柄继勋素贵而骄初无効死意但欲国主速降而口不敢发每与众言輒云北军强劲谁能敌之闻兵败则喜见颜色曰吾固知其不胜也继勋从子绍杰以继勋故亦为巡检使亲近继勋尝令绍杰密陈归命之计国主不从偏裨有募敢死士欲夜出营邀击王师者继勋必鞭其背拘囚之由是众情愤怒又托以军中多务罕入朝谒国主召之亦不时至是月国主自出巡城见王师列栅城外旗旌满野知为左右所蔽始惊惧乃收继勋付狱责以流言惑众及不用命之状并绍杰杀之军士争腐割其肉顷刻都尽继勋既诛凡兵机处分皆自澄心堂出实洎等專之也於是遣使召神卫军都虞侯朱令赉以上江兵入援拥十万众屯湖口诸将请乘涨江速下令赉曰我今进前敌人必反据我后战而捷可也不捷粮道且絕其为害益深矣乃以书召南都留守柴克贞使代镇湖口克贞先是已病迁延不行令赉亦不敢进国主累促之秋七月初江南捷书累至邸吏督李从镗入贺龚慎修以为国且亡当待罪何贺也由是羣臣称庆从镗即奉表请罪上嘉其得礼遣中使慰抚供帐牢饩悉从优给壬午复命李穆送从镗还其国手诏促表降且令诸将缓攻以待之九月

立为虜矣救至而后图战□卢绛自金陵引所部舟师八千□舍舟登岸与吴越兵战吴越兵少却因固守踰月自相猜忌澄以通降欵虑为绛所谋乃曰间者言都城受围日急若都城不守守此亦何为绛亦知城终陷乃曰君为守将不可弃城而去宜赴难去者惟绛可尔澄伪为难色久之曰君言是也绛遂溃围而出初绛怒一裨将议杀之未决澄私谓曰卢公怒尔尔不生矣裨将泣涕请命澄因曰吾有一言告尔非徒免死且得富贵因谕以降事令先出导意裨将曰某家在都城将奈何澄曰事急矣当为谋我家百口亦不暇顾矣于是裨将踰城而出绛犹未知明日澄与绛同食主兵者来告澄作色曰吾谓公已斩之矣何得令逃也绛已去澄徧召诸将卒告曰澄守城数旬志不负国家事势如此须为生计诸君以为何如将卒皆发声大哭澄惧有变亦泣曰澄受恩固深于诸君且有父母在都城寧不知忠孝乎但力不能抗尔诸君不闻楚州耶初周世宗围楚州久不下既克尽屠之故澄以此胁众戊寅澄帅将吏开门请降润州金陵危甚乃趋宣州旦夕酣饮为乐或劝赴难皆不答初李从镒至江南谕上旨国主欲出降陈乔张洎广陈符命以为金汤之固未易取也北军旦夕当自退矣国主乃止李穆既还上复命诸将进兵及润州平外围愈急始谋遣使入贡求缓兵道士周惟简者鄱阳人隐居洪州西山国主召之馆於紫极宫尝以冠褐侍讲周易累官至虞部郎中致仕於是张洎荐惟简有远略可以谈笑弭兵复召为给事中与修文馆学士丞旨徐铉同使京师时国主屡督朱令贇举湖口兵来援谓铉曰汝既行即当止上江援兵勿令东下铉曰臣此行未必能排难解纷城中所恃者援兵尔奈何止之国主曰方求和好而复召兵自相矛盾於汝岂不危乎铉曰要以社稷为计置臣于度外尔国主泣即日拜左仆射叅知左右内史事铉固辞国主又以惟简雅素高尚不近荣利亲寫十数纸题寫奏目令惟简乘间求哀欲谢养病冬十月己亥朔曹彬等遣使送铉及惟简赴阙铉居江南以名臣自负其来也欲以口舌驰说存其国其日夜计谋思虑言语应对之际详矣於是大臣亦先白上言铉博学有才辩宜有以待之上笑曰第去非尔所知也既而铉朝於廷仰而言曰李煜无罪陛下师出无名上徐召之升殿使毕其说铉曰煜以小事大如子事父未有过失奈何见伐其说累数百言上曰尔谓父子者为两家可乎铉不能对惟简寻以奏目进上览之谓朕不晓也上虽不为缓兵然所以□壬寅铉等辞归江南朱令贇领众十五万缚木为筏长百余丈沿流而下将焚采石浮梁王明率所部舟师屯独树口遣其子驰奏且请增造战船三百艘以袭令贇上曰非应急策也令贇朝夕至金陵围解矣乃密遣人谕明令於洲浦间多立长木若帆樯之状令贇望见之果疑大军袭其后逗挠不敢进时江水浅涸不利行舟令贇独乘建大将旗幡至皖口行营步军都指挥使破之令贇威蹙因纵火距鬪会北风甚火反及之军溃己未生擒令贇及战棹都虞侯王晖等获兵仗数万金陵独待此援由是孤城愈危蹙矣徐铉及周惟简还江南未几国主复遣入奉表辛未对於便殿铉言李煜事大之礼甚恭徒以被病未往朝谒非敢拒诏也乞缓兵以全一邦之命其言甚切至上与反复数四铉声气愈厉上怒因按剑谓铉曰不须多言江东亦有何罪但天下一家卧榻之



側豈容他人鼾睡乎鉉皇恐而退上復詰責惟簡惟簡益懼乃言臣本居山野非有仕進意李煜強遣臣來爾臣素聞終南山有靈藥他日願得栖隱上憐而許之仍各厚賜遣還先是曹彬等列三寨攻城潘美居其北以圖來上上視之指北寨謂使者曰此宜深溝自固江南人必夜出兵來寇爾亟去語曹彬等并力速成之不然將為所乘矣賜使者食且召樞密使楚昭輔草詔令徙置戰棹以防他變使者食已即行彬等承命自督兵夫掘堑三成丙戌江南人果夜出兵五千襲北寨人持一炬鼓噪而進彬等縱其至乃徐擊之皆殲焉獲其將帥佩符印者十數人王師圍金陵自春徂冬居民樵采路絕兵又數敗城中奪氣曹彬終欲降之故每緩攻累遣人告國主曰此月二十七日城必破矣宜早為之所國主不得已約先令其子清源郡公仲寓入朝既而久不出前數日彬日遣人督之且告曰郎君不須遠適若到寨即四面罷攻矣國主終惑左右之言以為城堅如此豈可克日而破但報云仲寓趣裝未辦宮中宴餞未畢二十七乃可出也彬又遣人告曰若二十六日出已無及矣國主不聽先是上數因使者諭彬以勿傷城中人若困獸猶鬪李煜一門切無加害於是彬忽稱疾不視事諸將皆來問疾彬曰余之疾非藥石所愈須諸公共為誓破城日不殺一人則彬病愈矣諸將許諾乃相與焚香約言既畢彬即稱愈乙未城陷初陳喬張洎同建不降之議事急又相要以同死社稷然洎實無死志於是携妻子及橐裝入止宮中引喬同見國主喬曰臣負陛下願加顯戮若中朝有所詰責以臣為辭國主曰歷數已盡卿死無益也喬曰陛下縱不殺臣臣亦何面目以見國人乎遂縊洎乃告國主曰臣與喬同掌樞密今國亡當俱死又念陛下入朝誰與陛下辨明此事所以不死者將有待也彬整兵入至其宮城國主乃奉表出降與其羣臣迎拜于門彬令有欲入者一切拒之始國主令積粟失守則盡室赴火死及見彬口俸賜有限費用至廣當厚口不可復得矣因復遣煜口棹都監梁迥及田欽祚口但笑而不答迥等忿爭不能自引決可亡慮也又憤嘆國亡無意蓄財所操持口獨右內史學士張佖不受詣彬自口邀名不許但取金翰之官彬既入金陵士大夫賴彬保全各得其所親屬為軍士所掠悉遣還之因大搜于軍毋得匿人妻子倉廩府庫委轉運使許仲宣按籍檢視彬一不問師旋舟中惟圖藉衣衾而已十二月己亥江南捷書至凡得州十九軍三縣一百有八十戶六十五萬五千六十有五羣臣皆稱賀上泣謂左右曰宇縣分割民受其禍思布聲教以抚养之攻城之際必有橫罹鋒刃者此實可哀也即詔出米十萬石賑城中飢民辛丑赦江南管内州縣常赦所不原者偽署文武官吏并仍其舊令太子洗馬呂龜祥詣金陵籍李煜所藏圖書送闕下 九年正月戊辰朔御崇元殿受朝辛未曹彬遣翰林副使郭守文奉露布以江南國主李煜及其子弟官屬等四十五人來獻上御明德門受獻煜等素服待罪詔并釋之賜冠帶器幣鞍馬有差時有司議獻俘之禮如劉鋹上曰煜嘗奉正朔非鋹比也寢露布不宣煜初以拒命頗懷忧患不欲生見上宇文察知之因謂煜曰國家止務恢復疆土以致太平豈復有后至之責耶煜心始安徐鉉從煜至京師上召見責以不早勸煜歸朝声色甚厲鉉對曰臣為江南大臣而國滅亡罪固當死不當問其它上曰忠臣也事

我如事李氏赐坐慰抚之责张洎曰汝教李煜不降使至今日因出帛书示之乃王师围城洎所草召江上救兵蜡弹内书也洎顿首请死曰书实臣所为也犬吠非其主也此其一尔他尚多今得死臣之分也辞色不变上初欲杀洎及是竒之谓曰卿大有胆朕不罪卿今事我无替昔之忠也乙亥以煜为右千牛卫上将军封违命侯其子弟皆授诸卫大将军宗属皆授诸卫将军丙子以徐铉为太子率更令张洎为太子中允铉性质直无矫饰故人子弟及亲族之孤贫者来依铉铉必分俸开馆以纳之十一月封煜为陇西郡公去违命侯之号赏曹彬平江南功见官制门太宗太平兴国一年二月右千牛卫上大将军李煜自言其贫乙未诏赐钱三百万 三年秋七月壬辰李煜卒年四十二赠太师追封吴王

太平治迹统类卷一

●钦定四库全书

太平治迹统类卷二

(宋) 彭百川 撰

太祖经略幽燕

契丹本匈奴之种也世居潢水之南距幽州千七百里本鲜卑之地君长姓大贺氏有八部唐光启后其主德钦乘中原多故侵掠诸部达靺奚室等后族帐寝盛德钦政衰别部酋长耶律当唐天成元年卒伪谥大圣皇帝德光嗣位二年始私置年号天□并州籍其兵势遂幽蓟□应寰朔蔚十六州以报□河伪称大辽死伪谥圣号天授皇帝改元天禄立□众不附共推德光子齐王述□年额森舒噜好睡国中目为睡王□气遂衰国初天宝贤遣边寇镇定□惊曰中国今有英武圣主吾岂敢以螳螂而□是遁去先是五代时募民盗戎人马官给其直籍数以补战骑之阙太祖受命务保境息民不欲生事北境尽令还前所盗马仍申明条禁无得出寨为盗未几狄众入遼为棣州刺史何继筠擊敗

干德二年昭义军节度使李继勋攻辽州州将杜延韬以城来降并又引其众步骑六万复来援继勋与彰德军节度罗彦瓌洛州防御使郭进内客省使武怀节度使曹彬率马步军六万人擊其众于辽州城下敗之辽又攻平晋军上遣郭进与内客省使曹彬等领步骑万余赴之未至而遁

三年冬来攻易州略居民上令监军李谦升率兵入其境俘生口如所略之数俟契丹放还易州之民然后从之

四年正月又寇易州监军任德义击走之上令关南监军及雄霸瀛等四州州刺史勒所部兵校猎于幽州之境以耀威武大德军节度使于延超与其子来降上以延超为左千牛卫大将军六月伪横海军节度使桑兴来降

开宝二年太祖亲征河东辽两道率众来援一道攻石岭关为何继筠所破一道攻定州为韩重赉击败之【二事见平太原门】是秋涿州刺史许周琼来降上以周琼为

涿州刺史于是丰州刺史王仲晏上言契丹日哩儒哩等共九十六族归款上以其大头领罗密四人为怀化将军罗伊特八人为怀化郎将余八十五人为归德司戈是歲舒噜为将下所杀国人立乌云之子明记为帝

三月十日辽以六万骑攻定州上遣判四方馆事田钦祚领兵三千人赴之上戒钦祚曰彼众我寡但背城列阵以待之辽至即战勿以追逐钦祚于是与辽众战于满城辽骑少却乘胜逐北至遂城杀获甚众值夜入保遂城辽围钦祚数日钦祚度城中粮尽是夜整众突围而出至保寨军中不忘一矢北边传言三千打六万太祖自是益修边备尝谓左右曰若辽敢复犯边我每以三十疋绢购一胡人之首其精兵不过万人止费我三百万疋绢此贼尽矣太祖一日内出取幽州圖以示宰相赵普谓曰卿意此圖孰能为者详观叹曰他人不能为惟曹翰能为之帝问何以知之对曰羣臣材谋无出于翰者陛下若使翰往必克但不知陛下遣何人代翰帝默然良久曰卿可谓熟虑矣十一月羣臣上尊号曰应天广运大圣神武明道至德仁孝皇帝曰令□可乎却而不受帝痛恨□自初即位专务节俭乘□贮供御美余之物谓左右□北狄用赎晋朝陷没百姓然□者其意在我不在彼也

七年十一月琮以书遗知雄州孙全兴曰琮受君臣□交于境外言则非宜事有利于国家专之亦可南北两地古今所同曷尝不世载欢盟时通贖币往者晋氏后主政出多门惑彼强臣忘我大义干戈以之日用生灵于是罹灾今兹两朝本无纖隙若或交驰一介之使显布二君之心用息疲民重修旧好长为兴国不亦休哉琮以甚微敢于斯义遠希通悟洞垂鉴详太祖命全兴以书答焉

八年闰三月遣款附使克实克谨思奉书来聘称契丹国上命合门副使郝崇信至境上迓之及至馆于都亭驿太祖召见赐以裘衣金带销金乌罗帽乌皮靴器币二百银鞍勒马其仆从衣物器币有差宴于内殿仍召至便殿观诸斑骑射令其一使者与卫士驰射毛球截柳枝乃辞归国召见赐器币衣服帝因谓宰相曰自五代以来北戎强盛盖由中原衰弱以至晋帝蒙尘亦否之极也今慕化而至乃气运使然非凉德能致左右皆称万岁自是契丹始于中国交聘八月遣使献御衣玉带名马太祖皆厚赐之因令其使人从猎近郊太祖亲射走兽矢无虚发使者俯伏呼万岁私译者曰皇帝神武无敌射必命中所未尝见也及平江南献弓矢名马九年长春节遣使贡御衣玉带银鞍勒马太祖升遐遣修賻礼

太祖圣政

建隆元年正月甲申上即位遣使往诸州賑贷二月遣使分诣城门赐饥民粥八月诏有司作新权衡以颁天下

二年正月丁巳分遣常叅官诣诸州度民田二月壬申先是藩镇率遣亲吏视民租入槩量增益公取余羨符彦卿在天雄军取名尤悉上闻之即遣常叅官分主其事民始不困于重斂于是出公粟赐彦卿以愧其心三月上步自明德门幸作坊宴射酒酣顾前



鳳翔节度使兼中书令王彦超曰卿曩在复州朕往依卿卿何不纳我彦超降阶顿首曰当时臣一刺史耳勺水岂可容神龙乎使臣纳陛下陛下安有今日上大笑而罢闰三月丁丑诏金商房三州民饥遣使赈之是春诏申明周显德三年之令课民种植每县定民籍为五等第一等种杂禾百每等减二十为差桑枣半之男女十五以上人种韭一畦阔一步长十步乏之井者□令佐以春秋处视其数秩满赴召有□殿最七月初上既诛李筠及李重进等谓赵普曰天下自唐季以来数十年间帝王凡易八姓僭窃相踵鬪战不息生民涂地其故何也吾欲息天下之兵建国家久长之计其道如何普曰陛下之言及此天地神人之福也此无他故方镇太重君弱臣强而已今欲治之惟稍夺其权治其钱谷收其精兵则天下自安矣语未毕上曰卿勿复言吾已谕矣上故人各典禁卫普数言于上请乘间即言之上曰彼等必不叛普曰臣亦不忧其叛然熟观数人者皆非统御才恐不能制下则军伍间万一有作孽者彼临时亦不得自由耳上悟于是召守信等饮酒酣屏左右谓曰我非尔曹之力不得致此念尔曹之德无有穷尽然天子亦大艰难殊不若为节度使之乐吾终夕未尝敢安枕而卧也守信等皆曰何故上曰是不难知矣居此位者谁不欲为之守信等皆顿首曰陛下何为出此言今天下已定谁敢复有异心上曰不然汝曹虽无异心如麾下之人欲富贵何一旦以黄袍加汝之身汝虽欲不为其可得乎皆顿首泣涕曰臣等愚不及此惟陛下哀矜指示可生之途上曰人生如白驹之过隙所以好富贵者不过欲多积金钱厚自娱乐使子孙无贫乏耳尔曹何不释去兵权出守大藩择便好田宅市之为子孙立永远不可动之业多置歌儿舞女日夕饮酒相欢以终其天年我且与尔为婚姻君臣之间两无猜疑上下相安不亦善乎皆拜谢曰陛下念臣等至此所谓生死而骨肉也明日皆称疾乞罢上喜所以抚慰赐赉之甚厚庚午以石守信高怀德王审琦张令铎为诸镇节度皆罢军职独守信兼侍卫都指挥使如故其实兵权不在也殿前副都点检自是亦不除授壬午以皇弟光义行开封尹同平章事

建隆二年春正月己巳命淮南道官吏发仓廩以赈饥民初户部郎中沈义伦使吴越归言扬泗饥民多死郡中军储尚百余万可贷至秋乃收新粟有司沮义伦曰若岁荐饥将无所取偿孰当执其咎者上以诘义伦义伦曰国家方行仁政自宜感召和气立致丰稔岂复有水旱耶上悦故有是命甲戌诏诸郡自后或因岁首荒必下此诏二月上谓侍臣曰朕欲武臣尽令读书以知为治之道于是臣庶始贵文学李沆等曰昔光武中兴时数引公卿郎将讲论经史次第今太祖欲令武臣读书不能引以为对识者非之□十人按行河北诸州旱田诏民间利害以闻八月石守信表解

干德元年上幸武成王庙历观两廊所祀指白起曰起杀已降不武之甚胡为受殒于此命去之□月戊午颁量衡于澧朗诸州惩割据厚敛之弊也 四年四月诏禁羨余【见用度门】五月上遣右拾遗孙逢吉至成都收伪蜀圖書法物己亥逢吉还所上法物皆不中度悉命焚毁圖書付史馆孟昶服用奢僭至于溺器亦装以七宝上遂命碎之曰自奉如此欲无亾得乎上躬履俭约尝衣澣濯之衣乘輿服用皆尚质素寢殿设青布

缘帷帘宫围帘幕无文采之饰尝出麻履布裳赐左右曰此我旧所服用也开封尹光义因侍宴禁中从容言陛下服用太草草上正色曰尔不记居夹马营中时耶上初命宰相撰前世所无年号以改今号既平蜀蜀宫人有入掖廷者上因阅其衮具得旧鉴鉴背上有干德四年铸上大惊出鉴以示宰相曰安得已有四年所铸乎皆不能答乃召学士陶穀宴仪问之仪曰此必蜀物昔伪蜀王衍有此号当是其岁所铸也上乃寤因叹曰宰相须用读书人由是益重儒臣也赵普初以吏道闻寡学术上每劝以读书普遂手不释卷上性严寡言独喜观书虽在军中手不释卷人间有奇书不吝千金购之显德中从世宗平淮甸或潜上于世宗曰赵某下寿州私所载凡数车皆重货也世宗遣使验之尽发箠篋唯书数千卷无他物世宗亟召上谕曰卿方为朕作将帅辟封疆当务坚甲利兵何用书为上顿首曰臣无奇谋上赞圣德滥膺寄任常恐不迨所以聚书欲广见闻增智虑也世宗曰善八月辛丑召宰相枢密使开封尹翰林学士窦仪知制诰王佑等宴紫云楼下因论及民事上谓宰相赵普等曰下愚之民虽不分菽麦如藩侯不为抚养务行苛虐朕断不容之普对曰陛下爱民如此乃尧舜之用心闰八月诏求遗书凡吏民有以书籍来献者令史馆视其篇自馆中所无则收之献书人送学士院试问吏理见任职官者具以名闻是岁三礼涉弼三传彭干学究朱载皆应诏献书总千二百二十八卷命分置书府赐弼等科名十一月上以翰林学士礼部尚书窦仪在滁州时弗与吏绢每嘉其有执守屡对大臣言欲用为相赵普忌仪刚直遽引薛居正及吕余庆参知政事陶穀等又相党附共排仪上意中辍癸丑仪卒上惻然谓左右曰朕薄佑天何夺我窦仪之速也优诏赠右仆射上尝纳凉后苑召仪草制至苑门仪见上岸愤跣足而坐因却立不敢进合门使以奏上遽索冠带而后召入未及宣诏意仪遂言曰陛下创业垂统宜以礼示天下臣虽不才恐豪杰闻而解体也上改容谢之

五年正月丁巳以内客省使曹彬为宣徽南院使义成事在周显德三年三月节度侍卫马军都指挥使初剑南之役王全斌等贪财军政废弛上知之每使蜀来者令陈全斌等所入贿赂子女及发官库分取珠金等事尽得其状及全斌等归上诘王仁贍仁贍历诋诸将过失冀以自解也独曰清廉畏谨不负陛下者曹彬一人耳上固已知彬善于其职于是特加擢用彬入见辞曰征西将士俱获罪臣独受赏何以自安上曰卿有功无过又不自矜伐苟负纆芥之累仁贍等岂惜言哉惩劝国之常典可无辞也乙丑以西川转运使沈义伦为户部侍郎充枢密副使初义伦随军入成都独居佛寺蔬食伪蜀羣臣有珍异奇巧之物为献者皆却之东归篋中所有纔圖書数卷而已上尝从容问曹彬以官吏善否彬曰臣止监军旅至采察官吏非所职也固问之惟荐义伦可任上亦闻义伦清节过人因擢用之开

宝元年正月己巳大内营缮皆毕赐诸门名上坐寝殿令洞开诸门端直轩豁无有壅蔽因谓左右曰此如我心少有邪曲人皆见之矣三月丙子以户部员外郎知制诰卢多逊充史馆修撰判馆事多逊喜任术数善为巧发多奇中上好读书每遣使取书史馆

多逊预戒吏令遽白己知所取书必通夕阅览上果引问书中事多逊应答无滞同列皆服上益宠异之七月殿前散员都虞侯董遵诲为通远军使遵诲涿州人父宗本仕汉为随州刺史上微时尝往依焉遵诲凭籍父势多所陵忽尝谓上曰每见城上有紫云如盖又梦登高台遇黑蛇约长百余丈俄化为龙飞腾东北去雷电随之是何祥也上皆不对他日与论兵战事遵诲理屈即拂衣起上乃辞宗本去自是遵诲亦不复见紫云矣及上即位遵诲累迁至骁武指挥使一日便殿召见遵诲伏地请死令左右扶起因谕之曰卿尚记往日紫云及龙化之梦乎遵诲再拜呼万岁俄而部下有击登闻鼓诉其不法十余事上释不问遵诲惶恐待罪上谕之曰朕方赦过赏功岂念旧恶耶汝可勿复虑吾将录用汝遵诲再拜感泣又问遵诲母安在遵诲曰母氏在幽州患难睽隔上因令人重赂边民窃迎其母送于遵诲仍加优赐于是上以通远军西戎近边命遵诲守焉遵诲既至召诸族酋长谕以朝廷威德剖羊酺酒厚加宴犒众皆悦服后数月复入寇遵诲率兵深入击走之俘斩甚众获羊马数万夷落已定上喜其功就拜罗州刺史如故遵诲遣外弟刘综来贡马及还上解所服真珠盘龙衣命赉赐之综曰遵诲人臣岂敢当此上曰吾方委之方面不以此为嫌也上自即位数微行过功臣家人不可测赵普每退朝不敢便衣冠一日大雪向夜普意上不出矣久之闻叩门声普亟出上立风雪中普惶惧迎拜上曰已约吾弟矣已而晋王至设重褥地坐炽炭烧肉普妻行酒上以嫂呼之夜久寒甚口陛下何以口上曰吾睡他人家故来见卿普曰陛下小天下口其时也愿闻成筭所向上曰吾欲收太原普良久曰非臣所知也上问其故普曰太原当西北二边使一举而下则边患我独当之何不姑留以俟削平诸国彼弹丸黑子之地将何所逃上曰吾意正尔姑以试卿于是用师荆湖继取西川

十月甲戌屯田员外郎雷德骧责授商州司户参军德骧判大理寺其官属与堂吏附会宰相赵普意擅增减刑名德骧愤惋求见欲面白其事未及引对即直诣讲武殿奏之辞气俱厉并言赵普强市人第宅聚敛财贿上怒叱之曰鼎铛尚有耳汝不闻赵普吾之社稷臣乎引柱斧击折其上腭齿命左右曳出宰相处以极刑既而怒解止用阑入之罪黜焉

十一月先是上入太庙见其所陈筵豆簋籩问曰此何等物也左右以礼器对上曰吾祖宗宁识此亟命撤去进常膳如平生既而曰古礼亦不可废也命复设之于是判太常寺和峴言按唐天宝中享太庙礼科外每室加常食一牙盘五代以来遂废其礼今请如唐故事诏自今亲享太庙别设牙盘食褻裕时飨皆同之

三年四月己卯诏三司诸路两税折科物非土地所宜者勿得抑配又诏诸州凡丝绵紬绢麻布香药毛翎箭筈皮革筋角等所在约之纳支二年之用勿得广有科市以致烦民上常命有司为洛州防御使郭进治第凡厅堂悉用■〈童瓦〉瓦有司言惟亲王公主可得用此怒曰郭进控扼西山逾十年使我无北顾之忧我视进岂减儿女耶亟往督役无妄言上宠异将帅类此也【进以建隆元年初为西山巡检虽记在此未必正在此



年也】十一月上顾谓宰相曰山泽之利虽多顷已诏减旧额三分之一以（阙）

五年辛未口使曹翰往寨之翰口决朕信宿以来焚香上口勿施于民翰顿首拜曰昔宋口星为之退舍陛下忧及兆民恳口心此必不能为灾也癸酉上又谓宰相曰霖雨不止朕日夜焦劳罔知所措得非时政有阙使之然耶对曰陛下临御以来忧勤庶务有弊必去闻善必行至苦雨为灾乃是臣等失职上曰朕又思之恐掖庭幽闭者众徧籍后宫凡三百八十余人因告谕愿归其家者具以情言得百余名悉厚赐遣之矣普等皆称万岁秋七月皇第三女封永庆公主尝衣贴绣铺翠襦入宫上见之谓主曰汝自今勿复为此饰主笑曰此所用翠羽几何上曰不然主家服此宫闱戚里必相效京城翠羽价高小民逐利展转贩易伤生浸广实汝之由汝生长富贵当念惜福岂可造此恶业之端主惭谢主因侍坐与皇后同言曰官家作天子日久岂不能用黄金装肩輿乘以出入上笑曰我以四海之富宫殿悉以金银为饰力亦可办但念我为天下守财耳岂可妄用古称以一人治天下不以天下奉一人苟以自奉养为意使天下之人何仰哉当勿复言

先是大理正李符知归州转运司制置有不合理者符即上言上嘉之秩满归阙上以京西诸州钱币不登八月癸巳命符知京西南面转运事书李符到处如朕亲行八字赐之令揭竿大旗常以自随符前后条奏便宜凡百余条其四十八事皆施行着为令十二月初上问宰相赵普曰儒臣有武干者何人普以知彭州左补阙辛仲甫对乃徙仲甫为西川兵马都监于是召见面试射且问能擐甲否仲甫曰臣在郭崇幕屡从征讨固尝被介胄矣上曰汝见王明乎朕已用为刺史汝颇忠淳若公勤不懈不日亦当为牧伯也仲甫顿首谢上因谓普曰五代方镇残虐民受其祸朕今选儒臣干事者百余人分治大藩纵皆贪浊亦未及武臣一人也

六年春运京师米赈曹州饥民五月以御史冯炳为侍御史判御史台事谓曰张释之于定国治狱天下无冤民此所望于汝也赐金紫宠之赵普之为政也专廷臣多疾之上初听赵玘之诉欲逐普既止卢多逊在翰林因召对数毁短普且言普尝以隙地私易尚食蔬园广第宅营邸店夺民利上访诸李昉昉曰臣职司书诏普所为不得而知也会雷有邻擊登闻鼓讼普亲信堂吏胡赞李可度受赇鬻法及王洞尝纳赂可度赵孚授西川官称疾不上皆普庇之上怒下御史府按问及赵李等抵罪普恩益替上诏参知政事吕余庆与普更知印押班奏事以分其权未几出为河阳三城节度检校太傅同平章事普独相十年上倚信之故普得成其志普尝荐某人为某官上不用明日普复奏之又不用明日普又以其人奏上怒裂牍掷诸地颜色自若徐拾遗归他日补缀旧纸复奏如初上乃可其奏后果以称职闻又有臣当迁官上素恶其人不与普力请与之上曰朕欲不与卿若之何普曰刑以惩恶赏以酬功古今之通道也且刑赏天下之刑赏非陛下之刑赏也岂得以喜怒专之上弗听起普随之上入宫普立于宫门良久不去上卒从其请一日大宴雨骤至上不悦雨良久不止上怒形于辞色左右皆震恐普因进言外间百姓正望雨于大宴何损不过沾湿供帐乐衣耳乞令乐官就雨中奏技上大悦终宴普临机制

变能回上意类此尝设大瓦壶于视事阁中中外表疏普意不欲行者必投之壶中束缊焚之其多得谤咎殆由此也

十一月丁酉除名人雷德骧为秘书丞分判御史台三院书少府监致仕卢亿有高识恶其子参知政事多逊所为尝曰赵普元勋也而小子毁之祸必及我我得早死不得见其败幸也十二月庚子亿以忧卒丙子多逊起复是岁命参知政事卢多逊知制诰

八年二月甲子上谓宰相曰年穀丰登人物滋盛若非上天垂佑何以及此所宜共思济急振举阙政庶几开泰平之基也夏四月教坊使卫德仁以老求领郡上曰用伶人为刺史此庄宗失政岂可效之耶宰相拟上州司马上曰上佐乃士人所处资望亦优亦不可轻授但当于乐部迁转尔乃命为太常寺大乐署令

九年正月庚辰诏幸西京将以四月有事于南郊二月己亥羣臣再奉表请加尊号一统太平上曰燕晋未复遽可谓一统太平乎不许羣臣请易以立极居尊上不得已许之三月丙子车驾发京师辛未上至西京见洛阳宫室壮丽甚悦四月庚子合祭天地于南郊初雨弥月不止上遣中使赍三木与兵神约齐宿日雨不止当施桎梏又使祷祀三畏藏塔不如约则毁之及期始晴霁以说如礼都民垂白者相谓曰我辈少经乱离不图今日复覩太平天子仪卫有泣下者上生于洛阳乐其风土尝有迁都之意李符上书陈八难上不从既毕欲留都洛阳羣臣莫敢谏鐵骑左右厢都指挥使李怀忠乘间进曰东京有汴渠之漕歲致江淮米数百万斛禁卫数十万人咸仰给焉根本安固已久一旦遽欲迁徙实未见其利上亦弗从晋王又从容言其非便上曰迁河南未已终当迁长安耳晋王叩头切谏上曰吾将西迁者欲据山河之胜而去冗兵循汉周故事以安天下也晋王又谏曰在德不在险上不答王出上顾左右曰晋王之言固善今姑从之不出百年天下民力殫矣遂还东京冬十月上不豫癸丑上崩于万岁殿传位太宗

太祖太宗授受之懿

建隆二年六月甲午皇太后崩后每与上决大政呼赵普为书记曰且为尽心吾儿未更事也尤爱皇弟光义然不假颜色每出辄戒之曰必与赵书记偕行方可仍刻景以待其归光义不敢违寝疾上侍药饵不离左右疾革召普入受遗命后问上曰汝自知所以得天下乎上呜咽不能对后曰吾自老死哭无益也吾方语汝以大事而但哭耶问之如初上曰此皆祖考及太后余庆也后曰不然正由柴氏使幼儿主天下羣心不附故尔若周有君长汝安得至此汝与光义皆我所生汝后当传位汝弟四海至广能立长君社稷之福也上顿首泣曰敢不如太后教因谓普曰汝同记吾言不可违也普即就榻前为誓书于纸尾署曰臣普记上藏其书金匱命谨密宫人掌之

开宝六年赵普既罢相出为河阳三城节度使上书自愬云外人谓臣轻议皇弟开封尹皇弟忠孝全德岂有间然矧昭宪皇太后大渐之际臣实预闻顾命知臣者君愿赐昭鉴上手封其书藏之金匱

开宝九年六月上以晋王光义所居地势高仰水不能及庚子步自左掖门至其第

遣工为机轮激水注第中且数临视促成其役王性仁孝上雅钟爱尹京十五年度务修举上数幸其府恩礼甚厚尝疾病殆不知人上亟往视问为灸艾王觉痛上亦取艾自灸自辰至酉王汗洽蘧息上乃还疾良愈复往视之赐以龙凤毡褥又尝宴宫中王醉不能乘马上起送至殿阶亲掖之王帐下士高琼左手执铠以出上顾见因赐琼等控鹤官衣带及器帛勉令尽心间谓近臣曰晋王龙行虎步且生时有异必为太平天子福德非吾所及也冬十月初有神降于盩厔县民张守真家自言我天神之尊号黑煞将军玉帝之辅也守真每斋戒祈请风肃然声若婴儿独守真能晓其所言遂为道士上不豫驿召守真至阙下谢恩就建隆观设黄箓醮令守真降神神言晋王有仁心言讫夜召晋王属以后事左右皆不得闻但遥见烛影下晋王时或离席若有所逊避之状既而上引柱斧戮地大声谓晋王曰好为之癸丑上崩宋后使王继恩出召贵州防御使时立晋王之志素定乃不诣德芳径趋府衙程德玄先坐于府门德玄者善为医对曰我宿于信陵坊一夜有当关疾呼视则无人如是者三吾恐晋王有疾故来继恩异之告以故叩门与俱入见上且召之王大惊犹豫不行曰吾当与家人议之入久不出继恩促之曰事久将为他人有矣时大雪遂与王于雪中步至宫继恩使王止其直庐曰王且待于此继恩当先入言之德玄曰便应直前何待之有乃与王俱进至寝殿后闻继恩至问曰德芳来耶继恩曰晋王至矣后见王愕然遽呼官家曰吾母子之命皆托于官家王泣曰共保富贵勿忧也

甲寅太宗即位羣臣谒见帝于万岁殿之东楹帝号恻殒絶乙卯大赦天下常赦所不原者咸除之其赦文略曰先皇帝勤劳启国宵旰临朝万机靡倦于躬亲四海方成于开泰念农民之疾苦知战士之辛勤氛祲尽平生灵永逸而寒暄或厉寝疾弥留方臻偃革之期遽抱遗弓之叹猥以大宝付与冲人宜覃在宥之恩俾洽维新之泽可大赦天下常赦所不原者咸赦除之令缘边禁戢戍卒毋得侵挠外境羣臣有所论列并许实封表疏以闻必须面奏者合门使实时引对风化之本孝弟为先或不顺父兄异居别籍者御史台及所在纠察之先皇帝创业垂二十年事为之防曲为之制纪律已定物有其常谨当遵承不敢逾越咨尔臣庶宜体朕心以开封府判官著作郎陆泽程羽为给事中权知开封推官右赞善大夫贾琰为左正諫大夫枢密直学士门下襄邑郭贄为著作佐郎正諫即諫议也避上名改之庚申以皇弟永兴军节度使兼侍中廷美为开封府尹兼中书令封齐王皇子山南西道节度使同平章事德昭为永兴军节度使兼侍中封武功郡王贵州防御使德芳为山南西道节度使同平章事帝友爱尤笃不欲德芳异其称呼并诏王后魏氏三公主皆依旧为皇子皇女焉宰相薛居正加左仆射沈伦加右仆射伦即义伦也卢多逊为中书侍郎平章事枢密使曹彬加同平章事副使楚昭辅为枢密使十一月甲子追册故尹氏为淑德皇后越国夫人符氏为懿德皇后尹氏崇珂之女兄上微时娶焉

太祖太宗收复漳泉二州

陈洪进泉州仙游人幼有壮节颇读诗书习兵法及长以材勇闻因隶兵籍从攻汀



州先登补副兵马使江南李煜以洪进累功擢为清源军节度泉南等州观察使干德元年四月清源留后张汉思年老醇谨不能治军务事皆决于副使陈洪进汉思诸子并为牙将颇不平欲图害洪进汉思亦患其专明年夏四月汉思大享将吏伏甲于内将害洪进酒数行地忽大震栋宇将倾同谋者惧以告洪进洪进亟出众惊悸而散汉思事不成虑洪进先发常严兵为备洪进子文显文颢皆为指挥使勒所部欲击汉思洪进不许一日洪进袖置大锁从二子常服安步入府中直兵数百人皆叱去之汉思方处内闾洪进即自外锁其门谓汉思曰郡中诸吏请洪进知留务众情不可违当以印见授汉思惶惧不知所为乃自门扇间投印与之洪进遽召将校吏士告之曰汉思不能为政授吾印矣将吏皆贺即日迁汉思外舍以兵卫送遣使请命于李煜又遣牙将魏仁济间道奉表来告汉思退居数年以寿终八月泉州陈洪进遣使朝十月魏仁济以陈洪进自称清源节度副使权知泉南等州听命于朝上先遣通事舍人王班赍诏抚谕十一月丁巳赐唐主诏具言所以纳洪进之意且将授旌节也己亥陈洪进遣使来朝贡癸卯唐主以表言陈洪进首鼠两端不听乞寝其旌钺上复以诏谕之唐主乃听命

太宗太平兴国二年闰七月庚寅朔以陈洪进将入朝遣翰林使程德玄往宿州迎劳之八月丙寅陈洪进入见于崇德殿礼遇优渥赐钱千万白金万两绢万疋三年四月己卯平海节度使陈洪进用其幕僚刘昌言之计上表献所管漳泉二州得县十四户十五万一千九百七十八兵一万八千七百二十七癸未以陈洪进为武宁节度使同平章事洪进子前漳州刺史文颢为房州刺史前顺州刺史文显为登州刺史寻复以平海节度使文颢为通州团练使仍知泉州泉州衙指挥使文颢为滁州刺史仍知漳州五月乙酉朔御干元殿受朝德音赦漳泉管内给复一年明年从平太原封杞国公

雍熙元年进封岐国公洪进年老富贵且极上言乞致仕优诏免其朝见二年以疾终年七十二废朝二日赐中书令谥忠顺

太祖太宗收复吴越

钱俶字文明杭州临安人祖鏐因唐末黄巢之乱据有吴越之地为吴越国王俶即鏐之孙也晋开运中为台州刺史累官至东南面兵马都元帅仍领镇海镇东节度使

建隆元年授俶天下兵马都元帅三月遣使贺登极

干德元年十月丁未俶遣其子惟浚入贡助南郊

开宝四年十一月上因出忽幸普第时俶方遣使遗普书及海物十瓶列庑下车驾卒至普亟出迎弗及屏也上顾见问何物普以实对上曰此海物必佳即命启之皆满贮瓜子金也普惶恐顿首谢曰臣未发书实不知此若知此当奏闻而却之上笑曰受之无妨彼谓国家事皆由汝书生耳固命普谢受之是冬俶遣其子镇海镇东节度使惟浚来朝贡

七年十月丁酉以俶为升州东面招抚制置使详见平江南

八年十二月先是上尝召进奏使任知果令谕旨于其王俶曰元帅克毗陵有大功

俟平江南可暂来与朕相见以慰延想之意即当遣还不久留也朕三执圭币以见上帝岂食言乎崔口向无敌今天下事势已可知保口然之丁卯俶请赴长春节朝觐

九年二月己未俶及其子镇海镇东节度使惟浚平江军节度使孙承佑来朝见于崇德殿宴长春殿先是车驾幸礼贤宅按视供帐之具及至即诏俶居之宠赉甚厚俶所贡奉亦增倍于前也三月庚子命俶劔履上殿诏书不名辛未以俶妻贤德顺穆夫人孙氏为吴越王妃宰相谓异姓诸侯王妻无封妃之典上曰行自我朝表异恩也即令其子惟浚持诏赐之先是止数召俶与惟浚宴射苑中惟诸王预坐俶拜辄令内侍掖起俶感泣又尝令俶与晋王光义京兆尹廷美叙兄弟之礼俶伏地叩头得止上将西幸俶恳请扈从不许乃留惟浚侍祠遣俶归国是日宴讲武殿谓俶曰南北风土异宜渐及炎暑卿可早发俶泣涕言愿三岁一朝上曰川途迂远俟有诏方来也先是羣臣皆有章疏乞留俶而取其土上不从于是命取一黄袱以赐俶封识甚固戒俶曰途中宜密观及启之则皆羣臣留俶章疏也俶益感惧既归每视事功臣堂一日命徙坐于东偏谓左右曰西北者神京在焉天威不违颜咫尺俶岂敢宁居乎益以乘舆服御来献制作精巧每修贡必列于庭焚香而后遣之

太宗太平兴国二年九月吴越王俶将入朝先遣其子镇海镇东节度使惟浚来贡壬辰诏户部郎中侯陟至泗州迎劳之及惟浚至赐赉无等

三年二月以俶将至命四方馆使梁迥往淮西迎劳之三月己丑以吴越王俶将至遣其子镇海镇东节度使惟浚至宋州迎省俶又先遣平江节度使孙承佑入奏事上优礼之己巳即命承佑护诸司供帐劳俶于近郊又命齐王廷美宴俶于迎春苑己酉俶见于崇德殿宠赉甚厚即日赐宴于长春殿俶僚佐崔仁冀黄夷简等皆预坐五月初俶将入朝尽辇其府实而分行为十五进犀象锦彩金银珠屯茶锦及服御器用之物逾距万计俶意求反国故厚其贡奉以悦朝廷宰相卢多逊劝上遂留俶不遣凡三十余进不获命会陈洪进纳土俶恐惧乃籍其国甲兵献之是日复上表乞罢所封吴越国王及解天下兵马都元帅之职寝书诏不名之制且求归本道上不许俶不知所为崔仁冀曰朝廷意可知矣大王不速纳土祸且至俶左右争言不可仁冀厉色曰今已在人掌握中矣去国千里惟有羽翼乃能飞去耳俶独与仁冀决策是日遂上表献所管州军上御干元殿受朝如冬至仪俶朝退将佐始知之千余人皆恸哭曰吾王不归矣凡得州十三军一县八十六户十五万六百八十兵十一万五千三十六以范旻权知两浙诸州事旻口学士卢多逊言杭州口且为朕行即当召口献内事奢僭地狭民瘠十升之逋罪至鞭背每笞一人则诸案吏各持其簿列于庭先唱一簿以所负多少量为笞数已则以次唱而笞之尽诸簿乃止少者犹积数十多者至笞百余乞于国除民苦其政旻既至悉条奏上请丁亥徙封钱俶为淮海国王以其子镇海镇东节度使惟浚为淮南节度使奉国节度使惟治为镇国节度使平江节度使孙承佑为泰宁节度使威武节度使沈承礼为安化节度使浙江西道盐铁副使崔仁冀为淮南节度使戊子德音赦两浙管内诸州仍给复一年

端拱元年八月戊寅武胜节度使太师尚书令兼中书令邓王钱俶卒上为辍视朝七日追封秦国王谥忠懿命中使护丧洛阳俶任太师尚书令兼中书令四十年为元帅三十五年穷极富贵福履之盛近代无比景德中有司请以礼贤宅为司天监真宗以先朝所赐不许大中祥符八年子惟演复表上之诏赐钱五万贯仍各赐第一区子惟浚惟治惟渲惟灏惟潛惟演惟济俶归朝廷从千余口后多贫悴会车驾出宗族数百人诉于上上令以米二万石付惟治分给之初俶祖父鏐有子十三人更养他姓为己子以壮其宗族故其世裔繁多熙宁十年知杭州赵抃有请云钱氏子孙之坟在钱塘临安者芜废不治愿以龙山废佛寺为观使钱氏之孙道士自然居之诏从之改寺名为表忠观岁度一人以修其祠宇坟庙

### 太祖太宗亲征北汉

建隆元年五月辛酉以洛州团练使郭进为本州岛防御使兼西山巡检脩北汉也时上亲征泽潞北汉遣使以诏书赐李筠筠遂请北汉主举兵南下已为前导北汉主从之及筠败北汉主自太平驿遁还晋阳谓华曰李筠无状卒如卿言吾幸全师以归但恨失卫融卢赞尔【详见平泽潞】初卫融之被执也上诘融曰汝教刘钧举兵助李筠反何也融从容对曰犬各吠非其主臣四十口衣食刘氏诚不忍负之陛下宜速杀臣臣必不为陛下用纵不杀终当间道走河东尔上怒命左右以铁挝击其首流血被面融呼曰臣得死所矣上顾左右曰此忠臣也释之命以良药传其疮因使融致书北汉主求周光逊等是年四月李筠执监军周光逊闲廨使李廷玉送于北汉纳款求援其详见平泽潞约亦归融太平北汉主不报

八月忠武节度使张永德徙武胜节度使上将有事于北汉因密访策略永德曰太原兵少而悍加以契丹为援未可仓卒取也臣愚以为每岁多设游兵扰其田事仍发间使谍狄先绝其援然后可图也上曰善九月壬寅李继勋帅师入北汉界烧平遥县虏掠甚众十月乙酉晋州言兵马钤辖郑州防御使荆罕儒战没罕儒恃勇轻敌常悬军深入北汉人多闭壁不出前后虏获甚众于是领千余骑抵汾州城下焚其草市而还夕次京上原北汉遣大将郝贵超领万众来袭黎明及之罕儒遣都监毡球副使阎彦进分兵以御贵超罕儒锦袍里甲据胡床飧士方割羊臂膋以食闻彦进小却即上马麾兵径犯其锋北汉人攒戈舂之罕儒坠马为北汉人所获罕儒犹格斗手杀十余人乃遇害北汉主欲生致罕儒及闻其死求杀罕儒者戮之上痛悼不已擢其子守勋为西京武德副使因索京上原之将士不効命者黜之

二年二月北汉寇麟州防御使口重训也十一月晋州言败口数千计十二月乙未昭口军千余人斩首百余级

三年二月北汉寇晋潞二州守将擊走之三月上诏徙北汉降民于邢洛州计口给粟四月太原民四百七十人来降北汉都指挥使蔚进郝贵超与契丹悉兵入寇又擊走之



干德元年四月上既诛李筠将有事河东诏张暉入覲问以计策暉曰泽潞疮痍未复军旅一兴恐民不堪命不若戢兵育民俟富庶而后圖之上慰劳遣还七月镇州兵马钤辖登州刺史高行本客省使曹彬等率兵入北汉界获生口数千人来献诏释之仍各赐钱米彬灵寿人其从母为周太祖贵妃上典宿卫尤器重彬彬非公事未尝入见平居燕会亦罕与上即位自晋州都监召彬入见谓曰我畴昔欲亲汝汝何故踈我彬顿首谢曰臣周室近亲列职禁庭安敢交结尊贵上益嘉獎焉八月丁亥王全斌复与郭进曹彬等帅师攻北汉乐平县降其拱卫指挥使王超等及所部兵一千八百人北汉侍卫都指挥使蔚进马军都指挥使郝贵超等悉番汉兵来救三战皆败之遂下乐平即建为平晋军丙申北汉静阳等十八寨领守相率来降九月北汉主诱契丹兵攻平晋军命洺州防御使郭进濮州防御使张彦进客省使曹彬赵州刺史陈万通令步骑万余往救之未至一舍北汉引兵去郭进御军严而好杀部下整肃每入北汉境无不克捷上时遣戍卒必谕之曰汝輩当谨奉法我犹赦汝郭进杀汝矣尝有军校诣阙诉进不法事上谓近臣曰所诉事多非实盖进御下严甚此人有过畏惧而诬罔之耳既命执以与进令自诛之进方奉表谢会北汉入寇进谓其人曰汝敢论我信有胆气今舍汝罪汝能掩杀北寇则荐汝于朝如败便可往降勿复来也军校踊跃听命果立功而还进奏乞迁其职上悦而从之十一月上将有事于南郊命沿边诸将分道略北汉境磁州刺史晋隰等州都巡检使孟人李谦溥与郑州防御使孙延进絳州防御使沈继深通事舍人王浚等帅师出阴地以谦溥为先锋会霍邑谦溥又曰敌必乘我后当整众备之延进等又弗听谦溥独令所部擐甲俄顷追骑至延进等狼狈入谷中谦溥麾兵拒战北汉人乃退谦溥寻迁隰州刺史都巡检使如故十二月乙巳遣内客省使曹彬通事舍人王继筠分诣晋潞州与节度赵彦徽李继勋会兵入北汉境收其边邑及辽石州初北汉主嗣位所以事契丹者略不如世祖时每事必禀之刘旻庙号世祖于是契丹遣使持书来责其略曰尔先父穷来归我先兄天授皇帝待以骨肉洎余继统益修前好尔父即世我用命尔即位枢前丹青之约我无所负尔父据有汾国七年止称干裕尔不遵先志辄肆改更李筠包藏祸心舍大就小无所顾虑始为觊觎轩口告段常尔父故吏本无大恶一日口是听非尔而谁我务敦大义口忍渝尔宜率德改行无自貽使币往谢契丹执其役口丹故国用日削乃口王刘守光之子守光死居五台山为人多智能好讲华严经四方供施多积蓄故继颺常得其马以献又于栢谷置银冶募民凿山取矿烹银每岁输千斤因即其冶建宝兴军

开宝元年七月尝因北汉界上谍者谓北汉主曰君家与周氏世仇宜不屈今我与尔无所间何为困此一方之人也若有志中国宜下太行以决胜负北汉主遣谍者复命曰河东土地兵甲不足当中国之十一区区守此盖惧汉氏之不血食也上哀其言笑谓谍者曰为我语刘钧开尔一路以为生故终孝和之世不以大军北伐初北汉世祖女为晋护圣营卒薛钊妻生子继恩汉高祖典禁卫以世祖故释钊军籍馆于门下钊无材能高祖衣食之而无所用其妻常居中钊罕得见怏怏因醉拔佩刀刺之伤而不死钊即自

裁其妻改适何氏复生子继元而何与妻皆卒世祖以孝和帝无子使养继恩及继元皆冒姓刘氏继恩皤腹多髯长上短下乘马即魁梧徒步即侏儒事孝和帝尽恭昏定晨省礼无遗者及为太原尹选软不治孝和帝忧之尝谓宰相郭无为曰继恩纯孝然非济世才恐不能了我家事奈何无为不对是月孝和帝卧疾勤政阁召无为执其手以后事付之继恩始监国无为与侍卫亲军使蔚进不叶因出进守代州又建议渐斥去公族命继恩弟继忠守忻州继忠亦孝和帝养子也自称尝使契丹得冷痲病定襄地寒愿留养晋阳继恩责其观望趋令就道继忠颇出怨语或以白继恩寻缢杀之孝和帝殂继恩遣使告终称嗣于契丹契丹许之然后即位八月丙寅命客省使卢怀忠等二十二人领兵屯潞州将有事于北汉也戊辰以昭义节度同平章事李继勋为行营前军都部署侍卫步军都指挥使党进副之宣徽南院使曹彬为都监继筠为先锋康延昭为都监建雄节度使赵赞为汾州路都部署绛州防御使司超副之湿州刺史李谦溥为都监九月北汉主继恩怨郭无为初与其父言不助己且恶其专政欲逐之而未果是月加无为守司空外示优礼内实踈远之也继恩服纓裳视事寝处皆居勤政阁其左右亲信悉留太原府廡或请召入令翊卫继恩勿听于是文武百官皆进秩继恩置酒宴诸大臣及其宗子饮罢卧阁中供奉官侯霸荣率十余人挺刃入阁反扃其户继恩惊起绕于堂屏风环走霸荣以刃楹其胸杀之无为遣兵以梯入屋杀霸荣并其党迎立继恩弟太原尹继元继恩立纔六十余日霸荣邢州人多力善射走及奔马尝为盗并汾间北汉主用为散指挥使成乐平王全斌攻并汾荣率所部来归补内殿直未几复奔北汉为供奉官至是弑继恩谋持其首归朝旋为无为所杀口亟诛霸荣以灭口放人口境乃急遣使上表口刘继业冯进珂领军口监其军峯太原人继元妻口氏重勋兄幼事北汉世祖遂口河朔记作铜锅河与李继勋口之斩首二千余级获马五百匹口汾河桥傅太原城下焚延夏门继元遣将郭守斌领内直兵出战又败守斌中流矢退入城中是月三十日庚子继勋奏到了未北汉左胜军使李琼来降十月上遣使赉诏至太原谕北汉主继元令降约以平卢节度使授之又别赐郭无为马峰等诏四十余道许授无为安国节度使马峰而下并与藩镇无为得诏色动但出继元一诏余皆匿之自是始有二志劝继元纳款继元不从十一月契丹以兵来援北汉李继勋等皆引归北汉因入寇大掠晋绛二州之境三年二月乙卯命宣徽南院使曹彬马步军都指挥使党进等各领兵先赴太原戊午诏亲征己未以皇弟开封尹光义为东京留守枢密副使沈义伦为大内都部署昭义节度使李继勋为河东行营前军都部署建雄节度使赵赞为马步军都虞侯先赴太原甲子车驾发京师丁卯次平桥顿彰德节度使韩重斌来朝上谓之曰寇知我是行必率众来援彼意镇定无备将由此路入卿可为朕领兵倍道兼行出其不意破之必矣乃以重斌为北面都部署义武节度使洛阳祈廷仪副之己巳次相州庚午次磁州乙亥次潞州以霖雨驻蹕时诸州馈饷毕集城中车乘塞路上闻之以为辇运稽留将罪转运使宰相赵普曰六师方至而转运使获罪敌人闻之必谓储峙不充非所以威远之道但当择治剧者莅此州耳丙

子命户部员外郎知制诰王佑权知潞州佑即发遣车乘行路无阻以枢密直学士赵逢为随驾转运使仍铸印赐之北汉口侯刘继业冯进珂屯于团栢谷遣衙将领数百骑未侦逻会李继勋等促降继业进珂知众寡不敌亦领众罢其兵柄继勋等遂围城时北汉主为帝北汉主夜开宴羣臣及契丹使皆预宰相郭无为恸哭于庭曰今日以空城抗大军计将安出引佩刀欲自刺继元遽降阶持其手引之升坐盖无为欲以此摇众心也旬有八日获北汉谍者问之对以望车驾恨其迟耳上笑给衣酒戊戌次太原庚子观兵于城南筑长连城辛丑幸汾河作新桥以兵部员外郎中知制诰太原府事乙巳幸城东南始命筑长堤壅汾水先是议欲增兵攻城者左神武统军陈承昭进曰陛下自有数千万兵在左右何不用也上未悟承昭以马策指汾水上大笑因使承昭董其役丙午决晋祠水灌城丁未命李继勋军于城南赵赞军于西曹彬军于北党进军于东为四寨以副之北汉又乘晦突门潜犯西寨赵赞率众与战弩矢贯赞足未退时党进遣东寨都监李谦溥伐木西山以给军用谦溥闻鼓声即引所部兵赴之北汉人乃退上遽至观战怪所赴援者非精甲问之则谦溥也甚悦刘继业复以突骑数百犯东寨党进挺身逐之麾下数人随之继业走匿壕中北汉兵出援之继业随縋入城获免夏四月戊申朔幸城东观筑堤辛亥遣海州刺史孙方进领军数千人围汾州以判四方馆事任城翟守素监其军壬子复幸城东赐羣臣及诸军时服宴从臣甲申幸城北引汾水入新堤灌其城戊子幸城东南命水军乘小舟载强弩进攻其城内外马步军都军头横州团练使王廷义亲鼓之免胄先登流矢中其脑而颠庚寅廷义卒辛卯殿前指挥使都虞侯袁州刺史石汉卿亦中流矢溺死癸巳赠廷义建武节度使汉卿袁州防御使太原围急郭无为谋出奔因请自将兵夜击王师北汉主信之选精甲千人命刘继业郭守斌为之副北汉主登延夏门自送之且伺其反是夕初甚晴霁已而风雨晦冥无为行至北桥因驻马召诸将而刘继业以马伤足先收所部兵入城矣守斌迷失道呼之不获无为不能独前乃兴麾下数十人亦还闰月戊申水自延夏门瓮城入穿外城两重注城中城中大惊扰上幸长堤观焉水口甚阔北汉缘设障为王师所射障不得施俄有积草自城中飘出直抵水口自塞郭无为复劝北汉主出降北汉主不听阉人卫德贵极言无为反状明白不可赦北汉主杀之以徇城中稍定北汉人俄自西长连城潜出将焚我攻战之具我师击走之斩首万余级夜半忽传呼壁外云北汉主降上令卫士擐甲开壁门八作使赵璘曰受降如受敌讐可半夜轻诺乎上使伺之果谍者诈伪也太原城久不下东西班都指挥使范旻李怀忠率众攻之战不利中流矢几死殿前指挥使都虞侯赵廷翰率诸班卫士叩头愿先登击之以尽死力上曰汝曹皆我所训练无不一当百所以备肘腋同休戚也我宁不得太原岂忍馘汝曹冒锋刃而蹈必死之地乎众皆感泣再拜呼万岁时大军多病而契丹亦复遣兵来援太常博士李光赞上言曰陛下应天顺人体元御极战无不胜谋无不臧四方恃险之邦僭窃帝王之号者昔日与中国为邻今日与陛下为臣矣曩尔晋阳岂须亲讨重劳飞挽久驻师徒且太原得之未足为多失之未足为辱向来恃险之邦闻是役也竭心



踊跃各有窥觎传曰邻之厚君之薄也岂若回銮复都屯兵马上党使夏取其麦秋取其禾既寛力役之征便是荡平之策惟陛下裁之况时属炎蒸候当暑雨河津泛滥道路阻难辇运稽迟恐劳宸虑上览奏甚喜复问宰相赵普亦以为然因使普召光赞慰抚之癸丑移幸城东罕山之南始议班师也已未徙太原民万余家于山东河南给粟庚申分命使者十七人发禁军护送之因屯于镇潞等州用绛人薛化光之策化光言伐木先去枝叶后取根柢今河东外有契丹之助内有人户赋输窃恐岁月间未能下宜于太原北石岭山及河东北界西山东静阳村乐平镇黄泽关白井社各建城寨扼契丹援兵起其部内人户于西京襄郑唐汝等州给闲田使自耕种絶其供馈如此不数年自可平定上嘉纳之壬戌车驾发太原我师陷敌百人上遣骁雄副指挥使浚仪孔守正领骑军往救守正奋击尽夺以还北汉藉我所弃军储得众粟三十万茶绢各数万丧败罄竭赖此以济戊辰次镇州六月庚辰诏车驾所过民无出今年秋租癸巳车驾至自太原曲赦京城繫囚是月北汉主决城下水注之台迺泽水已落而城多摧圮契丹使者韩知璠犹在太原叹曰王师之引水浸城也知其一而不知其二若知先浸而后涸则并人无遗类矣时契丹遣其将南大王来援屯于太原城下刘继业言于北汉主曰狄贪地弃信他日必破吾国今救兵骄而无备愿袭取之因籍河东之地以归中国使晋人免于涂炭陛下长享贵宠不亦可乎北汉主不从南大王数日辞还赠遗甚厚是岁契丹主明记为将下所杀九年八月丁未命伐北汉以侍卫马军都指挥使党进为河东道行营马步军都部署宣徽北院使潘美为都监虎捷右厢都指挥使杨光美为行营马军都虞侯

太宗太平兴国二年五月庚午命起居舍人辛仲甫使于契丹右赞善大夫穆被副之仲甫至境上闻朝廷议伐北汉而北汉实倚契丹为援迟留未能进飞奏俟报有诏遣行既至契丹主问曰闻中朝有党进者真骁将如进之比凡几人仲甫对曰名将甚多如进鹰犬之材何可胜数契丹主颇欲留之仲甫曰信以成义义不可留有死而已契丹主知其秉节不可夺厚礼遣还上尝谓左右曰仲甫远使絶域练达时宜可谓不辱君命若更得仲甫数人朕何患也

三年八月庚寅以隰州刺史李谦溥为济州团练使谦溥在隰州十年敌人不敢犯其境有招收将刘进者勇力絶过人谦溥抚之甚厚得其死力往来境上以少撃众北汉人患之为蜡弹书以间进佯遗书道中节度使赵赞得之以闻上令械进送阙下谦溥诘其事进伏于庭请死谦溥曰我以合家四十口保汝矣即上言进为北汉人所恶此乃反间也上悟遽令释之赐以禁军都校戎帐服具进感激愿撃敌自効口祚破契丹事见迁防门口指挥党进出为忠武节度口晋潞邢洛镇冀等州治皆戎器口粟北汉主甚恐十二月乙丑幸讲武台观发机石射连弩上将伐北汉先习武事也

四年正月上初即位谓齐王廷美曰太原我必取之及议致讨召枢密使曹彬问曰周世宗及我太祖皆亲征太原以当时人力而不能克何也岂城壁坚完不可近乎彬对曰世宗时史彦超败于石岭关人情震恐故师还太祖顿兵甘草地军中人多被腹疾因

是中止非城垒不可近也上曰我今举兵卿以为何如彬曰国家兵甲精锐人心忻戴若行吊伐如摧枯拉朽耳何有不可哉上意遂决宰相薛居正等曰昔世宗举兵太原倚北狄之援坚壁不战以至师老而归及太祖破狄于雁门关南尽馘其人民分布河洛之间虽巢穴尚存而危困已甚得之不足以辟土舍之不足以为患愿陛下熟虑之上曰今者事同而势异彼弱而我强昔先帝破此寇徙其人而空其地正为今日事也朕意决矣卿勿复言乃先遣常下参官督诸州军储赴太原庚寅以宣徽南院使潘美为北路都招讨制置使河阳节度使崔彥进攻其城东面彰德节度使李汉琼城南面柱州观察使曹翰城西面彰信节度使刘遇城北面翰以次当攻其西面而西面直逼汉主宫城尤险恶翰欲与遇易地自言我观察使班宜在节度使下遇弗可翰必欲易之议久不决上虑将帅不叶乃谕翰曰卿智勇无双城西北面非卿不能当也翰始奉诏八作使郝守浚守西面壕寨都监马军都虞侯米信步军都虞侯田重进充行营马步军都指挥使西上合门使郭守文判四方馆事顺州团练使梁迥监其军辛卯命云州观察使郭进为太原石岭关都部署西上合门祇候供奉官刘绪按行太原城西面壕寨阅视攻城梯冲器用

己酉命左右屯卫上将军张铎为京城内外都巡检车驾将北征二月辛亥诏以此月内暂幸玉津园宴射丙辰命宰相沈伦为东京留守兼判开封府事宣徽北院使王仁贍为大内都部署枢密承旨陈崇信副之甲子车驾发京师戊辰次澶州有邀车驾者前驱叱之不退取视乃临河主簿宋捷上见其姓名喜以为师必有捷之兆三月庚辰朔驻蹕于镇州口非古州北汉人依险阻郭进言契丹数万骑入寇口援绝北汉主复遣使间道赍蜡丸书求救进又得之徇于城下城中气始夺矣上幸太原甲子鲜暉等攻隆州西骁骑军校许均先登陷之均中八创杀三百余人获其招讨使李珣等六人以献继忠前护隰州白壁关屯兵前后入北汉境破三寨擒伪将校二人得铠甲鞍马牛羊生口数万计近戍闻之惧无功受谴乃以诚告继忠悉分虏获使列奏焉丙寅次侧石岭作闻捷奏平隆州诗庚午上至太原驻蹕于汾水之东辛未幸城四面按视城垒攻具慰劳诸将以手诏谕北汉主继元传诏至城下守陴者不敢受壬申夜漏未尽上幸城西督诸将攻城天武军校荆嗣率众先登手刃数贼足贯双箭手中炮碎齿上见之亟召下赐以锦袍银带嗣罕儒兄孙也先是上选诸军勇士数百人以剑舞皆能掷剑于空中跃其身左右承之见者无不恐惧会契丹遣使修贡赐宴便殿因出剑士示之数百人袒裼舞挥刀而入跳掷承接曲尽其妙契丹使者不敢正视及是巡城必令舞剑士前导各呈其技北汉人乘城望之破胆上每躬擐甲胄冒犯矢石指挥戎旅左右有谏者上曰将士争效命于锋镝之下朕岂敢坐观诸军闻之人百其勇皆冒犯先登凡控弦之士数十万列阵于乘輿前蹲甲交射矢集太原城上如猬毛焉每诏给诸军箭数百万又顷刻而尽城中人云北汉主城中市所射之箭以十钱易一只凡得十余万只聚而贮之上笑曰此箭为我蓄也及城降尽得之甲戌幸诸寨乙亥幸连城视攻城诸洞时李汉琼率众先登矢集其脑又中指伤甚犹力疾上促召至幄殿视其创傅以良药上欲亲幸洞屋中劳士卒汉琼泣曰

晋阳孤垒危若累卵诸将用命战士贾勇矢石注洞屋如雨陛下奈何以万乘之尊亲往临之若不听臣请先死上乃止丁巳幸西连城楼五月己卯朔幸城西南隅夜督诸将急攻迟明陷羊马城北汉宣徽使范超来降攻城者疑超出战擒之以献斩于纛下既而北汉主尽杀超妻子梟其首投于城外辛巳幸城西北隅北汉马步军都指挥郭万超来降壬午幸城南上谓诸将曰翌日重午当食于城中遂自草诏赐北汉主夜漏上有一刻城上有苍白云如人状癸未幸城南督诸将急攻士奋怒争乘城不可遏上恐屠其城因麾众少退城中犹欲固守左仆射致仕马峰以病卧家舁入见北汉主流涕以兴亡谕之北汉主乃夜漏上十刻遣客省使李勳上表纳款上喜即命通事舍人薛文宝赍诏答之夜漏未尽幸城北宴从臣于城台继元降迟明刘继元率其官属素服纱帽请罪台下诏释之赐袭衣玉带金鞍勒马文武官各赐器币鞍马有差召升台劳问继元叩头曰臣自闻车驾亲征即愿束身归罪乃致陛下銮輿暴露尚敢以孤城死守盖亡命者惧死逼臣不得降耳上令籍亡命投继元者选其巨室者以从军法余赐服分隶诸将因顾钱俶曰卿能保一方以归于我不致血刃深可嘉也俶顿首谢北汉平凡得州十军一县四十户三万五千二百二十命刘保勳知太原府乙酉赦河东常赦所不原者并释之诸州县伪署如故特与给复二年王师所不及口旧城改为平晋县以榆次县为新并州诏授继元为右卫上将军彭城郡公辛卯宴刘继元及其官属继元献其宫人百余人上以分赐立功将校丙申幸太原城北御沙河门楼遣使分部徙军民于新并州尽焚其庐舍民老弱趋城门不及焚死者甚众九月乙亥齐王廷美进封秦王宰相薛居正加司空沈伦加仆射卢多逊兼兵部尚书枢密使曹彬兼侍中文武官预平太原者皆迁秩有差初行赏功之典也

### 太祖太宗经制西夏

李彝兴夏州人父仁福本姓拓跋氏唐末拓跋思恭镇夏州统银夏绥宥静五州地讨黄巢有功赐姓李思恭卒弟思谏代为定难节度使思谏卒思恭孙彝昌嗣梁开平中彝昌遇害将士立其族子蕃部指挥仁福亦统银夏绥宥静五州之地仁福卒子彝兴嗣周初加中书令显德初封西平王世宗即位加太保恭帝初加太傅宋初加太尉北汉刘钧结代北诸部来寇麟州彝兴遣部将李彝玉会诸镇兵御之钧众遂引去建隆初献马三十匹太祖方事征讨大喜攻玉为带亲临视之召其使问曰汝帅腹围几何使言彝兴腰腹甚大如合抱之木太祖曰汝帅真福人也干德五年九月卒追封夏王子克睿嗣彝兴之卒自权知州事授检校太傅定难军节度使

太平兴国三年五月卒子继筠嗣 四年上征北汉继筠遣银州刺史李光远绥州刺史李光宪率蕃汉兵列阵渡河畧太原境以张军势 五年卒弟继捧嗣七年五月绥州刺史李克文表言继捧不应承袭请遣使与偕至夏州谕令入朝克文继捧从父也继捧来朝自称诸父昆弟多相怨怼愿留京师尽献其地上遣使诣夏州护继捧缙麻以上亲赴阙十一月己酉以继捧为彰德节度使其弟继迁时年十七勇悍有智谋不乐内徙



伪称葬乳母以兵甲寘柩中与其党数十人奔入蕃族地斥泽出其祖彝兴像戎人皆拜泣继迁自言我李氏子孙当复兴宗诸族帐稍稍归附奉表诣麟州贡马及橐駝等敕书诏諭继迁不出

雍熙元年九月知夏州尹宪与巡检使曹光实选精骑夜发兵掩袭地斥泽斩首五百级焚四百余帐获迁母妻及羊马器械万计继迁复结婚于帐族之酋豪凡数妻渐以强盛

二年二月帅众攻麟州使人给都巡检使曹光实曰我数奔北不能自存矣公许服降请期日于葭芦川光实勇而无谋信之及期继迁设伏兵于隐蔽止领数十人迎光实从百骑赴之继迁前导而行忽举手麾鞭伏兵尽起光实遂被害上闻之惊悼遣判四方馆事田仁朗合门使王侁副使董愿宫苑使李继隆发边兵擊之有言继迁悉知朝廷事盖由李继捧漏泄乃出继捧为崇信节度使李克宪为道州防御使与博州防御使李克文并归治所命著作郎韦亶殿中侍御史李式武元颖为通判专领州事继迁遂围三族寨寨将折遇弋杀监军使者与继迁合田仁朗行次绥州请益兵上闻三族陷大怒亟遣军器库使刘文裕自三交疾驰代仁朗文裕未至继迁乘胜亟攻抚宁寨仁朗喜曰戎人随逐水草散保岩穴常乌合狷聚胜则进败则走不可穷其巢穴今乃啸聚数万尽銳以攻孤城抚宁小而固戍卒少而精非旬浹所能破我俟其困以大兵临之分遣强弩三百邀其归路北敌成擒矣规画已定日纵酒樗蒲以示闲暇王侁等媒孽之上遣使者召仁朗下御史狱劾问请益兵及陷三族状仁朗对曰所召银绥夏三州兵本州岛皆以守备不遣有兵千余乃曹光实旧卒器甲不整故请益兵转运刍粟复未备三族寨去绥州道遠非元诏所救也昨臣已定擒继迁策会诏至不果因言继迁得羌戎情宜且降优诏怀柔之或揭厚赏啖部落酋长令斩其首不尔恐渐且难制大为边患益兵深入其地无益也御史以其状闻上大怒切责史府官吏御史遂劾之大理奏仁朗坐死上特贷之责授商州团练副使王侁等出银州口千六百级生擒八十人器甲百八十六橐口牛羊畜三万计口等保香族追口十七人生擒四十口余级又破保洗两族口千计麟州三族寨蕃部二千余口六十四人纳马赎罪愿助讨李继迁入浊轮川斩贼首五千级酋豪二十其将折遇弋皆遁去命内客省使郭守文自三交乘置往与侁等同领边事侁等又破银州杏子平东北山谷内设邵浪悉讹等族及浊轮川东兔头川西诸族生擒七十八人橐五十九人俘三百三十六人招降千四百五十二户六月守文与尹宪等引兵至盐城吴移越移四族皆奔有岌伽罗二十四族怙众不率宪等袭擊之斩首数千级生擒百人焚千余帐获牛畜万计于是银麟夏三州诸蕃悉归附凡百二十五族合万六千一百八十九户折遇弋穷蹙来降独咩嵬族酋豪招怀不至擒斩以徇并灭其族七月癸未诏昨为河西三族蕃部都监折遇弋并夏州李继迁啸聚寇边因发兵防遏抚绥近观奏报并已分屯其兵令下并州潘美及夏银绥等州常具蕃部动静飞奏以闻朝廷数以书招諭继迁及同恶蕃部继迁亦尝遣孔目官张浦诣知环州陈德元自陈归顺之意然继迁终不

## 肯降益侵盗边境

端拱元年五月宰相赵普建议欲复委继捧以夏台故地俾圖之继捧时为感德节度使即召赴阙上亲书五色金花笺赐继捧国姓改名保忠授定难节度使赐以所管五州钱帛刍粟田园等命右卫第二军都虞侯王果领兵千人护送之十二月保忠言继迁悔过归顺以为银州刺史洛苑使加保忠同平章事然继迁实不降已而保忠又言继迁诱蕃戎入寇乞师守御

淳化二年正月命商州团练使翟守素率兵屯夏州继迁闻守素将兵来讨恐惧七月奉表归顺授银州观察使赐以国姓名曰保吉外示归顺而阴与保忠相结诱荒盗戎蛮寇边不已陝西转运使郑文宝建议以为银夏之北千里不毛但以贩青白盐与边民博余粟麦充食愿禁之许商人贩安邑解两池售于陝西官获其利且困羌戎则保吉可不战而屈上从之诏自陝以西有私市青白盐者皆坐死募告者差定其罪行之数月犯法者益众羌戎乏食四十二族首领盟于杨家族引万余骑寇环州石昌镇知州程德元与殿头高品李神福等率三百骑擊走之后七日复来寇屠小康堡内属万余帐亦叛稍稍归保吉而商人贩两池盐者多取他径出唐邓襄汝间吏不能禁

四年八月上命翰林学士钱若水驰传视之弛新禁复旧制内属羌戎渐复归顺

五年正月灵州及通遠军皆言赵保吉复围保寨掠居民焚积聚上怒曰保吉□廷姑务含容赐以国姓□厚仍通其关市□矣乃敢如是□李继隆为何□诛保吉保吉之□保吉纳款授银州观察使□及保忠与保吉阴为唇齿之依置平夏留其将佐李贵等绥州文岷上言保吉忘主上养育之恩复兹猖獗今保□之计若绥州摇动则平城不可守矣保吉果遣其□三畔率众暴至将驱其吏民会平夏文岷出兵擊三畔败走斩首五百级获马一百匹以文岷知州事左正言直昭文馆王禹偁言伏覩国家出偏师讨李继迁进奉事守素言此贼未是由衷必恐中怀反侧又言继迁曾被左右暗箭横贯于鼻偶然不死今面上疮痕尚存臣窃谓此贼不必劳力而诛自可用计而取况讨伐之义权变为先汉光武彭宠据有渔阳攻伐未下家奴子密窃发肘腋斩首而来唐元和中李师道父子盗据全齐四五十年倔强难制其裨将刘悟倒戈攻城遂至族灭近代刘知俊兄弟以同州叛入李茂贞梁祖下诏有得知俊者赏缗钱一万与节度使得其弟者赏缗钱五千与刺史一月之间生擒其弟谚曰重赏之下必有勇夫兵法使贪使愚言贪者利其财愚者不计其死也今继迁本是匹夫偷生假息本无财利以结人心若数其罪恶晓諭蕃戎多立赏赐高与官资使左右生心蕃戎并力继迁身首不梟即擒何必苦烦睿畧多举王师且自陝以西歲非大稔加之饋餉转恐凋残河北虽是丰登预修边备况此贼通连北狄朝廷具知擊东南而备西北正在此时三月保忠闻继隆将兵来诛保吉乃先携其母及妻子卒吏壁野外上言已与保吉解仇贡马五十匹乞罢兵上怒即遣中使命继隆移兵擊之继隆兵压境保吉欲圖保忠而并其众夜袭保忠保忠方寝闻难作单衣被髮骑

骏马走还城中资财器用保吉悉夺之保忠尝遣指挥使赵光嗣入贡光嗣颇输诚款诏补礼宾副使保忠动静光嗣必以闻及保忠阴结保吉光嗣出家财散士卒誓以效顺保忠还城光嗣报之开门纳王师继隆入夏州擒保忠繫以银铛锁之槛车送阙下保吉引众遁去四月诏以赵光嗣为夏州团练使削赵保吉所赐姓名上以夏州深在沙漠本奸雄窃据之地诏隳其城迁其民于银绥等州五月丁卯以保忠为右千牛卫上将军封宥罪侯诏畧曰不讨继迁开狡兔之三穴潜疑光嗣持首鼠之两端七月继迁遣牙校以良马来献且谢过犹称所赐名八月又遣其将佐赵光祚张口绥州纳款遣其弟廷信奉表请罪十一月遣内侍张崇贵持诏谕继迁赐以茶药器币衣物等口亲已失辅车之势

至道元年正月继迁遣张浦来献蕃戎所产橐駝蓋浦在西夏多年继迁实奉为谋主三月上令卫士翹阙超乘引强夺槩于后园召浦观之上意欲威示戎狄使不敢轻大宋浦大骇上笑问浦戎人敢敌否浦曰羌部弓弱矢短但见此长大人固已逃遁况敢敌乎皆贫窶饮食被服粗恶无可恋者岂能永保富贵继迁上言自去年遣人入朝勅禁抄掠今境上戎人不禀诏旨频肆攻劫本部不敢禁御恐边吏诬奏无以自明诏答曰先敕边臣各谨封畧无辄相侵内属戎人所盗羊马钱物今并以还卿且恕其罪自今敢犯卿者当诛之也上因谓侍臣曰继迁游魂孤孽贪利忘义朕欲开其迷复之路渐加控制近闻仓皇失据不自宁处传信边将各守封疆无相侵轶亦畏我之兵锋耳六月遣合门副使冯讷中使贾继隆赍诏谕继迁欲授鄜州节度使继迁不奉诏上谓宰相等曰继迁负固不庭啸聚边境朕君临四海须与含容昨者赐以诏书俾移镇守而狂不奉诏尚恣陆梁朕哀此孽重死囚之非久也宰相等对曰继迁器识凡下自叛涣以来引亲校张浦为谋主军中动静一以谂之遂能倔强穷庐苟延岁月者浦之力也今陛下走一介致之继迁内失腹心之用矣沿边蕃部族帐居多继迁威以淫刑胁而用之近闻各怀怨望渐致携离则继迁外失夷落之助矣内外乖绝形势可见而乃偷安巢穴靡顾存亡苟不为蕃部所擒则必有刺客起于帐下今丹延环庆之地田川重复非但寇不能窥伺惟灵武一道是其凑进之路国家已严堡障练兵聚粟继迁率乌合之众往来沙碛犹困兽处于槛穽但自跳跃岂能为人患乎乃以张浦为郑州团练使留京师转运副使郑文宝先建议于灵州南界积石岭筑城号清遠军在瀚海中距灵环皆三四百里地不毛无泉水文宝大发民版筑益负粮水于数百里外关右之民始皆恣怨城垒既就戍兵数千人转饷共馈益为劳扰自同华抵环庆运粟一斗为钱七百为一围为银一两陝西民富者鬻田园贫者卖妻子以供力役自初筑城募邠泾寧庆等州民以榆槐杂木及猫狗鸦鸟至者厚赏之地烏鹵种植皆立枯数百里无草木禽鸟皆死未几山水大出壤钓桥陷羊马城数处前后费官钱数十万计李继迁酋长有鬼罗鬼悉者文宝以金帛诱之令阴圖继迁鬼罗等尽以其事告继迁因上表谢罪九月知清遠军张延州言李继迁帅千余骑来寇出兵擊讨之诏复夺其所赐姓名

二年三月环庆总管皇甫继明受诏护送輜重赴灵州继明先约灵州田绍斌率军



迎援会继明被病白守荣马绍忠等请率兵先往继明虑守荣等轻佻与戎人接战失利因谓之曰我疾少间遂矍铄被甲上马强行至清遠军卒绍斌过咸井贼踰三千余来破阵且行且鬪至耀德凡杀千人明日寇复尾后绍斌为方阵使被伤者居中自将骑三百步努三百与敌兵确于浦洛河大败之初绍斌与守荣等为期既而继明卒故后一日遂为贼所围守荣等欲擊之绍斌曰蕃戎猛兽不可追也勿弃輜重与战当按辔结阵徐行守荣等忿曰我不受若节制但率兵来迎勿预吾事绍斌因别率所部去輜重四五里而舍继迁初见绍斌旌旗不敢擊守荣等自欲邀功与战贼先伏兵以羸骑致师伏发守荣等皆败丁夫骇遁蹂践至死者无数刍粟四十万悉为李继迁所获绍斌率所部徐还入保清遠军四月甲戌以侍卫马军都指挥使李继隆为环庆灵等州都总管殿前都虞侯范庭召副之率师讨继迁诏绍斌为本州岛都总管兼内外都巡检使初诏调发灵州军储分道护送寇至易为备御而民力不匮转运使卢之翰违诏擅并为一及败上怒命国子博士王用和乘传捕之翰及转运使窦玘繫狱验问五月继迁率万余众寇灵州四方馆使曹璨自河西入奏上召宰相等于北苑门语其故曰继迁剽劫輜众之后颇猖獗自恣輒窥灵武驱乌合之众颇坚城之下固无持久之理却缘城中人赍表告急为贼所获贼以为危窘因顿兵未即引去卿等宜熟虑之朕固有成算矣吕端曰灵武军储乏少贼党又据瀚海津要环庆路不通臣思以为朝廷宜于麟府丹延环庆三道各发劲卒约轻赍径走平夏攻取继迁帐幕继迁必顾惜巢穴望风引退如此则灵武之围解饗道得通矣上曰不然三道起兵深入所发甲卒凡几万人何人为将领何人将輜众况塞垣表里砂磧三道兵马于何处会合须更熟筹不可轻举向者刍粟朕令分三輩护送丁夫悉持弓矢自卫兵级拒马劲弩令为方阵而行寇至则分布拒马发劲弩士卒成列以待之诚能遵守纪律岂致败衄而将校皆自率胸臆不用条教当寇之暴集战未暇施設而丁夫已溃乱相蹂践而死盖谋之不臧违朕节制所致也参知政事张洎曰盛暑之月水泉乏絕刍粟未集而议者欲以三道举兵深入以分贼势陛下以为未见其利诚如圣旨时贼围灵州岁余地震二百余日城中糗粮皆竭潜遣人市余河外宵运以入间出兵擊贼司天言荧惑犯輿鬼中积尸秦雍之分当有兵上语宰相等曰天文谪见如此秦地民罹其灾五星凌犯朕常候之未尝无其应朕旦夕念之不遑宁处李继隆等兵马已到环庆贼闻王师之至固已破胆其如灵州救援未及万一不守城中皆汉民尽为此贼所屠戮自壁闭已来居人乏食饿死必众因嗟叹久之辛亥降手诏曰灵州孤絕救援不及贼酋猖獗未就诛夷居庙堂侍帷幄者正合运奇兵而伸硕画宜令宰相吕端知枢密院事赵镒等各述所见利害再护送军储至灵武合发军民多少举兵深入贼境以速剿灭用兵几何何人将领何人监护直抵灵武今日实封来上吕端等相率诣长春殿见上言曰臣等若各陈所见恐乖询谋佥同之义望许共为一状陈其利害张洎越次奏曰吕端等备位辅弼上有所询问反緘默而不言深失谋谟之体端曰洎欲有言不过揣摩陛下意耳必无逆鳞之理在河上馈运艰难党项率先顺命灵武地口度塞门经盐州抵回乐口灵武

可以控守者缘路在党项继迁以党项余孽据平夏全壤振军车大出则鸟惊鱼散莫见踪由若般口屯使行劫夺其事一也军须所急莫若井泉自环庆至瀚海七百里斥卤枯泽无溪涧川谷荷戈甲而受渴乏虽勇如贲育亦将投身死地又安能与羣贼争锋哉其事二也自逆贼滔天灵州闭垒继迁之众践蹂四郊田畴日荒樵苏路绝负尸而汲易子而食备御理尽飞走望断岂能复为国家坚守者乎其事三也假使灵州围解瀚海尘清朝廷须当召发甲兵裹送粮草未逾终岁犇运复兴乃是以日系时而转输无已驱秦雍之百姓供灵武之一方使无辜之民膏涂原野朝廷大计岂若是乎其事四也况继迁或成或败未足致邦国之安危灵武或存或亾岂能系边隅之轻重得失大较理甚昭然以臣愚见所谓灵武封壤必不可以实时保守灵武士伍必不可深入应接牵拽兵马必不可令起离本处若除此道纵使良平复生亦不能为谋矣圣人以天下为度者不以细故为嫌弃地戢兵从权之上治也上初有意弃灵州既而悔之及览洎奏不悦却以付洎谓之曰卿所陈朕不晓一句洎皇恐流汗而出上乃召同知枢密院事向敏中等谓之曰张洎上言果为吕端所料朕以其疏还之矣上初以田绍斌为李继隆之副继隆遣护军冯讷入奏言洛浦之败绍斌握精卒登堊上顾望不救自言灵武非我不能守欲圖方面有异志上大怒曰是尝背太原来降今日复首鼠两端真贼臣也立遣使捕繫诏狄鞫问贬为右监门卫率府副率虢州安置以慕容德知灵州殿前都指挥使王超为夏麟府州都总管兼都排阵使上以李继隆言绍斌逗遛境上乃部分诸将继隆自环州范廷召自延州王超自夏州步军都虞侯丁罕自庆州西京作坊使张守恩自麟州五路率兵抵乌白池皆授以方畧师已有期银夏钤辖卢斌求对恳言曰蕃夷之族马骄兵悍往来无定败则走境疾战沙漠非大兵所利不若坚保灵州于内地多积刍粟以师援送苟其至也会兵首尾擊之庶几无枉费且不失固国之上策上不从改授斌环庆钤辖领兵二万为继隆前锋斌谓继隆由灵州趋乌白池月余方至若自环州橐驼路纔十日程耳继隆因遣其弟继和驰驿上言赤怪路回远乏水请自清冈峡直抵继迁巢穴不及援灵州上怒召继和于便殿诘之曰汝兄如此必败吾事矣因手书数幅切责继隆命引进使周莹赍诣军前莹至兵已发矣

九月继隆与丁罕守恩见贼不擊率兵归范廷召遇贼大小数十战斩首五十级生擒指挥使等二十七人马二千匹上初以口兵崇政殿列阵为攻撃之状刺射之节且令多口及遇贼布阵万弩齐发贼无所施其技矢纔一发贼皆败走凡十六战而抵其巢穴悉焚荡之贼中老幼不能走者继迁悉埋于沙中但露其首部落降者皆曰人马死者大半不能化矣夷语谓活为化言不能自活也上因顾马步军都虞侯传潜等曰此行合战与师还之期悉如所料但诸将不能尽依方略致此贼遁逸朕自即位未尝如此杀戮盖事不可容耳师兴以来夏秋之际躬自谋度炎热尤甚未尝宁息大抵行军布阵当负持重虽口勇者率数千人以先犯贼亦无能损益适足挠乱行伍朕每深诫之违令者必斩果无敢轻率者布阵乃兵家大法非常情所究小人有轻议者甚非所宜朕自为阵圖与

王超令勿妄示人超回曰汝可取圖观之潜等再拜谢而退初命五将出师卫州团练使李重贵实为麟府路浊轮寨都将得对便殿因言贼居沙迹中逐水草牧畜便于战鬪利则进不利则走今五路齐入彼畏我兵势太盛或不接战且谋遠遁欲追则人马乏食将守则地无坚垒贼既未平臣輩何颜以见陛下上善之赐以御劍又累遣使抚劳及诸将果无大功上思其言命重贵为并代副总管

三年二月李继迁以蕃部归顺者众遣兵屯駝橐口西北双堆以遏絕之李继隆遣都虞侯田敏与内殿崇班刘承蕴等讨之破其众万余斩首二千级获战马铠甲万计继迁单骑遁去三月傅潜等言护送二十五州军刍粟已入灵州会上不豫因止其出师

太平治迹统类卷二

●钦定四库全书

太平治迹统类卷三

(宋) 彭百川 撰

太宗圣政

太平兴国二年口众思广振淹滞以资其口又于科场中非敢望拔十得五之具矣建隆初三馆所藏书仅口诸国尽焚其圖籍惟蜀江南最多得蜀书一万江南书一万余卷又下诏开献书之路于是天下书复集三馆篇帙稍备自梁氏都汴正明中始以今右长庆门东北小屋数十间为三馆湫隘纒蔽风雨周庐檄道出于其侧卫士驺卒朝夕喧杂每诸儒受诏有所论撰即移于他所始能成之皇上初即位因临幸周览顾左右曰若此之陋岂可蓄天下图藉延四方贤俊也即诏有司度左升龙门东北旧章辂院别建三馆命中使督工徒晨夜兼作其栋宇之制皆亲规画自经始至毕功临幸者再轮奂壮丽甲于内庭 二月丙辰朔诏赐名为崇文院西序启便门以备临幸尽迁旧馆之书以实之院之东廊为昭文书南廊为集贤书西廊有四库分经史子集四部为史馆书六库书籍正副本凡八万卷策府之文焕乎一变矣 丙申合祭天地于南郊大赦国初以来南郊四祭及感生帝皇地祇神州凡七祭并以四祖迭配上即位但以宣祖及太祖更配于是合祭天地始奉我太祖升侑焉 六年三月诏中外文武百官等自今或知民间利病及时政得失上书直言无有所隐 冬十月癸酉羣臣奉表加上尊号曰应运统天睿文英武大圣至明广孝凡三上乃许之 十一月甲辰改政武德司为城隍司上尝遣武德卒潜察遠方事有至汀州者知州王嗣宗执而杖之缚送阙下因奏曰陛下不委任天下贤俊而猥信此輩为耳目切为陛下不取上遂大怒遣使械嗣宗下吏削秩既怒解嘉嗣宗直节令迁其官 庚戌上亲享太庙辛亥合祭天地于圜丘大赦御干元殿受册尊号先是有秦再思者上书愿勿再赦且引诸葛亮佐蜀数十年不赦事上颇疑之以问赵普普曰国家开创以来具存彝制三岁一赦所谓其仁如天尧舜之道也刘备区区一方不足师法上然其对赦宥之文遂定 七年四月以枢密直学士窦偁中书舍人郭贇并叅知政事五月上谓赵普曰朕每读书见古帝多自尊大深严宜谁敢犯颜言事蓋不降情



接纳是自蔽聪明或喜赏怒刑岂能服天下之心哉普曰帝王若赏罚无私内外无间上求其理下竭其诚驯致太平亦不为难事上又问治民之道复有何术普曰陛下恤念生民每闻利病无不即日施行古圣王爱民之心止于此矣六月□删正之或荐王薄成都王着有□充翰林侍读 冬十月□兵者不祥之器圣规戒每退□正道以齐□矣更俟五七年普曰陛下爱民之意发□□□是月改讲武殿为崇政殿□朕亲选多士殆忘饥渴召见临问以□度使岩野无遗逸而朝廷多君子尔朕每见□间有端雅为众所推誉者朕代其父母喜或召拜近臣必为择良日欲其保终吉也朕于士大夫无所负矣一日又谓宰相曰唐置采访使盖欲察官吏善恶民间疾苦然所命者官高则权势太重官卑则威令不行又所过州县承迎不暇岂能审知利害但虚有其名耳曷若谨选羣才各分任使有功无过但国家选才最为切务人君深居九重何由徧识必须采访苟称善者多即是操履无玷若择得一好人为益无限古人言得千良马不如得一伯乐十利劔不如得一欧冶此言殊有理朕孜孜访问正要求人庶得良才以充任使也赵普曰帝王进用良善实佐太平之理然于采择要在得所盖君子小人各有党类先贤谓观过各于其党不可不谨也上然之 七月叅政郭贄坐事黜之荆南中书惟赵普宋琪等普恩礼稍替将复命相廷臣独李昉宿旧上以琪先入庚辰以琪为刑部尚书昉守本官叅政 八月诏军国政要委李昉撰录【官制门】九月乙丑上谓宰相曰朕视万民如赤子念其耕稼之勤春秋赋租军国用度所出恨未能去之比令两税三限外特加一月而官吏不体朝贄自求课最恣行捶撻督令办集此一事犹伤和气宜下诏申儆之乃诏诸州长吏察访县属有以催科用刑残忍者论其罪又谓宰相曰民诉水旱即使检覆立遣上道犹恐后时颇闻使者或逗遛州县虐赋■〈禾恩〉违期日行鞭捶民亦俟检覆改锤若此稽缓岂朕勤恤之意乎自今遣使检覆其地之远近事之大小立限以遣之 十月上又谓宰相曰近日内外政事渐成条贯远近官吏无不畏谨朕思之不觉自喜日行好事利益于人便是修行之道假如饭一僧诵一经不知何功德朕夙夜孜孜固不为己每焚香惟愿民庶安辑不近理之事断不为也大凡为君为臣常宜兢畏不可放逸后唐庄宗夹河相持千征万战备尝艰苦天下甫定便恣溺惑不及三年果致倾覆若此可为鉴戒宋琪曰陛下勤俭于己厉精政务以百姓心为心所谓其身正不令而行也是月司徒兼侍中赵普罢为武胜节度使兼侍中十一月壬子以叅政宋琪李昉并本官同平章事上尝谓曰世之治乱在赏与罚当其功罪无不治琪曰赏罚二柄□赏罚至公未有不致太平也昉初□疑多逊屡诸昉人或告昉□上语及多逊事昉□直一钱昉始□□□□朕布素时□碑之卧治因诗导之对曰普昨至中书谓无阶上答庶来世得効犬马之力臣既谕君臣始终之分可谓尽善矣壬申李穆吕蒙正李至并为左谏议大夫参知政事枢密学士张齐贤王沔并为右谏议大夫同签事枢密事上因谓之曰朕为官择人惟恐不当今两制之臣十余皆文学通优操履方洁穆居京府尤好严肃故兹奖推公也上又曰朕览前书备见歷代治乱太抵君臣之际先要情通则道合故事皆无隐言必可用朕厉精

求治卿等为朕股肱耳目设有阙政宜悉心言之断在必行采访外事条白于朕虽浮泛之说亦以闻也凡人在下位见当世之务不合理者则怏怏于心得列高位得以献可替否尽展素所蕴蓄矣或所言不中程度亦当共议而更之俾协于道朕每行之事偶有未当久之寻绎唯自咎责耳固不以居尊自恃使人不敢言也宋琪曰前代羣臣上章论事或比之触龙鳞今陛下喻臣等以事无长短并许敷奏彼思贤若渴从谏如流者要未能比方我圣德也敢不竭诚上副明诏

雍熙元年三月选秘书丞杨延庆等十余人分知诸州上谓宰相曰刺史之任最为亲民苟非其人则民受其祸□ 乙丑召宰相近臣赏花于后苑上因曰春气暄和万物畅茂四方无事朕以天下之乐为乐宜令侍从词臣各赋诗赏花赋诗自此始是日羣臣奏事退上谓之曰卿等所奏簿书乃是常事唯时务不便尤须极言其失无有所隐朕当裁酌从长而行苟言不当亦不责也宋琪曰陛下英明临照无所不周而尤虚怀听纳所恨愚短不能上副圣心 五月丁亥幸城南观麦还幸玉津园观鱼宴射谓近臣曰朕观五代以来帝王始则勤俭终则乃忘其艰难恣为逸豫不恤士众妄生猜忌覆亡之速皆自贻也在人上者当以为戒 丁丑干元文明二殿灾 丁亥诏求直言其略曰既延灾于正殿盖示谴于渺躬岂非刑赏有愆措置乖当或近习屏蔽致物情壅塞赋调未得均一贤良多所沦滞有一于此足斲政经中外羣臣各期无隐因谓宰相曰朕访求谏直以规己失昔禹拜昌言世称其明今之谏者苟能切中时病朕岂惜夏禹之拜乎且为君之道要在广闻外事分别善恶朕御天下兢兢业业行将十年每念封疆万里身居九重人情未能尽达若全不采听则官吏可否生民利病何从而知古者凝旒黜纒于今世则未尽理国之理宋琪曰□所以高视广听导达物情陛下□伸理之官吏惰慢者□不倦遂致和□或知民□壅塞故□辞狂悖上不之罪□帝王多以尊极自居朕每与卿等款曲商榷时事盖欲使卿等直道而行杜绝请托勿以众口□上谓宰相曰闻台中鞠狱御史多不躬亲委之胥吏民不冤法不滥岂可得也乃诏御史革狱必须躬亲不得专任胥吏

八月癸巳有布衣以皂囊封书献上者上览之皆常事也且辞多狂妄上弗加责 九月上谓宰相曰今岁西成四方大稔人民亦无疾疫皆上天垂佑所致当与卿等力行数事以答天意 癸巳岚州献牝兽一角似鹿以为祥麟宰相宋琪等拜表称贺上曰珍禽奇兽奚益于事方内大宁风俗淳厚此乃为上瑞也 二年秋七月上谓宰相曰国家以百姓为本百姓以食为命故知储蓄为急务昨江南灾旱甚急遣使赈贷果无流亡盗贼之患若非积聚何以救之 庚申诏诸路转运使及诸州长吏专切督察知仓官吏等依时省视仓粟勿使毁败其有计度支用外设法变易或出棗借贷与民及转输京师如不省视而致损官粟者虽去官犹论如律 九月己亥坊州献一角兽上且谓宰相曰时和年丰兆民安泰斯为上瑞鸟兽草木夫何足云十二月上谓李昉等曰中书枢密朝廷政令所出治乱根本系焉且天下广大卿等与朕共理当各竭公忠以副任用人谁无媮故之情苟才不足称不若遗之财帛耳朕亦有旧人若果无取未尝假以名器也卿等其戒

之 三年七月左谏议大夫签书枢密院事张齐贤言事颇忤于上意于是上问近臣以御戎计策齐贤因请自出守边 戊子授齐贤给事中知代州与都部潘美同领沿边兵马 十月丙申朔上出飞白赐宰相李昉等因谓曰朕退朝未尝虚度光阴读书外常留意于真草近又学飞白此虽非帝王事业不犹愈于声色畋游乎昉等顿首谢 左拾遗真定王化基常乐范滂有揽轡澄清之志献澄清五畧书奏上嘉纳其言有意大用谓宰相曰化基自结人主诚可赏也又曰李沆宋湜皆嘉士即令中书并化基召试庚子并除右补阙知制诰各赐钱百万沆湜时皆为著作郎直史馆上□□□□□人息钱别赐钱三十万偿之□任每命一词臣必密加谘访察其器识然后授之尝谓左右曰□闻人言朝廷命□容易哉

端拱元年正月丙子上作东郊籍田诏曰国之上瑞惟丰年尔自累岁丰稔人无疾疫第今兹德化未洽天贶若是能无惧乎 二月先是有翟马周者击登闻鼓讼李昉身任元宰属北戎入寇不忧边思职但赋诗饮酒并置女乐等事皇上于是召翰林贾黄中草制授昉右仆射罢政黄中言仆射师长百僚旧宰相之任今自工部尚书拜乃殊迁非黜责之义也若以文昌务简均逸为辞庶几得体 庚子昉罢为右仆射 山南东道节度使兼侍中赵普为太保兼侍中给事中参知政事吕蒙正为中书侍郎兼户部尚书平章事上谕普曰卿勿以位高自纵勿以权势自骄但能谨赏罚举贤能弭爱憎何忧军国之不治朕若有过卿勿面从古人耻其君不尧舜卿其念哉蒙正质厚宽简有重望不结党与遇事敢言每论政有未允者必固称不可上嘉其无隐故与普旧德为之表率也蒙正晚辈骤进与普同位普甚推许之 陈王元僖进封许王韩王元侃为襄王元份为赵王益王元杰为剑南东西两川节度使 上手诏戒元僖等曰汝等长自深宫夫帝子亲王先须克己厉精听卑纳谏每着一衣必悯蚕妇餐一食则念耕夫至于听断之间勿先恣其喜怒朕每亲决庶政岂敢惮于焦劳礼接羣臣无非求于启沃汝等勿鄙人短勿恃己长乃可永守富贵而保终吉先贤有言曰逆吾者是吾师顺吾者是吾贼不可以不察也 枢密副使王沔为户部侍郎叅知政事御史中丞张宏为工部侍郎枢密副使 丙午诏诸道民有艰食者所在发廩赈之 上谓宰相曰累年以来百物丰阜自京师达于四方并无灾沴五谷顺成若非上穹降福何以及此今郡县至广生齿甚众每一方小有凶歉即命赈给虽不能遍亦表朕勤恤之意也赵普对曰文王墓枯骨天下称仁夫民犹草也草上之风必偃若帝王用心行道上合天意民自悦服臣等每闻陛下发言必思为苍生建长久利宁忧和气不降也 己酉以屯田员外郎杨砺为库部员外郎充襄王府记室叅军砺鄆人周广顺时初游澶州持所为文谒世宗常独处僧舍梦一人衣冠甚古目砺曰汝能从我游乎砺即随往顷之覩宫卫严邃若非人间见大殿上真人王者衣冠秉圭南向揔三千余众砺升谒案置籍录人姓名砺见己名冠首王曰我非汝师指一人曰此来和天尊也天尊笑曰此去四□寤而志之砺后受命谒藩府知□里又请对曰全卿勿以为虑官考课仍奉朝请特赐□精求理欲文说论以致太平患□上 三月甲子



下诏申警之曰四聪百职交修用熙于庶政而有位之士颇尚于宴口之任率多于拱默期格于道不亦难乎应两省谏官等职在规箴任司献替至于政教之堙鬱典章之阙漏国蠹民瘼悉当言无有所隐其后上封事者颇众 上谓李惟清曰朕读汉书贾谊传夜分不倦谊当汉文帝天下平治指论时事尤为剴切至云长太息堪痛哭者盖欲感动人主不鳞真忠臣明国体者也今廷臣有似此人者否惟清曰陛下登位以来亲选贡士所谓俊彦盈庭者矣若言事中理少赐奖拔苟不娴忌讳亦望含容即贾谊之流复出矣上曰朕聪明虽不逮汉文然每上章言事未尝不再三省览求其理道或益国便民即付宰相行之识浅事乖寝而不采未尝加罪盖欲开言路广视听若有言大事知大体者朕当擢以不次之位也御史中丞常劾奏开封尹许王元僖不法诉于上曰臣天子儿以犯中丞故被鞫愿赐宽宥上因曰此朝廷议制孰敢违之朕若有过臣下尚加纠谪汝为开封尹可不奉法耶论罚如式 十月癸未上谓侍臣曰朕每念古人禽荒之戒自今除有司顺时行礼之外不于近甸游猎五坊鹰犬悉解放之庶表好生之意遂诏天下勿复以鹰犬来献 十二月上尝谓宰相曰国之兴衰视其威柄五代承唐季丧乱之后权在方镇征伐不由朝廷怙势内侮故王室微弱享国不久太祖光宅天下深救兹弊暨朕纂位亦徐图其事思与卿等谨守法制务振纲纪以致太平 上又曰至公之道无党无偏有国者能行之太平固不难致赵普曰天发生于春夏肃杀于秋冬不私一物此所以能长久王者所宜法也 二年正月癸巳诏文武臣僚各陈备边御戎之策右正言直史馆江南温仲舒章独先上上大悦乙未赐仲舒金紫 初左正言直史馆下邳寇准承诏极言北边利害上器之谓宰相曰朕欲擢用准当授何官宰相请用为开封府推官上曰此官岂所以待准者耶宰相请用为枢密直学士 上沉思良久曰且使为此官可也秋七月己卯拜虞部郎中枢密直学士准尝知巴东成安二县其治一以恩信每期会赋役未常出符移惟具乡里姓名揭县门而百姓争赴之无抗者先是诏诸王府僚各献所著文上阅视曰其才则见矣其行孰优哉以冀府记室参军毕士安对上曰正合吾意口先是宰相赵普奏疏言口参切疑大限非遥深恩口山河至广郡县尤多口息防微虑患必资口此时机务须藉口焦劳之虑千官先翊口同僚共事非无谨畏礼稍存缄默宁济急需口臣切见工部侍郎张齐贤数年口公私识者尽为当才在朝岁月未久日虽闻消息未测缘由向来微有传闻口当凡言大事须有悔尤其如义士忠臣不顾身之口奸邪正直久远方知齐贤素蕴机谋兼全德义从来差遣未尽器能虑淹经国之才堪副济时之用如当重委必立殊功臣此疏特乞留中所贵全系君恩无貽众议复以札子言齐贤德义素为乡里所推而又深知福业谨择交游中外卿士举无出其右者伏念臣全族叨荣半身入土未谐答报常恐参差惭无致主之能但有荐贤之志观兹方正方敢举明若朝廷委任忠良则社稷增添柱石朝行夕死是所甘心亦聊遂微臣报德酬恩万分之一也

甲申以齐贤为刑部侍郎枢密副使甲子上谓宰相曰自古未常不欲进君子退小人然君子常少小人常多吕蒙正曰此系时运盛衰国家兴隆则君子道长其晦迹丘园盖

畏小人用事耳有国家者尤宜早辨上深然之 九月上以岁旱减膳徧走羣望皆弗应是夕手诏赐宰相赵普等曰万方有罪罪在朕躬自星文变见以来久愆雨雪朕为人父母心不遑宁直以身为牺牲焚于烈火不足以答谢天谴当与卿等审刑政之阙失念稼穡之艰难恤物安民庶祈眷佑时普被病请告即以授吕蒙正等于是蒙正等诣长春殿谢曰陛下临御以来躬亲万机勤恤民隐未常有纖微之失盖臣等调燮无状致此愆尤汉制水旱策免三公臣等实任其责愿上印绶避贤者路上慰免之 十二月庚申诏自后四方所上表宜只称皇帝 辛酉吕蒙正等奏曰陛下功德茂盛但可增益尊名今忽省去羣情无不震惊上曰皇帝二字亦不可兼称朕比欲止称王属以诸子封王为不便耳 甲子赵普率百官上表请覆尊号不许戊辰又上法天崇道文武六字诏去文武二字许之

淳化元年正月太保赵普自去秋以病免朝谒止日赴中书视事有大政则召对及冬病益甚乃请告车驾屡幸其第省问赐予加等普遂称病笃三上表致政上不得已戊子以普为西京留守兼中书令 冬十月乙巳赐知白州蒋元振绢米振江东人清苦厉节亲属多贫不能贍养闻岭南物贱因求其官寄家潭州 又赐知郢州项城县姚益恭绢粟益恭居官以清干闻召赴阙老幼遮道不絕益恭逮夜开城门遁去其在项城口数十人三遮转运使乞留口益恭未代采访使言口书监李至进新校口人君当淡泊口焉朕年长宅无口之不善者改之斯可口岁旱蝗手诏吕蒙正等口德之所致也卿等当于文德口上三日不雨卿等共焚朕以答天谴匿诏书翌日而雨蝗尽死 四月辛巳以张齐贤陈恕并参知政事张逊兼枢密副使温仲舒寇準并为枢密副使初王沔怙恩招权齐贤陈恕薄其所为二人在中书沔不安虑百官以中书旧事告齐贤己丑左司諫王禹偁上言请自今羣官诣宰相枢密并于都堂请见不得于本厅揖延宾客以防请托沔喜即白上施行之仍令御史台宣布中外左右正言直史馆谢泌上言以为如此是疑大臣以私也书曰任贤勿贰去邪勿疑设若杜公堂请谒之礼岂无私室乎塞相府请求之门岂无他径乎此皆非推赤心以待大臣大臣展四体以报陛下之道也王禹偁识量容浅昧于大体妄率胸臆以蔽聪明狂躁之言不可行用上览奏嘉叹即命追还前诏仍以泌所上表送史馆五月左正言谢泌数上章奏论时政得失上嘉其忠荅丙辰擢左司諫赐金紫并钱三十万泌一日得对便殿上复面加赏激泌谢曰陛下从諫如流故臣得以竭诚昔唐末有孟昭图者朝上諫疏暮不知所在前代如此安得不乱上动容久之 七月己亥上谓三司使李惟清等曰夫货财所以致用度或取之不以其道违朕惠养庶民之意岂能召和气乎当共务均节无致厚敛于下岂非四方刑狱有冤滥郡县吏不称职朝廷政治有所阙乎因遣常叅官十七人分诣诸路决按刑狱是夕雨庚戌宰相率百官称贺上曰朕孜孜求理视民如伤内省于心无所负矣而久愆时雨盖阴阳之数非朕之罪所忧者狱吏舞文巧诋计臣聚敛掎克牧守不能宣布诏条公卿莫肯修举职业耳李昉齐贤及贾黄中李沆慚惧拜伏退上表待罪上曰朕之中心苟有所懷即欲与卿等言之

既言之即无事矣然中书庶务卿等尤宜尽心也昉等复上表称谢 六月甲申有蝗自东北来蔽天经西南而去上谓宰相曰朕素不识此物今见其势甚盛必恐害其田稼朕将诣所集处视之卿等何策可去□顿雨则不能飞为灾与否庶故当感通天地臣等□蝗尽殪一时京师□城臣门置常平以参官□九月壬戌诏以□奉表加上尊号曰法天时和歲丰万姓阜康朕之愿也上表终不许己未上幸秘阁百官饮既罢又命皇城使王继恩召□殿前都指挥使戴兴等宴饮纵观羣书上意□知文儒之盛也 十月戊寅诏诸道知州通判厘□朝官令録判司簿尉等有治行尤异吏民畏服及居官廉洁莅事明敏斗讼衰息仓廩余羨寇盗剪灭部内肃清诏令本道转运使以名闻并驿赴阙亲问其状各加旌赏【云云】 二年八月上因谓近臣曰国家若无外忧必有内患可惧也帝王用心常须谨此 丁丑户部侍郎参知政事王沔给事中参知政事陈恕并罢守本官初给事樊知古出任转运使甚得时誉及为户部颇以职事不治诏书切责名益减雅与恕亲善上每念及计司事有乖违者恕具以告之欲令知古尽力知古后因奏对遂自解上问知古何从得此知古曰陈恕告臣上怒泄漏禁中语疾知古轻脱皆罢之上尝谓近臣曰近有人言储贰事朕观前代治乱岂不在心蓋诸子幼冲未有成人之性僚属悉择良善之士台隶辈朕亦自择拣不令奸险巧佞在其左右读书听书咸有课程待其成长自有裁制何言事者未谅此心耶 己亥命左仆射李昉参知政事张齐贤并平章事翰林学士贾黄中李沆并为给事中参知政事沆初判吏部铨因侍曲宴上曰李沆风度端凝贵人也未几遂与黄中俱蒙大用焉上尝召见黄中母王氏命坐谓曰教子如是真所谓孟母矣作诗赐之班赐甚厚庚子右谏议大夫权御史中丞王化基为御史中丞十月左谏议大夫韩丕起寒素以冲澹自处不奔竞于名宦上甚嘉之 己丑命丕守本官知制诰翰林学士三年正月戊午诏诸道转运使自今厘革务平议狱讼漕转金谷成绩居最及有建置之事果利于民者所在州府军监每歲终件析以闻非殊异者不得条奏 上谓宰相曰天下至广赖羣才共治之今岁登第者又千余人皆朕所选擢此等但能自检美替而归则驯致亨衢未易测也时诏刻礼记儒行篇赐近臣及京官受任于外者并以赐何等令为座右规诫初内殿策士例赐御诗以宠之至陈尧叟始易以箴用崇勉励暨孙何则诗箴并赐时论荣之 十一月许王元僖薨按礼诸祀不废尚书宋琪等上奏请以来年正月上辛合祭天地从之四年辛卯合祭天地于圜丘以宣祖太祖配二月上以江淮两□浙恐攘夺抵冒禁法乙卯考功员外郎直秘阁□处宣达朝旨询求物议使得上闻案决庶狱□宜官吏有罢软不□未便亦许条奏凡朝用悉出于三司故□费以爱民惜费为本□多阙食请格残税□惜若实惠及民虽每年□削贫民安得良吏为朕规制使□意乎 三月辛亥诏诸道知州通判限一月具□平税赋招集流亡惠恤孤穷窒塞奸幸及民间未便等事共为一状附疾置以闻它有所见听别上疏论列委中书舍人详定可否若可悉取当议旌酬苟务因循必申惩戒四月壬寅上谓宰相李昉等曰朕孜孜听政所望日致和平而在位之臣未进用时皆以管乐自许既得位乃竞为循默



曾不为朕言事朕日夕焦劳略无宁日事主之道当如是耶昉等惶惧拜伏上曰事有未至与卿等言之亦上下无隐尔 六月壬申知枢密院事张逊同知院事寇准并罢二人不协上怒故贬逊而罢准以涪州观察使柴禹锡为宣徽北院使知枢密院事枢密直学士刘昌言为右谏议大夫同知院事右谏议大夫枢密直学士吕端守本官参知政事昌言骤膺大用不为时望所归或短之于上前且言其词语难晓上曰唯朕能晓之 秋七月先是上急召广南转运使向敏中归阙擢工部郎中一日御笔飞白书敏中及虞部郎中鄆城张咏姓名付宰相曰此二人名臣也朕将用之左右因称其才己酉并命为枢密直学士 八月丙辰朔上草书宋玉大言赋赐翰林学士承旨苏易简因拟作大言赋以献上览赋嘉赏手诏褒之易简直禁中以水试欹器属小黄门宣事密奏而不识其名及晚朝上曰卿所玩得非欹器耶易简曰然乃江南徐邈所作即取至便坐上亲较试再三嗟赏易简进曰臣闻日中则昃月盈则亏器盈则覆物盛则衰愿陛下持盈守成谨终如始固万世基业则天下幸甚九月是秋自七月初雨至是不止壁垒庐舍多为之坏物价踊贵近甸秋稼多败流移甚众陈颖宋亳间盗贼羣起商旅不行上以阴阳愆伏罪由公辅切责宰相李昉及参知政事贾黄中李沆曰卿等盈车受俸岂知野有饿殍乎昉等惶惧拜伏黄中出语人曰当时但觉宇宙小一身大恨不能入地耳冬十月辛未右仆射平章事李昉给事中参知政事贾黄中李沆左谏议大夫同知枢密院事温仲舒并罢守本官先是上召翰林学士张洎草制授昉左仆射罢平章事洎上疏曰昉因循保位霖■〈雨上溜下〉百余日陛下焦劳惕厉忧形于色昉居相位任在燮调阴阳乖戾如此而昉晏然无引退之意矧中台仆射之重百口重不侔因而授之口易简外坦率在翰林八年特召见李沆在易简下先叅政事上稔其名望而易简以亲老急于进用因贾李等罢即命易简代之易简母薛氏入禁中上问曰何以教子遂成令器对曰幼则束以礼逊长则教以诗书上顾左右曰今之孟母也非此母不生此子矣 壬申以左谏议大夫寇准出知青州上顾准厚既行念常不置语左右曰寇准在青州乐否对曰准得善藩宜以为乐也累数日辄复问左右如初其后有以揣帝且复召准用者因对曰陛下思准不少忘闻准日置酒痛饮未知亦念陛下否上嘿然翰林学士张洎知吏部选事尝引对选人上顾之谓近臣曰张洎富有词藻至今尚苦心读书江东士人中首出也然缙绅当以德行为先苟空持文学亦无所取吕蒙正曰裴行俭不取王杨卢骆政为无德行耳德行为先诚如圣谕京畿民牟晖击登闻鼓诉家奴失豕豚一诏令赐千钱偿其直因语宰相曰似此细事悉诉于朕亦为听决大可笑也然推此心以临天下可以无怨民矣闰十月丙午上曰清静致治黄老之深旨也夫万物自有为以至无为无为之道朕当力行之至于汲黯卧治淮阳宓子贱弹琴治单父此皆行黄老之道也 宰臣吕蒙正曰老子称治大国若烹小鲜夫鱼挠之则溃民挠之则乱今之上封事议制置者甚多陛下渐行清静之治以镇之 十二月南至御朝元殿受朝上孜孜为治谓左右曰寸阴可惜苟终日为善亦无几耳可不勉乎 上曰朕每议兴兵皆不得已古所谓王师如时雨盖其义也今亭障无

事但当修德以懷遠此则清静致治之道也蒙正曰古者以简易治国者享祚长久陛下崇尚清静实宗社无疆之休也 丁卯宴近臣于长春殿以武宁节度使曹彬来朝劳之也诏翰林学士钱若水枢密直学士张咏并赴宴旧制每命将帅出征劳还宴于便殿当直翰林学士文明枢密直学士皆预坐开寶中梁迥为阁门使白太祖曰陛下宴犒将帅安用此辈遂罢之至是始复从参知政事苏易简之请也 五年正月上语蒙正曰夫否极则泰物之常理晋汉兵乱生灵凋丧殆尽周祖自邺南归京城士庶皆罹掠夺下则火光上则慧星观者恐栗当时谓无复太平之日矣朕躬览庶政万事粗理每念上天之赋致此繁盛乃知治乱在人上欲遣人使朔方谕中书选才而可责以事者蒙正退以名上不许他日又问复以前所选对问益急蒙正终不易上曰卿何执耶必为我易之蒙正因固称其人□以害国□徐□用□嘉其有□善好直咏王尝□观之众皆褒叹坦曰但见血山安得假山王惊坦曰州县督税上下相急剥里胥临门送县鞭笞血流满身愁苦不聊生此假山皆民租非血山而何上亦为假山未几有以坦言告於上上曰伤民如此何用山为命急毁之王每有过失坦未尝不尽言蒙正宫中自王以下皆不喜左右乃教王称疾不朝上日使医视之踰月不瘳上甚忧之召王乳母入宫问王疾增损乳母曰王本无疾徒以翊善姚坦检束王起居曾不得自便王不乐故成疾耳上怒曰吾选端士为王僚属者固欲辅王为善耳今王不能用规谏而又诈疾欲使朕逐去正人以自便何可得也且王年少未知出此必尔辈为之谋尔因命捽至后园笞之数十召坦慰谕之曰卿居王宫为羣小所嫉大为不易卿但能如此无患谗言朕必不聽 上曰幸门如鼠穴何可塞之但去其甚斯可矣近来纲运之上舟人水工有少贩鬻但不妨公一切不问却得官物至京无侵损耳吕蒙正对曰水至清则无鱼人至察则无徒小人情伪君子岂不知蓋以大度容之则庶事俱济昔曹参以狱市为寄正恐奸人无所容也陛下如此宣谕深合黄老之道 五月上语近臣曰朕虽德媿前王然于政事靡敢怠惰天下事急若奔驷日日听断尚恐有照烛不至者而况唐末帝主深处九重民间疾苦何由得知每一思之诚可深痛吕蒙正曰中书枢密院自来难处之地唐世帝王專委臣下致多阙失兼家族罕有保全今陛下躬决万机臣下止于奉行圣旨臣常欲与同列等言实深荣幸因再拜三呼万岁又曰唐末帝王臣下少得见面纵开延英亦被中人在侧何曾令臣言得一事赵昌言当时日开延英苟踰数刻史臣书之以为美谈今天下苟非陛下听断不倦则封疆万里岂致肃清斯所谓一人有庆兆民赖之也 上又谓近臣曰朕每日后殿自选循吏候选及三二百人天下郡县何愁不治迂儒因循之人并与诸州副使分司两京或且给俸禄不与差遣然后辈又如何消国家之食禄也以户部员外郎魏廷式自陝西至益州同勾当转运事廷式后当入朝奏事上曰有事当白中书廷式曰臣三千余里外乘驿而至以机事上闻愿取宸断非为宰相而来也即不时召对问方略称旨赐钱五十万令还任 八月以剑南招□招宣使王继恩为宣政使顺州防御使先是□贼功中书建议钦以为宣徽使上□矣不欲宦官干预政事宣□它官宰相恳言继恩□相等因命翰林学

士□立在昭荐□乱后□元侃为开封尹 元年八月日上谓□不扰之耳得人心莫若先以清静推是而行则虎兕亦当抚我则后虐我则讎信哉斯言也尔宜诫之 乙亥以諫议大夫寇准参知政事上因谓宰相吕蒙正曰寇准临事明敏今再擢用想益尽心朕常谕之以同德者事皆从长而行则上下鲜不济矣 冬十月丙戌以镇安行军马杨徽之为左谏议大夫毕士安并为开封府判官兵部郎中乔维岳寿王府记室参军水部郎中扬砺咨议司封员外郎夏侯峤并为推官徽之等入谢上召升殿赐坐谕以辅道之旨

十一月张洎性险诋尤善事宦官常引唐故事奏内供奉官蓝敏正为学士使内侍裴愈为副使上览奏谓曰此唐敝政朕安可踵其覆辙卿言过矣洎惭而退然以文采清丽巧于逢迎上卒喜之 丁卯日大雨近臣称贺上因言多士满朝朕试令索班簿阅之周行之人鱼贯栉比不胜其众比于其中求一材中转运使三司判官者了不可得虽多亦奚以为乎朕常谓求贤之道莫若责举主遂诏蒙正以下至知制诰各举有器业可任以事者一人蒙正奏曰臣位宰相可以进退百官令独举一二人是天□至道元年正月度支判官陈尧叟梁鼎上言唐季以来农政多废民率弃本不务力田是以家鲜余粮地有余利臣等每于农畝之业精求利害之理必在乎修垦田之制建用水之法讨论典籍备穷本末自汉魏晋唐以来于陈许邓颖暨蔡宿亳至于寿春水利垦田陈迹俱在望选稽古通今之士分为诸州长史兼管农事大开公田以通水利上览奏嘉之即遣大理寺丞皇甫选光禄寺丞何亮传往诸州按视经度其事因诏以官仓放数十万石代京畿及内郡民为种有司言请量留以供国上曰时雨既降土膏初起民无种则不能尽地利但竭廩以给之至秋有百倍之获国马食以刍藁可矣

夏四月己未吏部尚书平章政事吕蒙正罢为右仆射参知政事吕端为户部侍郎平章事上谓蒙正曰仆射师长百僚朕以中书多务与卿均劳逸耳又谓端曰庙堂之上官无虚授但能进贤退不肖便为称职耳卿宜勉之先是上作钓鱼诗断章云欲饵金钩深未达磻溪须问钓鱼人意以属端也后数日遂罢蒙正而相端端歴官仅十四年至是骤被奨遇端为相持重识大体以清浄简易为务□端罕所建明一日出内手□端详酌乃得闻奏端谨□为礼部侍郎翰林学士□月翰林学士□疋补濡徒步来谒□亏价者上曰□己知诏重造州县二□寿王元侃为皇太子改□为父后见任官赐勲一转诏皇□天佑以来中国多故不遑立储二□上始举而行中外胥悦初参知政事寇准自青州入见上曰朕诸子孰可以付神器者准曰唯陛下择所以付天下之望者上遂以元侃为开封尹至是立为太子京师之人见太子喜曰真社稷之主也上闻之趋宫中语后嫔九宫皆前贺 寇准常奏事切直上怒而起准攀上衣请复坐事决乃退上喜叹曰此真宰相也又语左右曰朕得寇准犹唐太宗之得魏征也 癸巳以尚书左丞李至礼部侍郎李沆并兼太子宾客见太子如师傅之礼太子见必拜动皆咨询至等上表恳让不许至等入谢上谓至等曰朕以太子仁孝贤明尤所钟爱今立为储贰以固国本当赖正人辅之以道卿等可尽心调护若动皆由礼则宜赞成或有未当必须力言勿因循而顺从也



至于礼与读书之道可以裨益太子者皆卿等素习不假朕多训耳至等顿首拜

十二月上以时和年丰羣寇剪灭顾谓宰相曰国家自近岁以来锤兹艰运水旱作沴连年不稔河西蜀川相继叛乱飞刍挽粟千里骚然朕为其父母中心忧念无须臾之安由是内修政经外勤戎畧以至有司常职米盐细事并躬亲裁断普天之下九谷咸登塞北江南经粟流衍朕岂望纔经灾歉之后便覩兹开泰深自庆慰也吕端等相率称贺

丙申上顾侍臣曰自晋汉以来纪纲大坏朕承丧乱之后居临大寶即位之始览前王令典覩五代弊政以其习俗既久乃革故鼎新别作朝廷法度于时逺近滕口咸以为非至于二三大臣皆旧德耆年亦不能无异朕执心坚固靡与动摇昼夜孜孜勤行不怠于今二十载矣卿等以朕今日视始如何也虽未能上比三皇至于寰宇晏清法令明着四海遵朝化百司絶奸幸固亦无惭于前代矣 二年春正月辛亥合祭天地于圜丘大赦天下 二月李昉卒谥文正闰七月上谓宰相曰夫君子小人趣向不同君子畏谨务在不欺闇室执持名节造次靡渝小人则不然口外刚虽谈忠信而履行颇辟所以真伪口败其在官黜于货贿罔畏刑辟薛口州政以贿成士俗多以罗帛口州民谓之罗端公即可口为给事中先是口重其口准口怒以中书札口忿曰上日阅万机宁察口疏言并及岭南官吏除拜不口准力争不已又论曲直于上前上口州极初责知端州言事不已上欲召还准口徙知朗州道改通判广州准既罢极以母丧请内徙口命知洲口口九口右仆射宋琪卒礼部侍郎苏易简性嗜酒初入翰林告谢日饮已半酣其后沉湎不已上尝因接见诫约深切易简垂泪再拜翌日复具表称谢上乃亲批答以申奨励又草书戒酒二诗赐易简其母读之自是每入直不敢饮或休假在第宾客候之则已醉矣 十二月己巳易简卒上曰易简竟以酒败深可惜也 三年正月丙子以户部侍郎温仲舒礼部侍郎王化基并参知政事上不豫化基因入对备言頤生服饵之要翌日上语左右曰化基爱君无隐至于修养之道亦为朕言之 二月辛丑上不豫始决事于便殿三月壬辰不视朝癸巳崩于万岁殿温仲舒宣遗制真宗即位于柩前

### 太宗经制契丹

上自即位与契丹继好（阙）

太平兴国四年二月太宗亲征太原次邢州契丹遣使奉书问起居已而数万骑入寇以援太原至石岭關南郭进大破之太原平上将遂伐契丹诸将皆愿行然无敢言者殿前都虞侯崔翰独奏曰此事不容再举乘此破竹之势取之甚易上悦即命枢密使曹彬议调发屯兵六月庚申车驾北往发镇州丙寅次金台顿契丹据有之地也募其民为乡导遣浚仪孔守正等先趋岐沟關丁卯上躬擐甲胄率兵次岐沟關易州刺史刘禹以州降【东易州即岐沟關】东西班指挥使傅潜孔守正先至涿州击狄破之生擒五百余人戊辰上次涿州判官刘原德以城降己巳次盐沟顿民有得契丹之马来献庚午至幽州城南驻蹕宝光寺契丹万余众屯城北上亲率兵乘之斩首千余级余党遁去壬申部分诸将攻城命宣徽南院使潘美知幽州行府事癸未幸城西隅督诸将攻城桂州观

察使曹翰与洮州观察使米信率兵屯东南隅以备非常军士掘得蟹以献翰谓诸将曰水物而陆居失其所也且多足狄救将至之象又蟹者解也其班师乎甲申上以幽州城踰旬不下士卒疲顿输转四达复恐契丹来救遂诏班师车驾夕发命诸将整师徐还乙酉次涿州丙戌次金台驿内供奉官严承翰将卫兵千余人止之翰请车骑径往至则谕以方略众遂定反命不戮一人上甚嘉之庚寅命崔翰孟玄喆等留屯定州李汉琼屯镇州崔彦逵等屯關南得以便宜从事九月癸巳契丹大入寇镇州都钤辖云州观察使浚仪刘廷翰帅众御之先阵于除河崔进潜师出黑芦堤北緣长城口衔枚摄狄后李汉琼及崔翰亦领兵至上以阵图授诸将俾分为八阵大军□右龙武将军赵延进乘高望之□等方按图布阵相去百步□谓翰等曰主上委吾□若此而吾师星布合而击之可以等曰万一不捷则□其责翰等犹以擅改□隆曰兵贵适变何以预料□之翰等意始决于是分为二□战大破之狄众崩溃悉走西山投□计追奔至遂城斩首万余级获马千余匹□人俘老幼三万□及兵器军帐羊畜甚众□午捷闻手诏褒之

五年冬十一月癸丑關南言破契丹兵万余众斩首三千余级即以河南节度使崔彦进为關南兵马都部署十二月丁丑上因契丹遁去遂欲进攻幽州钦祚为都监威塞节度使曹翰充幽州东路行营壕寨兵马都部署登州防御使赵延溥为都监复命宰相问翰林学士李昉扈蒙等事之可否昉上奏曰北狄居边自古为患乘秋入塞往往有之一旦輒率师徒来扰疆場陛下栉风沐雨冲冒严凝亲御戎衣以攘民患维兹部族畏威而逃因而剪之易于拉朽况幽蓟之壤久陷外邦慕化之心倒悬斯切今若拥百万横行之众吊一方徯后之民合势而攻指期可定其如大兵所聚转饷是资且河朔之区连岁飞挽近经蹂践尤极萧然虽荐遇于丰穰恐不堪其调发属兹寒冽益复罢劳况今敌骑宵奔边陲宁肃若亲巡塞下震耀威容固足惧彼军心亦恐劳于大驾伏望申戒羽卫旅旆京都善养骁雄精加训练严勅边郡广积军储娴习武经缮修攻具蒞府藏之充溢洎闾里之富饶朞岁之间用师未晚上深纳其说即下诏南归上既还于京师议者皆言宜速取幽蓟左拾遗直史馆张齐贤上疏略云择卒莫如择将任力不及任人如是则边鄙宁边鄙宁则辇运减则河北之民获休息矣民获休息则田业增而蚕织广务农积谷以实边用且北人之心固亦择利避害安肯投死地而为寇哉伏望审择通儒分路采访两浙江南荆湖西川河东有受伪命其赋敛苛重者改而正之因而利之使赋税课利通济可经久而行为圣朝定法除去旧弊天下诸州有不便于民事者委长吏奏闻如敢徇蔽不以闻自当严加典宪使天下耳目皆知陛下之仁戴陛下之惠此以德怀遠以惠利民则幽蓟据地之俦沙漠羣聚之众擒之则屈膝在术内尔

六年春正月丁卯三交□絕□之所保多由□使安庆以其族□轶边民以安和□王诏书令发兵以应

七年冬十二月契丹主明宸子三人曰隆绪隆裕隆庆隆绪立尊母萧氏为太后改辽为契丹年十二岁母萧氏專其国政八年高阳關捕得契丹生口送至阙下戊□契丹

种族携贰虑王师致讨颇于近寨城为备上谓宰相曰戎人剽掠为务乃修筑城垒为自全之计耳曩者继元盗据汾晋周世宗及太祖皆亲征不利朕取之为世宗太祖刷耻亲擒继元今日视之犹机上之肉也当其保坚城结北狄为援岂易制乎宋琪对曰臣少陷狄庭备知戎马之数自晋末始强盛然种族蕃多其心不一自石岭關之败平继元緣边诸郡频有克捷以臣度之其部下携贰必矣国家不须致讨可坐待其亡久之上复谓宰相曰数有人自北边来侦知狄中事自朝廷增修边备狄人甚惧威我军主财吏盗官钱尽室奔入狄中至涿州州将不敢受悉遣还晋汉微弱边陲无尽节之臣率张皇事势以邀恩宠为自利之计今之边将皆朕所推择咸能尽心无复袭旧态也幽州四面平川无险固可恃难于控扼异时收获燕蓟当于古北口以口据其要害不过三五处屯兵设堡寨自絶南牧矣琪对曰范阳是前代屯兵建节之地古北口及松亭關野狐门三路并立堡障至今石垒基堞尚存将来平定幽朔止于处数置戍可也况奚族是契丹世仇倘以恩信招懷俾为外御自可不烦朝廷出师矣

雍熙二年二月丙戌上谓宰相曰朕览史书见晋高祖求援于契丹遂行父事之礼仍割地而奉之使数百万黎庶之众陷于戎狄冯道赵莹位居宰相皆遣令持礼屈辱之甚也戎狄贪婪啖之以利可耳割地甚非良策朕每思之不觉愤惋三年春正月戊寅先是知雄州贺令图与其父并州刺史怀浦及文思使薛维昭军器副使刘文裕崇义副使侯莫陈利用等相继上言自国家伐太原而北狄渝盟发兵以援非天威兵力决而取之河东之师几为迁延之役且狄主年幼国事决于其母其大将韩德让宠幸用事国人疾之请乘其衅以取幽蓟上遂以令图等言为然始有意北伐上初议亲征给事中叅知政事李至上言略曰陛下不离辇毂恭守宗庙示敌人以闲暇慰亿兆之瞻仰者策之上也大名河朔之咽喉或暂驻銮辂扬言自将以张兵势壮军威者策之中也若乃遠提师旅亲抵边陲北有戎援可虞南有中原口之恳切断鞅之狂愚臣之不肖耻在口尚书宋琪上疏略曰臣有平燕口奏愿加省览疏奏颇采用口径入与狄战胜之斩首千级平城薛超体被口庚辰制史赵彦口曹彬进壁于涿州口流矢督战愈急狄遂败口涿州潘美进围涿州刺史口降诏以希赞为本州岛观察使口面招安使大鹏翼等帅众来援行营口忠谓重进曰狄多骑兵利于平地不如乘险口州刺史朝城谭延美曰狄恃众易我若出其不意可克也于是重进阵压东偏数交锋胜败未决命部将荆嗣出西偏暮薄山崖以短兵接战狄投崖而下手斩余级狄势衄散卒千余人在野嗣呵止降之狄退屯土岭裨将黄明与战不利嗣谓明曰汝第顿兵于此为我救援当夺此岭遂力战克之追奔五十里抵仓头而还拔小沼直谷二寨嗣因留屯直谷居数日狄遣骑挑战势颇张重进召嗣合兵击却之狄乘夜复围直谷石门二寨重进遣嗣往救嗣曰今所部纔五百人狄众二万力不敌矣重进忧之问嗣谭策安出嗣曰谭延美方屯小沼有兵二千愿间道往邀其策应遂驰见延美延美曰狄势如此何可当也嗣曰但愿以全军就平州列队树旗别遣二三百人执白帜于道侧嗣乃以五百人疾駟往鬪彼见旗帜绵亘遠甚疑大军继



至狄虽众可破也延美许焉癸未嗣还力战一日五七合狄不胜将遁去重进遂以大军乘之狄骑崩溃生擒大鹏翼及监军马都副将何万通并契丹渤海千余人斩首数千级俘老幼七百人获马畜铠胄万计大鹏翼貌壮伟而勇健名闻边塞既擒之狄气夺曹彬入涿州遣步将浚仪李继宣等领轻骑渡涿河觐狄势乙酉狄帅众来攻继宣击破之于城南斩首千级获马五百匹杀奚宰相贺斯丁亥潘美转攻应州其节度使艾正观察判官宋雄举城降即受正本州岛观察使雄为鸿臚少卿同知应州雄幽州人也田重进围飞狐令大鹏翼至城下谕其守将定武军马步军都指挥使郢州防御使吕行德尚欲坚守重进急攻之辛卯行德乃与其副都指挥使张继从马军都指挥使刘知进等举城降诏升其县为飞狐军以行德为左骁卫将军顺州防御使继从为右屯卫将军檀州刺史知进为左监门卫将军重进又围灵丘丙申其守将步军都指挥使穆超举城降以超为右监门卫将军夏四月辛丑潘美克云州斩首千级田重进破狄援军于飞狐北斩首千级俘四百人壬寅米信破狄于新城斩首三百级狄众复集信兵稍却信独以麾下龙卫卒二百人御之被围数重矢下如雨信自射杀数人麾下多死信挥刀率从骑百余大呼突围杀数十人□等援之遂大破狄于新城东 乙巳田重进遣牙校部□宥之以鹏翼为右千□驾部员外郎梁裔□赞善大夫马务□于飞狐北杀首□命左拾遗张舒同知□右千牛卫将军领儒州□官宋玄并为殿中丞掌书□仍旧职乙卯田重进至蔚州许彦钦等杀狄首萧迪哩及其守卒千人节度使耿绍忠举城降以崇仪使魏震知蔚州□州团练使彦钦平州团练使同知蔚州初王师入狄境所向皆下迪哩绍忠等惧不自安谋欲杀城中将吏尽率其豪杰归狄中存璋等知其谋乃先事而发绍忠父美为狄奉圣节度使弟绍雍为三司使绍忠领同州州在西楼南数百里方从狄主至遥乐河闻王师至遣为蔚州监城使于是被执存璋等初请降重进疑之先命荆嗣率猛士数十人缒而入得实乃纳其款重进军乏食嗣部降卒为鞏州廩给之存璋等既杀狄党狄孤城难守乃尽率其民吏奔重进军重进既抚之狄援兵大至副都指挥江谦妄言惑众嗣即斩之悉收城中辎重还集重进军与狄转战时军校五辈其四悉以战死至大岭嗣力鬪狄始却遂空蔚州是役也边民之骁勇者竞团结以袭狄或夜入城垒斩取首级来归上闻而嘉之曰此等生长边陲闲习战斗若明立赏格必大有应募者乃下诏募民有能纠合应援王师者资以粮食假以兵甲擒狄中酋豪者随职名高下补署获生口者人赏钱五千得首级三千马上等十千中七千下五千平幽州后愿军者优与存録愿归农者给复三年自是应募者益众初曹彬与诸将入辞上谓彬曰但令诸将先趋云应卿以十余万众声言取幽州且持重缓行毋得贪利以要遮狄狄闻之必萃劲兵于幽州兵既聚则不暇为援山后矣既而潘美果下寰朔云应等州田重进又取飞狐灵州兵势大振每捷奏至上颇疑彬进军之速且忧狄断粮道彬至涿州留十余日食尽乃退师至雄州以援供馈上闻之大骇曰岂有敌人在前而却军以援刍粟乎何失策之甚也亟遣使止之勿令复前引师缘白沟河与米信军接养兵蓄锐以张西师之势待美尽略山后之地会重进

东下趋幽州与彬信合以全师制狄必胜之道也而彬所部诸将闻美及重进累战获利自以握重兵不能有所攻取谋画蜂起更相矛盾彬不能制乃裹五升粮再往攻涿州狄当其前且行且战去城纔百里歷二十日始至有狄首领万骑与米信战相持不解俄遣使言乞降下蔡令大名柳开督馈饷随军谓曰此兵法所谓无约而请和也彼将有谋急攻之必胜信迟疑狄复兵排战后侦知果以矢尽俟取得涿州时方炎暑军士疲乏还师境土彬初欲令所部州斌悬言涿州深入狄必不利不若以此万彬从其言令彬拥退无复行伍为狄及之我师大败彬等南李继宣力战巨马河巨马河人畜相蹂践而死者大夫刘保勳陷淖中其子随军常从其后尽力掀之不能出遂俱死随军督刍粟溺于巨马河诏録保勳孙巨川正字宜子延世同学究出身癸酉潘美遣使部送应州朔州将吏耆老等赴關上召见慰抚之老人皆云久陷戎狄有粟不得食有子不得存养不意余年重覩日月并赐以衣服冠带丙子宫苑使王继恩自易州驰骑至上始闻曹彬等军败乃诏诸将领兵屯于边召彬文及崔彦进米信入朝田重进率全军驰定州潘美还代州曹彬等未还武胜节度使兼侍中赵普手疏諫曰伏覩三月中忽降使臣差搬粮草及详勅命知取幽州迺后虽有捷音未闻成事稍稽克复俄及炎蒸师老民疲实生疑虑伏念陛下圣略神功举无遗算平取浙右力取河东十年之间遂臻康济维兹部众诚非我敌盖迁徙靡常难得而制自古帝王包之大度任其随逐水草益以信义结之耳伏料圣明何足介意此必邪谄附会蒙蔽睿听致兴不急之兵颇涉无名之议臣切见汉武时主父偃徐乐严安所上书及唐相姚元崇献明皇十事据其年代虽则不同量彼是非必然无异專具录奏愿赐览观伏自大发骁雄重烦方畧百万家之生聚飞挽是供数十州之土田耕桑失半兹所谓以明珠而暗投又忌器之是虑所失者多所得者少得少之中犹难入手况是失多之外别有關心臣又闻圣人不凝滯于物事无固必理贵变通前书谓兵久而变生此不可不深虑也苟或更图淹缓转失机宜旬朔之间便涉秋序内地先困边庭早凉狄则弓劲马肥我则人疲师老恐当此际或误指呼臣今独兴沮众之言深负弥天之过愿明颁诏连议抽军聊为一纵之谋敢献万全之策伏望陛下安和寢膳惠养疲羸长令外户不扃永使边锋罢警自然殊方慕化率土归仁料彼契丹独将焉往又何必劳民动众卖犊买刀有道之事易行无为之功最大如斯吊伐是谓万全臣又思陛下非次兴兵必因偏听小人倾侧但解欺君事成则获利于身不成则贻忧于国昨来议取幽蓟未审孰为主谋虚说谎言总应彰露愿推首恶早正刑章所贵诈伪革心忠良尽虑共畏三千之法同坚八百之基臣欲露肺肝先寒毛髮迟疑数日未敢措辞又念往哲临终尚能尸諫况臣未死宁忍面谀固知逆耳之言不是安恩由卵翼命直鸿毛将酬国士之知荒弃市甘从此日之诛切禄明圣特赐察量又以札子居民二皆客户昨来差粮至莫州典桑卖加善诱偶赴严役决定广致逃移奸人但说契丹时逢旨殊不知蕃戎上下幽可狂讨若彼能同意纵幼而亦败诚宜守道事贵无和如不武此蓋两省少昌言之士灵台无阙拾遗合專思于规諫

天文历家须预定口误失之由各员疎遗之罪若无惩罚寧戒后来又言勾抽不同举发一则我无斗志一则彼有仇心须作过防免输奸便但令周施捍御小作程途纵遇交锋何忧乏力只应信宿便达城池又言臣猥蒙二圣之深知当两朝之大用不惟此世应系前生礼虽限于君臣情实同于骨肉是以凡關启沃罔避危亡实思陛下本是天人暂来尘世是以生知福业性秉仁慈潜闻内里看经盘中戒肉今者愿忍一朝之忿常隆万世之因如或未止干戈必恐渐多杀害即此民愁未定战势方摇仍于梦幻之中大作烦劳之事是何微类误我至尊乞明验于奸人愿不容于首恶兴言及此涕泪交流

上手诏赐普曰朕昨者兴师选将止令曹彬等于雄霸裹粮坐甲以张军威蒞一两个月间山后平定潘美田重进等会兵以进直抵幽州共力駟攘俾蕃部之党遠遁沙漠然后控扼险固恢复旧疆此朕之志也奈何将帅等不遵成算各骋所见领十万甲士出塞遠斗既妄取其郡县更还以援輜重往复劳弊为戎人所袭此责在主将也况朕踵百王之末粗致承平蓋念彼燕民陷于北狄将救焚而拯溺非黷武以佳兵卿当悉之也边防之事已大为之备将来敢肆侵挠必当尽殲丑类卿勿以为忧卿社稷元臣忠言苦口三复来奏嘉愧实深普复上表谢曰昨者臣未测事宜辄陈狂背陛下亲抒宸翰密谕宸谋臣窃审思信为上策将帅若克遵成算固可平戎但不副天心致兹败事今既边防有备更复何虞况陛下登极十年坐隆大业无一物之失所见万物之咸康所宜端拱穆清嗇神和志以无事为福他年自可遠继九皇俯观五帝岂必与戎狄较其胜负臣素亏壮志矧在衰龄固忠纯上答观者咸叹其忠口上将军张永德知沧州口卫上将刘延让口让等皆宿将久罢口并命八月初徙口所部兵护送之时口南北皮室及五神口等曰令寇锋益盛不口令兵出大石路先入口日令云州之众先出我师次应州口即令朔州吏民出城直入石碣谷遣强将与之战以骑士援于中路则三州之众保万全矣口合门使蔚州刺史王侁沮其议曰领数万精兵而畏懦如此但趋鴈门北川中鼓行而往马邑军器库使顺州团练使刘文裕亦赞成之业曰不可必败之势也侁曰君素号无敌今见敌逗挠不战得非有他志乎业曰业非避死蓋时有未利徒杀伤士卒而功不立今君责业以不死当为诸君先死矣乃引兵自跌路趋朔州将行泣谓美曰此行必不利业太原降将分当死上不杀宠以连帅授之兵柄非纵狄不击蓋伺其便将立尺寸功以报国恩今诸君责业以避敌业当先死于狄因指陈家谷口曰诸君于此张步兵强弩为左右翼以援蒞业转战至此即以步兵夹击救之不然则无遗矣美即与侁领麾下兵阵于谷口自寅至己侁使人登托逻台望之以为狄败走侁欲争功即领兵离谷口美不能制乃沿交河西南行二十里俄闻业败即麾兵却走业力战自日中至暮果至谷口望见无人即抚膺大恸再率帐下士力战身被数十创士卒殆尽业犹手刃数十百人马重伤不能进遂为狄所擒其子延玉与岳州刺史王贵俱死焉业初为狄所围贵亲射杀数十人矢尽张空拳又击杀数十人乃遇害业既被擒因太息曰上遇我厚期捍边破贼以报而反为奸臣所嫉逼令赴死致王师败绩何面目求活于狄中乃不食三日而死业不知书忠烈武勇



有智谋练习攻战与士卒同甘苦代北苦寒人多服毡罽业但挟纆露坐治军事傍不设火侍者殆僵仆而业怡然无寒色为政简易吏民爱之御下有恩故士卒乐为之用其败也麾下尚百余人业谓汝等各有父母妻子与我俱死亡益也傥鸟兽散尚可亡还报天子其众皆感泣不肯去遂俱死无一生还上闻业死甚痛惜辛亥诏削美三任旻除名配金州文裕登州赠业大同节度使赐其布帛千疋粟千硕录其子供奉官延朗等五人及贵子二人十二月契丹将耶律逊宁号裕悦者以数万骑入寇瀛州都部署刘延让与战于君子馆会天大寒我师不能彀弓弩狄围延让数重延让先以麾下精卒与沧州都部署李继隆令后殿缓急期相救及延让被围继隆退屯乐寿御前忠佐神勇指挥使巨野乘赞以部□□所至甲而狄援兵复至赞引众先遁延□数万人延让得麾下他马□平州围练使知雄州□杨重进俱陷于狄□素知令图尝使谍□路自拔幸君少留□功私遗于越重锦□州贺使君令图先出逆之至其帐前数□边事今乃送死来耶去重□进力战死之初令图□父子皆败天下笑之重进太原人也

丙午瀛州以败闻延让诣阙请罪上知为继隆所误不责追继隆令中书问状寻亦释之东头供奉官马知节监博州军闻延让败恐狄乘胜复入寇因缮完城垒治器械料丁壮集刍粮十有五日而具始兴役官吏居民皆不悦其生事既而狄果至见有备乃引去众始叹服初契丹复自胡谷入寇薄代州城下神卫都指挥使马正以所部列州南门外众寡不敌副都署卢汉赞畏懦保壁自固知州给事中张齐贤选厢军二千出正之右誓众感慨一以当百狄遂却走循夷狄河南而西先是齐贤约潘美以并师来会战居无何闻使为狄所得齐贤以师期既漏且虑美众为狄所乘俄而美有使至云师出并师行四十里至栢井忽奉密诏东路王师衎于君子馆令并之全师无得出战已还州矣于时狄兵塞川齐贤虑知美之退乃闭其使密室中夜发兵二百人人持一帜负束葛距州城西南三十里列帜燃葛狄遥见火光中有旗帜意谓并师至矣骇而走齐贤先伏步卒二千于土镫寨掩击大败之擒其北大王之子一人帐前锡里一人斩首二千余级俘五百余人获马千余匹车帐牛羊器甲甚众齐贤悉归功于汉赞己未汉赞以捷音来上优诏褒答后知汉赞未尝接战与钤辖刘宇皆罢为右监门卫大将

军雍熙四年春正月初曹彬及刘延让等相继败覆军亡死者前后数万人缘边疮痍之卒不满万计皆无复斗志河朔震恐悉料乡民为兵以守城皆白徒未尝习战阵但坚壁自固不敢御敌狄势益振长驱入深祈陷易州杀官吏虏士民所过郡邑攻不能下者则俘村墅子女纵火大掠辇金帛而去魏博之北咸被其祸上深哀痛焉丙戌降德音上以契丹频岁入寇将大发兵讨之遣使往河南北诸州募丁壮为义军京东转运使主客郎中李继清曰若是天下不耕矣三上疏争之宰相李昉等相率上奏曰近者分遣使往河东河南四十余郡凡八丁取一以备獯戎事非获已臣等颇闻夫被边之民世习农桑罔知顾虑人情扇摇因而逃避河北闾阎既困于戎马□之兴更妨农作之□严勅续遣使臣等所□即行法密奏取裁于是□覩仲春以来分遣使臣于诸州□气方盛农事

正勤况属久安岂可□是丁夫畎畝之氓本难拘率行伍之内□习之有方终馭使之无  
效若鳩集益广即经费□此思之止为劳弊今寇戎出塞边境已宁至于防秋须预经画  
望于将相之内选材谋之人付之兵权委以阃政精择銳旅分戎连城优恤其妻孥激发  
其勇力至于保障城寨州郡官寮遴■〈才东〉贤才责成倚办此外深沟高垒炳燧鸣  
刁来则御之去则勿逐有备无患古之道也若集乡兵虽众何用况又河南为内地人户  
非能便习武艺不可尽置戎行河北累经戎狄颇有闲习骑射或可选置军中望且于河  
朔緣边诸州点集止令本处守捍城池河南诸州一切停罢上纳其言诏询文武御戎之  
策殿中侍御史赵孚奏议曰臣愚以为不用干戈不劳飞挽为万世之利者敢献其说惟  
明主择之五月乙丑以待御史郑宣司门员外郎刘墀户部员外郎赵载并为如京使殿  
中侍御史柳开为崇仪使左拾遗刘庆为西京作坊使初开以殿中侍御史知贝州坐与  
监军忿争贬上蔡令及自涿州还诣阙上书愿効死北边上怜之复授以故官开又上书  
言臣受非常之恩未有微报年纔四十胆力方壮今匈奴未灭愿陛下赐臣步骑数十以  
任河朔用兵之地必能出生入死为陛下复取幽蓟虽身没战场无所恨于是上亦并用  
文武戡定寇乱乃诏文臣中有武略知兵者许换秩故开与宣等俱被此命是月雄霸等  
州皆相告以狄将犯边急设备宁边军数日间连受八十余牒知军柳开独不信贻书郭  
守文陈五事言狄必不至既而果牒者之妄时上亦将议亲征河北东路转运副使王嗣  
宗上疏言狄必不至之状上乃止有白万德者真定人为契丹贵将统治边兵七百余帐  
寧边有豪杰即万德媼族往往出外境见之柳开因使说万德为内应挈幽州纳王师许  
以裂地封侯之赏万德许诺来请师期使未及还会诏徙开知全州事遂寢全之西溪洞  
粟氏聚族五百余人常抄掠民口粮畜牧朝命设峡口查烟羊状等七寨御之不能制开  
始至为作衣带巾帽选牙吏勇辨者有三辈使入谕之曰尔能归我即有厚赏给田为屋  
处之不然发兵深入灭而类矣粟氏惧留二吏为质率其酋四人与一吏俱来开厚其犒  
赐吏民争以鼓吹饮之居数日遣还与为期并族而出不月余悉携老幼至开即□居业  
作时鉴一篇刻石戒之遣其酋□诏赐开钱三十万□端拱元年秋八月乙卯甲子□充  
镇州路都部署上□强弱明于动静赏□廷以镇定高□阳而来则出奇□骁勇者间以  
弓矢□制也又选廷臣押队□□势骑置其士朕即以驾前精□俟有必胜之策分布队  
伍纵兵擊□寨皆百战百胜之谋也自能随机设□繫此十一月□骑大至唐河北将入  
寇诸将欲□书从事坚壁清野勿与战定州监军判四方馆事袁继忠曰北兵在近今城  
中屯重兵而不能剪灭令长馭深入侵掠它郡谋自安之计可也岂折冲御侮之用乎我  
将身先士卒死于狄矣辞气慷慨众皆叹服中黄门林延寿等五人犹执诏书止之都部  
署李继隆曰阃外之事将帅得專焉往年河间不即死者固将有以报国家尔乃与继忠  
出兵拒战先是易州静塞骑兵尤骁果继隆取以隶麾下留妻子城中继忠言于继隆曰  
此精卒止可令守城万一寇至城中谁与捍敌继隆不从既而狄果入寇易州遂陷士卒  
妻子皆为狄所掠继隆欲以卒分隶诸军继忠曰不可但奏升其军额优以廩给使之尽

节可也继隆从其言众皆感悦继忠因乞以隶麾下于是推锋先入狄骑大溃追击踰曹河斩首万五千级获马万匹己丑捷奏闻羣臣称贺上降玺书褒答赐予甚厚至道元年春正月契丹大将韩德威率数万骑诱党项勒浪等族十六府大首领马尾等自振武入寇永安节度使折御卿率骑邀击之大败其众于子河■〈汙义〉勒浪等族乘狄之乱诈为府州兵蹶其后敌大惊扰死者十六七悉取其辎重涉河而遁狄将号突厥人尉司徒锡里死者二十余人生擒吐浑首领一人德威仅以身免甲子御卿遣使奏捷上召见便殿问破狄之状笑谓左右曰契丹之兵轻进易退朕常戒边将勿与争锋待其深入则分兵以断其归路从而击之必无遗类也今果如吾言左右皆呼万岁初并代都部署张永德闻狄入寇以太白万胜诀占之语其僚佐曰敌虽以年月便利乘金而未及值岁星对逆兵家大忌彼当自败不足虑也坐客皆恍然及是叹服

### 太宗平交州

太平兴国五年夏四月遣供奉官卢裘使交州时丁璉弟璇尚幼嗣称节度行军司马权领军府事大将黎亘擅权劫迁浚于别第举族禁锢之代总其众六月知邕州侯仁寶上疏言交州乱偏师可取愿乘传诣阙回奏上大喜驿召未发卢多逊奏曰交趾内扰此天亡之秋也朝廷出其不意用兵袭击所谓迅雷不及掩耳今若先召仁寶其谋必泄蛮寇知之阻山海为备则未易取也不若授仁寶以飞挽之任因令经度选将发荆湖士卒一二万人长駟而往势必万全上以为然也七月以仁寶为交州路水陆转运使兰州团练使孙全兴八作使郝守浚鞍辔库使陈钦祚左监门卫将军崔亮为邕州路都总管宁州刺史刘澄军器库副使贾湜供奉官王僕为廉州路兵马总管水陆进讨十一月黎亘遣牙校来贡仍为丁璇上表自言狗将吏军民之请已摄节度行军司马权领军府事乞朝廷赐以真命时孙全兴等出师踰时上察其止欲缓兵不报十二月全兴等破贼万余众斩首一千三百四十五级六年三月又破贼军万五千众于白藤江口斩首千余级获战舰二百只甲铠以万计于是侯仁寶率前军先进孙全兴等屯兵花步七十日以俟刘澄仁寶屡促之不行及澄至并军由水路抵多罗村不遇贼复擅还花步贼诈降以诱仁寶仁寶信之遂为所害时诸军冒炎瘴多死转运使许仲宣驰奏仁寶战没且乞班师不待报即分屯诸州开库赏赐给其医药谓人曰若待报则此数万人皆积尸于旷野矣乃自劾有诏嘉纳遣使就劾澄等会王僕病死澄与贾湜孙全兴皆伏诛陈钦祚郝守浚崔亮责授团练副使赠仁寶工部侍郎官其二子田锡上表曰今交州未下战士无功春秋谓老师费财兵书曰钝兵挫锐臣闻圣人不务广疆土惟务广德业声教遠被自当来宾愿陛下念征戍之劳思用人之广爱人惜力毋屯兵以费财修德服荒毋畧内以勤遠承诏执事寬其灵诛又何必蕞尔蛮陬劳于震怒上赐诏褒獎仲宣既分遣南伐之师乃草檄諭交州明国威信期必再举亘惧数遣使入贡雍熙三年以亘为静海节度使命左补阙李若拙不时留盼又却其私觐惟取陷蛮使臣邓君卞以归亘又谓觉等曰此土山川遙遠中朝人乍厯之不劳乎觉对曰国家提封万里列郡四百地有平易亦有险固此



一方何足云亘默然色沮

淳化元年正月命左正言宋镐右正言王世则以加恩制书赐亘镐等及境俄而拥从亘至展郊迎之礼亘敛马侧身问皇帝起居毕按辔偕行亘质陋而目眇自言近世与蛮寇接战坠马伤足受诏不拜信宿之后乃张筵饮宴有木塔其制朴陋亘一日同登顾曰中朝有此塔否地无寒气十一月犹衣夹衣挥扇四年二月乙丑封亘为交趾郡王亘性凶狠负阻山海久之屡为寇害渐失藩臣之礼上以其荒服不欲问罪

至道二年五月寇如洪镇巡检使董全斌击走之钦州如洪咄步如昔三镇皆濒海交州潮阳镇民卜文勇等杀人焚家属亡命至如昔镇镇将匿之黎亘令潮阳镇移牒来捕固不遣因兹海贼连岁剽窃丁巳以太常博士直史馆陈尧叟为广南西路转运使且赐亘诏书尧叟至遣李建中赍诏劳问亘尧叟又诘藏文勇之由乃令尽擒获召潮阳镇吏付之亘遂上章感恩并捕海贼送尧叟七月朝廷遣李若拙以诏书国信玉带赐亘若拙至亘谓曰向者劫如洪镇乃外境蛮贼皇帝知否若使交州果叛则当首攻番禺次击闽越岂止如洪镇若拙从容谓亘曰上初闻寇如洪镇虽未知其所以然以足下拔自交州牙校授之旄钺固当尽忠以报岂有他虑及见执送海贼事果明白然而大臣佥议为朝廷建节帅以宁馭海表今海贼敢为寇乃是交州力不能独制请发劲卒数万会交州兵剪灭使无后患上曰未可轻举虑交州不测朝旨或致惊骇不若且委黎亘讨击之亦当渐至清谧故不复会兵也亘愕然避席曰海贼犯边守臣之罪也圣君容贷未加诛责恩过父母自今谨守职约永靖瘴海因北望称谢

太宗平李顺

淳化四年二月青神县民王小波作乱蜀土富饶丝绵绮号官天下孟氏割据府库充溢及王师平蜀其重货铜布载自三峡轻货绞縠即设传置发卒负担每四十卒为一纲号为日进不数十年孟氏所储悉归内府而言事者竞起功利成都除常赋之外又置博易务诸郡课民织作禁商旅不得私市日进上供又倍常数司计之吏皆析秋毫蜀地狭民稠耕稼不足给由是小民贫困兼并者益夺其利小波聚众曰吾疾贫富不均今为汝均之贫民多附者遂攻劫邛蜀诸县杀彭山县令齐元振贪暴民尤苦之秘书丞张枢尝使蜀奏黜官吏之不法独称元振廉能朝廷赐玺书奖喻元振得诏益恣横与民为仇受赇得金帛多寄民家小波既杀元振剖其腹实以钱刀十二月西川都巡检张玘与小波斗于江源县俱死众遂推小波之妻弟李顺为帅玘麾下兵四百余人奔归西川转运使樊知古不受纵使亡去贼势由是日盛众至数万攻陷邛州又陷永康军及双流新律郫县纵火大掠留其党守之进攻成都五年正月甲寅初右谏议大夫许知成都府及还言于上曰蜀土久安其民流窳易授愿谨择忠厚者为长吏使镇抚之时东上阁门使吴元载口骧为成都元载颇尚苛察民有犯法者又禁民游宴行乐人用胥怨王口捕灭于是东上阁门使郭载口日者潜告载曰成都口可免载曰口行先是口城陷载与口入据成都口抵剑關南距口劫剑南诸州命昭宣口安使率兵讨之军事委继恩口繫

囚非十恶正贼悉得以便宜□始闻成都陷召宰相谓曰岂料贼势猖□罪罪在朕躬忍令陇蜀之民陷于涂炭去年以来□数月此亦兵气之应朕当部分军马旦夕讨平之遂命少府少监雷有终监察御史裴庄并为峡路随军转运使□马步军都军头勤州刺史王杲率兵趋剑门崇仪使带御器械尹元帅兵由峡路以进并受昭宣使王继恩节度或言庄本蜀人不宜复遣入蜀上益倚信之□李顺分兵数千众北攻剑门剑门疲兵纔数百都监西京作坊副使开封上官正奋励士卒出御之会成都监军供奉官宿翰领麾下投剑门道与正兵合遂迎击贼大破之斩首虜几尽余二百人奔还成都顺怒其惊众悉命斩于城都门外初朝廷深以栈路为忧正等力战破贼自是阁道无壅王师得以长驱而入奏至上嘉甲辰以正为六宅使剑州刺史充剑门兵马部署翰为崇仪使昭州刺史

三月甲寅诏王继恩戒前军所至处其贼党敢抗王师即当诛杀本非同恶偶被胁从而能归顺者并释之倍加安抚 壬寅王继恩言王师由小剑门路入研石寨破贼斩首五百级逐北过青强岭遂平剑州 五月癸丑王继恩言王师入绵州境贼众望风奔溃杀戮及溺水死者不可胜计 甲寅继恩言克绵州 又言先遣内殿崇班曹习分兵自葭萌趋老溪贼万余众依险为寨习击破之斩首三千级拥入江溺死者甚众遂克阆州又言巡检使胡正通率兵破贼五千众克巴州 五月丁巳继恩攻成都拔之破贼十余万斩首三万擒李顺及其党许词吴文赏等并甲铠僭伪服用甚众知梓州张雍初闻顺乱即谋为城守计训练城中兵得三千余令官属分主之犂绵州金帛以实帑藏销铜钟为箭镞伐木为竿纽布为索器械悉备遣观察推官盛梁请兵于朝既而都巡检使卢斌以十州之众援成都弗克而还雍即委以监护之任顺等遣其党帅众二十万来攻雍与战破之贼围城八十余日会王继恩分数千兵来救贼始溃去斌出兵追系降者一万余又破贼数万众解阆州围斩三千人平遂州雍驰奏诏褒美斌在川陝六年以孤军御寇屡立战功表请赴阙廷上遣使谕曰俟妖孽殄尽当召汝既而□集梓绵汉三州境上斌促往平之以□为谏议大夫知成都府有终由□画戎军皆有节制师行至□天雨军人以兜牟□垒濒江三面□恐惧有终为益州□坊使马知节□恩挟势骄恣恶□节守彭州配以羸兵□累乞师继恩弗听贼十万众□至申众寡不敌士多死者逮暮退□贼徒非壮夫也即横槊溃围而出休□至遂鼓噪以入贼众乃败去上闻而嘉之曰贼盛兵□知节不易当也授益州钤辖初尹元等入峡路首破贼三千余众于新宁遂深入梁山广安渠果之间捕斩收集久未得进王继恩虽径拔成都而郭门十里外尤为贼党所据伪帅张余谓王师孤絶无援复啸聚万余众攻陷嘉戎泸渝涪忠万开八州开州监军秦传序死之初贼众奄至传序督士卒守城既久危蹙日甚长史皆奔窜投贼传序谓士卒曰吾为监军尽死节以守郡城吾之职也安可苟免乎城中乏食传序尽出囊橐服玩市酒肉犒士卒而慰勉之众皆感泣力战既而贼众日盛传序度力屈终不能拒贼乃为

■ 〈虫葛〉丸帛书遣人间道上言曰尽死力战津口矢石如雨先是峡上复遣如京使白继赟为北路都大巡检统精兵数千人晨夜兼行助讨边寇是月庚午继赟入夔州出

贼不意与巡检使解守颞腹背夹击之贼众大败斩首二万余级流骸塞川而下水为之赤夺得舟千余艘甲铠数万计贼围施州指挥使黄希逊兵马使黄延霸开门击走擒百余人峡路行营亦破贼于广安军又破贼于嘉陵江口又破贼于合州雷有终大军抵合州境会尹元裴襄等领兵至遂克合州余党之保渠州广州梁山皆讨平之陵州破贼五万詹州破贼十余万峡路行营破张余众二万复云安军中书以王继恩有平贼功欲以为宣徽使上乃曰朕不欲令宦官干预政事宣徽使执政之渐也 八月命学士张洎钱若水议别立宣政使名序立宣徽使上以授之王小波李顺之初作乱羣臣慰抚给事中参知政事赵昌□滋蔓议久不决贼连陷□进讨继恩握重兵□后奏音乐又令□辈用事恣横□不给军士亦□上屡遣使督□因召对资福□之讫今三十年□所向无不克顾此□攻取之策上喜甚□□□□自继恩以下并受节度昌□别赐手札数幅亲授方畧焉 丁丑上下诏罪己初命翰林钱若水草诏既成进御上笑谓若水曰朕为卿润色可乎若水顿首谢因命笔亲窜数字皆引咎深切尤极为精当其畧曰朕委任非当烛理不明致彼亲民之官不以惠和为政筦榷之吏唯用刻削为功挠我烝民起为狂寇又曰念兹失德是务责躬改而更张永鉴前弊而今而后庶或警余初昌言行旬余或言有反相不宜委以蜀事上亟召宰相谓曰蜀贼小丑昌言大臣不可轻动时已至鳳翔诏遣及之因留候馆以枢密直学士张咏知益州先是苏易简言咏可属西川事上乃面谕之曰西川乱后民不聊生卿当以便宜行事是日咏始至益州陝西课民运粮以给蜀师者相属于路城中无半月之食咏访知民间旧苦盐贵而私廩尚有余积乃下盐价听民得以米易盐民争趋之未踰月得米数十万斛军士哗言前所给皆杂糠土不可食今一一精好此翁真善于国事者咏闻而喜曰吾令可行矣时四郊尚多贼垒城门昼闭王继恩日日务饮宴不复穷讨会卫绍钦亦以诏书来督捕余寇继恩始令兵四出咏计军食尚可支二岁乃奏罢陝西运粮上大喜曰乡者益州日以乏粮为请咏至未久遂有二岁备此人何事不能了朕无虑矣

十二月戊寅王继恩御军无政其下恃功暴横张咏恐军还日或有意外之变乃密奏请遣腹心近臣可以弹压王师者亟来分屯师旅 辛巳命枢密直学士张鉴西京作坊使冯守规偕往召对后苑门面授方略鉴曰益都新复卒乘不知若闻使者骤至易其戎伍虑猜惧变生不测请假臣以安抚之名上称善鉴至成都继恩犹偃蹇不意朝廷已闻其纵肆之行上付以空名宣头及廷臣数人鉴与咏即遣部戍兵出竟继恩麾下兵亦多遣东还督继恩等讨捕残贼而西川民始奠枕矣

太平治迹统类卷三

●钦定四库全书

太平治迹统类卷四

(宋)彭百川 撰

真宗祥符



景德四年十一月庚辰中书以事闻上拱揖不答王钦若曰非圣朝承平岂能振举王钦若既以城下之盟毁寇準上谓钦若曰今将奈何钦若度上厌兵即谬曰用兵幽蓟乃可刷此耻也上曰河朔生灵始得休息吾忍复驱之死地卿盍思其次钦若曰陛下苟不用兵则当为大功业可以镇服四海夸示戎狄也上曰何谓大功业钦若曰封禅是矣然封禅当得天瑞稀世絶伦之事乃可尔既而又曰天瑞安可必得前代盖有人力为之若人主深信而崇奉焉以明示天下则与天瑞无异矣陛下谓河图洛书果有此乎圣人以神道设教耳上久之乃可独憚王旦曰王旦得无不可乎钦若曰臣请以圣意谕旦宜无不可乘间为旦言之旦龟勉而从然上意犹未决莫适与筹之者它日晚幸秘阁惟杜镐方直宿上骤问之曰卿博達坟典谓河出图洛出书果何事耶镐老儒不测上意漫应曰此圣人以神道设教耳其言偶与钦若同上由此意决遂召王旦饮于内中欢甚赐以樽酒曰此酒极佳归与妻孥共之归发视乃珠子也旦自是不复持异天书封禅等事始作大中祥符元年正月乙丑上召宰臣王旦知枢密院事王钦若等对于崇政殿之西序上曰朕寝殿中帘幕皆青绢为之旦暮间非张烛莫能辨色去年十一月二十七日夜将半朕方就寝忽一室明朗惊视之次俄见神人星冠绛袍告朕曰宜于正殿建黄箓道场一月当降天书大中祥符三篇勿泄天机朕悚然起对忽已不见遽命笔志之十二月朔即蔬食斋戒于朝元殿建道场结彩坛九级又雕木为輿舁以金寶恭仁神呪未敢罢去适皇城司奏左承天门帛曳于鸱吻之上朕潜令中使视之长二丈许緘一物如书卷纏以青缕朕细思盖神人所谓天降事天地孝奉祖宗睦犷俗□和干戈谨一日之所致神告先期灵文□岁又言启封之际宜与卿等祇长改□隐之而使众不知也上侍周怀敏皇甫继明升屋对□受置书輿上复弊旦等步导却伞知枢密院陈尧叟启封帛上有文曰赵□于讳居其器守于正世七百九九定既去帛启□叟读之其书黄字三幅词类尚书洪范老子道德经始言上能以至孝至道绍世次谕以清淨简俭终述世祚延永之意读讫藏以金匱旦等称贺于殿之北庑是夕命旦宿斋中书晚诣道场旦趋往而上已先至丙寅羣臣入贺于崇政殿赐宴戊辰大赦改元文武官并加恩改左承天门为左承天祥符门擢护门亲从官徐荣为大将赐衣服银带缙钱荣先覩天书故也已知诏以天书降申徹在位俾各扬其职以荅天意太仆少卿直秘阁钱惟演献祥符颂天书降翌日宗諤上皇奉迎酌献乐章优诏荅之甲戌兗州父老吕良等诣阙请封禅上令引进使曹利用宣劳面谕之曰封禅大礼歴代罕行难徇所请良等进而言曰国家受命五十年已致太平今天降祥符昭显盛德固宜告成岱岳以报天地上复曰此大事不可轻议夏四月辛卯朔天书又降于大内之功德阁先是宰相王旦等文武百官诸军将校州县官吏蕃夷僧道耆寿二万四千三百七十人同诣东上阁门凡五上表请封禅甲午诏于今年十二月有事于泰山甲午以知枢密院事王钦若参知政事赵安仁并为封禅经度制置使初议封禅未决上以经费问权三司使丁谓曰大计固有余矣议乃决戊戌命皇城使刘成珪龙图阁待制戚纶崇仪副使谢德权计度封禅发运事纶上疏畧云伏望端守玄符

凝神正道参内景修行之要资五千致治之言建皇极以御烝人寶大位而延圣筭仰荅天祝俯惠羣黎上嘉纳之有司言巡狩有燔柴告至之礼皇帝亲行事又封祀至泰山下柴告昊天上帝于圆坛如巡狩告至之礼有司摄事之仪车驾至泰山合至望令太尉以酒脯币帛于山下坛告至奏可遣使驰诣岳州采三脊茅三十束备藉神缩酒之用有老人董皓识之授皓岳州助教赐束帛河北转运使李士衡奏罢内帑所助钱八万缗于是又请辇本路金帛刍粟四十九万赴京东以助祀事上曰士衡临事有心力可獎也遂赐褒诏丁谓因请留士衡于澶州管勾东口从之有司详定仪注诏皆从之丙口安等分撰玉册文上谕之曰口符端沓来次述为民祈福之口万两从之丁巳封王口之六月壬辰详定口废非典礼具备上告以将有口人言来月上旬复口于是钦若奏六月甲口曳草上有字不能识言有御名驰告钦若钦若等就职口授中使捧诣阙奏至上亟召王旦来迎即命旦为导卫使己亥旦与扶口奉迎天书入含芳园之西门庚子羣臣诣园口殿辛丑上致斋壬寅备銮驾以出面拜殿下导卫扶侍自殿上奉天书至上前上再拜授陈尧叟尧叟跪读其文曰汝崇孝奉吾育民广福锡尔嘉瑞黎庶咸知秘守斯言善解吾意国祚延永寿历遐岁读讫召百官示之复奉以升殿酌献毕上先还旦等导卫扶侍至朝元殿上迎拜入内时久雨顿晴景色澄廓苑中有云五色读天书次黄气如凤驻殿上赐文武百官泰山醴泉秋七月封禅用玉牒册凡七文思王工言用玉追琢难成宰相请以珉石及陞州采进上曰此砮砮之类目之为玉以奉天于礼可乎即遣中使徧询玉工有赵荣者言太平兴国中曾与众工治玉为牒册岁余方就真崇政殿库亟取用之己酉王钦若来朝献芝草八千一百三十九本皇城使刘承珪诣崇政殿上新制天书法物有鹤十四来翔天书扶侍使丁谓奏双鹤度天书攀飞舞良久翌日上顾谓左右曰昨所覩鹤但于攀上飞度若云飞舞良久文则文矣恐不为实卿当易此奏也癸亥奉天书于朝元殿上斋令殿之后阁上亲习封禅仪于崇德殿辛卯有司宿设天书仗卫于干元门自宫中奉天书出干元门升王辂黄麾仗前后部鼓吹道门威仪扶持使等导聳而行从臣望拜于殿下有顷上服通天冠绛纱袍御辇发京师次含芳园之行宫上即诣昊天玉册前焚香再拜以楼召近臣观卫士甲马还营赐百官休暇三日中书枢密院一日上之巡祭也往还四十七日未常遇雨雪严冬之候景气恬和祥应纷委咸以为诚感昭格天地助顺之致也诏以正月三日天书降日为感昭天庆节休假五日京师于上清宫建道场七日宰相迭宿罢日文武官内职皆集赐会锡庆院是夕京师张灯五日内无得刑用仍禁屠宰诸州建道场三日羣臣亦赐会丁谓请以天书降祥瑞编次撰赞绘画于昭应宫诏谓与龙图阁待制戚纶陈彭年同编次其赞令中书门下枢密院两制尚书丞郎给谏待制馆阁官分撰先是诏有司参详百官拜表进名仪式且言庆成乔岳归美祖宗虽繫孝思实为吉礼比之初上庙号理有不同按唐朝修八陵及迁懿献二祖礼毕并皆称贺欲望其日许百官诣阙门拜表贺从之乙酉大宴于含光殿十二月命丁谓等编修封禅礼癸卯羣臣并以次覃恩诏提点刑狱朝臣使臣不限品秩及诸班诸军都虞侯并与一子

恩上自东封还羣臣献贺功德者相继惟进士孙籍献书言封禅帝王之盛事然愿陛下谨于盈成不可遂自满上善其言即召试中书丙午赐同进士出身时知制诰周起亦上言天下之势常悉恬于逸安而忽于兢思愿毋以告成为恃上深纳之昭应宫日役工数万上以道里稍远悯其负劳令谓等规画有言载以橐驼驴车有言舟运谓等请用车载为便壬戌诏三司以空船给昭应宫运夫仍浚泊渠道一年秋七月辛未以昭应宫为玉清昭应宫诏诸州军监關县择官地建道观并以天庆□备材砌盖者亦听先是道教之□南人素崇重及是天下始□士逊上言今营造兢□之诏从其请□禅朝覲瑞祥□二月右仆射判□有损谦德及违□辛丑齐贤出判孟州□臣皆以陛下在尧舜之上□命出六月辛丑文武官将校诣阙请祀汾阴后土□不表既三上来年春有事于汾阴戊申以知枢密院□祀汾阴经度置制使翰林李宗谔副之盐铁副使李士衡又献钱帛三十万以佐用度诏褒之己酉发陝西河东兵五千人赴汾阴给役置急脚递铺出廐马增驿传递铺卒增置八千四百五十人庚戌命翰林学士与大常礼院详定祀汾阴仪注有司定封玉册玉匱度朝廷择地为之悉如社首封■〈石感〉之制从之戊寅诏西路行宫宜令仪銮司止用油幙为屋以备宿卫不须覆以芦竹陈尧叟至汾阴数奏云物之祥癸未杖杀入内高品江守恩守恩虽近侍上不贷以法论者以谓朝廷至治行法不私中外莫不悚庆冬十月河中府民巨诏诣陈尧叟言五世祖诚在德宗时夜梦人谓曰中条山苍陵谷有爵寶真文以金札之明当往取矣天书赤篆出可用参会如其言入谷三四里夜覩黄光下有块石碎之得黄金一斤及书帛取藏于家诚手笔为识后二百余年屡经大兵饥荒家独无苦其帛长二丈广九寸通判曹谷验之云篆文非常体词类道经庚戌尧叟附中使赵敦信入献以诏为本府助教赐衣服银带器帛庚申丁谓等上大中祥符封禅记五十卷乙卯告太庙奉天书如东封之制诏天书仪卫副使王钦若赵安仁扶侍使丁谓龙图阁学士陈彭年与太常礼院详定奉事天书仪制以闻既而钦若等着为五卷上之龙图阁待制孙奭由经术进守道自处即有所言未谢神光之贶上又至穆清殿王钦若等献泰山芝草三万八千二百五十本己酉五色云起岳顶庚戌书漏未五刻上服通天冠绛纱袍乘金辂备法驾至山门改服鞞袍乘步辇以登前一夕山下大风裂帘幕逮明未巳及上之至天气温和纖尘不动奉祀官点检习仪于圜台祥气瑞云交相辉映是夕山下罢警场辛亥享昊天上帝于圜台命郡臣享五方帝神于封祀坛仪卫使奉天书于上帝之左摄中书侍郎周起读玉册玉牒文上饮福摄中书令王旦跪称曰天赐皇帝太一神策周而复始永绥兆人三献毕封金匱摄太尉王旦奉玉匱置于石■〈石感〉摄太尉冯拯奉金匱以降将作监领徒封■〈石感〉上复登台阅视讫还御幄司天监奏□遶坛月有辉气宰臣率从官称贺□振动山谷上即日还奉高宫百□戴黄气纷郁壬子禅祭皇□仪上至山下服鞞袍□步辇上曰接神在□前久阴晦风势□霁烛焰凝然□四方所献□轮五色云见鼓□奉高宫为会真宫加号保生天尊青帝□使致告癸丑有司设仗卫□高宫之南方九丈六尺高九尺□袞冕御坛上之寿昌殿受朝贺



中书□亲诸军校四方朝贺使贡举人蕃戎父老僧道大赦天下常赦所不原者咸除之  
赐天下酺三日改干封县为奉符县泰山下七里内禁樵采大宴穆清殿又宴近臣及泰  
山父老于殿门赐父老时服茶帛始议肆赦上谓宰相曰此赦与常时不同但常赦所不  
能行者卿等并録出条目共议之务令实惠及民也丙子发陈桥次含芳园时近辅淮甸  
京东河朔之民自泰山迎候车驾奔走以望天颜者道路不絶丁丑车驾至自泰山扶持  
使丁谓奉天书归大内上御干元□阿附取悦上常问以天书爽对曰臣愚所闻天何言  
哉岂有书也上知爽朴忠每优容之是岁时命向敏中谕爽令陈朝廷得失爽上纳谏恕  
罪薄敛轻徭四事颇施用其言及将有汾阴之役会岁旱京师近郡穀价翔贵爽遂奏疏  
言不可十事上遣内侍皇甫继明谕以若复有陈其具条上于是爽又上疏曰陛下将幸  
汾阴而京师民心不宁江淮之众困于调发理须镇安而矜存之且土木之功未息而夺  
攘之盗必行北狄治兵不遠边境虽驰单使宁保其心昔黄巢出自凶饥陈胜起于徭戍  
隋炀帝緣勤遠畧唐高祖由是开基晋少主智昧边防耶律光因之猾夏今陛下俯纳邪  
佞遠弃京师罔念民疲不虞人患涉仍岁荐饥之□久废之祠又安知饥民之中无黄巢  
□内无陈胜之患乎肘腋之下无间天骄之观衅乎陛下□猖狂忽及澶渊陛下□中山  
能推锋县侵軼郊□臣欲借□以先常□为继成先□用付陛下则未常志而乃卑辞重  
币求□谓主辱臣死为空言以诬下□托鬼神纔毕东封便说西幸冀其无事往还便谓  
成大勋绩是陛下以□□佞邪侥幸之资臣所以长叹痛哭也时羣臣数奏爽又上疏言  
五载一巡狩虞书常典观民设教羲易明文何须紫气黄云始能封岳嘉禾异草然后省  
方今乃野鷗山鹿并形奏简秋旱冬雷率皆称贺将以欺上天则上天不可欺将以愚下  
民则下民不可愚将以惑后世则后世必不信腹非窃笑有识尽然上玷皇明不为细也  
疏入不报四年正月乙酉亲习祀后土仪于崇德殿初有司详定止习坛上仪上崇重大  
祀乃并庙廷及封石匱仪徧习焉上以灵文叠降尽志钦承且欲垂训子孙俾奉事之意  
为誓文乙未命刻石置玉清殿□宫寶待阁下丁酉车驾奉天书发京师壬申车驾至西  
京戊午致斋辛酉具法驾诣于雕坛夹路燎火其光如昼甬道盘屈周以黄麾仗至坛次  
服袞冕登坛祀后土地祇备三献奉天书于神坐之左以太祖太宗并配悉如封禅之礼  
即日还奉祇宫鼓吹振作紫气四塞观者溢路民有扶老幼不遠千里而至者或感泣言  
曰五代以来此地为战场今日乃获覩天子巡祭实千载一遇之幸也诏以奉祇宫为大  
宁宫增葺殿室设后土圣母像又遣官祭告河渚壬戌御朝覲坛受羣臣朝贺大赦天下  
恩賜如东封例河中府特给复一年半建寶鼎县为庆成军给复二年賜天下酺三日大  
宴穆清殿賜父老酒食衣帟上作汾阴礼成诗就宴所賜之又作西岳赞仙掌诗己卯车  
驾入西京时途中屡有甘澍之应皆夕降晨止从官卫士无沾服之患又农务方兴耕民  
瞻望輿驾所至欢忭相属上作喜雨述怀歌羣臣毕和陈尧叟李宗谔自河中府来朝言  
初经度事至礼毕凡土木工三百九十万余止役军士辇送粮草供应顿馱亦未常差扰  
边民己未诏恭上汾阴后土庙额曰太宁以河中府进士薛南为试将作监主簿首诣阙

请祀汾阴者也六月己酉诏诸路州府遣亲属奉方物诣汾阴者送学士院量试本业授试秋斋郎不就试者补三班借职如东封例乙丑刻御制大中祥符颂于左承天祥符门五年六月壬子玉清昭应宫使丁谓言天书阁望柱起黄白云相间又吐白光若银丝上□色上作瑞应诗赐近臣□吏办赐辅臣人□祥瑞躬亲细务□于国学许□先令汝□帝翌日□于延恩殿□自东南至掩蔽□天尊至冠服如元始□人通天冠绛纱袍上再拜于□散天尊与六人皆就坐侍从在□欲拜六人天尊令揖不拜命设榻□甘白如乳天尊曰吾人皇中九人一人也是赵之始祖再降乃轩辕皇帝凡世所知少典之子非也母感电梦天人生于寿丘后唐时七月一日降下总治下方王赵氏之族今已百年皇帝善为抚育苍生无怠前志即离坐乘云而去及曙以语辅臣即召外殿厯观临降之所己未礼示中外大赦天下常赦所不原者咸除之两京来年下税放十之二诸路十之一赐致仕官全俸一年幕职州县官先经省者权增五百员任满即停命详定崇奉天尊仪制以己巳上天尊号曰圣祖上灵高道九天司命保生天尊大帝有司请以玉清昭应宫玉皇后殿为圣祖正殿东位司命殿为治事之所辛未躬谢太庙六室诏圣祖名上曰玄下曰朗不得斥犯以七月一日为先天节十月二十四日为降圣节癸酉诏天下州府军监天庆观并增置圣祖殿乙亥诏上圣祖母懿号元天大圣后戊寅改兖州曲阜县为仙源县建景灵宫太极观于寿丘以奉圣祖及圣祖母遣内供奉官周怀政与本州岛长史规度兴作俟宫观成日备礼举册凡宫观之制皆南开三门二重东西两廊中建正殿连接寝殿又置道院斋坊其观宇之数差减于宫是月初置玉清昭应宫使命宰臣王旦为之六年正月乙卯建安军铸玉皇圣祖太祖太宗尊像成三月辛丑国子监新修御书阁有赤光上烛长尺许判监孙奭以闻甲辰圣像至上斋于长春殿百官宿斋于朝堂上乃具銮驾由宫城西出天波门就宫门望拜权设幄奉安择日各升本殿升建安军为真州镡范圣像之地特建为仪真观以御制大中祥符颂真遊颂圣祖临降记赐天下道藏从中书门下所请也七月刘承规卒谥忠肃承规性沈毅徇公上深所倚信尤好伺察人多畏之上崇瑞命修祠祀饰宫观承规悉预焉作玉清昭应宫尤为精丽屋有小不中程虽金碧已具必毁而更造有司不敢计其费及宫成追赠侍中以权三司使林特为修玉清昭应宫副使特勤于吏职善承上接下每见修宫使丁谓必拜一日三见亦三拜之与吏卒语煦煦惟恐□人皆尽力事无不集丁巳文□亳州谒大清宫诏从之辛酉□祀经度制置使翰林学士□命五使及遣计度□亳州官属如分□阴记丙戌□阁待制□又将祠□岂以明皇为□足为深戒者非独陛下也明皇之无道亦□诛杨国忠请矫诏之罪乃诏□当时虽有罪已之言觉悟已□□□自觉悟抑损虚华斥远邪佞罢兴□无为明皇不及之悔此天下之幸社稷之福也□丁谓自亳州来朝献芝草三万七千余本七年正月壬寅车驾奉天书发京师丙午至奉元宫斋于迎禧殿次亳州丁谓献白鹿一灵芝九万五千本己酉三鼓具法驾赴宫时密雪骤霁自奉元至太清十余里夹道设灯笼燎左右执炬间之焜煌如昼上奉玉币酌献读册文命太尉封石匱上又诣先天观洞霄广

灵宫行香复至太清宫真源观周览还奉元君肆赦亳州乙卯次应天府天书升辇有云五色如花木又黄云如人连袂翊辂而行占云春云如花木者旺与德相生如人连袂色黄者子孙分土延祚之兆也扶持使赵安仁请播为乐章以备献从之丙辰升应天府为南京辛酉车驾至自亳州乙丑诏自今天书在朝元殿车驾由右升龙门入自东上阁门就东阶赴殿焚香□□广庭以尽严恭之意所司着为定式上宿斋于玉清昭应宫之集禧殿庚午行荐献之礼遂赴太庙辛未享六室五月壬辰命左仆射平章事王旦为兖州景灵宫朝修使乙未诏模刻天书奉安于玉清昭应宫命王旦为天书刻玉使王钦若为同刻玉使丁谓为副使兵部侍郎赵安仁翰林学士陈彭年为同刻玉副使入内押班周怀政为都监修玉清昭应宫使丁谓表诸御制本宫碑颂及御书额从之壬戌遣使赍御药赐景灵宫朝修使王旦癸亥旦入辞又赐袭衣金带鞍勒马仍赋诗以宠其行诏自京至兖州察吏治民隐听以便宜从事丙寅诏天书刻玉使副等诣内殿觐待诏盛亮摹写本三函上皆跪受署案向敏中陈尧叟丁谓赵安仁捧持王旦与王钦若对读陈彭年详字体初有司具仪上监之增跪受亲启封又加上香者三再拜者八八月丁丑命内侍都知阎承翰奉安太祖太宗圣像于南京鸿庆宫辛卯内出御札与天下臣庶尊上玉皇大帝圣号曰太上开天执符御历含具体道玉皇大帝以来年正月一日躬申荐告仍定义式颁下冬十月甲子以玉清昭应宫成诏赐酺左京五日两京三日诸州一日宫宇总二千□一十区初料功须十五年修宫使□绘一壁给二烛遂七年而成□云如盖覆太初殿三鹤集殿□卯翰林学士晁迥上玉□宗操继上景灵宫庆□善训弟子亦搢绅□奉祀记三卷□金水后作土祠□道以属玉清昭应宫□为三神山起阁道几□竦抗疏皆以为不可其寳符阁奉神果实旦起视之□食之八年正月壬午朔备盥□殿奉表奏告尊上玉皇大天帝圣□天书于寳符阁塑御像冠服立侍上升阁备登□献还御崇德殿受贺大赦天下八月癸未陈州知州枢密直学士礼部尚书张咏卒赠左仆射谥忠定上尝称咏才任将帅以疾不尽其用咏临终奏疏言不当造宫观竭天下之财伤生民之命此皆贼臣丁谓诬惑陛下乞斩谓头置国门以谢天下然后斩咏头置丁氏之门以谢谓上亦不为忤云壬辰盛度上圣祖天源录五卷因上言所编事迹虑有未备愿别命儒臣就馆阁羣书更广编撰以继先烈诏从之仍命王曾及集贤校理晏殊与度同纂集九年二月壬辰命修景灵宫副使同玉清昭应宫副使户部侍郎林特诣兖州景灵宫太极观设醮以营建毕故也宫观总一千三百二十二区诏奖监修内臣赐工卒缗钱五月甲辰朔诏以来年正月一日诣玉清昭应宫与天下臣庶上玉皇大天帝圣号寳册又以十一日有事于南郊行恭谢之礼诸军赏赐并以内藏物充三司勿催促诸路钱帛诸州军监无得以修贡助祭为名辄有卒饮丙辰以景灵宫会灵观及兖州景灵宫太极观成羣臣称贺庚申景灵宫使向敏中修宫使丁谓并加兵部尚书副使以下进秩各赐衣带币宫宇总七百二十六区冬十月壬申朔诏以来年正月二日诣景灵宫奉上圣祖徽号礼仪院言正月天书降用上元日朝拜玉清昭应宫十月圣祖降请以下元日朝拜景灵宫着



为定式乙卯诏改来年为天禧元年王钦若尝自言过圃田夜起视天中赤文成紫微字后使蜀至褒城道中遇异人告以他日位至宰相既去视其刺字则唐司徒裴度也及贵遂好神仙之事常用道家科仪坛场以礼神朱书紫微二字陈于坛上戊辰钦若言度坟在郑州祠宇毁坏欲自以家财完葺诏可仍録度孙坦为郑州助教钦若又请以新庙编入祀典从之仍为文着其事凡天书及诸祠祭皆钦若发之虽以济其邪佞亦其素所蓄积者然也十二月壬申天中节羣臣上寿赐会用疏食有司备位卫道门威仪钧容乐导圣制玉清昭应宫颂赴宫辛巳召辅臣至崇德殿观所制真圣亲作天书金辂上服鞞袍命辅□司奉玉皇寶册袞服圣祖□长春殿中书枢密院修奉□仪禁卫援护安于崇德殿□寶册袞服二圣绛纱□己亥上酌献讫宫圣祖寶□册宫（阙）

天禧元年春正月□礼是日上斋于景灵宫□宣读天书之礼丙辰□以枢密使王钦若为灵观□事兼领于是王曾次当为之□欲得此曾因恳□焉上颇不恠□事何遽自异耶曾顿首谢曰君从諫谓明臣尽忠谓义陛下不知臣弩病使待罪政府臣知义而已不知异也乙亥出圣祖神化金寶牌分给京城寺观及天下名山牌长二寸许广寸余面文曰玉清昭应宫天尊万寿金寶背文曰永镇福地其周郭皆隐起蛇龙华葩之状封以绛囊漆匣上亲题署之十月辛亥翰林学士利瓦伊等上新修大中祥符降圣记五十卷诏褒之赐器帛有差二年九月祥源观成观宇凡六百一十三区冬十月乙未雪三年三月戊午準奏天书降于佑山中蓋朱能所为也中外咸识其诈上独不疑夏四月辛卯备仪仗至琼林苑迎导天书入内太子右谕德鲁宗道上疏畧曰天道福善祸淫不言示化人君政得其理则作福以报之失其道则出异以戒之又何有书哉臣恐奸臣肆其诞妄以惑圣德也知河阳孙奭上疏言朱能者奸险小人偶尘驱使骤为牧伯皆由妄言祥瑞而陛下崇信之屈至尊以迎拜归秘殿以奉安上自朝廷下及闾巷靡不痛心疾首反唇腹非无敢言者汉文成将军以帛书饭牛扬言牛腹中有奇书杀视得书天子识其手迹又有五利将军妄言方多不讎二人皆坐诛先帝时有侯莫陈利用以方术暴得宠用一旦发其奸诛于郑州汉武可谓雄材先帝可谓英断唐明皇得灵寶符上清护国经寶券皆王鉷田同秀所为明皇不能显戮怵于邪说自谓德实动天神必福我夫老君圣人也倘实降语固宜不妄而唐自安史乱离乘輿播越两都荡覆四海沸腾岂天下太平乎明皇虽仅得归阙复为李辅国劫迁卒以忧终岂圣寿无疆长生久视乎夫以明皇之英睿而祸患猥至曾不知者良由在位既久骄亢性成谓人莫己若谓諫不足听心玩居常之安耳熟导谀之说内惑宠嬖外任奸回曲奉鬼神过崇妖妄今日见老君于阁上明日见老君于山中大臣尸禄以将迎端坐畏威而缄默既惑左道即紊政经民心用离变起仓卒当是之时老君宁肯御兵寶符安能排难也今朱能所为或类于此愿陛下思汉时之雄材法先帝之英断鉴明皇之召乱庶几灾害不生祸乱不作天本无言安得有书天下皆朱能□尔乞斩朱能以谢天下佑县大赦天下自琼林□月戊申祥源观成□干兴元年九月□后所降天书□有日其刻玉副使□于内中供养则先□可留于人间当从

葬□之议也

真宗经制契丹

上嗣位遣何承矩知雄州赐诏□永图思与华夷共臻富寿而契丹□帝继统之初和好以来礼币不絕其后克后汾晋□贪地为国生事信好不通今者圣考上仙礼当讣告汝任居邊要洞晓诗书凡有事机必能详究轻重之际务在得中承矩即贻书契丹谕以怀徕之旨然未能得其要领也时契丹多有降者上颇优待承矩咸平二年三月京西转运副使朱台符上言曰陛下承天受命与物更始授继迁以节钺加黎亘以王爵咸使使者镇抚其邦惟彼契丹未蒙渥泽非所以柔遠能迩昭王道之无偏也今已讣谅阴将终禫祥中外延颈观听德音臣愚以为宜以此时赦契丹之罪择有文武才畧习知边徼辩说之士为一介之使以嗣位服除礼当修好往告谕之彼十年来不复犯寨以臣料之力非不足志欲归向而未得其间也今若垂天覆之仁假来王之使必驩悦慕义遣使朝贡因与之尽弃前恶复寻旧盟利以货财许以關市如太祖故事结之以恩彼必畏服两国既和则无北顾之忧可以專力西鄙继迁当自革心而束手是一举而两获也西北无事然后备边之兵可省边兵省然后费用节费用节然后黎庶可安黎庶安然后政化可致陛下若欲训兵练将与之力争臣不敢复有所云也若欲继好息民以安社稷不以此际乘便而行之虑他日噬脐无名发端昔汉高后时尉佗自号南越武帝黄屋称制与中国侔及孝文即位先遣陆贾驰传使之佗乃顿首称为藩臣夫汉文天子之尊也尉佗小国之君也所以然者为中国劳苦且以息战伐也今契丹之劲过于南越陛下之圣出于汉文迹而行之事岂相遠哉台符又自请使狄时论称之何承矩奏狄寇边上以问曹彬对曰太祖神武犹委孙全兴经营和好陛下初登极时承矩尝发书导意臣料北鄙终当复和上曰朕当屈节为天下苍生然须执纲纪存大体即久遠之利也七月甲申以傅潜为镇定高阳關行营都总管张昭允为都钤辖秦翰为排阵都监田绍斌为押先锋石普同押先锋杨琼为策先锋枢密都承旨王继英请车驾北巡上嘉纳之九月丙戌命继英驰传诣镇定高阳關宣慰将士傅潜遣绍斌石普等戍保州遇狄入寇普□之及夜普嗣未还绍斌疑其为贼所困渡良廉河□千余级获马五□使杨延昭领兵趋焉狄至潜每抑之不令遠袭□知代州今年移知忻州每见狄入寇次第甚大臣初未信自入□□屯结甚众又恐侵犯鴈门洛邢宁化军度其□不轻退深恐大寒之际转肆冲突臣愚乞陛下郊裡既毕庆赏才行五七日间遂起圣驾径至镇州躬御六师奋扬威武勿生迟疑之虑勿听犹豫之谋周世宗及我太祖太宗近事可法也况陛下谅阴三年礼无违者复此顺动其谁敢当圣驾若过河北契丹当自引退四蛮八夷无思不服正在此举矣十一月乙未诏以边境绎骚取来日暂奉河北命周莹为随驾官营都总管刘知信副之杨永遵为排阵都监石保吉为北面行营先锋都总管康廷翰副之上官正为钤辖十二月甲寅车驾发京师戊午驻蹕澶州辛酉以殿前都指挥使王超权都虞侯张进为先锋大阵往来都提点马步军都军头呼延赞马军都头为先锋瀕州防御使王荣马步军都军头王

断忠为策先锋内出阵图示超等令识其部分甲子□□□□□□□中军枢密使王显副使宋湜分押后阵横亘数十里威武军言契丹来寇出兵擊之杀其酋帅河北民多惊扰丙寅遣屯田郎中李蟠等八人分往邢洺雄赵祁霸贝冀诸州遍诣闾里谕以车驾已至大名速令归业仍诏州县倍加恤之府州驻泊孙思恭与知州折惟昌钤辖刘文质等引兵入契丹五合川破拔黄大尉寨尽杀狄众焚其帐千五百余所获战马牛羊万计铠甲弓箭千事初河北转运使裴庄屡奏传潜无将畧恐失机会枢密使王显与潜俱起攀附颇庇之庄奏至辄不报潜屯定州縁边城堡悉飞书报告急潜麾下步骑凡八万余咸自置铁挝铁捶争欲擊狄潜畏懦不进守将校请战者辄丑言詈之□□□两昼夜不胜遂引兵掠宁□骑出邢洺间百姓惊扰□者踰月朝廷屡□范廷□赴镇□丞魏庠谕百官□若水言陛下躬擐甲胄□今所切者御戎之策与将来□书以伐谋为上汉高祖将以用法□能料敌制胜也用法者以朝廷能赏罚不私也潜领数万雄师闭门不出坐视边寇俘掠生民上则辜委注之恩下则挫銳师之气盖潜辈不能制胜朝廷不能用法使然也军法曰临阵不用命者斩今若申明军法斩潜以徇然后擢取如杨延昭杨嗣者五七人增其爵秩分授兵柄分路除讨孰敢不用命如此则不出半月可以全清边塞然后銮辂还京天威摄于四海矣此所谓即今御戎之策也其将来安边之策臣不敢广引前事太祖朝制最得其宜伏望遵太祖故事遴择名臣分理边郡罢总管之号使不相统摄置巡检之名俾通相救应如此则出必擊寇入则守城不数年间边烽罢警矣起居舍人李宗諤言臣以为临军易帅拔卒为将固在此时有功者赏于朝不用命者戮于市亦在此时也右司諫直史馆孙何言陛下嗣位以来训师择将可谓至多分阃授钺者当以身先士卒为心贼遗君父为耻而列城相望坚壁自全手握强兵坐违成筭遂使边烽相望敌骑凭陵焚劫我县城系累我黎庶陛下搃人神之忿怒悯河北之生灵爰御六师亲幸澶魏天声一振狄骑四逃虽镇定道路已通而德棣战征未戢此殆将帅未甚得人边奏或有壅遏邻不相救援糗须俟辇输之所致也此四者当今急务也拣将帅则莫若文武之内参用谋臣防壅阏则莫若凡奏边防陛见庭问合救援则莫若督以军令听其便宜运糗粮则莫若轻赍疾驱角彼趨捷今大驾既驻邺下匈奴终不敢萌心南牧亦望量屯劲兵扼其要害则单于系颈不日可俟矣右司諫梁颙言自古用兵之道在乎明赏罚二柄而已昨者命将出师乘时备塞而傅潜奉明诏握重兵逗遛无谋迁延翫寇守陴闭塞选懦以自全銳卒精兵拘束而不用以至敌兵南牧边尘昼惊河朔之民流移未息魏博以北蹂践一空遂致銮辂省巡圣君栉沐遐方未殄余寇尚存此所谓以贼遗君父者也人怨神怒罪不容诛或赦而不问则何以谢横死之民或黜而不戮则何以恢用兵之畧以军法论之固合斩潜以徇军中降诏以示天下如此则协前古之典章戒后来之□然后择边臣之可用也就委用□潜于房州张昭允于通州皆□廷召自中山分兵擊狄求□保裔领赴之至瀛□遇使来趨兵保裔及夕廷召潜师以□左右请救伤□青而去范□里大破之斩首万余级□可胜纪余众遁逃出禁王荣□将才但能走马驰财汪



恒怯数口后发狄剽溜青者数十骑屯泥口所部署界河南岸而还昼夜急驰马不秣而道口有四五上闵之遣使收瘞置荣不问庚子车驾至自大名府三月手诏问备御剪灭之策于知开封府钱若水若水上言备边之要有五一曰择郡守二曰募乡兵三曰积刍粟四曰革将帅五曰明赏罚臣今举此五事皆是畧存大纲如可施行则当详具条奏臣尝见严尤论自古御戎无得上策臣切笑之以为王者守在四夷常获静胜此上策也曷谓无哉知雄州何承矩亦上言曰臣闻兵家有三阵日月风云天阵也山林水泉地阵也兵车士卒人阵也今用地阵而设险以水泉而设固建为陂塘亘连沧海纵有狄骑何由奔冲昨者戎狄犯边高阳一路东负海西抵顺安士庶安居即屯田之利也今顺安西至西山地虽数军路纔百里纵有丘陵冈阜亦多川渚泉源饶因而广之制为塘埭则可戢狄骑息边患矣今縁边守将多非其才心不知书耳不闻善不守疆界动蠹国家虽有貔虎之师莫逼贪污之众伏望遴择疆吏出牧边民厚之以俸禄使充其心借之以威权使严其令然后深沟高垒秣马厉兵为战守之备修仁立德布政行惠广安辑之道训士卒开田畴劝农耕畜刍牧以备凶年厉长戟修劲弩谨烽燧缮堡戍以防外患来则御之去则备之如此则边城安堵矣且边鄙之人多负壮勇议羌戎之情伪察山林之形势望于边郡置营召募不须等其人才止求少壮武力令及万人俟契丹有警任智勇将统而用之乃中国之长筭也上以大兵之后议遣重臣巡慰二河六月命参知政事向敏中为河北东安抚大使枢密直学士冯拯陈尧叟为副大使发禁军万人翼从所至访民疾苦宴犒官吏十二月诏沿边吏民斩贼首一级赏钱五千擒生者倍之获马者给帛二十疋不堪带甲者还之又诏河北民家凡二三丁籍一四丁五丁籍二六丁七丁籍三八丁已上籍四以强壮者五百人为指挥使置指挥使百人为都置正副都头二人节级四人所在置籍择善射者第补校长听自置马胜甲者蠲其户役寻募口勇敢团给附大军为栅官给铠甲四年六月口图示宰相北戎寇边常遣精口即有侵軼之患今盛选骁将口既能挫锐则其余望风不敢口断粮道可选将口地南北口深可口使口钤辖口是转运使口风裁且不能多饮固拒之口饮耳望都契丹兵卫也转运口帅之命往往得罪故显语及之口上默然良久曰卿第去勿忧朕自有处分于是口都转运使人遂不能委罪于望云十月北面前阵钤辖张斌与契丹遇于长城口时积雨狄弓用皮弦皆缓湿斌擊敗之杀获甚众斩其戎首伏骑大起三路统帅未及进前阵兵少退保威武军己未诏高阳關三路兵增骑二万为先锋又命将五人各领骑三千阵于先锋之前别命步军副指挥使莫州驻泊使管桑赞领万人居莫州顺安军为奇兵以备邀擊马步军都虞侯北平寨驻泊都总管荆嗣领万人以断西山之路仍列绘为图遣内侍副都知阎承翰賫示王显等且戒之曰设有未便当极言以闻无有所隐初议大兵阵于威武军会谍者言契丹犹未动故命悉徙于中山已而狄遽入渔阳逼威武斌虽以前锋独克大兵讫不进讨上得捷奏甚叹息焉诏桑赞分部下兵万人屯于宁边军令北面前阵兵居其后以前阵经力战故休息之何承矩请于干兴军选锐兵乘刁鱼之自界河攻平州以分狄劲从之十一月

王显与契丹战大破之戮二万余人获其伪大王统军成林相公等十五人首级并甲马甚众余皆奔北号恟满野十二月丁卯以狄退罢三路都总管兼河北之运已而狄数扬言入寇北边将帅多请益兵增筑城垒朝廷为之选强壮选保毅又浚河渠以省运置方田疏海道以限戎马扼要害募锐勇募强梁纳降附畧无宁岁六年四月入寇望都定州行营都总管王超召镇州桑赞高阳關周莹各以所部军来援超先发部兵五百人逆战杀戮甚众总管王继忠与敌战康村自日昃至半夜狄势小却迟明复战狄悉众攻东偏出阵后焚絕粮道继忠率麾下跃马驰赴服饰稍异狄识之围数十重士皆重创殊死战且战且行旁西山而北至白城陷狄超等即引兵还定州狄遂剽掠郡县时李继宣壁徐河狄众数十队薄威武魏能与战斩之久而继宣始至又寇静戎副使王□清分兵白将袭贼继宣不许虽日出遊骑觜贼势屡徙寨而未尝出战上召继宣令枢密院问状以杨延昭代之□都失利上日访御戎之策或言杨延昭□武事询以谋畧而所上不投机宜状闻或请令三路分兵扞御□定州之北又□高阳關□安军控扼□□□分兵出三路□之五千骑屯保州杨延昭□张屯北平寨田敏张凝石延福领□披城诱战使其奔命不服若□□令威虜之师与延昭会使其腹背受敌乘便掩□不攻定州纵南□则复会北平田敏合势入北界邀其輜重令雄霸破狄以来互为应援又命孙全照王德钧裴自荣领八千屯宁边军李重寶赵守伦张继旻领兵五千屯邢州扼东西路狄将遁则令定州大军与三路骑兵会擊之又令石普统兵万人于莫州卢文寿王守后监之俟狄北去则西趋顺安军襲擊断其西山之路如河水已合贼由东路则命刘用刘汉凝田思明领兵五千会石普孙全照犄角攻之自余重兵悉屯天雄命石保吉守之以张军势朕虽画此成谋以授将帅尚恐有所未便卿等审观可否更共商确李沆等曰战阵之事古今所难今所裁制尽合机宜上曰任人择材颇亦难事朕必就其所长而用之魏能性刚张銳善熟故使佐能威武地最要害白守素久习边防共司戎政庶其寬猛相济也孙全照好陵人取其尝所保荐者与同事三路都钤辖韩守英无执守当使阎承翰代之承翰虽无武干然亦勤于奉公也其它选用悉皆类此沆等曰陛下所任并中外素推许者况舍短取长必能协心成绩矣上曰已令将帅别上方畧候其奏至或无可采即当依此施行壬戌遣使诣河东河北陝西近郡取器甲羨数徙置沿边发顺安军役卒浚北平濠寨又以蒲阴县当高阳關会兵路宜葺其城令供奉官谢德权兼掌其事德权一日乘传诣阙求对且言沿边民庶多挈族入城屈指前岁敌人犯境傅潜闭垒自固康保裔被擒王师未有胜捷臣以为今岁戎人必寇内地今边民聚屯一处尤非便利愿速分戍镇定高阳三郡天雄城壁阔遠请急诏蹙之仍葺澶州北城浚清德军城堑以为备豫上变色曰此事非尔所当言德权曰臣又虑蒲阴工作未息寇必暴至矣既而狄果围蒲阴丁卯以工部员外郎兼侍御史知杂事刘宗为河东转运使丙子徙知天雄军事孙全照为宁边军总管徙并代钤辖一员率兵屯岢嵐军徙永兴副总管石晋为英州总管□癸亥徙北面都总管兵屯天雄军及邢洺州威虜□屯顺安□军莫州北平寨兵屯定州宁边军屯兵深

州镇定两路兵屯邢洺磁相□进上将亲征故也镇安节度使□求诣阙面陈边事曰伏覩□制置边备□有□显□道陛下□□□未犯塞鸣銮轻举直□又意或者献说请复幽燕此□鄙不宁僥北狄与之结援竞来□矣凡建议大事上下叶心举必成功今公卿士大夫以及庶人尚多异同之说安可行之耶臣谓止可命将帅以待之训士卒以御之坚垒以挫之按甲以待之必欲复燕蓟旧地则宜修文德养勇锐伺时利然后奉行天罚何往不克也

### 真宗澶渊通好

景德元年正月威武军莫州并言契丹奚王及南宰相皇太妃令公各率兵四万余骑自葭城川抵涿州声言修平寨事及故城上曰狄骑利战野缮治城堡或非其意诏边臣谨斥堠狄若有事于三城则并力城望都以大兵夹唐河令威武静戎顺安军北平寨保州严兵应使仍广门方由以拒戎骑若由未也则以修新寨为名储瓦木于定州二月辛酉以王显之天雄军府兼驻泊总管显上疏请于文武羣臣择晓边事者擢为宣徽使委之方面武臣先以罪戾降黜者宜匿瑕再用监军龐臣不须多任十羊九牧古人所讥每岁防秋精旅分屯三路合战多违期会望申约束如逐狄并令犄角相应自然军威倍壮人心增勇矣如威武军魏能破契丹于长城口□□追北过阳山斩级获戎器甚众四月诏能率此部兵次顺安军诏高阳關都总管周莹等会兵境上又诏北边诸路巡检魏愿等赴高阳關东路季政忠等赴干能宁军荆嗣等会刘汉凝田思明等率兵至莫州顺安军七月又发河东广锐骑兵赴镇州八月己未以参政吏部侍郎毕士安三司使兵部侍郎寇準并依前官平章事时契丹多纵遊骑剽掠深祁间小不利即引去倘佯无鬪意準曰是狃我也愿朝廷练帅领简骁锐分据要害以备之九月丁酉上谓辅臣曰累得边奏契丹已谋南侵国家重兵在河北敌不可狃朕当亲征决胜卿等共议何时可以进发毕士安曰陛下以命将出师委任责成可也必若戎辂亲行宜且驻驿澶渊然澶渊郭郭非广久聚大众深恐不易况冬候犹遠更望徐图寇準曰大兵在外须劳大驾暂幸澶河北所宜顺动以壮兵威仍督路进军临事□制然更不越澶州庶合机宜不□缓图若遂至澶渊必不可久驻□都总管知军府事命王显□大军□□□代州副总管雷有终至□军合寨于平定军诏河北吏□所在缓之仍颁赏格庚申令□邢州路刘用各率所部赴沧州邢州屯守戎人□邀擊之北面副总管王超等引大兵屯唐河契丹主同其母举国入寇其统军顺结兰引兵掠威虜顺安军魏能石普等率兵御之能败其前锋斩偏将获印及旗鼓輜重又攻北平寨田敏等擊走之又东趣保州振武小校孙密领十卒覘事中路遇狄前锋密等射杀十人又杀其军校获所佩右羽林军使印狄进攻定州城不利而北是日达兰与契丹主□□□□及其母合势以攻定州王超阵于唐河执诏书按兵不出战狄势益炽寇準言边事奏狄骑已至深祁以东縁三路大兵在定州魏能张凝杨延昭田敏等又在威武军等处东路别无屯兵乞先发大雄军步骑万人驻贝州令周莹杜彦钧孙全照部分或不足或止发五千人專委孙全照如□在近求便掩擊仍令间



道约石普阎承翰相应讨杀及募强壮入狄境焚毁族帐讨荡生聚多遣探伺动静以闻兼报军一安人心二张军势以疑敌谋三以振石普阎承翰军威与邢洺相望足为犄角之用又曰扈从军士不当与敌人争锋原野决胜负万一狄骑已营贝州以南即自定州发三万余人俾桑赞等结阵南趣镇州及河东雷有终所部兵由土门会定州审量事势即至邢洺间銮舆方可顺动更勅王超等速往定州地界翼城而阵以应魏能等作会合之势候抽移定州河东兵附近始幸大名又曰万一狄骑栅于镇定之郊定州兵不可来邢洺之北渐被侵掠须分三路精兵就差将帅会合及令魏能等迤■〈迤里〉东下傍城牵制狄必怀后顾之忧未敢深入若车驾不行益恐蕃贼残害生灵或是车驾亲举亦须度大河且幸澶渊就近今易为置制会合控扼寇準已决亲征之议参政王钦若以狄寇深入密言于上请幸金陵陈尧叟请幸成都上复以问準二人在旁準阳不知曰谁为陛下画此策者罪可斩也天子神武而将帅协和若车驾亲征狄自当遁去不然则出奇以挠其谋坚守以老其众劳逸之计我得胜算矣奈何欲委弃宗庙远之楚蜀耶二人由是怨準钦若多知準惧其妄有闕说疑沮大事图所以去之会上欲择大臣镇大名準因言钦若可任乙未□都总管提举河北转运司与□为狄所获狄即授以官□利时狄母老□小校李□望都□不□非唯□□常荷边□奉德音唯以□好必冀睿慈俯从愚瞽上□际亦以和戎为利朕初即位□仙命使讞告次则何承矩请因以为诚未交通不可强致又念自古边部为中原患非怀之以至德威之以大兵则犷悍之性岂能柔服此奏虽至要未可信也毕士安等曰近岁契丹归欵者言国中畏陛下神武本朝雄富常惧一旦举兵复幽州故深入为寇今既兵锋屡挫又耻于自退故因继忠以请谅亦非妄上曰卿等言知其一未知其二彼以无成请盟固其宜也然得请之后必有邀求若屈己安民时遣使命遗之货财斯可也所虑者闕南之地曾属彼方以是为辞必须絶议朕当治兵誓众躬行讨擊耳遂以手诏示继忠曰朕丕承大寶抚育羣民常思息战以安人岂欲穷兵而黷武今览封疏深嘉恳诚朕富有寰区为人父母尚谐偃革亦叶素怀诏到日卿可密達兹意共议事宜果有密实之言即付边臣闻奏继忠欲遣使命先達上未许也丙子以周莹为驾东西贝冀路都总管杜彦钧副之綦政敏为钤辖葛霸为驾前西面邢洺路总管王隐副之孙全照为钤辖上召全照与语命兼天雄军及贝冀等州钤辖仍令察视北面事机全照言若狄南逼魏城但得骑兵千百必能设奇取胜上赏其忠果足张兵威乃诏周莹若全照欲擊狄即分兵擊之狄骑数万入寇草城川岢岚军使贾综率兵败擊之翌日复至又败之逐北出境时并代钤辖高继勳等率兵来援登高望草城川谓琮曰狄众布阵不整将不才也我兵虽少可以奇取胜先设伏山下战合狄必南去尔起乘之大溃与战至寒光岭伏发果败自相蹂躪者万余人获马牛橐驼甚众十月知府州折惟昌率所部兵自火山军入契丹率州界前锋大狼水寨杀戮甚众生擒四百余人获马牛羊铠甲数万计契丹方围岢岚军闻败即遁去以何承矩知澶州诏雷有终等率兵赴镇州契丹遣众沿胡卢河而东诏诸将整兵为备仍令岢岚威武军保州北平寨总管等深

入贼境腹背纵擊以分其势令石■（卅 畧）路都监王汀率所部兵屯宪州如戎人自西谷入寇即会代州总管折州驻泊兵拒之如岢岚宁化军入寇即令麟府钤辖韩守英率兵赴之庚寅命兵部尚书知青州张齐贤令知青淄安抚使知制诰知郢州丁谓兼郢齐濮安抚使□转运及兵司各令具管内诸州□图以闻既而狄骑稍南民大惊□时济谓急取死罪囚斩河□分使并河执旗□引去丙□魏能保□诏□深兵挠□受超节度都□知秦翰乘使□事乙巳保莫州岢岚威□是役也张凝田敏皆以偏师□凡数万计独魏能逗遛无功契丹已领攻围瀛州盖闕南乃其旧疆恐难固□早遣使议和上谓辅臣曰瀛州素有备非所忧也欲先遣使固亦无损乃令枢密院择可使狄者王继英言殿直曹利用自陈倘得奉君命死无所避上曰契丹先露恳诚永结和好使于兵间用亦无他然小臣闻命请行斯可嘉也乃授利用阁门祇候假崇仪副使奉契丹主书以往又赐继忠手诏丙戌狄果寇瀛州势甚盛昼夜攻城擊鼓伐木之声闻于四面大设攻具駮奚人负板秉烛乘墉而上知延州李延渥率州兵强壮又集贝冀巡检使晋所部拒守逾十数日多所杀伤狄主及其母又亲鼓众急擊矢集城下如雨死者三万余人伤倍之竟弗能克乃遁去其众犹二十万谋欲乘虚抵贝冀天雄军十一月诏督诸路军及澶州戍卒会天雄军自狄入寇河朔皆城守右赞善大夫王屿知冀州常有破狄之志日阅戍卒又集强壮练习之开门樵采如平日常上言寇若至必可邀擊愿勿以一郡为忧于是狄骑逼城屿擊走之发忻代州兵赴诸路会合召德清军如戎寇南侵不须固守率城中军民并越澶州仍令驾前排阵使分兵应接以其介澶卫之间素不修治屯兵寡少也辛酉令随驾兵自来日以次发澶州戊辰以李继隆为驾前东面排阵使葛霸副之孙全照为都钤辖张旻为钤辖石保吉为驾前西面排阵使王隐副之秦翰为钤辖王继忠之战于望都也张旻为定州行营钤辖率诸将间道往援比至城已陷旻与狄战身被数疮杀一骁将迟明复战而继忠为狄所执旻还言天道方利客先起者胜宜大举伐狄并上兴师出境之日上以问辅臣皆言不可乃止车驾将亲征旻方戍并代复奏边事召还上曰契丹入寇与卿所进北伐之日同悔不用卿策今须守澶州扼桥而未得人如之何旻请行上喜命为东面钤辖先令至澶州候狄遠近秦翰既受命督诸将环城浚沟洫以拒戎马功毕狄果至翰不解甲胄凡七十余日庚午车驾北巡司天言日抱珥黄气亢塞宜不战而却有和解之象天雄军闻狄将至阖城惶惧王钦若与诸将议探符分守诸门孙全照曰全照将家子请不探符诸将自择便利□当有全照请当之既而莫肯若亦自分守门全照曰不□决南北相距二十里请□府第保固心□大门北门□乃环□□□□是亡□门力战杀□四□遂陷德清□都虞候胡福等十四人并□在踰月不至□益南侵上□陵之谋告上宜且避其銳者上□入内问□□□上曰羣臣辈欲将官家何之乎□速还京师準入问曰南巡何如準曰羣臣怯懦无知不异于向者妇人之言今狄寇迫近四方危心陛下惟可进尺不可退寸河北诸军日夜望銮輿至士气常百倍若回辇数步则万众瓦解狄乘其势金陵亦不可得而至也上意未决準出召殿前都指挥使高琼谓曰

太尉受国厚恩今日有以报乎对曰琼武人诚愿効死準复入对琼随入立庭下準曰陛下不以臣言为然盍试问琼等遂申前议词气慷慨琼即奏曰寇準言是且曰随驾军士父母妻子尽在京师必不肯奔而南行中道即亡去耳愿陛下急幸澶渊臣等致死狄不难破準又言机会不可失宜趣驾时王应昌带御器械侍于侧上顾之应昌曰陛下奉将天讨所向必克若逗遛不进恐狄势益张或且驻蹕河南发诏督王超等进军狄当自退矣上意乃决

甲□露寒□复且奏□念固许之矣然□马可渡亦宜过为之防朕贪憚不顾德义若盟约之际□□□上天景灵谅必助顺可再□以便宜从事□既陷德清是日率众抵澶州□阵围合三面轻骑由西北隅突进李继隆等整军成列以御又面戒利用以地必不可得若邀求货财则宜许之利用对曰臣向使晓敌语又密伺韩■〈木巳〉闻其乘间谓左右曰尔见澶州北寨兵否劲卒利器与前闻不同吁可畏也臣此行得熟察之妄有邀求必请会师平荡至狄寨狄以關南故地为言利用辄沮之且谓曰□若岁希南朝金帛之资以助□高正始遽曰今兹引众而来□图则本国之人负魏□已若北朝□息也□遗□意因□卫大将军□犹言曹利用所□悉具继忠密奏中矣丙□持誓书报聘金帛之数如秋奏上谓辅臣曰韩■〈木巳〉与东之来□而不述其主此盖毋專其政人不畏其主宜□毋遂并致两书又各送衣服茶药金器等东之又言众北归恐其縁边邀擊有诏诸路总管及诸州军勿辄出兵马以袭契丹归师利用之再使狄也面请岁赂金帛之数上曰必不得已虽百万亦可利用辞去寇準召至幄次语之曰虽有勅旨汝往所许不得过三十万过三十万勿来见準準将斩汝利用果以三十万成约而还入见行宫上方进食未即对使内侍问所赂利用曰此几事当面奏上复使问之利用终不肯言而以三指加颊内侍入白三指加颊岂非三百万乎上失声曰太多既而曰姑了事亦可耳及对上亟问之利用再三称罪曰臣许之银绢过多上曰几何曰三十万上不觉喜甚戊子上作回銮诗命近臣和幸北寨劳军召排阵使李继隆石保吉宴射行宫亭咸赐袭衣金带鞍马仍举酒属之继隆等皆引满因言曰契丹无名犯寨此盖将帅非才致劳陛下亲驾戎辂冒犯雪霜当戎寇之深入也羣议常务城守若非决于宸断尽出禁卫骁□□可保百年无事之分状劲弩控扼要害达兰所将皆精锐方为先锋异其旗帜躬出督战威虎军头张环守林子弩弩才发达兰中额是夜死狄之入寇皆其首谋遂大挫衄退却不敢动但时遣轻骑来覘王师丙子车驾发李继隆使人告捷又言澶州北城门巷湫隘望且于南城驻蹕是日次南城以驿为行营将止焉寇準固请幸北城曰陛下不过河则人心危惧狄气未慑非所以取威决胜也四方征镇赴援日至又何疑而不往高琼亦固以请且曰陛下若不幸北城百姓如丧考妣签书枢密院冯极在旁呵之琼怒曰君以文章致位两府今狄骑充斥如此犹责琼无礼君何不赋一诗咏退狄骑耶即麾卫士进鞞叩陛上遂幸北城至浮桥犹驻蹕未进琼乃执挝擊鞞夫背曰何不亟行今至此尚何疑焉上乃命进鞞既至登北城门楼张黄龙旗诸军皆呼万岁声闻数十里气势百倍



狄相视益怖骇驰骑传报擊鼓讙噪渐次遁去民被驱掠甚众无守视之者上览覲营壁召见李继隆以下诸将抚慰者久之赐诸军酒食缗钱戊寅移御北城之行营曹利用赴狄寨见其国主羣臣共议和好事议未决乃遣在飞龙使韩■〈木巳〉持国主书与利用俱还十二月庚辰■〈木巳〉入对其书复以關南地为请上谓辅臣曰吾固虑此今果然奈何辅臣等荅其书言關南久属不可拟议或岁给金帛助其军费以固欢盟惟陛下裁度上曰朕守祖基业不敢失坠所言归地事极无名必若邀求朕当决战耳实念河北居人重有劳扰傥岁以金帛资其不足朝廷之体固亦无伤荅其书不必具言但令曹利用与韩■〈木巳〉口述可也赐■〈木巳〉裘衣金带鞍马器币与利用同往□不然数十岁后戎且生心矣上曰数十岁后当有能扞御之者吾不忍生灵重困姑听其和可也準处分军事或违诏旨及是谢曰使臣尽用诏今兹事岂得速成上笑而劳焉辛丑録契丹誓书颁河北河东诸路始通和所致书皆以南北朝冠国号上乙亥知雍州何承矩言将来契丹使入界欲令暂驻新城俟接伴使至迎于界首从之承矩又言使命始通待遇之礼宜得折中庶可久行乃悉条上手诏嘉纳仍听事有未尽者便宜裁处初命内侍右班副都知阎承翰排辨礼仪议者欲以汉衣冠赐契丹使者承翰曰西北异宜各从其主俗可也上从承翰议二年十月遣度支判官太常博士周渐为契丹国主生辰使侍禁合门祇候郭盛副之职方郎中直昭文馆韩国华为契丹国母正旦使衣库副使兼通使舍人焦守节副之盐运判官秘书丞张若谷为国主正旦使内侍崇班阁门祇候郭允恭副之自是岁以为常甲午使臣自北归奏言榷场商旅贸易于北境契丹国主凡受其馈献必还其直又设酒馔相结好事同一家道路永无虞□兹亦可见然更宜谨择□国母遣使左金吾卫经国母使□左金吾丞□谔引□之□使留□信遐迩□干兴元年夏六月臣举号恟因谓其□垂二十年忽报登遐吾虽□恟又曰闻嗣皇□少恐未□闻奈何及薨貽廓至具道朝廷□萧氏曰汝可致书大宋皇太后使汝名□传真宗灵御于范阳悯忠寺建道场百日下令国中诸犯真宗讳易之遣殿前都检崇仪节度耶律王隐翰林学士工部侍郎知制诰马贻谋来祭奠右金吾卫上将军耶律留宁引进使姚居信来吊慰左金吾卫将军萧日新利州观察使延休吊慰皇太后丁巳使者入奠大行神御于滋福殿既而进慰书复于东承明殿进萧氏书及其还也又辞大行于滋福殿退诣崇德殿合门使宣大行遗旨曰两朝欢好务以息民继及子孙永存誓约

太平治迹统类卷四

●钦定四库全书

太平治迹统类卷五

(宋) 彭百川 撰

真宗圣政

大宋至道三年三月癸巳奉遗制即位四月戊戌始见羣臣于崇政殿西序癸卯宰相吕端加左仆射甲辰太子宾客李至为工部尚书李沆为户部侍郎参知政事工部侍

郎郭贇翌日求对恳辞上曰全魏之地所寄尤重卿宜亟去上召辅臣问曰郭贇愿留如何对曰近例亦有之上曰朕初嗣势治大藩而不行则何以使人卒遣之上谓宰相曰朝堂中颇有淹滞之人如梁周翰夙负词名三十年跻于众僚甚可念也朕在府宫多令杨亿草奏文理精当世罕偕者宜即加奖擢辛亥工部郎中史馆修撰梁周翰为驾部郎中知制诰著作郎直集贤院杨亿为佐正言馆职并如故事入西阁皆中书召试制诰三篇各二百字一篇百字惟周翰不朝试而命焉乙卯羣臣三上表请御正殿从之五月丙寅始御正殿视朝御后殿阅事如常仪丁卯诏御史台告谕凡人君有过政事或亏军事臧否□极建抗疏以闻庚午诏□兆至蕃未闻九年之蓄又诏三司及兹岁稔□准发运使诸路转□阙上初听政□嫔御颇多□等曰陛下□月上谓宰相曰□甚无益在朕薄德□乃为瑞也辛丑诏天□□□□工部侍郎同知枢密院事钱若水罢为集贤院学士判院事先是上即位若水以母老请解机务章再上乃得请入谢便殿命坐慰劳入对苑中从容数刻上问近臣谁可大用者若水言中书舍人王旦有德望宜任大事上曰此固朕心之所向也若水好汲引后进推重贤士襟度豁如也其在枢密同年生有为县佐者每谒见若水必序齿而拜之上居忧日对辅臣于禁中每见吕端等必肃然拱揖不以名呼端等再拜而请上曰公等顾命元老朕安敢上比先帝又以端朕体洪大宫庭阶庀颇峻命梓人为端纳陛秋七月乙丑御崇政殿召端等访以军国大事经久之制端陈当世急务有条理上甚嘉纳丙寅令诸路转运使更互赴阙询以民间利病八月己亥以曹彬为枢密使兼侍中罢旌钺户部侍郎同知枢密院事向敏中给事中夏侯峤并为枢密副使上谓之曰近密之司典领尤重必素有名望才德兼厚者处之乃可镇静而责成彬以耆旧冠枢衡之首敏中及峤协助之兵机边要有所望矣敏中明辨有识才畧英敏先是西北用兵敏中專主谋议至于二边道路斥堠走集之所莫不周知峤仕藩府最旧故首加擢焉乙巳令曹彬赴中书省彬请就枢密院上以彬位兼左相特宠异之九月先是寿州献绿毛龟金文粲然界道上以为介虫而毛天意或有所警戒令宰相详考以闻于是吕端等言臣等寡闻安知天意然尝闻于师曰圣人之意与天符合苟睿思徘徊属于一物必神灵盼饗有所启焉今神龟所得之地地名寿春陛下顷升皇储实自寿邸由是言之则是龟也特为陛下而生将使陛下后天而老既寿且昌又龟为水族义主乎阴介者刚物也□秋之类皆稟阴气天戒若曰将□来庭乎望陛下钦若天意弥□日则灵物之出岂徒然上□□□龟有毛者文理□毛文理之华者岂□朕意为比部员外□惟新所宜□誉道唐虞之□施于君子任贤勿□爱而知其恶憎□遊无以血方□刚而□大行之惠兹荅天地敷锡□成汉文三宗之美不可同年□建议请增损旧政者上曰先帝□名此欲我儿有常德久于其道也罔极之□因涕泣沾衣左右无不呜咽丙寅复初分三司勾院□三命官各判之以太常丞王钦若判三司都理欠凭由司钦若新喻人初为亳州判官监仓天久雨仓司以穀湿不收忧民自遠来输租食穀且不得输钦若悉命输之仓且奏不拘年次先支湿穀即不致朽败太宗大喜手诏褒荅因识其姓名及开封府

以岁旱蠲七十县民租特有飞语闻上言按田官欲收民情所蠲放皆不实太宗不悦御史台探帝意遣使复实乃诏东西诸州选官阅视亳州当按视太康咸平二县州遣钦若覆按甚详控疏言田实旱开封止放七分乞全放既而他州所遣官并言诸县放税过多悉追收所放税物人皆为钦若危之踰年而上即位于是擢用钦若因以其事语辅臣曰当此时朕以自惧钦若小官独敢为百姓伸理此大臣节也钦若既为三司属虞部员外郎母宾古谓钦若曰天下宿逋自五代讫今理督未已民病不能胜仆将启蠲之钦若则夕命吏治其数翌日上之上大惊曰先帝顾不知也钦若徐曰先帝固知之殆留与陛下收天下心尔上感卒从其言十二月戊午秘书丞勾当京兆府三白渠孙勉上书言九事一择贤材二询谏议三远邪佞四务节俭五明赏罚六谨号令七重使介八审荐举九推恩信赐诏奖之寻召试授直史馆国初罢节镇统支郡以转运使领诸路事其合别未有定制京西或为两路又为陝府西北路淮南分为西路江南分为东西路荆湖两路或通置一使两浙或为东北路其西南路其西路实兼福建剑南初曰西川后分陝路西川又分东西路寻并之是岁始定为十五路一曰京东路二曰京西路三曰河北路四曰河东路五曰陝西路六曰淮南路七曰江南路八曰荆湖南路九曰荆湖北路十曰两浙路十一曰福建路十二曰西川路十三曰陝路十四曰广南东路十五曰广南西路咸平二年三月戊辰荆湖南北路始置西使

咸平元年正月辛酉朔改元夏四月□路逋欠先朝每有赦宥皆令蠲更理纳颇闻细民愁叹甚亡□路转运使州军吏按百□钦若之言也□逋欠□由是眷钦若益□厚察官吏事权甚□听察远方□廉平之吏宽□端久被病诏免朝□为太子太保户部□郎参知政事李沆并平□至罢为武胜节度使仲舒罢为礼部尚书枢密副使□部侍郎密□副使户部侍郎□知政事翰林学士杨砺为工部侍郎宋湜为枢密副使庚寅上谓辅臣曰羣臣中有谤言達于朕听者询之于众似得其实然人谁无过但能循省迁革则为善矣朕固不以一眚废终身之用也时戚里有争分财不均者更相诉讼又宫官自理于上前更十余断不服齐贤曰是非其府所能决也臣请自治之上许焉齐贤坐相府召讼者问曰汝非以彼所分财多汝所分财少乎皆曰然乃命各署状结案即遣两吏送甲入乙家乙入甲家贖财皆安堵如故分书则交易之讼者遂止明日以闻上大悦曰朕固知非卿莫能定者上自即位每旦御前殿中书枢密院三司开封府审刑院及请对官以次奏事至辰后还宫进食少时复出御后殿视诸司事或阅军士校试武艺日中而罢夜则召儒臣询问得失或至夜分还宫其后率以为常十一月戊午上谓辅臣曰国家所重俭约为先节用爱人民俗自化张齐贤曰书称大禹克俭于家老氏三寶俭居其一上之所好下必从之好俭则国有余财下从则家有余粟自然廉逊兴行盗贼鲜少蚩蚩之众登于富寿也二年二月辛丑太常丞判三司理欠司王钦若表述上登位以来放天下逋欠钱物千余万释繫囚二千余人请付史馆上谓辅臣曰兹事先帝方欲行之朕奉承先志耳因命学士院召试钦若及览所试文谓辅臣曰钦若非独敏于史事兼富于文词



今西掖阙官可特任之即拜右正言知制诰己酉上谓宰相曰闻朝臣中有交结朋党互扇虚誉速求进用者人之善否朝廷具悉但患行义不至耳浮薄之风诚不可长乃命降诏申警御史台纠察之闰三月庚寅诏有司力役之无名营缮之不急者悉罢之上以亢旱诏中外臣庶并直言极谏诏书畧曰朕累降诏书大开言路颇多从臾罔副询求思得谏言以荅天休善者必加甄赏否者亦为优容勿尚靡辟复谈鄙事时有上封事指中书过失请以罢免者上览之不悦谓宰相曰此辈皆非良善止欲自进当谴责以警之李沆进曰朝廷比开言路言之当理宜加旌赏否则留中可也台辅如蒙罢免乃是言事之口者矣四月丙子上谓辅臣口询德行则罕见其人夫德口忠臣孝子岂无德行口姊讼家财婿言妻口且有遣书令异口酒酹地曰口财十之七口三给婿皆服咏明口转运使申淳德化惠口减直而入之十一月上御朝元殿受册尊号口加门下侍郎户部侍郎李沆口边境驿骚取来月暂幸河北口师甲子次大名府上御铠甲于中军枢密口使王湜分押后阵横亘数十里三年户部判官有司谏直史馆孙何出为京东转运副使上疏曰国家共治之任牧守为本亲民之官令长为急前代刺史入为三公郎官出宰百里其遴选可知也今则兼隋唐取士之法参周汉考绩之制然而资荫登朝居千骑之长胥徒祇役开百里之封或目不知书或心惟黷货属当盛世尤宜厘革望令审官院吏部铨凡京朝官籍入仕者非灼然绩状勿与知州州县官流外出身者非有履行殊常不拟县令庶分流品用劝士民十一月门下侍郎兼兵部尚书平章事张齐贤与李沆并相情好不叶自负有致君之术每敷奏多不直致议者以为踈阔辛卯日南至羣臣朝会齐贤被酒冠弁欹侧几颠仆殿上御史中丞劾齐贤失仪齐贤自陈因寒饮酒御之遂至醉顿首谢罪上曰卿为大臣何以率下朝廷自有典宪朕不敢私甲午齐贤罢守本官四年六月壬子上观稼北郊宴射于含芳园都人望见乘輿怵跃称万岁吕蒙正曰车驾遊幸百姓欢呼如此物情不可强致蓋陛下临御五年务行仁恤所以中外咸悦上曰但不扰之自然快乐蒙正又曰今秋大稔太平有象时和年丰即为上瑞上曰朕以边事未宁劳民供馈蓋不获已也苟能选将録兵駟攘戎寇使不敢侵掠则近边之民亦获安泰矣冬十一月丁亥幸龙图阁召近臣观太宗御书及古今名画御崇政殿阅张去华所著元元论及田园图谓近臣曰经国之道必以养民务穡为先朕常冀边鄙稍宁兵革粗定则可以力行其事使吾民富庶也十二月乙卯工部侍郎致仕朱昂献所著资理论论时政赏罚得失且言天下至广宜急择贤才以张治具儗限以常格则英俊无由自達矣上曰昂已退居复贡直言可嘉也命以其书付史馆乃録一本留中六年九月上又谓近臣曰比来备边專意西北至于遠方殊俗要不可忽如川广荆湖常须训谏军伍以为边备也十二月癸亥上亲问逋负名籍口囚四千一百六人蠲物八万三千口谓蠲放逋债減除率敛其数口亏损国计为言上曰非理口于出纳固有司职也

景德元年六月丙辰私或非素愿因而口得辄诣阙庭口使到州口其为首者口郎中边肃殿中口郎郝太冲李玄太口国子博士陈昭度太口若谷姜与殿中丞皇甫口允

崔遵度中舍□度将作□其姓名今阁门祇候崇政殿□阙每对必往复紬绎其词气或  
注文□为省府判官或升其差使焉仲谋高密人协帛第□州若谷南剑州涉虞城遵度  
淄川人也好事者因号越等为二十四气以比唐修文馆学士四时八节十二月之数元  
秋七月先是上召翰林学士梁颙夜对询及当世台阁人物颙曰晁迥笃于词学盛玄敏  
于吏事上不荅徐问曰文行兼着如赵安仁者有几颙曰安仁材识兼茂体裁凝远求之  
具美未见其比也顷颙卒乙酉以知制诰赵安仁为翰林学士玄余杭人也后改名度沆  
死中书无宰相上意欲擢任三司使寇準乃先置宿德以镇之庚寅迁翰林侍读学士兵  
部侍郎毕士安为吏部侍郎参知政事士安入谢上曰未也行且相卿谁可与卿同进者  
士安言準天资忠义能断大事臣所不如上曰闻準好刚使气士安曰準忘身徇国秉道  
疾邪故不为流俗所喜今天下之民虽蒙休德涵养安佚而北狄跳梁未复若準者正宜  
用也不越月遂与準俱相九月诏诸转运使副辨察所部官吏能否为三等公勤廉干惠  
及民者为上干事而无廉誉清白而无治声者为次畏懦贪猥者为下并列状以闻从右  
司谏高伸之请也三年三月己未太常丞有集贤院任随上言上览而嘉之乃降诏曰国  
家设谏诤之官广求言之路盖欲弥缝阙漏启迪聪明而处职者姑务因循罕闻蹇谔兹  
为尸禄曷副虚怀自今宜竭节箴规悉心献替赏罚之典断在必行八月丁丑上谓王旦  
等曰凡裁度机务当知本末朕每与羣臣议事当务从长虽言不尽理亦优容之所冀尽  
其情也若果决行事未足为难周世宗固英主然用刑峻急诛杀过当享祚不永岂不由  
此乎癸未诏以来年春朝谒诸陵司天言岁在酉戌乃可行上谓辅臣曰今封疆宁谧气  
序均调所谓人情平天道顺也王旦等曰陛下虚心求治屈己为民夷狄怀徠岁丰人乐  
此太平之应也咸再拜称贺上曰亦卿等之功也朕观古今事若君臣道合上下同心何  
忧不治今四方无虞卿等宜谨守经制审于出令耳四年二月壬申前代内臣恃恩恣横  
蠹政害物□秩赐与不使过分者罪未尝□等曰前代事迹昭然足□也内侍史崇贵尝  
使渴有佐官名昭度□命能采善恶固□人未为厌□若等曰近□宸殿有顿踣者□谕  
乃退恭宗为动□而史臣以逢吉之党□事迹尤宜区别善恶有□理论之以资世教五  
月□奏荐者王旦曰人之情伪固□荐扬或称其能而情排抑唐□己将以计去之乃称  
其有将帅材而敬玄卒败军此皆不以国家为虑者也上曰若然则险伪之辈世所不能  
绝也六月上又谓拯曰齐贤仲舒每言朝廷当选任英俊勿使沉滞下位及令举官不即  
应诏泊迫之亦后于众人岂不畏言之戾耶秋七月上谓辅臣曰比诏庶官上殿不得  
以无名札子奏事盖虑邪说因縁交鬪而近日以来殊无献言者卿宜勤接士大夫察问  
四方事以闻诏翰林遣画工分诣诸路图上山川形势地理远近付枢密院发兵屯戍移  
徙租赋以备检阅八月壬戌是月诸路皆言大稔淮蔡间麦斗十钱粳米斛钱二百诏三  
院御史命大台采听声誉不称职者具以名闻上封者言愚民无知信佛过当谓舍财可  
以邀福修供可以减罪蠹害斯民宜行禁止上曰习俗既久安可遽绝然佛之为教本于  
修心若能悟理为益滋大又其教尚忍则国君含垢亦其义也国君苟能忧勤政治惠养

兆民不必像设自为功德耳十一月丁丑上谓王钦若等曰近有西北使还者言顺安军西至定州旷土尽垦辟苗稼丰茂民无差扰物价甚贱惟当慎择守臣使不生边隙也马知节曰西北二方久为外患今契丹求盟夏台请吏皆陛下威德所致且如唐室贞观开元称为治世措置兵甲树立屏翰皆不得其宜终成尾大之患当今兵柄尽皆陛下掌握至于一命之士皆由指授上曰前代求治之君不尚多知德宗思欲威加天下知书自任羣臣虽复上言多所不愜以是人颇循默此亦可深戒陈尧叟曰唐太宗与臣僚论事有不出太宗意太宗退有忧色盖以天下至广深居九重不能周悉而羣臣之见亦未及远此太宗所以忧也今陛下听断如流尚以为戒兹实天下幸甚

大中祥符元年三月上语辅臣曰京师远近迩来渐事奢侈衣服器玩多镕金为饰虽累加条约终未禁止计所费岁不下十万两屡诏三司使丁谓申明旧制募告者赏之自今乘舆服御涂金销金之类亦不须用

五月甲申上出□非多然幽□节用之一□焉

二年四月□诏虽减价可更斗□京市物价以故稍平□无事累岁丰稔若所在□孜孜求贤犹虑在下位者思□知且峻用之既久不为朝廷□当即启曰苟得其人则国之利也八月□甚还自东封社氏乃服以迎车驾上见之怒遂令出俗为道士由是天下无敢犯禁者十一月丙辰上作文武七条赐文臣任转运使以下至知县者武臣任部署以下至巡检者赐幕职州县场务官戒励敕又思先朝以儒行篇赐近臣今可以并赐一轴三年三月丁酉上谓王旦等曰自北鄙修好疆场不耸朕居安虑危罔敢暇逸尝着文自誓置之座右乃出贵廩食珍田夫吟念农歌自戒箴以示旦等上作念边诗赐近臣和上谓辅臣曰将帅才难今文武中固亦有人盖不经阵无由知之虽天下无事然兵不可去战不可忘古之道也四年五月两浙福建荆湖广南诸州循伪制戍丁身钱岁凡四十五万四百贯民有子者或弃不养或卖为僮仆或度为释老秋七月壬申朔诏悉除之五年七月戊辰龙圖阁待制张知白上言窃览方册见唐虞之制立四岳十二牧于是百工允厘百揆时叙又言三载考绩三考黜陟幽明汉史载宣帝为明盛之主美其任人责成为王道之根本常曰与我共治天下者其惟良二千石乎斯言也传示不朽后之人孰不称颂哉昔唐李峤尝云安人之方须择守令窃见朝廷重内轻外每除牧伯皆避命致诉比遣外任多是贬累之人风俗不澄实由于此望于台阁妙选贤良分典大州共康庶绩臣请辍近侍率先具寮凤阁侍郎常嗣立因而请行遂令以本官出领州郡伏见浙江大郡方切择人苟有阙员俾之承乏臣虽不肖愿继前修矧方册非遥事故仍在倘以为允乞举而行上曰知白援引故事请重亲民之官良可嘉也然以累更外任方在要职不许八月知升州张咏头疡其□求分务壬寅命薛映代之映至升州□租牛死租不得蠲上览奏□遂诏诸州条上悉蠲之□绥万国不媿边丝之□务发挥圣道刑于天□之意六年七月□器之税上曰□勿诏诸路□達淮□余之则俾均诸仓监官等并□理为劳绩但一界干□庚子放宫人一百八十□察推官朱昌符等四百六□其中才不才未可尽



知王旦亦为多矣然遭逢盛时登此纠何远因言昌符即台符之弟闰六月庚辰王钦若奉上诏编修后妃事迹七十卷赐名彤管懿范上谓辅臣藩长吏尤难其人要在洞達物情遵守条诏爱民抑暴而已吏廉而肆虐或察而滋章或急掇敛以为公或旷职务以为恕如此则何由致治耶十二月以御制陈书诗并注赐辅臣曰隋炀帝初平陈斩五佞人以谢三吴当时天下称贤及其无道乃过后主深可叹也王旦等曰陛下博观载籍非惟多闻广记皆取其规鉴谈经典必稽其道语史籍必穷其事论为君必究其治乱言为臣必志其邪正加以秉笔立言皆化人垂世之作今之文章尔雅搢绅稽古皆圣训所及也九年二月乙酉上与宰相语唐开元天寶政治优劣因曰姚崇宋璟真明相也明皇委之不疑诚为至当而过信国忠林甫深可惜也王旦曰奸邪之人诬陷良善其言似忠人主难辨而外人罕敢极言以取祸故国忠林甫得以專陷人人君若能察陷人以自进者上可见其七八唐室颠危数矣而人归唐德者赖祖宗仁恩浸厚也秋七月辛亥飞蝗过京城上出死蝗以示大臣曰朕遣人徧于郊里视蝗多死者翌日执政有袖死蝗以进者曰蝗实死矣请示于朝率百官贺王旦曰蝗出为灾灾弭幸也又何贺焉皆力请之旦固称以为不可于是二府方奏事飞蝗蔽天有墮于殿庭间者上顾谓旦曰使百官可贺而蝗若此岂不为天下笑耶执政皆顿首曰王旦远识非臣等所及也九年七月甲子诏自今天下郡官职田并须遵守先制无侵扰客戸遇灾沴即蠲省之先是殿中侍御史王竒请籍纳职田以助赈贷上曰朕以此田均济官吏各足用责以言谨耳竒未晓留上供来五十万以备饥年龟山僧智悟请就开寶寺不雨上忧形于色减膳折庆分遣官致谢和九月上谓姓复役军士中以爱民此实蠹政天禧元年春上曰省灾异二曰察党与六曰谨发常平仓粟置杨十四五月戊申诏以仍岁蝗量安抚所至不得宴乐游从得迎送殿中御史张廓言粮斛欲诱令举放以济贫民俟秋成依乡例偿之如有欠负官为受理从之八月上欲相王钦若王旦言旦今在枢密院两府任用亦均臣见祖宗朝未尝使南方之人当国虽古称立贤无方然必贤士乃可臣位居元宰不敢沮抑人此亦公议也上遂止及旦罢上卒相钦若钦若尝语人曰为王子明故使我作相晚却十年二年正月诏诸路灾伤州军并议减价粿官粟以惠贫民三月丙辰上谓宰相曰雨足麦茂丰稔可期贫乏之民事须拯济州县先贷粮种或恐吏即收催宜亟止之八月乙未判三司都催欠凭由司左正言集贤校理宋缓言本司屡经恩赦除放欠负差官详定内有事节未圆者凡六十八州军兵六百七十三万贯石斤两计三千二百余人至今报应未备望令转运司选官与长吏催欠官详酌如合蠲免限半月开奏从之于是皆获蠲免焉三年四月己亥召山南东道节度使同平章事判永兴军府寇準赴阙六月甲午左仆射平章事王钦若罢为太子太保十一月庚辰屯田员外郎锺离谨言切见诸州长吏于境内雨足苗长即奏丰稔其后霜旱螟蝗灾沴皆隐而不言上罔朝廷下抑民俗请自今诸州有灾伤处实时誊奏命官检视如所部丰登亦须俟夏秋成日乃奏如奏后灾伤听别上言隐而不言则论其罪从之四年九月己酉以会灵

观判官兵部员外郎知制诰吕夷简为刑部郎中龙图阁学士权知开封府夷简治开封府严辨有声上识其姓名于屏风意将大用之也十二月丁酉上不豫久事多遗忘钦若先以太子太保在东宫位三少上丁谓不悦因改授司空钦若宴见上问曰卿何故不之中书对曰臣不为宰相安敢之中书上顾都知送钦若诣中书视事谓令设馔以待之曰上命中书设馔耳钦若饥出使都知入奏以无白麻不敢奉诏因归私第有诏学士院降口谓口上但闻宣制亦不知悟也干兴元年春上崩于延庆殿庙号真宗陵曰永定陵冬十月葬圣元孝皇帝于永定陵

### 真宗经制西夏

至道三年上即位口去王师俘馘口严卒口乘来即口宜庶關口应诏上疏口刍粟利害有取舍灵武康口兵不兴而挽运口矣今關西二十五郡口雨稍愆秋田失种府库口秋犯塞则朝廷何备之口臣庆州延州清遠军隰州同时口此非小变也關辅若有寇盜弄兵苇蒲聚啸则臣口吴蜀闽越淮南湖南将有幸灾而乘便者又言闻朝廷遣使往谕迁贼继迁闻朝廷告哀亦能举部族大临縞素受命贡奉谢恩即未闻乞守塞垣又未闻乞归朝阙大臣必有拟议必有藏谋谋之允臧计必先定翼日又奏今灵州闭壁以待馈粮不敢御寇昨闻百官馈送粮草死者十余万人粮草二十五万到者七八万非戎人劫掠之又非戎人杀戮之也自相蹈藉或因被劫夺饥饿既众死亡遂多虽援之以甲兵迎而害之者士卒今關西人父哭子弟哭兄妻哭夫悲哀之声感动行路冤枉之苦轸恻圣心非三十年生之聚之教之化之未可以致太平也冬十月通进银台司田锡又上疏曰昨杨允恭请置粮草车三千辆须推车兵士一千人【允恭事见九月内】卢之翰乞自京支拨钱四十五万贯度支奏五月下旬灵州米■〈豆斗〉十贯文须车子运粮是边上素无储备矣请自京支钱是帑库素无积蓄矣米每斗十贯是灵州今已饿殍矣未审朝廷惜灵州有何所得弃灵州有何所失陛下宜精于所虑断在不疑十二月辛丑上访宰臣以灵武事宜参知政事李至上疏畧曰夷狄狡诈古圣人置之度外何必竭膏血较胜负灵州自郑文寶为国生事致朝廷旰食怀西顾之忧關辅生灵困转戍之役积骸蔽野十室九空饿殍满城边畎尽歿岿然空壁老我师徒而张颐待饲者不下五千送粮四十万而止获六万此则求欲固守不可得也臣料继迁若急攻不已则城危可知今缓而来者欲竭我财用困我民力堕彼之计也当此之时若不改弦易张则前日之患未艾也或言灵州者咽喉之地西北要冲安可弃之反为敌有臣应之曰凡谓咽喉者必金城汤池屯兵积粟四出以邀之多方以扼之今则闭壁而已自固不暇何咽喉之有哉且螯手断腕事非得已蓋所保者大况继迁之众行逐水草居无定所岂有如汉兵守磧必不然矣李继迁遣使修贡求备藩任上察其变诈时方在谅阴姑务宁静口官爵甲辰以银州观察使口内侍右班都知张崇贵郑州防御使遣还口湜知上意必欲口深西顾将议口遗命实口上甚（阙）

咸平四年十二月口遏党项朝臣互执利口而吕蒙正王旦王钦若以为口恐劳民

向敏中周莹王继英□上以境土遐邈难可遥度其所事□馆洪湛侍禁阁门祇候程顺  
奇同往按视焉时□孤危诏羣臣议弃守之宜知制诰杨亿即日奏疏畧曰臣切见太祖  
朝命姚内斌领庆州董遵海领环州二人所统之兵才五六千而已阃外事一以付之军  
市之租不从中覆用能士卒致命羌戎畏威朝廷无旰食之忧疆场无羽书之警臣欲望  
于武臣中选有将帅之才知边鄙之事者三数人各部诸郡量其所将兵多少除廩禄之  
外赐一大县税恣其犒设令开募府召髦俊为僚佐咨以策畧勇力之士稟其指纵之用  
军旅之政许以便宜而行倘贼迁侵边为军城扰内属蕃部并唇齿相援腹背夹攻或战  
马正肥戎士思奋即召发内属讨贼生羌俘获之余尽分麾下且戎人利于降附明立赏  
格厚启战功即迁贼腹心稍稍奔溃亲离众叛事去运乖戟■〈尸外立内〉独行谁与  
为伍但塞外一贼人耳安能与大邦为讎哉若欲谋成庙堂功在刻漏臣以为北边方盛  
其财犹丰不逞之羣如臂使指未可以岁月破也须废弃灵州退保环庆然后以计困之  
尔如臣之策祇得两三骁将付三万精卒以数县租赋给其用度分守边郡贼迁便可计  
日成擒朝廷可以高枕无事矣上访于左右辅臣咸以为灵武必争之地苟失之则縁边  
诸州亦不可保上颇然之宰臣李沆奏曰若迁贼不死灵州必非朝廷所有上愕然曰卿  
何独与众异也沆曰臣谓莫若发单车之使召诸将部分戍卒居民委其空垒而归如此  
则關右之民息肩矣

闰十二月□丙戌□西面行营□秦翰为钤辖领□上二图其一置资□一遇贼即  
变而为□至则易聚而可弃力图□五年正月甲辰以右仆射□渭镇戎军经畧判邠州  
令□驻泊兵并受齐贤节度初庆州发兵 中丞郑文寶素知西边山川险易上言必为  
继迁所败已而转运使陈纬果没于贼贼进陷清遠军文寶时居母丧服未除即命驿召  
文寶询其策畧文寶因献河西陇右图且言灵州不可弃于是遣王超西讨乃诏复文寶  
工部员外郎同勾当陝西随运转运使事孙全照至绥州乃言筑城非便朝论亦多异同  
丁丑诏知天雄军工部侍郎钱若水与并代钤辖陈兴乘传详度之倘有所利亟令施功  
如其不然即可罢役三月李继迁大集蕃部攻陷灵州知州内客省使顺州团练使裴济  
死之济在灵州凡二年谋缉八镇兴屯田之利民甚赖焉及被围饷道断絶孤城危急济  
刺指血染奏求救大军讫不至城遂陷四月钱若水上言绥州顷为内地民赋登集尚须  
旁郡转饷自赐赵保忠以来戸口凋残今欲复城之用工计百余万又须广屯戍兵倍于  
曩日且刍粮之给全仰河东其地隔黄河及大小铁碣二山又城下有无定河缓急用师  
输送艰阻且其地甚险卒阵于此郊授以成筭则前日狄众侵夺必能戮彼渠魁遏其壮  
势又戎寇之退走也若会诸将袭逐必立奇功陛下复念其请盟许其修好安民息战示  
以好生不令邀擊开其归路臣等无以展尺寸之功上曰北狄自古为患倘思平日愤恚  
尽议歼夷则须日寻干戈岁有劳费今得其畏威服义息战安民甚慰朕怀亦卿等之力  
也保吉进曰臣受命御寇虽上稟宸畧至于戎人侵突之际分布行阵指挥方畧皆出于  
继隆继隆曰契丹之败并出圣谋然宣力用心躬率将士臣不及保吉上曰将帅如此协



和共图勲绩军旅之事朕复何忧契丹虽北去未即出塞颇纵游骑搔扰贝州天雄军居民惊移入郭诏高阳關副总管曹璨帅所部取贝冀路赴瀛州以张凝为沿边巡检安抚使李继和副之选天雄骑兵三万为璨后继以蹶戎寇敢肆劫掠则所在合势剪戮仍遣使谕契丹以朝廷为民庶恐有惊扰出兵巡抚之意又赐王继忠手诏令告契丹悉放所掠老幼口卫指挥使刘晋领兵夺戎人车牛口超等分三路兵营在河南者口隆石保吉领之天雄军始口照欲闭城拒之王钦若曰口刑是成其叛口劳饮宴口矣亲王口以雄口师是日口曰不如此则口事王旦权东京留守口口口者旦上言国家掣口万愿出钱帛数十万赎其人口车驾发澶州张凝等奏率兵至口北去不敢侵掠规得戎首与其母已过定远军王口具奏北朝以严禁樵采仍乞诏张凝等无使伤杀北朝人上谓辅臣曰昨倘徇羣议发大军会石普杨延昭所部屯布沿河诸州邀其归路以精税追蹶腹背夹攻则贼必颠沛矣朕念矢石之下杀伤者多虽有成功未能尽敌自兹北塞常须益兵河朔人民无日休息况求欢盟已议俞允若彼自渝盟约复举干戈因而誓众中外同愤使其覆亡谅亦未晚今张凝等出兵袭逐但欲絶其扰攘耳左右皆称万岁延昭尝言狄顿澶渊去北境千里许人马罢乏虽众易败凡所掳掠悉在马上愿饬诸军扼要路掩杀狄兵歼即幽易数州可袭取也奏入不报延昭独帅所部兵抵狄界破古城俘馘甚众李继昌至狄帐羣情大感悦馆设之礼益厚即遣其西上阁门使丁振奉誓书来上戊戌车驾至澶州在澶州时寇准每夕与知制诰杨亿痛饮諠哗達旦上知之喜曰得渠如此吾复何忧乎时人比之谢安既而曹利用与韩■〈木巳〉至行在议和準初欲勿许且画策以进曰如若修葺未备蕃寇奔冲则难于固守况此州城邑焚毁无尺椽片瓦所过山林无巨木不堪采用徒为烦扰絶无所得宜罢其役若水复诣阙面陈其事上甚喜纳初若水率众过河分布军伍咸有节制深为戍将所服上知之谓左右曰若水儒臣中知兵者也寻复遣若水巡检陝西沿边诸州听便宜制置边事及还拜邓州观察使李继迁复以二万骑进围麟州金明巡检使李继周擊之未解麟州浊轮部署曹璨请济师上曰麟州据险三面孤絶州将戮力足以御贼但忧城中乏水既而贼果据水寨诏发并代石隰州兵援之李继迁率众攻麟州四面负板薄城者五日知州阁门祇候卫居实屡出奇兵突战及募勇士缒城潜往擊贼贼皆披靡自相蹂践杀伤万余人丁丑继迁拔寨遁去壬辰上始闻麟州捷奏谓左右曰迁贼猖狂以来未尝如此丧败又加以威虐胁从其众若频有奔衄人心必离易为图也诏以卫居实为供备库使通判以下并迁口各赐锦袍金带仍令藉立功将口而被围之际暴雨沾口人皆口有泉水列寨为防而垣墙口河东部井匠至州开凿口部署以下诏书谕所口景德元年正月丁未李继迁之陷西凉也都首领罗支伪降继迁受之不疑未几罗支遽集六谷蕃部及耆龙族合擊之继迁大败中流矢创甚奔还至灵州界三十井死其子阿■〈口移〉嗣位名德明遣中使赍手诏谕西面縁边部署钤辖等宜承贼迁既死速图报攻取之策飞驿以闻张崇贵屡请遣大臣至边议赵德明事五月甲申朔以兵部侍郎知永兴军府向敏中为鄜延路縁边安抚使崇

贵筑台于保安北十里许召戎人所亲信者与定盟约经置大小皆崇贵所为敏中实总其议焉二年六月辛卯鄜延路钤辖张崇贵言赵德明已奉表归款今河西蕃族各守疆界诏诸部如德明无所侵扰则勿纵兵出境甲午张崇贵自延州入奏诏谕以继迁昔时变诈之状今当令德明自为誓约纳灵州疆土止居平夏遣子弟入宿卫送畧去官吏尽纳蕃汉兵及质口封境之上有侵掠者禀朝旨凡七事则授德明以定难节度使西平王赐金帛缗钱四万贯疋两茶二万斤给内地节度俸听回图往来放青盐之禁凡五事仍遣阁门通事舍人焦守节偕往呼德明亲信示之如能顺命即降恩制既而德明使张浦诣崇贵等面议及致书疏但多邀求不肯自誓约也赵德明遣其兵马使贺守文来贡先是向敏中及张崇贵与德明议立誓约久未决德明虽数遣使修贡然于七事讫莫承顺累表但云乞先赐恩命徐议之时已有诏许德明毋纳灵州既又赐敏中等诏谕德明止遣子弟入宿卫及毋得攻劫西路进奉蕃部缀有争竞并取朝廷和断它约悉除之然亦不听回圖往来及放行青盐之禁乙巳敏中等言二事苟不如约恐乖前议请皆与之上以德明变诈难信傥务姑息必貽后患复赐敏中等诏令熟计复奏

景德三年五月丙午泾原仪渭钤辖秦翰知镇戎军曹玮等各请出兵讨贼上以德明累遣使修贡虑失诚信不许德明初请命于朝玮言继迁澶河南地二口边不解甲使中国西顾而忧口减后更盛强难制愿假臣口复以河南为郡县时不口其书不报向敏中等口约但令遣长子亲口得攻劫内属蕃口事颇为要切口愿与之口空接取进奉口复赐敏中等诏令口胁攻劫事状付敏中亦当重作要约絶其口贵入奏赵德明遣牙校言保吉临终谓之曰尔当口纳但连表上祈得请而已口禁虽宣命未许然誓立功効冀为异日尝典上嘉獎焉冬十月庚午朔以赵德明为定难节度使西平王给俸如内地又録德明誓表令渭州遣人賫至西凉府晓论诸蕃转告甘沙首领辛未以六宅使獎州刺史内侍省右班都知张崇贵为皇城使诚州团练使内侍省左押班都知赏其功也丁丑以内侍右班都知张崇贵为赵德明旌节官告使太常博士赵湘副之赐德明袭金带金鞍勒马银万两绢万疋钱二万贯茶二万斤大中祥符元年正月戊辰赵德明尝以饥上表乞粮数百万上出其奏示辅臣众皆怒曰德明方纳款而敢渝誓约妄有干请乞降诏责之王旦独不言上曰卿意如何旦曰臣欲降诏与德明言尔土灾谨朝廷抚御荒远固当賑救然极塞刍粟屯戍者多不可辍易已敕三司在京积粟百万令德明自遣众来取上喜从既而德明受诏望阙再拜曰朝廷有人臣不合如此

#### 丁寇南迁之祸

天禧三年夏五月戊戌以山南东道节度使同平章事寇準为中书侍郎兼吏部尚书平章事保信军节度使丁谓为吏部侍郎参知政事故节度使除拜当降麻翰林学士盛度以为参政改属外制遂命知制诰宋绶草诰辞谓甚恨焉谓在中书事準甚谨尝会食羹污準须谓起徐拂之準笑曰参政国之大臣乃为官长拂须耶谓甚媿之由是倾诬始萌矣四年六月丙申以仆射兼中书侍郎平章事寇準为太子太傅莱国公先是準

为枢使□利用议事有不合者辄曰□即利用由是衔恨丁谓遂合谋欲排準翰林□讲姻好而惟演女□豫难于语言政事□固刘氏宗人□準必请□曰皇太子□固万世基本丁□臣为翼上然之□且欲援亿以代谓□剪烛跋中外无知者□準请罢政事上不许与準□知制诰晏殊入禁中示以□臣职也乃召钱惟演须臾惟演□上曰当与何官惟演请用王钦若例授準太子太保□曰与太傅又曰更与加优礼惟演请封国公出袖中具策以进上于小国中指莱字惟演曰如此则中书但有李迪恐须别命相上曰姑徐之殊既误召因言恐泄机事臣不敢复出遂宿于学士院及宣制则非殊畴昔所见者不知殊所见除目又何等也殊不以告人故亦莫得其详云秋七月寇準罢是日惟演又力排寇準于上前曰準自罢政转更交结中外求任用晓天文卜筮者皆过召以至管军臣僚陛下亲信内侍无不着意恐小人朋党诬惑圣听不如早令出外上曰有何名目惟演曰闻準已具表乞河中府见中书未除宰相兼亦闻有许以再用遂不进此表上曰与河中如何惟演乞召李迪谕旨上曰李迪何如惟演言迪才短不能制準惟演又言寇準宜令早出外準朋友盛王曙又其婿作东宫宾客谁不畏惧今朝廷三分二分皆附準矣迪既除相準为太子太傅莱国公如故七月庚午以丁□谓马制辞云□过零陵踰大披□长问而责之曰奈何□其在道州晨具朝服如常时宾至笑语自若初準之绌皆非上本意岁余上忽思準左右亦莫敢对上崩九月丙辰以枢密副使周起知青州签署枢密院事曹玮环庆路都部署管勾秦州兵马起素善準而玮亦不附丁谓谓恶之并指为準党故俱罢自寇準贬斥丁谓侵权至除吏不以闻迪愤懣尝慨然语同列曰迪起布衣十余年位宰相有以报国死且不恨安能附权臣为自安计乎及议兼职上欲令太子以政令大臣各兼东宫职时迪已带少傅欲得中书侍郎谓执不可遂草制加谓为门下侍郎兼少师迪加中书侍郎兼丞故事两省侍郎无兼左右丞者迪旧人当廷中书谓专意抑迪迪不堪变色而起丙寅晨朝迪以谓改迁林特因诟谓引手版欲击谓谓走得免同列极意和解不听遂入对于长春殿内臣自禁中奉书置榻前上曰此卿等兼东宫官制书也迪进曰臣请不受此命因斥谓奸邪弄权中外无不畏权臣愿与谓同下宪司置对且言寇準无罪罢黜朱能事不当显戮东宫官不当增置又钱惟演亦谓之姻家臣愿与谓惟演俱罢政柄望陛下别择贤才为辅弼又曰曹利用冯拯亦相朋党上顾谓曰中书有不当事耶谓曰愿以询臣同列乃问任中正王曾皆曰中书供职外亦无旷阙事顷之谓迪等先退独枢密副使议之上怒甚乃命学士刘筠草制各降秩一级罢相谓知河南迪知郢州制书犹未出丁卯迪请对于承明殿又请见太子于内东门其所言不传谓阴图后入惟演恐谓出则已失援白上欲留迪戊辰谓以户部尚书迪以户部侍郎归事颇迫遽其制词舍人所草也筠所草讫不行己巳谓入对于承明殿上诘所争状谓曰非臣敢争乃迪忿詈臣尔臣不当与之俱罢愿复留遂赐坐左右欲设整谓顾曰有旨复平章事乃更以杻子进于是入内都知张景宗□知邓守恩传诏送谓赴中书□郢州放朝辞实时赴任时□相谓既复相其制亦卒□制筠不奉诏乃更召□敢揖盖有所愧也□臣



曰昨夜皇后矣□敢应迪进曰迪不得□□□干兴元年□初从易以送□吉州从易因对时贬道州谓又□曰当以故事相之谓□州司马寇準为雷州司户□使準坐与怀政交通迪坐责太重丁谓熟视曾曰居停主人勿复言曾蹶然惧遂不复争知制诰宋绶草制谓嫌其不切顾曰舍人都不解作文字耶绶逊谢乞加笔削谓即用己意改定诏所称当丑徒干纪之际属先皇违豫之初罹此震惊遂至沉剧皆谓语也谓恶準迪必欲致之死地遣中使赍敕就赐二人中使承谓旨以锦囊贮剑揭于马前示将有所诛戮状至道州準方与客宴客多州吏也起迎中使使避不见问其所以来使故不荅众惶恐不知所为準神色自若使人谓之曰朝廷若赐準死愿见敕书使不得已乃授以敕书即就録事参军借緑衫着之短纚至膝拜敕于庭升阶复宴至暮乃罢及赴贬所州县以竹輿迎之道险不能进準谢曰吾罪人得乘马幸矣冒炎瘴日行百里左右为之泣下既至吏献以图经首戴州南门至海岸十里準恍然曰吾少时尝为诗云去海只十里过山应万重今日思之人生得丧岂偶然哉中使至郢州迪闻其异于他日即自裁不死其子东之救之乃免人往见迪者中使辄藉其名或馈之食留至臭腐弃捐不与迪客邓余怒曰竖子欲杀我翁以媚丁谓耶余不畏死汝杀我翁我必杀汝从迪至衡州不离左右迪由是得全或语谓曰迪若贬死公如士论何谓曰异日好事书生弄墨笔记事为轻重不过曰天下惜之而已始中使迫迪上道通判郢州范讽辄留数日为具装祖饯讽正辞子也初丁谓与雷允恭叶比専恣内挟太后同列无如之何太后尝以上卧起俛令内侍传旨中书欲独受羣臣朝谓适在告冯拯等不敢决请谓出谋之及谓出同列陈其不可且诘拯等不即言由是稍失太后意又尝议月进钱充宫掖之用太后滋不悦允恭既下狱王曾欲因山陵事并去谓而未得间一日语同列曰曾无子将以弟之子为后明日退朝当留白此谓不疑曾有异志也曾独对且言谓包藏祸心故令允恭擅移皇莹于絶地太后始大惊谓徐闻之力自辨于帘前未退内侍卷帘曰相公谁与驾起久矣谓惶恐不知所为以□出癸亥辅臣会食资善堂□颇哀请钱惟演遽曰当致□惟演踧踖及对承明殿□与允恭交通因出请□示之又出允恭□尝因谓曰前附允恭□奏进方其□迁易几恭□同议称□此宗社之□□帝新即位□□□失奏山陵事耳太□□□中正言谓被先帝□谓以不忠得罪宗庙尚何□司西京故事宰相罢免皆降□草词仍榜朝堂晓谕天下谓恃权妄作未必真有祸心然天姿险狡多阴谋立意要不可测虽曾以计倾之而公论不以为过也任中正弟兄俱降黜坐营救丁谓故也秋辛卯再贬谓崖州司户参军诸子并勒停始谓命宋绶草寇準责词绶请其故谓曰春秋无将汉法不道皆证事也绶虽从谓指然卒改易谓本语不纯用及谓贬绶犹当制即草词曰无将之戒旧典甚明不道之辜常刑罔赦朝论快焉谓初逐寇準京师为之语曰欲得天下平当拔眼中钉欲得天下好莫如召寇老不半岁谓亦贬人皆谓报复之速天道安可诬也谓窜崖州道出雷州準遣人以一蒸羊迎之境上谓欲见準準拒绝之闻家僮谋欲报仇乃杜门使纵博毋得出伺谓行远乃罢十一月钱惟演罢为保大节度知河阳谓逐寇準惟演有力焉序枢密

直学士题名刊去準名曰逆準谓得罪惟演虑并得罪遂挤谓以自解拯恶之因请出之

天圣元年九月癸卯始命準为衡州司马準戊戌己卒于雷州弗及知也其妻宋氏乞归葬西京许之道出荆南公安县人皆设祭于路折竹植地挂纸钱焚之踰月枯竹尽出笋众因为立庙号竹林寇公祠五年冬南郊肆赦中外以为丁谓将复还侍御史陈揆上疏曰乱常肆逆虽小必诛左道怀奸有杀无赦丁谓因縁险佞窃据公台贿赂苞苴盈于私室威权请谒行彼公朝引巫师天术厌魅宫门易神寝龙岗冀消王气今禋柴展礼涣汗推恩必虑潜输琛货私结要权假息要冲冀移善地李德裕止因朋党不获生还卢多逊曲事王藩卒无牵复请更不原赦上然之八年冬壬辰以丁谓为道州司戸参军始南郊肆赦中外谓必将内徙刑部员外郎侍御史知杂刘随言彼擅移于陵域将不利于君亲只合取彼头颅荐之郊庙殿中侍御史张锡言谓奸邪弄国罪当万死实无可怜由是止徙道州

景佑四年庚辰光州言秘书监致仕丁谓卒王曾闻之语人曰斯人智数不可测在海外犹得用诈还京数年未必不复用天下□非□其死也天圣三年十二月□家寓洛阳当为书名克□人致于西京留守付□□得书不敢私即（阙页）

#### 真宗平王均

西川李顺平后人心未宁益州钤辖符昭寿彦卿之子也骄恣不亲戎务有所裁决但令仆使传道多集锦工织作纤毫所须辄配市人踰半年不给其直又纵部曲掠取之广余稻麦败即勒僧道倍偿仆使乘势凌忽军校其下皆怨知州右谏议大夫牛冕寬弛无政时神卫军戍成都者两指挥都虞侯王均及董福分主之福御众整肃故所部优贍均好饮博军装悉以给费咸平二年十二月甲子冕与昭寿大阅于东郊蜀人喜遊观两军衣服鲜弊不等均所部皆慚愤出不逊言戊寅晦冕具酒馔犒其牙队而昭寿无所设军士益忿故赵延顺等八人谋作乱三年正月己卯有中使自峩眉山还京师昭寿戒馭吏具鞍马将出送之延顺等乃悉解廐中马缰使跳跃庭下阳逐而縶之呼喧之际延顺率其徒径登听事擊杀昭寿并其二仆据甲仗军取兵器冕闻变皆逃窜使张适同縶城出彭汉州惟都巡检刘绍荣冒刃格鬪或欲奉为主绍荣骂曰我燕人也北弃狄归朝肯与汝同逆耶亟杀我我宁死义也延顺等初未敢加害都监王泽闻变召王均谓曰汝所部兵乱盍自往招安延顺执昭寿首未知所适忽见均至即率众踊跃奉均为主指挥使孙进不从命杀之余兵及骁猛威武军悉合而乱绍荣縶死均僭号大蜀改元化顺置官称帝设乘輿以神卫小校张锴为谋主陷汉州牛冕等奔东川均攻绵州不能克直趋剑阁知剑州秘书丞李士衡初闻寇作乱以州城难守焚仓库运金帛东保剑门均至士衡与剑门都监裴臻逆擊敗之斩首十数级民之胁从者率多奔溃士衡揭榜召降得数千人悉置麾下示以不疑均众乏食瘦弊不敢由故道经阴平还成都时上北伐闻均反即以雷有终知益州李惠石普李守伦并为川陝招安使帅步骑八千讨之初知蜀州杨怀忠闻成都乱时调乡丁会兵进攻成都战不数合怀忠兵势不敌均致败绩王均复入成

都二月怀忠檄诸州调军民再攻之贼稍却贼党三道来攻出官军后怀忠分兵抗之斩首三百余级雷有终等自汉川与张思均帅大众进讨王均开城伪为遁状有终等率兵径入贼闭门发伏李惠死之有终等缘堞而坠获免四月王均自升仙桥来袭官军有终大败之杀千余人初张咏闻冕代己曰非抚众材既而果然八月乙卯王均自升仙桥之败彻桥塞门雷有终等以官军至清遠江浮梁而过渡直抵桥下于北门之西夺旧草场因筑垒焉依壕为土山分设鹿角造梯冲洞攻车攻具石普專主之高继勳张照孙正辞攻城东上官正李继昌王伉攻城西杨怀忠与巡检马贵攻城南贼众赵延顺尽驱凶党以拒官军既而延顺中流矢死神卫军使丁万重代延顺据东城门接官军又射杀之然每攻城则雨甚其城滑不能上官军及丁夫为洞屋攻城者贼又凿地道出掩之多溺壕中死者千余军势小衄贼大宴其凶党歌吹之声達于城外时方暑湿攻城之人多被疾有终市药他州自和合疗之复遣洛苑使入内副都知秦翰为两路讨贼招安使翰既至与有终计议于城北鱼桥别筑土山是月克城北羊马城遂设鴈翅敌棚复洞车以进逼罗城贼亦设敌棚号喜相逢楼九月戊寅官军焚其敌楼贼气始夺乃筑月城自固均起农夫戇懦无谋其伪宰相张锴者性狡猾素习阴阳以营惑同恶先是均每日言大军若至我当先路出迎自陈被胁之状锴闻之即择军中子弟署寄班以防守均不令与人接于是诏遣均子侄亲族至城下招降官军射箭开谕锴得箭即令焚之均皆不知也王均多为药箭射官军中者必死雷有终募敢勇士穴城间道蒙毡举燧而入悉焚其守具于东西北寨鼓噪攻城有终与石普分主二洞屋以进普已穴城暗开城门贼鑽戟拥路众未敢进有二卒出请行许以厚赏乃麾戈直冲贼锋稍靡遂克其城有终登楼下瞰贼犹以余众寨于天长观前密设乐于文翁坊高继勳曰转运使马亮愿得秸秆油粃乃合众执长戟巨斧乘炬以进悉焚之杨怀忠又焚其天长观前寨追至太安门复败焉前后杀贼三千余人是夕二鼓均领余众出万里桥门突围而遁有终尚疑凶党潜伏遣人于街郭纵火诘朝与翰登楼门牙吏有受贼署为三司使者捕得立楼下乃积薪于傍厝火其上尽索男子魁壮者令辨之曰某常受伪署某职不复推究即命左右摔投火中自辰至酉焚数百人颇为冤酷李继昌严戒部下无扰民凡获妇女幼童置空寺中分兵守卫事平遣还其家冬十月王均自成都突围走渡合水尾由广都畧陵荣趣富顺监所过胁军民断桥塞路焚仓而去雷有终先命杨怀忠领虎翼追之后二日石普继往以全军为援先是朝廷每岁孟冬朔诏富顺监具酒殽犒内属蛮酋是日裁设具而均党适至皆就食焉结筏渡江趋戎泸蛮境闻怀忠追骑至甚易之均谓其党曰速降怀忠之众令负袒以行怀忠距富顺六七里地名杨家市少憩焉贼众在后者邀战市侧有高原懷忠遣亲信五骑登原覘贼怀忠语左右曰纵贼渡江后悔无及石侯将至当以奇兵取之乃临江列阵擊贼贼众散走有擊舟将渡江而遁怀忠令强弩射之溺者数艘怀忠张旌鸣鼓入城均方在监署其党多醉均穷蹙缢死虎翼军校鲁斌斩首以诣怀忠又获僭伪法物旌旗甲马甚众擒其党六千余人逆徒歼焉怀忠旋军出北门石普始至夺均首驰归成都梟



于北市辛亥雷有终遣寄班供奉官杨崇勳驰奏益州平赐以锦袍银带器帛崇勳蜀人也乙丑雷有终言王均伏诛德音赦川峡路死罪囚以有终为保留后秦翰等九人并迁秩上官正与石普不叶翰恐生变为晓譬和解之正寻移疾归东川故赏弗及是役也杨怀忠之功居最为普所掩上微闻之遣使按视战所尽得其状既而怀忠秩满受代归阙复自供备库副使擢崇仪使领恩州刺史

太平治迹统类卷五

●钦定四库全书

太平治迹统类卷六

(宋) 彭百川 撰

庄献大中祥符三年夏□上谓起曰知朕□有即入禁中怀金钱出□刘修仪庄重寡言□□□□□玉钗坠心恶之上私卜钗□进殊不毁上喜甚已而果生子焉【李氏所生子后为仁宗】七年三月丁未以皇子受益为□将军封庆国公初宰相屡言皇子未议封建中外系望今朝修礼成愿特降制命上虽从之而谦让未加王爵旧国公食邑三千户令止千户有司之误也皇子即后宫李氏所生于是五年刘皇后以为己子使杨婉仪保视之故仁宗常呼后为大娘婉仪为小娘娘

天禧二年二月丁卯命寿春郡王为节度使加太保封升王先是宰臣因对屡言王性聪悟好学乐善孝谨敦笃迥然老成而未正封爵人情中外咸所属望愿早议崇建上谦让久之许焉丁酉羣臣上表请立皇太子表三上许之先是寺丞陈执中上复古要道三篇上召之上时已属疾春秋高大臣莫敢言建储者至执中进演要三篇以蚤定天下根本为说召对便殿劳问久之寻擢为右正言执中恕之子也甲辰立升王受益为皇太子改名禎大赦天下以参知政事李迪兼太子宾客诏皇太子礼之如师傅癸丑上作元良箴赐皇太子又作诗分赐宾客而下九月辛巳太子宾客李迪言昨日东宫赐宴臣获陪侍皇太子举动由礼不轻放伶官杂剧未尝接目瞻仰无不恭肃上曰尝居内庭□□太子天赋仁德严重温裕宗庙社稷之庆也□四年以宰相□準素轻曹利用丁谓见上不豫难于语言政□谓等媒蘖之準□思宗庙之重□可以辅之□林扬亿□所谋谓□惧□诺其请七月□利用加平章事然□等遂告变用怀政矣□準乃贬怀政诛且欲并责及太子李迪从容奏曰陛下有几子乃为此论太子之不动摇迪之力居多十一月乙丑上谕朕迩来寝膳颇康复然军国之事未免劳心储德渐成皇后素贤明临事平允深可付托欲令太子莅政于外皇后居中详据卿可议之闰十二月乙亥上力疾御承明殿召辅臣语其状因谕以尽心辅导储贰之意出手书一幅付之时太子虽听事资善堂然事皆决于后中外以为忧王曾说惟演曰太子幼非中宫不能立中宫非倚皇储之重则人心不附后厚于太子则太子安太子安乃所以安刘氏惟演以为然因白后两宫由是益亲人遂无间

干兴元年二月上不豫浸剧自上不豫以来太子出则监莅军国入则省视医药皇

后悉倾宫中财用遣使诣天下寺观为上祈福不可胜纪上每言皇后造次不违规矩朕无忧也太子动息后必躬亲调护至于乳保小臣皆择勤愿岁久者旦夕教其恭恪而太子纯孝之德亦由天赋非常情所及焉戊午上崩于延庆殿仁宗皇帝即位军国事权同太后处分丁谓欲去权字王曾不可乃止时中外汹汹曾正色独立朝廷赖以为重秋王曾加中书侍郎平章事吕夷简为给事中鲁宗道为右谏议并叅知政事八月乙巳上与皇太后御承明殿垂帘决事始用王曾议也【王曾建此议请五日一御】

□□□□□宰相率百官表贺太后哀恻令内侍宣谕曰候上春秋长即当还政十月己未附真宗神主于太庙初太后欲具平生服玩如宫中以银罩覆神主参知政事吕夷简言此未足以报先帝今天下之政在两宫惟太后远奸邪奖忠直辅导皇帝成就圣德所以报先帝者宜莫若此辛巳始御崇政殿西阁召侍讲孙奭学士兼侍讲冯元讲论语利瓦伊晏殊与焉初诏双日自是只日亦召焉王曾以上新即位宜近师儒故令奭等入侍上在经筵或左右瞻矚或足敲踏床奭拱立不讲每讲礼貌必庄上亦为竦然改听十二月京师穀价翔贵戊申出常平仓米分十四场贱余以济贫民

天圣元年癸未命御史刘筠议裁减冗费从□裕之言也夏四月辛丑中书□河东陝西部署并奉使契丹□从之判吏部南曹丁度□事一增劝讲官二增□河东河北役兵补□坐私罪杖者听□戒外戚云上封□者而御史□御史以下各□缺不补故言及□日行法令审故事

丙午命御史姜同放天下□安殿乙卯诏详臣就观御史鞠咏言陛下□决屯塞霖雨害稼宜思所以应灾□臣愿陛下援进忠良退斥邪佞为国寶以训劝农兵丰积仓廩为天瑞草水之恠何足尚哉天圣二年春癸未皇太后手书赐辅臣谕以临朝愿治之意三月皇太后谕宰相曰比择儒臣侍上讲读深有开益秋七月以权知开封薛奎为谏议大夫权御史中丞上疏论择人才崇节俭屏声色凡十数事赐玉泉山景德院白金三千两皇太后微时常过玉泉有老僧言后当极贵既如其言遣使召之不至就问所须曰道人无所须也玉泉寺无僧堂长芦无三门后念之故有是赐寺门起承中成辄为蛟所坏后必欲成用生鐵数万迭成小门乃成言蛟畏铁也天圣三年春江东主簿王堪上疏陈十事复制科置营田立义仓复阅武之法兴郡学减度僧等事上以堪学通世务命试学士院甲子皇太后命择前代文字可资孝养补政治者以备帝览七月辛未诏西川所造绫令改织绢以供边费先是上封事者以为言上谓辅臣曰朕政欲如此宜亟行之王曾等曰臣约一锦之费可为绢数疋陛下崇节俭以惠远人臣等敢不奉诏十二月诏京城物价翔贵其令三司出廩米之下者贷畿内民期以三年偿鹿巴之半又散置棗场数十第取半价民争赴之讫春无饥者先是太仓粟有陈腐不可充军食者程林权三司事建此议从之凡出米六十万斛天圣六年夏四月癸未命燕肃等议蠲减三司岁所科上供物五月诏罢温鼎广等州贡柑罢咸阳民元守毫贡梨七月壬戌知制诰徐奭等言详定三司欠负凡放天下二百三十六万十二月以范仲淹为按阁校理初仲淹遭母丧上书

执政请择郡守县令斥游惰去冗僭令选学敦教育养将才实边备保直臣斥佞人朝廷无过生灵无怨以杜奸雄凡万余言王曾见而伟之亦知仲淹晏殊客也殊荐人充馆职曾谓殊曰舍仲淹而荐此人乎已为公置不行宜更仲淹殊从之辛巳上封者积税之利欲流天下通何无何月参政鲁宗道卒太后石何如主对曰唐之参知政事吕夷简久不用士逊授张耆上尔行用

明道元年仁宗皇帝即位妃默处先朝妃后帝不自知疾革苑中攢涂于嘉庆院宰相吕夷简奏事因曰相以预宫中事耶引帝偕子也夷简曰太后他日不欲简请发哀成服备宫伏葬之时有诏欲凿宫丧夷简遽求对曰凿垣非丧礼臣备位宰相朝廷大事理当廷争太后不许臣终不退崇勳三反夷简正色谓崇勳曰宸妃诞育圣躬而丧不成礼异日必有受其罪者莫谓夷简今日不言也崇勳惧驰告太后乃许之初宸妃入宫其弟用和才七岁妃既生子太后使刘美等访妃亲属得用和于民间补三班奉职癸巳迁用和礼宾副使八月壬戌太内火延及八殿百官晨朝宫门不开辅臣请对帝御拱宸门百官拜楼下夷简独不拜帝使问其故曰宫廷有变臣愿一望清光帝举帘见之夷简乃拜丁卯大赦时宦者置狱治火事得缝人火斗已诬伏下开封狱知府程琳以为不然御史蒋堂亦言火起无迹安知非天意陛下宜修德应变今乃归咎宫人宫人付狱何求不可而赐之死是重天谴也帝宽其狱竟无坐死者殿中丞滕祖谅奉诏对事言国家以火德王天下火失其性由政失其本因请太后还政秘书丞刘钺请太后还政言尤鲠切皆不报

明道二年三月庚寅以皇太后不豫大赦甲午皇太后崩四月丙申朔下诏求助删去遣诰皇帝与太后裁处军国大事之语皇太后既崩左右始有以宸妃事闻者上号恻累日不絶壬寅进尊为皇太后甲辰改葬永定陵或言太后死非正命丧不成礼上亦疑焉因易梓宫上遣李用和视之则容貌如生服餼严具用和入告上叹曰人言可信哉乃于大行神御前焚香泣曰自今大娘娘平生分明矣

### 仁宗圣政

明道二年三月皇太后崩夏四月庚戌以流人林献可为三班奉职初献可抗言太后还政太后怒窜于岭南至是录之壬子诏内外毋得进献以祈恩泽及因缘亲戚通表章若传宣有司实封覆奏内降除官辅臣审处分罢创修寺观毋献干元节香及山仪帝始亲览庶政裁抑侥幸中外大悦召知应天府宋绶范仲淹赴阙丙辰黜江德辅臣而德明等交通请谒斥遂恐偕以为乱上不亲政夷简首疏陈八绝女谒踈近习罢耆夏竦等皆大不附太后藺方押后临朝此以干军政阁中得德用前密李迪王随李谿蔡齐权三司使范讽右司谏戊午减天下余饷遗近臣侍史知杂事陈范仲淹以江淮京东灾伤请间曰宫掖中半月不食当如何今数路艰食而上不恤甲申命仲淹安抚江淮所至开仓廩赈乏绝禁淫祀奏蠲庐舒折役茶江东丁盐钱饥民有食乌昧草者撷草进御请示六宫贵戚以戒侈心又陈八事上嘉纳之七月



戊子诏以旱蝗去尊号令中外直言得失八月丙申赠修古为右谏议大夫修古鲠直有风节当庄献时权幸用事人人顾望畏忌修古遇事辄言无所间挠初贬通判杭州未行改知兴化卒于官贫不能归宾佐赙钱五十万季女泣白其母曰奈何以是累吾先人也卒拒不内帝思修古故优赠之癸卯诏凡除转运使及藩镇边郡守臣自今并许上殿奏事甲辰诏以两川绫锦易为细绢供军须时上富于春秋后苑珠玉之工颇盛于前时御史龐籍言今冬螟为灾民忧转死北有耶律西有柘拔陛下安得不以俭约为师奢靡为戒重惜国费以先民之急上深纳之十一月召孔道辅为右谏议大夫戊寅大理评事川涣为右也一塔不能自卫为火所毁又何福可庇于民时盛暑靖对上极言靖修籛上入内云被一汗臭汗熏杀喷唾在吾面上上优容台谏如此此中有云陛下若恤民之病取后宫无用之物内帑有余之币出助边费勿收中民一年田租明降诏书布告中外此则陛下结天下之民感召和气虽造百塔无以及之若从无用浮费民益怨矣甲寅上谓辅臣曰岁旱而飞蝗滋甚百姓何罪而罹此默祷上帝愿归咎于眇躬章得象对曰臣等不能辅理宣化致灾斯民且貽陛下忧今圣言及此必有以默感天心矣富弼主北事条上河北守御十二策【见庙筭门】是日谏官余靖等言灾异屡见飞蝗为孽陛下责躬引过祈于天地宗庙社稷不令殃及万民于是愿言朝廷君臣上下有如是之失大臣有如是之过臣等负罪至深伏乞遽加窜逐又言天下之势日可忧惧天人灾异相仍而至岂非臣等不能辅助之至或朝廷尚□庶朝廷□七月□平从富□使副提□擢之或不□从仲淹之□按察使□谏官□闻不□谓辅□过务为□史刘湜□言欧□之人□只赖□言便□可以利民委任之□按察使未有大郊而老病昏昧之人望风而欢近日□任者渐多州县方欲澄清而朝廷自沮其事其近降札子乞抽还不使自沮按察之权为贪脏老繆之吏所快九月甲申杜衍依前官平章事兼枢密使衍裁抑侥幸每内降恩率寝格不行积诏旨至数十张辄内帝前谏官欧阳修对见上曰外人知杜衍封还内降耶凡有求于朕每以衍不可告之而止者多于所封还也参政贾昌朝为枢密使青州陈执中为参知政事谏官蔡襄孙甫等言执中不学刚愎若任以政天下不幸上不听谏官争不已乃命中使赍勅告即青州赐之且谕意曰朕用卿举朝皆以为不可朕不惑人言力用卿尔明日谏官上殿上作色迎谓之曰岂非言陈执中耶朕已召之谏官乃不敢言冬己酉知谏院蔡襄知□州以老乞乡郡与孙甫俱论执中不从于是两人俱求出襄先得请甫使契丹未回苏舜钦等坐事摈斥王拱辰自喜曰吾一举网尽矣【事见朋党门】知潞州尹洙上疏畧云臣闻知贤而不能任任之而不能终于治国之道其失一也去年朝擢欧阳修余靖蔡襄孙甫等相次为谏官臣知数子之贤且久一旦乐其见用又庆陛下得贤而任之所虑者任之而不能终尔以陛下知臣之明修等被遇之深岂有任之不能终者哉唐魏元成既薨文皇亲撰碑文以赐之后有言其阿党遂覆其碑近世君臣相得未有如文皇元成而间言随之则存没之恩不终臣未尝不感愤叹息而不能已也以是而论则知之为易终之实难又云公论之与朋党尝系于上意不系于忠邪君臣大

义也臣既为陛下建忠谋岂复顾朋党之责但惧名以朋党则所陈之言不蒙见采此臣之深虑也诏如天禧政事置谏官六员【见圣政门】庆历五年春乙酉参知政事范仲淹知邠州枢密副使富弼知郢州二人既出使谗者益甚凡在朝□为亦稍沮止独杜衍□奏疏□一请□若即有□表谢上□明逸表得挟朋党□诏罢仲□执中□百二十□胆颇彰□劳之敢私□直学士知□上言畧□可未□申余□萌也□而仲淹安抚河东秦□固执行之田况奏欲汰冗兵【见远畧门】欧阳修言朝廷施行变更富范举官之议又言富弼尽忠被黜不报韩琦论富弼责补闲郡何负朝廷疏入不报韩琦不自安求补外迹英阁读汉书高祖封信齐王事上曰高祖之从谏善用人不疑如此丁度对曰高祖聪明大度故臣下尽其忠不然何以基帝业也章得象罢政陈州御史里行孙沆数以为言【见遗拾门】知制诰余靖知言州御史刘元瑜等劾靖失使者礼对契丹为蕃语也冬十月诏罢按察使之名时执政沮改范仲淹富弼所行事因肆赦遂有是命初议覃恩百官优赐军士参知政事吴育曰无事而事侥幸谁为陛下建此者请治之已而帝语辅臣曰外人恐执政宜防諠哗育曰此必建议者欲以动摇上听愿毋虑臣既以身许国何惮此耶乙未迹英阁读经武圣畧至真宗朝李继和上言国初李汉超在闕南私钱贸易佐公用人或绳奏之太祖反令尽除所逋税上曰任人如此孰不尽力哉庆历六年春二月癸丑司天监言日当食三月朔上谓辅臣曰日食之咎盖天所以谴告人君愿归罪朕躬而无及臣庶也凡民之疾苦益思询究而安利之壬寅上谓臣曰前日除用和子璋为阁门副使今次子珣为通事舍人朕已谕之曰朝廷爵赏所与天下共也倪戚里之家兄弟迁补如此朕何以待旧勲乎昌朝对曰母后之家自昔固多蒙恩泽今陛下能重惜爵赏不肯轻授非为示天下以至公抑亦得全外戚之福也王拱辰为三司使建议复榷河北盐漕臣鱼周询别议增筭云岁可得缗钱七十余万三司奏用其策上曰使人顿食贵盐岂朕意哉于是三司更立推法而未下也张方平见上谓曰河北再推盐何也上曰始议立法非再也方平曰周世宗推河北盐犯辄处死世宗北伐父老遮道泣诉愿以盐课均之两税□某禁世宗许之今陌□卿语□□以手诏□诏下之□报上恩且□涕【余见财】畜狐兔鳧□事非专故事乞□之阴阳□之议再畋□言编修唐□郊上封□已是□一石□十万里此但引一路之弊□古称聚敛之臣过于盗贼今如此掊敛与朕结怨于民亟下诏止絶之【张唐英政要】八年宫中卫士之变勾当皇城司王从善等五人皆外迁杨怀敏夏竦庇之领职如故御史何郯等数上疏言上谕郯曰古之谏臣尝有碎首者卿能行此否郯对曰古者君不从谏故臣有碎首今陛下无谏不从何用如此若必碎首则美归臣下过在君上上欣纳之甲寅幸龙图天章阁召近臣宗室观太宗游艺集真宗幸澶渊诗又出手诏赐辅臣又诏翰林学士三司使知开封府御史中丞曰朕欲闻阙失左右朋邪中外阴诈州县暴虐法令非便民者及朝廷凡事其悉以陈皆给笔札令即坐上对宰相执中固辞上谕至三四乃听西府归而上之时夏竦知执中不学实为帝谋欲困执中也执中方辞未许参政宋庠曰两汉对策本延草莱之士今备位政

府自比诸生非所以尊朝廷请至中书会议上许之论者以为知体【方平鱼周询所对见遼畧门叶清臣永兴亦条对】夏四月御史何郟言臣闻治天下者欲保邦于常安无他道焉其要在核名实别邪正而任之尔极论夏竦奸邪会京师无云而雹者五上方坐便坐趣召翰林学士俄顷张方平至上谓曰夏竦奸邪以致天变如此亟草制出之辛酉竦罢枢密使知河阳壬辰帝语辅臣曰春夏久雨朕日疏食夙夜祷于上帝傥霖淫未止当去食啜水冀移灾朕躬然不欲使外闻之嫌其近名尔宰臣文彦博荅曰今景气澄晏实圣德感通也

皇佑元年春三月丙午幸后苑宝岐殿观刈麦顾谓辅臣曰朕新作此殿不欲植花卉而岁以种麦庶知穡事之不易也秋翰林侍读学士张锡讲书禁中上叹其博学飞白书博学二字赐之因问治道锡对曰节嗜欲者治身之本审刑罚者治国之本时贵妃方宠幸锡故以此讽上改容曰卿言甚嘉朕恨用卿晚也皇佑二年六月讲书迺英

□□□但有□太宗徒□俭今人□重迁若□下户田三□沟壑诚□如律晓告□挥百司□肆赦帝谓□寛大以□托以图□严切□祀以□□□四月庚子迺英讲□如杨安国曰鼎为烹饪成器之象其犹任得其人虽重而可胜非其人则必有颠之患上曰任人不可不谨重也丁未御迺英阁谓讲读官曰易旨精微朕每以疑难问卿得无烦乎曾公亮对曰臣等幸承圣问惧不能对岂敢言烦上曰卿等宿儒博学多所发明朕虽盛暑亦未尝倦但恐卿等劳尔丁度复进曰自古帝王临御日久非内惑声色则外穷兵黩武陛下即位三十年孜孜圣学虽尧舜之聪明不过因顿首谢五月眉州彭山县上瑞麦图一茎五穗者数本上曰朕尝禁四方献瑞今麦秀如此可谓真瑞矣其赐田夫束帛劝之六月无为军献芝三百五十本上曰朕以丰年为瑞贤臣为寶草木昆虫之异乌足尚哉知军茹孝标免罪仍戒天下自今毋得以闻戊子汝州都部署杨景宗求为郡上谓辅臣曰景宗章惠太后之弟朕岂不念之然性贪暴老而益甚今与郡则一方之民受祸矣不许乙丑上谕辅臣曰近日职司以长吏不理闻者甚多中书未尝施行且长吏者民之性命可不重乎宜择甚者罢之小者易之彦博等惭谢而退于是自鄂州王开台州吕士宗等或以衰老或以弛慢而罢斥对移者凡十六人甲子信州民有刼米而伤主者法当死上谓辅臣曰饥而刼米则可哀恣而伤主则难恕小民无知终缘饥尔又曰刑不可太寛太猛为政者尝得寛猛之中使上下无怨则水旱不能灾卿等宜戒之十月上谓龐籍曰諫官御史必用忠厚淳直通世务明治体者以革浮薄之弊籍既承圣谕自是中书奉诏举台官必以上语载勅中乙亥上谓辅臣曰江淮连年荒歉顷闻发运转司惟务诛剥以敷额为能虽名和余实抑配尔其减今年上供米百万石皇佑四年二月戊寅上谓辅臣曰东南比岁不登民力匱乏常诏捐岁百万石今发运使施昌言许元乃欲分往两江南调发军储是□束□一欵□之法试□则覆虚□列侍观□下当与□陛下□台上□五年夏四月丁酉迺英阁讲书罔命侍御仆从罔匪正人帝曰君臣之际必诚意相通而后治道成杨安国对曰陛下聪明文思从諫弗拂如流水之趋下视羣臣若僚友自古盛王未



之有也帝曰臣下能进忠言朕何惜夏禹之拜学士孙抃为谏议权御史中丞抃性笃厚寡言质畧无威仪久处显要罕所建明及制下谏官韩絳论奏抃非纠绳才不可任风宪抃即手疏曰臣观方今士人趋进者多廉退者少以善求事为精神以能讦人为风采捷给若嗇夫者谓之有议论刻深若酷吏者谓之有政事谏官所谓才者无乃谓是乎若然臣诚不能也上察其言辄令视事秋庚戌上谓辅臣曰如闻诸州军常于夏秋之际先奏时雨沾足田稼登茂后或灾伤遂不能奏致使民税不得蠲除甚非官吏爱民之意宜申饬之

至和元年春正月京师太医进方内犀牛角□其一通天犀也内侍□物□午殿□事者多□久矣朕以□癸丑御□日马遵□也中复□及李林□人主然□天下公议□少卿周湛□辞上谕曰□恐封曰臣□月乙丑□之兴□知审□不实之罪上曰州郡□闻今守臣自陈垫坏官私庐舍意亦在民当恕罪也五月先是少不雨帝问翰林吕公绰何以致雨公绰曰狱久系则旱帝亲摠狱已而大雨时公绰受命知河阳数月乙丑诏留侍经筵六月戊戌知永兴军文彦博为吏部尚书平章事判并州富弼为户部侍郎同平章事刘沆加兵部郎监修国史彦博与弼并命是日宣制帝遣小黄门数革觚于庭士大夫相庆得人后数日翰林学士欧阳修奏事殿上帝具以语修且曰古之求相者或得于梦卜今朕用二相人情如此岂不贤于梦卜哉修顿首称贺癸卯学士张升为右谏议权御史中丞上尝语执政升情直可任风宪使代孙抃富弼初入相欧阳修为翰林咸谓三得人也甲辰知郢州龐籍知并州籍过京师入对上新相文彦博富弼意甚自得谓籍曰二相何如籍曰二臣皆朝廷高选陛下拔之甚副天下望上曰诚如卿言彦博犹多私至于富弼万口一辞皆曰贤相也籍曰陛下既知二臣之贤用之则当信之坚任之久然后可以责成功若以一人言用之未几又以一言毁之臣恐太平之功未易卒致也上曰卿言是也秋戊辰资政殿大学士吴育为宣徽南院使判延州育侍读禁中帝因语及臣下毁誉多出爱憎育曰圣言简要切实四海之幸知而形之于言不若察而行之事自古人君因信谗邪而致乱照奸险而致治安危万端不出爱憎二字达之则羣书可不观不达则博览无益也帝益重之数欲大用谏官诬奏育河南贷民钱事遂命出帅十月丁卯迺英阁读史记策传上问古人动作必由此乎孙抃对曰古有大疑既决于己又询乎众犹谓不有天命乎于知永兴后改并是命龟以断吉凶所谓谋及乃心谋及卿士谋及庶人谋及卜筮盖圣人贵诚默与神契然后为得也上善其对壬子迺英阁读左郑人铸刑书王洙曰子产以郑国之法铸之于鼎□民□太史□免于□矣□□嘉佑□雪压□二月壬□今日□书四□三岁大□执政请□戒知制□加大□可谓□名而□六□三等翰林学士范镇□司会之言吾媿之而不敢怨惟胡宿以为策不对所□引唐穆宗恭宗以死盛世非所宜言力请黜之先是于三人中独有爱君忧国之心不可不收执政亦以为当黜上不许曰求直言而以直弃之天下其谓我何乃收入第四等及除官知制诰王安石疑其右宰相而攻人主比之谷永不肯为词韩琦笑曰彼策谓宰相不足用欲得娄

师德郝处俊而用之尚以谷永疑之乎改命沈邁考官也乃为之词已而谏官杨政见上曰苏辙臣所荐也陛下赦其狂直而收之此盛德事乞先付史馆上悦从之七年冬丙申幸龙圖天章阁召辅臣近侍三司副使台谏官皇子宗室驸马都尉主兵官观祖宗御书又幸寶文阁为飞白分赐从臣下逮馆阁作观书诗韩琦等属和遂宴羣玉殿传诏学士王珪撰诗序刊石于阁庚子再会于天章阁观瑞物复宴羣玉殿帝曰天下久无事今日之乐与卿等共之宜尽醉勿辞赐禁中花金盘香药又召韩琦至御榻前赐酒一卮从臣俱至暮而罢八年春二月癸未上不豫甲申德音降天下囚罪一等徒以下释之丙戌中书枢密院奏事于景福殿之西阁见上所御幄幕裯褥皆质素暗弊久而不易上顾韩琦等曰朕居宫中自奉常如此此亦生民之膏血也可轻费之哉

### 景佑君臣议乐

景佑元年十月壬午龙图阁待制燕肃集贤校理李照直史馆宋祁同按试王朴律肃时判太常寺建言旧太常钟磬皆设色每三岁亲祠则重饰之岁既久所涂积厚声益不叶故有是命帝亲阅视律题其背以属太常肃等即取钟磬划除考击用律準按试其声皆合二年二月燕肃等上考成乐器并见工人戊午御延福宫临阅奏郊庙五十一曲因问李照乐何如照对乐音高命详陈之照乃建言王朴律準视古乐高五律视禁坊乐高二律击黄钟则为大吕击夹钟则为夷则是冬兴夏令春召秋气盖五代之乱雅乐废坏朴创意造律準不合古法用之本朝卒无福应又编钟铸磬无大小轻重厚薄长短之差铜锡不精声韵失美大者凌小者抑非中度之器相传以为唐旧钟亦有朴所制者轩辕氏命伶伦截竹为律复令神瞽叶其中声然后声应鳳鸣而管之参差亦如鳳翅其乐传之夙古不刊之典也愿听臣依神瞽律法试铸编钟一虞可使度量权衡叶和诏许之仍就锡庆院铸庚申太常博士宋祁上文乐图义二卷夏丁巳李照言奉诏制玉律以候和气请于潞州求上党县羊头山秬黍及下怀州河内县取葭苳从之戊辰命宰相吕夷简王曾都太管勾铸造大乐编钟参政宋绶蔡齐盛度同都大管勾集贤校理李照勾当御乐院邓保信专监铸造仍以内入都知阎文应提举始照既铸编钟一■〈竹虞〉以奏御遂建请改制大乐取京县秬黍累尺成律铸钟审之其声犹高更用太府布帛尺为法乃下太常制律照因为律管之法以九十黍之量为四百二十星率一星占九抄一黍之量得四星六抄九十黍得四百二十星以为十二管定法庚午诏中外臣僚洎草泽之士知雅乐音律者许所在荐闻或自言侍御史刘系言乐之大本与政化通不当轻易其器愿择博学之士以补卿丞帝善其言不能从也五月李照上九乳编钟图钟旧饰以旋虫改为龙并自创八音新器又请别纚不为编钟辛卯命工往淮阳军治磬石照又言既改制金石则丝竹匏土革木亦当更制以备献享六月左司谏姚仲孙言伏闻改制雅乐俾叶絶音谓旧律太高裁之就下以高形下人固知之然制之或未甚精损之必差其度臣盖不知其得于何道而辄敢变更闻其所为率多诡异至如炼白石以为磬范中金以作钟又欲以三辰五灵二十四孝为乐器之饰臣虽愚昧窃有所疑自祖宗以来考正大

乐荐之郊庙垂八十年洪惟先朝备行盛礼燔柴岱岳瘞玉汾睢振前王久坠之风举历代难行之典岁事之际雅乐具陈用以格神明服景贶先儒审议曾靡间言若一旦轻用新规全出旧制臣切以为不可望特诏罢之止用旧乐时帝既许照制器业已为之且欲究其术之是非故仲孙之章卒不下有司先是太常钟磬每十六枚为一虞而四清声相承不击乙丑照言十二律声已备余四清声乃郑卫之乐请于编县止留十二中声去四清钟则哀思邪僻之声无由而起也冯元等驳之云钟磬二器非可轻改今照欲损为十二不得其法等以为不可其钟磬十六本周汉诸儒之说及唐家典法所载欲损为十二惟照独见臣以为如旧制便帝令权用十二枚为一格且诏曰俟有知音者能考四钟叫调清浊有司别议以闻辛未御崇政殿召辅臣观新乐景佑二年秋庚子侍御史曹修睦言李照所改历代乐颇为迂诞而其费甚广请付司按劾之帝以照所作钟磬颇与众音相谐但罢其增造仍诏谕修睦和知杭州郑向言推官阮逸晓知音律正其所撰乐论十二篇并律管十二诏令逸赴阙先是所撰乐书所上言县设建鼓初不考击又无三鼗且旧用诸鼓率多陋敝于是敕冯元等详典故甲辰元等言建鼓四今皆具而不击别设四散鼓于县间击之以代建鼓干德四年秘书监尹拙上言散鼓不详所置之由且于古无文去之便时虽奏可而散鼓于今仍在又雷鼓灵鼓路鼓虽击之皆不成声故常赖散鼓以为乐节而雷鼗灵鼗阙而未制今既修正雅乐宜申敕大匠改作诸鼓使考击有声及创为三鼗如古之制使先播之以通三鼓罢四散鼓如干德诏书奏可康成当八面灵鼓六面路鼓四鼓之数不具于经然神有尊卑其数有多寡隆杀理或然也后元等复奏以殿庭备奏四隅建鼓既随月叶均顾无以节乐而周官鼓人以晋鼓鼓金奏应以施用诏依周官旧法制焉于是县内始有晋鼓矣古者搏钟击为节检而无合曲之议大射有二搏皆乱击焉后周以十二搏相生击之景德中李宗谔领太常总考十二搏钟而乐工相承殿庭习用三调六曲三调者黄钟大簇蕤宾也六曲者调别有隆安正安二曲郊庙之县则环而击之宗谔言金部之中搏钟为难和一声不及则宫商失序使十二搏工皆精习则迟速有伦随月用律诸曲无不通矣真宗因诏黄钟大簇二宫更增文舞武舞福酒三曲至是诏冯元等询考击之法元等奏言后周常以相生之法击之音韵克谐国朝亦用随均合曲然但施殿庭未及郊庙谓宜使十二钟依辰列位随均为节便于合乐仍得并施郊庙轩县以下则不用此制所以重备乐尊王制也诏从之辛酉上作警严曲付太常隶习名曰振容歌从李照之请也寻以名无取改奉禋作景安四佑安五兴安四曲在元年大安曲在元年独元率安当考云己巳崇政殿召辅臣观所作乐上出双凤管下太常隶习之其制合二管以足律声管端刻饰双凤施两簧焉时又出两仪琴及十二弦琴二种以备雅乐两仪琴者施两弦十二弦琴如常琴之制而增其弦以象律吕之数又敕更造十弦九弦琴皆令圆其首以祀天方其首以祀地命李照同修乐书丁丑内出景佑乐髓新经六篇赐羣臣其一释十二均二明所主事三辨音声四圖律吕相生并祭天地宗庙所用律及阴阳数配五十二管之长短六历代度量权衡皆本之于阴阳配之于四



时建之于日辰通之于鞞笙演之于壬式遁甲之法九月李照言太常所用祝四面尽时  
卉未合古制请易以青龙朱雀倮虫白虎元龟以配五方从之又与邓保信作铜方响五  
架乐工以为不可施用罢之随制内宫县二十簏以大磬代搏钟而去建鼓武后称制改  
用搏因而莫革及是诏访冯元等曰大磬应何法考击何礼应用癸未元等具言古者特  
磬以代搏钟本施内宫遂及祭祀考击之法缘诏旨不俾循环互击而立依均合曲之制  
则特磬固应不出本均与编钟相应为乐之节也诏可丁酉李照为刑部员外郎赐三品  
服其余迁补有差以造新乐成也初照谓旧乐磬高乃以太府尺为法实比古一尺二寸  
有奇独任所有更造新器所定黄锺律又声极下乐工歌其韵中无射倍磬又鑱破旧钟  
磬欲一用新器上时博求知音者听照所言音官乐工知不可不敢非之阎文应推言其  
功故特改官照自造谓今葦箎乃邠诗葦管诗鬻发且今葦箎首伶人谓之葦子其名出  
此于是制大管葦箎为雅乐议者嗤之翰林学士承旨章得象等言宋祁所上大乐图仪  
其论武舞所执九器经礼举其凡而不着言其用后先故旅进葦作而无终始之别且鼓  
鼗者所谓导舞也铙者所谓通鼓也鐃者所谓和鼓也铙者所谓止鼓也相者所谓辅乐  
也雅者所谓陔步也宁有导舞方始而参以止鼓止鼓既摇而乱以通铙臣谓当舞入之  
时左执干右执戚离为八列别使工人执旌最前鼗绎以发之鐃以和之左执雅以节之  
及舞之将成也则鸣铙以退行列筑雅以陔步舞鼗铙鐃相皆罢而不作如此庶叶舞仪  
请如祁所论奏其冬礼官言鲁隱公五年考仲子之宫初献六羽何休范甯等咸谓不言  
佾者明佾则干舞在其中妇人无武事独奏文乐也江左宋建平王宏皆据以为说故章  
太后庙独用文舞至唐垂拱以来中宫之县既用搏钟其后相承故仪坤等庙献武舞备  
金石之乐尤为失礼前诏议奉慈之乐有司援旧典已用特磬代搏钟取阴教尚柔以静  
为体今乐去大钟舞进干盾颇戾经旨请止用文德之舞奏可景佑三年丙辰诏翰林学  
士冯元礼宾副使邓保吉与镇江节度推官阮逸湖州乡贡进士胡瑗较定旧钟律瑗海  
陵人以经术教授吴中范仲淹前知苏州荐瑗白衣召对崇政殿与逸俱命乙未冯元上  
秬黍新尺别为钟磬各一架六月丙寅礼宾副使邓保信上所制乐尺并龠且言其法本  
汉志可用合律度权衡诏冯元聂冠卿同校定以闻秋冯元聂冠卿宋祁上景佑广乐记

【并官】八月右司谏韩琦言乐音之起生于人心臣初计之不若穷作乐之源为致治  
之本使政令平简纯熙浹洽海内击壤鼓腹以歌太平斯乃治古之乐可但以气象求乎  
就达其原又当究今之所急且西北二边久弛备宜缓兹求乐之议移访安边之策急其  
所急在理为长请下有司且记二家音律法所造管尺钟磬度量存而未行再访天下晓  
音律者俾之详正而后施用二年迄无至者则将王朴逸瑗保信三法别诏稽古之臣取  
其中合典志者以备雅奏固亦未晚诏丁度等速详定以闻九月丁度言邓保信所制尺  
推以算法类皆差舛不同周汉量法阮逸胡瑗所制用上党秬黍中者累广求尺制黄钟  
之律今用再累成尺比逸瑗所制又复不同差黍有圆长犬小保信所用者圆黍又首尾  
相衔逸等止用大者故再考者即不同尺既有差故难以定钟磬今欲数器之制参伍无

失则班志积分之法为近逸等以大黍累尺小黍实龠自戾本法保信黍尺以长为分垂合后魏公孙崇所说然当时已不施用况保信今尺以圆黍累之及首尾銜又与实龠之黍再累成尺不同其量器分寸既不合方即权衡之法不可独用诏悉罢之又诏度等详定大府寺并保信逸瑗所制四尺度等言尺度之兴上矣周官璧羨以起度广径八尺袤一寸礼记布手为尺淮南子十二粟为寸孙子十厘为分十分为寸虽存异说莫可适从汉志元始中召天下通知音律者百余人使刘歆典领之是时周灭二百余年古之律度当有存者以歆之博贯艺文晓达厯律筭有所制作宜不凡近考其审度之法云一黍之广为分十分为寸十寸为尺先儒训解经籍引以为义厯世祖袭着之定令然而岁有丰俭地有饶肥就今一岁之中一境之内取黍校验亦复不齐是盖尺之为物果难均一古之立法存其大槩故前代制尺非特累黍必求古雅之器以黍校焉晋泰始十年荀公曾等校定尺度以调钟律是为晋之前尺公曾以古物七品勘之一曰姑洗玉律二曰小吕玉律三曰两京铜望臬四曰金错望臬五曰铜斛六曰古钱七曰建武铜尺当时公曾尺揆校古器焉本名尺寸无差前史称其用意精密隋志所载诸代尺度十有五等然以晋之前尺为本以其与姬周之尺刘歆铜斛尺建武铜尺相合窃惟周汉二代享年永久圣贤制作可取则焉而隋氏铸毁金石典正之物罕复存者夫古物之有分寸明着史籍可以酬验者惟有汉钱而已周云圜法厯载圜法莫得而详察之半两实重八铢汉初四铢其文亦曰半两孝武之世行五铢下洎隋朝多以五铢为号既厯代尺度屡改故小大轻重鲜有同者惟刘歆制铜斛之法及所铸错刀并大泉五十王莽天凤元年改铸货布货泉之类不闻后世复有铸者臣等检详汉志通典唐六典云大泉五十重十二铢径一寸二分刀环如大泉身形如刀长二寸货布重二十五铢长二尺五寸广一寸首长八分有奇广八分足枝长八分间广二分肉好径二分半货泉五铢径一寸今以大泉错刀货布货泉四物相参校分寸正同或有小大轻重与本志微差者盖当时盗铸既多不必皆中法度但当校其手足肉好广分寸皆合正史者用之则铜斛之尺从而可知矣阅经籍制度皆起周世知刘歆术业之传祖冲之筭数之妙荀公曾之详密既合周尺则最为可法兼详隋牛里仁等议称后周太祖敕苏绰造铁尺与宋尺同以铜钟律以均田度地唐祖孝孙云隋平陈之后废周玉尺用此铁尺律然比晋前尺长六分四厘今司天监景表尺和峴所谓西京铜望臬者盖西汉之物和峴谓洛阳西京乃唐都尔今以货布错刀货泉大泉等校之则景表长六分有奇畧合宋周隋之尺自此论之铜斛与货泉布等尺寸昭然可验有唐享国三百年其制作法度虽未及周汉亦可谓治安之世矣今朝廷必求尺度之中当依汉钱分寸若以为太祖膺图受禅创制垂法尝诏和峴等用景表尺典修金石七十年间荐之郊庙稽合唐制以示貽谋则可且依景表旧尺俟有妙于锤律之学者俾考正之以从周汉之制王林律準尺比汉钱尺寸长二分有奇比景表尺短四分既前代未常施用复经太祖朝更易其逸瑗保信照所用太府寺尺其制弥长去古弥远又逸进周礼度量法议欲先铸嘉量然后取尺量权衡其说疎舛不可依用谨考唐文再造景

表尺一校汉铁尺二并大泉错刀货布货泉摠十七校上进诏度等以铁尺景表各造律管比验逸瑗升太常新旧钟考定音之高下以闻度等奏非素所习乞别诏晓者摠领校定诏乃罢之而高若讷卒用汉货泉度一寸依隋书定尺十五种上之藏于太常寺历代尺度长短未录壬辰以镇江节度推官阮逸为掌书记知城父县胡瑗试校书郎初诏逸瑗作钟磬律度按之虽与古多不合犹推恩而遣之

寶元元年七月右司諫韩琦言前奉诏详定钟律常览景佑广乐记覩李照所造乐不合古法皆率用己意别为律度朝廷因而施用识者久以为非今将亲祀南郊不可重以违古之乐上荐天地宗庙窃闻太常旧乐见有存者郊祀大礼请复用之诏资政殿大学士宋绶御史中丞晏殊同两制详定以闻绶等言李照新乐比旧乐下三律众论以为无所考据愿如琦请郊庙复用和峴所定旧钟磬不经照镌磨者犹存三县竒七虞郊庙殿庭可以更用乃诏太常旧乐悉仍旧制李照所造勿复施用

太平治迹统类卷六

●钦定四库全书

太平治迹统类卷七

(宋) 彭百川 撰

皇佑论乐同异

皇佑二年三月诏罢今岁亲祠南郊以九月择日有事于明堂六月丙寅翰林学士承旨王尧臣等言奉诏与太常参议阮逸所上编钟四清声谱法请用之于明堂者尧臣等言自唐末多故乐文缺坠考击之法久而不传今若使匏土丝竹诸器尽求清声即未见其法又据大乐诸工所陈自磬萧琴和巢笙五器本有清声埙篪竽筑瑟五器本无清声五弦九弦琴则有太宗皇帝圣制谱法至歌工引音极唱止及黄钟清声臣等参议其清正二声既有典据理当施用自今大乐奏夷则以下四均正律为宫之时商角依次并用清声自余八均尽如常法至如丝竹等诸器旧有清声者令随钟石教习本无清声者未可创意求法且当如旧惟歌者本用中声故夏禹以声为律明人皆可及若强所不至足累至和请止以正声作歌应合诸器亦自是一音别无差戾其阮逸所上声谱以清浊相应先后互击取音靡曼近于郑声不可用诏可丁卯以御撰黄钟五音五曲凡五十七字下太常隶习之九月丁亥帝御崇政殿召近臣宗室馆阁台諫官阅雅乐自宫架登歌舞佾之奏凡九十一曲徧作之因出太宗皇帝琴阮谱及御撰明堂乐曲音谱并按习大乐新录赐羣臣又出新制颂埙匏笙洞箫仍令登歌以八音诸器各奏一曲遂召鼓吹局按场大乐鼓吹令丞至乐工徒吏缙钱有差十一月召太子中舍人致仕胡瑗赴大乐所同定钟磬制度先是亲阅大乐而言者以为铸钟特磬大小与古制度未合诏令改作而太常言瑗素晓音律故召之闰十一月丁巳内出手诏朕闻古者作乐本以荐上帝配祖考三王之盛不相沿袭然必太平始克明备周武受命至成王时始大合乐汉初亦沿旧乐至武帝时始定太一后土乐诗光武中兴至明帝时始改太子之名唐高祖造邦至太



宗时孝孙文收始定钟律明皇方成唐乐是知经启善术礼乐重事须三四世声文乃定国初亦循用王朴窆伊所定周乐太祖患其声高遂令和岷减下一律真宗始议随月转律之法屡加按核然乐经久坠学士罕传历古妍覃亦未究绪顷加访求终未有知声知经可信之人尝为改更未适兹意宜委中书门下集贤院及太常礼乐官将天地五方神州日月宗庙社蜡祭飨所用登歌宫县审定声律是非按古合今调谐中和使径久可用以发扬祖宗之功德朕何惮改为但审声验书二学鲜并互诋胷臆无所援据慨然希古靡忘于怀于是中书门下集两制太常官置局于秘阁详定大乐王尧臣等言待制赵师民博通古今愿令预详定仍乞借参政高若讷所校十五等古尺并从之三年春诏采磬石访民间有藏古尺律者上之甲午诏两制礼官议定国朝大乐名初胡瑗请太祖庙舞用干戚太宗兼用干羽真宗用羽钥以象三圣功德然而议者谓国朝宗庙之舞名虽不同干羽并用又庙制与古异及瑗建言止降诏定乐名而已秋丁巳翰林学士承旨王尧臣等言按太常天地宗庙四时之祀乐章凡八十九曲自景安而下十三章率以安名曲岂特本道德政教安靖之义亦缘神灵祖考安乐之故臣等谨上议国朝乐宜名大安诏以太祖之勘暴乱也安天下之未安其功大二宗之致太平也安天下之既安其德盛而朕之承圣烈也安祖宗之安其仁厚十二月庚子以益州乡贡进士房庶为试校书郎庶成都人宋祁尝上所著乐书补亡二卷田况自蜀还亦言其知音既召赴阙庶自言尝得古本汉志云度起于黄钟之长以子谷秬黍中者一黍之起积一千二百黍之广度之九十分黄钟之长一为一分今文脱之起积一千二百黍八字故自前世以来累黍为尺以制律是律生于尺尺非起于黄钟也且汉志一为一分者盖九十分之一后儒误以一黍为一分其法非是当以秬黍中者一千二百实管中黍尽得九十分为黄钟之长九寸加一以为尺则律定矣直秘阁范镇是之乃言曰李照以纵黍累尺管空径三分容黍千七百三十胡瑗以横黍累尺管容黍一千二百而空径三分四厘六毫是皆以尺生律不合古法今庶所言实千二百黍于管以为黄钟之长就取三分以为空径则无容受不合之差校前三说为是盖累黍为尺始失之于隋书当时议者以其容受不合弃而不用及隋平陈得古乐器高祖闻而叹曰华夏旧声也遂传用之唐祖孝孙张文收号称知音亦不能更造尺律止沿隋之古乐制定声器今房庶所言以律生尺诚众论所不及请如其法试造尺律更以古器参考当得其真乃诏王洙与镇同于修制所如庶说造律尺钥律径三分围九分长九十分钥径九分深一寸尺起黄钟之长加十分而律容千二百黍初庶言太常乐高五乐五律比律成才下三律以为今所用黍非古谓一糗三米黍也赤比横黍所累者长一寸四庶又言古有五音而今无正征音国家以火德王征属火不宜阙今以五行旋相生法得征音又言尚书同律度量衡所以齐一风俗今太常教坊钧容及天下州县各自为律非书同律之义且古者帝王巡狩方岳以考礼乐同异以行诛赏宜颁格律自京师及州县无容辄异有擅高下辄论之帝召辅臣观庶所进律尺钥又令庶自陈其法因问律吕旋相为宫事令撰图以进其说以五正二变配五音迭相为生衍之成

八十四调旧以宫征商羽角次第配七声然后加变宫变征二声以足之庶推以旋相生之法谓五行相戾非是是当改变征为变羽易变为闰随音加之则十二月各以其律为宫而五行相生终始无窘诏以其图送详定所庶又论吹律以听军声者谓以五行逆顺可以知吉凶先儒之说畧矣是时胡瑗等制乐以有定义特推恩而遣之镇为论于执政曰今律之与尺所不得其真由累黍为之也累黍为之者史之脱文也古人岂以难晓不合之法书之于史以为后世惑乎殆不然也易晓而必合也房庶之法是矣今庶自言其法依古以律而起尺其长与空径与容受与一千二百黍之数无不合之差诚如庶言此至真之法也且黄钟之实一千二百黍积实分八百一十于算法圆积之则空径三分围九分长九十分积实八百一十分此古律也律体本圆圆积之是也今律方积之则空径三分四厘六毛比古大矣故围十分三厘八毛而其长止七十六分二厘积实亦八百一十分律体本不方积之非也其空径三分围九分长九十分积千八百一十分非外来皆起于律以一黍而起于九十尺与一千二百黍之起于律皆取于黍今议者独于律则谓之索虚而求分亦非也其空径三分围九分长九十分之起于律与空径三分四厘六毛围十分三厘八毛长七十六分二厘之起于尺古今之法疏密之异其不同可见若谓工作既久而复改为则淹引岁月计费益广非朝廷制作之意其淹久而计费广者为之不敏也今庶言太常无姑洗夹钟大簇等数律就令其律与其说相应钟磬每编纆易数枚因旧而图新敏而为之旬月之效也又何淹久而广费哉执政不听四年六月祠部员外郎直秘阁判吏部南曹范镇上书陛下制乐以事天地宗庙以扬祖宗之休烈兹盛德之事也然自下诏以来及今三年有司之论纷然未决盖由不议其本而争其末均惟乐者和气也发和者声音也声音之生生于无形故古人以有形之物传其法俾后人参考之然后无形之声音得而和气可导也有形者秬黍也律也尺也钥也龠也斛也筭数也权衡也钟也磬也是十者必相合而不相戾然后为得今皆相戾而不合则为非是矣有形之物非是而欲求无形之声音和又安可得哉于是条十者非是之验惟裁择焉按诗诞降嘉种称诞降者天降之也许叔重云秬一稔二米又云一秬二米后汉任城县产秬黍三斛八斗实皆二米史官载之以为嘉瑞又古人以秬黍为酒者谓之秬鬯宗庙降神惟用一尊诸侯有功惟赐一卣以明天降之物世不常有为可贵也今秬黍取之民间者动至数斛秬皆壹米河东之人谓之黑黍设有真黍以为取数至多不敢送官此秬黍为非是一也又按先儒皆言律空径三分围九分长九十分容一千二百黍积实八百一十分今律空径三分四厘六毫围十分三厘八毫是围九分外大其一分三厘八毫而后容千二百黍除其围广则其长止七十六分二厘矣说者谓四厘六毫为方分古者以竹为律竹形六圆而今以方分置筭此律之为非是二也又按汉书分寸尺丈引本起黄钟之长又云九十分黄钟之长者据千二百黍而言也千二百黍施于量则曰黄钟之龠施于权衡则曰黄钟之重施于尺则曰黄钟之长今遗千二百之数而以百黍为尺又不起于黄钟此尺之非是三也又按汉书言龠其状似爵爵谓爵琖其体正圆故龠当圆径九分深

十分容千二百黍积实八百一十分与律分正同今龠乃方一寸深八分一厘容千二百黍是亦以方分置筭也此龠之非是四也又按周礼龠法方尺圆其外深尺容六斗四升方七者八寸之尺也何以知尺有八寸十寸之别按周礼璧羨度赤好三寸以为赤壁羨之制长十寸广八寸同谓之度赤既以为赤则八寸十寸俱为赤矣又王制云古者以周尺八尺为步今以周尺六尺四寸为步八尺者八寸之尺也六尺四寸者十寸之尺也同谓之周尺者是周用八寸十寸尺明矣故知以八寸尺为龠之方十寸尺为龠之深而容六斗四升千二百八十龠也积实一百三方六千八百分今龠万尺积十寸此龠之非是五也又按汉书斛法方尺圆其外容十斗旁有■〈疒兆〉焉当隋时汉斛尚在故隋书载其铭曰审律嘉量斛方尺圆其外■〈疒兆〉旁九厘五毫幕百六十二寸深尺容一斛今斛方一尺深一尺六寸二分此斛之非是六也又按算法圆分谓之径围方分谓之方斜所谓径三围九方五斜七是也今圆分而以法筭之此筭数非是七也又按权衡起千二百黍而立法也周之龠其重一均声中黄钟汉之斛其重二均声中黄钟斛之制有容受有尺寸又取其轻重者欲见薄厚之法以考其声也今黍之轻重未真此权衡为非是八也又按鳧氏为钟大钟十分其鼓间之以其一为之厚小钟十分其钲间之以其一为之厚今无大小薄厚而一以黄钟为率此钟之非是九也又按磬氏为磬倨句一矩有半其博为一股为二鼓为三盖各以其律之长短为也今亦以黄钟为率而无长短薄厚之别此磬之非是十也前此者皆有形之物也易见者也使其一不合则未可以为法况十者之皆相戾乎臣固知其无形之声音不可得而和也请以臣章下有司门黍之二米与一米孰是律之空径三分与三分四厘六毛孰是律之起尺与尺之起律孰是龠之圆制与方制孰是龠之方尺圆其外深尺与方尺孰是斛之方尺圆其外旁九厘五毛与方尺深尺六十二分孰是筭数之以圆分与方分孰是权衡之重以二米秬黍与一米孰是钟磬依古法有大小轻重长短薄厚而中律不依古法而中律孰是孰不是律定然后制龠合升斗龠斛以校其容受容受合然后求其真黍真黍至然后可以为量为钟磬量与钟磬合于律然后可以为乐也今尺律本末未定而详定修制二局工作之费无虑千万计矣此议者所以云云也然而议者不言有司议论依违不决而顾谓作乐为过举又言当今宜先政令而礼乐非所患此臣之所尤惑也倘使有司合礼乐之论是其所是非其所非陛下亲临决之顾政令不亦大乎昔汉儒议盐铁后世传盐铁论今方定雅乐以求废堕之法而有司议论不着盛德之事后世将何考焉愿令有司人人各以经史论议条上合为一书则孰敢不自竭尽以副陛下之意如以臣议为然伏请权罢详定修制二局俟真黍至然后为乐则必得至当而无事于浮费也诏送详定所镇说自谓得古法然集贤校理司马光数与之论辨以为弗合世鲜钟律之学卒莫辨其是非焉十二月两府及侍臣观新乐于紫宸殿凡博钟十二黄钟高二尺二寸半广一尺二寸鼓六钲四舞六甬衡并旋虫共高八寸四分遂径二分深一寸二厘篆带每面纵者四横者四枚景挟鼓举舞每处各有九每面共三十六两栾间一尺四寸容九斗九升五合重一百六斤大吕



以下十一钟并与黄钟同制而两栌间递减半分至应钟容九斗三升五合而其重加至应钟重一百四十八斤并中新制本律特磬十二黄钟大吕股长二尺博一尺鼓三尺博六寸九分寸之六弦三尺七寸五分大簇以下股长尺八寸博九寸鼓二尺七寸博六寸弦三尺三寸七分半其声各中本律黄钟厚二寸一分大吕以下递加其厚至应钟厚三寸五分诏以其图送中书议者以为周礼大钟十分其鼓间以其一为之厚小钟十分其钲间以其一为之厚则是大钟宜厚小钟宜薄今大钟重一百六斤小钟乃重一百四十八斤则小钟厚非也又磬氏为磬倨句一矩有半博为一股为二鼓为三参分其股博去其一以为股博三分其股博以其一为之厚今磬无博厚无长短亦非也五年详定大乐知制诰王洙奏黄钟为宫最尊者但声有尊卑耳不必在其形体也言钟磬依律数为大小之制者经典无正文惟郑康成立意言之亦自云假设之法孔颖达作疏因而述之据历代史籍亦无钟磬依数大小之说其康成颖达等即非身曾制作乐器至如言磬前长三律二尺七寸后长二律一尺八寸是磬有大小之制者据此黄钟为律臣曾依此法造黄钟特磬者止得依林钟律声若随律长短为钟磬大小之制则黄钟长二尺二寸半减至应钟则形制大小比黄钟才四分之一又以无射应钟为宫即黄钟大吕反为商声宫小而商大是君弱而臣强之象今参酌其搏钟特磬则制度欲各依律数算定长短大小容受数仍以皇佑中黍尺为法铸大吕应钟钟磬各一即见形制声韵所归奏可夏翰林学士承旨王拱辰言奉诏详定大乐比臣至局钟磬已成窃缘律有短长磬有大小黄钟九寸最长其气阳其象土其正声为宫为诸律之首盖君德之象不可并也今十二钟磬一以黄钟为率与古为异臣亦尝询阮逸胡瑗皆言依律大小则声不谐故臣窃有疑请下详定大乐所更稽古义详定之是月知谏院李兑言曩者紫宸殿阅太常新乐议者以钟之形制未中律度遂斥不用复诏近侍详定窃闻崇文院聚议王拱辰欲更前史文义王洙不从语言往复殆至喧哗夫乐之道广大微妙非知音入神岂可轻议西汉去圣尚近有制氏世典大乐但能纪其铿锵而不能言其义况今又千余年而欲求三代之音不亦难乎阮逸罪废之人安能通明述作之事务为异说欲规恩赏朝廷制乐数年当用赋匱乏之时烦费甚广器既成矣又欲改为虽命两府大臣监议然未能裁定其当请以新成钟磬与祖宗旧乐参校其声但取谐和近雅者合用之洙既与瑗逸更造钟磬而无形制容受之别又数劝上用新乐于南郊议者多以为非后亦不复用六月乙亥御紫宸殿奏太常寺新定大安之乐召辅臣至省府馆阁预观焉赐详定官器帛有差八月甲寅诏南郊且用旧乐新定大安之乐常祀及朝会用之胡宿言自古无并用二乐之礼今旧乐高新乐下相去一律难并用且新乐未施郊庙先用之朝会非荐上帝配祖考之意帝以为然【宿为翰林】九月乙酉崇政殿召近臣等观新乐先是钟磬之音未合古法诏中书门下集两制及太常礼官与和钟律者考定其当议者各安所习久而不决乃命诸家各作钟律以献亲临视之然古者黄钟为万事根本故尺量权衡皆起于黄钟至隋用累黍为尺而制律容受卒不能合及平陈得古乐遂用之唐兴因其声犹不失于古五代之

乱大乐沦散王朴始用尺定律而声与器皆失之故太祖患其声高减一律至是又减半然太常乐比唐声犹高五律比今燕乐高三律上虽勤劳制作未能得其当者有司失之于以尺主律也史官蒲宗孟李清臣曰世号太常为雅乐而未尝施于燕享岂以正声为不美听哉夫乐者乐也其道虽微妙难知至于奏之而使人悦悻和平此不待知音而后能也尝窃观于太常其乐钟磬埙箎搏拊之器与夫舞缀羽钥干戚之制盖皆仿诸古矣逮制作之后听者虽知为乐而观者厌焉岂所谓古乐其声真若此哉孔子恶郑声之乱雅乐乱之云者似是而非也孟子亦曰今乐犹古乐然今太常独与教坊乐音殊绝何哉昔者李照胡瑗阮逸改铸钟磬处士徐复笑之曰圣人寓器以声不先求其声而更其器其可用乎照瑗阮制作久之卒无成蜀人房庶亦深议其非是因著书论古乐与今乐本末不逮其大畧以谓上古世质器与声朴后世乃变为金石钟磬也后世易之为方二分竹琴箫也后世变而为箏笛匏笙也攢之以科埤土也变而为瓯革麻料也击而为鼓木祝敌也贯之为叛此八音者于世甚便而不达者指庙乐搏钟搏磬宫轩为声而槩用殊方别部为淫声殊不知大辂起于椎轮龙艘生于落叶其变则然也古者以俎豆食后世易之以楛孟古者簟席以为安后世更之榻按虽使圣人复生不能舍楛孟榻按而复俎豆簟席之质也然则八音之器夫岂异于此哉孔子曰放郑声郑声淫者岂以其器不若古哉亦疾其声之变尔试使知乐者由今之器寄古之声去其沾滞靡曼而归之中和雅正则感人心导和气不曰治世之音乎然是所谓雅乐者未必如古而教坊所奏岂尽为淫声哉数子纷纷改制钟律而复庶之论指意独如此故缉其语以俟知音者嘉佑元年八月初李照斥王朴乐音高乃作新乐下其声太常歌工病其大浊歌不成声私赂铸工使减铜齐而声稍清歌乃叶然照卒莫之辨又朴所制编钟皆侧垂照及胡瑗皆非之及照将铸钟给铜于铸泻务得古编钟一工不敢毁乃藏于太常钟不知何代所作其铭云粤朕皇祖实铸夬钟粤斯万年子子孙孙永宝永叩其声与朴钟夷则清声合而其形侧垂瑗后改铸正其钮使下垂叩之弇郁而不扬无射钟又长角而震掉不和著作刘羲叟谓人曰此与周景王无射钟无异上将有所眩惑之疾已而果然于是范镇言自臣伏见自弃祖宗旧乐用新乐以来及今四五年日食星变冬雷秋电大雨不时寒暑不节不和之气莫甚于此使乐无感动则已乐而有所感动则众异之至未必不由是也去年十二月晦大雨雪大风宫架折坏元日大朝会乐作而陛下疾作臣恐天意以为陛下不应变祖宗辄用新乐也不然何以方乐作之初而陛下疾作此天意警陛下之深也自初议乐时臣屡言创乐非是其间书一通最为详悉今再具进呈乞下执政大臣参详臣书有可采伏乞且用祖宗旧乐以俟异时别加制作丁丑诏用旧乐

### 皇佑明堂之议

皇佑二年春先是宋庠建议以今年当郊而日至在晦用建隆故事宜有所避因请季秋大享明堂乙亥帝谓辅臣曰明堂之礼由汉以来诸儒议论不同将安适从文彦博曰此礼之废久矣俟退而讲求其当自圣朝行之三月戊子朔诏罢今年冬至亲祠南郊

之礼以九月择日有事于明堂帝谓辅臣曰明堂者布政之宫朝诸侯之位天子路寝乃大庆殿是也况明道初合祀天地于此今之亲祠不当因循尚于郊坛寓祭己丑诏以大庆殿为明堂

癸丑诏以季秋辛丑大享明堂先是礼官上王者郊用辛盖取斋戒自新之义又通礼祠明堂亦用辛遂下司天择日将用辛亥盖九月二十七日也丙辰宋祁上明堂通议二篇自序畧曰上薄三代旁搜汉唐礼之过者折之说之谬者正之以合开宝一年之典辅佐一夜观书之勤其书内降出寻复有诏进入乙丑内出详诏明堂之礼前代并用郑康成王肃两家义统兼祭昊天上帝已为变礼祖宗以来三岁一亲郊即徧祭天地太祖雩祀太宗真宗祈穀二祀本无地祇位当时正合祭天地祖宗并配而百神从祀今祀明堂正当亲郊之期而礼官所定止祭昊天上帝不及地祇配坐不尽祖宗未合三朝之制况比年水旱地震稼穡不登移郊为大享盖亦为民祈福宜合祭皇地祇奉太祖太宗真宗并配而五帝神州亦亲献日月河海诸神悉如圜丘祀因谓文彦博曰礼非天降地出缘人情尔礼官习拘儒之旧传舍三朝之成法非朕所以昭孝息民也彦博曰惟上圣至明为能达礼之情适礼之变非臣等所及翌日彦博奏诏书所定亲献之礼周于五天帝神州比圜丘之位陟降而劳请命官分献帝曰朕于文祀岂敢惮劳也礼官议从祀神位未决复谕曰郊坛第一龕者在堂第二第三龕者设于左右夹庑及龙墀上在壇内外者列于堂东西厢及后庑以象坛墀之制仍先绘图以闻壬申诏辅臣与礼官设神位于大庆殿上五室内太室中北昊天上帝位皇地祇在左皆南面一祖二宗在东西面黄帝在太皇帝西南北面人帝在左少退青赤白黑帝各从本室人帝在左少退神州地祇日月北极天皇大帝并设于五室之间其位少退五帝神州日月北极天皇于郊坛为第一龕位五官勾芒以下设于明堂庭中少东南别为露幄五帷十二次紫微垣内官五方岳镇海渚岁星真栲钩星以七十二位于东西夹庑上版设于郊坛为第二龕位二十八舍黄道内天宫角宿摄提五方山林川泽以下二百七十九位于丹墀龙墀道东西版设于郊坛为第三龕位黄道外天官及众星五方坟衍原堤以下四百九十六位并东西■〈户外瓦内〉周环殿后版设以北为上于郊坛为内壇之内外位仿古明堂之制又稍与坛墀位叙相传云初礼官言按通礼昊天配帝用苍牲二五帝五人帝各依方色用牲十缘国朝南郊虽神位至多亦止用犊四羊豕十六今明堂请用七犊以荐上帝配帝五方帝羊豕各五荐五人帝既报可寻诏合祭并侑及亲献五帝神州礼官请更增四犊凡用犊十一羊豕悉依郊例各用十六荐日月以下从祀神位从之五月丁亥朔礼院上新作明堂神玉及璠玉初上谓辅臣曰前代礼神有祭玉璠玉今独有璠玉无乃于祀典阙乎沙州适贡玉乃择其良制为琮玉等九器其黝璜尤粹温祭玉之备始于此唐太常卿王起以当时祀事用璠玉下有司作礼神玉于是造琮璧止用璠玉等九器祭毕藏之唐以来玉已不脩甲午礼院上明堂五寶制度图丁酉明堂礼仪使言将来行礼请皇帝初诣昊天上帝位次皇地祇青赤黄白黑神州地祇位奠玉币次诣太祖太宗真宗位奠币酌献



之序如之又言明堂所用之乐皆当随日用律从之九月庚戌诏乐曲名常祀同者更之六月己未内出御撰明堂乐八曲以君臣民事物配属五音凡二十音为一曲用宫变征变者天地人四时为七音凡三十声为一曲以子母相生凡二十八声为一曲皆黄钟为均又明堂月律五十七声为二曲皆无射为均又以二十声二十八声二十声为三曲亦无射为均皆自黄钟宫入无射如合用四十八五十七声即依前谱次第成曲其征声自同本律及撰鼓吹警严曲合宫歌并隶于太常【周明堂乐见乐门】秋丁未上封者言明堂酌献五帝清安之曲并用黄钟一均声此乃国朝帝祀五时迎气所用旧法若于亲行大飨即所未安且明堂之位木室在寅火室在巳金室在申水室在亥盖木火金水之始也土室在西南盖土王之次也既皆用五行本所王之次则献神之乐亦当用五行本始律各从其音以为曲其清安五曲宜以无射为均大簇为角献青帝大吕为征献赤帝林钟为宫献黄帝夷则为商献白帝应钟为羽献黑帝诏两制官同太常议上尧臣等言大享日迫事难猝更诏俟过大礼详定以闻八月子孙奏荐恩泽以大享为罢自知杭州范仲淹奏建昌军草泽李觏撰明堂图义觏能研精经训会同大义按而视之可以兴制今朝廷行此盛礼千载一辰何斯人之学上契圣作谨具录以进庶讨论之际有所补助诏送两省看详称其学业优博授试大学助教丙寅草泽郑叔豹上宗祀书三卷述明堂制度及配享冕服之义丁丑诏立冬罢祭神州地祇初礼院以黑帝及神州地祇皆当合祭于明堂请罢立冬之祭上以四时近气不可辄止罢祭神州地祇时积雨弥旬帝请祷禁中甲辰斋于文德殿天日澄霁人情胥说【己酉朝飨景灵宫庚戌享大庙辛亥大享于明堂以太祖太宗真宗配从祀如圜丘大赦文武职官及分司致仕官并特与转官内臣入仕十年亦迁改即不为永例冬十月丙寅大宴集英殿以明堂礼成饮福也辛未诏宰臣文彦博宋庠参政高若讷检讨王洙编修大享明堂记皇佑三年春丙戌文彦博等上明堂记三十卷纪要二卷上为之序镂板以赐近臣】编修官王洙加史馆修撰仍俟知制诰有阙除之

### 康定元昊扰边

仁宗皇帝明道元年冬十一月定难节度使守太傅尚书令兼中书令西平王赵德明封夏王德明凡娶三姓卫慕氏生元昊性凶鸷残忍面圆高準长五尺余少时衣长袖绯衣冠黑冠佩弓矢从卫步卒张青盖出乘马以二旗引百余骑自从晓浮屠学道蕃汉文字按上置法律书常携野战歌太一金鉴诀忽引兵袭夜落隔可汗王破之夺甘州数谏德明毋臣中国德明辄戒之曰吾久用兵终无益徒自疲耳吾族三十年衣锦衣绮衣此圣宋天子恩不可负也元昊曰衣皮毛事畜牧蕃姓所便英雄之生当王霸耳何锦绣为既陷甘州复举兵攻拔西凉府未踰时德明死元昊继立延州以诏辍视朝三日赠大师尚书令兼中书令命开封府判官度支员外郎朱昌符为祭奠使六宅副使内侍押班冯仁俊副之赐赙绢七百疋布三百疋副以羊麩上尊酒将葬赐物称是皇太后所赐亦如之帝与皇太后为德明成服于苑中百官奉慰

癸亥制授元昊特进检校太师兼侍中定难节度夏银绥宥静等州观察处置押蕃落使西平王以司封员外郎判开拆司杨吉为旌节官告使礼宾副使朱允中副之元昊既袭封即阴为叛计时改元明道而元昊避父名辄称显道于国中虽奉贡然僭已萌矣初对使者设度自尊大而告徙坐即宾位不为屈又闻屋后有数百人锻声知其必叛独畏懦不敢言告允恭子也丙申诏苏州所没丁谓庄田还给其家仍以其子前内殿承制翊为供奉官

景佑元年赵元昊始寇府州闰六月乙丑府州言昊自正月后数入寇诏并代部署司严兵备之秋七月先庆州柔远蕃部巡检嵬通领兵入夏州界攻破后桥新修诸堡是月赵元昊率万余众来寇称报仇沿边都巡检杨遵柔远寨监押卢训以骑七百战于龙马岭败绩环庆路都监齐宗矩走马承受赵德宣宁州都监王文援之次节义峰通事蕃官言虏多伏兵不可过壕宗矩不听伏兵发宗矩被执久之以宗矩还诏永兴军劾宗矩等败军状以闻八月徙刘平为环庆路副都部署上初擢平为四厢谓左右曰平所谓诗书之将也平在定州常建言臣前在陕西见元昊车服僭窃势且叛矣宜严备之不听及是又戒平曰知卿有将畧所委以边寄卿其勉之加赐钱百万十月赵元昊自袭封始为反计多招纳亡命峻诛杀以兵法部勒诸羌始衣白窄衫毡冠红裹顶冠后垂红结绶自号嵬名吾祖凡六日九日则见官属其伪官分文武或靴笏幞头或冠金帖镂冠绯衣金涂银黑束带佩蹠■（跣）穿靴或金帖纸冠间起云银帖纸冠余皆秃髮耳重环紫旋襴六垂束带佩解结锥短刀矢弓鞬乘靛皮鞍打跨钹拂民庶衣青绿用此以别贵贱元昊初制秃发令先自秃发及令国人皆秃髮三日不从令许众杀之每欲举兵必率酋豪与猎有获则下马环坐饮割鲜而食各问所见择取其长是岁春始寇西边杀掠居人下诏约束之私改元曰开运既逾月乃更广运其母氏族人山喜谋杀元昊事觉元昊酖其母杀之沉山喜之族于河遣使来告哀诏起复镇军大将军左金吾卫上将军员外置同正员以内殿崇班阁门祗候王中庸为致祭使兵部员外郎兼起居舍人郭劝为吊赠兼起复官告使元昊赂遗劝等百万劝悉拒不受屯田员外郎张亢者奎弟也豪迈有奇节常通判镇戒军上言赵德明死其子元昊喜诛杀势必难制宜亟防边论西北攻守之计章数十上上欲用之会丁母忧景佑二年十二月赵元昊遣苏诺尔将兵二万五千人攻嘉勒斯賚败死畧尽苏诺尔被执元昊又自率众攻牦牛城一月不下既而诈约和城开乃大纵杀戮又攻青唐安尔宗噶尔带星岭诸城嘉勒斯賚部将安子罗以兵十万絶归路元昊画夜战二百余日子罗败然兵溺宗噶尔河及饥死过半元昊又尝侵嘉勒斯賚并兵临河湟斯賚知众寡不敌壁鄯州不出阴间元昊颇得其虚实元昊已渡河插旗帜志其浅斯賚潜使人移植深处以误元昊及大战元昊溃而归士视帜渡溺死十八九所卤获甚众嘉勒斯賚来献朝廷议加斯賚节度使同知枢密院韩亿以谓二寇皆藩臣今不能谕令解仇乃因捷加赏非所以御四夷也议遂寢

景佑三年冬赵元昊自制蕃书十二卷字画繁冗曲屈类符篆教国人纪事悉用蕃

书私改广庆元年再举兵攻回纥陷瓜沙兰三州尽有河西故地将谋入寇恐嘉勒斯賚拟其后复举兵攻兰州诸羌南侵至马衔山筑城瓦川会留兵镇守絶吐蕃与中国相通路

寶元元年春正月癸卯元昊请遣人供佛五台山乞令使臣引护并给馆券从之元昊实欲窥河东道路故也己酉鄜延路钤辖司言赵山遇遣人至金明县与都监李士彬约降已令却之诏钤辖司及环庆泾原麟府等路各谨斥候如山遇复遣人至但令士彬以己意约回务令边防安静初赵元昊悉会诸部酋豪刺背血和酒置髑髅中共饮之约先寇鄜延欲自德靖塞门赤城路三道并入酋豪有谏者辄杀之山遇者元昊从父也数正元昊不听山遇畏诛先遣人持伪告诣士彬绝黄河南渡发部落内属而挈其妾入野利罗子呵遇及亲属二十二人以珍寶石马来降是月庚子至保安军知保安军未告以告之延州郭劝劝与钤辖李谓狐疑不敢受先是山遇等豫寄珍寶于士彬以万数劝诘士彬士彬利其物荅云无有言未尝招诱之劝谓亦以自为德明纳贡四十年有内附者未尝留并议遣还仍约束缘边勿受降者于是奏入因降此诏劝谓寻遣山遇还山遇不可即命监押韩周执山遇等送元昊至辍移坡元昊集骑射而杀之山遇名惟亮弟惟永分掌左右厢兵元昊恶其不从常语惟序曰汝告山遇反吾以山遇官爵与汝不然俱族灭矣惟序不忍更以告山遇山遇欲来降弟惟序曰南朝无人不知兀卒所为将不信兄必受害山遇曰事已至此无可奈何若南朝有福则纳我矣遂告其母母曰汝自为计我年八十不能从汝去为汝累当置我空中纵火焚之山遇等如母言及为韩周所执号泣称冤周见元昊于宥州元昊衣锦袍黄绵胡帽不肯受山遇等曰延州诱我叛降我当引兵往延州于知州厅前受之周说谕良久乃肯受时元昊自称兀卒已数年兀卒者华言青天子也谓中国为黄天子元昊既杀山遇遂谋僭号十二月丙寅鄜延路都钤辖司言赵元昊反辛未徙环庆路副署殿前都虞侯邕州观察使刘平为鄜延路副部署范雍为振武节度使知延州诏陝西河东沿边旧与元昊界互市处皆禁绝之寶元元年冬甲戌赵元昊筑坛受册僭号大夏始文英武兴法建孔仁孝皇帝改元大庆二年天授祀法延神元年遣潘七布昌里马乞点兵集篷子山自诣西凉府祠神仍遣使以僭号来告二年正月初元昊遣使称伪官抵延州郭劝李谓留其使具奏元昊虽僭中国名号然阅其表函尚称臣可渐以礼屈愿与大臣熟议诏许使者赴京师劝等令韩周与使者及东华门始中国服朝廷发亟读其表曰臣宗祖本后魏帝赫连之旧国拓拔之遗业也逮祖思恭当唐季率兵拯难受封赐姓名祖继迁大举义旗悉降诸部收临河五镇下沿边七州父德明嗣奉世基勉从朝命臣偶以狂斐制小蕃文字改大汉衣冠革乐之八章为五音裁礼之九拜为三拜衣冠既就文字既行礼乐既张器用既备吐蕃达鞑张掖交河莫不从服军民屡请愿建邦家是以受册皇帝位伏望陛下许以西郊之地册为南面之君谨遣弩涉俄疾你厮闷卧普令济嵬伽崖妳奉表诣阙以闻赵元昊为书及锦袍银带投鄜延境上以遗金明李士彬且约以叛候人得之诸将皆疑士彬副都部署夏元亨独曰



北行间尔士彬与羌世仇若有私约通赠遗岂使众知耶乃召士彬与饮厚抚之士彬感泣不数日果击贼取首馘羊马自効寶元二年六月诏削赵元昊官爵除籍属揭榜于边募人擒元昊若斩首献即以为定难节度番汉职员能帅族归顺者等地推恩是月西贼寇保安军鄜延钤辖卢守勤等击走之贼又三万骑围承平寨鄜延副都署许怀德时在城中率劲兵千余人突围破贼已而贼复成阵有出阵前据鞍骂者怀德引弓一发而踣贼乃解去怀德均子也十二月乙丑赏保安军守御之功鄜延钤辖六宅使荣州防御使卢守勲为左骥驥使都巡检司指使散直狄青为右班殿直青功最多故超四资授官西河人也是日元昊复遣贺永年赍嫚书纳旌节及以所授敕告并所得敕榜置神明匣留归娘族而去书畧曰既先违誓约又别降诏命诱道边情潜谋害主谅非圣意皆公卿异议心膺妄图有失宏规全忘大体又云国土迥殊幸非僭逆妬嫉何为

康定元年春鄜延环庆经畧司言元昊遣使至境议和诏所上表如不亏臣礼受之如初西贼自承平寨退声言将攻延州范雍闻之惧甚即奏疏言延州最当贼冲地阔而寨栅疎土兵寡弱又无宿将为用请济师疏入未报而元昊诈遣人乞和雍信之不为备元昊乃盛兵攻保安军自土门路入壬申声言取金明寨李士彬严兵以待之夜分不至士彬释甲而寝翌日奄至士彬父子被擒遂乘势抵延州城下副都部署刘平领兵与石元孙合军救延州夜至三川口十里止营鄜延都监黄德和将二千余人屯保安北巡检万俟政郭遵各将所部分屯雍皆召之为外援戊寅五将令步骑万余东行五里平令诸军齐至三川口遇贼官军争奋杀日暮贼以轻兵薄战官军却二十余步黄德和居阵后见军却后遂率麾下走保西南山众军随皆溃平遣其子驰追之并力拒贼德和不从遂骤马遁平率余众退保西南山下立七寨自固明旦贼四出合击官军平与元孙皆被执围延州凡七日及失二将城中忧沮不知所为会大雪解去城不陷鄜延走马承受薛文仲入奏金明县都监李士彬与其子殿直怀寶并战没诏黄德和石元孙领兵防边刘平援之士彬所部仍令延州招集时朝廷未知延州被围平等已败故也士彬世居金明有兵近十万人延州专使控扼中路众号铁面相公夏人畏之元昊反乃使其民诈降士彬士彬白范雍请徙置南方雍曰讨而擒之孰若招而致之乃赏以金帛使隶士彬于是降者日至分隶诸寨甚众元昊使其诸将每与士彬遇辄不战而走士彬由是益骄又以严酷御下下多怨愤者元昊乃阴以金爵诱其所部渠帅往往受之而士彬不知是春元昊遣衙校贺真来见范雍自言改过归命朝廷雍喜厚礼而遣之真既出境夏骑大入诸降人皆为内应士彬时在黄堆寨闻敌至索马左右以弱马进遂鞚以诣元昊与其子怀寶俱陷没雍初闻夏大举令士彬分兵守三十六寨勿令敌得入怀寶谏曰令当聚兵御寇分则势弱不能支也士彬不从怀寶遂力战或曰元昊得士彬割其耳不杀十余年乃卒于夏中癸未朝廷始知刘平石元孙等兵败被执延州奏到故也延州之役左侍禁合门祗候郭遵以西路都巡检使属刘平麾下既与贼遇驰马入阵杀伤数十人贼出骁将杨言当遵遵挥铁杵破其脑两军皆大呼复持铁鎗挺进所向披靡会黄德和引兵先溃去

贼战益急遵奋击期必死出行间军稍却即覆马以殿又持大稍横突之贼知不可敌使人持券索立高处迎遵马辄为遵所断因纵使深入攢兵注射之中马即仆地被杀知枢密院事王巖知河南府陈执中知青州同知枢密院事张观知相州天圣中巖常使河北过真定曹玮玮曰君异日当柄用愿留意边防巖曰何以教之玮曰吾闻赵德明少子元昊颇桀悍德明常使人推易汉物不如意欲杀之元昊谏曰我戎人本从事鞍马间而与汉推易之物已非策又从而斩之失众心不可德明为贵不杀吾使人觐元昊状貌异常他日必为边患巖时莫究所谓比再入枢密院元昊果反帝数问边计不能对及刘平石元孙等败议刺乡兵久不决帝不悦宰臣张士逊言军旅之事枢密院当任其咎于是巖及执中观三人同日罢黄德和诬奏刘平降贼命御史文彦博就河中府置狱时朝廷信德和奏已发禁兵围平等家收其族天章侍讲贾昌朝言平事未可知先收其族使果存亦不得还矣子仕任布亦言平非降贼者知谏院富弼力奏平引兵赴援行不淹日以奸臣不救故败竟骂贼不食而死宜恤其家而延州吏民复诣阙诉平战没状上即命罢围各赐平及元孙家绢五十疋钱五百贯布五百端时河中狱犹未决也延州之围既解钤辖卢守勲与通判临邛许用章更讼于朝廷亦命文彦博等即河中府劾之时内侍用事者多为守勲游说知谏院富弼言卢守勲黄德和中官怙势诬人冀以自免宜竟其狱枢密院奏方用兵狱不可遽弼又言大臣附下罔上狱不可不竟始延州民请诣阙告急上召问具得诸将败亡之状执政恶之命边郡禁民擅赴阙者富弼言此非陛下意宰相恶上知四方有败尔民有急不得诉之朝则北走丹契西走元昊矣文彦博等劾河中府狱既得实韩琦亦言平以疲兵数千敌贼十余万众画夜力战而为德和所累既被执犹骂贼不已忠勇不愧于古人今坐诬言所惑恤孤悯忠之典未下边臣岂不解体乎丙午腰斩东染院副使充鄜延路都监黄德和于河中府仍梟首延州城下甲子元昊陷塞门寨执寨主内殿承制高延德监押左侍禁王继元死之延州都监周美言于范仲淹曰贼新得志其势必复来金明当边冲我之蔽也今不亟完将遂失之仲淹因属美复城如故数日贼果来其众数万薄金明阵于延州城北三十里美领众二千力战会暮援兵不至乃徙军山北多设疑兵贼望见以为救至即引去既而贼出文蒿寨遂至郭北平夜闻不解美悉众使人持一炬从间上山益张旗帜四面大噪贼惧走获其牛羊橐驼铠甲数千计遂募禁兵筑万安城而还贼复寇金明美引兵由虞家堡并北山而下贼即引去康定元年九月丙寅西贼寇三川寨镇戎军西路都巡检杨保吉死之明日泾原路都监刘继宗李纬王秉等分兵出战皆失利继宗为流矢所中时泾州驻泊都监王珪将三千骑来援自瓦亭寨至师子堡贼围之数重珪奋击贼披靡获首级为多叩镇戎城请益兵不得城绝糗粮与之师既饱语其下曰兵法以寡敌众必在暮我兵少乘其暮气之衰可得志也复驰入有贼将持皂帜植枪以詈曰谁敢与吾敌者枪直珪胷而伤右臂珪右手以杵碎其脑继又一将复以枪进珪挟其枪以铁鞭击杀之一军大惊将引去会珪以马中箭而还贼遂留军纵掠凡三日闻泾原钤辖知渭州郭志高率大兵趋三川乃退三班借职

郭纶固守定州堡得不陷刘璠堡本军指使散直王遇弓箭手都虞侯刘用以事急出降并陷干沟干河赵福三堡是役也官军战没者凡五千余人壬申环庆副都部署任福等攻西贼白豹城克之凡烧庐舍酒务仓草仓伪大尉衙及破荡骨咩等四十一族兼烧死土控中所藏蕃贼不知人数贼时盛兵寇保安及镇戎军福等自庆州东路华池鳳川镇声言巡边召都巡检任政华池寨王胡求锡鳳川监押刘世卿淮安镇都监刘政监押张立同议入界以牵制贼兵庚午行至柔远寨明日犒熟户蕃官且或以不得离席遂部分诸将又遣别将馱所犒蕃官行前柔远至白豹七十里夜漏未尽抵城下四面各击平明城破纵蕃部军人等掠焚巢穴委聚方四十里是日晚还军诸军既还贼遣百骑袭其后范全设伏崖险贼半度邀击之斩首四百级生获七十余人全开封人后改名恪甲午赐泾原驻泊都监礼宾副使王珪名马二疋黄金三十两裹疮绢二百疋仍遣使抚谕之复下诏暴其功寨下以励诸将寻命为举路驻泊都监复兼行营勒金字处置牌赐之使得专杀丙申环庆部署沂州团练使兼知庆州任福为龙神卫四厢都指挥使贺州防御使赏白豹之功也寻命福知鄜延路副都部署十一月丁卯鄜延路部署司指使右班殿直狄青为右侍禁合门祗候泾州都监青每临敌被髮面铜其出入贼中皆披靡无敢当者尹洙为经畧判官青以指使见洙与谈兵善之荐于副使韩琦范仲淹曰此良将才也二人一见奇之待遇甚厚仲淹以春秋授之曰将不知古今匹夫勇尔青折节读书悉通秦汉以来将师兵术由是益知名

庆历元年春先是朝廷欲发泾原鄜延两路兵讨贼议未决诏环庆副都部署任福乘驿诣泾原议事会经畧安抚使韩琦行边趋泾州而谍者言元昊阅兵折彊会谍寇渭州己丑韩琦亟趋镇戎军尽出其兵又募敢勇凡万八千人使福将以击贼泾原驻泊都监桑恠为先锋钤辖朱观泾州都监武英继之行营都监王珪参军事耿傅皆从琦面受福方畧出敌之后诸寨相距仅四十里道近且易刍粮足供度势未可战则据险设伏待其归然后邀击之福等就道琦亦至城外重戒之翌日福自新壕外分轻骑数千趋怀远城捺龙川遇镇戎军西路都巡检常鼎同巡检内侍刘肃与贼兵一滔战于张家堡南斩数百贼弃马羊橐驼佯北恠引骑趋之福亦分兵自将踵其后薄之福恠合军屯好水川宋观武英为一军屯笼落川隔山相距五里约明日会兵不使贼得逸去逻者传贼兵少故福等轻之路益远刍粮不继人马已乏食三日福等不知贼之诱也悉力奔逐癸巳至笼竿城北遇贼大军循川行出六盘山下距羊牧隆城五里结障以抗官军诸将乃知堕贼计势不可留因前接战恠驰犯其锋福阵未成列贼纵铁骑冲突自辰至午阵动众傅山欲据胜地贼发伏自山背下击士卒多堕崖堑相覆压恠肃战死贼分兵八千断官军后福力战身被十余枪有小校刘进者劝福自免福曰吾为大将兵败以死报国耳挥四刃铁简挺身决鬪枪中左颊絶其喉而死福子怀亮亦死之先是琦命渭州都监赵律将瓦亭骑兵二千二百为军后继是日与观英会兵于姚家川福既死贼并兵攻观英等战既合珪自羊牧隆城以屯兵四千五百来阵于观军西屡出畧阵阵坚不可破英重伤不



能出军贼兵益至东偏步兵先溃众遂大奔英律珪傅皆死之监羊牧隆城酒税訾斌陝西部押兵士李简柔远寨主王庆镇戎军监押李禹亨三川寨监押刘筠俱没于阵指使及军校死者数十人军士死者六千余人唯观以余众千余人保民垣四向纵射会暮夜贼引去泾原部署王仲室亦以兵来援与观俱还民垣距福败处纔五里然不相闻王珪望见福麾帜尚在围中欲援出之军校有观望不进者珪斩以徇乃东望再拜曰臣非负国力不能也独有死耳乃复进战击杀数百人铁鞭至挠曲手掌破裂犹奋自若马三中箭三易马最后得其下马左右驰击杀贼数千人飞矢中其目遂死英知必败劝傅避去不荅叹曰英当死君文吏无军责奈何与英俱死观亦戒傅少避贼锋而傅愈前不顾身被数枪乃强射一夕傅在观营夜作书遗福以其日小胜前与贼大军遇深以持重戒之自写题观名以致福军中傅死后或言福之败由傅督战太急福等既违节度虽死不足与既而福随军孔目吏彭忠得傅戒福书具白琦琦即奏之尹洙为作悯忠辨说二篇方元昊倾国入寇而福所统皆非素抚循之师临敌受命法制不立既又分出趋利故致甚败奏至上深悼焉夏六月诏陝西诸路部署司自今西贼犯塞方且出兵掩击诸族以牵其势自余毋得擅行侵掠始用田况之言也秋七月元昊寇麟府州八月戊寅诏鄜延部署许怀德驻泊都监任守信刘极巡检黄世宁以兵万人援麟府州又徙围丰州麟府二州皆在河外因山为城最为险固既久士卒渴乏或劝知州苗继宣取污沟之泥以饰牒元昊仰视曰谍谓我无庸战不二日当渴死今尚有余以污牒给我也斩之城下解围去乙未元昊陷丰州庚戌鄜延钤辖兼知鄜州西上合门使忠州刺史张亢为并代钤辖专管勾麟府库马公事代康德輿也时元昊已陷丰州引兵屯琉璃堡纵骑抄麟府间二州闭壁不出民乏水饮黄金一两易水一杯朝廷议弃河外守保德军以河为界未果因徙亢使经度之亢单骑扣府州城门闕不启亢曰我新军帅也出所授敕示城上既入即开门纵民采薪刍汲涧谷然寇骑尤时出抄掠汉田亢以州东焦山有石灰穴为筑东胜堡下城旁有蔬畦为筑金城堡州北沙坑有水泉为筑安定堡置兵守之募人获于外腰鎌与持兵卫送者均其得其时禁兵败北无鬪志乃募役兵夜潜隘道邀击寇游骑比明或持首级来献亢犒劳之衣以锦袍禁兵始惭奋曰我顾不若彼乎又纵使饮博士窘乏幸利皆愿一战亢知可用始谋擊琉璃堡谍伏贼塞旁草中见老羌方炙羊胛占吉凶惊曰明日当有急兵且趋避之皆笑曰汉儿方藏头■〈黍卩〉间何敢至此亢知无备乃夜引兵袭擊大破之斩首二百余级寇弃堡遁去乃筑宣城寨于步驰沟以捍寇路鄜延都监西京作坊使贵州刺史王信为本路钤辖兼两路都巡检使信初为鄜延都监始至之夕寇众号数万傅城军吏气慑不知所为信领劲兵二千夜出南门与贼战不利失其前锋因按军不动迟明潜上东山整束乘势而下擊走之追袭大获而还葛怀敏败信又出兵拒贼俘斩甚众先是屯田员外郎张旨通判府州州依山无外城旨将筑之州将曰吾州据险敌兵必不来旨不听城垂就寇大至乃联巨木补其罅守以强弩时中外不相闻者累日民心震恐库有买马彩数千旨矫诏赐守卒卒皆东望呼万岁贼以为救至州无

井民取河水以饮贼断其路旨夜开门率兵居民乘城力战贼死伤者众遂解去以功迁都官员外郎旨河内人也鄜州都监王凯者全斌曾孙常出双烽桥染枝谷遇寇破之又破庞青黄罗部再战于伺候烽前斩首三百八十七级焚荡驱获马牛橐驼器械以数千计寇围麟川乘城拒鬪昼夜三十一日始解去特迁西头供奉官代还寇尤抄掠道不通以为内殿崇班麟路沿边都巡检使与同巡检张岳护粮道于青眉浪寇大至与岳相失乃分兵出其后夹击之复与岳合斩首六十五级又入兔毛川贼众三万凯以兵六千陷围流矢中面斗不解至暮寇溃又斩首八百十六级自蹂践死者以数千迁南作坊副使张岳者府谷人以贄为牙将有瞻畧善骑射天圣中西夏伪观察使阿遇有子来归阿遇寇麟州夏边户约还子然后归所获麟州还其子而阿遇辄背约安抚使遣岳诘问岳造帐中以逆顺谕阿遇阿遇语屈留岳共食阿遇抽佩刀贯大脔啖岳岳引吻就刀食肉无所惮阿遇弦弓张镞指岳腹而穀岳食不辍神色自若阿遇抚岳背曰真男儿也翌日又与岳纵猎双兔起马前岳发两矢连毙二兔阿遇惊服岳马橐駝悉归所获如故约州将补为来遠寨主手杀伪首领俄易儿夺其甲马时年十八名动一军元昊犯鄜延麟府时岳为教练使从忻继闵破浪黄党儿两族射杀数千人斩伪军王敖保以功补下班殿侍三班差使贼骑方炽中人促赐军衣至麟州寇骑充斥不得前康德輿管勾军马司事遣岳驰骑五十往护之至青眉浪遇贼接战矢中双颊岳拔矢鬪愈力夺马十二匹而还贼围府州攻甚急城西南角陴下贼将登众嚣曰城破矣岳乘陴大呼令两人持一人来贼为稍却众心乃安飞矢中右目而身被三枪昼夜督守又帅死士开闕护州人及于河北围解城中不乏水以劳迁右班殿直然贼游兵常往来境中邀夺馈运以岳为鄜府州道路巡检至深栢坞遇贼数千分兵追击斩首百余级夺兵械马数百近郊民由比秋成未获岳以计干张亢得步卒九百人护之大败贼于龙门川从诸将通麟州粮道破贼于栢子寨改左班殿直内侍宋永诚传诏寨下岳护永诚遇贼三松岭贼以精骑挑战矢中岳臂犹跃马左右驰射诸将乘胜而进贼皆奔溃特改西头供奉官以为赏薄又迁内殿崇班贼破丰州将据有其地岳与诸将一日数战破伪容州刺史耶布移守贵三寨俘获万计又有王吉为麟州通判官被围急苗继宣募吏民通信求援吉应募继宣问须几人从行吉曰今寇骑百里无所用众请髡髮衣彼服挟弓矢赍糗粮诈为夏人夜缒出遇寇问之则为夷语荅之两昼夜然后出敌寨之外走诣府州告急府州遣将兵救之吉复问道入城城中皆呼万岁及围解除吉奉职本州岛措使吉常从王凯及中贵人将兵数十人卒遇寇数万骑中贵人惶恐以手帛自经吉曰官何患不得死何不且令吉战若吉不胜死未晚也因使其左右数人守中贵人曰贵人不虞当尽斩若属因将所部先登射杀寇大将寇众大奔众军乘之寇坠崖死者万余人又常与寇战其子文宣年十八从之战罢不见文宣其麾下请入寇中求之吉止之曰此儿为王吉子而为寇所获尚何以求为顷之文宣挈二首级以至乃喜曰如此真我子也吉每与寇战不过一矢即舍弓矢袒而出手杀数人然后反曰我当张弓挟矢之时一往銳气彼若仓卒无备则成擒矣吾前后数

十战未尝发两矢也吉与张岳齐名卒不至显官壬寅知谏院张方平又上疏言自元昊叛命以来王师数出无功济其凶谋气焰益盛今自陝西四路河东麟府遠近输挽供给天下为之劳弊而解严息甲未可以日月期也臣常就自边来者询贼中事多云贼为寇三年虽常得逞然重于举众故必岁年乃罢一入连陷城寨未能有我尺寸之地而絕其俸赐禁诸關市今贼中尺布可值钱数百以此揣贼情安得不困夫夷狄得志则骄逆稍困则卑顺然其业已于大国为仇倘有悔心势未能自通诚朝廷虽欲招徕而非特无名事亦难举今因南郊大礼宜特推旷因以示绥怀之意或时降一诏或着之赦文或择边臣之有名望者单使以谕上意足彰朝廷德义之厚而无损威重之体使天下知陛下深诚遠虑为生灵计至于天地鬼神亦当助仁而佑顺上喜曰是吾心也命方平以疏付中书吕夷简读之拱手曰公言及此社稷之福也

丙辰诏延州若元昊专遣人投进表章即且拘留之先具事宜以闻若令伪官持私书至州须候朝廷处分然后报之始用张方平议也庆历三年正月范仲淹巡边至环州州属羌阴连寇为边患仲淹谓种世衡素得属羌心而清涧城已坚固乃奏世衡知环州以镇抚之龐籍请留世衡诏仲淹更择人仲淹言非世衡则属羌不可怀诏从仲淹所请有牛家族奴讹者屈强未尝出闻世衡至遽郊迎世衡与约诘朝往劳其族是夕大雪深三尺左右曰地险不可往世衡曰吾方结诸羌以信不可失期遂缘险而进奴讹方卧帐中谓世衡必不能至世衡蹙而起奴讹大惊率其族罗拜听命又有兀二族受寇伪补世衡招之不至命蕃官慕思出兵讨之其后百余帐皆自归莫敢贰因令诸族置烽火有急则举燧介马以待又课吏民射有过失射中则释其罪有辞某事请某事辄因中否而与夺之由是人人自励虽屠贩娼优皆精于射寇不敢复近环州初世衡在青涧为属吏所讼以不法事按验皆有状龐籍言世衡披荆口立青涧城若拘以法则边将无所措手诏勿问及步口州詣籍拜且泣曰世衡心肠铁石也今日为公泪口戊子降诏獎諭知延州龐籍等以籍兴修桥子谷塞城也元昊之据承平塞诸将会兵议攻讨洛苑副使种世衡请赍三日粮直捣巢穴文思使周美曰彼知吾来必设覆待我不如间道掩其不意世衡不听美独以兵西出芙蓉谷大破贼而世衡等独无功未几贼复掠土塿寨美逆擊于野家店追比至托拔谷败其众以功迁右骐驎使还军屯永平寨又筑栅于葱梅官道谷以扼贼路令士卒益种营田岁收穀六千斛复率众由厅子部西济大里河屠札万多移二百帐焚其积聚以归龐籍与范仲淹交荐之际鄜延都监迁贺州刺史二年五月癸卯西上合门使忠州刺史并代鈐辖管勾鄜府军马张亢领果州团练使为高阳關鈐辖初麟州犹未通饋路闭隔敕亢自护南郊赏物送麟州贼既不得钞随以兵数万趋栢子寨邀我归亢所将纔三十人亢激怒之曰若等已陷死地前鬪则生不然为贼所屠无余也士皆感励会天大风顺风擊之斩首六百级相蹂躪崖谷死者不可胜计夺马千余匹乃修建宁寨贼数出争逐战于兔毛川亢自以大阵抗贼而使骁将张岳以短兵强弩数千伏山后亢以万胜军皆京师新募市井无赖子弟疲慙不能战遇贼必走贼目曰东军素



易之而虎翼卒勇悍阴易其旗以误贼贼果趋东军而值虎翼卒搏战良久伏发贼大溃斩首二千级不踰月筑清寨百胜中候建宁镇川五堡麟川路始通亢复奏今所通特往来之径尔旁皆虚空无所阻若增筑并边诸栅以相维持则可以广田牧河外势益强议未下而朝廷虑契丹将渝盟乃徙亢高阳庆之西北马铺寨当后桥川口深在贼腹中范仲淹欲城之度贼必争密遣子纯佑与蕃将赵明先据其地引兵随其后诸将初不知所向行至柔远始号令之版筑毕具旬日城成是岁三月也寻赐名大顺贼觉以骑三万来战佯北仲淹戒弗追已而果有伏大顺既成白豹金汤皆截然不敢动环庆自是寇益少癸亥新知邠州观察使范仲淹为龙图阁直学士左司郎中鄜州观察使龐籍复为龙图阁直学士吏部郎中并从所请也初仲淹上表言观察使班待制下臣守边数年羌人颇亲爱臣呼臣为龙图老子今改观察使则与诸族首领名号相乱恐为贼所轻且无功不应更增厚禄辞甚切至表二上乃从之闰九月泾原副都部署葛怀敏与元昊战没于定川先是元昊声言入寇是月辛未朔王沿命怀敏将兵救之已卯至瓦亭寨遣本寨都监许思纯新环庆都监刘赏以蕃兵五千余人为左翼天圣寨主张贵为殿后戊子进屯五谷口知镇戎军曹英泾原路都监赵珣西路都巡检李良臣孟渊皆自山外来会沿边□使向进刘湛为先锋赵瑜总奇兵为援及大军□寨给刍秣未绝怀敏即离军夜至安远堡比一□庚寅领大军自镇戎军西南又先引从骑百余以前走马承受赵政以为距贼远不可轻进怀敏乃少止□养马城曹英及泾原都监李知和王保王文镇戎□李岳西路都监璘等分兵屯镇戎城六里夜则入城自守凡三日至是亦趋养马城见怀敏闻元昊徙军新壕外乃议质明掩袭赵珣谓怀敏曰贼远来利速战其众数倍锐其为今之计且以奇制之宜依马栅城市栅扼贼归路固守镇戎以便饷道俟其衰击之可必胜不然必为贼所屠怀敏不听命诸将分四路趋定川寨刘湛向进出西水口赵珣出莲华堡曹英李知和出刘璠堡怀敏出定西堡既而知和与英督军夜发辛卯刘湛向进行次赵福新堡遇贼战不胜保向家峡而赵珣曹英李良臣孟渊等将趋定川怀敏且令援赵福堡未行谍言贼已屯边壕上复召珣等入定州会李知和麾下蕃落将报贼五千人留定川寨北顷之王文李知和定川寨主郭纶又报已拔栅踰壕怀敏命赵珣与其子宗晟先行日几午怀敏入保定川寨贼毁版桥断其归路别为桥十四道以过军环围之又绝定川水泉上流以饥渴其众刘贺帅蕃兵斗于河而不胜余众溃去怀敏为中军屯寨门东偏曹英等阵东北隅贼自偏江川业变会出四面俱至先以锐兵冲中军不动回击曹英黑风自东北起部伍相失阵遂扰士卒攀城堞争入城面被流矢仆壕中怀敏所部兵见之亦奔骇怀敏为众所拥蹂躪几死輿至瓮城久之乃苏怀敏选士据门桥□败于镇戎葛怀敏败于渭州贼声益震然所以复守巢穴者盖鄜延路屯兵六万八千环庆路五万□万秦鳳路二万七千有以牵制其势故也冬十□西鄜延钤辖西京作坊使贵州刺史王信为保州刺史本路部置鄜延都监西上合门使狄青为秦州刺史泾原部署泾原都监兼知原州左藏库副使景泰为西上合门使本路钤辖兼知镇戎军皆赏其破贼功也

后三日信及青各本路经畧安抚使招讨副使始贼以兵十万分二道一出刘璠堡一出彭阳城入攻渭州葛怀敏援刘璠战崆峒北败没贼踰平凉至潘原泰率兵五千从间道赴援而先锋左班殿直张迥逗遛不进泰斩以徇遇贼彭阳西裨将夏侯观以为众寡不敌欲退守彭阳泰不许乃依山而阵未成列贼骑来犯短兵相接泰阴遣三百骑分左右翼张旗帜为欸兵贼徘徊不进欲遁去将校请进击泰止之遣士搜山果得伏兵与战遂斩首十余级先是以西边将有战功特召见之环庆都监宫苑副使范全入奏近制知天都左右厢点兵然未知寇出何路上曰适有边奏已犯高平军刘璠堡可乘驿亟往遂迁礼宾使荣州刺史环庆钤辖手诏趣范仲淹麾下起兵赴援令昼夜兼行比至平凉贼已解去狄青时亦被召会贼寇渭州急乃命图形以进辛亥以环庆路都部署经畧安抚沿边招讨使龙图阁直学士左司郎中兼知庆州范仲淹秦鳳路部署经畧安抚使沿边招讨使秦州观察使知秦州韩琦并为枢密直学士右谏议大夫鄜延路都部署经畧安抚招讨使龙图阁直学士吏部郎中兼知延州龐籍为左谏议大夫葛怀敏败贼大掠至潘原關中震恐居民多窜山谷间仲淹率众六千由邠泾援之知贼已出塞乃旋帝始闻定川事按图谓左右曰若仲淹出援吾无虑矣奏至帝大喜曰吾固知仲淹可用亟加职进官仲淹以西师久无功密疏乞赐贬降以谢边陲辞不受命不听琦初拜观察使独不辞曰吾君方忧边岂臣子择官之时乎而仲淹等累辞未听琦奏乞并罢所受且言恐不知臣者谓他路辞之为得宜臣则壮年贪禄而已会有诏令琦为枢密直学士兼侍御史琦又言朝廷定着不可以思乱皆不听至是乃还旧职又迁其官琦辞所迁官曰臣得还旧职固荣矣贼犯邻境臣虽督遣援兵实无毫发之助官不当复迁不听癸丑贈怀敏等官有差怀敏通时事善候人情故多以材荐之及用为将而轻率昧于应变遂至覆军丁卯泾州观察使知渭州王沿复为龙图阁直学士刑部郎中降知号州坐怀敏之败也沿始教怀敏驻军瓦亭及怀敏趋镇戎沿驰书戒勿入第背城为寨以羸师诱寇至发伏击之可有功怀敏弗听进至定川果败寇乘胜直犯渭州沿率州人乘城多张旗帜为疑兵先是沿子豫谓怀敏非将才请沿奏易之不听故及此三年正月癸巳延州言元昊遣伪六宅使伊州刺史贺从勗来纳欸【议元昊纳欸事见经制西夏要畧门】庚戌右正言知制誥梁适假龙图阁学士左谏议大夫使延州与龐籍议所以招怀元昊之礼也于是许贺从勗赴阙癸卯著作佐郎签书保安军判官事邵良佐假著作郎使夏州先是良佐与贺从勗詣阙馆于都亭西驂承受使臣取元昊书中书枢密院諭从勗以所賚来文字名体未正名上一字又犯圣祖讳不敢进却令賚回其称男情意虽见恭顺然父子亦无不称臣之礼自今上表只称旧名朝廷当行封册为夏主賜诏不名许自置官属其燕使人坐朵殿之上或遣使往彼一如接见契丹使人礼如欲差人于界上承领所賜亦听之置榷场于保安军岁賜绢十万疋茶三万斤生日与十月一日賜賚之许进奉干元节及贺正其沿边兴复寨栅并如旧仍命袁佐与从勗等同往议定以闻乙酉元昊复遣吕你为定幸拾寮黎罔聿口与邵良佐俱来所要请凡十一事其欲称男而不为臣犹执前议也

丙戌元昊始称臣自号夏国主复遣尹与则杨守素来议事鄜延经畧司言西贼寇青涧城宣武副都头刘岳等与战败之诏功第一迁两资次迁一资四年冬十月初元昊以誓表来上其词曰两失和好遂历七年立誓自今愿藏盟府其前日所掠将校民户各不复还自此有边人逃亡亦无得袭逐即以归朝廷岁赐乞如常数无致改更臣更不以多事干朝廷今本国自独进誓文而辄乞俯颁誓诏盖欲世世遵承永以为好倘君亲之义不存或臣子之心渝变使宗祀不永子孙罹殃庚戌赐誓诏曰朕临制四海廓地万里西夏之土世以为胙今乃纳忠悔咎表于信誓质之日月要之鬼神及诸子孙无有渝变申复恳至朕甚嘉之俯阅来誓一皆如约所宜明谕国人藏书祖庙乙未册命元昊为夏国主更名曩霄其文曰咨尔曩霄抚爱有众保于右壤惟尔考服勤王事光启乃邦泊尔承嗣率循旧物向以称谓非正强侯有言鄙民未孚师兵劳戍而能追念前眚自归本朝胜章累请遣使系道忠悃内奋誓言外昭要质天地暴情日月朕嘉尔自新故遣尚书祠部员外郎张子奭充册礼使东头供奉官阁门祗候张士元充副使持节册命尔为夏主永为宋藩辅光膺宠命可不谨欵赐对衣黄金带银鞍勒马银绢茶等物改所赐敕书为诏而不名许自置官属置推场于保安军及高平寨第不通青盐然朝廷每遣使往馆于宥州闕律则来贺正旦自是岁以为常时律则以留延州议事故后时也甲申诏曰朕以元元之故已赦曩霄罪复许为藩臣约誓寝兵与之更始朕念兴师以来陝西士暴露良苦民疲转饷其降击囚罪一等杖笞释之边民赐缗钱民去年逋负举皆勿责蠲其租税之半麟府州常为羌所寇掠除逋负视此进士一举诸科两举并与免今年取解五月夏国主曩霄遣使来谢册命八月诏陝西河东严戒邊吏毋得輒有生事辛未诏班厯于夏

太平治迹统类卷七

●钦定四库全书

太平治迹统类卷八

(宋) 彭百川 撰

仁宗经制西夏要畧

景佑元年十二月屯田员外郎张亢者奎弟也豪迈有奇节常通判镇戎军上言赵德明死其子元昊喜诛杀势必难制宜亟防边论西北攻守之计章疏十上上欲用之会丁母忧竇元二年甲寅知延州郭劝落职知齐州鄜州李渭降尚食知汝州坐不察寇情也朝廷虽知元昊犹善遇其使初议诛元昊使者叅政程琳以兵交使在其间宜善遣之王德陈执中皆欲执其使盛度等不可卒遣之三月壬寅右正言吴育言畧曰伏望陛下从容延对左右大臣讨论阙政博访羣议修节用爱人之道求训兵练将之策则一方小警不足虑也上嘉纳之丙午吴育又言圣人统御之策夷夏不同虽有戎虜之君向化宾服终待以外臣之礼羈縻勿絶而已一有背叛来则御之去则勿追盖异俗殊方非隶版籍不足责也今元昊若止是款邊当置不问若已见叛状必须先行文告以诘其由不比中国叛臣即加兵讨大凡兵家之势征讨者贵在神速守御者利在持重况夷狄之性惟



事剽掠因而伪遁多误王师武夫气锐轻进贪功或陷诱诈之机今宜明烽候坚壁清野以挫剽急之锋徐观其势此庙堂远筭也初元昊反书闻朝廷即议出兵羣臣争言小丑可即诛灭育独建议元昊虽名藩臣其尺赋斗租不入县官窘汉之外服叛不常宜外置之示以不足责且彼已僭輿服夸示酋豪势必不能自削宜援国初江南故事稍易其名可以顺抚而收奏入宰相张士逊笑曰人言吴正言心风果然于是育复奏俱不报癸卯贾昌朝上书畧曰今西夏僭狂出师命将以遗朝廷之忧臣谓此不足虑而国家用度素广储蓄不厚民力颇困是则可忧自天圣以来屡诏有司节省用度至今未闻有所施行又云宋受命八十载可谓治平矣然节爱之术有所未至邊邮虽宁兵备不省徭役虽简农务不笃外厚币聘内丰廩假自余虚用冗费难以悉数愿陛下鉴已往之失察当今之务取景德以来迄于景佑凡百用度靡有巨细校其出入之数约以祖宗旧制其不急皆省罢之诏枢密学士张若谷右谏议任师中右司谏韩琦与三司详所奏定夺省减以闻真定都部署夏守贇上召用之入见帝问西事守贇曰平时所屯兵马不及千余第可御草寇耳贼兵猝至固守不暇安能出鬪耶且并兵扼冲要伺便邀击可以成功帝然之韩琦言减省浮费当自禁宫始诏从之六月丙寅遣鲁絶持诏论嘉勒斯賚使击元昊卒不能也先是诏陝西安抚龐藉谕旨如永兴夏竦议西鄙事丙子竦言畧曰臣以为不较主客之利不计攻守之便议追讨者是为无策若缮治地垒修利器械约束将佐控扼险要但迁延于岁月不预计于胜负是今之常制也谨上十策一教习强弩以为奇兵二羈縻属羌以为藩篱三诏嘉勒斯賚父子用力破贼四度地形险易遠近寨栅多少军士勇怯而增减其兵五诏诸路互相应援六募土人为兵号神虎保捷州各一二千人以代东兵七增置弓手壮丁猎户以备城守八并邊小寨毋积刍粮贼攻急则弃小寨入保大寨以完兵力九關中民坐罪若入过误者许入粟赎罪铜一斤为粟五斗以贍邊计十损并邊冗兵冗官及减骑军以舒馈运当时颇采用之秋九月甲寅直集贤院富弼上疏言赵元昊反状有紊者六事云是六者岁月已久中外共闻天子不得知朝廷不为备养成深患遂此大骚此两府大臣之罪也臣今畧举八条止为戎事不论其它伏惟圣明详择一不斩其使以破其谋二今始用武不遽练军以惊众三不当惜内府而取于民四不当限官而举士五马遵之赏薄不足以激劝六购募元昊科格无益七宜罢免夏守贇之职而别选才能八不接见武臣非所以广接纳十一月修起居注宋祁上疏论三冗三费冗兵冗官僧道斋醮薰修之费寺观卒徒官司之费使相接度之费时陝西用兵调费日促又言人不率则不从身不先则不信陛下若能躬服至俭风示四方衣服醪膳无溢旧规请自乘輿始锦彩珠玉不得妄费必自宫掖始天下向应民业日丰人心不摇师复可举虽使风行电照饮马西河蠢尔戎首可玩之掌股中矣闰十二月直史馆蕪绅陈八事一重爵禄二遴选择三明荐举四异服章五适才宜六择将帅七辨忠邪八修预备欲预备之道莫若安民而厚利富国而足食欲民之安则为之择守宰明教化欲民之利则去兼并禁游末恤其疾苦寬其徭役则民安而利久欲国之富则崇节俭尚质素蠲浮费欲食之足

则省官吏之冗去兵食之蠹絕奢靡之弊书奏帝嘉纳之绅又请诏西邊为入讨之计云以十年防守之费为一岁攻取之资其论利害甚多知延州范雍言西邊守御利害知制诰叶清臣论西邊兵备虚弱鄜延环庆副都统刘平上攻守之策云请召夏竦范雍与两府大臣议定攻守之策令邊臣遵守初夏竦请置土兵易戍兵东归令既下知河中府杨偕言不可朝廷下竦议竦奏土兵其利六虑有小人不忠以谋非出己曲要破壞果有杨偕上书荧惑圣聽但偕所言以少击众乃虚语若偕能之乞命以代臣尽減邊兵千人留百官留十果以此平凶蕩寇即乞不次旌赏如其不能亦乞严遣以戒逸慝诏以竦章示偕偕奏云臣之所陈盖谓增兵习既不精徒费国用虜未平而中国先困竦乃以臣为不忠此其用意非独欲中伤臣亦欲傾朝廷大臣也古人以少擊众不可胜数今竦在泾原守其城垒不闻出师何用兵众盖竦意战或败衄则欲以兵少为辞又云兵不条土地系将帅训习抚养激励之如何尔竦议遂屈

康定元年二月宋庠请严守备潼關从之諫官富弼言天子守在四夷今自潼關以西弃之耶己丑富弼言自古以来以内臣监军取败非一今入内副都知王守忠为陝西都鈐辖与之何异愿罢守忠勿遣不聽宰臣张士逊请遣使安抚陝西于是起居舍人韩琦自蜀归论西兵形势甚悉即命琦为陝西安抚使上谓琦曰夏人猖獗官军不习战数出无功今因小警乃开后福乙巳诏京畿京东西淮南陝西路括市战马韩琦言陝西科扰频仍民不胜其困请免此一路以安众庶从之丁酉诏枢密院自今邊事并与宰相參议富弼言邊事系国安危不当专委枢密院乞如国初令宰相兼枢密上取其言降是诏丙午改元悉许中外臣庶上封事朝政得失自仲淹贬禁越职言事富弼因论日食谓应天变莫若通下情愿下诏求直言除越职之禁上嘉纳焉丁未诏韩琦与运司量民力蠲所科刍粮调民修筑城池具数以闻当加优恤将佐懦怯并令罢去停诸州上供之物数十万时庆州陈叔度陈邊防策补官东南琦奏曰士忠义愤懣为国献计置之僻左何得自効非所以来人才也诏皆从邊任己酉知延州范雍言昨朝廷询臣深讨之计臣未知深入之利又言借援契丹令举兵为犄角庶此贼可灭如得银夏绥宥等州每岁增契丹賜千万可以破借助之谋也范雍降知安州坐失刘平石元孙也时贼围塞门安遠寨琦奏乞留雍以安众心若谓雍节制无状宜召越州范仲淹委任之丙辰内出手诏俾大臣条陝西攻守之策庚申再降郭劝李渭言者以二人不当拒絕山遇使故也同知枢密院事陈执中言畧云李士彬族破而沿邊篱落壞宜选阁门祇候为寨主以补其阙抚存熟羌云邊兵小屈皮肤之忧民力之窘腹心之患也臣请首修缘邊城池其次邊如延州之鄜同环庆之邠宁不过五七处量为营葺则科率既減民力稍蘓仍須增土兵減骑卒土兵增则守御有備骑卒減则转饷可蠲优秩之科以诱兼并寬茶盐之利以足编氓静守以骄其志蓄锐以挫其锋更須主张将臣使横议不入则忠臣得以尽节虎士得以忘生时手诏谕访执中既会议上对退复奏此上嘉纳之起居注吴育言比常建乞通回纥以破昊贼宜募机辨有胆畧者使多方招诱散离其党此伐谋之要也壬申以达州刺史高

志宁为河北安抚使元昊初反志宁时知隰州上言请乘贼未发选骁将锐兵分道急趣覆其巢穴所谓迅雷不及掩耳章疏十上不报徙知贝州刘平石元孙陷贼志宁叹曰前策不可复用矣朝廷始思其言即日召至阙问今宜为何策志宁曰今将不达权兵不识法制故败请以古阵法教之诸帅以今所习异不肯用志宁又言元昊与契丹通宜为备故命之俾经畧云三司使晏殊在三司请罢内臣监兵不以阵图受诸将乃募弓箭手教之以备战鬪又请出宫中长物助邊费凡他司之领财利者殊奏悉罢还度支事多施行宋綬在河南画十策以献帝初诏询攻守之策至是召之同管枢密知永兴杜衍权知开封府西邊用兵民苦调发吏或促辨因以侵渔衍为之区处条画量物有无贵贱道理远近寬其朝会使得次第输送永兴比他州民费省半范仲淹知永兴军始用韩琦之言也诏举才任将帅以名闻从富弼之言也己卯诏昊遵路籍河东乡丁为边备又不其法于诸路以遵路常建议复兵民也癸未殿中侍御史文彦博言西鄙用兵将权不可不专军法不可不峻故对敌而伍中不进者伍长斩之伍长不进什长斩之什伍之长尚得专杀统帅之重不能诛一小较军中之令可谓隳矣国朝着令禁军将校之有过宜从中覆施之于平居无事之时今邊防用兵逾十数万将不专权军不峻法何以御人哉上嘉纳之陝西安抚使韩琦上疏言御捍之备宜以鄜延为先鄜延若有重兵必无深入之患次以环州最逼贼境为今计者莫若分河中同州锐兵三五千进屯鄜州选才望大臣履本路经畧之任兼知鄜州处置邊事令张亢充本路钤辖鄜州驻扎用朱观知环州差葛怀敏充环庆部署其沿边城寨自来系广屯兵马之处外其余小寨栅并兵入城只留人员兵士三二十人以为斥候量事更差弓箭手防护沿边都监路分等之阙即令选差沿边州军招置蕃落保捷等指挥不必拘定等秩但以人才壮勇堪任披带者充上嘉纳之康定元年夏四月大理寺丞秘阁校勘石延年往年往河东路同计置催促粮草明道中延年常建言天下不识战三十余年请选将练兵为二边之备不报及西边数警始召见命昊遵路使河东时方用延年之说藉乡丁为兵也己亥陝西安抚使韩琦等言庆涇鄜三州调民修城有妨农种请听富民自雇人大修筑量工与官【三万工齐即五万工监薄七万工薄尉八万伪备职十五万工奉职】乙巳诏运使河北姚仲孙沿边安抚高志宁密下诸州军招募土兵从王拱辰之言也【拱辰奉使还言寇不畏官兵畏土兵故降是诏】范仲淹未至永兴癸丑改为陝西都运使御史知杂高若讷知永兴军谏官梁适言仲淹前责若讷为谏官诋仲淹谋事疎阔宜易以近任上曰朕方任仲淹若讷强事固当体朕委寄之意诏諭之若讷寻留判流内途壬戌吕夷简自天雄复入相即使李迪代之士逊罢政甲戌陝西都转运使范仲淹言于边城寨有五七分之备關中之备无二三为今之计莫若严边城使持久可守实關内使无虚可乘西则邠凤为环庆仪渭之声援北则同州河中控扼鄜延之要害东则陝兰华州据黄河潼關之险中则永兴为都会之府各须屯兵三二万人若寇至则使边城清野不与战關中少实岂敢深入复命五路修攻取之脩张其军声分彼贼势使弓马之劲无所施牛羊之贵无所售二三年间彼自困弱待



其众心离叛有间隙则行天讨此上策也戊寅夏竦为经畧安抚招讨永兴军己卯韩琦为陝西都转运使范仲淹并为陝西经畧安抚副使初仲淹与夷简有隙及议加职夷简请超迁之上悦以夷简为长者既而仲淹入谢帝谕仲淹使释前憾仲淹■〈去页〉首曰臣向所论盖国事夷简何憾也知同州龐藉为陝西都转运使藉常上言宜裁酌三官之赐以励战功则寇不足平【医官内官末官】丁亥以任福为环庆副都部署知庆州听便宜从事龐藉言今已废并边小寨自今缓急有言并令互为应援从之帝常问丁度御戎之策度奏曰今士气伤沮若窘追巢穴馈粮千里轻用人命非计之得也为今之计莫若谨亭陆逵斥候控扼要害为制御之全策因条上其策名曰徭边要览癸亥鄜延钤辖张亢手疏言御贼之策其后遂多施行者八月乙酉田况为陝西经畧安抚司判官胡瑗为经畧安抚司勾当公事况从夏竦瑗从仲淹辟也庚戌仲淹兼知延州先是有诏分边兵部署领万人钤辖领五千人都监二千人有寇则官卑者先出仲淹曰不量众寡出战而以官为先后取败之道也分州兵为六将将六千人分部教之量贼众寡使更出御贼贼不敢犯既而诸路皆法焉贼相戒曰无以延州为意今小范老子腹中自有数万兵甲不比大范老子可欺也大范指雍云九月都官员外郎景泰为左藏库使泰普州人元昊未发言今主将率任军伍无长策器械钝缺士卒惰窳城池不修资粮无备一旦有警何以应敌不报已而元昊果反泰复上边城要畧二十卷平戎策十五篇于是有荐泰知兵者称旨换秩知宁州庚午种世衡知延州青涧城安远寨门既陷贼东路无藩篱贼益内侵世衡言于仲淹请营救宥州州西南直延安二百里当贼冲右捍延安左可致河东粟北可图银夏仲淹为请于朝诏世衡即废垒具筑城成赐名青涧开营田二十顷募商贾贷以本钱使通货得利城遂富实间出行部族慰劳酋长或解与所服带常客饮有得寇事情者即予饮器由是属羌皆乐为用无定河蕃部钞边率属羌讨击斩首数百壬午韩琦以三川寨诸将败书闻且言刘继宗王珪等宜量贷其罪以责后効从之冬十月甲午赐泾原都监王珪名马二匹黄金三十两裹疮绢百疋仍遣使抚谕之下诏暴其功塞下以励诸将劝金字处置牌赐之使得专杀初晁宗憲等至永兴议边事夏竦等合奏今兵与将尚未习练但当持重自保安俟其侵轶则乘便掩杀大军盖未可轻举及刘承宗败上复以手诏问师期竦等乃画攻守二策遣副使判官尹洙至京师求决于上乙巳诏鄜延泾原两路取正月上旬进兵入讨西贼上与两府大臣共议始用韩琦所画攻策也枢密院杜衍以为侥幸出师非万全计不听馆阁校勘欧阳修上书言便宜三事通漕运画地利昔之画地利者易为攻今之言财地者难为术昔之民赋税而已故其不足而铸山煮海推酒与茶征關市而筭舟车尚有可为之法以苟一时之用自汉迄今其法日增其取益细今取民之法益尽矣昔日赋外之征以备有事之用今尽取民之法于无事之时悉以冗费而縻之矣至卒然有事则无法可增三曰权商贾丁未诏括驴以备征讨从陝西经畧司所上攻策也庆厯元年正月朝廷既用韩琦所画攻策先戒师期知延州范仲淹言攻守利害云臣所乞存此一路者一则惧春初气寒士寒愈怯二则恐隔絕情意

偃兵无期若施臣之鄙计恐是平定之一端苟岁月无效遂举重兵取绥宥二州择要害而据之屯田营兵为持久之计如见财用门时陈执中亦不欲出兵此茶山横山可以招降戊午诏从仲淹所请仲淹又言鄜延路入界比诸路最远若能修复城寨却是远图前后凡六奏卒成承平等十二寨蕃汉之民相踵复业壬戌遣使安抚诸路王尧臣将行请曰关中之民雕疲为甚请称诏劳来乃谕以贼平蠲租二年从之是月元昊使人于泾原乞和又遣寨主高延德诣延州与仲淹约言已知至保安军仲淹见延德察元昊未肯顺事且无章表不敢闻于朝乃自为书谕以顺逆遣监押韩周同延德还抵元昊二月夏竦言出兵利害诏以竦奏示仲淹龔藉言畧曰臣藉度朝议以大兵屯聚已久上费国力下困民生欲决于攻取之计其如将佐士卒未能如意或且为岁月持守之备汰去冗兵只留精锐者在边数少则费用日宽兵精则足以御捍举凡贼地所产之物严法以绝之使不得与边人市易既劫掠无所通则其势必日蹙如益更练将卒俟其衅隙可乘然后大举庶几有万全之策陕西签书判官田况言不可出兵者七事韩琦言今入夏将半月渐有暑气必难进兵且令诸路置办军需训敕兵马俟秋初三月任福既败朝议悉欲罢诸路行营之号明示招纳使贼骄怠仍密收兵深入讨击诏仲淹体量士气勇怯如可驱策前去乘机立功仲淹言以臣所见延州路乞依前奏且修南安等处三州废寨安存熟户并弓箭手以固藩篱又云今乞且未可进兵必恐虚有劳弊守犹虑患岂可深入臣非不知不从众议得罪必速然而成败安危之机国之大事臣岂避罪于其间哉臣非不能督主兵员外须令讨击不管疎虞败事之后谋之何济惟圣慈念之行营号卒不罢兵亦不复出元昊始将兵未动朝廷即欲讨之通判睦州张方平上言国家自景德以来既与契丹盟天下无备将不知兵士不知战民不知劳殆三十年矣若骤用之必有丧师蹙将之忧兵连民困必有贼盗意外之患当含垢匿瑕顺适其意使未有发得岁月之须选将励士坚城备器为不可胜以待之虽元昊终于必叛而兵出无名吏士不直其上难以决胜小国用兵三年不见胜负不折则破我以全制其后必胜之道也方平所议盖与吴育同议者皆不谓然既交兵天下骚动方平又献平戎十策大畧以兵地千里我分而贼专虽屯兵数十万然贼当至以一击十必败之道也既败而图之则老师费财不得为己宜及民力之完屯重兵河东示以形势贼入寇必自延渭而兴州巢穴之守虚我师自麟府渡河不十日可至此真所谓攻其所必救形格势禁之道也宰相吕夷简见之谓叅知政事宋綬曰大科得人矣然不果用其策夏四月韩琦降知秦州任福败军琦上章自劾会夏竦奏福违琦节度取败罪不在琦上知之手诏慰琦范仲淹降知耀州职如故大臣言仲淹不当辄与元昊通书又不当辄焚其奏宋庠言于上曰仲淹可斩也杜衍曰仲淹之志盖忠于朝廷欲招内叛羌尔何可深罪夷简徐助衍言孙沔亦上言辨上悟乃薄其责诏陕西经畧安抚招讨知永兴夏竦屯鄜州同知永兴军陈执中屯泾州时两人议边事不合分任之壬申范仲淹知庆州兼管勾环庆部署司事初元昊反阴诱属羌为助环庆酋长六百人约与贼为乡道后呈首露犹环去就仲淹至部即奏行边以诏书犒赏诸羌阅

其人马立条约诸羌受命悦服自是始为汉用签书判官田况上兵策十四事一罢行族以严守备二募民兵以增屯戍三择大将以明部分四募死士以去贼手足五宽盐禁以招抚属户益步卒以减骑军严军法毋轻易主将给米造酒犒士卒精器甲治器用以为守城之备上嘉纳之己亥陝西体量安抚使王尧臣言四路沿边所守地界约二千余里屯兵二十万凡贼三至而三胜由众寡之势不侔彼常以十战一我常以一战十其为胜负甚明今须较四路之势因其地形益屯兵马以待其来四路之中泾原为急须益兵三万屯渭州以备出战为镇戎山外之援以万人屯泾州控扼要会为泾渭声势如此则可以杜深入之患益兵二万于环庆二州屯近边城寨来则合力以战居则分头以守亦足以制贼之冲突也其次兰州合秦州所管兵马共二万七千分屯诸城寨外土兵不及万虽然验其事形若有所恃倘用御捍亦未为全胜之师必须益兵万人分屯安远诸寨清水县以扼东西之来路寇至则据险守隘以塞其前出山外之兵以要其后必未能为边患也尧臣又言范仲淹韩琦皆天下才其忠义智勇名动夷狄不宜以小故置散地任福坐违节度不可径责主帅由是忤宰相意他议皆沮不行又言招抚蕃部熟户从之秋七月鄜延都钤辖张亢言太平日久人不知兵自元昊叛逆以来民力雕疲边机军政措置未得其宜陈所宜十事不报命蒋偕与环庆都监王懷端同招抚蕃落用田况之言也辛卯范讽知陝州入见上言元昊不可擊独以兵守要害捍侵掠久当自服倘内修百度躬节俭如祖宗故事则疆事不足为陛下忧知諫院张方平言伏见宣差朝臣分路往陝西河东京东西路到前来点差弓箭手强壮分募愿充军分配宣毅保捷指挥者臣窃思此举事系安危谨列不便者六事疏入不报寶元初青州人赵宇上书言元昊必反宰相以为狂妄置福州及元昊反所部弗拘遂逃至京师复上书言刘平勇而无谋必败宰相益怒下开封令府司以在官无故亡法劾宇司録陈希亮奏乞取所上书付所司治使其言验不当加责宇由此得释刘平既败乃授宇青州司马宇复上大衍阵图及系说七篇己未以为环州军事推官辛酉韩琦复官知庆州范仲淹复为户部郎中上疏畧云西贼叛命以来言边事者盖以万计皆人持所见献忠于上而朝廷益务听纳纖悉必行其间大抵欲保疆守境爱民省用者多矣入保城寨则边民重迁苦其屠掠尽徙内地则诸族属户皆为贼合沿边城寨数百里外田野一空惟存孤垒则岁计粮草从何而出贼既知无后患席卷深入關辅根本能不摇乎爱民省用则贼势未弭边害滋大日朘月削所伤益多斯皆利于近而局于遠顧其小而遗其大若为国家长久之策则不然夫以祖宗之德业陛下之仁圣天下之事力而使小寇常遂并兵之一策不敢与较但谓彼众我寡为蹙境弃民之策岂不惜哉臣所以尽忠忧国岂忍隱而不言今鄜延泾原环庆三路防驻扎防守兵马之外可以各那一万人聚于鄜庆渭三州臣今为陛下计者莫若于三州各更益兵三万人拔用有勇畧将帅三员统领训练预先分定部曲遠设斥候于春秋西城举动之时先据要害贼来则会驻扎之兵观利整阵并力击之又于西贼未甚点集之际出三州已整之兵浅入大畧或破其和市或招其种落或更筑垒拓地广招强人别立经制



以助西军属户有助贼者即会兵密行破荡诸族见此地势自然无去就之意渐可驱使既不能为乱则可以严青盐粟帛之禁勿使与贼交通朝廷节俭省费倾内帑三分之一分助边用以金帛赐逐路帅臣使行间觐贼则动静先知遇盛暑则那次边就食粮草如此则二三年间贼力渐屈平定有期诚暂劳永逸之筭也冬十月丁亥知并州杨偕请建新麟州谓迁则有五利不迁则有三害云麟夏二州唐汉古郡一旦弃之一麟州何足惜哉上谓辅臣曰麟州古郡也咸平中常经寇兵攻围非不可守今遽欲弃之是将退而以黄河为界其谕偕速修复宁远寨以接麟州夏竦陈执中俱罢竦判河中执中知陝州始分陝西为四路秦州韩琦渭州王沿庆州范仲淹延州龐藉并兼本路马步军都部署经畧安抚沿边招讨使十一月丁未高继宣知并州河东路经畧安抚沿边招讨使代杨偕也偕列六事一罢中人预军事二徙麟州三以便宜从事四黜冗帅五募武士六专补授且曰能用臣言则受命不然则已朝廷难之奏不上罢知邢州田况欲于镇戎原渭之地大兴营田以纾边计是月梁适自陝而还仲淹附攻守二议攻则欲进筑城寨以据其地守则欲兴屯田以息转输之患云国家用攻则宜取其近而兵势不危用守则必图其久而民力不匮然后有文帝和乐之德无孝武哀痛之悔天下幸甚【律书载汉文且无议兵事】十二月韩琦自前日山外之战诸将多亡没所部兵众今不立法制则各务生全若人数不多则军法可必行请陝西河东诸路部署许置亲兵百五十人钤辖百人招讨都监等七十人月各给钱二百其出师临敌主将亡败者并斩仲淹奏朝廷差除中使督促诸路轻易入界之失二年春正月仲淹奏请给枢密院官及宣徽院空名头子者各百道缓急书填以劝赏战功及招降蕃部从之布衣雷藺夫隱居不仕枢密杜衍荐之召见论边事甚辨上悅令中书检真宗用种放故事吕夷简言士大夫有口才者未必能成事也姑试之乃以为校书郎知庆州范仲淹奏攻守二议诏荅以将帅累经挫衄未甚勇果若幸于或胜恐非良筹假令克获又烦守备若且勤于训练严加捍御遠设探候制其奔冲见利以进观衅而动庶可以养锐持久卿宜深体此意与邻路互相应援叶心毕力有便宜密具以闻仲淹复奏畧曰今臣领庆州日夜思之攻有利害守有安危攻其遠者则害必至攻其近者则利必随浅近进筑守以土兵则安守以东兵则危攻宜取于近而兵势不危守宜图其久而民力不匮招纳之策可行其间诏陝西诸路参议以闻知秦州韩琦请降枢密空名宣头五十道以赏属羌有功者从之是春范仲淹巡边至环州州属羌阴连寇为边患仲淹谓世衡素得属羌心而青涧城已坚固乃奏世衡镇抚之龐藉请留世衡诏仲淹更择人仲淹言属羌非世衡不可懷诏从仲淹所请世衡令诸族置烽火有急则举燧介马以待又课吏民财有过失射中则释其罪由是人人皆精于射寇不敢复近环州世衡在青涧为属吏所讼以不法事按验皆有状龐藉言世衡披荆棘立青涧城若一拘以法则边将无所措手足诏勿问及徙环州詣藉拜且泣曰世衡心肠似石也今日为公泪下矣己亥以韩琦为秦州观察使王沿为泾州龐藉为鄜州仲淹为汾州并观察使【夏四月】五月甲寅诏三馆臣寮上封事及听请对欧阳修上疏言三敝一不谨

号令二不明赏罚三不贵功实五事一曰兵二曰将三曰财用四曰御戎之策五曰可任之臣冬戊辰中丞贾昌朝上疏言太祖初有天下监唐末五代藩镇武臣土兵牙校之盛尽取其权当时以为万世之利今羌西之叛亦选择将领鸠集士农士不素练固难指纵将未得人岂免屡易以屡易之将驭不练之兵故战必致败此削方镇过甚之弊也又言方今备边之尤切者六事一驭将帅二复土兵三训营卒四制戎狄五绥蕃部六明探候始昌朝馆伴契丹使者建言和亲辱国内地尺不可许朝议欲以金帛啖契丹使攻元昊朝昌曰契丹许我而有功则责报无穷且以我市于元昊昔唐结质欲助唐讨朱泚而陆贽以为不可后乃知吐蕃阴与泚合今安知契丹计不出此耶于是命昌朝报使契丹昌朝力辞因奏此疏上嘉纳之原州属羌明珠灭藏二族兵数户与元昊首尾隔绝邻道范仲淹闻泾原欲袭讨之乙巳奏言二族道险不可攻前日高继嵩常以丧师平时犹虞反侧今讨之必与贼为表里南入原州西扰镇戎东侵环州边患未艾也宜因昊贼别路大入之际即并兵北取细腰卢泉为保障以断贼路则二族自安而环州镇戎经道通彻可以无忧矣后二岁遂筑细腰葫芦诸寨帝以泾原伤夷欲令范仲淹与文彦博对易遣内侍王懷德喻贽仲淹谢曰泾原地重臣恐不足以独当愿与韩琦同经畧泾原并驻泾明琦兼秦凤臣兼环庆一则夷夏稍安事不亟易二则泾原有警臣与韩琦可合秦凤环庆之兵犄角而进若秦凤环庆有警亦可率泾原之师以相应援三则通修环州镇戎诸寨藉此两路事力必能速有成功四则臣共韩琦日夜计议选练兵将渐复横山以断贼臂不数年间可期平定愿诏龐藉兼领环庆以成首尾之势秦州委文彦博庆州用滕宗谅总之孙沔亦可办集渭州一武臣足矣于是复置陝西四路都部署经畧安抚兼沿边招讨使命韩琦范仲淹龐藉分领之仲淹与琦开府泾州而徙彦博帅秦宗谅帅庆皆从仲淹之请也初葛懷敏军败于定川诸郡震恐宗谅顾城中兵少乃募农民数千戎服乘城又募敢勇谍知贼远近形势报旁郡使为备会仲淹引环庆兵来援时天阴晦者十日人情忧沮宗谅乃大设牛酒迎犒士卒又藉定川战没者哭于佛祠祭酹之因厚抚其孥使各得其所欲于是士感发增气边民稍安故仲淹荐以自代校理余靖言秦州非韩琦不可守彦博新进懷德无闻不报辛卯诏新知永兴郑戡兼管勾陝西转运司计度粮草公事戡建言军行所须愿下有司相折为三等非急切罢去十二月庚午泾原安抚使王尧臣言今体量定川之败其失有四望勅边臣深鉴前败不可更馱士旅以陷败机世衡用间元昊欲和不錄三年春王尧臣至陝西言见鄜延环庆路地有险固而易以守惟泾原则不然自汉唐以来为戎狄之冲臣畧论一路五州军城寨控扼要害及贼径交通之处备御之策凡五事望下韩琦范仲淹相度施行之诏韩琦范仲淹龐藉凡军期不覆者皆便宜从事用安抚王尧臣之言也乙卯韩琦仲淹等言元昊遣人赴阙将议纳和臣等谓元昊如大言过望为不改僭号之请则有不可许者三如卑词厚礼从兀卒之称亦有大可防者三伏望圣慈于纳和御侮之间审其处置为圣朝长久之虑校理余靖言昊贼私差署官入境欲与朝廷通和臣愚料之以谓挫北人之气屈西羌之锐不如不和最为得

策或欲速成和好而屈名分则天下共耻之虽强兵在境有血战而已矣若他年贼自有衅来求和者权在于我则不必拒之也惟陛下裁之夏四月己亥资政殿学士兼翰林侍读学士富弼言今元昊遣其伪官持书欲议通好而外皆传言元昊未肯称臣昨闻宣传下西人所过州郡加迎候之礼又逐州通判就驿燕待之太过深恐其后难为处置失中国制御夷狄之术兼闻西使之来盖因契丹所喻元昊既稟畏契丹则朝廷可且持重纵使其议未合亦有后图大凡制事在于初初若失宜后难救正今日又闻西使入见赐与甚厚既许其伪补之珍则元昊自为得志臣去年使契丹与馆伴刘六符语将来若使元昊复称臣则本朝岁增金帛之馈初既不避此名今又未即如约受前耻而不获效甚可惜也今朝廷过有许可受忧有二事若契丹谓中国既不能臣元昊则岂肯受制于我必将以此遣使来未知以何辞答之也若契丹谓元昊本称臣于两朝今既南朝不称臣渐为敌国则以为独尊矣异日缘边隙复有所求未知以何术拒之臣晓夕思之二者必有一焉不可不早虑也余靖言臣窃见朝廷每遇契丹遣使到阙元昊差人来朝大臣商量惟欲秘密两制两省御史中丞已下虽名侍从供奉之官当时并不闻知及处置既了纵或不便无由论列伏思国家建置侍从之官以救阙失盖欲举无过事谋无遗策书不云乎谋及卿士谋及庶人谋及卜筮是事有大疑谋欲其广也汉武帝征伐四夷开置边郡侍从之臣数屈丞相汉始称之为美谈今柄臣密议外不得闻一虑或失救之不及势之可忧者也凡北狄西戎之事系于安危者侍从谏诤之官悉令闻之凡有利害不为漏泄传云谋之欲多断之欲独此御国之要也惟陛下善为裁择先是欧阳修言臣料国家今若不能曲从其言不如优宠其来人厚加礼遇元昊不免出兵攻寇逞彼忿心若是不受彼必自亏事体不若急修备以图胜算修虽有此议然朝廷更未之从也且元昊既未肯臣如定等来又多所要请两府司谏皆欲从之独韩琦以为不可屡合谢于上前晏殊曰众议已同惟琦独异上顾问琦琦历陈其不便上曰更审议之及至廷议琦称不可益坚殊变色而起复上章曰今西界遣人讲和其患有三望且令中书枢密院再三论难使朝廷得大体契丹无争端此议和庶为得策谏官蔡襄余靖言修又言臣谓方今不羞屈志急欲就和者其人有五一曰不忠于陛下者欲急和二曰无识之人欲急和三曰奸邪之人欲急和四曰疲兵懦将欲急和五曰陕西之民急欲和甲午枢密韩琦上疏曰臣闻汉文帝袭高惠承平之后躬行修俭国治民安刑措不用时贾谊上书言事尚以为可恻哭太息岂其过哉盖忧思深遽长久之计欲大汉之业垂于万世而无窘者今陛下绍三圣之休烈仁德远被天下大定民乐其生者八十余年矣而臣切睹时事可谓昼夜泣血非直恻哭太息者何哉盖以西羌北狄祸衅已成而上下泰然不知朝廷之将危社稷之未安也臣辄尽当今所宜先行者七事条列以献其大畧一曰清政本枢密院本兵之地今所主多奇碎渺末之务中书公事虽不预闻恐亦类此谓宜诏中书枢密院事有例者着为法可拟进者无面奏其余微琐可悉归有司得从容谋议赐对之际惟专务大事二曰念边事今政府循故事纔午即欲出稍留则恐疑众退朝食罢忽遽命书而去何暇议



及疆事哉谓宜须未正方出延此一时以专边论三曰擢贤才自承平以来用人以叙迁之法故遗才甚多近中书枢密院求一武臣代郭承裕聚议累日不能得谓宜仿祖宗旧制于武臣中不次超擢以试其能四曰备河北自北狄通好三十余年武备悉废近嫚书之至骚然莫知所为宜选转运使二员密授经畧责以岁月使营守御之情则我待之有素也五曰固河东前岁昊贼陷丰州掠河外属户殆尽麟府势孤絶宜责本道帅度险要建城堡省转饷为持久之计六曰收民心祖宗置内藏库盖备水旱兵革之用非私蓄财而充欲也自用兵以来财用匱竭宜稍出金帛以佐边用民力可寛而众心安矣七曰营洛邑【见迁都遠畧事】陈八事大畧谓当今救弊之术不过选将帅明按察丰财利抑侥幸进有能之吏退不才之官去冗食之人谨入官之路然数事之举谤必随之愿委信辅臣听其措置虽有怨谤断在不疑则纪纲渐振而太平可期二虑岂足为国之患哉上嘉纳之欧阳修言风闻韩琦以范仲淹已作参政欲自请行不知是否以臣愚见不若且遣仲淹速去琦与仲淹皆是国家委任之臣材职俱堪信用然仲淹以陝西军民恩信尤为众所推服若仲淹外捍寇兵而琦居中应付必能共济大事庶免后难谏官孙甫言切观西人议和其利一而其害有四利害之机安危之计愿陛下熟图之乙酉陝西宣抚使田况言自冬初诸路得谍者皆声言西界迤■〈迂里〉遇乞刚娘嵬等诸腹心谋叛贼事觉被诛国中大乱臣窃疑朝廷方遣使议和贼所希甚大若心实欲和则当夸示凶势幸我曲从以厌其私岂肯诈扬此声自见危弱此其势实衰而亟求倚附也若其国人果叛犹且倔强妄有干求不宜过有许予示四夷以弱如谋者所得皆诈则触谋懷毒志未可量虽尽副所求只是纳侮朝廷既恃和懈备贼羸形伺隙祸发所忽昔人所戒望与二府大臣熟思计其事其岁给不可优增也欧阳修言伏见张子奭奉使之贼中近已到阙风闻贼意虽肯称臣受册而尚有数事邀求朝廷未知如何处置今若只为臣下苟安之计则何必爱惜尽可曲从若为社稷久遠之谋则不止目前须思后患臣愿陛下询于议事之臣五事不录万一能有说焉非臣所及若其无说则天下之忧从此始矣又云西城虽和所利极鲜北戎若动其患无涯比臣前后非不切言今无及矣伏望陛下留意而思之戊申谏官孙甫言汉以金缯遣匈奴贾谊谓中国卑辱之甚遂致流涕今与一小蕃议和岁给之物近又增至二十五万彼犹偃蹇未滿其意卑辱又甚于汉矣今日之事又在预择将帅择将之术必有责于大臣昔周世宗以凤秦之乱命宰相王溥择将而得向拱既成功而世宗诏王溥曰平秦凤卿之力也盖自古良将多由辅臣荐用庆秦二州惟朝廷选择将帅而深计之四年罢修水洛城从宣抚使韩琦奏请也辛未降刑部员外郎天章阁待制权知凤翔府滕宗谅为祠部员外郎知虢州职如故并代部署张亢为本路钤辖宗谅及亢皆置狱并州狱未具而有是命从叅知政事范仲淹言也谏官孙甫言自昔之有天下者未常一日去兵虽然兵无良将与去兵同祖宗朝养兵不多而取胜于夷者有良将也今日养兵多而未常胜者非无将也不知其才而任之也韩琦田况近皆遠自陝西边将之才无容不知请诏琦等条四路将臣能否其最下者黜之庶几将帅得人而

胜可取也夏五月枢密副使韩琦叅知政事范仲淹并对于崇政殿上策畧曰臣等思和与不和俱为大患然则为今之谋者莫若择帅练兵计用武之策以和好为权宜以战守为实务彼知我有谋有备不敢轻举而盟约可固如不我知轻负盟约我则乘彼之骄可因而擊未必能为中国之患试画一言之其一曰臣等观西戎畜祸积有岁年元昊外倚北戎屡乘战胜而乃辄求通顺实图休息所获者大利所屈者虚称陛下当如唐高祖太宗隆礼敦信以盟好为权宜选练兵卒则攻守有具此和策之得者也其二曰久守之计莫若畜土兵其众多识山川习战鬪比之练兵其功相倍然沿边次边土兵数少而分守不足更当于要便城寨益招置之迁其家于边任营更免出军父母妻子保其完聚战则相救守则相安此可恃之兵也陝西新刺保捷孱弱不堪战者宜首汰之使归于四畝既省军费复增农力三万东兵以一屯边以助土兵之势以一徙次边或屯關辅以息馈饷之劳以一归京师以严警卫之备沿边所招弓箭手使之聚居险要与城寨相应彼或小至则属户番兵弓箭手诸寨土兵共力御之彼欲大举则必先闻集举之期我之沿边兵车尽可驻于坚城以待敌之进退欲长驱而来则使诸将出兵以蹶其后欲保师以归我则使诸城并力以乘其弊进无所利退而有祸不能两三其举势必败亡此守策之得也其三曰西夏之众动号十万以坐守之兵拒彼专举之势众寡不敌遂及于败我若复用此等计使彼劳我逸则取胜必矣臣请于麟府鄜延环庆泾原路各选将佐三五人使臣一二十人步卒一万骑三千以为三军训以新定阵法候其精勇然后观贼之隙使三军互掠于横山横山一带蕃部元昊入寇必为先锋降者厚赏纳质各令安土拒者并力急擊必败其族使贼奔命不暇部落携怨我则兵势自振此春秋时吴用三军破楚之策也元昊若失横山之势可谓断其右臂此攻策之得也【又陈北狄七事见契丹门】是日二人指陈上前数刻乃罢叅知政事范仲淹安抚陝西先是仲淹闻契丹与元昊相攻料其可疑者六可忧者三云今乞圣慈顾问大臣如契丹可以保信必不入寇亦不与元昊连衡则乞今日同具一奏纳于御前使中外安静不更忧疑他日或误大事责有所归如大臣不能保信则便画河东备御之策戊午富弼奏契丹必不寇河东杜衍言契丹必不来仲淹争议帝前诋衍不以为恨韩琦请行云不须一人一骑仲淹求再对奏琦语兵竟不行仲淹不以为忤也先是仲淹受命主西事弼主北事弼条上河北守御十二策凡此守御富弼言近见元昊所上誓书及奏表辞理恭顺一遵朝廷所约只是榷场上微有商量候杨守素到阙臣乞与婉顺商议示以和之意使之深信不可谓其恭顺却于元约事外别诘难邀勒所宜多方容纳令无备我之意则必尽力与契丹相持若二寇相杀伐朝廷之福天之所假也又范仲淹言前代帝王与戎结好通和礼意甚重非志不高而力不足也盖惧边事不息困乏生民用兵久之必生他变而为社稷之忧如汉高祖唐太宗身经百战既定天下不敢黩武而屈事戎狄者正为此也及其国力强盛将帅得人则长驱破敌以雪天下之耻今西兵数年未能平定近方遣使以议通好今众议欲复得寨门以全疆土且西戎骄怯不足与争但名体已顺余可假借以成和好然后重议边事退移兵

马减省粮草蕪我生民勤我稼穡选将练兵使民富土强以待西夷之变此帝王有道之  
术社稷无窘之福也谏官蔡襄言元昊陈奏数目如闻誓书大体颇如朝廷约束兼余靖  
请使北已有回奏别无齟齬之意臣窃谓速行封册诏如靖言仍令延州先移文夏人仲  
淹因奏张亢得所增广堡寨宜使就总其役诏既下而明镐持不可屡牒止亢亢曰受诏  
置堡寨岂可得经畧牒而止耶坐违节度固所甘心堡寨必为也每得牒置案上督使役  
愈急小堡或一日而成卒事乃发封自劾朝廷不问蕃汉归者数千户岁减戍兵万人河  
外遂安十一月初环原之间属羌有明珠减藏康奴三族最大素号强犷抚之则骄不可  
制伐之则险不可入其北有二州交通西界宣抚使范仲淹设筑古细腰城断其路于是  
檄知环州种世衡与知原州蒋阶共干其事世衡时卧病即日起兵会阶于细腰使甲士  
昼夜筑城先遣人以计款寇果不争又召三族酋长犒之谕以官筑此城为汝御寇三族  
既出不意又忘寇援因遂服从城成而世衡卒冬十月范仲淹复檄蒋阶筑堡大虫纒堡  
未完而为明珠减藏伺间邀击阶辄从间道遁归伏经畧使庭下请死王素将赦其罪令  
复往毕功以赎罪狄青曰阶轻而无谋往必更败素曰阶死则部署行矣青乃不敢言阶  
卒完所筑堡致其酋长而还始明珠策族数为寇阶潜兵伺之斩首四百余酋豪二十九  
焚帐落八十获牛马三千所俘皆刳割磔裂于庭下坐客为废饮食而阶笑自若五年春  
枢密使韩琦言朝廷已封册夏国又契丹矣西征回来告当此之时便谓太平无事则后  
有大忧者三若以前日之患而虑及经远则后必有大利者【一禾尽录】臣愿陛下深  
思去大忧取大利则为天下之福又陈陝西合措置事件久任主帅徙兵就粮去冗兵以  
蠲经费上悉施用其言六年诏陝西安抚及运使朝廷开纳夏国本欲宽财恤民自进誓  
以来至今已及一年而调度尤急不敢用兵其议裁节诸费及所增置官员指使使臣今  
无用者悉条奏之从枢密副使龐藉之言也辛酉诏河东经畧使郑戡裁减本道边费以  
闻

### 仁宗朝契丹议關南地界

天圣二年契丹大阅声言猎幽州朝廷患之以问二府皆请备粟练师以待不虞枢  
密副使张知白独言契丹修好未远今其举兵者以上初改观试朝廷耳岂可自衅耶若  
终以为疑莫若因北河决以防河为名万一有变亦足应用未几寇果败盟

景佑元年十二月或传契丹聚兵幽涿间河北皆惊癸酉命张克为北京使知安肃  
军因入对曰狄岁享金帛甚厚今其主孱而岁歉欲兴兵而来特张言耳非其实也万  
一有背约臣请环甲为诸军先朝廷欲大发军为备辅臣迭议上前参知政事蔡齐画三策  
料契丹必不渝盟已有契丹祭天幽州以兵屯境上耳二年契丹主加号文武仁圣昭孝  
皇帝

庆历三年春二月契丹谋聚兵幽蓟前遣使致书求關南北知保州衣库使王果先  
购得其书稟以闻且言契丹潜与昊贼相结将必渝盟请自广信军以西缘山口贼马出  
入之路预为按守札付河北安抚使密修边备乙未诏真定府天雄军澶州各备兵马十



万人刍粮二千车器甲五百副又诏河北路提点刑狱视所部州军城隍应修者修之又诏河北诸州强壮自三月后并赴州阅习委知州择其强劲者刺手背为义勇军不■〈首页〉者释之而存其籍以备守葺城池自是强壮寝废矣诏始下人情汹汹河北转运使李昭述乘疾置日行数舍开谕父老人情始安辛丑以新知河州保静军留后王德用为保静军节度使契丹将渝盟上起德用于曹州复留后知青州不数日改澶州入见上流涕言臣前被大罪陛下幸赦而不诛今不足辱命上慰劳曰河北方警藉卿威名镇抚耳又赐手诏以遣之即拜节度使三月己巳契丹遣宣徽南院使归义节度使萧英翰林学士右谏议大夫知制诰同修国史刘六符来致书曰弟大契丹皇帝谨致书于大宋皇帝粤自世修欢契时遣使诏封圻殊两国之名方册纪一家之美盖欲洽于绵远固将有以披陈窃缘马桥關南是石晋所割迄至柴氏以代郭周兴一时之狂谋掠十县之故壤人神共愤庙社不延至于贵国祖先肇创基业寻与敝境继为善邻暨乎太宗绍登寶位于有征之北纔定并汾以无名之师直抵燕蓟羽召精銳御而获退遂致移镇国强兵富南北王府并内外诸军弥年有戎境之劳继日备渝盟之事始终反复前后谄详尝窃审专命将臣往平河右炙凉屡易胜负未闻兼李元昊于北朝久已称藩累增尚主克保君臣之道实为甥舅之亲设罪合加诛亦宜垂报迩者郭稹时至杜防又回虽具音题而但虞诈谍已举残民之伐曾无忌器之嫌营筑长堤填塞隘路开决塘水添置边军既潜稔于猜嫌虑难敦于信睦倘或思久好共遣疑懷曷若以晋阳旧附之区關公元割之县俱归当国用康黎民如此则益深兄弟之懷长守子孙之计緬惟英晤深达悃悰适届春阳善缓冲裕先是西兵久不决六符以中国为怯且厌兵困因教其主聚兵幽涿声言入寇而六符及英去以书来求關南十县正月己巳边吏言契丹泛使且至朝廷为之旰食歷选可使狄者羣臣皆惮行宰相吕夷简举右正言知制诰富弼入对便殿叩头曰主忧臣辱臣不敢爱其死上为之动色壬申命弼为接伴弼以二月丙子发京师至雄州久之英等始入境遣中使慰劳英称足疾不拜弼谓曰吾常使北病卧车中闻命辄拜今中使至而君不起此何礼也英矍然起遂使人掖而拜弼警英等自以狄先违盟约及其从者皆有惧色可动故每与之开懷尽言冀以钩得其情英等以故亦推诚无隱乃密以其主所欲者告弼且曰可从从之不从便以一事塞之王者爱养生民旧好不可失也弼具以闻及英等至命御史中丞贾昌朝馆伴朝廷议所欲与不许割地而许以信安僖王允宁女与其子梁王洪基结婚或增岁赂独弼以结婚为不可初北主之弟宗元者号太弟挟太后势用事横于国中常自通书币上欲因今使答之令昌朝问六符六符辞曰此于太后则善然本朝则不便也昌朝曰即如此而欲以梁王求和亲皇帝岂安心乎六符不能对既而狄卒罢结婚之议辛未授弼礼部员外郎枢密直学士将使弼报聘故也弼曰国家有急惟命是从不敢惮劳臣之职也奈何逆以官爵赂之固辞不受庚辰诏以右正言知制诰富弼为回谢契丹国信使西上阁门使符惟忠副之复书曰昔我烈考章圣皇帝保有基国惠养黎庶与大契丹昭圣皇帝弭兵讲好通聘着盟肆余纘承共遵谟训边民

安堵垂四十年兹者专致使臣特贻緘问且以瓦桥旧地晋阳故封援石门之割城还周朝之复境系于异代安及本朝粤自景德之初始敦邻堡之信凡诸细故咸不寘懷况太宗皇帝亲留并郊匪图燕壤当时贵国亟发援兵既交石岭之锋遂举蓟门之役义非反复理有因緣元昊赐姓称藩稟朔受禄忽谋狂僭俶扰边陲乡议讨除已尝闻达杜防郭稹传道备详及此西征岂云无报聘轺旁午屡闻嫉恶之谈谍间交驰未谕聯亲之故忽窺异论良用惘然谓将軫□□原反致讥于忌苦复云筑营堤埭开决陂塘昨綠霖潦□余大为衍溢之患既非疎导当稍善防岂蘊猜嫌以亏雍睦至于备塞隘路阅习兵夫盖边臣谨职之常乃乡兵充籍之旧在于贵境宁撒戍兵一皆示以坦夷两何形于疑阻故惟欢契方保悠长遽兴请地之言殊匪载书之约信辞至悉虚鉴孔昭两地不得相侵缘边各守疆界二书之外一无所求期在久要弗违先志諒为聰达应切感思再属清和妙臻戩穀其余令弼口陈书词翰林学士王拱辰所撰也甲午徙知澶州王德用为真定府定州路都部署仍降诏諭以选任之意初刘六符见德用于澶州喜曰闻公名久乃幸见于此今岁大熟非公仁政所及耶德用谢之曰明天子在上固常多豐年因已衰老中国多贤士大夫指坐客歷陈其家世六符竦听五月丁卯徙知成德军龙图阁直学士兵部郎中张存为河北转运使先是存上言契丹与元昊为婚恐阴相首尾河北城久不治宜诏意毋忽于是悉城河北诸州俾存督察之二年秋七月初富弼张茂实以结婚及增岁弊二事往报契丹惟所择弼至满达河刘六符馆之谓弼曰北朝皇帝坚欲割地如何弼曰北朝若欲割地此必志在败盟假此为名朝廷必不从有横戈相待耳六符曰若南朝坚执则事安得济弼曰北朝无故求割地南朝不即发兵拒却而遣使好辞更议嫁女益岁币犹不从此岂南朝坚执乎及见北主弼曰两朝人主父子继好垂四十年一旦忽求割地何也北主曰南朝违约塞鴈门增水塘治城隍藉民兵此何意羣臣竞欲举兵而寡人以谓不若遣使求關南地求而不得举兵未晚也弼曰北朝忘章皇帝之大德乎澶渊之役若从诸将之言北兵无得脱者且北朝与中国通好则人主专其利而臣下无所获若用兵则利归臣下而人主任其祸故北朝诸臣争劝用兵者皆为其身谋非为国计也北主惊曰何为也弼曰晋高祖欺天叛君而求助于北末帝昏乱神人弃之是时中国狭小上下离叛故契丹全师独克然擄获金帛充物诸臣之家而壮士健马物故太半谁任其祸者今中国提封万里所在精兵以万计法令修明上下一心北朝欲用兵能保其必胜乎曰不能弼曰胜负未可知就使其胜所亡士马羣臣当之欤抑人主当之欤若通好不絕岁币尽归人主臣下所得正奉使者岁三人耳于羣臣何利焉北主大悟首肯者久之弼又曰塞鴈门者以备元昊塘水始于何承矩事在通好前地卑水聚势不得不增城隍皆修旧民兵亦旧籍特补其阙耳非违约也北主曰微卿言不知其详然寡人所欲得之者但以其地耳弼曰晋高祖以卢龙一道赂契丹周世宗复伐取關南皆异代事宋兴已九十年若欲求异代故地岂北朝之利乎北主无言徐曰元昊称蕃尚主南朝伐之不先告我何也弼曰北朝向伐高丽黑水岂常报南朝乎天子令臣致意于陛下曰向不

知元昊与弟通姻以其负恩扰边故讨之而弟有烦言今擊之则伤兄弟之情不擊则不忍坐视吏民之死不知弟何以处之北主顾其臣与语良久乃曰元昊为寇岂可使南朝不击乎既退六符谓弼曰昔太宗初平河东遂袭幽燕今虽云用兵西伐无乃续欲谋燕蓟乎弼曰太宗时北朝先遣伊喇摩哩来聘既而出兵石岭以助河东太宗怒其反复遂伐燕蓟盖北朝自取之也六符又曰吾主耻受金帛坚欲十县如何弼曰南朝皇帝常言朕为人子孙岂敢妄以祖宗故地与人昔澶渊白刃相向章圣尚不与昭圣關南岂今日而可割地乎且北朝欲得十县不过利其租赋耳今以金帛代之亦可以坐资国用朕念两国生灵不欲使之肝脑涂地不爱金帛以徇北朝之欲北朝既欲得地是志在背盟弃好朕独能避用兵乎且澶渊之盟天地神祇实共临之今北朝先发兵端朕不愧于心亦不愧于天地神祇矣六符谓其介曰南朝皇帝存心如此大善当共奏使两主意通翌日北主招弼同猎引弼马自近问所欲言弼曰南朝惟欲欢好之久耳北主曰我得地则欢好可久弼曰南朝皇帝遣臣问于陛下曰北朝欲得吾祖宗故地南朝亦肯失祖宗故地耶且北朝既以得地为荣则南朝以失地为辱矣兄弟之国岂可使一荣一辱哉朕非忘燕蓟旧封亦安敢复理此事正应彼此自论耳退而六符谓弼曰皇帝闻公荣辱之言意甚感悟然金帛必不欲取惟结婚姻可议耳弼曰结婚姻易以生衅况夫妇之情好难必人命修短或异则所托不坚不若增金帛之便也六符曰南朝皇帝必自有女弼曰帝女纔四岁成婚亦须在十余年后虽允宁女成婚亦在四五年后今欲释目前之疑岂可待哉弼揣彼意在多得金帛因曰南朝嫁公主故事资送不过十万缗耳由是狄结婚姻之意缓且谕弼还弼曰二论未决安敢徒还愿留毕议北主曰俟卿再至当择一事受之宜遂以誓书来也弼还奏复授弼吏部郎中枢密直学士又辞不受癸亥弼与茂实再以二事往使于北吕夷简传帝旨令弼答契丹书并誓书凡为国书二誓书三议婚则无金帛若契丹能令夏国纳款方岁增金帛二十万否则十万弼奏于誓书内创增三事一两界塘淀毋得展开二答不得无故添屯兵马三不得停留还亡诸色人弼因请録副以行中使夜赍誓书五并所録副本□□□□□□及弼于武强授弼行至乐寿自念所增三事皆非契丹前约万一书词异同则狄必疑乃密启副封观之果如弼所料即奏疏待报又遣其属前陵州团练推官宋诚蔡挺诣中书白执政上欲知狄事亟召挺问挺时有父丧听以服帽对便殿乃诏弼三事但可口陈弼知此谋必执政欲变已所与北朝初议者乃以礼物属茂实疾驰至京师日欲晡叩合门求对合门吏以旧制当先进名对仍翌日弼责之遂急奏得入见曰执政故为此欲致臣于死臣死不足惜奈国事何上急召吕夷简等问之夷简从容曰此误耳当改正弼语益慢夷简晏殊言夷简决不肯为真恐误耳弼怒曰殊奸邪党夷简以欺陛下遂诏王拱辰易书其夜弼宿学士院明日乃行富弼张茂实以八月乙未至契丹清泉淀金毡馆持国书二誓书三以语馆伴耶律仁先刘六符问所以然者弼曰姻事合则以姻事誓能令夏国复归款则岁入金帛增二十万否则十万国书所以有二誓书所以有三也翌日引弼等见北主大弟宗元子梁王洪基侍萧孝



思孝穆马保忠杜防分立帐外北主曰姻事使南朝骨肉睽离或公主与梁王不相和悦则将奈何固不若岁增金帛但患无名耳须于誓书中加一献字富弼曰此乃下奉上之辞非可施于敌国况南朝为兄岂可兄献于弟乎北主曰南朝以厚币遗我是惧我也献字何惜弼曰南朝皇帝守祖宗之土宇继先皇之盟好故致币帛以代干戈盖惜生灵也岂惧北朝哉今陛下欲发此言正欲弃绝旧好以必不可冀相要耳则南朝亦何暇顾生灵哉北主曰改为纳字如何弼曰亦不可北主曰誓书何在取二十万者来弼既与之北主曰必寡人加纳字卿无固执恐败乃主事我若拥兵南下岂不祸乃国乎弼曰陛下用兵能保其必胜否北主曰不能弼曰胜未可必安知其不败耶北主曰南朝既以厚币与我纳字何惜况古有之弼曰自古惟唐高祖借兵于突厥故臣使之当时所遗或称献纳不可知其后颉利为太宗所擒岂复更有此理北主默然见弼词色俱厉度不可夺曰我自遣使与南朝皇帝议之若南朝许我卿将何如弼曰若南朝许陛下请陛下与南朝书具言臣等于此妄有争执请加之罪臣等不敢辞北主曰此乃卿等忠义为国之事岂可罪乎弼退而与刘六符言指帐前高山曰此尚可踰若云献纳二字则如天不可得而升也使臣头可断此议断不敢诺于是乃留所许二十万誓书复遣耶律仁先刘六符赍其国誓书以来仍求纳字二十万誓书盖明着夏国纳款事北主不悦欲令弼改之弼不可彼亦卒不肯报其事于誓书但于国书中叙述耳是月乙巳弼等还至雄州诏即以弼为接伴使有朝廷合先知者急置以闻弼奏曰彼求献纳二字既以死拒之敌气折六不可复然朝廷意欲从晏殊议许称纳字弼不预知也乙丑契丹枢密副使保大节度耶律仁先枢密使礼部侍郎同修刘六符入见其誓书曰惟重熙十一年岁次壬午八月壬申朔二十九日庚子弟大契丹皇帝致书于兄大宋皇帝阙下来书云谨按景德元年十二月七日章圣皇帝与昭圣皇帝誓曰共遵成纪虔守欢盟以风土之仪物备军旅之费用每岁以绢三十万疋银一十万两更不差使臣专往北朝只今三司差人搬送至雄州交割沿边州军各守疆界两地人户不得交侵或有贼盗逃遁彼此勿令停匿至于陇畝稼穡南北勿纵骚扰所有两朝城池并合依旧存守修壕葺藁一切如常即不得创筑城隍开决河道誓书之外一无所求各务协心庶同悠久此保安黎庶谨守封疆质于天地神祇告于宗庙社稷子孙共守传之无穷有渝此盟不克享祀昭昭天鉴其当殛之昭圣皇帝复以书答云孤虽不才敢遵此约谨当先于天地誓之子孙神明俱知呜呼此盟可改后嗣何述窃以两朝修睦三纪于此边鄙用军干戈载偃追懷先约炳若日星今绵遠已深敦好如故關南县邑本朝传守惧难依从别纳金币之仪用代赋税之物每年增绢壹十万疋银一十万两前来银绢搬至雄州白沟交割两界塘淀已前开田畝者并依旧外自今己后不得添展其湜堰水口逐时决泄壅塞量差兵夫取便修垒疏导非时霖潦别至大段涨溢并不在關报之限南朝河北沿边北朝自古北口以南沿边军民除见管数目当依散關无故不得大段添屯兵马如有事故添屯即令逐州军移牒關报两界所属之处其自来乘除更替及本路移易不在關报之限两界逃走作过诸色人口并依先朝誓

书外更不得以日前停留容纵恭惟二圣威灵在天顾兹纂承各当遵奉共修大体无介小嫌且夫守约为信鄰邻为义二者缺一罔以守国皇天厚地实闻此盟文藏于宗庙副在有司余并依景德统和两朝誓书顾惟大德必敦大信苟有食言必如前誓时契丹固惜盟好特为虚声以动中国中国方困西兵宰相吕夷简等持之不坚许与过厚遂为无穷之害敌每岁得金帛五十万因勒碑纪其事刘六符极汉官之贵子孙重于国中庚辰复命右正言知制诰馆修撰富弼为吏部郎中枢密直学士弼上章固辞先是吕夷简当国人莫敢抗弼既数论事侵之及堂吏以伪署度僧牒诛夷简益恨因荐弼使契丹变易书欲因事罪之馆阁校勘欧阳修上书引颜真卿使李希烈事罪之不报而弼受命不少辞自初奉使闻一女卒再奉使闻一男生皆不顾而行得家信不发而焚之曰徒乱人意耳十月丙午以右正言知制诰史馆修撰富弼为翰林学士弼言于上曰增金币与敌和非臣本志也特以朝廷方讨元昊未暇与敌角故不敢以死争耳于功何有而遽受赏乎伏愿陛下益修武备无忘国耻卒辞不拜敌既修和好有忌弼功高妄指他事譖弼奉使不了乞斩于都市上虽不听而弼深畏恐故每迁官辄力辞云三年三月甲午枢密副使右谏议大夫富弼改为资政殿直学士兼翰林侍读学士弼时再上章辞所除官曰臣昨奉使契丹彼执政之官汉使所未尝见者臣皆见之两朝使臣昔所讳言者臣皆言之以故得详其情状彼惟不来来则未易御也愿朝廷勿以既和而遂忽之臣今受赏彼一旦渝盟臣不惟蒙朝廷斧钺之诛天下公论其谓臣何臣畏公论甚于斧钺愿收新受则中外之人必曰使臣不受赏是事未可知于守备决不敢懈弛非臣务饰小廉诚恐误国事上察其意坚定特为改命焉七月以富弼为枢密副使弼直执制诰命纳于帝前陈所以牢避之意且曰愿陛下坐薪尝胆不忘修德上许之焉

### 仁宗经制契丹要畧

庆历四年初边奏契丹修天德城及多建堡寨知制诰田况意敌畜奸谋乃上疏曰朝廷予契丹金帛岁五十万腴削生民输将道路疲弊之势渐不可久而近西羌通款岁又予二十万设或复肆贪渎再有规求朝廷尚可从乎臣至愚不当大责每念及此则惋叹不已矧两府大臣皆宗庙社稷天下生民所望而系安危者岂不为陛下思之哉每旦拱垂之对不过目前政事数条而已非陛下所以待辅臣非辅臣所以忧朝廷之意也有唐故事肃宗以天下未乂除正衙奏事外别开延英以询访宰相盖旁无侍卫献可替否曲尽讨论今北敌桀慢而河朔将佐之良愚甲兵之善窳道路之夷险城垒之坚弊军政之是否粮财之多少在两府辅臣实未有知之者万一变发所忽制由中出少有差跌则士不测矣如前岁萧英刘六符始来和议既定又复恬然若无事者岂得为安哉愿因燕闲召执政大臣于便殿从容赐坐访及时政专以敌患为急则人人惟恐不知以误应对事事惟恐不集以孤圣懷日夕忧思不敢少懈同心叶力以有所为今不以此为急务而日以委琐之事更相便对议者羞之臣叨备近列契同朝廷休戚惟陛下不以人废言也五月壬戌朔枢密副使韩琦参知府事范仲淹并对于崇政殿上四策其四曰臣等既以

三策陈之久以北戎为忧且戎久强在后唐日以兵四十万送石高祖至洛阳立为天子遂与石晋为父子之邦邀求无厌晋不能支一旦衅起直抵京师携石少主暨当时公卿尽室而去为中原千古之耻国家始与结和将休兵养民自有待也及天下无事人人懷安不复有征战之议前年北敌骤起说谋称兵有割地之请今来元昊欲议和又因而要功其谋愈重苟不大为之备祸未可量请朝廷欲行七事以防大患一密为经畧二再议屯兵三专于选将四急于教战五训练义勇六修京师外城七密定讨伐之谋一密为经畧者自河朔罢兵以来几四十年州郡困循武事废弛凡谋兴葺则罪其引惹昨朝廷选差转运使盖欲革去旧弊预为之防然既有本职则日为冗事所婴未暇周虑请选有材识近臣假以都转运使之名暂往经畧使亲视边垒精究利害凡边计未备者皆条上而更置之不出半年归奏阙下更令中书枢密院仔细询访熟议经久之计若敌情骤变则我有以待之矣二再议屯兵者自有真定府三州高阳關分为五路其所辖兵马未甚整齐乃有一州兵马却属西路之处又未晓本路将来于何处控扼合用重兵若干又甚处只宜守固合屯兵若干及三路互相应援次第须差近臣往彼密为经畧方可预为法制临时不致蹉跌或事宜未动亦当相度兵马合那减于何处驻泊就使刍粮以省边费庶免先自匱乏至用兵之日重困生民三专于选将者委枢密院于合门祇候使臣以上选人三班院于使臣中选人殿前马步军司于军旅中選人或有智畧或有材武堪边上试用者逐渐进呈据选到人数以藉记之候本路有阙则从而差授如此则三二年得人多矣四急于教战者于陝西四路北取曾押战队使臣十数人更授以新议八阵之法遣往河北阅习诸军使各知竒正循环之术应敌无穷五训练义勇者今河北所藉义勇虽约唐之府兵法制三时务农一时教战然未见府卫之官而法制不行号令不一须别选知州知县县令可治兵者并增置将校使人人各知军中之法应敌可用斯强兵制胜之本矣六修京师外城者后唐无备契丹陷洛阳石晋无备契丹陷京师故契丹犯京师坦然无备一朝称兵必谋深入我以京师无备必促河朔重兵与之力战彼战或胜则更无所顾直趋澶渊张犯阙之势至时遣使邀我以大河为界将何以御之是京师不可以无备也若京城坚完则戒河朔之兵勿与之战彼不得战则无乘胜之气欲谋深入前有坚城后有重兵必将阻而自退退而不整则邀之击之皆可也故修京城者非徒御寇诚以伐深入之谋也汉惠帝时起六百里男女城长安二年而就唐明皇时城长安九十日而就今约二年城之则民不劳而利大不可不蚤计也是日琦与仲淹陈于上前数刻乃罢庆历四年六月韩琦范仲淹奏河北五事一边材臣领河北转运使密令经画边事二再议河北三路合屯田去处三委枢密院于合门祇候以上选人三班院于使臣中选人逐十日或一月具选人数进呈四于陝西押战队使臣十数人授以新议八阵之法教习诸军五河北州县专选知州知县令可以治民者教习义勇并增置将校参知政事范仲淹言契丹发兵马可疑六事可忧三事见广筭门戊午枢密副使富弼条上河北守御十二策曰国朝以兵得天下震耀武威太祖皇帝待北狄仅若一族每与之战未尝不克太宗



皇帝因亲征之衄敌志遂骄频年寇边胜败相半真宗皇帝嗣位之始专用仁德于时旧兵宿将往往沦没敌骑深入直抵澶渊河朔大骚乘輿北幸于是讲金啖之之术以结欢好自此河湟百姓几四十年不识干戈岁遗差扰然不足以当用兵之费百一二焉则知澶渊之盟未失策而所可痛者当国大臣论和之后武备皆废以边臣用心者谓之引惹生事以缙绅虑患者谓之迂阔违时大率忌人谈兵幸时无事谓敌不敢背约谓边不必预防谓世常安谓兵永息恬然自处都不为忧西北二寇稔知朝廷作事如此之失也于是妄欲希赏未常听也蕃使每到朝廷悖慢则尚曰夷狄之人无礼是其常事故不之恤也但只自谩吓佯为包容其实偷安不为国家任责画长久之计所以纵其奸谋养成深患是致寶元元年元昊窃发数载用兵西人困穷未可胜算又至庆历二年契丹观衅而动嫚书上闻中外仓皇莫知为计上恬下嬉以苟一时之安二边所以致然者乃曰国家向来轻敌妄战不为预备之所致也臣深见二敌为患卒未宁息西伐则北助北静则西动必欲举事不难求衅通和则坐享重弊交战则必破官军叛而复和孰敢不许禽纵自在去往无梗两不牵制困我中国有何大害而不为边患有何后悔而长守欢盟渝盟扰边则我遂困不幸凶荒相继贼盗中起二敌所图又甚大矣自契丹侵取燕蓟以北柘拔自取灵夏以西其间所生英豪皆为其用得中国土地役中国人力称中国位号方中国官属任中国贤才读中国书籍用中国车服行中国法令是二敌所为皆与中国等而又劲兵骁将长于中国中国所有彼尽知之彼之所长中国不及当以中国勅敌待之庶几可御岂可以上古之夷狄待二敌也前既轻敌妄战不为预备致二敌连祸朝廷深忧今又欲以苟安之势遂为无事二敌各获厚利退而养勇不数年相应而起则无复以金帛可啖而盟诅可约也谨具守御策如左其守策一曰河北三十六州军内沿边次边北京雄霸冀祈保瀛莫沧镇定十一州广信安肃顺安信安保安宁干宁永宁七军北平一寨总十九城皆要害之地可以控扼贼寇而不使得深入定为右臂沧为左臂瀛为腹心北京为头角此四城乃河朔之望也余十五城为指爪支节乃四城之所使也定瀛沧各置一帅北京置一大帅余十五城分属定瀛沧三路择善将守之十九城都用兵三十万定五万瀛沧各三万雄霸冀保广信安肃各一万祁莫顺安信安保安宁永宁北平各五千北京五万为诸路救援余二万分于诸道巡检游击兵此三十万兵非如景德年中闭门自守皆使出而接战者也今若使良将帅守十九城分领三十万众左右出入纵横救应闪误鬪诱冲陷掩袭臣虽至愚未信敌骑敢长驱而南也二曰河朔长贰最宜得人以备匈奴之变自来都不选择又移替不定经久利害自知不及其身率皆不为前后相承积弊已甚若不选人久任以矫前失则异日敌有所变故边城不守为患不细乞差选长吏并使久任绩効着闻优与就迁厚加宠赐使乐于边计悉心营职自能久处其三曰除上件十九城久任外其余十七州军大小文武官并乞诏本路转运提刑安抚部署钤辖路分举充所贵上下得人四曰屯兵备边古无常制所患者民赋有限军食多缺必须广为经度始给用度其间岁有凶歉谋之不获寇至益戍常数不足则暴敛横取何所不至民由

是困盜由是起此歷代所患也敵雖與之和終非悠久之計臣嘗深慮得養民二條其一條據守邊兵合留外駐泊駐屯就以地分屯于河南鄆齊濮等州以教以養况其地富實不營而足率二年一代遇有緊急發符召之不旬日可到豈有后期不反者耶所以畧省河朔科斂以寬疲民使之安益蘇息坐待寇至而用庶几師有余力可以御敵其二緣大河州軍起敖倉運河南民稅及漕江淮粟實也近邊兵馬每歲三年一代亦足以寬河朔困乏之民五曰河北最號勁兵處若盡精銳則無敵于天下况夷狄乎今屯南兵尚多徒能張為聲勢而實不足用臣愿河北純募土人為禁兵教之精勇則匈奴自當畏服既得土兵勿戍他鄉糧若不足则愿用臣前養兵二條六曰北邊風俗大率以近親為盟主將相以治國事以掌兵柄而信任焉所視中國用人亦如其國臣亦常念國家將帥既未聞于夷狄而親王素有畏望為匈奴所畏者今不復聞敵必謂王室孤危無所扶助本根不固易以搖動此誠宜為夷狄之窺測臣愿陛下親擇宗室中年長知書者試之以政臣知不數年當有賢宗室如漢河間東平二王矣內以藩屏王室外以威示四夷此有國者之急務長久之策也故三代以後興王者今日得天下明日封宗室至于襁褓之子亦皆為侯為王分割地土自成邦國于以分布枝葉庇蔭本根張大王室壯觀天下此前代帝王制天下布在簡牘驗之可信今則埋沒抑壓僅同豢養縱其痴騃殊不教習虽有說書官从實虛設是盡欲愚之不令知善道為人甚非養宗室之大義也至于臣庶之家有子孫弟侄者无不孜孜教誘使之成器國家富有天下基業全盛實祖宗艱難所致所宜子子孫孫相承不絕為歷世之計豈可宗室滿宮而陛下未知教導任為過惡俾外夷哂笑是陛下損枝葉而取孤根易搖之患矣且陛下任李用和為殿前都副指揮使任曹瑋為馬軍副都指揮使者是任親也用和與瑋誠親矣然皆異姓者尚有親信則宗室同姓與陛下為骨肉之親反不信哉陛下不過為宗室無人臣謂今則誠未見其人教之試之當自有人矣今為朝會時羣行旅進者蓋滿道士大夫見者方知其有宗室但出都城四門之外不知宗室之有無况天下乎又况四夷乎自上古以至今日其間所歷何啻萬代至宗室不教不試不用而微弱之甚未有如本朝者也宜乎為識者之所忧而北狄之所輕也且如北敵有南大王蕭孝穆北大王蕭孝惠魯王特哩袞楚王伊勒希巴是其亲近甚眾臣前歲奉使盡與之接又徇其國人未必實有才武而中原聞之莫不疑其人人皆良將也其故何哉蓋聞其名而疑其實耳今朝廷若能崇樹宗室使聲名漸著聞北敵北敵亦必謂南朝有人根本牢矣欲謀則息欲動則北古者有以实效濟者亦有以虛聲攝者兵尤重先聲而后實况臣之所说必使聲實相副愿陛下行之無疑其御策一曰景德以前沿邊土兵無事時留戍本州島軍寇至則盡為逐路部署司抽起緣邊闕食又却以南兵屯守甚無謂也夫土兵居邊知其山川道路熟其彼中人情復諳狄兵次第亦藉其營護骨肉之心且又服習州將命令所御必堅戰必勝也若迁入內地山川道路人情不熟狄兵不諳骨肉不在州縣命令不習又為怯弱所累則御必不堅戰必不勝也北敵惟懼邊兵凡聞有南兵潛入內地敵人大喜故來則決勝而回前年河朔有警復尋景德一事

尽抽边兵守定州河朔之民大恐为官军必败幸而敌骑中止不见失律不然丧师必矣臣愿自今北敌若入寇沿边土兵只在本处不复令部署司抽起若逐处土兵而少即以南兵益之有余则方许部署司抽起况部署司自有近里州军土兵可以聚而为大阵矣【臣上篇议十九城分领三十万出战余十七城系近里州军只用乡兵守之更不出战其逐路部署可于十七城聚而为大阵矣】边兵勇悍有材武不畏坚敌敌骑初入使堂堂之锋必能取胜则近里州军人心自壮虽南兵之怯亦颇增气局以南兵在边遇寇一败敌骑乘而南则表里震恐虽精锐尽在部署司亦已阻丧安能保其全胜哉二曰景德以前匈奴寇边多由飞狐易州界道东西只过阳山子度满城入自广信之西后又多出广信安肃之间大抵敌骑率由西山下入寇大畧州郡然后东出雄霸之间景德前二州塘水不相接因名东塘西塘三塘之交荡然可以为敌骑归路遂置保定军界于二州以当贼冲决后开导不已二塘相连虽不甚浩渺而贼路亦稍梗矣然穷冬冰坚旱岁水竭亦可以济未为必安之地虽然但少以兵控扼之则敌骑无以过矣自余东从姑海西至保州一带数百里被塘水弥漫若用以为险可以作限只自保州以西至山下数十里无塘水之阻敌可以平入敌且守盟不动则无以先发但用臣上篇屯兵之法足以固守万一渝盟入寇用臣之策可以转祸为福而逞志泄愤矣何以陈之今敌若寇边必由广信西而来敌骑初入塘缘边州军坚壁示弱不得出兵敌必不愿而进将及镇定亦坚壁敌必易我而懈于是令广信安肃保州三边开壁会兵张击之之声而不与战敌必分兵复御已而令镇定亦闭壁不与战敌既前后受敌亦未敢长驱而南于是我急从沧州取海上路以数千艘出轻兵三万趋平州入符家寨口则只咫尺燕蓟矣【沧州至北界平州水路五百里不数日登岸地肥水草美不必重举】雄霸之间即景德敌骑东归之路也又出精兵二万直抵燕京会沧州兵捣其腹心破其积聚敌见两下兵入莫知为计矣燕地既入寇者必有归心又为王师所击而不能遂去于是乘其向背之杰使沿边三城及镇定合兵击之必大破追奔及燕尽逐敌过山后【敌兵入界则整败而出塞则纷然散走无复行阵易为驱除之矣】以兵守居庸關右北口松亭關符家寨此四關口皆险隘各以三千兵守之固矣则敌骑无复南者因其妄动可以一举而复全燕之地拔邻郡陷蕃之族平累朝切骨之恨臣自谓必无遗策矣既以兵守四關口外西山有后来新开父牛铁脚猪窠二口敌人以通山后又州之道路皆险峻不通车马虽不加防守尚无所害或于口侧少伏车马纵敌入寇发伏可以尽擊之假陛下谨重未欲举燕之策即请寇入之后屯重兵于西山下敌虽有所掠而东出无路进退不遂我于是以十九城之兵分出掩擊必使退败保无深入之患敌既屈与和则久亦治匈奴之一策也三结边豪四结高丽五经制山后新路六广祁深二城七防河东凡此守御十二策总十三条是臣庚辰壬午年奉使契丹日于河北往回十余次询于法边土豪并内地故老博采彙校得之甚详及于敌庭议事又颇见其情状以至稽求载籍质以时务用是裒聚撰述以副陛下委任之意即非臣任智臆罔圣聪伏望陛下令两府会议可者速行之其不可者更相致诘而



是正之臣必不敢恃己徇私旁拒众论两府亦不得徒事成言而无所发明如此则庶几谋行而患可弭矣知制诰张方平言臣闻外敌不守封界筑城鄙上边吏谍知科阅兵马且复遣使来事故未审虚实然国家与敌通已四十年事穷必变利尽则交疎亦理之常者臣愿陛下思患预防考谋事先秋气渐清宫殿凉爽时因燕闲延对大臣俾各尽其谋猷以定其帷幄一日有边境之患庶几无仓猝之忧今而疆場初宁纵不保其久求无旦夕之虞也其将校可任者稍徙河北使得与士卒相服习渐谙土俗至于选官吏峙糗粮缮器械葺廐牧皆当今切务而可以素备者也备而未用为政之常临事纷纭何以镇静癸未参政范仲淹言臣窃见契丹来书志在边功势将构难还答之际尤宜慎重先且大议备边之策然后遣使往来使敌知我有备无必胜之理则亦可以遏其邀功求报之初心纵背盟好亦有以待之少减生灵之祸【余见经制西夏要畧门】

四年八月甲午枢密副使富弼为河北宣抚使先是抚臣奏事垂拱殿前面谕之曰北主受礼云州遂袭我河东两府宜设备弼谓契丹必不寇河东其事有九无名一也易出难入二也动称王师不肯窃发三也不寇河东四也不先寇河北五也必不肯先报云州受礼六也必不与元昊合入寇七也不闻脩无以防我八也不由河东入寇九也臣验此九事故知契丹不寇河东必矣今臣但论目下不为河东之患过此以往非臣所知臣前使契丹理当无所增赂盖以朝廷方难尽力西鄙未遑北事于是忍羞歲益所入聊以疑兵纾祸而望雪耻于后也臣今所乞必愿俞允不惟训兵备敌以安元元至于身羞国耻庶几可雪于是命弼宣抚河北实亦不自安于朝欲出避谗谤也乙未翰林学士承旨王度学士王尧臣吴育宋祁知制诰孙抃张方平欧阳修权御史中丞王拱辰侍御史知杂沈邈等言中书枢密院聚召臣等宣示契丹来书与朝廷答书臣等窃谓契丹元昊相攻虚实未可知莫若以大义而两存之如此则于西人无革絶之由于北鄙无结怨之端从容得中不失大义先是吴育奏凯言为今之策宜使人谕元昊曰契丹汝世姻一旦自絶力屈归我我所疑也若无他者当顺契丹如故然后许汝归欵告契丹曰已诏元昊如能委谢辕门即听内附若犹固拒当为加伐如此则二敌自然归属朝廷及聚议方平当事言不能易所议焉戊戌右正言余靖为回谢契丹使先是靖言臣复料北人之意不出四策一曰借兵于我同力剪除二曰见乏资粮欲假边粟三曰军兴费广先借数岁之资四曰元昊与贼连谋不宜更通和好其它校计不可详知皆目前所宜预备者也必若假借财物拒之有辞惟与元昊絶和最难处置臣窃计之逊词以谢北敌缓词以欵西戎苟纾岁月之祸诚当今可施之策也若徇北敌而絶西戎顺西戎而违北狄俱有兵祸二敌连谋共为矛盾之势北人纔去西人必来拒纳之间动辄违碍择祸就轻守之以信使曲不在我即其要矣朝廷以靖言为然于是遣靖回谢其复书畧曰若以元昊于北朝失事礼之大则自宜问罪或谓元昊于本朝稽効顺之故则不烦出师矧延州昨奏元昊已遣杨素如将誓文入界倘不依初纳则犹可阻还如尽遵承亦难却也冬十二月富弼言河北一路盖天下之根本臣奉诏宣抚自渡河而北遍询狄人熟知祖宗以来边防事机今

来事体不及祖宗其事有七一号令不及先朝之严明二威令不及先朝之震赫三北狄苟动事系安危谁敢为朝廷主张行事此执政者不及先朝大臣主断四民心不及先朝固结五财用不及先朝丰足六将帅不及先朝有谋勇而经战阵七士卒不及先朝整肃上七件事尽臣目覩耳闻不敢缄默恐误边防之计伏望陛下特留圣念以先朝已试之效革今日因循之弊为长久之策不胜大幸寶曆五年春韩起言二边事【见要畧门】五月欧阳修言边事【见远畧门】

太平治迹统类卷八

●钦定四库全书

太平治迹统类卷九

（宋）彭百川 撰

仁宗诸臣谋国远略

天圣元年秋八月先是钱惟演自河阳赴亳州朝京师图入相张咏奏惟演险人今若遂以为相必大失天下望太后遣内侍持奏示之惟演犹望顾不前御史鞠咏语左正言刘随曰若相惟演当取白麻毁之惟演闻乃亟去王钦若知江寧徙润州王随代之在江宁会岁大饥转运使移府发常平仓米计口日给一升随置不听曰民所以饥者由兼并闭籾以要高价尔乃大出官粟私价遂平他郡计口以籾者不能自足辄多流亡天圣三年春中丞薛奎罢知秦州州宿重兵费常不足奎务为俭约教民水种谨商算岁终廩粟积者三百万征衍者三十万核民隐田数千顷复得刍粮十余万三月徙知河南陈尧佐知并州每汾水涨人忧溺尧佐为筑堤种柳数万本作柳溪亭民赖其利矣天圣四年八月诏修泰州捍海堰久废不治岁岁患海涛西溪监税范仲淹言于运使张纶请复之纶奏以仲淹知兴化县总其役役既兴会大雨雪众言不可复诏遣使按视将罢之又诏运使淮南胡令仪同度其可否令仪力主仲淹议仲淹寻以忧去以书抵纶言复堰之利表三请愿身执其役乃命纶权知秦州堰自小海塞至耿庄凡一百八十里于运河置闸纳潮水通漕水踰年堰成流民归者一千六百户民为纶立生祠天圣六年八月员外郎陈贯知泾州督察盗贼禁戢不肖子弟簿书赋租出入皆自检核常谓僚属日视县官物如己物容有奸乎州人惮其严徙为利路转运使岁饥自以职田粟赈饥率富民令计口占粟发其余活几万人诏书褒谕发运使纶知泰州纶天禧未为发运副使时盐货积亏者十年纶力奏除通楚秦三州盐户宿负官助其器用盐入优与之直由是岁增课数十万复置盐场于杭秀海三州岁入课又三百五十万居三岁增上供米八十万在江淮踰十年为民兴利除害甚众十一月冬至上率百官上皇太后寿于会庆殿秘阁校理范仲淹奏言天子有事亲之道无为臣之礼有南面之仪无北面之仪若奉亲于内行人礼可也今与百官同例亏君礼损主威不可以为后世法不报晏殊初荐仲淹闻之大惧召仲淹诘以狂率邀名且将累荐者仲淹正色抗言曰緣辱公举每惧不称为知己羞不意今日反以忠直获罪殊不能答又作书遣殊申理前奏不少屈殊媿谢又奏请太后还

政不报乞补外为河中府通判

明道元年春以新知江陵杜衍为河北都运使命衍守荆南御史郭劝言衍清直当留本朝不听会河北乏军费加衍一官往经度之不增赋于民而用足薛奎为泰州益州皆辟明镐自随还朝上问辅臣以镐所用奎曰镐文妙学博而沉挚有谋能断大事愿陛下用之二年十月秘阁校理吴遵路为开封推官太后称制遵路条奏十余事语切直忤太后出知崇州遵路至州即令转市吴中米以备岁歉已而果大乏饥民以济自他州流者十全八九仲淹安抚淮南荐遵路为郡得古人风乞以其救灾事迹颁州郡为法并付史馆

景佑元年八月甲子叅政宋绶以帝富于春秋天下无事虑燕乐有渐乃上言自古守成之君皆兢兢抑畏不忘顾畏者何也人心逸于久安害生于所忽故立防于事之始销变于未萌之前若事至而应不亦殆欤愿饬羣臣勿以承平自怠九月丁酉帝康复许布以针进上疾愈范仲淹知达州未几徙苏州州北大水民田不得耕仲淹疏五河导太湖注之海未就徙明州运使言仲淹治水有绪愿留以毕其役庚子诏复任十一月御史杨沔言同安尉李安世以上书狂悖下吏伤纳谏之仁责降监永州酒税以唐天后覆车为戒二年正月徙江东运使蒋堂为淮南转运使堂在淮南岁荐吏工百员曰十得二三亦足报国矣三月己丑以中丞杜衍权判吏部流内铨先是选补科格繁主判不能悉阅吏多受贿衍视事即敕吏取铨法问曰尽乎曰尽矣乃阅视具得本末曲折明日晓诸吏无得升堂各坐曹听行文书铨事悉自予夺由是吏不能为奸利居月余声动京师后改官知审官院裁制如判铨法度支判官段少连为两浙转运副使旧使者至郡县索簿书不暇殫阅往往委之吏胥持以为货少连命郡县上簿书悉织识遇事问取一二日自阅摘其非是者按之余不及阅者全织识以还由是吏不能为奸州县簿书莫敢不治石介不召【欧阳与杜衍书云可谓中书举动也御史台初辞以言事不召耳】

康定元年十一月丙子河东运使杨偕为枢密直学士知并州有中官预军事素横前帅优遇之偕至一绳以法命率所部从副部署赴河外戒曰遇贼将战一禀副部署中人不从捧檄诉偕叱曰汝知违主帅命即斩首乎监军怖汗不觉堕笏翌日告疾未几告卒于是军政肃然五月乙丑王德用为定州都部署至官日教士卒习战顷之皆可用契丹使人来覘或请捕杀之德用曰彼得其实以告是服人之兵以不战也明日大阅于郊提桴鼓誓师进退坐作终日不戮一人乃下令具糗粮听吾鼓声视吾旗所向覘者归告狄中谓兵将大入既而复议和兵乃解时朝廷发兵屯川几六万寓居逆旅及民间闾塞城市未尝有一人敢喧呼暴横将校相戒曰吾辈各务敛士卒勿令扰我菩萨一日仓中给军粮军士以米黑諠哗纷扰监官惧逃匿有四卒以米来见德用德用曰从我入仓视之乃往召專副曰昨者我不令汝给二分黑米八分白米乎曰然然则汝何以先给黑米后给白米此辈见所得米黑以尽如是故諠哗尔專知对曰然某之罪也德用叱从者杖專副二人又呼四卒谓曰黑米亦公家不给与汝曹当弃之乎汝何敢乃尔諠哗四卒相



顾曰向者有八分白米故尔某等死罪德用又叱从者亦各杖二十召指挥使骂曰衙官汝何敢如此欲求配决乎指挥使再拜流汗乃舍之军中肃然僚佐皆服其能处事张亢权知瀛州兼部署亢去高阳每遣谋者厚与金帛无所吝亢闲处便坐弟子行首入曰愿屏人白事亢骂久之曰我非合使剧我外生女予自小教歌舞甚妙丽为敌骑掠去今幸于敌王日夜居帐中将卒皆事之今遣人有所市合使善结之敌中情伪如指掌也亢曰所市何物曰某大王纳聘须紫竹鞭合使所执可与也凡所市物皆从之自是敌中动静必告时边臣多警每一挂答费甚惟高阳独否【龙川别志】

庆历三年韩琦既至陕西居岁大饥羣盜啸聚张海郭邈等率众相合于商号之郊宣毅保健邵兴等又招诱铸钱监商号蓝田丞驰报于延雍帅臣未有所处琦寻遣属官往商号料简钱监役兵其旧素沿边禁兵即令却归元配州军壮健役兵并押归陝府填龙猛龙骑壮健阙额郡兴榜致之谋遂不得行又遣内侍黄琮范廷赍宣抚司榜收其散军谕以免罪归所属仍召谢云行等将沿边土兵入山捕张海等擒捕余党殆尽關辅遂安堵矣是冬大厚河中同华十余州军物价翔贵居民相率东徙琦即选官分诣州县发省仓以賑之奏差提刑许崇寿尊切往来提举蒲华同三州所活凡二百五十四万二千五百三十七人他州人称是时民力久困琦乃蠲赋役察官吏能否者升黜之又以兵数虽多杂以疲老耗用度选禁军不堪征战者停放一万二千余人后田况乞选诸路军不堪战者为厢军云或谓兵骄久一旦澄汰恐致乱则去年韩琦汰边兵万余岂闻有乱者哉庆历五年春先是田况用事言比来灾咎频仍蝗旱继作陛下责躬引慝不遑宁处以至躬祈道佛并走羣望熏祓之意可谓至矣然常详观当世之弊验灾失之由其实敛役重而民愁和气伤而沴作役敛之重由国计之日窘国计日窘由冗兵之日蕃今天下兵已踰百万比先朝兵几三倍矣宜分遣干臣拣选诸路宣毅保健等军不堪战者并降为平常厢军不堪役者并放停议者必曰兵骄久一旦遽加澄汰恐立以致乱此虑事之疎也孱弱之兵既不堪战勇强者亦耻为伍去年韩琦汰边兵万余人岂闻有为乱者今天下财用不足以贍冗食之兵倘或顾恤细故而不思救弊之原臣窃忧之三月右谏议韩琦言杜衍为相一百二十日而罢范仲淹自乞保边朝廷任之固亦有名富弼以河朔边备未完又自请行事毕还朝甫及都闲未得一陈于陛下之前责补闲郡中外不知弼得罪之因臣亦痛弼何负朝廷而黜辱至此臣恐自此忠臣义士指弼为戒孰肯为国家之用所损非细兼云近日臣僚多务攻击忠良取决私忿非国家之福疏入不报琦请补外罢知扬州是月欧阳修上疏言杜衍韩琦范仲淹富弼等相继而罢必有朋党専权之说上惑圣聪略云杜衍为人清谨而确守规矩仲淹则恢廓自信而不疑韩琦则纯正质直富弼则明敏而果统四人为性各有不同虽皆归于尽忠而其所见各异故于议事多不相从杜衍欲深罪滕宗谅仲淹力争而寬之仲淹谓契丹必攻河东请亟修边备富弼料九事言契丹必不来如尹洙亦仲淹之党争水洛城事琦是尹洙而非刘沪仲淹是刘沪而非尹洙此数事尤为至明陛下素已知者此四人可谓公正之贤也平日闲居则相称

美之不暇为国议事则公言廷争而无私以此而言臣见杜衍等直得汉史所谓忠臣有不和之节而小人谗为朋党可为诬矣疏入不报指修为朋党者益恶焉戊申章得象罢为镇安节度判陈州得象在中书八年远名势宗党亲戚一切抑而不进方陝西用兵上銳意天下事进周韩范富使同得象经画当世急务得象无所建明琦等去得象居位自若御史里行孙抗言之得象十二章求罢上不得已乃许之癸巳河北都运按察使欧阳修论北敌地界略云臣见朝廷常有惧敌之色而无忧敌之心夫忧之与惧名近而意殊忧者深思极虑而不敢暂忘惧者临事惶惑而莫知所措今边防之事措置多失其机者惧敌之意过深也若能察其强弱之形得其情伪之实则目今之事诚不足惧而将来之患深有可忧奈何不忧其深可忧而反惧其不足惧又曰朝廷不以此事为忧又怯惧如此既曰惧矣则于用人之际又若忽其不忧此臣之所未喻也甲戌修降知滁州权知开封杨日严使狱吏附致其罪钱明逸言之也始诏苏世安王昭明杂治安世独辨修之诬虽忤执政意二人俱得罪然君子多之九月甲辰徙江南按察使杜紘知衡州紘常自言不法之人不可贷如使肆贪残于一郡一邑害于良民千万家不若去之不利一家耳闻者望风解去或及期不敢之官然竟苛刻下迁富弼荐为按察使是年诏改范富所行事冬帝常遣中使察视山东盗贼还奏盗不足虑而言兖州杜衍郓州富弼山东尤尊爱之此为可忧帝欲徙二人淮南育曰盗贼无足虑然小人乘时以倾大臣非国家之福议遂格壬寅刘湜兼御史知杂议者谓湜探宰相意深致尹洙罪故得优擢御史包拯还自契丹言河北沿边将帅未甚得人乞加精选庆历六年秋九月户部副使夏安期为陝西都转运使安期与诸路安抚使议边费凡奏省员及汰边防之不任役者五万人八年三月翰林学士张方平既退朝会锁院草制方平即条对所问夜半与制书俱上【时夏竦困执中令坐门制诏言事】曰康定庆历之间朝廷议刺民兵备厢军充禁旅匝任台谏屡上章疏极言其害至于今日事势果然臣昨在三司计会天下财用出入之际及建隆以来兵数乞朝廷速加图议太祖兵不及十五万人真宗增至四十二万余人通三朝旧兵且八九十万人其乡军义勇厢军等不在此数凡此冗兵非惟困天下财用且成天下之大患若不早汰后无及矣然兹事体大非君臣同心上下协济则事必难成又云臣曾任勾当三班院在院使臣景佑中约计四千余员今六千五百余员臣勘合学士及两省以上官景佑中四千余员今六千余员臣任御史中丞将本台班簿点算景佑中京朝官不及二千八百员臣判流内铨取责在铨选人毕竟不知数目大约三员守一阙略计万余人十年之间所增官品如此若更五六年其将奈何愿陛下鉴祖宗故事重爵赏以待功劳责久任以观能効亦馭将帅之一节也帝览奏惊异诘旦更赐手札问诏所不及者方平复上对曰凡臣所陈实时要务然皆事之一节耳至于天下大势臣请为陛下言之臣观古今治乱之变不在其它只在天下之势合事无大不成天下之势离事无小不败愿陛下深为留神务在通上下之情欲上下之情合在审于听受而已上览奏益异之书文儒二字以赐方平御史中丞鱼周询答手诏所问今元昊幼子新立乃朝廷寬财用惜民

力之时也速宜经制以纾匱乏愿委安抚使与本路守边掌计臣僚同议裁减冗兵节省浮费禁止横敛廩假贫民去武臣之庸懦及守宰之贪残仍冀特发宸断出内帑钱助關陝经费使通盐商之利改钱币之法宣布德泽与民休息然后劝勉农桑隱括税藉收遗利抑兼并则公有羨财私有余力矣翰林侍读学士叶清臣在永兴条对甲寅诏书所问其言多劇切权贵云中书政令不平赏罚不当则箝口结舌未常敢言人主纖微过差或宫闈小事即极言过当用为讦直供职未踰岁迁擢已加伦等宋禧为御史劝陛下宫中蓄犬设棘以为守御削弱朝体取笑夷狄不加诃谴擢为諫官以此术略献纳左右王逵两为湖南转运使所至苛虐诛剥百姓徒配无辜特以宰相故旧不次拔擢遂有河北之行如此是长奔竞也其它所列利害甚众皇佑元年户部副使包拯言教民兵增禁兵略云边任武将未甚得人将者人之司而邦国安危所系可不审择之道不当限以名位高下但辨其能之可否苟得实材则擢而用之專而委之必有成功若不素为之具缓急旋求之必无所及矣契丹与夏人相攻聚兵近塞遣使来告边候稍警帝御使殿访近臣以备御之策权三司使叶清臣对曰陛下临驭天下二十八年未尝一日自暇逸而叛羌点寇频岁为患顾上无失德朝无阙政而敢尔者岂非将相大臣不得其人不能为陛下张威德而攘邊鄙乎明诏问辅翼之能方面之才与夫帅领偏裨当今孰可以任此者臣以为不患无人患有人而不能耳今辅翼之臣抱忠义之深者莫如富弼为社稷之固者莫如范仲淹谳古今故事者莫如夏竦议论之敏者莫如郑戩方面之才严重有纪律者莫如韩琦临大事能断者莫如田况刚果无顾避者莫如刘涣宏达有方略者莫如孙沔至于将领偏裨贵能坐运筹策不必亲当矢石王德用素有威名范仲淹深练军政龐藉久经边任皆其选也狄青范全颇能驭众杨偕沉毅有术略张亢倜傥有胆勇刘貽孙材武刚断王德基纯慤劲勇此可补偏裨者也至若威驭绥宁即竦戩尤其所长明诏问朔方灾伤军储缺乏此则三司失计置转运使不举职盖非一日既往固已不咎来者又不复追臣未见可也且如施昌言乘久弊之政方欲竭思虑辨职事一与贾昌朝违戾遂被移徙军储何由不乏自去年秋八月计度市余而昌朝执异议今仲春而尚未予夺财赋何緣得丰先朝置内帑本备非常今为主者所吝自分彼我缓急不以为备则臣不知其所为也诏问战马之絕何策可使足用臣前在三司常陈监牧之弊占良田九万余顷须费钱百缗天闲之数纔三四万急有征调一不可用今欲不费而马立办莫若赋马于河北河东陝西京东西五路上户一马中户二户一马养马者复其一丁如此则坐致战马二十万不为难矣三月户部副使包拯答诏所问御边之策拯言备凶荒入穀赎罪汰老弱之兵以寬民力臣云所陈皆国家之常务而言者多反之臣谓今切务在择政府大臣敢当天下之责独立不惧以安危为己任者委以经制四方庶几可弭向者之患而纾陛下之忧【诏所问在新政门】又言分兵就粮诸军一遇有警实时可以发之若谓敌好方坚趋过目前以为成算惮于更张措置臣恐日朘月剥中外益以殫劳一旦用兵则重加暴敛民必怨叛肘腋之下皆为仇讎岂敢御寇哉此乃国家根本之患若不銳意而速



圖之臨事无及矣癸丑詔徙河北阙粮处士兵于近南州军候措置边储有备复令还屯从包拯之言也夏四月丁亥右司谏钱彦遠上劝农疏曰农国家急务所以顺天养才御水旱制蛮夷之本原也唐开元户八百九十余万而定垦田一千四百三十余万顷今国家户七百三十余万而定垦田二百一十五万余顷其间逃废之田不下三十余万顷是田畴不辟游手多也劝农其可不兴乎上嘉纳之侍御史知杂事何郯言今财力大屈所患在于兵冗竭天下所出之物仅能以供亿陛下幸听臣言特行处置一路之内可三数万人亦省费之一端【十一月壬戌诏】定与施行之郯又言方今天下之患莫甚于冗食未去冗食未去不可以节财用财用未节不可以除横敛横敛未除不可以寬民力民力未寬不可以求治求治宜以去冗食为先包拯又言略云臣谓冗兵耗于上冗使耗于下欲救其弊当治其原治其诏见圣政门原者在乎减冗杂而节用度若冗杂不减用度不节虽善为计亦不能救也今夫山泽之利竭矣征赋之入尽矣幸而西北无事乃是可为之时若不銳意而改图俱务因循必恐貽患将来有不可救之患矣愿陛下上体祖宗之成宪下恤生灵之重困因谓设官太多则宜艰难选举澄汰冗杂谓养兵太众则宜罢招募拣老幼土木之功不急者罢之费出无名者并除之懲禁中奢侈之端节上下浮枉之费当成平之代建长久之策愿陛下留神省察申命宰执而力行之天下幸甚天佑二年二月左正言贾黯自以年少遭遇备位谏官果于言事首论富弼韩琦范仲淹可大用及杜衍贬黯言衍无罪且旨从中出不因臣下弹奏恐自此贵幸近习言一得入则将肆谗毁害及忠良不可不察秋甲午谏院吴奎言陛下十数年以来每降诏令及所行事或为横议所移或为奸谋所破中外不甚为信皆谓陛下言之虽切而不能行行之虽銳而不能久自明堂降诏杜絕内降忠贤莫不增气羣小莫不革面愿陛下谨守前书坚于金石如是则太平之风有望于兹矣四年知谏院包拯为河北都转运使在谏院二年数论斥大臣权幸请罢一切内除曲恩又列上魏公三疏以为龟鉴又列条七事奏疏多见采纳一曰险伪之臣诬陷良善当研窍其实二毋以朋党疑臣下三纳公议以别白臧否四毋主先入之说五革猜忌之近制而法景佑之初六罢妬贤嫉能之臣毋俾久塞要路七躬阅谪藉之臣而加宠擢彰化节度知延州狄青为枢密副使御史王举正言青出兵伍为执政有不可者五御史郭贄亦以为言不听青时面涅犹存常敕青传粉除字青指其面曰陛下擢臣于功不问门第阅臣有今日以涅耳愿留此以劝军中不敢奉诏皇佑五年壬戌知定州韩琦知并州琦至并州首罢前守李昭亮所兴不急之务奏逐走马承受廖浩然奏略云既诬逐一大帅又望风诬逐一同职官朝廷略不辨证皆从其请官吏皆忧叹不安且浩然性贪恣不法状甚多愿召还使保全不然臣将行法矣上俾浩然驰归敕本省鞭之秋庄宅副使赵滋为并代部署初滋为定州路驻泊都监常给事食同列言粟不善滋叱之曰尔欲以是怒众耶使众有一言当先斩尔以徇韩琦闻而壮之以为真将帅才滋有是命从琦请也三月殿中侍御吕景初言救灾之术乞罢招补而汰冗滥又言为陛下计惟急于择士笃于任贤无以朋党疑臣下若贤者类进则可以朝廷选

将帅明纪律岁月磨之使变【陈熊兵最】备严常若敌至则夷狄不敢动而有所捍御矣

至和元年马遵等以言梁适罢官职中丞孙抃言臣昨论梁适事今风闻吕景初等并议谴谪必是奸人以巧言移人主意遂使邪正曲直溃然倒置又累奏乞还遵等不报丙申知谏院范镇言陛下每遇水旱之灾必露立仰天痛自刻责尽心竭虑无所不至盖下吏不称职使陛下忧勤于上人民苦愁于下也夫以国家用调责之三司三司责之运使运使责之州州责之县县责之民民竭其力以佐公上而自用不给则嗟怨之气干戾天地此水旱所以作也愿诏中书枢密大臣考求祖宗朝廷建隆天圣中官吏与所蓄兵及天下人赋之数而斟酌裁节之庶国用有常民力有余陛下虽高拱无所事而天地之和应矣至和元年秋九月权三司使杨察为户部侍郎时提举集禧观事内侍杨永德请察建抃河置水递铺察条其不便罢之永德毁察于上前察乞置帝从其请知谏院范镇言陛下宜以察所争四事下中书枢密大臣详正是非付有司依公施行殿中侍御史赵抃亦言察若有罪不当遽转官资若本无罪不当遽罢不报抃西安人也为御史弹劾不避权幸时号铁面御史冬十月范镇又言臣常建议方今官冗兵多民力不堪请诏中书枢密大臣裁节损益累月不报退自念中书之务莫急于此朝廷恬然不以为怪此臣区区不得隐默也云景德时兵不满五十万今兵倍之矣敌纔遣一介之使增益者又数万及其去也中外相庆谓无事殊不知新兵之费岁损一百万缗矣其费非出于建议者之家一出于民也方愁苦之时又重赋之以为满计者吾未见其可也又云臣以为备契丹莫若宽河北河东之民备灵夏莫若宽关陕之民备云南宽两川湖岭之民备天下宽天下之民民力宽则知自爱虽有外虞人人可以为兵用人人自爱之兵以御外虞何往而不克何征而不服哉又言官所以养民者也兵所以卫民者也今养民卫民者反以残民而大臣不知救臣恐朝廷之忧不在四夷而在冗兵与穷兵也

至和二年初命张方平知益州未行而程戡已先入为三政运使高良夫摄守事西南夷有邛部川首领妄言蛮贼智高在南诏欲寇蜀良夫闻大惊屯兵边郡发民筑城民大惊扰朝廷发陕西步骑戍蜀兵仗络绎于道路促方平行许以便宜从事方平言南诏去蜀二千余瑞安得举大兵为智高寇我哉必妄也臣当以静制之道遇蜀卒兵仗辄遣还入境下令邛部川曰寇来吾自当之妄言者斩悉归边兵罢筑城之役散遣弓手会上元观灯城门皆通夕不闭蜀人遂安已而得邛部川之始为此谋者斩之梟首境上西南夷大震庚子御史赵抃言臣近奏执中不学无术措置颠倒引用邪佞招延卜祝私讎隙排斥忠良很愎任情家声狼藉入奏多日未赐省纳赵抃又言陈执中之罪臣近累奏未蒙施行风闻同知谏院范镇妄行营救小人朋邪不识恩出陛下但知率由执中伏望取内外之公议立朝廷之大法镇言陛下进退大臣不以职事而以私事故言事官大率急人私事而缓其职事执中身为平章变祖宗大乐隳朝廷典故缘葬事除宰相除翰林学士除观察使其余僭赏不可胜纪陛下罢内降近日内臣无名超资改转月须数人又

天下民困正为兵多今益不已天变之发实为此事陛下释此不问御史又專治其私舍大责细臣恐退执中未当天变乞以臣章宣示执中御史后付学士草诏使天下知陛下退大臣不以家事而以职事后来执政不恤家事而尽心于职事初翰林吕溱上疏论执中内实奸邪外诈强项厯数其过恶十余事上还其疏溱曰以口舌论人是阴中大臣也请付执中令自辨溱于是以侍读改滁州辞日特赐燕资善堂遣使谕曰此会为卿设可尽醉也仍诏自今经筵出者亦如例宰臣刘沆陈杜请托侥幸之路三弊既施行众颇不悦未几复故知谏院范镇言伏见今岁无麦苗朝廷放免赈贷存恤之恩不为不至然人民流离至父母妻子不能相保者平居无事时不少寬其力役轻其租赋岁虽大熟使民不得终岁之饱及少歉虽加重施已不济事矣此无他重敛之政在前也今特一穀不熟尔流民如此就死九穀不熟朝廷将如之何臣以为水旱之作由民之不足而怨民之不足而怨由有司之重敛有司之重敛由官冗兵多与土木之费广而经制不立古今之言太平者正于使民之足食也今诚能立经制省官与兵节土木之费使民足食陛下高拱深居而太平可以坐致顾陛下信任大臣如何尔镇又言周制冢宰制国用唐宰相兼盐铁转运或判户部或判度支是宰相制国用自古然也今中书主民枢密主兵三司主财各不相知或财已匱而枢密益兵不已民已困而三司取财不已中书视民之困而不知使枢密减兵三司寬财以救民困者制国家之职不在中书也而欲阴阳和风雨时家给人足天下安治不可得也乞使中书枢密通知兵民财利大计与三司量其出入制为国用则天下民力庶几少寬以副陛下忧劳之心真宗时内外兵九十一万二千宗室吏员受禄者九千七百八十五宝元以后募兵益广宗室蕃衍吏员益增至是兵百二十五万九千宗室吏员受禄者万三千四百四十三禄廩俸禄从而增广又景德中祀南郊内外赏賚缗钱金帛总六百一万及享明堂增置一千二百余万故用度不得不屈自天圣以来帝每以经费为虑命官裁节者数矣臣下亦屡以为言有司不能承上之意牵于习俗卒无所建明议者以为恨焉丙辰侍御史赵抃言臣累上章乞正宰相陈执中之罪伏蒙陛下省纳开悟宣付政府施行执中退处于私第不赴朝请前后数月此月二十二日执中遽此趋朝再入中书供职如故中外惊骇不测圣情臣不知陛下以执中之罪为有耶以臣之言为是耶非耶陛下若以臣言为是以执中为有罪乞即陛下早正朝廷之法而罢免相位以从天下之公议陛下若以臣言为非而执中无罪亦乞陛下正朝廷之法而窜臣遠方宣布中外以诫后来五月范镇又言河北招兵略云与其离民之心以备契丹契丹未至而民力以先困国用以先匱孰若固民之心以备契丹契丹虽至而民力有余国用有备其利害若视白黑而大臣以为难者臣所以深感也又言陛下诚罢今招兵敕大臣使具太祖时赋若干兵若干官若干太祖真宗天圣中赋若干兵若干官若干约今赋入之数十分为率七分给郊庙宫省诸费三分留补水旱及缓急非常为之十年仅可以言治欧阳修贾黯补外知制诰刘敞言二人复留陈执中竟罢为镇海节度判亳州赵抃攻镇尤力镇由是与抃有隙范镇乞罢黜倚权奸猾使良善得以立嘉佑元年春御史



张升奏台谏官乞许依例上殿奏事以开言路寻有诏许中书上殿甲子赵抃言臣去年奏陈执中乞下其事而罢免之是时范镇不顾公议阴为论列营救臣寻与御史范师道抨镇阿党今镇除知杂臣见居台宪之地趣向各异难为同处伏望除臣江浙一州军合入差遣范镇言臣前后五奏留中赵抃不知本未至今交结毁臣不已伏乞检会前奏并今状付中书明辨施行上之得疾也贾昌朝阴结右班副都知武继隆令司天官二人于大庆殿廷两府聚处执状抗言国家不当穿河于北方致上体不安文彦博知其意顾未有以制数日二人又上言请皇后同听政亦继隆所教也史忘聪等以其状白执政彦博视而懷之有喜色同列问不以告既而召二人诘之曰汝今日有所言乎对曰然彦博曰天文变异汝职所当言也何得辄预国家大事乎汝罪当族二人色惧变彦博曰观汝真狂愚尔未欲治汝罪自今无得复尔二人退彦博乃以状示同列同列皆愤怒曰奴敢尔妄言何不斩之彦博曰斩之则事彰灼于宫中不安众皆曰善及议遣司天定六塔于京师方位彦博复遣二人往继隆曰请留之彦博曰彼何敢辄妄言有人教之耳继隆默不敢对二人至六塔恐治前罪乃更言六塔在东北非正北无害也壬子兵部侍郎平章事刘沆罢为工部尚书观文殿大学士知应天府范师道赵抃既出御史中丞张升言天子耳目之官进退用舍必由陛下奈何以宰相怒斥之愿明曲直以正名分凡十七上沆知不胜乃自请以本官兼一学士守南京故有是命升为中丞弹劾无所避上谓升曰卿孤立乃能如是升曰臣朴学愚忠仰托睿圣是为不孤今陛下之臣持禄养高者多而赤心谋国者少陛下似孤立也上为之感动嘉佑六年七月壬寅同知谏院司马光以二札子上殿其一论君德曰臣切惟人君大德有三曰仁曰明曰武其二论御臣曰臣闻致治之道无他在三而已一曰任官二曰信赏三曰必罚丁卯司马光进五规一曰保业二曰惜时三曰遠谋四曰重微五曰务实七年五月知谏院司马光上疏言财利曰为今之术在随材用人而久任之在养其本源而徐取之在减省浮费而省用之夫农天下之首务也古人之所重今人之所轻岂独轻之又困苦莫先焉何以言之农者食人劳力衣粗食粝官之百赋出焉岁豐贱贸其穀以应官私之求岁凶则流离冻馁先众人填沟壑如此而望浮食之民转而之南亩难矣

### 仁宗平桂阳监贼

庆历三年九月乙丑湖南转运司言桂阳监蛮獠内寇自衡州常宁县属于桂阳郴连贺韶四州环紆千余里蛮居其中不事赋役谓之獠人有吉州巫黄捉鬼与其兄弟数人皆习蛮法往来常宁出入溪洞诱蛮众数百盗贩盐杀官军逃匿峒中既招出而杀之又徙山下民他处其党遂合五千人出桂阳监蓝山县华阴峒害巡检李延祚潭州都监张克明诏发兵捕击以刘沆为龙圖阁直学士知潭州殿中丞杨畋提点荆湖南路刑狱督之畋至湖南募才勇深入峒讨击然南方久不识兵士卒多畏惧及战孤浆峒前军却大兵悉溃畋踣岩下藉浅草得不死十一月诏转运使郭辅之等如未能以兵剪除即就便招抚四年五月以金部员外郎周陵为司勳员外郎荆湖南路转运按察使二月遣入

内供奉官王昭明往宜州招募勇敢入峒捕击三月又以殿中侍御史王丝为荆南路体量安抚提举捉贼遣内侍赍手诏体量捉杀次第以闻諫官欧阳修言臣风闻湖南蛮贼近日渐炽杀戮官吏锋不可当新差杨旼锐于击讨与郭之辅异议不肯招降又王丝去时朝廷亦无别处分虑丝到彼与旼同谋盖蛮贼只可招携卒难剪扑而旼等急于展効恐失事机以臣思之莫若罢兵曲赦示信推恩可使听命今若击之不已为害愈深臣欲乞速令两府大臣共思长策决定妙谋若迁移后时致彼昌炽兵久不已害之无涯修又言杨旼与蛮贼斗敌杀得七八十人首级仍闻入彼巢穴夺其储粮挫贼之锋增我士气旼之勇略固亦可嘉然朝廷谋虑事机宜思久远切恐上下之心急于平贼闻比小捷便谓兵胜不能镇静而外示轻脱其闻二事允合深思一曰不待成功便可厚赏二曰谓其可杀更不肯招苟如此则计之大失而事之深害也今湖南捕贼者杀一人头赏钱十千官军利赏见平人即杀平人惊惧尽起为盗今若因旼小胜示以恩威正是天与招降之时机不可失伏乞即降敕书獎谕授以事宜俟彼招安便行厚赏仍乞明说此意谕与杨旼其赏典仍少迟留庶合事体余靖言闻荆湖南路州军以羣盗之故禁民不得耕种即不知出自何人指挥此仍驱民为盗耳乞特降指挥切责监司帅臣诸州长吏疾速出榜告谕人户并令依旧任使便耕种靖又言湖南以钱绢募斩蛮贼首级军人利于厚赏逢人即杀今又领兵九疑以尽杀为期则一方之民永陷涂炭矣伏乞朝廷抽回九疑之军其蛮人首领许以官封平民各令归业以示陛下含忍之德余靖又言风闻湖南蛮夷大烧城郭为害不止者切以贼本山獠居在崑险啸聚亡命出行抄掠数年以来未甚为害去冬今春气焰渐盛其故何也盖缘官军枉杀良民以贪厚赏近山百姓皆入贼中杨旼等攻贼巢穴意在荡除由是贼出攻城以争死命虽闻朝廷屡令招抚而杨旼鸷勇欲尽贼徒臣愚以为憑朝廷之力取数千之贼胜之未足为武不胜适足为羞今来民皆逃亡城无蓄积必须急战乃见胜负若能尽贼但恐百姓已尽臣切料贼势已穷欲降久矣但缘杨旼固执前议贼亦恨之旼不罢去贼必疑我臣谓宜因杨旼待罪之际别与差遣假为此说招谕蛮人但旼不晓朝廷素求招纳之意多行杀戮今專委良将惠懷吾民百姓因此可以复归山獠因此可以抚绥事定之后用旼不迟不可重惜杨旼而轻湖南一路百姓靖又言中外措置湖南蛮事乖错六月降敕榜下知潭州刘沆招谕九月以徐的为荆湖南路安抚使諫官欧阳修言朝廷虑事不早及其临事仓皇常多失误昨湖南蛮贼初动差刘沆知潭州令專了蛮事沆未到又差杨旼作提刑專了蛮事旼未到差周陵为转运使又令了蛮事周陵差敕未到又自朝廷遣王丝安抚專令了蛮事王丝方在路又自淮南遣徐的往彼令專了蛮事不惟任人不一难责成功兼彼数人一时到彼不相统制凡于事体见各不同使彼一方从谁则可奏入不报的寻卒丝徙广东十月知潭州刘沆大发兵以敕榜至桂阳监招降叛蛮二千余人使散居所部十一月余靖言臣今欲于南郊赦书中特示存抚旧荆湖南北路人户先胁从及劫入贼中者限赦书到后百日内经官首身并令州县支与旧来田业并与赦罪靖又言乞朝廷抽回杨旼并九疑山下兵

革昭示朝廷不尚杀伐之意五年三月诏荆湖南路安抚转运提刑蛮事听便宜从事八月以礼宾副使宋吉为荆湖南路提杀蛮人九月湖南安抚使刘沆言与提点刑狱杨旼等八路入讨蛮獠破荡桃由平能家等处巢穴十月诏始闻湖南獠贼余党欲降其令本路罢出兵攻守及告谕逃匿者复归旧处仍令州县存抚之时唐和等复入寇与礼宾副使胡元右侍禁郭正赵鼎三班差使殿侍王孝先战于蓝山县华阴峒隘口元等败之十二月新知浑州刘夔言唐和等比经胡元败后益聚众生疑恐转为边患乞降空头宣命十道欲行招安与捕逐处溪洞守领从之开封府判官祠部员外郎周沆为荆湖南路转运使代周陵经画蛮人沆以蛮骤胜方骄未易懷服宜须秋冬进兵蛮地险气毒其人骄悍善用铤盾北军不能与之角请选邕宜融三州澄海忠敢知其山川习其技艺者三千捣巢穴余兵络山足出则猎取之使其势穷力屈然后招抚也六年三月以洛苑使蒋偕充荆湖南路钤辖四月以湖南都监宋守信兼知桂阳监刘夔遣人谕蛮首使降不从五月夔举兵败唐和于银江源遂进破其巢穴蛮兵遁去前将以帛募蛮首至是有持首取赏者按问乃辄杀平民夔诛之而罢募九月户部判官祠部郎中崔峰为荆湖南路体量安抚往议讨除招安之策宋守信言唐和啸聚千余人众为盗五六年卒不能克者朝廷不许攻讨故也今衡州监酒黄士元颇知溪峒事愿得敢战士千人土丁二百优给金帛使之捕逐必得然后已彼既势穷必将款附朝廷用其策大发兵讨贼贼遁入郴州黄莽山由赵峒转运入英韶州界依山自保时出抄掠峰又言太常博士杨旼常战孤浆洞下人乐为用今欲殄贼非旼不可乃换东染院使荆湖南路钤辖七年五月置桂阳监华阳寨以禁军五百人守之唐和令其子执要领诣官自言愿贷粮米居堡峒中朝廷乃补唐和盘知谅房承映承泰文运等并为银青光禄大夫检校国子祭酒兼察御史武骑尉充峒主知谅等和党也杨旼曰贼剽攻湖广七年所杀不可胜计今耗资粮据峒穴其势必不久复乱欲招贼出峒而贼终以不听明年贼果出阳山旼即领众趋岭外涉夏秋凡十五战乃溃

### 仁宗平欧希范

广西环州隶宜州羈縻领思恩都毫二县蛮欧希范者思恩人也狡黠颇知书常举进士试礼部景佑末与其族正辞应募从官军讨安化州叛蛮既而希范击登闻鼓求録用事下宜州而知州冯伸已言其妄编管全州正辞亦常自言功不报二人皆缺望希范遁归与正辞率其族人及白崖山酋蒙■〈是干〉荔波峒蛮谋为乱将杀伸已且曰若得广西一方当建为大唐国会有日者石太清至因使之筮太清曰君贵不过封侯乃令太清择日杀牛建坛场祭天神推蒙■〈是干〉为帝正辞为奉天开建国贵王希范为神武定国令桂州牧皆北向再拜以为受天命又以欧丕绩为宰相余皆伪立名号补授四十余人

庆历四年正月丙子率众五百破坏州焚积聚以为武城军又破带溪寨下镇宁州及普义寨有众一千五百事闻诏转运钤辖司亟发兵击捕之遣入内供奉官王昭明往



宜州召募勇敢人入峒捕击四月丁酉以京西转运按察使杜杞为广南西路转运按察使兼安抚使宝元初朝廷出兵讨安化叛蛮杞时知横州言岭南诸郡无城郭兵甲之备牧守非易横为邕钦廉三州咽喉险阻可以屯兵应援三郡贼或奔衡是为控扼邕管内制广源外控交趾愿择文臣达权变练岭外事者以为牧守使经制边事于是执政请用杞平欧希范乃自京园召见迁秩而遗诏广州发澄海军一千人屯宜州捉贼李德用出韩婆岭击希范斩获甚众俘伪将崔盈谭护二人希范自是入保荔波峒间出拒官军谏官余靖言欧正辞曾入蛮洞杀贼诣阙自陈将帅贪功不录其绩朝廷吝赏不与其恩因此怨恨归而作贼今贼首未获而卖卦巡官随行人力坐族诛何益于事七月丁卯诏广西转运安抚司出榜宜州有获希范正辞蒙赶者人赐袍带钱三万盐千斤杜杞至宜州先遣急递以檄谕蛮听其自新比至宜州蛮无至者■〈木巳〉得州校吴香及狱囚区出宏脱其械与衣带使入洞说谕不听五年三月■〈木巳〉勒兵攻破白崖黄泥九居山寨及五洞焚毁积聚斩首百余级复环州希范与蒙赶散走使香招赶出降■〈木巳〉谓将佐曰蛮依险阻威不足制则恩不能怀所以数叛今特以穷蹙来降后必复动莫如尽杀之乃击牛马为曼陀罗酒大会环州坐中伏兵擒诛数千余人昼五藏为国释疴病被胁与非因败而降者百余人后三日又得希范醢以遗诸溪洞

### 仁宗筑古渭寨

古渭州距秦州三百经哑儿峡边臣屡欲城之而朝廷艰于馈饷不许陕西转运使范祥既议解盐商骤加狃于功利知秦州张升未至祥权领州军不谋于众遽请修筑未得其报辄自具役纳藁毡世居渭州密迩夏人境夏人牧牛羊于境上藁毡掠取之夏人恐欲攻之藁毡惧力不敌因献其地冀得戍兵以敌夏人藁毡先自跨有九谷后浸衰仅保三谷余悉为他族所据青唐族最强据其盐井日获利可市马八疋藁毡白祥比本我地亦乞汉家取之祥又多夺诸族地以招弓箭手故青唐及诸族皆惧举兵遂叛

皇佑五年三月攻破广吴岭堡围哑儿峡寨杀官军千余人诏秦凤路都总管刘涣招抚毋得深入轻战降范祥为屯田员外郎议者谓责之太轻命陕西转运使李参代范祥专制置解盐张升既至秦州诸弃古渭勿城命户部副使傅求兼秦凤路置粮草顷之以升知青州徙文彦博知秦州御史中丞孙抃言昨者筑城境外众蕃之心已皆不安今又特命旧相临边事异常例必转增疑惧或生他变知永兴军晏殊秩将满朝廷必藉彦博才望不若遣镇關中兼制秦凤事宜庶蕃部不致惊扰傅求言今弃其城夏人必据其地更为秦患且已得而复弃之非所以强国威也按藁毡父祖皆授汉官其地非夏人所有明甚但当更名古渭寨不为州以应榜招青唐等族酋谕以朝廷今筑城寨实为汝诸族守卫而汝叛何也皆言官夺我盐井及地无以为生求曰今不取汝盐井及地则如何皆喜听命遂罢兵求乃割其地四分之三以畀青唐等族卒城古渭命藁毡为本地分巡检候一年能弹压蕃部即与除顺州刺史求又言古渭寨方发兵戍守不宜更易主帅乃命升复知秦州升命总管刘涣讨叛羌涣逗遛不进升命他将郭恩代之多所斩馘涣疾

恩出已上遂给奏恩所杀皆老穉朝廷疑焉十二月以端明殿学士张方平守秦方平辞曰涣与升有阶级今互言而两罢帅不可为也升以故得不罢寻以举郭恩发兵贼部迁右司郎中

至和元年八月丙午礼部侍郎知郑州梁适为观文殿大学士知秦州御史中丞孙抃再疏言旧相不当临边不报初建古渭寨间为蕃部所抄乃益兵拒守而他族多惊疑适具牛酒召其大酋膳乐鸡罗等抚定之罢所益兵终适之去蕃部不为寇十一月古渭寨毕工初筑城费一百万缗其后留兵戍守每岁费十万缗

### 仁宗平保州乱军

庆历四年八月甲午保州军乱保州广信安肃军自五代以来别领兵万人号沿边都巡检司亦曰策先锋以知州军为使署副二人析所领卒为三部使援邻道太祖常用之有功诏再出巡部卒偏得廩赐军中以为不均通判保州秘书丞石待举献计于都转运使张昱之仍请合三部兵更出入季一出即别给钱粮余悉罢仍请以武臣代内侍时杨懷敏方任边事尤不悦巡检司云翼卒杨言为乱知州刘继宗心不安逸乃悉令纳私所置教阅器杖会都监韦贵与待举射弓赌酒而众辱之贵慝酒曼骂曰徒能以减削兵粮为已功因激其众是日给军衣众遂劫待举兵入牙门待举挈家上城出东门入无敌营会继宗亦挈家至与待举列无敌兵守關城率神卫招收兵却入东门以拒乱兵既而转斗不敌继宗待举复上城避之继宗渡城壕溺水死待举藏鹿角中为乱卒所害众怨待举甚揭其首众射之又疑走马承受刘宗告与待举同议亦害之始迫沿边巡检都监王守一为首守一不从而死乃拥韦贵据城以叛知广信军刘貽孙与走马承受宋有言临城谕叛兵有欲降者计未决而诸路各进军来讨遂复固守拒命遣入内供奉官刘保信驰往视之命知制诰田况知成德军充真定府定州路安抚使住保州城下相度处置仍听便宜从事赐保州投来人员兵士特支钱降敕榜招安况言保州缘边人户多扇言军城作乱将引契丹兵马入界以臣所料必有奸人因欲摇动边民乞下沿边安抚司密令捕缉法外施行从之直史馆修起居注蔡襄言保州军士闭城作乱杀党中懦弱者十余人指为首恶以要朝廷招安臣与臣修臣甫已有论列欲令知定州王果引兵随榜入城尽行诛戮不闻施行切以天下内外之兵百有余万苟缓诛杀决行之令将开骄慢叛乱之源今州兵杀官吏开城门从而招之使传于四方明朝廷有畏众不杀之恩官吏有触事可持之势何惮而不为也议者若谓今日北戎妄生衅端不可便于极边之地张皇其事为敌人所窥是不知制兵之权而昧威戎之略也夫中国为戎狄所轻者本由朝廷威令不行今以劲兵入城诛三千叛卒以絕天下祸乱之萌敌人咫尺必将竦动安虑其窥乎况事机不可失惟陛下特发睿断而行之而朝议以诸道兵集保州城下未有统领因诏宣抚使富弼促行往节制之再降敕榜招安仍令田况等且退兵选人赍敕入城若遂开门即入招抚存之如尚拒命则益进攻其在营同居骨肉无老幼皆戮之先是知定州王果率兵趋保州攻城甚急会有诏招安贼不肯降乘埤呼曰得李步军来我降矣李

步军谓昭亮是日昭亮至与田况同谕贼贼终未信石侍禁郭达径踰壕诣城下谓贼曰我班行也改下索我就汝语贼乃下索授之登城谓贼曰我班行也岂不自爱苟非诚信肯至此乎朝廷知汝非乐为乱由官吏遇汝致此今赦汝罪又以禄秩赏汝使两制大臣奉诏书来语汝汝尚疑之岂有诏书而不信耶两制大臣而为妄诞耶气词雄辨贼皆相顾色动曰果如此更使一二人登城即复下索召其所知数人登城贼信之争投兵下城降者二千余人遂开城门纳官军其造迎者四百九十二人况具得其姓名令杨懷敏率兵入城悉坑杀之降卒悉分隶诸州宣抚使富弼恐后生变与转运使欧阳修相遇于内黄夜半屏人欲谋使诸州同日诛之修曰祸莫大于杀已降况胁为乎既非朝命诸州有一不从为变不细弼悟乃止以刘涣为吉州刺史知保州涣至踰月虎翼军士又谋反居人惊惶涣以单骑至械其首恶诛之一军帖然

太平治迹统类卷九

●钦定四库全书

太平治迹统类卷十

（宋）彭百川 撰

仁宗平侂智高

皇佑元年秋九月乙巳广南西路转运使言广源州蛮寇邕州诏江南福建等路发兵备之广源州在邕州西南郁江之地峭绝深阻产黄金丹砂颇有邑居聚落俗椎髻左衽喜战鬪轻死好乱其先韦氏黄氏周氏侂氏为首领互相劫掠唐邕管经畧使徐申厚抚之黄氏纳质而十三部二十九州岛之蛮皆定自交趾蛮据有安南而广源虽号邕管西羈縻州其实服役于交趾初有侂全福者及其子智聪以归其妻阿侂本左江武勒族也转至倘犹州全福纳之全福见虏阿侂遂嫁商人生子名智高年十二杀其父商人曰天下岂有二父耶冒姓侂与其母奔雷火洞其母又嫁特磨道侂夏卿久之智高复与其母出据倘犹州建国曰大历交趾攻拔倘犹执智高释其罪使知广源州又以雷火频婆四洞及思浪州附益之然内怨交趾居四年遂袭据安德州僭称南天国改年景瑞求内附未即得于是始入寇皇佑二年五月戊申广南西路转运司言交趾发兵捕广源州贼侂智高其众皆遁伏山林诏本路严备之三年三月癸酉广南西路转运司言侂智高奉表献驯象及生熟金银诏转运钤辖司止作本司意答以南原州本隶交趾若与其国同进奉即许之四年四月侂智高贡方物求内属朝廷拒之后复金函书以请知邕州陈珙上闻亦不报智高既不得请又以交趾为讎且擅广源山泽之利遂招纳凶命数出敝衣易谷给言洞中饥部落离散邕州信其微弱不设备也乃与广州进士黄玮黄师宓及其党侂建侯侂志忠等日夜谋入寇一夕焚其巢穴给其众曰平生积聚今为天火所焚无以为生计穷矣当拔邕州据广州以自王否则兵死是日率众五千沿郁江东下攻破横山寨寨主右待禁张日新邕州都巡检左班直高士安钦横州同巡检右班殿直吴香死之五月乙巳朔侂智高破邕州执知州北作坊使陈珙通判殿中丞王干佑广西都监六



宅使张立初贼围城珙令干佑守来远门权都监三班奉职李肃守太安门指使武吉守朝天门张立自宾州来援既入珙犒军城上酒行而城破珙立干佑及节度推官陈辅尧观察推官唐鉴司户叅政孔宗旦皆被执兵死者千余人智高阅军资库得所上金函怒谓珙曰我请内属求一官以统摄诸部汝不以闻何也珙对常奏不报索奏草不获遂扶珙出珙病目不能视惶恐呼万岁求自劾不听并立干佑辅尧鉴宗旦害之立临刑大骂不为屈逾月得其尸如生而李肃武吉武缘令梅微之支使苏与贼黄师宓有旧获免当智高未反时邕州有白口出庭中江水溢宗旦以为兵象度智高必反以书告珙珙不听宗旦言不已珙怒诋之曰司户狂耶及智高破横山寨即载其亲桂州曰吾有官守不得去无为惧死也既而贼执宗旦欲任以事宗旦叱贼且大骂遂被害宗旦鲁人始官京东与李道徐尚同四人为监司耳目号为四■〈目掌〉人多恶之然其立节乃尔智高既得邕州即伪建大南国僭号仁惠皇帝改年启历赦境内师宓以下皆称中国官名癸丑智高入横州殿中丞张仲回监押东头供奉官王日用弃城丙辰入贵州知州秘书丞李琚弃城庚申入龚州知州殿中丞张仲回弃城辛酉入藤州又入梧州入封州知藤州太子中舍李校知梧州秘书丞江滋并弃城知封州太子中舍曹覲死之封州人未尝知兵士卒纔百人不任鬪又无城隍以守或劝覲避贼覲正色叱之曰吾守臣也有死而已敢言避贼者斩都监陈晔引兵迎击贼封州令率乡兵弓手继进贼众数百倍晔兵败走乡丁亦溃覲率从卒决战不胜被执贼戒勿杀粹使拜且诱之曰从我得美官付汝兵柄以女妻汝覲不肯从且詈曰人臣惟北面拜天子我岂从尔苟生耶幸速杀我贼犹惜其忠愤不忍杀徙置舟中覲不食者两日探怀中印章授其从卒曰我且死若求间道以此上官贼知其无降意害之至死骂贼声不絶投其尸于江时年三十五壬戌智高入廉州太子右赞善大夫赵师旦监押右班殿直马贵死之师旦稹从子也贼既破邕州顺流东下师旦使人覘贼还报曰诸州守皆弃城走矣师旦叱之曰汝亦欲吾走之耶乃大索得谍者三人斩以徇而贼已薄城下师旦止有兵三百开门迎战杀数十人会暮贼稍却师旦语其妻取州印佩之使负其子以匿曰明日贼必大至吾知不然然不可以去尔死无益也遂与贵士卒固守城池当食贵不能食师旦独饱如平时至夜贵卧不安席师旦卧内大鼾明日盗攻城愈急左右请少避对曰战死与戮死何如众皆曰愿为国家死至城破无一人逃者矢死与贵俱还据堂而坐智高挥兵鼓噪争入胁师旦大骂曰獠朝廷负尔何事乃敢反耶天子发一兵校前来汝无遗类矣智高怒并贵害之癸亥智高入端州知州太常博士丁室臣叶宝臣晋陵人也丙寅依智高围广州前二日有告急者知州仲简以为妄囚之下令曰有言贼至者斩以故民不为备及贼始至令民入城民争以金贝遗阖者求先入践死者甚众余皆附贼贼势益张乃命崇仪使知韶州陈曙领兵讨依智高朝廷初闻智高反诏进奏院不得輒报知制诰吕溱言边防有警急一方有盗贼宜令诸路闻之共得为备今欲人不知非计也六月乙亥起复前卫尉卿余靖为秘书监知潭州前屯田员外直史馆杨畋为广南西路体量安抚提举经制贼盗靖及畋各居父丧先是

靖与知韶州者结辑农兵完葺堡障共为守御计朝廷闻而嘉之又以曷素习蛮事故有是命既即丧受命靖后七月改广南西路安抚使知桂州后十日曷召至都门外辞以丧服不敢见上赐以服饰御巾入对便殿即日加起居舍人同知谏院而遣之甲申徙广州兵部郎中天章阁侍直仲简知荆南朝廷但以简能守城故有是命不知广人怨之深也丙午命知桂州余靖经制广南东西路盗贼时谏官贾黯言靖及杨旼皆许便宜从事若两人指纵不一则下将无所适从矣靖专制西路若贼东向则非靖所统无以使众不若并付靖经制两路而靖亦言贼在东而使臣西非臣志上从其言故有是命枢密言蛮贼徒党无虑二万人日食米五百石非有资其粮食者则势不可留须法外禁之幸酉诏犯者其首处斩从者配岭南牢城舟车没官初魏瓘筑广州城凿井蓄水作大弩为守备及侂智高攻城甚急且断流水而城坚井饮不竭努发辄中中辄洞溃贼稍屈知英州普江苏缄始闻广州被围谓其众曰广与吾州密迩今城危在旦夕而恬不往救非义也乃募壮勇合数千人委州印于提点刑狱鲍轲夜行赴难去广二十里驻兵黄师宓者广人也陷贼中为谋主缄使缚其父斩以徇贼闻之丧气时羣不逞皆旁缘为盗缄捕得六十余人斩之诏怀其馘胁诳误使复故业者凡六千八百余人城围日久数战不胜贼方舟数百急攻城南番禹县令萧驻者新喻人也先自围中出募得海上强壮二千余人以海船集上流水发会扬风夜起纵火焚贼舟烟欲属天大破之积尸甲如山即日发县门诸援兵及民户牛酒刍粮相继入城城中人乃有生意每战必胜而转运使王罕赤自外募民兵遂入城益修守备贼知不可讨围五十七日壬戌解去由靖逵县济江拥妇女作乐而行攻贺州不克遇广东都监张忠于白田忠战败被杀虔州巡检董玉康州巡检王懿连州巡检张宿贺州巡检赵允明监押张全司理参军邓冕皆没先是缄与洪州都监蔡保恭以兵八千人据边渡村扼贼归路会忠自京师至夺而将之临战谓其下曰我十年前一健儿以战功为团练使尔曹勉之于是不介马而前先锋遇贼奔手拉贼帅二人马陷泞不能奋遂中标鎗死甲子广东钤辖蒋偕击贼于路兵败南恩州巡检杨达南安州巡检邵余庆权宜融州巡检冯岳西路提刑王兴杨用和皆没八月丁亥杨旼既趋广南又奏请删康定行军约束及赏罚格颁下并置检法官乙卯诏谕旼曰智高乘飙锐窃发二广之民日俟官军至故委卿节制之殄贼为期临机赴变安用中覆今甲兵大集不能度形势一举扑灭乃奏请颁格令置检法官此岂应速计耶或顺风下掠琼管及海瑞诸州厚戍则兵不足无备则寇乘之如能断海道则不以日月掩速也诏广南有捕获侂智高者授正刺史赏钱三千缗绢二千疋获智高母授诸司副使钱三千缗绢二千疋获黄师宓黄玮授东头供奉官钱一千缗辛卯改新知秦州孙沔为荆湖南路江南西路安抚使内园使陵州团练使入内押班石全彬副之沔初入见帝以秦州事勉之对曰臣虽老然秦州不足烦圣虑陛下当以岭南为忧也臣覩贼势方张官军朝夕当有败奏既而闻张忠死蒋偕败帝谓执政曰南事诚如沔料宰相龐藉因奏遣沔行故有是命仍许沔便宜从事沔以南方兵连为贼所破气馁不可用请发骑兵以益之且增选偏裨二十人永武

库精甲五千参知政事梁适折沔曰毋张皇沔曰前日惟亡备故至此今指期灭贼非可以侥幸乃欲示镇静耶夫实备不至而貌为镇静危亾之道也居二日促行与兵七百沔忧贼渡岭而北乃檄湖南江西曰大兵且至其善治营垒多其燕犒贼疑不敢北侵沔行至鼎州复有诏加广南东西路安抚使知英州秘书丞苏缄为供备库使初广州以贼遽至下及清野故贼得肆掠后缄知贼将走分兵边村渡扼其归路布槎木巨石几四十里贼至果不得前遂环绕数舍入沙头渡江由清逵县道连贺州西归摧伤者极多缄尽得贼所掠去物戊申智高杀钤辖蒋偕何遵古张达唐岷皆没丙辰杨畋降知鄂州命蒋偕弃州禁储往韶州故也丁巳命余靖经制盗贼

己未赠岭南诸州死事官有差庚申依智高破韶州知州柳应辰弃城走洛苑使广西钤辖王正伦与贼战于馆门驩死之东头供奉官合门祗候王从政三班奉职徐守一借职文海皆被害州之山有数穴可容数百人民闻贼至走匿其中悉为贼所焚贼始至从政骂贼不絶口至以汤沃之终不屈而死杨畋曹修经蛮事既无功改命杨沔及余靖等上尤以为忧或言智高欲得邕桂二州节度使即降枢密副使梁适曰若尔二广非朝廷有矣上问宰相龐藉谁可将者藉荐枢密副使狄青青亦请行上表翌日入对自言臣起行伍非战伐无以报国愿得蕃落骑数百益以禁兵羈贼首致阙下上壮其言庚午改宣徽南院使荆湖南北路宣抚使提举广南东西路经制盗贼事初欲用入内都知人守忠为青副谏官李光言唐失其政以官者观军容致主将掣肘是不足法遂罢守忠丙子诏鄜延环庆泾原洛扫蕃落广锐军曾经战鬪者各五千人仍逐路遣使臣一员押赴广南行营从狄青之请也青言贼便于乘高履险步兵力不能抗故每战必败愿得西边蕃落兵相从或谓南方非骑兵所宜枢密使高若讷言蕃落善射耐艰苦上下山如平地当瘴未发时疾驰破之必胜之道也青卒用骑兵破贼丁丑依智高入宾州知州国子博士程东美弃城乙卯降空名宣头榜子各一百道锦袄子金银带三百付狄青以备赏功庚辰狄青辞置酒垂拱殿青既行上谓辅曰青有威名贼必畏其来左右使令非亲信不可虽饮食卧起皆宜防窃发因驰使以戒之辛巳内降守诏付狄青应避贼在山林者速招之复业其乘贼势为贼盗但非杀人及贼所胁从能逃归者并释其罪已常刺面令取字给公憑自便若为人所杀而冒称贼首级令识验给钱米调之其被焚劫权免户下差徭见役仍寬与假使营葺室居凡城壁常经焚毁若初无城及虽有城而不固并加完筑器甲朽弊不可用者繕治之右正言韩絳言狄青武人不可独任帝以问龐藉藉曰青起行伍若用文臣副之必为所制而号令不专不如不遣乃诏广南将佐皆禀青节制若孙沔余靖分路讨击亦各听沔指挥甲申依智高复入邕州知州礼宾使宋克隆弃城克隆承贼践踏之后不能营葺守备颇纵士卒下诸山寨杀逃民诈为获贼一级赏钱十千又诈给亲兵帖以为赏有功及智高再至克隆无以御贼遂遁去壬辰枢密副使王尧臣言请析广西宜容邕等州为三路以融柳象隶宜州白高窦雷化郁林仪藤梧袭琼隶容州钦宾廉横浔贵隶邕州并选武臣为安抚都监兼知州事以统支郡运全永道三州米以馈



军食有能完城壁廨宇营舍仓库及拓复户口者计其功迁一官诏狄青详酌青以为便遂施行十二月壬申朔广西钤辖陈曙击侬智高兵败于金城驿东头供奉官王承吉白州长吏噩死之曙无威令既与贼遇士卒犹聚博营中使承吉将宜州忠率五百为先锋仓卒被甲以前遂致覆军戊子余靖言交趾今岁当入贡属侬智高道阻不通累移文乞会兵讨贼宜从其请朝廷许之而狄青以为不可蛮夷贪得忘义因而起乱何以御之且檄靖毋通交趾后朝廷卒用青计策人亦服青有远略云皇佑五年春正月丁未诏广南西路转运司移文于交趾助兵从狄青之请也狄青合孙沔余靖二将之兵自桂州次宾州青以张忠蒋偕皆轻敌取死军声大阻前戎诸将无得妄与贼鬪听吾所为陈曙恐青独有功乘青未至以步卒八千犯贼溃于昆仑关其下殿直袁用等皆遁青曰令之不齐兵所以败己酉晨会诸将上堂揖曙起并召用等三十二人按所以败状驱出军门斩之沔靖相顾愕然靖常迫曙出战因离席而拜曰曙失律亦靖节制之罪青曰舍人书生军旅之责非所任也诸将皆股栗狄青既戮陈曙乃按军不动更令调十日粮众莫测贼覘者还以为军未即进也翌日遂进军青将前陈沔将次阵靖将后阵夕次昆仑关黎明整大将旗鼓诸将环立帐前待令乃发而青已微服与先锋度关趣诸将会食关外即归仁铺为阵戊午贼悉其众列三铙阵以拒官军执大盾标枪衣绛衣望之如火及战军稍却右将开封孙节死之贼气锐甚沔等惧失色青起自执白旗麾蕃落骑兵张左右翼出贼后交击左者右右者左已而右者复左左者复右贼众不知所为大败走侬智高复趋邕州王师追捕五十里捕贼斩首二千二百级其党王师必侬建中侬智忠并伪官属死者五十七人生擒贼首五百余人智高夜纵火烧城遁由合江入大理国黎明青按兵入城获金帛巨万杂畜数千招复老壮七千二百尝为贼所俘胁者慰遣使归梟师必等首于邕州城下得户五千三百四十一筑京观于城北隅时有贼尸衣金龙衣众以为智高已死欲具奏青曰安知非诈耶宁失智高不敢诬朝廷以贪功也青始至邕州会瘴雾四塞或谓毒水上流士卒饮者多死青甚忧之一夕有泉涌寨下汲之甘众遂以济智高自起至平几一年暴残一方如行无人之境吏民不胜其毒先是谣言农家种余家收已而智高为青所破皆如其谣战于归仁也右班殿直张玉为先锋北京副使贾逵将左西京左藏库副使孙节将右既阵青誓曰不待而举者斩及节搏及死山下逵私念所部忠敢澄海皆土兵数困而心慑易剺苟待令必为贼所薄且兵法先据高者胜乃引军疾趋山立始定而贼至逵拥众而下挥剑大呼断贼阵为二玉以先锋突出阵前而青麾蕃落骑兵出贼后贼遂大溃逵乃诣青帐下请罪青拊逵背曰违令而胜权也何罪之有玉保定人逵藁人也二月丙子上谓辅臣曰狄青已破贼立功将士宜速议赏缓则不足以劝癸未以宣徽南院使彰化节度使狄青为护国节度使枢密副使依前宣徽南院使初广南捷书至上大喜谓宰相龐藉曰青破贼卿执议之力遂欲擢青枢密使平章事藉以为不可力争之罢

乙酉广南东西湖南江西路安抚使枢密直学士右谏议大夫孙沔知桂州秘书监

余靖并为给事中仍诏请留屯邕州经制余党候处置毕乃还桂州狄青尝问沔何以破贼沔曰使贼出上计收其宝聚退守巢穴则当徐图之据邕州以拒我师犹为中计若恃胜求战此计最下然贼有轻我心必出下计将成擒尔已而果然沔与青夜谋帐中昼则推青自行之青治附贼者多诛杀沔靖与青分治所免释数百人青既先还沔留治后事沔始受命数请骑兵又令军中制张刀巨斧人谓南方地形不使骑而刀斧所用青竟用骑兵破贼贼皆翳大盾翼两标置阵甚坚矢石不可动竟赖刀斧杂短兵搏战阵乃破人皆谓不及也赐狄青敦教坊第一区贷知邕州礼宾使宋克隆死除名春秋刺配沙门岛溪洞都巡检东头供奉官同修城刘庄除名杖脊刺配福建牢城宾州推官权通判王方灵川县主簿权推官杨德言并除名免杖刺配湖南牢城永不录用坐依贼再至弃城也断敕既下其日大雨雹上急遣中使追敕已不及人亦颇闵之四月壬申狄青还朝置酒垂拱殿庚寅御崇政殿令蕃落骑兵布阵如归仁破贼之势观其驰逐击刺等第推赏仍以拱圣马三百补其阙部大提举教阅阵法右班殿直张玉迁内殿承制枢密直学士给事中孙沔还自岭南帝问劳解所服御带赐之壬午命知杭州沔自请也青既平岭南上欲用为枢密同平章事宰臣龐藉曰不若且与移镇加捡校官多赐金帛亦足以酬青功矣上乃从之上既从藉言后数日两府奏事上顾藉笑曰卿前日商量除青官深合事宜为虑深遠矣丁未枢密直学士给事中知杭州孙沔为枢密副使余靖为工部侍郎侍御史梁蒨言赏薄沔青践二府靖亦加秩十二月丁酉广西安抚司言捕获智高母阿侬及智高弟智光子继宗继封诏护送京师阿侬有智谋智高攻陷城邑多用其策僭号皇太后天资惨毒嗜小儿肉每食必杀小儿智高败走阿侬入保特磨依其夫侬夏卿收残众约三千余人习骑战复欲入寇余靖督部吏黄汾黄献珪石鉴进士吴舜举发洞兵入特磨恣掩袭皆获之神宗熙宁元年夏四月客省副使狄谿召对青子也上念青之功曰征南得无遗事乎狄谿乃上平蛮记及归仁铺战阵图至是上亲为文遣使祭青而子谿亦稍擢用焉

### 仁宗平王则

庆历七年十一月戊戌贝州宣毅卒王则据城反则本涿州人岁饥流至贝州自卖为人牧羊后隶宣毅军为小校贝冀俗尚妖幻相与习五龙滴泪经及图讖诸书释迦衰谢弥勒佛持世初则去涿母与之诀别刺福字于背以为记妖人因妄传福字隐起争信事之而州吏张峦卜吉主其谋党与连德齐诸州约以明年正旦断澶州浮梁乱河北会党人潘方静潘静两以书谒北京留守贾昌朝事觉被执不待期亟叛时知州张得一与官属谒天庆观则率其徒劫库兵得一走保骁健营贼焚门执得一囚之兵马都监田斌以从卒巷战不胜而出城扉合提刑田京任黄裳持印弃其家縋出保南关贼从通判董元亨取军资库钥元亨推之杀元亨又出狱囚囚有憾司理王獎者遂杀獎既而节度判官李浩清河令齐开主簿王湊皆被害僭号东平郡王以张峦为宰相卜吉为枢密使建国曰安阳榜所居门曰中京居室廐库皆立名号改年曰得圣以十二月为正月百姓

年十二以上七十以下皆涅其面曰宜军破赵得圣旗帜号令率以佛为称城以一楼为一州书州名补其徒为知州每面置以总管然縋城下者日众于是令民守者伍伍为保一人縋余悉斩初变起仓卒众莫知所为元亨自天庆观促马驰还厅事贼党十余人环甲露刃排挞而入左右皆奔溃贼胁元亨曰大王遣我来索库钥元亨据案叱之曰大王谁也妖贼敢弄兵乎我有死尔钥不可得也贼将郝用继来索愈急曰库帑今日大王所有也可不上钥乎元亨厉声张目用遂杀之贼争携钥去及城破获郝用斩以祭元亨之首昌朝遣大名钤辖郝质将兵趋贝州十二月辛丑以贝州反书闻出札子下中书枢密院亟择将领兵往扑灭之仍令孟州定州真定府预设守备毋至奔逸壬寅遣宫苑使麦允言作坊使王凯往贝州捕杀贼兵仍诏昌朝发精兵卫之高阳关都部署王信闻贝州乱亟领本部兵传城下甲辰即以信为贝州城下招捉都部署丙午夜有星如缶坠贼城庚戌权知开封明镐为河北体量安抚使甲寅知沧州高继隆知贝州遣内侍何诚用赍勅招安贝州军贼

庆历八年春乙亥明镐言贝州距闾用工二万人期三十日可与城齐贼亦城上设战栅与官军相当名曰喜相逢距闾将成又为贼所焚三日不灭既斩兴乃用军校刘遵计即南城凿地道而入攻其城以牵制贝州民有汪文庆郭斌赵宗本汪顺者自城上系书射明镐帐约内应夜垂縋以引官军既纳数百人焚楼櫓贼觉率众拒战初官军既登欲专其功断其縋以绝后来者及与贼战兵寡不敌与文庆等复縋而下是夜城几克丁丑参政文彦博为河北宣抚使本路体量安抚使明镐副之镐督诸州攻贝州城久不下帝忧之问辅臣策安出彦博乞身往破贼故遣彦博宣抚使明镐副之上大喜既而左右赞曰官家无忧贝州王则败矣上益喜先是枢密夏竦恶明镐恐其成功镐所奏请从中沮之彦博既受命言军事中覆不及愿得专行戊寅诏许文彦博便宜行事彦博请用将作监主簿鞠得卿三人掌机宜文字许之明镐所奏殿中丞王起等四人仍随军贝州贼谋窃出要劫契丹使明镐遣殿侍安素伏兵西门壬午贼果以三百人夜出伏发皆就获之乙酉降空名告勅空头札子三百道下河北宣抚使以备赏战功是日彦博至贝州城下

乙未官军攻贝州城北甚急贼尽锐御之而南城所穴地道潜达城中贼初不觉也闰正月庚子朔文彦博夜选壮士二百衔枚由地道入右班殿直曹竭等导之出登城杀守陴者垂縋引官军贼纵火牛大军稍却军校杨遂援枪中牛鼻牛还走贼众惊溃王则开东门遁合门祗候张纲缘壕与贼战死之王信捕得贼余党保村舍皆焚死则自反至败凡六十五日遂开封人也辛丑彦博遣李继和来告贝州平赐继和锦袍金带彦博请斩王则于大名府夏竦言所获恐非真当覆视之乃诏以槛车送则京师王则之以贝州反深交龐旦与其徒谋以元日杀军校劫军兵应之前一日有告者知州王鼎夜出檄遣军校摄事外邑而阴为之备翌日会寮吏饮酒如常党愕不敢动鼎刺则背徐捕首谋十八人送狱狱具俟运使至审决未至军中汹汹谋劫囚鼎谓僚吏曰吾不以累诸军独命



取囚桀鷲者数人斩于市一郡帖然运使至囚未决者尚半讯之皆伏诛壬寅改贝州为安武军甲辰曲赦江北赐平贝州将士缗钱战没者官为葬祭之兵所践民田除夏秋税改贝州为恩州戊申以文彦博为同平章事明镐端明殿学士给事中王信为成德军留后自余兵官各以次迁余赐缗钱有差赠马遂为宫苑使遂初闻王则叛中夜叱咤晨起诣昌朝请擊贼昌朝因使将榜入城招降谕以祸福不答遂将杀贼而无助贼攢刀聚噪断其臂遂骂贼曰恨不斩汝万段贼杀遂而走解之事闻追赠其妻官其五子

### 刘沪城水洛

庆历三年冬十月甲子陝西四路经畧安抚招讨使郑戡言顺德军生户大王家族元宁等以水洛城来献其地西占陇抵通奉州往来道路陇之二水环城西流绕带河渭田肥沃广数百里杂氏十余落无所从属寻遣静边寨主刘沪招集其酋长皆愿纳质子求补汉官今若就其地筑城可得番兵三五万及弓箭手共讨西贼实为封疆之利从之刘沪先以右侍禁瓦亭寨监押权静边寨主擊破党留等族斩一骁将获牛马橐驼万计时任福贩边城昼闭居民畜产多为贼所掠沪独开门纳之边人谓沪为刘开门迁左侍禁韩琦范仲淹荐授合门祗候又破穆宁生氏西南去洛阳二百里中有城曰水洛川平土沃又有水轮银铜之利环城数万帐汉民之逋逃者归之其百工商贾自成全国曹玮在秦州常经营不能得沪进城章川收善田数百顷以益屯兵密使人说城主铎厮那令内附会郑戡行边沪遂召铎厮那及其酋属来献结公水洛露罗甘地愿为属户戡即令沪将兵往受地既至而氏情中变聚兵数万合围夜纵火呼啸期尽杀官军沪兵才千人前后数百里无援独坚卧虑因令晨炊缓食坐胡床指麾进退一战氏溃追奔至石门酋皆稽顙请服因尽驱其众隶麾下以通秦渭之路又败临洮氏于城下迁内殿崇班四年春正月戊辰诏陝西都部署司泾原经畧司罢修水洛城从宣抚使韩琦奏请也然刘沪时已兴役郑戡又遣著作郎董士廉将兵助之矣

甲戌命盐铁副使祠部员外郎鱼周询宫苑使周惟德往陝西同都转运使程戡相度铸钱及修水洛城利害以闻先是韩琦以水洛为不便奏罢之郑戡固请终役琦还自陝西即罢戡四路都部署戡既改知永兴又极言城水洛之便役不可罢会刘沪董士廉督役如故知渭州尹洙及泾原副都部署狄青相继论列以为修城有害无利议者纷纷不决故遣周询等行视戡初命泾原都监许迁将兵为修城之援及戡罢统四路洙亟召迁还之又檄沪士廉罢役且召沪士廉蕃部皆遮止沪士廉等请自备财力修城沪士廉亦以属羌既集官物无所付又恐违蕃部意别生变日增版趣役洙再召之不从洙亟命瓦亭寨都监张忠往代沪又不受洙怒令青领兵巡边追沪士廉欲以为节度斩之青械二人送德顺军狱时周询等犹未至也蕃部遂惊扰争収聚积杀民吏为乱又诣周询等诉周询等具奏诏释沪士廉令卒城之参政事范仲淹言泾原路走马承受赵正奏内政崇班刘沪著作佐郎董士廉被狄青械送司理院次切缘此二人元稹四路都部署节制往修水洛城即非是二人擅兴及四路罢后本路部署司押下军马其人即合依稹罢修

不合坚执抗拒臣料其情盖本人在彼相杀得功降下周回蕃部又已下手修筑城寨惧见中辍之后本路责见其经画不当故以死拒抗一面兴修意望成功亦求免罪始末可见非有他意况刘沪是沿边有名将佐最有战功国家且须爱惜不可轻弃恐狄青因怒辄用军法则边上将佐必皆衔怨谓国家负此有劳之臣人人解体谁肯竭力边事其董士廉是朝廷京官即非将佐亦将一例枷勘盖狄青粗人未知朝廷事理万一二人被戮逐家骨肉必来诉于阙下亦更多有臣僚上言紊烦圣听虽知将帅行得军法即非用兵进退之际有违节制自是因事利害致犯帅威昔陈汤矫诏命以破敌王浚违节制以下吴皆释罪封侯以劝将列伏望圣慈特遣中使乘驺往彼委鱼周询周惟德取勘刘沪范士廉所犯因依情罪奏闻仍送邠州拘管听候朝旨一则惜得二人不致因公被戮二则惜得狄青尹洙免彼二家骨肉称冤致讼倘允臣所奏事可两全彰陛下保庇边将之恩使文武臣效死以报圣德夏四月乙未谏官孙逋言切闻刘沪等修水洛城而泾原副使部署狄青以沪等不听令并枷送德顺军此狱系一方利害但未知朝廷处置何如尔昔曹玮常欲修其城以通渭秦救援之师会边防多事其志未克自西事以来边臣亦要有营度者盖其城在生蕃中未能通之昨郑戩为四路部署与刘沪等具上修建之利而沪等入生蕃界服其众渐立城堡朝廷已赏其功矣近闻韩琦等宣抚回以修城虽有利虑生蕃难制而功莫能就乞且罢其役戩固请城之且言沪等招得生蕃皆愿借耕牛以助布种又城中有推酤之利可以贍军事苟不行沪等虽诛无悔缘狄青之意原与郑戩不同戩既罢四路青以韩琦等所奏使抽还水洛城援兵沪等自谓已见功绪正乞留兵以毕其役若便坐以违主帅之令则沪本以一方利害初禀朝廷之命领千余众在数万生蕃中亦尝战鬪杀获而终使之服属亦其勇略之可尚也今以主帅之言而罪之不惟劳臣不劝其招来蕃部得不惊惧乎虽然青为一道帅下有不从令而朝廷释之青宜不快心况今之将臣如青之材勇者不可多得此固难以处置惟朝廷两全之余靖言凡不受大将节度者谓师行之际当进而退可行而止动临机会必有胜负如此之类或违之者皆用军法以一其众今刘沪因修城堡自有利害与夫临阵逗遛不可同论又况水洛城在陇山其利可以通渭之援昔曹玮在秦州固已经营及李紘韩琦相继亦欲开拓而生户羌人或降或否故不克就今刘沪一战而服数百千户因其势而灭之虽留援兵不足为罪狄青所执但以筑孤城于生羌之中恐贼昊来攻有难守之势故与沪等异同因其忿而执之耳朝廷欲伸大将之令而罪沪等则沪以威信招纳戎人方来归而谋者获罪令后立功者怠而又失信于戎必不可也若以狄青倚公法肆私忿而责之则恐今后偏裨轻于违犯此又非朝廷之意也二者之间均是害焉臣愚以为生羌利我交易因沪招抚故献其地非沪不可守也沪若失职戎将生心古者矫制及违其节度者因其立功则可赎罪今为朝廷计当切责沪罪而推恩怨之使其城守责其后効仍诏青等共体此意沪等所筑之城堞已就将军既困之矣恕之令其自守此边鄙安危之计非私于沪等倘有缓急通其策应勿以谋之异同幸其有急而不救也仍乞不候奏到沪等公按特于踈

放无使羌戎因此疑贰欧阳修言边将不和用兵大患况狄青刘沪等皆是可惜之人事体须要两全利害最难处置且水洛城自曹玮以来心知其利害于难得未暇经营今沪能得之则于沪之功不小于秦州之利极多韩琦自陝西来非以水洛为不便但恐难得其城今沪能得之又有以城之正宜责其必成而狄青所见不同遂成衅隙其间利害臣请详之国家迩年边兵屡败常患大将无权今若沮狄青而释刘沪则不惟于青之意不足兼沿边诸将皆挫其威此其不便一也刘沪经营水洛之初先以奋力身战然后诱而服从乃是诸蕃族畏沪之威信今忽见沪先得罪枷入狱则新降生户岂不惊疑若使翻然复叛则自今边将欲以威信招诸族谁肯听从不惟水洛更无可成之期兼沿边生户永无可召之理此其不便二也自陝西用兵诸将立事者少此城不惟自曹玮以来未能得之亦闻韩琦在秦州当经营而未暇今沪奋然立取其功垂就而中道获罪后谁肯于边防立事者此其不便三也又闻水洛之戍虽能援秦州而须渭州刍粮之助今刘沪既与狄青异议纵使城即得成他时狄青怒沪之异己又欲遂其偏见缓急不为之力则必须复此其不便四也若遂移狄青于别路则是因一小将而易一部署此其不便五也此臣所谓利害最难处置者也近遣鱼周询定夺利害臣谓宜命一中使令周询密谕狄青曰沪城水洛非擅重役盖初有所禀且筑城不比行师之际沪见利坚执意在成功不可以违节制加罪今不欲直释沪以挫卿之威宜自释之后若出师临阵而违节制者自当以军法从事然后又谕沪曰汝违大将命自合有罪今以汝城水洛有功故使青赦尔罪尔卒事以自赎俟城成则又戒青不可幸其失城以遂偏见如此则水洛之利可固蕃户之恩信可不失边将立事者不懈大将之威不挫苟不如此未见其可也始狄青械刘沪董士廉送德顺军狱寻有诏移邠州既而释二人令任水洛城讫役须勘到罪状别听旨丙辰谏官欧阳修言近差鱼周询等相度修水洛城始闻蕃族见狄青械繫刘沪等因致惊骚今周询却将沪往以此可见沪能恩信服彼蕃众朝廷必知水洛之为利而不欲弃之非沪守之不可然沪与狄青尹洙难共了此事臣谓不得已宁移尹洙不可移沪尚虑议者谓不可因沪而动大将今且移尹洙而不动狄青若洙更以恩从他路即不是因沪而屈大将矣如此则于洙无损于沪得全其功于边防事体无不便三者皆获其利不得有害大凡武臣常疑朝廷偏厚文臣假有二人相争实为武人理曲然终亦不服但谓报复尽是文臣通相党助轻沮武人况沪与洙争而沪实有功又其理不曲罪沪则沿边武臣尽鼓怨其害一也自西事以来擢用边将固多能立功效者殊少惟范仲淹筑大顺城种世衡筑青涧城沪筑水洛城尤为艰勤而功不在二人下今若曲加轻沮则武臣无复为朝廷作事其害二也沪若不在水洛则其生聚恐他人不能绥抚苟别致生事则自今蕃部更难以招辑其害三也今三利三害其理甚明但得大臣公心不于尹洙曲有顾虑则不与边防生患此系国家利害甚大伏望圣慈断而行之余靖又言水洛非刘沪不可守宁移青等不可移刘沪以失新附之心先是郑戩奏修水洛城乞令韩琦不与商量琦言臣任西边首尾五年于水洛城事比他人知之甚详因上利害十三条诏札与鱼周询



程戡已先具奏修城之利且言今欲毕工惟女墙未全弃之诚可惜宜遂令讫役乃诏戡等卒城之丁勿遣陈惟信往泾原路催修水洛城已已徙知庆州孙沔知渭州知渭州尹洙知庆州用欧阳修之议也

庆历四年六月癸卯改新知渭州孙沔复知庆州新知庆州尹洙知晋州始朝廷欲卒城水洛故令洙与沔易任沔以病辞乃别徙洙于是渭州关守诏除狄青谏官余靖言泾原在陕西最为重地自范仲淹不敢独当岂青粗暴所能专任章凡四上

庆历朋党

范仲淹出处大节附

大圣六年冬十二月甲子以大理评事范仲淹为秘阁校理初仲淹遭母丧上言执政请择郡守举县令斥游惰去冗僭慎选举敦教育养将才实边备保直臣斥佞人使朝廷无过生民无怨以杜奸雄凡万余言王曾见而伟之亦知仲淹乃晏殊客也于是殊荐人充馆职曾谓殊曰公实知仲淹舍而荐此人乎已为公置不行宜更荐仲淹殊从之

七年十一月癸亥冬至上率百官上皇太后寿于会庆殿乃御天安殿受朝秘阁校理范仲淹奏疏言天子有事亲之道无为臣之礼有南面之位无北面之仪若奉亲于内行家人礼可也今顾与百官同列亏君体损主威不可为后世法疏入不报晏殊初荐仲淹为馆职闻之大惧召仲淹诘以狂率邀名且将累荐者仲淹正色抗言曰仲淹缘辱举公每惧不称为知己羞不意今日反以忠直获罪门下殊不能答仲淹退又作书遗殊申理前奏不少屈殊卒愧谢焉又奏疏请皇太后还政亦不报遂乞补外八年春仲淹言下陝西市木事【见拾遗门】明道二年春召仲淹赴阙与宋绶同召太常博士秘阁校理范仲淹为右司谏初闻遗谥以太妃为皇太后参决军国事亟上疏言范仲淹安抚江淮【见明道圣政门】谏仁宗勿追斥垂帘时事【见圣政门】二年冬初郭皇后之立非上意寢见疎而后挟庄献势颇骚后为庄献所禁遏希得进及庄献崩上稍自纵吕夷简以前罢相故怨后而范讽与夷简相结讽乘间言后当废夷简赞其言上意未决右司谏范仲淹因极对陈其不可且曰宜早息此议不可闻于外也居久之乃定议废后夷简先命有司无得受台谏章疏夷简罢政事因郭皇后故夷简成仁宗所举【见圣政事】乙卯诏称皇后以无子愿入道特封净妃玉京冲妙仙师名清悟别居长宁宫台谏章疏果不得入仲淹既与御史中丞孔道辅率知谏院孙祖德侍御史蒋堂郭劝杨偕马绛殿中侍御史段少连左正言宋祁右正言刘涣诣垂拱殿门伏奏皇后不当废愿赐对以尽其言守殿门者阖扉不为通道辅抚铜环大呼曰皇后被废柰何不聽台谏入言寻有诏宰相召台谏谕以皇后当废状道辅等悉诣中书语夷简曰人臣于帝后犹子事父母也父母不和固宜谏止柰何顺父出母乎众哗然争致其说夷简曰废后自有故事道辅及仲淹曰公不过引汉光劝上耳乃是光武失德何足法也自余废后皆前世昏君所为主上有尧舜之资而公顾劝之效昏君所为可乎夷简不能答拱立曰诸君更自见上力陈之道辅仲淹等退将以明日留百官揖宰臣廷争而夷简即奏台谏伏合请对非太平美事

## 乃议逐道辅等

丙辰旦道辅等始至待漏院诏道辅出知泰州仲淹知睦州祖德等各罚金二十斤故事罢中丞必有告词至是直以勅除道辅比还家勅随至又遣使押道辅及仲淹亟出城仍诏谏官御史自今并须密具章疏毋得相率请对骇动中外绛平阴人也偕奏乞与道辅仲淹俱贬劾及少连再上疏皆不报少连疏曰臣初闻非时召两府大臣议皇后入道一日之内天下喧然以为母仪天下固无入道之理翌日又闻两府列状乞降后为净妃臣与孔道辅范仲淹等恐诏命一行难于追复是以羣诣殿阁上疏而执政进说使臣等不获面对令就中书商量宰相虽知其误然犹责臣等翻覆率易故道辅仲淹斥守外郡臣等例皆蒙罚陛下意盖执政大臣假天威以出道辅仲淹而断来者之说也切覩戒谕自今有章宜如故事密上毋得羣诣殿门请对且伏阁上疏岂非故事今遽絶之则国家复有大事谁敢旅进而言者昔唐阳城王仲舒伏合雪陆贄崔元亮叩殿陛理宋申锡前史以为美今陛下未忍弃出皇后而两府列状议降为妃谏官御史安敢默然陛下深思道辅等所言为阿党乎为忠乎又上疏言中宫动摇有大不可者二愿诏复中宫位号不报将作监丞富弼上疏谏畧云今陛下举一事而获二过于天下今废后已行未能悔过愿陛下亟还仲淹复其谏职减二过之一庶乎谏疏不絶朝纲复振疏入不报

景佑元年秋壬申诏净妃郭氏出居于外美人尚氏为道士洞真宫杨氏别宅安置曩者母后临朝臣僚戚属多进女口入内悉令遣还其家长秘之位不可久虚当求德门以正内治丁酉范仲淹由睦州徙蘓州州比大水民田不得耕仲淹疏五河导太湖注之海募游可兴作未就又徙明州转运使言仲淹治水有绪愿留以毕其役庚子复诏仲淹知蘓州二年三月己酉知莱州左司谏秘阁校理范仲淹为礼部员外郎天章阁待直太常礼院言侍御史刘夔请去庄献明肃太后庄懿太后所加太字盖入庙称后繫于夫在庙称太系于子然二太后奉安别庙準礼未应去太字上以夔不习故曲诏本台谕之夔崇安人也十二月昭宣使恩州团练使入内都知阎文应领嘉州防御使都知为秦州钤辖寻改郾州钤辖其子入内供奉官勾当御药院士良为内院崇班罢御药院时谏官姚仲孙高若讷劾文应方命宿斋太庙中文应叱医官声闻行在郭皇后暴薨中外莫不疑文应置毒者请并士良出之故有是命文应又称疾愿留仲孙复论奏文应乃亟去文应专恣事多矫旨付外执政不敢违天章阁待制范仲淹将劾奏其罪即不食悉以家事属其长子曰吾不胜必死之上卒听仲淹言窜文应岭南寻死于道礼部员外郎天章阁待制范仲淹为吏部员外郎知开封府仲淹自还朝言事愈极宰相阴使人讽之曰待制待臣非口舌任也仲淹曰论思正待臣职余敢不勉宰相知其不可诱乃命知开封欲挠以剧烦使不暇他议亦幸其有失亟罢去仲淹处弥月京邑肃然称治三年春仲淹言孔道辅迁都事【见都邑门】五月丙戌天章阁待制权知开封府范仲淹落职知饶州府仲淹言事无所避大臣权幸多忌恶之时吕夷简执政进者往往出其门仲淹言官人之法人主当知其进退升降之序其进退近臣不宜全委宰相又上百官圖指其次第曰如此

为序迁如此为不次如此则公如此则私不可不察也夷简滋不悦帝常以迁都事访诸夷简曰仲淹迂阔务名无实仲淹闻之为四论以献一曰帝王好尚二曰选贤任能三曰近臣四曰推委大抵讥指时政又言汉成帝信张禹不疑舅家故有王莽之乱臣恐今日朝廷亦有张禹坏陛下家法以大为小以易为难且以未成为己功以急务为闲务者不可不早辨也夷简大怒以仲淹语辨于帝前且诉仲淹越职言事荐引朋党离间君臣仲淹亦交章对其辞愈切自是降黜侍御史韩渎希夷简意请以仲淹朋党榜朝堂戒百官越职言事从之时治朋党方急士大夫畏宰相少肯送仲淹者天章阁待制李紘集贤校理王质皆载酒往饯质又独留数语或以诮质质曰希文贤者得为朋党幸矣

戊子同知枢密院事韩亿言昨蒙宣谕范仲淹常密荐臣臣自厯固行惟励忠朴宸聪过听擢赞枢密未常涉朋比之迹结左右之容况臣与仲淹既非婚姻又非故旧缘何契义辄有荐论举臣以公则臣素无交托伏望曲照孤衷免婴浮议必若以臣备位无补进退之际惟陛下裁赐优诏答之仲淹既贬谏官御史莫敢言秘书丞集贤校理余靖言仲淹前所言事在陛下母子夫妇之间犹以其合典礼故加优奖今坐刺讥大臣重加谴谪傥其言未协圣虑在陛下听与不听耳安可以为罪乎汲黯在庭以平津为多诈张昭论将以鲁肃为羸疎汉皇吴主熟闻訾毁两用无猜岂损圣德陛下自专政以来三逐言事者恐非太平之政也请速改前命壬辰靖落职监均州酒税乙未贬太子中允馆阁校勘尹洙为崇信军节度掌书记监郢州酒税先是洙上言臣常以范仲淹直谅不回义兼师友自其被罪朝中多云臣亦被荐仲淹既以朋党得罪臣固当从坐虽国恩宽贷无所指名臣内愧于心有腼面目况余靖素与仲淹分疎犹以朋党得罪臣不可幸而苟免乞从黜降以明宪典宰相遂逐之戊戌贬镇南节度掌书记馆阁校勘欧阳修为夷陵县令初右司谏高若讷言范仲淹贬职之后臣诸处察访端由参验所闻与勅榜中意颇同固不敢妄有营救今欧阳修移书诋臣言仲淹平生刚正通古今班行中无与比者责臣不能辨仲淹非辜犹能以面目见士大夫出入朝中称谏官言及谓臣不复知人间有羞耻事仍言今日天子与宰臣以忤意逐贤人责臣不得尽言臣谓贤人者国家恃以为治也若陛下以忤意逐之臣合争臣愚以为范仲淹须以论事切直亟加进用今兹狂言自取谴辱岂得谓之非辜恐中外闻之谓天子以意忤逐贤人所损不细请令有司召修戒諭免惑众听因缴进修书修坐是贬西京留守推官仙游蔡襄作四贤一不肖诗传于时四贤指仲淹靖洙修不肖斥若讷也不肖诗曰人禀天地中和生气之正者为诚明诚明所锺皆间杰从容中道无欹倾嘉谟谏论范京兆击奸纠缪扬王庭积羽沈舟毁销骨正人无徒奸者明主知漆固未遐弃两轡五马犹专城欧阳秘阁官职卑欲虐忠良无纵岐六幅长书披忧愤一责司谏必无夷人谓高君如挞市出见缙绅无面皮高君携书奏天子游言偷急尚容怡返言希文谋疎阔贬彼南方诚为宜永叔忤意窜西蜀不免一中谗人讥司谏不能自引咎复将已过扬当时四公称贤作不肖谗言入易天难欺朝家若有观风使此语当预古人诗四贤诗不具录泗州通判陈恢寻上章乞根究作诗者罪左司谏



韩琦劾恢越职希恩宜重行贬黜庶絕奸諛不报而襄事已寢光祿寺主簿蘓舜欽上疏言歷觀前代神聖之君好聞讒議蓋以四海至遠民有隱匿不可以遍照故無問愚賤之言擇而用之然後朝無遺政物無遁情雖有佞臣邪謀莫得而進也臣觀乙亥詔書越職言事播告四方無不驚惑徃徃切議恐非出于陛下之意蓋陛下即位以來屢詔羣下勤求直言使百僚轉對置匭函設直言極諫科今詔書頓異前事豈非大臣壅蔽陛下聰明杜塞忠良之口不惟虧損朝廷亦自取覆亡之道夫納善進賢宰相之道蔽君自任未或不亡今諫官御史悉出其門但希旨意即獲美官多士盈庭噤不得語陛下拱默何由盡聞天下之事乎前孔道輔范仲淹剛直不撓致位台諫後雖改他官不忘獻納二臣者非不知緘口數年坐得卿輔蓋不敢負陛下委注之意而皆罹中傷竄謫而去使正臣奪氣鯁士咋舌目覩時弊口不敢論昔晉侯問叔向曰國家之患孰為大對曰大臣持祿而不急諫小臣畏罪而不敢言下情不得上通此患之大者故漢文感女子之說而肉刑是除武帝聽三老之議而江充以族肉刑古法江充近臣女子老人愚耄踈隔之至也蓋以議之所在賤不可忽二君從之後世稱聖况國家班設爵位列陳英豪故當責其公忠安可教之循默賞之使諫尚恐不言罪其敢言孰肯獻納物情閉塞上位孤危軫念于茲可為惊怛覬望陛下發德音寢前詔勤于求獻下及葛藁可以常守隆平保全近輔若詔榜未削欺罔成風則惟堂下遠于千里切恐指鹿為馬事復見于朝矣舜欽二年丁忱三年上【此疏居喪論事元佑元年及第】四年十二月壬辰徙知饒州仲淹知潤州監筠州稅余靖監秦州稅夷陵縣令歐陽修為光化縣令上諭執政令移近地故也【尹洙不徙當考】先是京師地震直史館叶清臣上疏畧曰陛下忧勤庶政方夏泰寧而一岁之中灾变仍见下失民望上戾天意故垂戒以启迪清衷而陛下泰然不以为异徒使内侍走四方治佛事治道科非所谓消复之实也顷范仲淹余靖以言事被黜天下之人齜舌不敢议朝政者行将二年愿陛下深自责咎详延忠直敢言之士庶几明威降鉴而善应来集也尝奏数日仲淹等得皆近徙范仲淹既徙润州谗者恐其复用遂诬以事语入上怒亟命置之岭南参知政事程琳辨其不然仲淹乞得免自仲淹贬而朋党之论起朝士牵连出语及苑仲淹者皆指为党人琳独为上开说上意解乃已

康定元年三月吏部员外郎知越州范仲淹复天章阁待制知永兴军始用韩琦之言也上谕夷简仲淹释憾【见经制西夏要畧门】先是夷简当国同列不敢预事宋庠数与争论吕不悦上顾庠厚吕忌之巧求所以倾庠未得及仲淹通书元昊又焚其报夷简从容谓庠曰人臣无外交希文何敢如此庠以夷简深罪仲淹之甚也他日上前议事庠请斩仲淹枢密副杜衍力言不可庠谓夷简助已而夷简终无一言上问夷简夷简曰杜衍之言是也止可薄责而已上从之庠遂失措论者喧然皆咎庠不知实为夷简所卖也于是因朋党事叶清臣吴遵路宋庠郑戩以同年进士皆出知州富弼言晏殊党附夷简【见大科门】

庆历三年春夷简数求罢陝西运使孙沔上书言畧云自夷简当国黜忠言废直道

荐不若己者为自固之计王随陈尧叟以忿争罢欲使陛下知辅相之位非己不可冀思己而复用也又云若荐贤才令公议虽失之于始而得之于终犹可宽天下万世之责苟遂容身不救前过以谄佞为君子以庸懦为长者使之在廊庙布台阁上惑圣明下害生灵为社稷计则必危为子孙计亦未可保终吉是张禹不独生于汉李林甫复见于今也在陛下察之而已书闻帝不之罪议者喜蹇切夷简谓人曰元规药石之言恨闻此迟十年耳人亦服其量也三月上擢韩琦范仲淹等一时贤臣布在朝廷天下大悦士大夫相庆国子监直讲石介作庆历圣德诗以美之其诗曰

于维庆历三年三月皇帝龙兴徐出闱闼晨坐太极画开阖阖躬览英才手鉏奸孽大声飒飒震摇六合如干之动如雷之发昆虫躅躅怪妖藏灭同明道初天地嘉吉切闻皇帝蹙然言曰予祖予父付予大业予恐失坠实赖辅弼汝得殊象重慎微密君相予从予加乃绩君乃相予笙鏞斯叶昌朝儒者学问该洽与予论政傅以经术汝贰二相度绩咸秩惟汝仲淹汝诚予察太后垂帘汤沸火热汝时小臣危言截辘为汝司谏正予门闼为予京兆予言乃悦贼叛予夏汝往边馷六月酷日大冬积雪汝寒汝暑同予士卒予闻辛酸汝不告之予晚得弼予心慰悦弼每见予无有私谒以道辅予弼言深切予不尧舜弼自答捩谏官一年奏疏满篋侍从周歲忠力勤竭契丹忘义梲机饕餮敢侮大国其词慢悖弼将予命不畏不怯幸复旧好民得食褐沙磧万里死生一节视弼之勇霜剥风裂观弼之心炼金锻鐵宠名大官实以酬渴弼辞莫受其志莫夺惟仲淹弼一夔一契天实賚予予其敢忽并来相予民无瘥札曰衍汝来予之黄发事予二纪毛秃齿豁心如一兮率履不越遂长枢府兵政无蹶予早识琦琦有奇相其器魁櫺岂视店楔其人谨朴不施剗剗可属大事敦厚如勃琦汝副衍知人予哲惟修惟省立朝■〈车献〉■〈车献〉言论■〈口累〉呵忠诚特达禄微身贱其志不怯常诋大臣亟遭贬出万里归来刚气不折屡进直言以补予阙素相之后含忠履洁昔为御史几扣予榻至今谏疏在予箱篋襄虽小官名闻予彻亦常献言箴予之失刚守惟圣尚修俦匹并为谏官正色在列予过汝言汝无箝舌皇帝明圣忠邪辨别举擢贤良扫除妖孽众贤之进如茅斯拔大奸之去如距斯脱上倚辅弼司予调燮下赖谏争维予纪法左右正人无有邪孽予望太平日不逾浹皇帝在位二十二年神武不杀其默如地进退不测其动如天赏罚在手不失其权恭己南面馷奸进贤知贤勿易非明勿得去邪惟艰惟断乃克明则不惑聪则不灭既明且哲惟正惟直无作侧僻皇帝汝殛皇帝一举羣臣摄焉诸侯畏焉四夷服焉臣愿皇帝寿享万年

九月欧阳修言吕夷简罪恶满盈事已彰着然而不敢言者盖专主夺权胁制中外人皆畏之不敢发谏又上言吕夷简用仆人袁宗等二人为奉职身为大臣坏乱朝典又上言夷简近于御药院暗入文字李淑除翰林院学士欧阳修在延和殿西论淑奸邪请罢之又上言淑朋附夷简在三尸五鬼之数若用之则小人转得为计富范论异同【见君臣论治门】四年四月上谓辅臣自昔小人多为朋党亦有君子之党乎范仲淹言邪

正之党唯圣心所察苟用而为善于国家何害也欧阳修作朋党论【见谋国远畧门】韩范论契丹入寇异同【见经制契丹门】夏六月先是石介奏记于富弼责以行伊周之事夏竦怨介斥已乃使女奴习介书改伊周作伊霍字又撰废立诏上虽闻之不信而仲淹弼始惧不自安于朝二人皆请出按西北边仲淹陝西宣抚富弼河北宣抚冬甲子殿直刘巽校理蕪舜钦并除勒停王洙落侍讲知濠州校理刁约通判海州殿丞江休复监税蔡州王益柔监税复州周延雋降为秘书丞校理章岷通判监州起居吕溱知楚州殿坐周延让宿州税敏监徐绶等并出先是杜衍范仲淹富弼等同执政引用一时闻人欲更张庶事中丞王拱辰等不便其所为舜钦仲淹循前例用鬻故纸公钱召妓女闲多会宾客拱辰廉得之讽其属鱼周询刘元瑜劾奏因欲摇动衍事下开封府治其事于是舜钦及巽俱坐自盗洙与妓杂坐而休复约延雋延让又服惨未除益柔并以谤讪周孔坐之同时斥逐多知名士世以为过薄拱辰方自喜曰吾一举网尽矣狱事起枢密副韩琦言于上曰昨闻宦者操文符捕馆职甚急众听纷骇舜钦一醉饱之过止可付有司治之何至陛下圣德素仁独自为是何也上悔见于色自仲淹出谗者益深拱辰既劾奏宋祁张方平又助之为言益柔作傲歌罪当诛欲因一益柔以累仲淹也章得象无所可否乃召贾昌朝王拱辰等共议其事韩琦独言益柔少年语狂何足深治天下大事固不少近臣同国休戚置此不言而攻一王益柔此其意有所在不特为傲歌可见也上悟稍宽之时两府合班奏事琦必尽言事虽属中书琦亦对上陈其实同列尤不悦上独识之曰韩琦性直己巳诏曰朕闻至治之世元凯共朝不为朋党君明臣哲垂荣亡极何其德之盛也朕宵旰励志庶几治古而承平之后浇竞相蒙人务交游家为激讦更相附丽以沽声誉至阴招贿赂佯托荐贤又按察将命者习为苛刻构织罪端奏鞫纵横以重多辟至于属文之人类无体要诋斥前圣妄肆异言以讪上为能以行怪为美自今委中书门下御史台采察以闻

#### 唐介论张尧佐

康定元年冬十月癸未朔以御史河南郡君朱氏清河郡君张氏并为才人张氏河南人父尧封天圣□□容南郡依大姓曹氏以女妻之后以进士第补石门军事推官未行卒京师从兄张尧佐将赴官于蜀而曹氏请以诸孤从行尧佐以道远弗许曹益困尧封母钱氏女也张氏时八岁与姊三人由钱氏入宫浸长得幸于上性聪敏使巧挟智数能探测人主意先后将迎上以其良家子待遇异诸嫔使累封清河郡君于是与朱氏并为才人朱氏开封府人也

庆历四年三月己巳判登闻鼓院尧佐提点开封府诸县镇公事谏官余靖言外议皆云尧佐识见浅近依托后宫嫔媵之势已得内降指挥改赐章服又从内批与官府差遣大臣依违不能坚执遂与府界提点伏惟陛下近岁以来絶斜封之官无私谒之宠以至公之心行至美之事安得外议如此臣深为陛下惜之又言尧佐修媛之世父进用不宜太遽顷者郭后之祸起于杨尚不可不鉴上曰朕岂以女谒进人盖因臣僚论荐后用



之尔如物议不允更当授一郡耳尧佐竟不出明年閏月除通判庆历六年九月御史知杂梅摯言权陝西转运使张尧佐非才由宫掖以进恐上累于圣德也七年七月壬午除户部副使张尧佐为天章待制河东都转运使皇佑元年九月乙未权三司使端明殿学士给事中张尧佐为礼部侍郎三司使御史陈旭言尧佐以后宫世父之亲不宜使制国用不听二年夏丙子谏官包拯陈旭吴奎等言三司使张尧佐任用以来百怪渐露上违天意万口交讥下违人情陛下何庇一尧佐违天拂人而稔岁危口者乎包拯又言尧佐久居是职失天下之望误天下之事臣为陛下痛惜之八月己未御史知杂何郯知汉州将行上疏言张尧佐充三司使已踰年若大享讫事众谓陛下必以酬劳为名进用尧佐在两府果如众议则命下之日必以死争陛下罢尧佐则伤恩黜言者则累德莫若富贵尧佐而如李用和处之正得宜也先是屯田员外郎彭思永入为侍御史极言内降之弊及祀明堂日有传百官皆迁官时尧佐以宫掖骤进王守忠以出入禁闕被宠参政阙员尧佐朝暮侍命王守忠亦求为节度使思永独奏入上震怒吴舍郭劝言思永纳忠不宜深罪上悟不复语寻罢侍御史为司封员外知宣州尧佐守忠之议遂格闰十一月己未尧佐为宣徽南院淮康节度使景灵宫使庚申又加尧佐同郡牧制置使癸亥知谏院包拯言陛下即位仅三十年未有失道败德之事乃五六年超擢尧佐羣臣加切议于下默而迹其过不在陛下在女谒近习及执政大臣也初执政希上旨一日除尧佐四使又以王举正重厚寡言同日授御史中丞朝议意举正儒懦迤邐退避动经旬浹则尧佐之命必遂行甲子举正告谢上殿力言擢用尧佐不当疏入不报戊辰退朝举正留班廷争复率殿中侍御史张择行唐介包拯吴奎陈旭于上前极言且于殿庑切责宰相上闻之遣中使谕旨百官乃退己巳诏近台官累乞罢张尧佐三司使及言亲连宫掖不可用为执政之臣若优与官爵其体差使遂除宣徽使廉己指挥自今妃之家毋得除两府职任今台谏官盖有言责其言虽过惟陛下矜察然宠尧佐太厚恐非所以全之是日尧佐亦奏辞宣徽景灵使乃诏学士院贴麻处分而成例卒不行

皇佑三年八月辛卯淮康节度使同郡牧使张尧佐为宣徽南院使判河阳御史中丞王举正言尧佐自罢宣徽半年端坐京师今复受之益增鄙诮此乃执事之臣不能执奏制命既行有损圣德若陛下不纳臣尽忠爱君之请必行尧佐滥赏窃位之典即乞黜臣以戒不识忌讳之臣不报知谏院吴奎陈旭包拯相继言之庚子诏自今张尧佐别有改迁检会此札子进呈执奏仍诏除宣徽使自今不得过二员十月丁丑殿中侍御史里行唐介责授春州别驾初尧佐除四使介与包拯力争又请王举正留百官班卒夺尧佐景灵宫宣徽二使顷之复除宣徽使判河阳或云补外不足争介以为宣徽次二府不计内外独争之上谕介除拟初出中书介言当责执政请全台上殿不许自请贬亦不许于是劾宰相文彦博专权任私挟邪为党知益州日作间金奇锦因中人入献宫掖缘此擢为执政恩州平贼幸会明镐成功遂叨宰相昨除尧佐累论奏面奉德音谓是中书进拟以此知非陛下本意盖彦博谋奸迎合显用尧佐阴结贵妃外陷陛下有私于后宫之名

内实为自谋之计乞斥罢彦博以富弼代之臣与富弼亦昧平生不敢私也上怒甚却其奏不视且言将加贬窜介徐读毕曰臣忠义愤激虽鼎镬不避敢辞贬窜上于坐急召二府示以奏曰介言他事乃可至谓彦博因贵妃得执政此何言也界面质彦博曰彦博宜自省即有之不可隐于上前彦博拜谢不已枢密副使梁适叱介下殿介辞益坚立殿上不去上令送御史台劾介既下殿彦博再拜言台官言事职也愿不加罪不许乃诏当制舍人即殿卢草制而责介春州别驾时上怒不可测羣臣莫敢谏左正言蔡襄乃进言介诚狂直容受直言帝王盛德也必望矜贷之翌日中丞王举正上疏言责介太重上亦中悔恐内外惊疑乃勅朝堂告谕百官改介英州别驾复取其奏以入遣中使护送介至英州且戒必全之无令道死而介之直声自是闻于天下介江陵人也知制诰胡宿言唐介坐言事得罪不可着为后法殿中侍御史梁旧亦言陛下爱介故遣中使护送之即不幸介以疾死天下后世能无以杀疑乎上曰诚不思此急追还中使亦言礼部尚书平章文彦博罪罢为礼部尚书观文殿知许州或言张尧封文彦博父客也彦博知益州贵妃有力焉因讽彦博织灯笼锦以进贵妃服之上惊问曰从何得此妃正色曰文彦博所织彦博与妾父有旧不然妾焉使之特以进于上耶上悦自是属意彦博及为参政明镐讨王则未克上甚忧之语妃曰大臣无一人为国了事日日上殿何益于国妃密令人语于彦博翌日彦博入奏乞身往破贼上大喜彦博坐恩州十数日贼果平即军中拜相议者谓彦博因明镐以成功其得相由妃力也介既用是深诋彦博虽坐贬彦博亦出事之有无卒莫辨之或云灯笼锦乃彦博夫人遗妃而彦博初不知介章乃梅尧臣书窜之过矣四年春正月徙英州别驾唐介为全州团练副使监郴州酒税三月郴州监税唐介为秘书丞六月壬辰秘书丞唐介为主客司员外郎通判潭州五年丁未通判潭州唐介为殿中侍御史知复州戊午新知复州主客员外郎殿中侍御史里行唐介为殿中侍御史充言事御史遣内侍赍告勅赐之介贬斥之二岁复召谏者谓太子优容言事之臣自古未有也冬十月丁巳殿中侍御史唐介为工部员外郎直集贤院介始入见无一言及迁谪上曰闻卿迁谪以来未尝有私书至京师可谓不易所守矣介顿首谢后数日论得失因言于上曰臣继今言不行必或固争之或更坐黜是臣重累陛下愿解官职许之至和中二年六月戊申文彦博为吏部尚书平章事【富弼同相】

嘉佑元年八月癸丑江东转运使工部员外郎直集贤院唐介为户部员外郎时殿中侍御史吴中复乞召介还朝宰臣文彦博因言介顷为御史言事多中臣病其间虽有风闻之误然当时责之太深请如中复所奏召用之故有是命五年秋七月户部员外郎天章阁待制知谏院唐介知洪州从介请也勅过门下知封驳事何郯封还之言介为谏官有补朝廷不当外出召介复知谏院如故

太平治迹统类卷十

收藏 分享 评分

回复 引用 订阅 TOP

wave99 发短消息

加为好友

wave99 当前离线

UID1 帖子42 精华0 积分62 威望0 金钱40 贡献0 阅读权限200 在线时间43  
小时 注册时间2009-5-12 最后登录2010-8-20 管理员

2# 发表于 2009-9-24 18:06 | 只看该作者 踩窝窝 送礼物 问候Ta

### ●钦定四库全书

太平治迹统类卷十一

(宋) 彭百川 撰

嘉佑建储之议

皇佑三年十一月乙亥朔戊寅保庆皇后崩始上起居饮食后必与之俱所以拥卫扶持恩意勤备性慈仁谦冲寡过帝尝召其妹永节永德见禁中欲受诸司副使后辞曰小儿岂胜太恩傥小官可也乃并命为左右侍禁又岁奉缗钱二万助汤沐后复辞曰此皆出民力愿留以贍军上不从上未有嗣后从容劝上选宗子养宫中由是英宗自宫邸未韶龄为后所养四年六月甲子皇太子宗实特迁右内率府率宗实允让第十三子也生四岁养于宫中至和元年十二月上春秋高未有继嗣皇佑末太常博士张述上书曰臣闻漆室之女有忧国之心倚楹而叹臣位于朝二十五年矣而区区之虑不敢早为陛下建长世之策是漆室之女不若也臣实耻之夫生民之命系于宗庙社稷之重而以继嗣为之本匹夫匹妇有百金之产犹能定谋托后事出于素况于有天下者哉建隆干德之臣子孰不愿太祖皇帝享年亿万者端拱天禧之臣子其心莫不若此而天地有运行日月有盈昃阴阳之数有闰有章气至而回物极而变理之必然者也艺祖以神器付太宗太宗以传真宗真宗以传陛下承三圣之业传之于十万年斯为孝矣而春秋四十四宗庙社稷之计未有托焉此臣所以夙夜彷徨而忧也陛下知此矣而以嫌疑不决非孝也群臣知此矣而以讳避不言非忠也陛下享天下之贵而不自怠有天下之富而不自侈过成康文景远矣谓宜默祈天地岳渎分宠六宫用均爱施或未之获则遴择宗亲才而贤者异其礼秩试以职务俾内外知圣心有所属则天下大幸是岁复上疏曰臣闻明两作离大人以继明照四方时京师自五月大雨冒城郭坏庐舍诸路亦奏水旱诏群臣言阙失知谏院范镇言天变之发本于储贰之位虚乞以臣前一章降付执政大臣速为裁定以塞天变文彦博富弼等共议建储未尝与两府议也枢密使王德用闻之合掌加额曰置此一尊菩萨何地或以告翰林欧阳修修曰老衙官何所知修又言水灾至变五行传言简社庙则水为灾陛下严奉礼可谓至矣惟未立储贰易曰王器莫若长子殆此之警戒乎水者阴也天之谴告必不虚发惟陛下深思而早决庶几可以消弭灾患转为



福应也疏凡再上皆留中不出知制诰吴奎言王者以社稷为本宗庙为重社稷未有奉宗庙未有主陛下在位三十五年而嗣续未立今之灾沴乃天地祖宗开发圣意不然何以陛下无大过朝廷无甚失輒降如此之灾异乎殿中侍御史李景初亦言此阴盛阳微之戒也盖以皇子未立致有此大忧惟陛下早为之计八月司马光上疏言当今之务大而急者在于根本未建癸丑范镇又言陛下即位三十五年以纳諫为德以畏天为心至于小小议论未尝不虚懷开纳今乃宗庙社稷之计又拒諫而不用违天而不戒乎臣职当言不敢爱死默以负陛下陛下乞以臣前所上章与大臣速定大计甲寅镇复遗执政书言镇前后六奏宗庙社稷大计而两次至中书歷月踰旬寂然不见有所施为伏愿诸公携镇之书言于上前速定大计如其不然即赐镇之死放镇归田皆诸公之赐也乙卯镇又言臣前六奏宗庙大计奉圣旨送中书陛下不以臣章留中而令送中书是欲使中书大臣奉行也臣两至中书而中书通相设词离为日君象也二明相继故能久照东升西没一昼一夜数之常也陛下御天下将三纪是日之正中也而未闻以继照为虑臣诚疑之夫嗣不早定则是一旦之忧而貽万世之患歷观前世事出仓猝则或宫闈出令或宦官主谋或奸臣首议贪孩孺以久其政冀闇昧以窃其权安危之机发于顷刻而朝议恬不为计岂不危哉述前后七疏最后语尤激切文多故不具载上终不以为罪述小溪人也审刑院吴及上疏推言閹寺以及继嗣云胎卵而伤鳳凰不至宦官多而继嗣未育书奏帝异其言

嘉佑元年春上御大庆殿受朝暴感风眩冠冕欹侧促行礼而罢己未上疾作文彦博与两府召入内副都知史志聪邓保吉等问上至禁中起居状志聪等以禁中事严密不敢泄彦博怒叱之曰主上暴得疾系宗社安危范惟房輩出入禁闥乃竟不令宰相知天子起居欲为何耶自今疾势增损必一一见白仍命引至中书取军令状志聪等素谨愿皆聽命及夕皇城诸门白当下锁志聪曰汝白宰相我不任受其军令由是禁中事宰相无不知其详左千牛卫大将军幼養于宫中上及皇后鞠視如己子既出还第问劳赏赐不絕宗室莫与为比上始得疾不能視朝中外忧恐文彦博富弼刘沆劝早立嗣上可之参政王尧臣之弟纯臣数与尧臣言宗实之贤时为王府官尧臣以告彦博等彦博等亦知宗实上意所属乃定议乞立宗实为嗣既具藁未及进上疾瘳其中辍是日知諫院范镇上疏曰陛下置諫官者为宗庙社稷计也今陛下不以臣愚任之諫官臣敢不以社稷计事陛下乎又云真宗取宗室子養之宫中此天下之大慮也太祖皇帝舍其子而立太宗皇帝天下之大公也宗庙社稷之至计也疏奏文彦博使提点开封公事蔡挺问镇何所言鎮以对明日挺谓鎮曰言如是何不与执政谋鎮曰自分必死乃敢言若谋之执政或以为不可岂得中辍也六月御史赵抃上疏曰伏覩陛下圣体偶一违豫中外人心莫不动搖赖宗庙社稷之降灵天地神明之垂佑四海蒙福宸躬浸康然犹上有谪见之文迨无虚月下有妖言之俗至于再三天其或者以陛下皇嗣未立人心未有所系垂厥祥异欲陛下深思远慮亟有所为而然也愿陛下思所以答谪见妖言之警戒思所以

固三圣百载之基业思所以安中外臣庶之忧惑思所以破奸雄阴贼之窥觐断宸衷发诚意择用宗室贤善子弟或教育宫闈或封建任使左右以良士辅导以正人盘石维宗根本深固有是二者惟陛下示天下以至公而择焉庚午殿中丞集贤校理通判并州司马光上疏畧云礼太宗无子则同室为之后为之后者为之子也故为人之后者事其所后皆如父所以尊尊而亲亲也伏惟祖宗受天明命功德在人牵支百世子孙千亿而陛下未有皇嗣人心忧危伏望深念祖宗艰难之业断自圣志昭然勿疑遴选宗室之中聪明刚正孝友仁慈者使摄居储贰之地以俟皇嗣之生退居藩服傥未欲然且使之辅政或典宿卫使尹京邑亦足以镇安天下之心时上在位久国嗣未立及不豫天下寒心而莫敢言惟諫官范镇首发其议光闻而继之又贻镇书言此大事不言则已言一出岂可复反顾愿公死争之于是镇言之益力□□□是陛下欲为宗庙大计而大臣不欲也丁巳又上疏庚申以知諫院范镇为户部员外郎兼御史知杂事镇辞不受曰陛下以臣言为非即当加臣以万死之罪以臣言为是岂可不先宗庙社稷计而遽为臣转官迁职也范镇又以慧星谪见上言星既灭又上言辞言责九月司马光又上疏言自古諫诤无官自公卿大夫至于庶人百工商旅蒙眊刍蕘无有不得言者所以達下情而察国政也若置官而守之非其官者不得言则下情壅而不通如是则国家虽有迫切之忧行道之人皆知之而在上者不得闻也此其为害岂不深乎卿以水灾常下明诏延访中外而勤求得失臣安敢舍此大节隱而不言时范镇亦累辞所除官且乞因恭谢大礼次定大议丙午镇又遗执政书云诸公视今日之事与前日为孰难必曰今日难于前日安知他日不难于今日难而不可为则他日不为易也此所以谓难易有机不可忽也先是执政谕镇以上不豫诸大臣亦尝建此策今间言已入为甚难故镇言及之十一月范镇入对言臣前后上章凡十九次切虑留中大臣不得尽见今録进呈乞付中书枢密大臣同共参议有异议者乞令与臣廷辨谓臣不然即祈明加臣罪臣之至情尽在于此镇待罪几百日须为白至泣以请上亦泣曰朕知卿言是也当俟二三年镇由是卒辞言职朝廷不能夺也二年八月翰林学士欧阳修以兗国公主出降因言臣愚以为宜因此时出自圣意于宗室之中选材贤可喜者録以为皇子其出入左右问安视膳亦足以慰悅圣情三年春太常博士吴及除丧擢校理乙巳改右正言諫院供职上疏言陛下以海宇之广宗庙之重而根本未立四方无所系心上下之忧无大于此宜发自圣断擢宗室以备储副又言内侍養子之禁■〈施，弓代方〉天理絕人欲阴累圣嗣愿诏大臣明示开寶之训勅内侍三十无養父者听養一子上顺天意上嘉纳之三月乙卯范镇知制诰镇自罢言职每因事未尝不以储嗣为言及知制诰上谢又面论之曰陛下许臣复三年矣愿早定大计六月庚戌权知开封包拯权御史中丞言东宫虚位日久天下以为忧太子者天下根本也根本不立祸孰大焉帝曰卿欲谁立拯曰臣非才备位乞预建太子者为宗庙万世计陛下问臣欲谁立是疑臣也臣年七十且无子非邀后福者惟陛下裁察帝喜曰徐当议之十二月韩宗彦以上春秋高未有继嗣上书请修胎養令四年夏诏有司取柴氏谱

系于诸房中取最长一人令岁时亲奉周祀以著作郎何鬲以皇嗣未立上疏请访周唐苗裔备二王后也六年知制诰宋祁卒祁弟兄皆以儒学显而祁尤能为文章善议论清约莊重不逮其兄论者以祁不至公辅以此祁自为遗奏曰陛下享国四十年东宫虚位天下人心岌岌为社稷计莫若择宗室贤才进爵亲王为匕鬯之主若六宫有就馆之庆圣嗣蕃衍则宗子降封郡王以避正嫡此定人心防祸患之大计也溢景文六月甲戌张述奏疏言择太祖太宗贤子孙立皇嗣系天下之望闰八月丁未司马光奏臣普通判并州曾三上章乞陛下早定继嗣以遏乱原是时臣踈遠在外犹不敢隱忠爱死特陈社稷计况今日侍陛下左右官以諫诤为名窃惟国家至大至急之务莫大于此若舍而不言專以冗细之一事烦渎圣聰是臣懷奸以事陛下罪不容于菹醢伏望陛下取臣所上三章少加省察或有可取断自圣意早赐施行如此则天地神祇宗庙社稷羣臣百姓并受其福惟在陛下一言而已光既奏复面请之上时简默不言虽执政奏事首肯而已闻光言沉思良久曰得非欲选宗室为继嗣者乎此忠臣之言但人不敢及尔光曰臣言此自谓必死不意陛下开纳上曰此何害古今皆有因令光以所言付中书光曰不可愿陛下自以意喻宰相是日光诣中书白事韩琦问光今日何言光默计大事不可不使宰相知思所以广上意者即曰所言宗庙社稷之计也琦喻意不复言九月司马光复奏继嗣事天下安危之本愿陛下果断而速行之初韩琦既喻光意后十日有诏令与御史里行陈洙同详定行户利害洙与光屏人语曰日者大享明堂韩公摄太尉洙为监察公从容谓洙曰闻君与君实善近建言立嗣事恨不以所言付中书欲发此议无自发之行户利害非所以烦公也欲洙见公達此意于是光复具奏且面言臣向者进说陛下忻然无难谓即行矣今寂无所闻此必有小人言陛下春秋鼎盛子孙当千亿何遽为此不祥之事小人无遠虑特欲仓卒之际援立所厚善者唐自文宗以后立嗣皆出左右之意至有称定策国老门生天子者此祸岂可胜言哉上大感悟曰送中书光至中书谓琦曰诸公不及今语异日夜半禁中出寸纸以某人为嗣则天下莫敢违琦等皆唯唯曰敢不尽力洙寻具奏乞择宗室之贤立以为后既发奏状谓家人曰我今日入一文字言社稷大计若得罪大者死小者贬窜汝輩当备之下奏状者未反洙得疾暴卒时知江州吕诲亦上言伏望陛下念根本之重宗庙之计思宗祖肇宋之艰难鉴成帝衍汉之基祚杜奸臣附会之源絕后世窺觐之渐早为定断慰安人心冬十月壬辰起复前左卫大将军岳州团练使宗实知宗正寺初司马光既以所上章送中书内复出知江州吕诲章宰相韩琦等与同列奏事读光海二章未及有所启上遽曰朕有此意多时但未得其人因左右顾曰宗室中谁可者琦曰此事非臣下所言当出自圣择上曰宫中尝養子二人小者甚纯不慧大者可也琦请其名上曰名某者今三十许岁矣议定将退琦复奏曰此事至大臣等未敢施行陛下今日更思之来日取旨明日奏事又启之上曰决无疑也琦曰事有渐容臣等商量所除官时犹居父丧乃议起复泰州防御使知宗正寺上喜曰如此甚好琦曰此事若行不可中止陛下断以不疑乞从内批上曰此岂可使妇人知之只中书行可也遂降



诏至和末上得疾文彦博等劝上早立嗣上许之会疾愈寝其疏既而言者相继上未许如是五六年言者亦稍息琦请建学内中欲以此感悟上意乘间言立嗣上曰后宫一二将就馆卿且待之后皆生皇女一日琦取汉书孔光传以进曰成帝即位二十五年无嗣立弟之子定陶王为太子成帝中材之主犹能之以陛下之圣何难哉太祖为天下长虑福流至今况宗子入继则陛下真有子矣盛德大庆传流万古孰有逾陛下者愿以太祖之心为心则无不可者于是因光等言卒回上意初然犹故辞也癸巳诸王宫侍讲王猎为宗正等伴读猎为宫僚凡十三年有辅导功故擢用之吴奎荐可任经筵文学之选韩琦言其不通私谒是为有守十一月知宗正寺宗实上表请终丧帝问韩琦琦曰陛下既知其贤而选之今不敢遽当者盖气识宏大兹所以为贤也愿固起之上四表乃从其请嘉佑七年春宗实乞还知宗正寺告勅不许秋七月又辞不许是月王陶上疏言又请对言宫嫔宦官有以上惑圣聪使宗实退避不敢前上问陶欲别与一名目如何陶曰此止是一差遣名目乞与执政大臣议之上曰当与别一名目于是韩琦等始有立为皇子之议丙午宗实又辞许之初宗实辞宗正寺告勅上谓韩琦曰彼既如此盍姑已乎琦曰此事安可中辍愿陛下赐以手札使知出自圣意必不敢辞比遣使称疾不一琦与欧阳修私议曰宗正之命既出外人皆知必为皇子不若遂正其名修曰知宗正寺告勅付合门得以不受今立为皇子止用诏书事足以定遂入对乞听宗实辞上曰勿便为他名便立为皇子琦曰请枢密院及张升至帝面谕之升曰陛下不疑否帝曰朕欲民心先有所系属但姓赵者斯可矣升即再拜称贺琦等乞帝书手札至中书丁丑琦语翰林王珪令草诏珪疑焉戊寅请对言此大事也后不可悔外议皆云执政大臣强陛下为此若不出自陛下则祸乱之萌未可知上指心曰此出自朕怀非由大臣之言也不如此众心不安卿何疑焉乃再拜殿上曰陛下能独断宗庙社稷此天下之福退而草诏以进己卯诏人道亲亲王者之所先务也盖二帝之隆治由兹出朕甚慕之在卫大将军岳州团练使宗实皇兄濮安懿王之子犹朕之子也少鞠于宫中而聪知仁贤见于夙成日者选于宗子近籍命以治宗正之事使者数至其第乃崇执谦退久不受命朕甚慕焉朕蒙先帝遗德奉承圣业罔敢失坠夫立爱之道自亲者始固可以厚天下之风而上以慰宗庙也其以为皇子癸未赐皇子名曙上既下

己卯诏书皇子犹坚卧称疾不入司马光王陶等言凡人争丝毫之利至相争夺今皇子辞不费之富已三百余日不受命其贤于人远矣有识闻之足以知陛下之圣能为天下得人然臣闻父召无诺君命召不俟驾而行使者受命不受词皇子不当辞逊使者不当徒返凡诏皇子内外皆具责降且以臣子大义责皇子宜必入上与辅臣谋之韩琦曰今既为陛下子何所问哉愿令族属敦劝彼内臣必不敢违辛丑皇子以肩舆赴曰恐遂失君父之命尔皇子初让宗正与记室孟阳谋之所上表皆孟阳之文也每一表饷十金孟阳辞皇子曰此不足为谢俟得请于朝方当厚赏尔凡十八表孟阳获千余缗及立为皇子犹固称疾孟阳入见于卧内曰主上察知太尉之贤参以天人之助乃发德音太

尉独称疾坚卧其义安在皇子曰非敢徼福以避祸也孟阳曰太尉事两宫以父母中外所闻主上为万世计而立为子矣今固辞不拜假如得请而归藩遂得宴安无患乎皇子抚榻而起曰吾意亦及此遂与宗谔等同入内良贱不满三十口行李萧然无异寒士有书数厨而已中外闻知相贺九月己巳以皇子为齐州防御使封巨鹿郡公

八年二月上不豫三月乙丑上暴崩于崇福殿夏四月壬辰朔辅臣入至寝殿后定议召皇子入告以上晏驾使嗣立皇子惊曰某不敢为因走辅臣共执之召学士王珪草遗制至日昃百官皆集犹吉服但服金带及鱼自垂拱殿门外哭而入班宁福殿前哭上韩琦宣遗制英宗即皇帝位嘉佑八年夏四月壬申英宗即皇帝位辅臣奏事必面详问本末然后裁决莫不当理中外翕然皆称明主是日晚忽得疾语言失序己卯大敛仁宗崩八日上疾增剧大呼狂走不能成礼韩琦亟投杖卷帘抱持上呼内人属令加意拥护上自不豫以来丧皆礼官执事羣臣奏慰则垂帘不坐乙未大祥上始亲行礼又卷帘坐受慰人心稍安戊戌司马光上疏畧曰今者圣体痊平初临大政四海之人拭目而视倾耳而听举措云为不可不审易曰君子以作事谋始召诰曰王乃初复呜呼若生子罔不在厥初生自貽哲命夫为政之要在于用人赏善罚恶而已三者之得则逺近翕然向风从化可以不劳而成无为而治三者之失则流闻四方莫不解体纪纲不立万事堕頽治乱之源安危之机尽在于是愿陛下安之重之精心审虑如射之有的必万全取中而后发可也陛下思念先朝欲报之德奉事皇太后孝谨抚诸公子慈爱此诚仁孝之至过人远甚臣愿陛下虽天性得之复加圣心夙夜匪懈谨终如始以结亿兆之心刑四方之化则福祚流于子孙令闻垂于无穷矣六月癸酉上复以疾不出是时惟两府得以入对戊寅侍御史吕诲上疏曰陛下践阼于今累月哀慕日深摧毁过礼圣躬违豫久而未平万几滞留皆期英断法宫严闕不覩清光臣子之心若为启处传闻大医所上阳剂解服用饵臣居外罔知其然陛下必以方术无状当更选上医精加调护若谓勿药有喜计日可待则臣恐节宣失宜五行二气浸淫汨戾邪得干正非所以保圣躬为宗社计也且居丧之礼致于灭性圣经深戒士人承家犹曰不可况万乘之重耶高宗居亮阴中谓傅说曰启乃心沃朕心若药弗瞑眩厥疾弗瘳平居尚及于此陛下实撻灾疹其可不念臣敢析明断節损哀泣申勅二府责成大医讲求药饵无俾玩疾切湏瞑眩期于必瘳使天下倾耸知礼乐刑政行于朝夕皇太后惟疾之忧欢然慰悻岂不休哉帝自感疾即厌服饵韩琦常亲执药杯以进帝不尽饮而却之药污琦衣太后亟出服赐琦琦不敢当太后曰相公殊不易癸巳司马光上太后及帝疏畧曰皇帝非皇太后无以君天下皇太后非皇帝无以安天下两宫相恃犹头目之与心腹也皇帝圣体平寧之时奉事皇太后承顺颜色宜无不如礼若药石未効定省温清有不能周备者亦皇太后所宜容也孔子曰孝哉闵子骞人不间于其父母昆弟之言盖言诚信纯至表里着明而他人不能间也孟子曰父子责善贼恩之大者盖言骨肉至亲止当以恩礼相厚不当较锱铢之是非臣愚伏望皇帝思孔子之言皇太后无忘孟子之戒万一奸人欲有闕说涉于离间者当立行诛戮以

明示天下使咸知谗妄之徒不能欺惑圣明也帝初以忧疑成疾举措或改常度其遇宦官尤少恩左右多不悦者乃共为谗间两宫成隙太后对辅臣常及之韩琦因出危言感动太后曰臣等只在外见得官家内中保护全在太后若官家失照管太后亦未得安穩太后惊曰相公是何言自家更切用心琦曰太后照管则众人自然照管矣同列为缩颈流汗或谓琦曰不太过不琦曰不如此不得间有传帝在禁中过失事众颇感之琦曰岂有殿上不曾错了一语而入宫门即得许多错琦固不信也传者亦稍息秋八月壬子帝御紫宸殿帝自六月癸酉不御殿至是始见十一月司马光奏疏皇太后畧云方今仁宗新弃四海皇帝久疾未平天下之势危于累卵惟恃两宫和睦以自安如天覆而地载岂可效常人之家争语言细故有丝毫之隙以为宗庙社稷之忧哉又奏疏諫帝曰臣曾两上疏以陛下受仁宗之天下欲报之德当奉事皇太后孝谨抚诸公主慈爱勿使奸邪之人有所离间致两宫有隙以上贻宗庙之忧下为羣生之祸叩心沥胆极其恳恻未审臣言已達圣听或万几之繁未尝奏御也此乃安危之本成败之端不可不察又云周书曰小民怨汝詈汝则皇自敬德古人有言御寒莫若里裘止谤莫若自修陛下疾疹未平固无如之何若既愈之后臣愚伏望陛下亲御皇太后阁克己以自责谢前失温恭朝夕侍養左右先意承志动无违擅使大孝之美絕粹光显过于初登大位之时如此则上下感悦宗社永安今日道路妄传何能为损也古之至孝虽有不慈之母犹能使之感悟驩悦回心易虑况皇太后圣善之德着闻四方自陛下有疾以来日夜泣涕禱于神祇忧劳困瘁以冀陛下之安寧如耕者之望收涉者之求济陛下岂不思有以慰安之也吕海上皇太后书劝太后调治圣躬以弭间言并以书劝帝尽孝道亲药物开陈切至多人所难言又乞早建东宫为庙社长久之计方帝疾甚时云为多乖错徃徃触忤太后太后不能堪左右谗间者或阴有废立之意昭陵既复土韩琦归自陵上太后遣中使持一封文书付琦启之则帝所寫歌词并宫中过失事琦即对使者焚毁令复奏曰太后每说官家心神未安则语言举动不中节何足怪也及进对帘前太后呜咽流涕具言之且曰老身殆无所容须相公作主琦曰此病故尔病已必不然子病母可不容之乎太后不恠欧阳修继言曰太后事仁宗数十年仁圣之德着于天下昔温成之宠以妬忌而浸成骄恣太后处之裕如无所不容今母子之间而反不能容耶太后曰得诸君知此善矣修曰此事何独臣等知之中外莫不知也太后意稍和修又言曰仁宗在位岁久德泽在人人所信服故一日晏驾天下禀承遗命奉戴嗣君无一人敢异同者今太后深居房闈臣等五六措大尔举动若非仁宗遗意天下谁肯听从太后默然他日琦等见帝帝曰太后待我无礼对曰自古圣帝明王不为少矣然独称舜为大孝岂其余不孝也父母慈爱而子孝此常事不道惟父母不慈爱而子不失孝乃可称尔政恐陛下事太后未至父母岂有不慈爱者帝大悟自是亦不复言先是十月辅臣请如干兴故事召侍臣讲读寻有诏直湏来春司马光以为学者帝王首务不宜以因寒暑废上纳其言十二月己巳始御迺英召侍讲侍读讲论语史记吕公着讲学而时习之曰说命云人求多闻时惟建事学于古训乃有获



然则人君之学当观自古圣贤之君如舜禹汤之所用心以求治天下国家之要道非若博士诸生治章句解诂训而已又讲有朋自远方来不亦乐乎公着曰自天子至于庶人皆赖朋友讲习然士之学者以得朋为难故有朋自远方来则以为乐至于王人之学则力可以治当世之贤者使之日燕见讲劝左右又以左右之贤为未足于是访之岩穴求诸滞淹则懷道抱德之老皆不远千里而至此天子之友自远方来也其乐亦大矣又讲人不知而不愠不亦君子乎公着言在下而不见知于上者多矣然在上者亦有未见知于下也故古之人君令有未孚人心有未服则反身修德而不以愠怒加之如舜之诞敷文德文王之皇自敬德也刘敞读史记至尧授舜以天下因陈说曰舜至侧微也尧越四岳禅之以位天地享之百姓戴之非有他道惟其孝友之德光于上下何谓孝友善父母为孝善兄弟为友词气明畅上竦体改容知其以讽諫也左右属听者皆动色即日传其语于外既退王珪谓敞曰公直言至此乎太后闻之亦大喜治平元年三月司马光言臣闻君子受人一饭之恩犹不忍负之况皇太后有莫大之德三陛下岂斯须忘之先帝立陛下为嗣皇太后有居中之助一也及先帝晏驾之夜太后决定大策迎立圣明二也陛下践阼数日而得疾不省人事中外众心惶惑失措皇太后为陛下摄理万几镇安中外以俟痊愈三也有此一德陛下子子孙孙报之不尽况兼三德而有之陛下所以奉養之礼若有丝毫不备四海之人其谓陛下为何如天地鬼神其谓陛下为何如此不可以不留圣心也今陛下已能奉養如礼臣复区区进言诚愿陛下戒之谨之始终无倦外尽其恭内尽其爱使孝德日新令闻四達以協天下之望保万世之祿而已若万一有小人以细末之事离间陛下子母不复顾国家倾覆之忧祇自营一身之利者愿陛下付之有司明正其罪使天下晓然皆知陛下圣明仁孝不负大恩而谗佞不能间也光又言祖宗之时闲居无事尝召侍进臣与之从容讲论万事至于文武朝士使臣选人凡得进见往往召之使前亲加访问委曲详悉无所不至所以然者一则欲使下情上通无壅蔽二则欲知其人能否才器所任是以黜陟取舍皆得其宜太平之业由此而致恭惟陛下潜德藩邸踰三十五年一旦龙飞庵有四海虽圣贤英睿得于天纵然与当世士大夫未尝相接民间情伪未其尽知臣谓宜诏侍从近臣日轮一员直资善堂夜则宿于崇文以备非时宣召若有事故请假则以次官互换直宿其余羣臣进见及奏事者亦望圣慈稍解严重细加访问以广聪明裨益大政他日光进又言陛下事皇太后当一如事濮王而有所加光寻以言不用求外补帝令宰臣宣谕曰卿所言事畧皆施行且供諫职未湏求出光复奏陛下虽事皇太后加于往日犹未及事濮王之时承颜顺色曲尽敬心虽省覽庶政犹未尝访问羣臣讲治乱之切务也陛下若以二者为止当如此则两宫之意无由和合万几之务何由治辨祸乱之原尚在则太平之期尚远臣虽日侍丹宸有何所益陛下若奉養之礼日增月益访求治道勤劳不倦使慈母欢忻于上百姓安乐于下则臣虽在远亦犹在陛下之侧也吕诲又再言先帝拔陛下于公侯之中以贤且长付托之意正谓今日也当陛下违豫之时非皇太后内辅则政无所倚大臣建策于国忠也然而陛下临朝御

前殿百官朝罢两府大臣方至内东门是纲领权柄皆在于手陛下自未专决何所恃也臣伏愿宸衷感悟无以此为念惟内勤率孝养率宫中尽礼则妇姑尽情相接母子之爱益亲躬修政务操守威福日与近臣讲求治道事无过举体斯为顺自然皇太后慰安恩意无间燕适深宫优游清净含饴弄孙不复闕政岂非皇太后之心耶海遂言于皇太后曰恭以殿下保佑圣子积三十年辅翼又踰期岁寰宇帖泰庙社安固慈恩至矣圣功大矣然而成乃全德是惟艰哉保敬克终亦惟艰哉以万几浩繁殿下焦心劳思曾未少休非所以燕贻福寿之本也况皇帝躬亲治事勤励如此在于圣虑应已慰安臣以谓东殿帘帷宜五七日一御咨询大臣无俾旷事庶少均逸暇于翊政之道亦无所损当在沉机奋于独断豫宣教命诞告朝廷外形谦讓之宜中遂优游之乐上顺天道下厌羣情享是全美岂不休哉夏四月权御史中丞王畴欲车驾行幸以安人心丁丑上疏于是諫官及执政相继亦请上曰当与太后议之韩琦白太后太后曰疾新愈恐未出琦曰上意亦自谓可出矣诏有司择日以闻癸未放宫女三百五十五人司马光有言欲遂物情重人世省浮费远嫌疑也光又言请约古礼定立后宫人数制度选择良家子入宫甲申御延英阁上自即位感疾至是犹未全安多不喜进药公着讲论语子之所慎齐战疾因言有天下者天地宗庙社稷之主其于齐戒祭祀必致诚尽恭不可不谨古之人君一怒则伏尸流血故于兴师动众不可不谨至于人之疾病常在起居饮食之间众人所谨况于人君任大守重固当节嗜欲声色近医药为宗社自爱不可不谨上纳其言为之俛首动容复因辅臣奏事语及公着欧阳修曰公着为人恬静有文上曰比于经筵讲解甚善司马光请车驾早出为民祈雨以副中外之望甲午祈雨于相国寺醴泉观帝久不豫至是士庶驩呼相庆戊申皇太后出手书付中书还政是日遂不复处分军国事先是上疾稍愈自去年秋即间日御前后殿视朝听政两府每退朝入内东宫小殿覆奏太后如初太后再出还政手书大臣以白上輒留之不出上既康复无他太后复降诏书还政韩琦亦欲罢东殿垂帘尝一日取十余事并以禀上上裁决如流悉皆允当琦退与同列相贺因谓曾公亮等曰昭陵复土琦即合求退顾上体未平迁延至今上听断不倦如此诚天下之大庆琦于帘前先白太后请一乡郡须公等赞成之公亮等皆曰朝廷安可无公公勿庸请也于是诣东殿复奏上所裁决十余事太后每事称善同列既退琦独留遂白太后如向与公亮等言太后曰相公安可求退老身合居深宫却每日在此甚非得已且容老身先退琦即称前代如马邓之贤不免贪恋权势今太后便能复辟诚马邓所不及因再拜称贺且言台諫亦有章疏乞太后还政未审决取何日撤帘太后遽起琦即励声命仪銮司撤帘帘既落犹在御屏后微见太后衣也

吕海上言恭闻皇太后罢同听政谦尊之德辉光益着在于圣世诚为庆事臣切以陛下隆孝治义切安亲尊奉之宜当全恭顺昔先帝拔陛下于公族三十年中孰不知皇太后经营保佑之助口宣遗制力扶天下不幸五日之外陛下违豫大臣叶谋乃建是策比翊辅踰年政令平允于陛下之恩为至矣于庙社之计为深矣今遽宣诰命罔知其

由在皇太后则为得之在陛下宜何如哉伏望宸衷特降诏旨曲形逊讓至于再三感动羣情庶几中礼追思先帝之顾托不失圣母之欢心克全孝恭斯为尽善中外明知无俾窃议盛德于始终之际也海寻又言帝尧受命不以位为乐而以天下为忧及其成功率由仁孝尔先帝在位四十余年天下晏然非有他术仁孝而已矣一旦举万乘之业属于陛下继承安得不以仁孝为先且皇太后事先帝日久稔详治道方罢共政虽陛下至明凡百官白事示不敢自专之意则上慰慈颜所得大矣元元知陛下奉亲尽礼孰不翕然从化帝尧之道无难致也庚戌御史中丞王畴上疏言太后于陛下有保養扶持之力古之贤后不能加也愿诏大臣讲求所以尊崇之礼是 诏中书枢密院参议尊崇皇太后仪范以闻知諫院司马光言治身莫先于孝治国莫先于公仁宗皇帝以四海之大授之陛下恩德之大天地不足以为比今登遐之后骨肉至亲独有皇太后与公主数人陛下所当竭力尽心供奉抚養以副仁宗皇帝之意又云大学曰古之欲明明德于天下者必先正其心有所忿懣则不得其正有所好乐则不得其正陛下奋发宫邸入纂皇极爰自潜跃至于天飞旧恩宿怨岂能尽无然今日即政之初皆不可稍置于圣虑以害至正人君之要道在进贤退不肖赏善罚恶而已爵禄天下之爵禄非以厚人君之所喜也刑罚者天下之刑罚非以快人君之所怒也是故爵人于朝与士共之刑人于市与众弃之明不敢以己私蓋天下之公议也令四海之贤杂沓并进愿陛下少留聪明其间苟有才德高茂合于人望者进之虽夙昔怨讎勿弃也有器识庸下无补于时者退之虽亲昵姻娅勿取也有励行立功为世所推者赏之虽意之所憎勿废也有懷奸犯禁为众所嫉者罚之虽意之所爱勿赦也如此则野无遗贤社稷永安矣司马光又上疏于皇太后曰臣切以治国家之道贵贱虽殊人情一也嘗观天下士民之家其长幼羣居长者或恩意不备衣食不豐幼者或容貌不恭言语不逊若幼者孝恭而不怨长者慈惠而不责上下雍睦家道以兴若幼者以为怨长者以为责上下乖离家道以衰其始相失也甚小而终为祸也甚大又加以谗言间之于是乎有父子相疑兄弟相嫉乱虐并兴无所不至者矣凡闺门之内子妇有孝恭之心至者则驩然以慈爱之心接之若其过当则当以忠孝之心教之教之备矣而犹不聽虽责之可也罪之可也及其既改则又当以欢心接之不可以一忤颜色而终身恶之遂不解谢故骨肉之间有威怒而无憎疾有诘责而无猜忌此自古圣人所以御其亲之道也臣切惟皇帝皇后于殿下兼内外之亲幼蒙保育今日为万民父母享天下之富贵孰云非殿下之力臣谓殿下固宜抚存爱念情同所生周旋保护以终大德不可偶以纖介之失遂蓄长久之怒弃生成之厚恩取踈远之深怨愚智所同知也皇帝去歲得疾之时容貌言辞诚或可疑得罪于殿下者臣固已嘗言于殿下云不可责有疾之人无疾之礼也且醉而有过醒犹可赦况有疾之人不自省知本非其意之所欲为岂可追数以为罪咎耶皇后自童孺朝暮游戏于殿下之懷分甘哺果拊循煦妪有恩无威今既正位中宫得复奉膳羞盥帨以事殿下其意恃昔日之爰不自踈外犹以童孺之心望于殿下故或有所求须不时满意则愠怼怨望不能尽如家人妇姑之礼殿下



虽怒之责之固其宜也谁曰不可但事过之后殿下若遂弃之不复收恤憎嫉如仇讎则臣以为过矣臣在阙门之外无由知禁廷之事窃闻道路之言未详虚实皆言近日皇帝与皇后奉事殿下恭勤之礼甚加于往时而殿下遇之太严接之太简或时进见殿下虽赐之坐如待疎客言语相接不过数句须臾之间已复遣去如此则母子之恩何时得達妇姑之礼如何得施所以使之疑惑恐惧不敢自亲者盖以此也臣切惟殿下母仪天下踰三十年柔明之誉洽于中外皇帝龙潜藩邸进德修业仁孝之事光于远迩先帝以至公大义选贤继嗣海内之人皆谓继統之日慈孝之风必自家刑国诚不意闾巷之民忽有异论推其本原盖由皇帝遇疾之际宫省之内必有谗佞之人造誹言语互相间构一则欲诈效小忠以结殿下之知饶求利禄二则自知过失素多畏嗣君之严有所不容三则欲窃弄权柄恶君长聪明使已不得自恣是以日夜窥覘拾掇丝毫之失无不纳于殿下之耳殿下虽至聪哲不能无疑虽至仁慈不能无怒皇帝以刚健之性屈于众口无以自伸能不愤悒遂使两宫之间介然相失久而不解流闻于外朝野之士有敢窃议其是非者深可惜也今天诱其衷殿下浚发慈旨卓然远覽举天下之政归之皇帝此乃宗庙之灵生民之福然臣窃料谗邪之人心如沸汤愈不自安力谋离间彼皆自营一身之私非为国家与殿下之计也臣望殿下深察其情勿复聽纳斥远其人勿置左右召諭皇帝以向来纷纷皆此属所为自今以后母子之间当坦然无疑皇帝必涕泣拜伏感激推谢然后两宫之欢一皆如旧皇帝进见之际殿下宜赐以温颜留之从容来往无时勿加限絶或置酒笑语与之欣欣相待如一家人之礼则殿下坐享孝養何乐如之心平气和眉寿无疆国家又安内外无患名誉光美垂于无穷与其信任谗邪猜防百端终日戚戚忧愤生疾国家不寧祸乱横生讥谤之言流于后世二者得失相去遠矣且殿下既能以祖宗之业付皇帝又以大政授之独于恩礼之际终不能豁然回心息怒其故何哉方今宫闈之中殿下骨肉至亲止皇帝皇后长公主及皇子公主数人而已其余皆行路之人于殿下何有若亲者尚不能结以恩信猜而远之则疎者独肯受殿下顾遇尽其死力始终无二乎夫贵莫贵于为天子之母富莫富于受四海之養今殿下有此富贵而不能自乐亲其所可踈疎其所可亲使受恩之子妇彷徨而不自安蹶蹶而不敢进虽内懷反哺之心而无施臣窃为殿下惜之臣不避死亡以进忠直庶几殿下母子和悦国家安寧是臣所以为报效也辛未富弼辞所迁官畧云陛下録臣先帝时微劳曷若报皇太后今日之大恩皇太后垂帘日嘗谓臣与胡宿吴奎曰无夫孤孀妇人无所告诉臣等共闻此语实为伤心必料中书亦闻其说又向窃闻先帝诸公主陛下易其所居以安己女如此者尤甚动心亦未嘗闻陛下畧皆思念恭惟先帝临御天下四十二年仁恩德泽入人骨髓以至徧及虫鱼草木臣事先帝亦三十余年自布衣擢至首相恩德可谓大今日不忍见其孀后幼女失所如此臣反坐享陛下迁宠还得安乎仁宗与皇太后于陛下有天地之恩而尚未闻所以为报臣于陛下不过有先时议论丝发之劳何赏之可加陛下忘天地之大恩録丝粟之小劳可谓顛倒不思之甚也天下事所急而宜先者惟是仁宗一后五女

所谓孤遗而百官万方力不能急其休戚只系于陛下一人之手切在陛下照恤之恩思怜之则天道助人情归子子孙孙享福无穷也奏入不报弼又奏曰愿陛下奉仁宗祀祭尽恭谨之道事皇太后颜色极诚实之礼若勤勤不已则孝德自然彰闻于外京师翕然歌咏传达天下遂成风教陛下可不劳而治至时推恩教倍今日臣自不辞让君臣之际两得其宜岂不美哉岂不盛哉奏至六七上乃优诏荅焉圣诏云恭惟仁宗皇帝欲报之德昊天罔极皇太后子育朕躬方以天下之养承颜于朝夕矧曰孝之至乎又曰今既勗朕以事亲之道而拒君命不受岂其言之戾耶弼又两奏卒不聽弼乃受之八月丙子司马光奏乞延访羣臣八月丙辰宣政使入内都知安静军留后任守忠安置蕲州初上为皇子命守忠宣召守忠避不肯行及上即位不豫遂交鬪两宫及擅取奉宸库金珠数万两献皇后受赏赐司马光吕诲交章劾之光数其十罪乞斩之市都帝纳其言翌日遂黜守忠焉九月初有诏开迓英阁重阳当罢侍讲吕公着司马光言先帝时无事常开讲筵近因圣体不安遂于盛暑盛寒之月权罢数月今陛下始初清明且亲近儒雅讲求治道愿不息顷刻之间日御讲筵从之

治平二年八月以灾异诏中外臣僚并许上直言时政得失学士草诏曰执政大臣其惕思天变帝书其后曰淫雨为灾戒朕不德更曰执政大臣朕之股肱其協德交修以辅不逮司马光上疏畧云窃惟皇太后仁明之德爰自先朝保育圣躬在于襁褓陛下入承大统不可谓全非太后之力当陛下得病之初外间传言皇太后于梓宫之前为陛下叩头祈请额为之伤如此岂可谓无慈爱之心于陛下哉不幸谗贼之人交相离间遂使两宫之情介然有隙就使皇太后有不慈于陛下陛下为人之子安可较量曲直遂生忿恨而于爱恭之心有所不备乎传曰忘大德灭小怨先帝擢陛下于众人之中自防御使升为天子唯以一后数公主属于陛下梓宫在殡已失太后之欢心长公主数人皆屏居闲宫臣请以小喻之匹夫为此犹贬于乡里况以天子之尊为四海所瞻仰哉臣愿陛下上稽天意下顺人心奉事皇太后愈加孝谨务得欢心诸长公主时加存抚无令失所总揽大柄勿以假人选用英俊修名责实赏功罚罪舍小取大划塞弊幸一新大政延纳讠言虚心从善皆行之以至诚夫至诚可动金石况人乎陛下果能尽诚于此则至德日新令名四達人心悦天道和百穀蕃嘉瑞至蛮夷率服福流子孙矣吕诲言蔽遏有德厥灾水蓋有德之人壅遏而不用也陛下当翼翼修思追掇其失庶几消复之理吕大防言雨水为患此阴胜阳之沴也陈八事曰主恩不立臣权太盛邪议干正私恩害公西北连谋盗贼恣行羣情失职刑罚失平知制诰郑獬时知荆南上疏曰陛下发诏书求忠言羣臣章疏宜选官署属令专掌之如其宏谋伟论可施于当世者则召见与共议如此则下诏有实言陛下得言有实用史册书之以为某年大水诏书求直言用某人言行某事以黜夫前世之为空言者则无令陛下诏书藏于有司为数幅空纸而已十月司马光言臣以弩朽得侍劝讲窃见陛下天性好学孜孜不倦然于经席之中未尝发言有所询问臣愚意陛下欲护羣臣之短恐于应对之际仓卒失据不能开陈稠人之中受其愧耻此诚圣

心仁恕之极羣臣捐躯无以报塞然臣闻易曰君子学以聚之问以辨之论语曰疑思问中庸曰有弗问问之弗得弗措也有弗辨辨之弗明弗措也以此言之学非问辨无由发明今陛下默而识之不加询访虽为臣等踈浅之幸窃恐无以宣畅经旨裨助圣性伏望自今讲筵或有臣等讲解未尽之处乞赐诘问或虑一时记忆不能备者许令退归讨寻次日别具劄子敷奏庶几可以辅稽古之志成日新之益

### 治平西夏扰邊

治平元年夏庚午赐谅祚诏戒以自今宜精择使臣母俾生事先是夏国贺登极进奏人吴宗等至顺天门欲佩鱼及以仪物自从引伴高宜禁之不可留止廐置一夕絶供馈宗出不逊语宜折之如故事良久乃聽入及赐食殿门愬于押判张覲诏令还付延州与宜辨宜者延州所遣也程戡受诏通判诘之宗曰引伴谓当用一百万兵遂入贺兰穴此何等语也通判曰闻使人目国主为少主故引伴有此对是失在使人不在引伴宗沮服遂不复辨司马光吕诲乞加宜罪不报是秋夏国主谅祚数出兵寇秦鳳泾原抄熟户扰邊寨弓箭手杀掠人畜以万计诏遣文思副使王无忌赍诏诘问司马光言去岁先帝遐逝谅祚使来致祭延州差指使高宜押伴入京宜言语轻肆傲其使者侮其国主使者临辞自诉于朝臣当时与吕海上言乞加宜罪朝廷忽畧不以为意使其怨怼归国外人皆以为耻今歲以来谅祚招亡命点集兵马窥伺邊境攻围堡寨驱胁熟户八千余族杀掠弓箭手数千人悖逆如此而朝廷更使臣赍诏抚谕彼顺从则抚之傲狠则畏之若使臣至彼谅祚稽首伏罪禁止侵掠犹或可赦若复拒违王命辞理骄慢侵掠不已未知朝廷将何以待之伤威损重孰甚于此方今公私困竭士卒骄惰将帅乏人西夏犯邊事之可忧孰大于此而朝廷上下晏然若无事其故何哉岂朝廷自有其备而踈外之臣不得预知乎臣窃惑之所谓备者非但添屯兵马积贮粮草而已也在于选将帅修军政二者皆阙何谓有备臣不胜愤懣伏望陛下博延羣臣访以备邊之策择其善者而力行之十一月己亥命屯田郎中徐亿职方员外郎李师钐屯田员外郎钱公纪刺陝西义勇初宰相韩琦奏三代汉唐以来皆藉民为兵故数虽多而贍養至溥所以雄制万宇威服四夷又非近世所蓄冗兵可及也唐置府兵最为近古天寶已后废不能复因循至于五代广募长征之兵故困天下而不能给今之义勇河北几五万余河东几八万勇悍纯实生于天性而有物力资产父母妻子之所系若稍加简练亦唐之府兵也陝西当西事之初亦嘗三丁选一丁为弓手其役刺为捷正军及夏国纳款朝廷所■〈才东〉今所存无几河北河东陝西三路当西邊控御之地事当一体今若于陝西诸州亦点义勇止刺手背则又知不复刺面可无骇惊或令永兴河中鳳翔三府先刺观聽既安然后及诸郡一时不无小扰而终成长利诏从之枢副胡宿请且刺沿邊州军上曰不若即行之韩琦意亦欲如此乃命亿等往除商虢二州余悉籍为义勇凡主户三丁选一丁六选二九选三年二十至五十材勇者充止刺手背以五百人为指挥使并副二人正都头三人十将虞侯承局押官各五人歲以十月番上阅教一月而罢又诏泰州成纪等六县有买保毅田承



名额者每三丁刺一六丁刺二九丁刺三悉为义勇人赐钱二千总得十五万六千八百七十三人其后复诏秦陇仪渭泾原邠宁环庆鄜延十三州义勇遇召集防日给米二升月给酱菜钱三百知諫院司马光奏凡五乞罢刺陝西义勇云于民有世世之害于国无分毫之利终弗听又六奏及申中书自劾求去亦终弗许尝至中书与韩琦辨琦谓光曰兵贵先声后实今谅祚方桀傲使闻陝西骤益二十万兵岂不震惧光曰兵之用先声为无其实也独可用之于一日之间尔少缓则敌知其情不可复用矣今吾益兵二十万然实不可用过十日西人知其详宁复惧乎琦不能荅复曰君但见庆历间陝西乡兵初刺手背后皆刺面充正军忧令复然尔今已降勅榜与民约永不充军戍邊矣光曰虽光亦未免疑也琦曰吾在此君无忧此语之不信光曰光终不敢奉信非独不敢但恐相公不能自信尔怒曰君何相轻甚也光曰相公长在此可也万一均逸偃藩他人在此因相公见成之兵遣使运粮戍邊反掌间尔琦默然竟不为止其后十年义勇运粮戍邊以为常

十二月内侍王昭明为环庆路钤辖兼管鄜延蕃部公事李若愚为泾原钤辖兼权管句当秦鳳蕃部公事令预为经画后数日又以左藏副使梁寔领秦鳳内殿承制韩则顺领鄜延而令昭明等专令本路前世以宦人预邊事将帅不得尽其用及有是命人不以为便也諫官吕诲言中官监军之害乞罢四人御史傅谋俞赵瞻皆有论列瞻又因入对力请追还昭明等否则愿显逐乞不从知延州程戡言蕃部所以亡去苦邊吏苛暴为西人诱畧耳今昭明等徒能呼召首领慰恤以言犒赐以酒食茶帛终未足以结其心也而甚动邊聽宜改用昭明等为路分钤辖都监各部一将军马兼沿邊巡检使勿复专蕃部事亦不从二年春诏夏主谅祚自泾原秦鳳路熟户及弓箭手地分不可更行侵扰始朝廷遣王元忌赍诏责谅祚谅祚迁延弗受诏而因其贺使附表自言起兵之由归罪我邊吏辞多非实复以诏戒諭终弗听癸酉参政欧阳修言谅祚猖獗备御之计全不择人宜用旧守环庆孙沔以备一方之寄诏以沔为资政殿大学士知河中府修尝奏西邊事宜云兵分备寡兵家之大害也害常在我以逸待劳兵家之大利也利尝在彼是以往来贼常得志今能反其事移我之害于敌夺敌之利在我则我当先为出攻之计使彼疲于守御则我亦得志此臣所谓方今可用之谋也愿陛下遣一重臣出而巡抚遍见诸将与熟图之以定大计凡山川道里蕃汉步骑出入所宜可先知者悉图上方畧其余不可先言付之将帅使其见形应变因敌制胜至于谅祚之所为宜少含容既以骄其心亦以缓其事以待吾之为备而且严戒五路训兵选将利器用蓄资粮常具行军之计待其反书朝奏则王师暮出以骇其心而夺其器使其枝梧不暇则胜势在我也往年议者亦欲招緝横山蕃部谋取山界之地然臣谓必欲招之亦须先藉胜捷之势使其知中国之强则方肯来附也由是言之亦出攻为利矣司马光言羣臣既不能为陛下忠谋陛下又不能自以为忧则谁当忧之臣恐邊臣之请兵无穷则朝廷之募兵无已仓库之束帛有限百姓之膏血有涯不知国家长此沉疴何时当瘳乎愿陛下罢招禁军选将帅训练旧有之兵以备御四夷不患不足五月权知开封冯京为陝西安抚使代陈旭也先是韩琦言庆

歷中臣嘗與仲淹同上御戎四策未及施用而元昊請和今諒祚狂童非元昊之比敢爾輕動勢將渝盟願以臣當時所上四策令二府共議擇可行者付邊帥及命京使陝西琦又言何亮劉平各言西事亮謂靈武不可棄棄則西人必吞諸戎為后大患當時不能用今悉驗焉劉平所陳四策稍異然大抵以得西人山界土地部族為甚利願并二人奏付京使與四路使臣參議之然京所議方畧卒無聞也六月己酉司馬光言臣聞明王謀事于始而慮患于微是以用力不勞收功甚大切見國家所以御外夷之道似未盡其宜當安靜附順之時則好與之計校末節爭競細故及其桀傲橫暴之后則又從而姑息不能誅討是使外夷益有輕中國之心皆怨于柔服而樂為背叛近者西人之禍生于高宜北方之隙起于趙滋而朝廷至今尚未省悟猶以二人所為為是而以循理守分者為非是以邊鄙武臣皆銳意生事或以開展荒棄之地十數里為功勞或以殺掠老弱之民三五人為勇敢朝廷輒稱其才能驟加擢用既而敵心忿恨遂來報復屠剪熟戶鈔劫邊民所喪失者動以千計而朝廷但知驚駭增兵聚糧其致寇之人既不追究而守邊之人亦無譴責如此而望四夷賓服疆場無虞是猶添薪扇火而求湯之不沸也臣愚切惟真宗皇帝與契丹約為兄弟仁宗皇帝赦趙元昊背叛之罪冊為國主歲捐百萬之財分遺二敵豈樂此而為之哉誠以屈己之媿小愛民之仁大故也今陛下嗣已成之業守既安之基而執事之臣數以爭桑之小忿不思灌瓜之大計使邊鄙之患紛紛不息臣竊惟陛下惜之近者聞契丹之民有于界河捕魚及于白溝之南剪伐柳栽者此乃邊鄙小事何足介意而朝廷以前知雄州李中佑不能禁御為不材別選州將以代之臣恐新將之至必以中佑為戒而以趙滋為法妄殺敵民則戰鬥之端徃來無窮矣況今民力凋弊倉庫虛竭將帥乏人士卒不練夏國既有憤怨屢來侵寇禍胎已成若又加以契丹失歡臣恐國力未易支也伏望陛下嚴戒北邊鄙將吏若契丹不循常例小小相侵如魚船柳栽之類止可以文牒整會道理曉諭使其官司自行禁約不可以矢刃相加若再三曉諭不聽則聞于朝廷雖專遣使臣至其庭與之辨論曲直亦無傷也若又不聽則莫若博求賢才增修政事待公私富足士馬精強然後奉辭以討之可驅窮廬于漠北復漢唐之土宇與其爭漁柳之勝負不亦遠哉十二月甲辰夏國主諒祚使人來賀正旦丁未使人來賀壽聖節司馬光言諒祚之所以依旧遣使稱臣奉貢者一則利于每歲所賜金帛二十余萬二則利于入京販易三則欲朝廷不為之備三年九月夏國主諒祚舉兵寇大順城又寇柔遠寨燒屈乞等三村柵段木嶺初環慶經畧安撫使蔡挺斥堠明知諒祚入寇即遣諸將分屯要害以大順城堅雖被攻不可破不益兵柔遠城惡命都副總管張玉將重兵守之勅近邊熟戶入保青野戒諸寨無得逆戰諒祚將步騎數萬攻圍大順三日蕃官趙明與官兵合擊之諒祚裹銀甲毡帽以督戰挺先選強弩分列于濠外注矢下射重甲洞貫諒祚中流矢遁去徙寇柔遠張玉募胆勇三千人夜出扰賊營賊遂驚潰上遣中使賜挺手詔慰勞諒祚退屯金湯聲言益發步騎且出慢辭須已得歲賜復攻圍大順城鄜延經畧安撫陸洸言朝廷積習如此故虜敢狂悖不稍加詰責則國威不立即止其歲賜銀帛牒宥

州问故上喜曰固知此人可倚也诏诋得宥州报具闻而谅祚果大沮盘旋寨下取粮四反卒不敢入寇又顾岁俭贪得赐物乃报言边吏擅兴兵行且诛之初夏人寇大顺上问两府策将安出宰相韩琦请留岁赐遣使赉诏责问枢密使文彦博等曰如此则边衅大矣至引竇元康定丧师以动上意琦曰兵家须料彼此今日御戎之备大过昔时且谅祚狂童岂可比元昊也诘之必报上竟从韩琦议遣何次公往使朝退二府以所论不同各私相语彦博谓其党曰渠自言料敌且观渠所料逾月次公还以谅祚表上时上卧疾辅臣因入问起居毕琦叩御榻曰谅祚服罪否上力疾顾谓琦曰一如所料谅祚所上表虽言受赐景朝敢渝先哲然尚多辞归罪于边吏乃复赐诏诘之令专遣使别贡誓表直言今后严戒边吏及酋长各守封疆不得点集兵马輒相侵犯其鄜延环庆泾原秦鳳等路一带久系汉界熟户并顺汉西蕃不得更行劫掠及逼胁归投所有汉界不逞叛亡之人亦不得更有招纳苟渝此盟是为絶好余则遵依先降警诏朝廷恩礼自当一切如旧四年闰三月甲申夏主谅祚遣使来献方物谢罪请戒飭酋长封疆如去冬所赐诏旨复以诏荅之曰苟封奏如彼忠信勿渝则恩礼所加岁时如旧仍赐银及绢各五百疋两

### 议濮安懿王同异

治平元年夏戊申皇太后出手书付中书还政是日遂不复处分军国大事【详见辅导门】癸亥宰相韩琦言濮安懿王德盛位降所宜尊礼陛下受命先朝躬承圣统顾以大义后其私亲钦之重之事不轻发臣等忝备宰弼实闻国论谓当考古约礼因宜称情使有以隆恩而广爱庶几上有以彰孝治下以厚民俗臣伏请下有司议濮安懿王及谯国太夫人王氏襄国太夫人韩氏仙游县君任氏合行典礼详处其当以时施行诏湏大祥后议二年夏四月戊戌诏议崇奉濮王典礼以闻宰臣韩琦等以元年奏进呈也六月初议崇奉濮安懿王典礼翰林学士王珪等相顾不敢先天章阁待制司马光独奋笔立议议成珪即勅吏以光手稿为案其议曰臣等谨按仪礼丧服为人后者传曰何以三年也受重者必尊服服之为所后者之祖父母妻妻之父母昆弟弟之子若子子者皆如亲也又为人后者为其父母传曰何以期也不二斩也特重于大宗者降其小宗也又为人后者为其昆弟传曰何以大功也为人后者辟其昆弟也以此观之为人后者为之子不敢复顾私亲圣人制礼尊无二上若恭爱之心分施于彼则不专一于此故也是以秦汉以来帝王有自旁支入继大统或推尊父母以为帝后皆见非当时取讥后世臣等不敢引以为圣朝法前代之入继者多宫车晏驾之后援立之策或出母后或出近臣非如仁宗皇帝年龄未衰深惟宗庙之重祇承天地之意于宗室众多之中简拔圣明授以大业陛下亲为先帝之子然后继体承祧光有天下濮安懿王虽于陛下有天性之亲顾复之恩然陛下所以负宸端冕富有四海子子孙孙万世相承者皆先帝之德也臣等愚浅不達古今切谓今日所以崇奉濮安懿王典礼宜準先朝封赠期尊亲属故事高官大国极其尊荣襄国太夫人仙游县君亦改封大国太夫人考之古今实为宜称议上中书奏王珪等议未见详定濮王当称何亲名与不名珪等议濮王于仁宗为兄于皇帝宜称



皇伯而不名如楚王涇王故事议者或欲称皇伯考天章待制吕公着曰真宗以太祖为皇伯考非可加于濮王也是月己酉中书又奏按仪礼为人后者为其父母服及按令文典五服年月勅并云为人后者为其所后父斩衰三年为人后者为其父母齐衰期即出继之子于所继所生父母皆称父母又汉宣帝光武皆称其父为皇考今王珪等议称皇伯于典礼未见明据请下尚书省集议从之执政意朝廷必有迎合者而台諫皆是王珪议论汹汹未及上太后闻之辛亥内出手书切责韩琦等以不当议称皇考而琦等奏太后以珪等议称皇伯为无稽且欲缓其事须太后意解

甲寅降诏曰如闻集议议论不一宜权罢议当令有司博求典故务合礼经以闻范镇时判太常即率礼官上言汉宣帝于昭帝为孙光武于平帝为祖则其父容可称皇考然议者犹或非之谓其以小宗而合大宗之统也今陛下既考仁宗又考濮王则其失又非汉宣光武比也凡称帝称皇若皇考立寝庙论昭穆皆非是因具列仪礼及汉儒论议魏明帝诏为五篇奏之执政得奏怒遂责镇曰诏书云当令检详奈何遽列上耶镇曰有司得诏书不敢稽留即以闻乃其职也奈何更以为罪耶于是台官自中丞贾黯以下各有奏乞早从王珪等议侍御史知杂事吕海言朝廷既知议论不一当辨正是非三合众意明所适从岂可事有未定遽罢集议付有司诏命反复非所以示至公于天下也臣輒询愚见敢以闻上臣谨按仪礼为人后者为其父母服盖为大宗斩还为小宗周不二斩明于彼而判于此矣又按令文典五服年月敕出继之子于所生皆称父母者所以别其本生于后也在属籍当行除附斯令之意可明也如汉宣光武皆称父为皇考者二帝上承本宗皆非旁继子今事体畧不相类王珪等议濮安懿王于仁宗皇帝其属为兄于皇帝合称皇伯而不名于礼得矣及引元佐元俨称皇兄叔之类皆本朝典礼安得谓之无据臣切原勅意直欲加濮安懿王为皇考与仁庙同称如是则尊有二上昭有二斩礼律之大皆相戾矣臣恭以陛下龙跃藩邸入继大统南面尊临皆先帝之德也甫终禫尚未遑诣谒遽有斯议搢绅之士皆未为然陛下躬勤孝養上奉慈闈承颜犹惧其不足矧复顾私恩别亲疎而忘大义哉就如有司循情酌礼以安懿为考仙游为妣示于中外得为安乎一切惟兹事非出清衷必佞臣建白苟悦圣情二三辅臣不能为陛下开陈正论又将启其间隙违背礼义惑乱人情忽先帝之眷倚陷陛下于非正得为忠乎臣伏望陛下开广圣虑动遵孝治不作无益以害至公既罢三省集议当别降诏旨以王珪等议为定以前后所献不一论尽降出外辨正是非明其有罪寘之于法可以涣释羣疑杜絶邪论不然何以明陛下之无私判中外之深感传之永久所损不细又言皆天下英睿学通古今经义粲然不应有感礼所谓大宗者収合于宗族也陛下继大宗而有天下义之重恩不得掩岂可复顾于小宗哉人臣非不欲陛下尊显所生褒崇封爵极其美称惟不过于典礼矧至孝之道不能循于己私于亲惟其诚而已矣在宸衷岂不是思第为邪佞进说惑乱人情陛下何惜一幅之诏推示信诚以皇伯之称为定追正封爵以称典礼则中外之心涣然释疑不如是则纷纷议论有损圣明不独贻讥于万世将恐取轻于四夷又言

陛下践阼以来克勤政理继述所存孝诚已至惟濮安懿王一事不合典礼未副人情良为陛下惜之然事由中书起议两禁及礼官集议台諫官章疏俱未蒙施行虽有权罢指挥终未了絕议论纷纷中外愈惑宰相前请如是必难为复有开陈人言不已诚有累于圣躬解天下之疑者莫若发睿断特以手诏自中而下追封濮安懿王大国与夫大礼典称是仍于郊祀前了毕慰厌人心于体为顺奏皆留中不行司马光又言圣人举事与众同欲故能下協人心上顺天意洪范曰三人占从二人言盖国有大疑则决之于众自上世而然矣伏见向者诏羣臣议濮安懿王合行典礼翰林学士王珪等二十余人皆以为宜準先朝封赠期亲尊属故事凡两次会议无一人异辞所以言者盖欲奉濮王以礼辅陛下以义也而政府之意独欲尊濮王为皇考巧饰词说误惑圣德不顾先王之大典蔑弃天下之公议使宗室踈属皆已受奉赠而崇奉濮王之礼未能有加二议是非臣更请为陛下别白言之政府言仪礼令文五服年月敕皆云为人后者为其父母即出继之子于所生皆称父母臣按礼法必須指事立文使人晓解令欲言为人后者为其父母之服若不谓之父母不知如何立文此乃政府欺罔天下之人谓其皆不识文理也又言汉宣帝光武皆称其父为皇考臣按宣帝承昭帝之后以孙继祖故尊其父为皇考而不敢尊其祖为皇考以其昭穆同故也光武起布衣诛王莽亲冒矢石以得天下名为中兴其实创业虽自立七庙犹非大过况但称皇考其谦损甚矣今陛下亲为仁宗之子传曰国无二君家无二尊若复尊濮王为皇考则置仁宗于何地乎政府前以二帝不加尊号于其父祖引以为法则可矣若谓皇考之名亦可施于今日则事恐不侔设使仁宗尚御天下濮王亦万福当是之时命陛下为皇子则必不谓濮王为父而为伯若先帝在则称伯没则称父臣计陛下必不为此行也以此言之濮皇当称皇伯又何疑矣今举朝之臣自非挟奸佞之心欲附会政府误惑陛下者皆知濮王称皇考为不可则众志所欲亦可知矣陛下何不试察羣臣之情羣臣非不知濮王于陛下为天性至亲若希旨迎合不顾礼义过有尊崇岂不于身有利而无患乎所以区区执此义者但不欲陛下失四海之心受万世之讥耳以此观之羣臣之忠佞邪正甚易见矣愿陛下上稽古典下顺众志以礼崇奉濮安懿王如珪等所议亦和天人之一事也二年十二月郊祀既毕侍御史知杂事吕海复申前议乞早正安濮王崇奉之礼寻进延和殿开陈恳切上谕海曰羣臣虑本宫兄弟众多将过有封爵故为此言海即辨其不然退又言臣切思仁宗于堂兄弟輩尚隆封爵况陛下濮宫之亲其谁敢间近日中宫与皇太后受策内外安庆必若恩及天伦乃为盛美虽甚愚者不应献此言者乞宣示姓名与众共罚不宜寬容以启谗慝海前后既七奏不从因乞免台职补外又四奏亦不从遂劾韩琦曰切以求治之本必广于聪明馭臣之威当严乎法制聪明不广则下情无以上通法制不严则大臣得以专政如干之德以刚而健坤之体以柔为顺反是则君臣之义失强弱之势分履霜之疑良有其渐自古强臣滋盛直以辨之不早故也臣不敢博引强臣之事輒以汉唐二臣之迹而明之如霍光于孝宣李德裕于武宗朝皆得谓之有功也然而专有柄权盗用威福终以威震人主而不

能保身庇族书云臣有作福作威害于而家凶于而国二人者是也且刑赏人主之操柄可一日倒持而授之于人乎今琦自恃勲劳日益专恣广布朋党堕紊法度朝廷进一官皆曰琦之亲旧黜一官皆曰琦之怨敌人言若是未必皆然盖持守不公气势浸盛众所指目不能逃也以至小人乘时迎望风旨趋走门下唯恐其后只知琦之恩讎而不知陛下之威福也如嘉佑中议立皇嗣虽先时臣僚上章恳请者众然亦先帝与皇太后属意日久保育宫中事已素定至是琦赞成之不为无功也暨践阼数月琦请下有司议濮王典礼比再下两制用汉宣光二帝故事欲称皇考切原诏旨本非陛下之意琦导谀之过也永昭陵上土尚未干遗音犹在乃心已革谓天可欺致两宫之嫌猜鼓天下之怨怒谤归于上人所不忍言者辩论半年不决琦犹遂非不为改正得谓之忠乎计当时赞成之意本徼福于今日明矣陛下视政之初当引勲旧佐佑明圣赞襄密勿琦殊无进贤之意惟求附己之人陈旭在先朝始以奸进终以此退黜力排众议复登大用如旭之輩不可胜数皆授美官布要路相与表里以成朋党报国之心孰知其所存也方天下多事之际台諫章疏朝奏夕罢壅塞言路意在专政蒙蔽宸聪下情不得而上通皇明何由而远烛使忠臣抱吞声之恨圣君有拒諫之名中外不平独清衷未悟耳况陛下即位以来进秩疏封赏功报德不为不至而琦略无谦损益肆刚愎半歲之内两次求罢无疾坚辞卧要宠命犹自谓孤忠之可立岂知直道之难行果知人臣进退之分天道盈虚之理不应形斯言于章奏也借如干兴中丁谓曹利用辅幼君母后曾无今日陛下报琦之厚犹以横恣不公相继败逐臣观琦之才之功未如霍光李德裕丁谓曹利用其骄君之色过之当琦引退之时莫不愿陛下遂其所请收还相印不意恩礼益加强之以事仰惟圣眷俯念前功爱有所忘久而不厌其如公议何臣所虑者朝廷居安之久是陛下大有为之时不宜持循当务更化琦之才用恐未足以究天下之安危方今士论沸腾人心愤鬱得不揽威福之在手戒履霜之积征罢琦柄任黜居外藩非止为国之福亦以保府族于始终也唯祈圣虑断之勿疑以臣言是望赐必行以臣言为非敢逃常宪区区之恳罄于是矣三年春正月吕诲前后十一奏乞依王珪等议定濮王追崇典礼不报乞免台职又不报是月即与侍御史范纯仁御史里行吕大防合奏曰豺狼当道擊逐宜先奸邪在朝弹劾敢后伏见参政欧阳修首开议妄别经据以枉道说人主以近利负先帝欲加濮王以不正之号陷陛下于过举之讥朝命骇闻天下失望政典之所不赦人臣之所共弃哀帝威之失既难施于圣朝念臣下之奸固难逃于公论当屡更议以安众意又极言韩琦公亮赵槩等苟且依违未尝辨正乞下修于理及正琦等之罪以谢中外戊辰又奏云今不正濮王之礼则无以慰众心不罪首恶之人则无以清朝政癸酉又奏乞将前后章疏付外施行庶分邪正以服天下海等论列不已中书亦以劄子自辨于上曰伏见朝廷议濮王典礼两制礼官请称皇伯中书之议以为事依至大理宜审重必合典故方可施行皇伯之称考于经史皆无所据方欲下三省百官博访羣议以求其当陛下屈意手诏中罢众议纷然至今不止臣以为众论虽多其说不过三其一宜称皇伯是无稽之臆说二曰简宗



庙致水灾是厚诬天人之言也三曰不当用汉宣哀为法以干乱统纪者是不原本末之论也臣请为陛下条列而辨之三事不备录愿陛下沛然下明诏播告中外以皇伯无稽决不可称而今所欲定者正名号耳至于立庙京师干乱统纪之事皆非朝廷本议庶几疑可释若此而犹必称皇伯则虽孔孟复生不能为之辨矣上意不能不向中书然未即下诏也执政乃相与密议欲令皇太后下手书尊濮安懿王为皇夫人为后皇帝称亲又令上下诏谦让不受尊号但称亲即园立庙以示非上意且以为异日推崇之渐丙子中书奏事垂拱殿韩琦以祠祭致斋上特遣中使赍实封文书至中书执政相视而笑海等闻之即奏臣等近日三次弹劾欧阳修首启邪议及韩琦曾公亮赵槩等依违附会未蒙付外施行因缴纳御史诰勅居家待罪乞早赐黜责上以御实封诰勅遣内侍陈守清趣海等令赴台供职海等以所言不用虽受告勅犹居家待罪丁丑中书奏事上又遣中使召韩琦同议即勅称准皇太后手书吾闻羣臣议请皇帝封濮王至今未见施行吾再阅前史乃知自有故事濮安懿王令皇帝称亲谯国襄国仙游并称后又降勅称上手诏朕面奉皇太后慈旨已降手书如前先是学士司马光上言臣闻政府之谋欲托以皇太后手书及不称考而称亲虽复巧饰百端要之负先帝之恩亏陛下之义违圣人之礼失四海之心政府之臣祇能自欺安能欺皇天上帝与天下之人乎及是诏下判大常寺吕公着上言称亲之说乞寝罢不报诏百官议追崇典礼诸王府侍讲孙固曰礼可变天性不可变王宜称亲议未集有诏罢议戊寅吕海等又奏若不归罪首议之人天下疑惑莫之能解御史范纯仁又奏乞追寝前议韩琦见纯仁奏谓同列曰琦与希文恩如兄弟视纯仁如子侄乃忍如此相攻乎是日合门两以诏谕海等赴台供职海等又奏今濮王典礼虽去殊号而首启邪议之臣未蒙显责中外犹以为惑己邪又奏今日事体与汉宣不同其园庙指挥特行追罢庚辰又奏臣等乞以臣此章下百官共议欧阳修首恶韩琦令高居简等眩惑母后之罪不然天下之疑不能释君父之义无以明辛巳又奏上令中书降札子趣使赴台供职而海等缴还札子并前后所奏九状申中书坚辞台职是日讳避濮安懿王名下一字置濮王园令一人以大使臣为之募兵二百人以奉园为额命王世宁张征等度濮王园广上皆从中书所请也吕公着言谨按礼文七庙之讳虽不及王天下乞降诏旨濮王名下一字唯上书奏事并听回改余公私文字不复讳避庶与祖宗七庙名讳小有差别在于天下臣子亦安敢犯者不从壬午诏罢尚书省筑议濮安懿王典礼中书进至吕海等所申奏次问执政当如何韩琦等曰臣等忠邪陛下所知欧阳修曰御史以为理莫并立若以臣等为有罪即当留御史若以臣等为无罪则取圣旨上犹豫久之乃令出御史既而曰不宜责之太重也海罢侍御史知杂事以工部员外郎知蕲州纯仁以侍御史通判安州大防落监察御史里行以太常博士知休宁县故事知杂御史觥官皆有诏词时知制诰韩维当直又兼领通进银台司门下封驳事执政恐维缴词头不肯草诏及封驳勅命遂径以勅送吕海等家仍以累不遵稟圣旨赴台供职为海等罪维言罢黜御史事闕政体而不使有司预闻纪纲之失无甚于此宜追还海等勅命由银台司

使臣得申议论以正官法司马光言乞留吕海范纯仁监察御史吕大防及吕公着亦言愿陛下以天地之量包荒含垢特追悔等勅命令归供职则天下幸甚三月辛酉传尧俞赵鼎赵瞻使契丹回以尝与吕海等言濮王事海罢而不敢就职尧俞乃知和州鼎通判汾州司马光奏臣与尧俞等七人同为諫官共论典礼今尧俞等六人尽已补外独臣一人尚留阙下天下之人皆谓臣始则倡率众人共为正论终则顾惜禄位苟免刑章臣虽至愚粗识名节受此指目何以为人伏望依臣前奏早赐降黜凡四奏卒不从御史彭思永上疏请正典礼召还言事官因自求罢不许辛未手诏曰朕近奉皇太后慈旨濮王令朕称亲仍有追崇之命朕推汉史宣帝本生父称曰亲又谥曰悼裁置奉邑皆应经义既有典故遂遵慈训而不敢当追崇之典朕又以上承仁考庙社之重义不得兼奉私亲故但即园立庙俾王子孙世袭濮王自主祭祀遽嫌有别盖欲为万世计岂皆权宜之举哉而台官吕海等始者专执合称皇伯追封大国之议朕以本生之亲改称皇伯歷考前世并无典据追封大国则又礼无加爵之道向日罢议之后而海等职奏不已忿其未行乃引汉室哀恭皇定陶之号立庙京师干乱正纪之事皆朝廷未常议及者歷加诬诋自比师丹意欲摇动人情眩惑众聽以至封还诏勅擅不赴台明缴留中之奏于中书録传训上之文于都下暨手诏之出海等以称亲立庙皆为不当朕覽海等前疏亦云生育之恩礼宜追厚矣祥禫既毕然后讲求典礼褒崇本亲今乃反以亲为非前后之言自相抵牾尧俞等不顾义理更相唱和既挠权而示众复归过以取名朕姑务含容屈于明宪止命各以本官补外尚虑缙绅之间士民之众不详本末但惑传闻欲释羣疑理当申谕宜令中书门下俾御史台出榜朝堂遍牒告示庶知朕意夏四月丙戌礼院言濮王建庙当行祭告其祝文令教授为之初命翰林冯京京言未有体式乞下礼院议礼院议称皇帝某谨遣官恭告于亲濮王既而以前诏俾王子孙奉祠事乃更定此议帝常以称亲之议质于天章阁待制兼侍讲王猎以为不可帝曰王相待素厚亦当尔耶对曰臣被王厚恩故不敢以非礼名号加于王所以为报也

太平治迹统类卷十一

●钦定四库全书

太平治迹统类卷十二

(宋) 彭百川 撰

神宗圣政

治平四年夏四月殿中丞唐淑问为监察御史里行上谕曰朕以家世用卿卿当谨家法人臣病外交阴附卿当自结主知比言者尚抉剔细故以为能浊乱人聪明无益也论事必务大体乃为称职淑问介子也先是诏同签书枢密院事陝西四路沿边宣抚使郭逵赴阙御史中丞王陶諫官邵亢等皆言逵出于微贱不可筦枢要上手批谕陶等曰先朝用逵虽士论纷纭然在位只逾数月今遽罢之是先帝有任人之失也朕于逵固非亲旧当为人子必不可彰父之过宁负暗于知人之责其初陶等屡言韩琦自嘉佑末

连执国柄君弱臣强乞行罢退是日陶遂极口诋琦意谓必能遂去既而上不许陶始失望己酉诏内外官所上封事委翰林学士承旨张方平学士司马光详定利害以闻先是御史台以状申中书中书不报中丞王陶因以状白宰相云天子新即位大臣不当隳废朝仪又不报陶遂劾奏韩琦及曾公亮不臣至引霍光梁冀専恣等事为喻斥韩琦骄主之色过于霍光且言欲保全琦族故劾奏之其畧曰琦等久居重任新辅嗣君忽千官瞻视之庭蔑如房闼难再拜表仪之礼重若丘山沮格台文傲忽风宪宜加明宪用肃具僚上命翰林学士司马光为御史中丞与王陶两易其职丁卯光入对上谕曰已除卿中丞光曰言职人所惮臣不敢辞但王陶言宰相不押班竟不赴而陶遽罢言职不押班细故也陶言之过然爱礼存羊固不可废自顷宰相权重今陶复以言宰相罢则中丞不可复为臣请俟宰相押班然后受诏上许之时光中丞诏已进入而陶学士之命中书独持之不下戊辰叅知政事吴奎赵槩面对坚请绌陶于外上不许请密授枢密直学士领羣牧使许之既而上直批付中书以陶为翰林学士时宰相未入奎即具奏曰陶天资险薄惟势利是持巧诈翻覆情态万状索其素蘊真市井小人之不若也陛下念其东宫之旧首加任使擢为中丞陶乃挟持旧恩専为险恶轻肆狷薄織罗交捽摧辱大臣排抑端良至如韩琦曾公亮不押班事蓋已久歴来相承浸成废礼非是弛于二臣陶以台制弹劾举动便可何至引背负芒刺自为跋扈肆意深诋以此见陶处心积虑在于排陷大臣窃弄国权者也己巳奎称疾乞罢政事陶劾奎附宰相欺天子六罪侍御史吴绅奏御史中丞因言事求罢居家待罪朝廷降旨不允乞留陶依旧供职并上疏劾奎有无君之心数其五罪上由是遂知奎意司马光入奏上亦以奎疏示光光请止还陶旧职上许之即又欲与陶侍读学士光退翌日复奏上不怿光中丞诏时在阁门上复收入后三日乃付中书先是上封陶疏以示琦琦奏曰臣非跋扈者陛下遣一小黄门至则可缚臣以去矣上为之动问知制诰知谏院滕甫甫曰宰相不押班诚有罪若以为跋扈则为欺天陷人矣王陶为人隼利眉目疎秀美书翰性怵急色厉而内荏初事韩琦甚谨故琦深器之骤加擢用阴知上不悦执政之専既为中丞谋易置大臣虚次相以自拟初建东宫英宗命以蔡杭为詹事琦固荐陶文彦博私谓琦盍止用杭琦遂并用二人及琦为陶所攻彦博谓琦曰颇记为詹事时否琦大愧曰见事之晚真宜受挞癸酉司马光始受御史中丞诰奏疏曰臣蒙陛下援于众臣之中委以风宪天下细故之事皆未足为陛下言之敢先以人君修心治国之要为言诚太平之原本也臣闻修心之要有一曰仁二曰明三曰武治国之要有一曰官人二曰信赏三曰必罚昔仁宗时臣初为谏官上殿首曾敷奏此语先皇帝时臣曾奏歴年图又以此语载之后序今幸遇陛下臣复以此语为先者臣诚以平生力学所得至精至要尽在于是愿陛下勿以为迂阔试加省察 五月乙酉新河北体量安抚使陈荐言皇佑初河北荐饥朝廷辍汴纲米七十余万石漕黄河以济一方之民欲乞依例辍米三十万石转漕至澶卫州通利军北京賑济从之戊子龙图阁直学士韩维知颍州初王陶罢御史中丞为翰林学士维言宰相跋扈法所当治也御史中丞言是



则宰相安得无罪若其非中丞安得止罢台职而已今为翰林学士是迁也陛下既不能  
辨明大臣使负恶名有不自安之意又使言者无名罢去疑惑远方愿廷对羣臣使是非  
两判及吴奎御批罢参知政事迁一官知青州维以为奎素有学问敦笃持重可任以事  
擢参大政众谓得人今纔数月止因论事之际少失宛顺便加斥逐进退大臣不当如此  
与王陶罢中丞而加翰林学士何以异陶既出维亦表求外补上从之未行改汝州司马  
光言韩维沈靖方雅亦陛下畴昔宫僚之中最有美誉今者无故称病求出外人皆不知  
其故伏望圣慈更赐详度或且留之左右使拾遗补阙诚有所裨益丙申诏诸路监司河  
北河东陕西安抚转运使提点刑狱体量管内三班使臣至殿侍散直就粮将校有胆勇  
谋畧或武艺精絶谙练边事可随才任使者以名闻诏许举中行员外郎为侍御史里行  
从司马光之言也甲辰屯田员外郎张唐英为殿中侍御史里行唐英双流人从翰林王  
珪范镇之荐也英宗初立唐英上谨始书言为人后者为之子恐他日有引定陶故事眩  
惑圣德者愿杜其渐既而台谏官相次斥逐珪镇谓唐英有先见之明故荐之王陶赴谏  
州上表谢到任数千言皆诋毁执政执政怒将请其罪司马光言今若以表诋毁大臣重  
加降责兴衰之机于此乎在是宜察也陶遂得免召公着恐上复召之奏疏云臣恐奸邪  
小人因奏对之际希合上意蔽陶之罪谓其忠直望陛下割一人之私恩采天下公议登  
用中立之士杜絶阿党之原毋为偏见私说所惑则天下幸甚己未遣官于四门赈济司  
司马光言如此处置有损无益莫若择监司使察灾伤州县守宰不胜任者易之监察御史  
里行唐淑问亦以为言乃诏四门给米六月止又令约束州县倍加存恤右司谏刘庠言  
近手诏减天下贡献出宫女数百人省后苑作工匠应乘章服凡所更改乞付史馆不从  
龙图阁直学士户部郎中赵抃知谏院兼提举万寿观既见上谓曰卿匹马入川以一鹤  
一琴自随为政简易如是耶人言尝独处室中有一龟效其服气故也前此自蜀远者多  
歷省府官大臣以为言上曰用抃为谏官赖其言耳倘欲大用何必两府乎抃献疏言任  
道德委辅弼别邪正去侈心信号令平赏罚谨机密备不虞勿数赦容诤谏十事又言吕  
诲傅尧俞范纯仁吕大防赵鼎马默皆骨鯁敢言久遣不复无以慰缙绅之望复论五费  
谓宫掖宗庙宫监丘垄土木之费多见纳用赐知潭州司少卿王罕獎谕勅书仍赐绢三  
百疋以监司言考课二年入优等故也己巳京师地震上谓辅臣曰是震何祥也吴奎曰  
但为小人党盛耳上不怿是月判河阳富乃上疏曰陛下自始临御好博采兼聽务广聪  
明此古圣王之所尚而君道之至美也四方鼓舞歌颂以谓臣下情伪时政得失必不能  
逃圣鑒而太平可立致也然其间君子常寡小人常众人君采聽之际故得人常少不得  
人常多得人少故好事常不足不得人多故恶事常有余臣以谓帝王都无职事惟别君  
子小人乃帝王之职事然千官百职岂尽烦帝王辨之乎但用求任天下之事所谓大臣  
者不越十数人不使一小人参用于其间则千官百职委诸大臣参而选之因而下及州  
县之吏莫不得人矣顾虽欲乱不可得也九月己丑韩琦数因入对恳求罢相上察琦不  
可复留赐手札曰朕以大臣进退国家所重矧卿勲力光于三朝朕之眷怀未有涯也令

许卿暂临藩服朕将虚上宰之位以待卿还琦亟奏宰辅之任朝有定制老臣无状不当虚位待之愿亟进良弼以光新政辛丑琦守司徒兼侍中判相州吕公弼为枢密使张方平为参知政事方平在翰林上所草诏上手札褒之曰卿文章典雅焕然有三代之意而又善以多为少意博词寡虽书之训诂无以加也赵抃为右谏议参知政事抃尝密奏臣僚有被谤于外始疑而中释者有诡说于前初惑而卒明者愿陛下察其言观其行敢有挟情论奏怀奸罔上屏之远方手诏曰卿政事之余能时以经义启沃苟非博达治理诚节内固何以臻此指意沉远罔究所谓药非瞑眩厥疾不瘳宜不惮烦悉陈醜缕抃复具奏上嘉纳之司马光召对言张方平奸邪上作色曰朝廷每有除拜众言辄纷纭非朝廷好事光曰此乃朝廷好事也知人帝尧难之况陛下初即位万一用一奸邪若台谏循默不言陛下从何知之此乃非好事也上曰吴奎附宰相否光曰不知也上曰奎有罪否光曰吴奎言王陶过实安得无罪但士论与奎而不与陶上曰结宰相与结人主孰贤光曰结宰相为奸邪然希意迎合观人主趋向而顺之者亦奸邪也上曰两府孰可留孰可用光曰此乃陛下威权所当采择小臣岂敢与闻然居易以俟命者君子也由径求进者小人也陛下用人当用君子不当用小人也癸卯权御史中丞司马光为翰林学士兼侍读学士滕甫为右谏议大夫权御史中丞司马光论张方平命司马光进读通鉴并见圣学门司马光又奏臣愚暗不达圣旨又恐累公着上言公着方正朕使之掌银台固虑诏令有失欲其封驳耳奈何奏之公着亦具奏臣近为降司马光等诰勅以为不便遂具封驳窃知己直降付阁门朝廷既以臣言不当当显行绌责其所降勅告亦须经由本司盖臣虽有罪而此职终不废若因臣一言不当遂令今后封驳之司不能举正职事则是祖宗法度由臣而坏上手批公着奏可以两日求对当谕朕意以释卿憾他日登对上独留公着谓曰朕以司马光道德学问欲在帝左右非以其言事也又尝谓公着曰光方直如迂阔何公着曰孔子上圣子路犹谓之迂孟轲大贤时君亦谓之迂况光岂免此名大抵虑事深遠则近于迂矣愿陛下更察之中书密院议边事多不合赵明与西人战中书赏功而密院降约束郭逵修堡栅密院方诘之而中书已下褒诏甫言战守大事安危所寄今中书欲战密院欲守何以令天下愿勅大臣凡战守大事须是除帅议同而后下上深然其言冬十一月丁丑上谓文彦博等曰诸路帅臣转运使职任至重一道惨舒繫焉所宜审择其人久于其任汉宣循名责实须用此道彦博等曰为治之要无以易此上曰卿等欲成此事非难要在勿事空言而已丙戌诏自今二府举官宜各言其人才业所长堪任何事以副朕为官择人之意奏上令中书取旨量才试任曾公亮文彦博赵槩亦依此举官丁亥诏曰考课之法所以练羣臣而核名实也今诸路监司典羣守之政既以科别其条具为令矣至于县令之职与民尤近而未尝立法恐非所以爱养元元之道宜令天下州军各上所辖县令治状优劣科条约令考课院详定以闻乙未诏曰方今中外羣才辐凑并进不为不多尚虑藏器抱道之士沉于下僚郁而未伸宜令内外官各举所知上人见任两府三人或耻于自媒久淹下位或偶因微累遂及同行者咸以名闻上曰朕观三

代以至于唐未有百年之间无患难者国家承祖宗之业升平如此朕嗣守大器日夜恐惧以思为治之道无如择人

熙宁元年春正月甲戌朔日有食之诏改元丙申龙图阁直学士给事中权三司使唐介参知政事庚午上谓文彦博曰天下弊事至多不可不革彦博曰譬如琴瑟不调必改而更张之韩绛曰为政立事当有大小先后之序三月乙未诏河北转运司预计置拯济饥民夏四月壬寅富弼入见且免拜坐语从容上曰冀闻以治道弼以上锐于有为对曰人君好恶不可令人窥测则奸人得以附会其意陛下当如天之鉴人随其善恶若自取然后以诛赏从之则功罪得其实矣上称善又问北边事条目甚悉弼曰陛下临御以来当先布德泽且二十年未可言用兵亦不宜重赏边功恐致生事干戈一起所系祸福不细愿陛下勿先留意于此上默然良久又问所先弼曰阜安宇内为先上善之癸亥孙觉为右正言赴谏院供职上与觉言欲革积弊觉对弊不可革革而当其悔乃亡他日上语左右曰孙觉颇知理觉高邮人也秋七月壬戌诏以十一月十八日有事于南郊己卯羣臣上尊号司马光言非先王令典诏赐光曰朕方以地震淫雨日虞倾祸被此洪名有惭和惠诚如卿言终不许八月壬寅京师地又震太子中允直集贤院同知谏院孙觉通判越州觉既降官累章求出不许觉以为去岁有罚金御史今兹有贬秩谏官御史怀奸挟邪或论事越职或喑嘿不胜任皆朝廷所宜放黜然未有罚金贬秩犹居位者也邵亢亦累章求出不许觉遂移牒阁门御史台及所领诸局云论邵亢滕甫奸邪方侍罪更不入朝及厘务阁门以闻上批出曰觉牒与所言事不同宜与外任差遣便邵亢复入视事如故京师地又震乙巳诏鄜延路转运使计余米三年军储外寨湏及一年以上具数以闻辛亥迺英进讲上因论治道言州县长吏多不得人政府不能精择司马光曰人不易知天下三百余州责其精择诚难但能择诸路监司使择所部知州知州择所部知县得人多矣今之监司古方伯州牧之任系一路休戚当审择贤才上又问谏官欲得人谁可者对曰臣仓猝不得记容臣退而密奏寻具奏曰凡择言事官当以三事为先一不爱富贵次则重惜名器次则晓知治体具此三者诚亦难才臣愚何足以识别贤能窃谓已试之人差为可信伏见铁盐副使吕海累居言职不畏强御再经谪降执节不回侍御史吕景外貌和厚内守坚正见得知耻临义不疑于臣所知中此两人似堪其选丙午上问富民之术司马光言凡富民之本在得人县令最为亲民欲知县令能否莫若转运使陛下但能择转运使转运使按知州知州按县令何忧民不富也乙卯诏出奉宸库珠二千三百四十万付河北四路榷场鬻之别封桩以备买马十一月甲午司马光入辞因请河阳晋绛上曰汲黯在朝淮南寝谋卿未可出也先是屯田郎中陈习坐因转对指人过恶以逞私怨责监新孙镇酒税知谏院吴充对上问贬习事充言陛下既降诏书令百官转对其畧本斥有位之阿私糾在庭之过失张寿荣裡霍交等即是有位而习次当转对是应诏指陈非越职言事以此罪之恐示天下以诏书不信御史孙昌龄龙图直学士韩绛与翰林学士王安石亦皆以为言安石所言尤切曰人主之聽天下不可偏偏则有弊偏于



恶言人罪则其弊至于奸不上闻真宗但恶人潜行交欢阴有中伤故诏言事者不得留中此是大失也然其后之弊乃至大臣奸邪佞巧而真宗终不得闻上乃批陈习今已经思可特召还与依旧差遣安石札子乃朝廷所共见竟敢斥真宗终不得闻大臣之奸邪佞巧其言岂尤切哉即此已见安石谓祖宗不足法之兆端矣十二月乙丑以琦判大名府先是上遣内侍刘有方赍手诏赐琦曰地震河朔涉秋冬未止朕甚惕然常虚上宰之位竚卿之还大名为天下喉襟欲除卿苟勉而祇命则朝廷岂有北顾之忧哉琦奏曰君之使臣当即降命而先驰使指委曲为谕此乃陛下仁恤老臣过示优礼然承此大异之后正在朝廷加意凡有措置须假应副于是复降手诏听便宜从事苟朝廷有可应副朕当力为主张二年春正月知同州赵尚宽知唐州高赋知齐州王广渊奏置义仓事上批近诏齐唐等郡讲求修复社仓且图经久之法知陈留县苏洵亦言臣所领邑最为近畿以为天下郡县倡率劝谕百姓置义仓以备水旱条上措置事户第一等出粟二石第二等一石第三等五斗第四等二斗五升第五等一斗麦如之村有社有仓仓置守者耆为输纳县为籍记岁丰则量其数以出停藏久则为借贷之法使新旧相登多寡不一则又为通融之法使之相辅上曰陈留辅邑耳目不遠可且聽其施行徐访利害洵又言义仓事并论臣僚所言未便者十二可行者五诏除一事每值荒饥借贷与被灾户种粮未便除放仍责以二三年限还纳可中书更详度外余并依所奏施行又诏曾公亮曰近王广渊于齐州创置义仓已劝率十余万石若渐可就令广渊罢去当得人继守其事可特诏广渊举知州一人二月司马光登对乞一州上不许曰君子小人皆知卿方正吕公着使契丹亦问公着有司马光者其人甚方今为何官名为敌国所知奈何出外光曰此虚名未足信也固求外补不许光初罢御史中丞契丹问公着以光何不为中丞公着归告上故上乃知三月壬辰分遣辅臣祷雨于郊庙社稷上忧旱甚言当避正殿又恐妨同天节宴未便富弼曰此但系陛下至诚亦不须避殿上曰避殿止亦是文饰弼曰阴阳不和皆臣等變理无状所致然臣等微眇不足以动天陛下以至诚应天则天必应也上又问措置宗室事弼曰此事出于陛下外人谋之则为疎间亲公亮曰此亦当自外裁定弼曰为之当以渐恐致纷纭安石曰此事但欲于恩义间无伤使彼可安而已上又问裁定亲疎之宜亮以为当从上身亲疎上曰当以祖宗为限断安石曰以陛下身即是以祖宗为限断也四月同天节罢上寿是日雨富弼言陛下避殿减膳彻乐此三大事诚合典礼诞日特罢称觴最为深切所以遽动天地当日得雨幽灵大効如在目前伏愿陛下无以今日雨泽为喜当以长年灾变为惧盖修德致雨其应如此万一于德有损其灾应岂有缓耶上亲书答曰义忠言亲理正文直苟非意在爱君志存王室何以臻此敢不置之枕席铭诸肺腑终老是戒更愿公不替今日之志则天灾不难弭太平可立俟也癸丑先是同知谏院范纯仁言今两府之下则有侍从官实九卿之职也是宜朝夕论思同国休戚今则只将主判司存便使为己之职事宠亚四辅报周庶僚愿降诏督责朝廷阙失并须论列其所上章疏付政府铨定量行赏罚上与执政议之王安石亦以为当然丙辰诏曰今

在此位者视朕过失与朝廷政事之阙默而不言乃或私议窃叹若以其责不在己宜令侍从官自今视朕过失与朝廷政事之阙无有巨细各具章极言无隐噫言善而不用朕有厥咎遗之而勿言尔为不恭将用此考察在位所以事君之实而明黜陟之典王安石之词也五月丙子吕诲言罢十阁之制七月癸未上谓执政曰天下久安庶事废弛况灾变不细正当孜孜营致几微之际所宜图虑若事急难则无及也唐明皇处安之时治兵甚严骊山讲武极有法也文彦博曰明皇晚年失策分兵二统遂至生变韩绛曰以明皇英睿求治若非末年荒惑忽于政事岂至此耶上曰人君岂可怠于政理朕非乐于劳苦益思少时精神可惜欲乘时有为以安生灵至于兵乃是圣人之大权所以安天下也但不轻用非独杀人心所不忍诚恐天道不佑己丑上尝以西夏累世桀傲背惠寇边朝廷每遇罢兵处置无法以致侮慢乃诏文彦博等各言边防久远备至之策乃降手诏付陕西河东帅臣条上便宜至是来合羣策凡十六门奉旨裁处又增十事仍令择使持所著事宜与逐路帅臣再议论审核可否拟定取旨上御资政殿召彦博等赐茶毕上曰便坐欲从容论事也上因语及选任知州未得善否曰朕每思祖宗百战得天下今以一州生灵付一庸人尝痛心疾首卿等为何如则可彦博奏以责在监司宜得至公之人委任按察公弼曰朝廷当择诸路长官八路监司无不济矣韩琦等上表进新修英宗实录三十卷目三卷八月丙午司马光上疏曰陛下已出视朝继以经筵将及日中乃还禁中入宫之后切闻亦不自安河阅天下奏事羣臣章疏迨至昏夜又御灯火研味经史博览羣书虽中宗高宗之不敢荒宁文王之日昃不食臣以为不能及也然孜孜求治于今三年而功业未著者殆未得其体要故也冬十月丙申门下侍郎平章事富弼罢为武宁军节度使判亳州弼前后五章乞还政柄又数面恳上深惜其去以弼欲以西京养疾乃命判河南既入谢又辞河南乞亳州许之令学士院贴麻改正于是诏下六日矣弼初入相即除司空兼侍中弼固辞得免及罢不复加异恩盖上意不乐其去故也弼将去复言于上曰比见亲旧乃知人情大不安进用多小人诸处地动灾变宜稍安静上既许富弼辞位问弼曰卿即去谁当代卿者弼荐文彦博上默然良久曰王安石何如弼默然上曰人材岂不自知朕自度不能遽畧不过能保祖宗旧业而已安石曰陛下不宜过自推托以陛下圣质如此何所不可企及是日上问节财如何王安石对以减兵最亟上曰比庆厯数已甚减矣惟别有措乃可耳安石曰精训练募兵而鼓舞三路百姓习兵可省己亥翰林学士司马光对延和殿上问近相陈升之外议云何光对曰今已降麻诞告中外臣虽言何益上曰试言之光曰闽人狡险楚人轻易今二相皆闽人二参政皆楚人必将援引乡党之士充塞朝廷天下风俗何以得更淳厚上曰升之有才智晓民政边事他人莫及光曰升之才智诚如圣旨但恐不能临大节而不可夺尔昔汉高祖论相以为王陵少戇陈平可以辅之平智有余然难独任真宗用丁谓王钦若亦以马知节参之凡才智之人必得忠直之人从旁置之此明主用人之法也光曰富弼老成有人望其去可惜上曰朕之所以留之至矣彼坚欲去光曰彼所以欲去者盖以所言不用与同列不合也上曰王安

石何如光曰人言安石奸邪则毁太过但不晓事又执拗耳上曰韩琦敢当事贤于富弼但未强耳光曰琦实有忠于国家之心但好遂非此其所短也上因历问羣臣至于吕惠卿光曰惠卿险巧非佳士使王安石负谤于中外者皆惠卿所为也近日不次进用但不合众心上曰惠卿应对明敏亦似美才光曰江充李训若无才何以动人主因论台諫天子耳目当自择其人上曰諫官难得卿更为择其人光退而举学士陈荐史馆苏轼集贤校理赵彦若职方员外郎王元规甲辰内批宋守约可本官签书枢密院事时守约以威武军留后为步军都指挥使王安石见之谓曾公亮曰此岂可奉诏公亮默然又顾陈升之曰此于理何如物议果允否升之曰亦恐不允安石曰亦须为上论此后两日遂罢守约签书之命守约管军凡十余年専以严明所居肃然无人声蝉上庭木亦击去之人或讥其过监察御史里行张戢程颢言每有本职公事欲上殿敷奏必先候朝旨既许上殿伺候班次动经旬日倘遇朝政或阙及外事有關於几速不容后时者耳目之司虽不应急陈闻不可得也伏覩天禧诏书或诏令不允官曾涉私措置失宜刑赏渝制诛求无节冤滥未伸并委諫官奏论宪臣弹举是盖台諫之职言责既均则进见之期理无殊别何独宪臣隔絶殊异欲乞朝廷使依諫官例牒阁门即许登对诏三院御史及里行有公事并许直申阁上殿御史中丞吕公着言昨令两制议择牧守台省官及取士养人之法其余所以为治之具盖欲一一修具此皆国家之先务而不可一日缓也当时人立异论皆以为不可变易而特以因循为便陛下圣资超迈洞然遠照以浮议为非意者必将有为也而自尔以来所施行者惟财用一二事而已如向之所议可以出治道化风俗者从未闻择其可者而行之惟陛下推笃好力行之意奉之以终使三王之治遂复见于今日司马光读通鉴至萧曹事【见圣学门】十一月庚午迺英讲毕上留司马光问以变更宗室法光对曰此诚当变更但宜以渐不可异耳甲戌诏中书枢密院言今所降裁减宗族新制内合具条件者令所司议定闻奏于是乃依中书所奏诏曰自我祖宗惇叙邦族大则疏封于爵土次则通籍于闈台并留京师参奉朝请然而世绪寢遠皇枝益繁属有亲疎则恩有隆杀才有贤否则禄有重轻今而一贯穿于周行是亦受分于流品虽敦睦之道诚广而德施之义未周故廷臣数言宰司继请谓宜定限以等彝朕惟亲戚之间经史有训汉唐之世典故具存或以九族办尊卑或以九宗纪遠迩或听推恩而分子弟或许自试而効才能或宗子之贤得从科举或诸王之女自主婚姻尽前日之所行顾当今之未备况我朝制作动法先王岂宗室等差乃无定着因俾羣公之合议将为一代之通规载览奏封具陈条目以谓宗祖昭穆是宜世世之封王公子孙抑有亲疎之杀若乃服属之既竭暨于才艺之并优在随器以甄杨使当官而勉懋至于任子之令通婚之仪凡百有司之常一用外官之法金言既久朕意何疑告于将来用颁明命宜依中书所奏施行吕夷简在仁宗时改宗室补还独官骤增廩给其后废大而不可止至韩琦为相尝议更之而不果及上即位遂欲改法于是王安石为上具道措置之方上曰善闰十一月壬寅张载为崇文院校书先是吕公着荐载召对问以治道载曰为政不以三代为法者终苟



道也上谓载才胜邢恕王安石亦以为然遂命之十二月中旨下开封府减价买浙灯四千余枝权推官苏轼言陛下游心经术动法尧舜穷天下之嗜欲不足以易其乐尽天下之玩好不足以解其忧而岂以灯为悦哉此不过奉三宫之权耳且卖灯皆细民安可贱酬其直愿亟罢之将来放灯与凡游观之类务从俭约顷者裁减皇族恩例此实陛下至明至断深计远虑割爱为民然其间不能无少望于陛下惟当稍自刻损以身先之上纳其言因奏书献三言曰愿陛下结人心厚风俗存纲纪书凡七十余言轼素不为安石所喜使权开封府推官欲以多事困之轼决断精敏声闻益远论事益不休三年五月同修起居注陈襄兼直舍人院兼天章阁侍讲先是上患无知制诰执政以祖宗故事有直舍人院欲令襄为之王安石曰如此除人则不可轻与人资序而官易得人故襄有是命襄辞直院及侍讲手诏谕襄曰近除卿知制诰以言事未遂恳不受命且求外补朕素慕卿经术行己深惜遽去特还旧职庶几左右经术渐摩道义以释所愿闻襄终辞许之先是丙戌赦书令诸路搜访士有行义者以名闻癸丑前陝县令范育为崇文院校书育祥子尝得召对进复田役书上以转对章疏三十付育看详育条奏称旨故也八月上批近令司农寺專主天下常平广惠仓农田水利差役事看详编修中书条例所言看许合归有司二十二事先是上怪中书事多稽滞王安石言臣屡奏中书事多宜裁省归有司欲谕修条例官先具合减省多名件逐旋进呈上许之九月泾原路安抚司言本路熟户蕃部阙食乞降度僧牒百上批赐五百道付陝西宣抚司易见钱余穀賑接之四年春正月诏鬻天下广惠仓田为三路及京东青苗本钱诏从之即以广惠常平寺仓所贮粟麦给之戊申诏宣徽南院使郭逵归院供职馆阁校勘顾临为太子中允荆湖南路转运判官提举常平等事临谈兵尝召对问以兵学临曰兵以仁义为本仁者爱人义者循理动静之机安危所系也因条上十事及使湖南议论与执政违戾因乞解官侍养诏归馆阁供职踰年乃起二月编修条例所言舍人院除官皆有定格除官之人无日不有而外制臣僚皆兼领他事乞自今内外凡除授责降并撰定检用从之三月上召二府对资政殿出陝西运司奏庆州军乱示之上深以用兵为忧文彦博曰朝廷施为务合人心以静重为先陛下即位以来厉精求治而人情未安盖更张之过也祖宗以来法制未必皆不可行但有废坠不举之处耳庚寅诏诸路置学宫州给田十顷为学粮乙未上论庆厯中财用困乏而事不振王安石曰财用足然后可以用兵然财用特用兵一事方今之事且搜举人才理财用务富安百姓则四夷不足论上论财用屈竭以为皆緣置官多王安石曰以臣所见似不由官多上曰置禁军五十余万皆以当直迎送官人占使吕公弼言先朝待制止破两人剩员安石曰当患待制非其人不能胜陛下任使壞朝廷事不患制当直人多夏四月诏罢陝西见行交子法五月乙丑司农寺言河北提点刑狱王广廉请广惠仓钱斛并入常平从之秋九月癸卯中书言天下选人俸既薄而又多寡不一恐不足以劝廉吏三司勘会开画当增俸以闻从之先是选人廩给不足至请钱七千麦两石而已贫不足自养则徃徃陷于苟贱不廉之地上闻之故更此法其后三班使臣卒不及增癸卯

侍御史知杂事邓綰上言欲乞赐锡庆院以为太学仍修五城庙古学诏将作监丞宋靖国权发遣户部判官吕嘉问相度以闻十一月壬午朔诏应朝廷擢用才能赏功罚罪事可惩劝者中书枢密院冬專令检正检详官一员月以事状进奏院编下诸路甲申诏蠲天下见欠贷粮共计米一百六十六万八千五百石有奇钱十一万七千四百缗有奇上以诸路民欠贷粮积日已久岁催索无已时故尽蠲之百姓闻诏莫不称庆己酉司农寺言诸路卖户絕田产钱乞从本司移助常平余本从之五年三月上谓王安石曰楚建中言昨陝西用兵凡费钱七百余万有是否安石曰臣亦疑之然建中稽考沈起簿书数果如是钱银紬绢共千二百万贯足一路半年有奇所费已如是之多何由供忆因为上言西事稍弭边计正当措置天下困弊唯兵为患若措置得宜即中国可以富强余皆不足议也己亥诏勲臣后虽有致仕官依无人食禄推恩先是明堂赦文曾任两府及节度使之家凡有一德而后嗣无人食禄者其子孙量才録用既而有司以致仕为食禄故有是诏五月癸未诏凡中书审官东西三班院吏部流内铨南曹开封府吏掾其受财者以赃法论六月丙寅诏西作坊铸京师诸门铜符契三十四上以京城门禁不严素无符契命枢密院约旧史更造铜契中刻鱼形以门名识之分左右给纳以戒不虞而启闭之法密于旧矣乙亥枢密院言仁宗时尝建武学既而中辍庆厯三年五月丁亥置武学八月戊午罢之乞复之诏于武成王庙置武学选文武官知兵者为教授闰七月丙辰知颍州翰林学士吕公着判太常寺先是侍御史刘孝孙劾公着在颍州多饮宴子弟以公库器皿于豪民家质钱由是部吏无所畏惮诏转运副使陈知检按覆皆不实上谓王安石曰致知公着必无是事今果然安石曰公着实病郡或不治置与依新法置通判公着安肯聽安石曰公着但寬弛而非强愎也上不欲令公着治郡安石曰令入京主判闲局亦无害改以太常寺处之御史张商英言判刑部王庭筠立法应蝗蝻为害须捕尽乃得奏今大名府祈保郭莫州顺安保定军所奏凡四十九状而三十九状除捕未尽进奏院以应法不敢通奏且蝗蝻几遍河朔而邸吏拘文封进奏牒姑俟其扑除尽净方许闻则陛下欲上答天戒而下恤民隱亦晚矣惟陛下裁省御批令进奏院遍指挥诸路后应有灾伤并仰所在实时闻奏以称朝廷寅畏天威遇灾恐惧之意乙丑遣起居舍人枢密都承旨曾孝寬赵子几往河东路察访义勇利害及体量官吏措置常平寺不如法八月赐太学生叶适进士及第为试校书郎衢州推官郟州学教授适处州人管勾国子监张墟言适累试优等也是月诏司农以方田均税条约并式颁之天下九月辛丑同知諫院张墟言朝廷自推行新法以来迨今数岁州县之吏多不能悉公惟藉监司督责近者监司所至方稍知利害又已移领他路乞自今诸路监司并令久任显有劳効就加爵秩上因曰今官吏数易何以成治汉宣帝责任有劳者增秩赐金正得其要诸任监司但委任责成如其不才即与废退则自当奋厉十二月诏差官检视陝西武备从知华州吕大防请也大防因山崩陈私忧者三过计者一以为三路京东人情剽悍最宜先虑沿边则有城池兵械可恃之具而内郡武备素堕将帅多未选拣乞精拣三路京东守臣庶使奸猾将乱之人

无所窥伺万一有虞则吾亦有以待之诏诸路学官并委中书选京朝官选人或举充又诏诸路择举人最多州军依五路法各置教授一员委国子监询考通经史及新及第出身进士可为诸路学官即其所著词艺以闻乙亥诏诸路察访官河东两浙路许奏举选人充京官职官县令十二人余路十人升陟不限员数戊申诏创水碓碾碓有妨灌溉民田者以违制论不以去官赦原减官司容纵亦如之六年六月中书以劝课农桑之法奏御上曰农桑衣食之本宜以劝民然民不敢自力者为州县约此以为费升其户等耳目有条约可申明之己亥置军器监总内外军器之政其所统摄并依将作仍以吕惠卿曾孝宽为判监军器旧领于三司胄案至是始按唐令置监而始废胄案焉先是上语辅臣河北兵械皆不可用王安石曰兵械非可一朝一夕且须预具上乃议置监设官提举翌日遂有是命八月己亥枢密使王充言朝廷广开言路微至于庶人皂隶苟有可言皆得上闻此至公之议也而比日士大夫辄以书啓或家信投有位其间排诋营劾增饰事情嫌爱在心言无忌惮虽朝廷必加审核至蒙原察则被诬之人亦已困辱含沙射人来缢还妇懷阴害以中良善托公议以售私恩此风浸成实玷圣政乞有司申严法禁庶惩薄俗诏中书枢密院自今并遵守条制九月戊申淮南东路转运司言今扬州民逐熟于泗州见须振救及两浙提点刑狱司言润州旱甚乞发仓廩或量给僧度牒及紫衣师号敕募人入粟以备赈济诏各拨常平司粮三万石募饥民兴修农田水利丙辰引进使眉州防御使李端愿言朔望御文德殿祁寒盛暑数烦清蹕紫宸之朝岁中罕御欲乞朔日御文德望日御紫宸所贵正衙内殿之朝仪并举从之十一月冬至奉安中太一神像诏天下系囚死罪以下并释之应诸路灾伤民户本名税物失计致违省限不该减放者监司体量减放先是上以久旱欲因冬至发德音顺承太一之赐手诏令辅臣相度王安石等请如诏旨拟合施行事目进呈上于禁中增入减放一节盖其察政事恤民如此乙丑上怪陝西兵少财用不足又以为转运使非其人曰使此辈理财举事未得安石曰恐未可归咎监司盖既用兵即所费必如此至于些小失计亦或有之未必便能致财用阙乏也七年二月上因择帅之难叹曰薄言采芑于彼新田宣王能新养育人未遂可征伐獯豷而蛮荆来威今朝廷可谓所用非所养所养非所用卿等宜为朕养育人材以当缓急之上又叹要一奉使如富弼之辨者亦不可得安石曰恐不至如此乃陛下察人才未尽七年三月癸亥上批闻都下米价踊贵可令司农寺发寄仓常平米不计元余价比在市见价之直量减钱出粟斗钱百五十已诏司农寺以常平三十二万斛三司米百九十万斛其价直斗百钱至人减十钱益置官场出粟民甚便之乙丑诏曰朕涉道日浅晦于致治事失厥中上干阴阳之和乃冬迄今早暵为虐间诏有司损常膳避正殿冀以塞责消变歷月滋久未蒙体应中夜以兴震悸靡宁意者朕之听纳不得于理欤狱讼非其情欤赋敛失其节欤忠谋谗言郁于上闻而阿谀壅蔽以成其私者众欤何嘉气之久不効也应中外文武臣僚并许实封言朝政阙失翰林学士承旨韩维之词也先是维对延和殿上曰久不雨朕夙夜焦劳奈何维曰陛下忧闵旱灾损膳避殿此乃举行故事恐不足以



应天变愿陛下痛自责已下诏广求直言以开壅塞上感悟即命维草诏诏出人悦四月己巳上以久旱忧见容色每辅臣进见未尝不嗟叹恳恻欲尽罢保甲方田等事王安石曰水旱为灾尧汤所不免陛下即位以来累年丰稔今旱暵虽远但当益修人事以应天灾不足貽圣虑耳壬申上批应灾伤路分方田保甲除已编排方量及造五等簿处可速指挥并权罢是日雨上论及免役利害且曰今日之法但当使万姓出钱轻如往日便是良法至如减定公使钱人尤以为言者此实除去衙前陪费深弊冯京曰朝廷立法本意出于爱民然措置间或有未善陛下但当广开言路凡天下之议便者行之有不便者不吝改作则天下受赐矣五月戊戌朔天章阁待制李师中言臣闻应天以实者见于行事动民以行者不以空言天生愚臣盖为圣世伏望陛下诏方正有道之士召诣公交车对策如司马光苏辙辈复置左右以辅圣德有臣如此陛下其舍诸吕惠卿因捕其语遂贬和州安置诏熙河岁计用钱令凤秦路转运司熙河路经畧司用具无事时一年收支数申中书自开建熙河岁费四百万缗癸丑学士承旨韩维知河阳自以言不用数求去会兄绛入相又援故事乞补外遂出绛入相维实草其制时人荣之六月癸酉河东都转运张景宪为右谏议大夫再任先是诸路官吏行新法或违失监司多所奏劾人情■〈卜禹〉恐景宪不劾一人议者欲分河东为两路事下景宪言河东地肥饶相杂州县贫富亦异正宜有无相通以备边买其议遂罢两浙路提刑卢乘为太常博士升一任兼提举监事岁课增羨也是时盖已徙江南东路矣上谓辅臣曰知州转运使令久任吕惠卿曰众议皆以举县令为急不知列官分职何处不择人上曰刺史县令治民为最近故以择人为急县令中能有功绩者朝廷擢用三两人以砺庶官不亦善乎秋七月戊戌诏以十一月有事于南郊戊申赐僧度牒二千五百试监主簿斋郎州助教勅告补■〈片忿〉五十振贷涇源环庆路汉蕃饥民及为永兴路常平余本八月庚午诏监司每半年一具有无措置改正事及保举发所属官申中书考察如有可以施行即下所司令遍闕所属从河北转运判官吕温卿请也丙戌命知制诰沈括为河北西路察访使代章惇也先是遣内侍籍民车以备边人未喻朝廷之意上下骚动又市易为患西蜀井盐不可禁欲尽实私井而运解以足之举朝臣子讫无定论括时修起居注因与上言车战私井利害明日二事俱寝执政喜谓括曰公有何术立谈而罢此二事上其多太平车之说括曰圣王可以理夺不可以言争若车可用互市可禁括不敢以非为非也九月是时诸路灾旱有司未能赈济壬子上谕辅臣曰天下常平仓若以一半散钱取息一半减价余便二者如权衡之相依不可轻重如此民必受赐今有司务行新法惟欲散钱至于常平旧规无人督责者大凡前世法度有可行者宜谨守之壬戌诏河北被伤州军罢余仍令转运司具见管及所赐钱粮有无阙少以闻辛巳诏河南发运使岁买西浙紬绢自今于所产处置场收买或预给钱毋得抑民先是既诏民输免其行钱而知开封府孙永它日因对复论非民所愿于是言者论其不便义在沮令而御史张琥又言之河阳端明殿学士韩维先与永同议皆不当十一月庚子永罢府事维落职己未冬至合祭天地于南郊以太祖配

赦天下十二月上封事者言河北西路灾伤乞逐州委官祷名山大川灵祠河北西路县州自今祷祠祭祀并仪以省钱买礼科八年正月丁酉彗出东方己亥宰臣王安石率在位之臣直言遂诏中外各言朝政得失中丞邓綰又言三司使章惇与吕惠卿叶济为奸庚子惇罢知湖州于是知制诰沈括权三司使壬寅大赦天下彗灭初吕惠卿既为手实法司农寺下之诸路不时施行者以违制论知密州苏轼谓援举常平官曰违制之坐若自朝廷谁敢不从今出于司农是干造律使者上曰姑徐之是时县或灾伤则留以俟丰岁于是荆湖察访蒲宗孟言民自拱手实无所扰也何待于农穰哉愿诏有司不以丰凶弛张其法辛丑诏从之二月己丑看详编修中书条例李承之等上礼房条例十三卷并目录十九册诏行之夏四月上与安石论理财安石曰但审计无为小人所挠令才士肯为陛下尽力则极有可理之道曾孝宽语以为两共事不如专任一人先是上批闻河北河东上等户至今流移不绝或缘与下户同保请常平钱穀保内人近因乏食多已逃外惧将来独于户下催理故一例迁避宜令所在体量以闻七年十一月丁酉也是日王安石以诸路体量奏状以闻称或为分房减口岂得谓之逃移不知当时谁为陛下言此上曰忘记是谁安石曰彼既言之必有事实即是州县监司合根究蔽欺若无事实即如此诬罔之人存之何利陛下欲明目達聰聰則容长此辈适足自蔽耳闰四月上论宣王时无不自尽以奉其上吕惠卿曰宣王时如此而已未及文武也安石曰宣王盛时乃能如此及其衰也则我友敬矣谗言其兴善人君子乃念乱不暇岂复有自尽以事其上之人上曰宣王犹能奏凯旋于郊牧亦岂易及安石曰宣王用吉甫征伐无张仲在内吉甫无以成其功韩琦奏倚阁预买紬绢县买借贷斛斗王安石谓韩絳曰此不可行絳曰民细不得须着宽恤及进呈安石曰近岁方镇监司唯以媚民为事上曰韩琦用心可知天时荐饥乃其所愿也前问以北事乃云须尽改前所为契丹自然无事安石曰琦再经大变于朝廷可谓有功陛下以礼遇之可也若与之计国事此所谓启宠纳侮五月丙寅命近臣祷雨天地宗庙社稷己丑诏永兴军等路转运判官叶康直往鄜延环庆路賑济饥民冬十月壬辰宣徽北院使中太一宫使张方平为宣徽使判应天府方平在朝虽不任职然多所建明乃对请便郡上曰卿在朝岂有所交恶者欤何欲去之速也方平曰臣平生未尝与人交恶但欲归老耳上知不可留乃有是命谓方平曰朕初欲卿与韩絳同事而卿论政不同又欲除卿枢密使而卿论兵复异受先帝末命卒无以副朕意乎因泫然泣下中书请出钱二百万緡散在江淮等七路遇穀贱余充计外遇价贵亦许量减价糴从之许借留内藏库上供钱物及发运司蕃息钱摠二百緡分三年拨还十一月癸未右諫议大夫集贤学士宋敏求为龙圖阁直学士右司郎中知制诰陈襄为枢密直学士先是知制诰邓润甫言近者羣臣專尚告讐此非国家之美宜登用敦厚之人以变风俗上嘉纳之居数日敏求及襄有是命自熙宁三年始制天下吏禄而行重法以絕请托之弊其年京师诸司支吏禄钱凡三千八百三十四贯有奇及括为三司使当熙宁八年其年支吏禄凡三十万一千五百三十三贯有奇京师旧有吏禄者及天下吏禄皆不预此数云

九年三月庚申上论人财以臣下登对多窥测人主意为迎合之说其不中理者朕因加诘难欲使知上意所向然亦虑縁此有不敢言事者辅臣对曰唐太宗之威严魏征之切直终优容之其后不悦征者盖不当以諫草示人也上曰魏征以諫草示人非扬主之恶特好名耳六月壬子富弼言天子无职事唯于大臣邪正而进退之此其职也切乞重之又重也此札子只恐陛下畧知外事一二而已乞右降出庶免后悔也八月宣徽南院使判应天府张方平言司农寺近降勅制应祠庙并依坊场河渡募人承买收取净利实损大体乞朝廷不卖阙伯微子巡遠三庙以称国家严恭典礼追尚前烈之意上批司农寺鬻天下祠庙辱国黷神此为甚者可速令更不施行其司农寺官吏令开封府劾之冬十月上批体问得前日小雨于农夫亦小有济宜择日赛谢戊子上批翰林学士权御史中丞邓綰操心颇僻赋性奸回论士荐人不循分守可落御史中丞以兵部郎中知虢州十一月御史彭汝砺言臣观朝廷近岁用言之道同之则众举之以为奇才为知治体而果用之异之则众愚之以为同俗为不知变而果废之而是非在己不在同异使同之而有所附焉则虽同乃所以为欺也异之而有所取焉则虽异乃所以为忠也夫上之所好恶民表也上惟同之为好则民亦以同为贵惟异之为恶则人亦以异为贱十年二月侍郎御史周尹言昨弹李稷任法不公及不葬父事乞早降手诏李稷改军器监丞御史彭汝砺言切闻河东京北盗贼不禁至白昼杀人于市攻城畧邑巡检县尉职在追胥指踪有待臣观汉京兆多盗起王尊于久废渤海惊扰任龚遂于垂老乞选通明智畧之士更领州事稍寛诸科率欠负以安下户甲辰诏已差徐禧具可以寛恤振补事以闻后禧上賑恤事一曰蠲赋税减役钱二曰除欠负养孤遗三曰罢抑变禁科置事四曰放舖夫生役人五曰省地理省科拨并从之五月庚申诏以欧阳修五代史藏秘阁癸亥知越州资政殿大学士赵抃知越州时两浙旱蝗米价踊贵饿死者什五六诸州皆榜衢路立告赏禁增米价抃独衢路令有米者任增价粜之于是诸州米商辐辏诣越米价更贱民无饿死者是岁卢秉奏计上问曰昨闻滁和民食蝗以济有之乎秉对有之民饥甚死者相枕藉上泫然曰独抃为朕言与卿合前此发运司入奏多献羨余以希恩秉独以钱七十万缗偿三司旧负因言发运司但督六路财赋以时上之本无羨余以进者率正数也乞遂禁絶上嘉纳之秋七月辛亥诏以十一月有事于南郊辛未太常丞集贤校理知湖州鞠真卿为太常博士直秘阁以宣徽北院使王拱辰邓润甫言真卿自改官至登朝三十年未常陈请磨勘故也丙子诏太常礼院续修礼阁新仪八月戊戌诏监御史里行黄廉为京东路体量宣抚廉既受命举条百余事郡守县令能救灾养民者劳来劝诱使即其郡发仓廩府库以賑不给水占民居未能复业着择其高地聚居之皆使有屋避水回遠未能归者遣使移给之皆使有粟所灌郡县蠲赋弃债流民所弃男女于道者收养之年壮而饥者募役之初水占州县三十四壞民田三十万顷壞庐舍三十八万家卒事所活饥民二十五万三千户壮者就功而食又二万七千人得七十三万二千工给常年牛备权钱八万六千三百缗归而论荐一夫后多朝廷所收用云甲辰诏内外待制以上及台諫



官发运转使提点刑狱转运判官各举文臣才行堪升擢官一员令中书审察随才试用毋得举馆职及两府已之亲从监察御史黄廉奏请也初廉既奏请上用其言故有是诏应诏者百余人廉又言势孤地寒迹远下僚者既得以名闻于上愿诏中书审察其能而用之则急下明诏使不虚行于天下冬十月乙未知河阳吕公着提举中太一宫公着至京师对延和殿劳问至上曰不见卿七八年殊觉卿老也公着面对曰臣伏读近诏举才行堪升擢官然数年以来天下之士陛下素知其能尝试以事而终就闲散者尚多未必尽出于迂阔缪戾而难用也自熙宁初论新法不附执政者皆遣逐不复收用故公着见上首言之十二月丁丑朔壬午诏自明年正月朔旦改元为元丰元年正月戊午判太常寺陈襄集贤校理经履李清臣王存详定郊庙奉祀礼文壬申光禄卿知潞州史照再任照考课为河东第一故也闰正月戊子权监察御史里行彭汝砺为江南路转运判官辞日复上疏论时事且言不患无将顺之臣患无谏诤之臣不患无敢为之臣患无敢言之臣上察其忠慰谕久之六月癸卯朔日有食之秋七月庚子初澶渊决水复塞吕公着奏疏其畧曰近日数起诏狱建僧烦众有司极于锻炼羣下无不震恐比至临决多从末减昔于公不过一狱吏耳犹以阴德有报充大子孙今万乘之尊六合之广布德施惠固宜受福无疆施于万世吕公着入对上迎谓曰览卿所奏深得近臣尽规之义时狱犴浸繁而上继嗣未广公着词顺而意切故上纳焉公着因面奏宜增馆阁之选又论宜宽县令之制八月丁卯知密院冯京疾甚上中夕诏左右适梦京造朝甚慰乃赐诏曰渴想形仪不忘梦寝及疾愈造朝上首以所梦语之九月乙酉吕公着薛向并同知枢密院事公着既就职与同列奏事毕独留谢固言臣老于闲外蒙陛下收之桑榆唯知拳拳纳忠以报恩遇自熙宁以来因朝廷议论不同端人良士例为小人排格指为沮坏法度之人不可复用此非国家之利也愿陛下加省察上曰然当以次收用之冬十月己未权发遣州罗观乞颁义仓法于川陝西路从之诏端明殿直学士兼翰林侍读学士提举崇福宫司马光子康充编修资治通鉴聽检文字从之十二月崔台符为大理卿作大理寺凡十有七日而成二年五月羣臣奏事垂拱殿御衣有虫善入人耳上亟曰此飞虫也三年二月辛丑命辅臣祈雨三月乙酉宰相平章事吴充罢为吏部尚书观文殿大学士西太一宫使充为相务安静不妄役使不恃己长所言于上人无知者己丑上以慈圣光宪故大推恩于曹氏凡被赏者百余人上又曰褒宠外戚诚非国家美事顾以慈圣光宪有功于宗社宜优恤其家耳公着因言自古亡国乱家不过亲任小人宦官通女谒宠外戚等数事而已上深以为然时王中正宋用臣等任事故公着假此以讽上既退薛向叹曰公乃敢言如此事何向汗流浹背夏四月乙卯御史中丞季定言奉行朝廷法令以致之民者诸路监司耳而钩考之法令御史台分察官司违慢若推此法以察诸路监司宜无不可者苟如此则朝廷法令不至隳废从之丙戌诏羣臣求直言时占者讲京城有兵变诏修京城储军器严保甲养保马知制诰王安礼上疏曰和气致祥乖气致沴意者羣臣是非好恶有不遵诸道乘权射利者不察主上惠养元元之意用力殫于沟瘠取利究于园夫殆

有以召星变臣愿陛下省不急之改作纾弗胜之工力至于祈禳小数贬损旧章恐非应天以实者上览奏嘉叹他日进对上曰王珪欲使卿条具所以朕常谓左右大臣宜遵下情以達于上不应沮格人言以壅塞人主今以一指蔽目虽泰华在前不之见也近习之蔽君何以异此朕今信卿卿第言之闰九月壬子诏于都城门外赐文彦博钱送御筵令中书枢密院臣僚同赴上自为诗赐之诏命参知政事章惇为之序诏彦博曰卿在仁宗朝蚤冠三事懷忠奋策迄有成勲来观外廷相成宗礼崇进公品徃莅洛师锡宴赐诗昭示殊礼仍勅近辅序而识之庶传无穷着见贤业其承朕志悉体睿思今赐卿诗序至可领也乙卯潞国公文彦博为河东永兴节度使韩国公富弼为守司徒刘沆追谥文安王尧臣改赐谥文忠尧臣子水部员外郎同老为秘阁校理冬十月辛酉详定官制所检讨文字光禄寺丞李德刍表上元丰郡县志凡三十卷十二月乙未朔诏各路监司具到部下知州通判治状最优有未经朝廷任使者令中书籍其姓名

元丰四年三月甲辰翰林学士承议郎张璪为大中大夫参政事先是王珪尝三荐璪不用珪曰璪果贤陛下未尝用以为不贤谗也臣恐士弗得进矣臣为宰相三荐贤三不用臣失职请罢上喜曰宰相当如是姑试卿卿德不回朕复何虑知制诰王安礼为翰林学士安礼于训词初不经意而典贍丰润上数称之御史丰稷言安礼性行淫僻师言鄙之擢在词禁地亲职重将何以训多士仪四方御史朱服又言学士职不專以翰墨为事今安礼行义如此而朝廷擢之不已岂是陛下昭示好恶使人知所修行者臣等伏望追寢安礼新命不听戊申诏河东河北路转运司寻访程婴公孙杵臼坟墓所在以承议郎吴处厚言二人保全赵孤乞加封爵故也诏封婴成信侯杵臼封忠智侯立庙载在祀典六月甲子有上书乞审择守令者上谓辅臣曰天下守令之众至千余人其才性难以徧知惟立法于此使象之于彼从之则为是背之则为非以此进退方有準的所谓朝廷有政也夫家自为政人自为俗先王所以必诛朝廷惟一好恶定国是守令虽众行之数年自当得人也

元丰五年二月上曰刺史县令治民为最近汉刺史有入为三公者盖重其任耳今藩郡不过数十徃徃多不得人则县令可知也自今更宜谨择辛亥分命辅臣祈雨四月壬子知开封府王安礼言三院狱空安礼事至辄断庭无留讼久系待辨者一切论决于是以狱空谒诸府门迂使过见叹息称以为异事上曰昔由余聘秦观政内史廖辈从容俎豆以夺其谋者秦有人也安礼留意吏事能骇动外夷于古无媿矣壬戌崇文院校书杨完编类元丰以来详定郊庙奉祀礼文成三十卷以进蔡确既为右仆射且兼中书侍郎欲以自大乃议尚书省闕移中书当加上字以重之王安礼问上曰陛下用确为相岂以材术卓异抑亦迁徙适在此位耶上曰然安礼顾曰陛下谓适在此位何得自大上每燕见大臣多及前代兴亡事上临御久羣臣俯伏聽命无能有所论说时因奏事有被诘责者安礼进说曰陛下固圣矣而左右辅弼宜择自好之士有廉隅者居之则朝廷尊上善其言七月乙未上谓辅臣曰唐明皇晚年逸豫以致祸乱如本朝无前世离宫别馆游

豫奢侈之事非特不为亦无余力可为也盖北有强敌西有黠羌朝廷汲汲支梧不暇然二敌之势所以难制者有城国有行国自古荒服能行而已今兼中国之所有比之汉唐尤强盛也六年八月诏尚书左丞蒲宗孟守本官知汝州宗孟坐违法缮治西府先是宰执同对上有无人才之叹宗孟对曰人才半为司马光邪说所坏上不语正视宗孟久之宗孟惧甚无以为容上复曰蒲宗孟乃不取司马光邪未论别事只辞枢密副使一节朕自即位以来唯见此一人他人则虽迫之使去亦不肯矣冬十月诏封孟轲为邹国公以吏部尚书曾孝宽言孟轲有庙在邹属兖州未加爵命故特封七年五月范纯仁权知河中府官制初行上欲召纯仁弟纯粹由陕西转运副使入对上问纯仁无恙纯粹对以实故上悟寻有是命纯仁至河中时督教保甲甚严非老幼不许在家农事皆废纯仁上疏曰欲乞权任教阅不报六月礼部言欧阳修等编太常因革礼始自建隆迄于嘉佑惟百官嘉佑之后缺而不录熙宁以来礼文制作以垂法万世乞下太常委博士接续编募以备讨阅从之十二月端明殿学士司马光为资政殿学士降诏奖谕赐银绢衣带马奉议郎范祖禹为秘书省正字并以修资治通鉴书成也上感疾始有建储意又谓辅臣曰来春建储其以司马光及吕公着为师保蔡确知光必复用欲自托于光乃谓职方员外郎邢恕曰上以君实为资政殿学士异礼也君实好辞官确晚进为和叔门下士宜以书言不可辞之故恕但与光之子康书致确语康以白光光笑而不荅亦再辞而后受八年二月癸巳上疾甚迁御福宁殿东阁之西间三省枢密院入问圣体见于上榻前三月戊戌上崩于福宁殿宰臣王珪读遗制哲宗皇帝即位史臣曰上聪明英睿天性孝友事西宫竭诚尽力天下称孝慈圣光宪太后之丧哀毁过甚既除丧思慕不已岁时献酌每至继仁殿必恸哭踰时礼遇皇后宫庭肃正亲爱二弟无纤芥之间终上世乃居外第圣学高遠言必据经深造道德之蕴而精通象数每论经史多出人意表间一日御迓英讲读虽风雨不易禁中观书或至夜分在东宫素闻王安石有众名熙宁初擢辅政虚己以聽之安石更法令中外争言不便上亦疑之安石不自得求引退八年不复召然恩顾不衰司马光吕公着虽议论终不合而极口称其贤励精求治如恐不及摠揽万几小大必亲遇休假独御便殿决事或日昃不暇食至两宫遣人趣之侍臣有以为言者上曰朕享天下之奉乃喜劳恶逸诚欲以此勤报之也将定官制犹处阁中考求沿革一年乃成人皆不知虽治尚严整智勇果断而造次必仁恕羣臣进见顾问或不能对上恐其失次辄顾而言他有忤意者虽甚不乐终保全之每当用兵或终夜不寐边奏络绎以礼处画号令诸将必丁宁详密授以成筭虽千里之外上自节制机神鉴察无所遁情恩威相济人不敢不尽力如李宪张诚一辈虽甚亲用然未尝弛其御策无不畏上之威明而莫之敢肆欲先取灵夏灭西羌乃圖北伐积粟塞上数千万石多储兵器以待及永乐陷没知用兵之难于是亦息意西伐共在位十有九载规模宏遠取法三代由汉以下陋而不取而谦冲退托去华务实终身不受尊号此诚帝王之盛德也

太平治迹统类卷十二



## ●钦定四库全书

### 太平治迹统类卷十三

(宋) 彭百川 撰

#### 神宗任用安石

嘉佑六年六月成寅度支判官刑部员外郎直集贤院同修起居注王安石辞修起居注既得请又申命之安石复辞至七八乃受于是径迁知制诰安石自此不复辞官矣尝有诏今后过舍人院不得申请除改文字安石遂上疏争舍人院职分其言颇侵执政安石于是与执政忤

治平二年冬十月复以安石为工部郎中知制诰母丧除故也安石既除丧诏安石赴阙安石屡引疾乞分司上语辅臣曰安石历先帝朝累召不起或为不恭今召又不起果病耶曾公亮对曰安石文字器业时之全德宜膺大用累召不起必以疾病不敢欺罔吴奎曰安石向任纠察刑狱争刑名不当有旨释罪不肯入谢每以为韩琦沮抑已故不肯入朝公亮曰安石真辅相之才奎所言荧惑圣听奎曰臣尝与安石同领羣牧备见其临事迂阔且护前非万一用之必紊乱纲纪公亮荧惑圣听非臣荧惑圣听也上未审奎重言之上纳奎言于是安石不再召癸卯安石知江宁府众谓安石必辞及诏到即诣府视事或曰公亮力荐安石盖欲以倾韩琦也四年春神宗即位八月戊戌知制诰知江宁府王安石为翰林学士召用上谓吴奎曰安石真翰林学也奎曰安石文行实高出于人上曰当事如何奎曰恐迂阔上弗信于是即召用之制曰王安石学为世师行为人表廉于自进优处于东藩兹有金言宜还中禁俾夫左右先后以道义辅予岂特専文墨视草而已哉可特授翰林学士

熙宁元年四月壬寅诏新除翰林学士王安石越次入对上谓安石曰朕久闻卿道德仁义有忠言嘉谋当不惜告朕方今治当何先对曰以择术为始上问唐太宗何如主对曰陛下每事以尧舜为法唐太宗所知不逮所为不尽合法度但乘隋极乱之后子孙又皆昏恶所以独见称于后世道有升降处今之世每事须以尧舜为法至简而不烦至要而不迂至易而不难但末世学士大夫不能通知圣人之道故常以尧舜为难法而岂知圣人经世立法常以中人为制也上曰卿可谓责难于君然朕自视眇然恐无以副卿此意卿可悉意辅朕庶几同济此道又尝问安石祖宗守天下能百年无大变粗致太平以何道也安石退而奏曰本朝乘累世因循末俗之弊而无亲友羣臣之议人君朝夕与处不过宦官女子出而视事又不过有司之细故未尝如古大有为之君与学士大夫讨论先王之法以措之天下也一切因任自然之理势而精神之运有所不加名实之间有所不察君子非不见任然小人亦得厕其间正论非不见容然邪说亦有时而用以诗赋记诵求天下之士而无学校养成之法以科名资叙立朝廷之位而无官司课试之方监司无检察之人守将非选择之吏转徙之亟既难于考绩而游谈之众因得以乱真交私养望者多显官独立营职者或见排阻故上下偷惰取容而已虽有能者在职亦无异于

庸人农民壤于徭役而尝特见救恤又不为之设官以修其水土之利兵士杂于疲老而未尝申饬训练又不为之择将而久其疆场之权宿卫则聚伍卒无赖之人而未有以变五代姑息之俗宗室则无教训选举之实而未有以合先王隆杀之宜其于理财大抵无法故虽俭约而民不富虽忧勤而国不强頼非寇盗昌炽之时又无尧汤水旱之变故天下无事过于百年虽曰人事亦天助也盖累圣相继仰畏天俯畏人寬仁恭俭忠恕诚恉此其所以获天助也伏惟陛下躬上圣之质承无穷之绪知天助之不可常恃知人事之不可怠终则大有为之时正在今日臣不敢辄废将明之义而苟逃讳忌之诛伏惟陛下幸赦而留神则天下之福也明日上谓安石曰昨阅卿所奏书至数遍言本朝事可谓精尽讨论治道无以出此上曰卿今所言多朕恐有遗忘试録今日所对以进安石唯而退讫不复録丁丑赐布衣王安国进士及第注初等职官安国安石弟也于书无所不读数举进士试礼部辄不中又举茂材异等有司考其策第一召试密阁母丧罢上即位翰林承旨王珪首荐之枢密副使韩絳邵亢又同以安国所著序言十卷进上于是出手诏称美令召试舍人院七月诏司马光王安石同定登州谋杀刑光与安石异议安石不晓法好议法论者不以为是时知谏院吴申上疏论事辅臣以申疏进呈祖宗成宪不违朝廷众论上笑曰众论何可不违刑名末事尚不违况远大者乎学士王安石曰先王但稽于众非一一从也又曰且如谨奉成宪不知申意欲何如谨奉若事事因循弊法不敢一有所改谓之谨奉成宪恐非是上由是不听申言罢申谏职八月宰臣曾公亮等言伏见故事南郊礼毕陪祀官并蒙赐赆实非臣等所安欲望特从诚请大礼毕两府臣僚罢赐银绢诏送学士院取旨司马光奏曰臣知此物未能富国家因此渐思减其余浮费自今日为始耳安石曰国用未足犹未得善理财之人故也光曰天地所生货财百物止有此数不在民间则在公家桑弘羊能致国用之饶不取于民将焉用之安石曰太祖时赵普为相赏赆或以万数今郊赆岂独为多光曰普等运筹帷幄平定诸国赏以万数不亦宜乎今两府助祭不过奉申严外辨沃盥奏帨巾何功勤而得比普等乎争论久之王珪曰司马光言省费自贵近始光言是也王安石言所费不多恐伤国体安石言亦是也惟陛下裁上曰朕亦与司马光同今且以不允答之可也是日适会安石当制遂以上所言意草批札所乞宜不允公亮等于是不敢复辞上欲用王安石参知政事以问辅臣曾公亮因荐之唐介曰恐难大任上曰卿谓文学不可任也介曰泥古而议论迂阔后使为政恐多所变更必扰天下介退至中书谓公亮等曰异日安石果用天下必困扰诸公自知之时执政进除目上久之不决既数日乃曰朕问安石以为然可即施行介曰陛下如此使大臣何以自安且陛下以安石为可大用宜即用之岂可使中书政事决可否于翰林学士必以臣为不才当先罢免此语传之天下恐非示信之体也介虽言然上意益向安石矣曰唐太宗必得魏郑公刘备必得诸葛亮然后可以有为对曰魏郑公诸葛亮皆有道者所羞何足道哉以天下百年承平学者之多然常患无人可以助治者以陛下择术未精虽有皋夔稷契傅说之贤亦必为小人所蔽因卷怀而去尔二年二月王安石为大夫参

知政事先是安石见上论天下事上曰此非卿不能为朕推行料卿学问如此亦欲施設安石对曰臣未事陛下固愿助陛下有为天下风俗法度一切颓坏在廷少善人君子则安常习故而无所知奸人则恶直丑正而有所忌有忌者倡之于前无知者和之于后虽然昭然独见恐未及效功而为异论所胜陛下诚欲用臣宜先讲学使于臣所学本末不疑庶几能粗有成上曰朕知卿久非适今日也上曰朕仰慕卿道德不知卿所施以何为先安石曰变风俗立法度最方今所急也上以为然自此安石取祖宗法度变更之天下骚然矣诏立制置司条例司甲子命知枢密院事陈升之及王安石领其事安石曰今财用分于开阖敛散不能相通故多费失天下之财使利出于一孔自秦汉以来学者不能推明先王法意更以为人主不当与民争利今欲理财则当修泉府之法以收利权然此法既修必大违流俗而异论者众在陛下先有以断之然后可为此须藉人才上曰诚如此今但知有此理者已少况欲推行安石曰人才难得亦难知今使能者理财则十人之中有一二人败事况所择而使者非一人岂能无此失上曰自来一人败事则遂废所圖此所以事少成故置司以讲求理财之术安石因请以吕惠卿为制置司检详文字从之冬十月甲午朔著作佐郎编校集贤书籍吕惠卿太子中允崇正殿说书后九月又加集贤校理初欲置惠卿经筵曾公亮以为京官无例须换朝冠公亮又曰经筵官不可复兼修条例王安石以谓无害乃己十一月乙丑命枢密副使韩绛同制置三司条例初陈升之既拜相遂言条例司难以签书欲令孙觉吕惠卿领局而升之与王安石提举安石曰臣熟推此事但可如故者升之曰臣待罪宰相无所不统所领职事岂可称司安石曰今天下财用困急尤当先理财特置一司于时事以为并之无伤安石曰今分为一司则事易商议若归中书则待四人无议然后草具文字恐成须遍歷四人看详然后出于白事之人亦须待四人皆许则事积而难集陛下既使升之与臣执政必不疑升之与臣專事而为奸况制置司所奏请皆关中书审覆然后施行自不须并入争于上前日高不决乃皆退他日又对升之固以为不可置司上欲使安石独领安石以为非便曰陛下非置此司令中书密院各差一人今若韩绛用事甚便上曰善故有是命升之深狡多欲善传会以取富贵为小官时与安石相遇淮南安石深器之安石时为扬州签判有送升之序及安石用事务变更旧制患同执政者间不从设制置条例司引升之共事凡所欲为自条例直奏行之无复齟齬升之心知其不可而竭力赞助或时为小异阳若不与安石皆同者安石不觉诈深德之故安石推升之曰兹事盍归之三司何必揽取为已任也安石大恐二人于是乎始判己己司封员外郎直史馆蔡延庆右正言集贤院孙觉并同修起居注上初欲用苏轼及觉王安石曰轼岂是可獎之人上曰轼有文学朕见似为人平静司马光韩维王存俱称之安石曰险邪之人臣非苟言之皆有事状作贾谊论优游浸渍深交绱灌以取天下之权附丽欧阳修因作正统论章望之非之乃作论排章望之其论都无理非但如此遭父丧韩琦等送金帛不受却贩数船苏木入川此人所共知司马光言吕惠卿受钱反言苏轼平静斯为厚诬陛下欲变风俗息邪说骤用此人则事何由知陛



下所好在此人非无才智以人望诚不可废若省府推判官有阙亦宜用但方是通判资序岂可便令修注上乃罢轼不用闰十一月条例司奏差官提举诸路常平广惠仓兼管勾农田水利差役事上问王安石以真宗时边事安石曰臣按实录当时君臣议论未尝说到底上下相与皆灭裂而已则何以安边境癸未上谓王安石韩维曰吕公着言条例司近转疎脱所举官皆是奴事吕惠卿得之并非韩绛王安石曰自外举者诚或非臣等所识然取于众议若谓奴事吕惠卿则惠卿在条例司已来几日在外人如何奴事得三年春正月条例司言提举常平广惠仓者本职外毋得侵预外事以扰民右正言李常言臣近闻京东转运使王广渊以陈汝义所进羨余钱五十万贯随和买绢钱俵散今却每贯纳见钱一贯五百于常税折科和买之外又取二十五贯又诏诸路常平广惠仓给散青苗钱本为惠恤贫乏并取民情愿今虑官吏不体此意追呼均配翻成骚扰其令诸路提点刑狱官体量觉察违者禁止立以名闻敢阻遏愿请者罚余见青苗门王安石既称疾家居翰林学士司马光再为批答曰朕以才高古人名重当世召自岩穴推心委诚言听计行人莫能间众所共知今士夫沸腾黎民搔动乃欲委还事任退取便安卿之私谋固无憾朕之所望将以诱谁安石得之怒即抗章自辩上封还其章手批谕安石曰诏中二语乃为文督迫之过而朕失于详阅今览之甚愧又明日安石乃入见固请罢先是文彦博屡乞罢枢密使上谕以须臾年听去韩绛与安石协力排彦博每议事绛多面沮之彦博内不平遂引暮年之诏坚求补外上面谕复视事安石之在告也上谕执政罢青苗法曾公亮陈升之欲即奉诏赵抃独俟安石出令自罢之连日不决安石入对上劳问曰青苗法一无所害极不过失陷少钱物安石既视事持之益坚人言不能入矣安石之求分司也御史王子韶程颢谏官李常皆称有急奏乞登殿言不当听安石去位意甚惧及安石复视事子韶等乃私相贺安石复视事志气愈悍而责公亮等曰为宰相当有执守何得妄降札子今体毕抑配青苗又辍删去当日诏语公亮等不敢抗安石既得每赞上以独断上专信任之轼发策云晋武平吴以独断而克苻坚伐晋以独断而亡齐桓等任管仲而霸燕哱等任子之而灭事同功异何也安石见之不悦上数欲用轼安石必阻毁之轼又上疏曰陛下自岁以来所行新政皆不与治世同道又作拟进士对御试策上即以轼所对策示安石安石曰轼才亦高但所学不正今又以不得逞之故其言遂跌荡至此请黜之曾公亮曰轼但异论耳无可罪者他日安石又白上曰陛下何以不黜轼岂为其材可惜乎譬如调恶马须减刍秣加捶朴斯乃可用如轼者不困之使自悔而絀其不逞之心安肯为陛下用且如轼辈其才为用甚少为患甚大陛下不可不察也上谕安石闻有三不足之说否安石不闻上曰陈荐言外人云今朝廷以为天变不足惧人言不足惜祖宗之法不足守昨学士院进试馆职策其问意专指此三事是何理朝廷亦何尝有此已别昨问矣吏部侍郎枢密副使韩绛参知政事绛间与王安石同奏条例司事尝赞上曰臣见王安石所陈非一皆至当之言可用陛下宜深省察故安石尤德之李定为御史淮南转运使屯田郎中谢景温为工部郎中兼侍御史知杂事景温雅善安石吕公着

之为中丞也人谓景温先必降御史及公着罢乃有此除四月上谓司马光曰王安石不好好官职及自奉养可谓贤者光曰安石诚贤但性不晓事而愎此其短也又不当信任吕惠卿奸邪而为安石谋主安石为之力行故天下并指安石为奸邪也上曰今天下汹汹孙叔敖所谓国之有是众之所恶也光曰然陛下当察其是非然后守之今条例司所为独安石韩絳吕惠卿以为是天下皆以为非也陛下岂能独与此三人共为天下也遂退五月甲辰诏近设制置三司条例司本以均通天下财利今大端已举惟在悉力应接以趣成效其罢归中书先是文彦博等皆请罢制置条例司上谓彦博曰俟羣言稍息当罢之不欲急罢恐伤王安石故也三年六月降屯田员外郎知山阴县陈舜俞监南康军盐酒税坐违诏旨不散常平钱自劾也其后乃上书称青苗法实便初自迷不知尔时参知政事冯京欲缘此复用之宰相王安石曰为人反复如此何可用也方是时畿内初置保甲且观其端而知宿州元积中遂乞布之四方故京师咸云数百年误用刑名今乃得止安石喜其附已故有此授丙戌贬秘书丞集贤校理知谏院胡宗愈通判真州仍落馆职宗愈为谏官遇事必言然不肯出姓名辞多微婉故御批有潜伏中伤等语或曰御批乃吕惠卿笔也初欲与知县曾公亮不可始除通判七月枢密使吕公弼罢知太原弼将去位上议所以代之曾公亮韩絳极称司马光上迟疑未决始欲用蔡挺既而欲并用京及光安石曰司马光固佳今风俗未定异论尚纷纷用光即异论有宗主今但欲兴农事而诸路官司观望莫肯向前若更使异论有宗主即事无可为者上遂不用光公亮曰真宗用寇准人或问真宗曰且要异论相搅即治道何由成若终令君子与小人相搅则君子但有卷懐而已上以为然癸巳赐大理寺丞王钦臣进士及第秘书省正字唐垆出身初垆为北京监当官上书言青苗不行宜斩大臣异议者一二人王安石荐垆宜在馆阁故得召对垆有才辩韩琦甚爱之既去乃闻其言七月龙圖阁学士大夫祖无择授忠正军节度副使嘉佑中无择与王安石同知制诰时词臣许授润笔物安石因辞一人之馈不获意不受以其物置舍人院梁上安石以母忧去无择取为本院公用安石闻而恶之以为不廉安石既当国无择遂得罪秋八月乙丑司马光对垂拱殿乞知许州或西京留司御史台上曰卿何得出外朕欲申卿前命卿且受之光曰臣旧职且不能供况当进用上曰何故光曰臣不敢留上沈吟久之曰安石素与卿善何自疑曰凡素与安石善如苏轼辈皆毁其素履中以危法臣虽不敢避削黜但恐彼一人之身或前是而后非上曰安石与公着如胶漆及其有罪不隱乃安石之忠也又曰青苗已显效光曰天下知其非独安石党以为是癸巳上曰苏轼非佳士光曰岂不佳于李定不孝安石喜之用为台官安石常欲置其党一二人于经筵以防察奏对者吕惠卿以遭父丧安石未知腹心所托而曾布巧黠善迎合安石悦之故以布代惠卿入侍经筵布资序甚浅人尤不服而布固辞卒罢之庚子门下侍郎平章事曾公亮兼三城节度向安石阴助之安石以其助已深德之故推尊公亮而沮抑韩琦御史至中书争论青苗事公亮俯首不答安石厉声与之往返由是言者亦以安石为專而公亮不预也苏轼尝责公亮公亮曰上与安石如一人此

乃天也安石犹以公亮不尽同已数加毁訾公亮虽屡乞致仕上辄留之于是乃听公亮罢相司马光登对乞许州及留台上曰必得许州乎光曰臣安敢必但稍便乡里即臣之幸也司马光知永兴光辞上谓光曰今委卿长安邊鄙动静及本落民间利病当以闻光曰谨奉诏光言青苗助役为陝西之患上曰助役惟行京东两浙耳冬十月职方员外郎邓绾为集方校理校正中书孔目房公事绾故名维清双流人举进士高第累迁宁州通判上书言陛下得伊吕之佐作青苗免税钱法等百姓无不歌圣泽臣以所见宁州而知一路观之将见天下皆然此诚不世之良法愿陛下坚守行之勿移于浮议也又与王安石书及颂安石大喜白于上使乘驿诣阙时庆州方有夏寇绾进呈邊事上问识王安石否曰不识上曰今之古人也又问识吕惠卿否曰不识上曰今之贤人也绾见安石欣然如旧交绾自至京师乡人皆笑骂绾曰笑骂从汝笑骂好官我须为之寻之命绾兼编修中书戶房条例十二月辛酉右谏议大夫知邓州吕海提举嵩山崇福宫先是九月上欲移海知河南命未下而寝海虽在外遇朝廷有大得失犹言之不置于是以疾求贤故有是命会诏两制举谏官众俱以为当今宜为谏官者无若苏轼于是镇以轼应诏御史知杂事谢景温安石弟安国姻家也景温意轼为谏官以攻安石短遂以谤语力排之范镇举轼为谏官轼前丁母忧多占人船私贩苏木安石下淮南江南东西京湖北夔州成都六路体量其状事不实士论薄之镇又举台州司户参军孔文仲贤良对策极陈新法之害初宋敏求第为异等上覆考王珪书以第四等详定韩维从初考安石见而大恶之密启于上以御批黜文仲令再进呈乃下诏罢归故官孙固屡封还制书不许镇于是曰吾前举苏轼为谏官后举孔文仲贤良方正可谓无负朝廷矣即日上章乞致仕冯京解之曰参政何必尔遂落镇翰林学士以本官戶部侍郎致仕命舍人蔡延庆为告词有诋欺要君之语安石犹不为快自加改定极其丑诋明日延庆贺镇且以制词出于安石为解镇诵之笑曰才无任职之能镇披襟当之内有怀利之实则夫子自道也即上表称谢云望陛下集羣议为耳目以除壅蔽之奸任老成为腹心以养和平之福天下闻而壮之初至和中赵抃为侍郎御史与镇争劾宰臣陈执中家决婢子事与镇有隙至是安石恨镇数讦之于上且曰陛下问赵抃即知其为人他日上以问抃抃对曰忠臣上曰卿何以即知其忠对曰嘉佑初仁宗违豫镇首请立皇嗣以安社稷岂非忠乎既退安石怅然谓抃曰公不与景仁有隙乎抃曰不敢以私害公也丁卯石谏议大夫参知政事王安石为礼部侍郎平章事王珪守本官参知政事丁酉曾布知制诰上初欲用张琥为之王安石使琥为文坚辞不为布自请为之琥由是忤安石意琥不得知制诰冬十二月章惇经制边事官吏多为所狎侮独商英与抗论不少屈惇竒之乃荐商英于王安石于是召对擢用五年正月辛丑司天监灵台郎亢瑛言天久阴星失度宜罢免王安石遂谒告冯京等进呈送英州编管上批令刺配英州牢城安石翌日乃出安石曰臣窃观陛下所以未能调一天下兼制敌国正为不明于帝王大略非谓如此小事不察也陛下修身齐家虽尧舜文武亦无以过至于精簿书刀笔之事羣臣虽或未能承望清光然帝王大畧似不必讨



论今在位之人有事韩琦富弼如仆妾者然陛下不能使之革而况敌国乎二月上又言三司判官当督察安石曰且刑名法制非治之本当更论讲帝王之道术而已若不务此而但欲多立法制以驭羣臣恐不济事是日王安石留身乞东南一郡上甚怪安石如此曰卿所以为朕用者非为爵禄但以懷道术可泽民不当自埋没使人不被其泽而已朕顾鄙初未有知自卿在翰林始得闻道德之说心稍开悟卿朕师臣也断不许卿出外夏六月丁卯王安石恶李评必欲去之既办上寿新仪词诞慢若推鞫即明见欺罔之状令送宣徽院取勘已而上批令评更不管勾合门事已王安石谒告上令冯宗道抚问安石因附表札请解机务上怪安石求去安石曰疲疾不任劳剧兼任事久积中外怨恶多人人情容有壅塞上曰卿无乃谓朕有疑心自制造知卿属以天下事如吕诲比卿少正卯卢杞朕固知卿不为吕诲所惑吕公着与卿交游至相善然韩琦必以兵讨君侧恶人朕亦不为公着所惑朕与卿相知近世以来所未得安有不为朕少屈安石曰大臣久擅事未有无衅者及其有衅然后求去则害陛下知人之明又伤臣私义上固留之比三四上上又固留约令入中书安石复具奏而阁门等处皆有旨不许收接安石文字甲戌王安石见上曰陛下不许臣去臣不敢固违圣旨然实病若更曳勉半年不可强即须再烦圣听秋七月前处州缙云尉条例删定官郭逢源上疏曰臣窃观自周文武以还盛德有为之主固无如陛下而懷道之士由孔孟而后如王安石者未之有也又上疏曰废去枢府并归中书除补武臣悉出宰相军旅之事各责其帅合文武于一道归将相于一职复兵农于一致此尧舜之举也疏奏上甚不悦他日谓安石曰逢源必轻俊安石曰陛下何以知之上曰见所上书欲并枢密院废募兵安石曰人才难得如逢源亦宜晓事可试用也贬太子中允同知谏院权同判吏部流内铨唐垆为潮州别驾初以王安石荐得召见骤用为谏官数论不得遂因百官起居越班扣陛请对上谕止之垆坚请上殿读疏论王安石用人变法非是上怒其诡激故贬垆疏留中其畧云安石用曾布为腹心张琥李定为爪牙刘孝孙张商英为鹰犬元绛陈绎为厮役逆意久不召还附同者虽不肖为贤又作奸令章惇变李定狱事又擅议宗庙事有轻神之心保甲以农为兵凶年必致怨叛免役损下补上人人怨咨而令坚司压塞州县事不上闻又保甲事曾布蔽塞人情欺诬人主以为情愿又置布易司都人有致饿死者以安石比李林甫卢杞翌日执政进呈安石垆素狂不足责乃改授大理评事监广州军资库六年二月先是王安石以病谒告弥旬乃求解机务且入对上面还其章安石固求罢上不许上曰卿如此必是以朕终不能有成功久留无补所以决去安石曰陛下圣德日跻非臣所能仰望后来贤俊自有足用者臣久妨贤路又病所以求罢非有他上曰朕置卿为相事事頼卿以济后来可使者何人孰可以为相者卿所见也安石曰岂可谓无其人但陛下未试用耳上再三晓谕安石乃告乞将理既而上又召安石子雱再三问劳又令冯京王珪谕旨于是安石复入视事夏四月上令沈起密经制交趾事诸公皆不与闻凡奏请皆听报九月赐屯田员外郎侯叔献大常丞杨汲府界游田各十顷叔献等引河水淤田决清水于畿县澶州间坏民田庐塚

墓岁被其患他州县游田类如此而朝廷不知也龙圖学士孙固知成都府先是上以固东宫旧僚尝问固安石可相否固曰安石文行甚高侍从献纳其选也宰相自有度而安石少从容凡四问事以此对及安石当国数议事不安故也丙戌王安石罢为吏部尚书观文殿学士韩绛依前官平章事监修国史遣勾当御药院刘有方赍诏韩绛赴阙翰林学士右正言兼侍讲吕惠卿为右谏议大夫参知政事安石为执政凡六年会久旱百姓流离上忧见颜色每辅臣进对嗟叹恳恻益疑新法不便欲罢之安石不悦屡求上不许而吕惠卿又使其党日诣匭函假名役书乞留王安石坚守新法上乃遣惠卿以手诏諭安石欲处之以师傅之官留京师而安石坚求去又赐手诏曰继得卿奏以义所难处欲得便郡休息意更不欲再三邀卿之留已降制命除卿知江宁庶安心休息以安所欲朕体卿之诚至矣卿宜有以报之手札具存无或食言从此浩然长往也又赐手诏曰韩绛欲得一见卿意者有所咨议卿可为朕详奏以方今人情政事之所宜急者安石荐绛代己仍以惠卿佐之于安石所为遵守不变也时号绛为传法沙门惠卿为护法善神已五诏先是惠卿虑中外因王安石罢相言新法不便以书徧遗诸路监司郡守使陈利害至是又曰上降此诏申明之王雱为右正言天章阁侍讲以疾不能朝又诏给俸免朝谢许从王安石之江宁仍修撰评议又诏王安石依旧提举详定国子监修撰经义参知政事吕惠卿同提举乙亥诏监安上门光州司法参军郑侠编管汀州始侠监门为大早上书言事并畫百姓蓝缕之状为圖以献书奏上叹息终夕不寝遂下诏求直言有旨放侠擅发马递罪会安石请罢相上不许侠言安石所致罢安石天必雨安石既罢果雨侠自以所言中未几又上疏五千余言既言时政得失且言安石作新法为民害惠卿党奸邪拥蔽聪明独冯京立异敢与安石校请黜惠卿用京为相惠卿大怒遂白上夺侠官汀州编管八年春正月甲午朔不视事谏议大夫冯京守本官知亳州侠既窜汀州人多怜之或资其行吕惠卿憾侠不置且恶冯京异议欲藉侠以排去京并及王安国乘间白上曰侠书言青苗免役流民等事此众所共知也若言禁中有人被甲登殿诟骂此禁中事侠安从知此盖侠前后所言皆言王安国导之上亦疑然他日问京曰卿识郑侠乎对曰臣素不识侠侍御知杂事张琥即劾奏京大臣与侠交通有迹乞追侠付狱窘治诏送御史台京侠素重王雱而议论常与王安国同非新法安国亲厚之侠诣登闻鼓院上书丁讽判检院延与啜茶其所言称獎之讽又尝见京语及侠京称侠之辞甚佳小臣不易敢尔狱既具遂罢京政事侠遠徙讽等皆得罪惠卿事安石如父子安国负气恶其儉巧数面折之惠卿切齿及安石罢相引惠卿辅政惠卿遂欲代安石恐其复来乃因侠狱陷安国亦以沮安石也辛丑察访荆湖常平等事蒲宗孟言近制民以手实上其家之物产而官为注籍以正百年无用不明之版而均齐其力役此天下之良法也然州县灾伤五分以上则不与焉且留以俟丰岁以臣观之使民自供手实无所扰也何待于丰穰哉愿诏有司不以丰凶弛其法从之吕惠卿为手实法奉使者至析秋毫天下病之而宗孟乃有此奏张方平言中户以下鲜有盖藏田蚕所收岁有厚薄户有耗登何常之有不惟扇惑人情

更有纷乱新法今兹一事专用挠人徒骚拏于天下实无济于国家是岁十月卒罢手实法甲寅诏罢诸将参谋初置三十将许武举学生充参谋谏官范百禄言边事未有机警何用布衣参谋徒长奔竞耳罢之丁卯前曲阳县尉吕和卿为奉礼郎知军器监丞先是吕惠卿令和卿建议行手实法至是判军监章惇情以为丞仍特改官癸酉知江宁府王安石依前官知平章事始安石荐韩绛及惠卿代己惠卿既得势恐安石复入遂欲逆闭其途凡可以害安石者无所不用其智又数与绛忤绛乘间白上请复相安石上从之惠卿闻命愕然翌日上遣勾当御药院有方诏往江宁召安石安石不辞遂倍道赴阙三月戊午上谓王安石曰小人渐定卿且可以有为又曰自卿去后小人极纷纭独頼惠卿主张而已因称吕惠卿不可得安石曰诸兄弟皆不可得和卿者臣初不知其人昨送臣到陈留道中与语极晓事安石曰臣父子蒙陛下知遇诚欲助成陛下盛德大业而已小人纷纷不敢安职今陛下复诏用臣诚欲粗有所効以报陛下察臣用心上曰固所望于卿君臣之间初勿形迹形迹最害事闰四月上欲用宣徽使张方平为枢密使既批出王安石将行文书吕惠卿留之曰当晚集更议之因私于王安石曰安道若入必为吾属不利翌日再进呈其事遂寝乃诏司农司条例司具应言废罢耆户长壮丁利害编写成册纳禁中御史临川蔡承禧言崇政殿说书吕升卿招权慢上并及参知政事吕惠卿且言惠卿辟刘谷为经义所检讨与官俸令教小儿丁亥宰臣王安石与惠卿对上独顾安石屡称其无私殆以晓惠卿也于是惠卿求去不许秋七月崇政殿说书同管勾国子监从其请而有是命蔡承禧劾升卿既自辨析且乞札付承禧王安石白上恐不宜如此若承禧纷纷则烦陛下处置上乃已初宰执同进呈承禧劾升卿事惠卿乃谒告上表求补外者三上曰卿为参政责不在卿卿何必尔惠卿曰顷安石之去一时乏人所以受命不辞安石复来理当决去上曰卿以承禧故耶承禧言卿弟无与于卿惠卿曰纵使承禧言臣臣为参知政事苟自度无过岂至为之求去况臣弟分析事又如此乎上曰岂以安石议用人不合耶安石必忘卿惠卿曰安石于臣何忌惮陛下初用安石以其势孤助之每事易今日陛下以谓安石之助多节之故每事难就则臣之在朝廷所补者少而所害者多不若遂臣之去陛下一听安石天下之治可成也上曰终不令卿去惠卿曰陛下数宣諭臣以参贰安石不识何也参知政事莫参知陛下政事否上曰安石政事即朕之政事也惠卿因言承禧所以言臣弟者意乃在臣上曰已晓无过虑惠卿不得已乃复就职九月吕惠卿缘升卿事乞罢政既复就职与安石益不协于是留身白上曰臣意安石在江宁时心有所疑故速来如此既至必是陛下圣谕及尝借臣奏对日録观之后颇开解忽两日前余中叶唐懿来为臣言安石怒臣改其诗义上曰安石无他意冬十月己丑上既决意罢惠卿政事故先出升卿先是御史蔡承禧奏臣累言参知政事吕惠卿奸邪干威福赏刑天下共愤是日手诏给事中参知政事吕惠卿朕不次拔擢俾预政而乃不能以公灭私为国司直阿蔽所与屈挠典刑羣言交攻深骇朕听可守本官知陈州庚子石正言知制诰直学士院权三司使章惇知湖州先是御史中丞邓绾言臣伏见近日陛下断然



罢黜吕惠卿令按治其罪惠卿执政逾年所立朋党不一然与惠卿相济无如章惇虽已黜逐而尚留惇在朝廷亦犹疗病四体而止治其一邊糞除一堂而尚存秽之半也于是罢惇三司使以本官守十一月丙戌先是王安石以疾居家上遣中使劳问又命辅臣即其家议事时有不附新法者安石欲深罪之上不可安石争之日不然法不行上曰闻民间亦颇苦新法安石曰祁寒暑雨民犹怨咨此岂足恤也上曰岂若并祁寒暑雨之怨亦无耶安石不悦十二月己丑王安礼知润州先是吕惠卿言安礼任馆职狎游无度于是安礼乞出即从之安石犹以惠卿昔居忧在润州欲使安礼求其过失故也九年六月乙酉朔给事中知陈州吕惠卿奏往者邓綰言臣丁忧日托张若济贷部内钱闻推究首尾七月乃毕今朝廷复差蹇周辅乃綰乡人尝为御首推直官不惟有嫌于法亦碍乞别选官置院诏屯田郎新权发遣秦凤路提点刑狱李竦与蹇周辅日推鞫安石既与惠卿交恶令徐禧王右等按华亭狱不得惠卿罪更使周辅按之安石子雱犹恐不得切责练亨甫吕嘉问共议取邓綰等所条惠卿事杂他书下制狱安石初不知也惠卿所结堂吏遇告自诉且讼綰及安石前后凡数十纸其畧曰安石尽弃素学而隆尚纵横之末数以为奇术以至赞愬胁持蔽贤党奸移怒行狠方命矫令罔上要君凡此数恶力于卒岁之间莫不脩具虽世之矢志倒行而逆施者迨不如此平日闻望一旦扫地不知安石何苦而为此也谋身如此以之谋国必无遠圖而陛下既以不可少而安之臣固未易言也又曰陛下平日以何如人遇安石安石平日以何等人自任不意窘急乃至于此又曰臣之所论皆中于肺腑之隱上既以惠卿所诉事示安石安石谢无有归而问雱雱乃言其情安石始咎雱雱先病疽而嘉问等相继得罪安石由是媿且数求去上待安石自是意亦稍衰矣雱性刻深喜杀常称商君为豪杰之士每劝安石诛不用命大臣而安石不从也安石辅政时罢逐中外老成人几尽多用门下儂慧少年诸生一切以王氏继为师讲官策试诸生论及时政皆骂逐及惠卿交恶佞人告发吕氏奸私事皆自雱发之七月壬戌诏宰臣王安石及王雱终七供职九月是秋宣徽南院使判应天府张方平上表乞致仕诏答不允方平因奏疏论率钱募役之害其畧云盖愚而不可欺弱而不可胜者民也是以圣人甚畏之甚重之欲保国家必先得民是谓藏身之固置器于安之道也十月丙午王安石罢为镇南军节度同平章事判江宁府安石之再入也多称病求去及子雱死犹悲伤不堪力请解机务上亦滋厌安石之所为故有是命枢密使工部侍郎吴充为同平章事充性谨密在两府数乘间言安石政事不便上以其中立无私故相之知成都府冯京知枢密院事先是吕惠卿悉出安石前后私书手笔奏之其一云勿令齐年者谓京也与安石同时在中书多异议故云又其一云勿令上知由是上以安石为欺故复用京十二月判江宁府王安石奏乞施田与蒋山太平兴国等充常住为其父母及子雱营办功德从之司马光与书吴充云今若法弊而不易民疲而不恤万一鼠窃益多蜂虿有毒则恐庙堂之位亦未易安居虽复委遠机柄均逸外藩固非息肩之处乃至投簪解绂啸傲东山亦非高枕之地然则相公今日救天下之急保国家之安更无所与让矣苟不罢青苗

免役保甲市易之法息征伐之谋而欲求其成效是犹恶汤沸而益薪适鄢郢而北辕也充代王安石为相知天下不便新法欲有所变更尝乞召还光及吕公着韩维苏颂及荐孙觉李常程颢等十数人皆王安石所斥逐者故光遗以此书而充不能用光亦卒不起十年五月诏中书舍人下给假一月令往江宁府省视王安石疾病六月集禧观使王安石请所居江宁府上元县园屋为僧寺乞赐名额从之以报宁禅院为额或云安石爱其子雱雱性险恶安石在政府凡所为不近人情者雱实使之既死安石哀悼久而不忘尝恍惚见雱荷铁枷如重囚状遂请以园屋为僧寺盖为雱求救于佛也元丰元年夏四月守司空集禧观使荆国公王安石卒司马光手书与吕公着曰介甫文章节义过人处甚多但性不晓事而喜遂非致忠直疎遠谗佞辐凑败坏法度以至今日方矫正其失革其弊不幸介甫谢世反复之徒必诋毁百端光意以为朝廷宜优加厚礼以振起浮薄之风苟有所得辄以上闻不识晦叔以为何如更不烦答以笔扎宸前力主张则仗晦叔也诏再辍视朝赠大柱遗表恩七人命所在应制墓事

太平治迹统类卷十三

●钦定四库全书

太平治迹统类卷十四

(宋) 彭百川 撰

神宗朝臣议论新法

神宗即位励精求治以王安石学行负时望召为翰林未几引叅大政一日紫宸早朝二府奏事颇久日刻既晏例隔登对于崇政殿上更衣复坐以次赞引中丞吕晦待对于崇政殿侍读迩英亦将趋资善堂以俟宣召相遇于朝路先密谓晦曰今日请对何言晦与袖中弹文乃新叅也光愕然曰以介甫之文学行义命下之日众皆喜于得人奈何论之晦正色曰君实亦为此言耶安石虽有时名上意所向好执偏见不通物情轻信奸回喜人佞已听其言则美施于用则疎若在侍从则可或容置于宰辅天下必受其弊光又谕之曰与公为心交苟有所懷不敢不尽今日之论未见有不善之迹似伤忽遽或别有章疏愿先进呈姑留是事更加筹虑晦曰上新即位富于春秋所与朝夕谋议二三执政苟非其人将败国事此乃心腹之疾治之惟恐不及顾可缓耶语未竟各趋以出海疏奏曰臣窃见大奸似忠大诈似信虽有用舍系时之休戚也至如少正卯言伪而辨行僻而坚顺非而泽强记而博非宣父圣明孰能去之卢■〈木巳〉奸邪德宗不知终成大患所以言知人之难尧舜病诸陛下即位之初起王安石为学士缙绅皆谓陛下之明擢有文之人得以适其用也乃进二台席金论未允衡石之下果不能欺其轻重也谨按安石外示朴野中藏巧诈骄蹇慢上阴贼害物众所共知今略疏十事皆目覩之迹一言近诬万死无避慢上无礼好否欲进见利忘义要君取名用情罔公以私报怨怙势招权专政害国商榷财利以动摇天下臣究安石之迹固无远略惟务立异于人徒文言而饰非将罔上而欺下臣窃忧之误天下苍生者必斯人矣陛下图治之宜当稽于众方天灾屡

见人情未知惟在澄清不宜挠浊如安石久居庙堂必无安静之理臣所以沥恳而言不虞横祸期感动于聪明庶判别于真伪然诋奸大臣之罪不敢苟道孤危若寄职分非安当复露章请避怨适取进止是日司马光退归玉堂以海遽论安石者终日思之不得其说既而缙绅间复有传诲疏者往往亦偶语切疑其太过熙宁二年二月前大名府推官苏辙为制置三司条例检详文字先是辙上书言事即日召对延和殿疏奏上批付中书曰详观疏意如辙潜心当今之务颇得其要郁于下僚不得伸诚亦可惜因有是命时安石新得幸急于财利置条例检详文字官命吕惠卿苏辙同为之安石多于惠卿谋辙议事多悟一日介甫出一卷书曰此青苗法也诸君熟议之不便以告辙曰以钱货民使出二分息本以救民之困非为利也然出纳之际吏缘为奸钱入民手虽良民不免妄用及其纳钱虽富民不免违限如此则鞭捶必用州县不胜烦矣介甫曰君言有理徐议行之时上既用富弼为相犹以足疾在告上遣勾当院御药院刘有方谕旨令先赴中书供职弼固辞曰岂有召自外郡未见天子而遽坐庙堂预闻天下之政乎是日弼始入见上谕弼曰君臣须是上下相尽忠尽节不得有隐弼拜于御座之前曰臣之拜不独贺陛下尧舜之明亦为宗庙社稷天下生灵为贺似此宣谕不为当今之论亦可为万世子孙之法尽忠无隐只臣一员亦无益于事须是在庭臣僚天下官守人人尽忠方能成天下之务上曰卿论至详甚善弼又曰臣自沿路到京闻士大夫说大抵守道者心多不安希进者往往得志愿陛下精别流品无使忠邪混淆小人渐进兹系治乱之大者陛下若不以臣说为妄略加听纳则异日必有所补弼又曰臣闻中外之事渐有更张此必有小人献说于陛下也大抵小人惟喜动作其间有所希冀缘朝政守静事有常法小人无可望也愿陛下深赐审察无致后悔弼又曰臣闻天下财用不充执事必须多为经画其有当数日乃祭祀百官六军西北赐与人往来等费是也其所不知者内中取索及两宅请俸以致土木兴作等费不一并宜置局会计渐节不给之用则百姓无暴敛之苦国用无不足之虑上改容听纳曰今日得卿至论乃沃朕心可谓金石之言朕不忘也富弼言大臣须和以济务上即问安石所置条例如何安石曰已检详文字略见伦绪亦有待人而后可举者然今欲理财则须使能天下但见朝廷以使能为先而不以任贤为急但见朝廷以理财为务而于礼乐教化之际有所未急但见朝廷深念国体有先后缓急上颔之置条例司二年夏四月滕甫知郢州性疎达在上前论事如家人父子言无文饰洞见肝膈上待甫甚厚时遣小黄门持短封御札问事甫往往夸示于人因见御札有用字悞者因谗甫以为扬上之短上由是疎焉安石恶甫故极力排去之甫入辞言于上曰臣知事陛下而已不能事党人为无益矣上为改容知制诰钱公辅罢知谏院时上委任政府责以太平一日执政召台谏官至都堂谕之上求治如饥渴正赖同心以济所愿公辅对曰所为是耶天下谁敢不同非耶公辅虽同之不得已公辅素与王安石之入翰林为学士也首荐公辅忠信笃实富于文学口之禁林必有补助而安石盛主薛向欲进用而公辅方请黜向安石素恶甫将废逐而公辅反营解之安石以是怨公辅言于上曰臣昨以公辅在先



朝言事似非希世顾望者故举以自代诚不意今挟邪乃尔至是上闻安石有公辅挟邪之语乃问安石以前册事罢之何如安石曰比日安日亦宜罢盖其理合罢则非以一事罢之人自以为宜陛下以进退羣臣当如天道生杀自然可也乃罢公辅谏院丁未给事中叅知政事唐介卒介数与安石论登州谋首事于上前介曰新法天下皆以为不可安石曰以为不可者皆朋党尔安石强辨上主其语介不胜愤闷居顷之疽发背而卒五月郑獬知杭州王拱辰判应天府钱公辅知江宁府獬与滕甫相善王安石素恶之目为滕屠郑洁尝言于上曰獬极险不宜使之在内故事而制差除必宰相当笔时富弼在告曾出使西京王安石遽自当笔议者皆疑安石行其私意御史中丞吕诲即奏曰臣所惜者不惜四人去之所惜者朝廷之体无俾权臣盗弄其柄上出诲奏于执政安石曰此三人者出臣但媿不能尽理论情暴其罪状使小人知有所惮不意言者更乃如此是日王安石以吕诲劾章乞辞位上即封还其奏令视事如故苏轼议科举事六月御史中丞吕诲出知邓州诲初论安石上使谕解诲诲执愈坚又奏曰臣受国恩家有忠范惟知死节以图报效窃以我国朝开基一百余年四方无事前古未闻然太平之久事固有系于圣虑者以是思之尤当谨于措置谋谟在得人安危在委任图任旧德推广恩信以至万务讲求利病在乎沈机默运不露形迹因事制宜去弊补废上应天灾务以安静乃今日之事也王安石者本以文章进用竟遽为辅弼逢迎陛下之意张皇一时之事祖宗法度首议变更天下利源皆欲摇动斥逐近侍盗弄权柄倾危老成欲速相位人情甚郁公议不容独陛下未悟倚任安石与之讲求治道之要进退天下之事臣恐无益于盛时徒有累于知人于是安石求去上还其奏安石乃具谢起安事安石既视事益自信日以经纶天下为已任尽变祖宗法专务聚敛造出条目颁于四方州县吏奉行微忤其意则责追之所用俱儉薄少年天下骚然于是昔之疑诲为太过者愧仰叹伏以诲为不及而诲亦由此力求补外遂得罪八月侍御史刘琦监处州税监察御史钱顛监衢州税初御史刘述及琦等奏劾王安石专肆胸臆轻改法度疏奏即卧家待罪述坐缴敕札被劾未复故二人充贬顛将出台坐骂孙昌龄曰平日未尝知君止以王安石居忧金陵君为幕官媚事安石故安石荐君于彭思永得与为御史今日亦当少念报国奈何专附安石求美官顛今得罪分当远窜君为美官自谓得策我视君犬彘之不若也遂拂衣上马至是诏琦言多失实事辄近名担去官曹规喧朝听可落御史充监当于是翰林司马光奏琦等不当贬不报八月诏同修起居注范纯仁罢同知谏院初纯仁以言薛向不可为发运使或致民心别生事变上曰今令发运使兼制置六路财赋务在均适有无何由乃致百姓人情怨骇纯仁曰人主不当言利但当务农桑节用而已纯仁露奏显讼顛琦指切安石又中书曰今日忽闻诏命以台官刘琦等事近多名落御史充监当者闻命之际中外震惊盖人臣以率职为忠人君以纳谏为美是以仁宗开言路优容谏臣执政不敢任情小人不敢害政以致太平日久亿兆归心先帝容纳直言未尝变色是时吕诲与纯仁并为御史亦尝擅纳告身皆蒙慰主上思绍光烈而因二三执政不能以道致君教化或失其后先刑

赏或乖于轻重书藏其本末但致外议喧腾凡居言责之臣无不实时论奏既许风闻言事即是过失得知而柄臣遂摭拾其罪主上将何所赖且叅政以文学自负议论得君专任已能不晓时事而又性类率易轻信奸回举意发言自谓中理欲求近功忘其旧学舍尧舜知人安民之道讲五伯富国强兵之术尚法令则称商鞅言财利则背孟轲鄙老成为因循之人弃公论为流俗之语异己者指为不肖合意者即为能贤主上无从谏之美时政有揠苗之忧曾相公平高不退廉节已亏且欲见容惟务雷同苟相旧好拘文守法令则一切规随赵叅政心知其非而辞辨不及凡事不能力救徒闻退有后言此皆朝廷大臣所为安得政令无失公亮等以纯仁状进又落起居舍人同修起居注条例可检详文字苏辙言每于本司商量公事动皆不合臣已有伏申本司具述所议不同事乞除一合入差遣诏依所乞为河南府推官辙初为检详文字朝廷数召刘彝等八人遣之四方辙因求见宰相陈升之问君来见何也对曰有疑欲问尔近日诏八使欲遣往诸路不审公知利害所在而使案实之耶未知而谩遣出外罗诸事也升之曰君意谓何辙对曰昔嘉佑遣使宽恤既还奏例多难行不免为天下笑今何以异升之曰吾惜奉诏看详宽恤事如范尧夫所言多中理辙曰今所遣如尧夫有几升之曰所遣贤将不肯行辙曰公知不便而特遣使者之不行若之何卒遣之他日又言均输青苗非良法以状诋升之安石怒甚欲加之罪升之止之上阅辙状问辙与轼如何观其学问颇相让王安石曰臣已尝论奏轼兄弟大抵以飞箝押阖为事上曰如此宜合时事以为异论安石曰大抵小人押阖非必尽如人主意然后为利九月上谓陈升之王安石曰今赋非不多只是用度无节如何节用升之安石皆言兵及宗室之费置交子务

先是御史张戢言吕惠卿奸邪不可在左右后数日安石又独对力陈惠卿所以被譖者之情并诸奸利事上然之三年正月知河南府张方平提举集禧观先是方平被诏举堪任谏官者二员即以李大临苏轼应诏方平既入见上欲除方平宣徽使留京师王安石曰此大除拜四方观望方平奸邪人孰不知恐如此除拜无补圣政也而安石又言陛下留方平甚不便方平为御史中丞附贾昌朝之徒误仁宗赏罚甚众今留在内于陛下何所补但令羣邪更有宗主尔方平亦坚乞南京留召遂命知陈州方平言民戎事国之大本愿陛下广聪明于听览之外采公论于得失之前深察军民之情厚为社稷之虑朝廷尊而国体平顺气应而嘉禾生遂退就诛殛亦所甘心上谓方平曰能复少留乎方平曰退即行矣二月韩琦论青苗事二月傅尧俞直昭文馆同判流内铨尧俞始除丧至京师王安石素善尧俞未即见也安石数召之既见语及新治安石谓尧俞曰方今纷纷迟君来久矣将以宝文阁待制同知谏院处君尧俞谢曰新法世以为不便诚然当力论之平生未尝欺敢以实告安石不悦遂有此命辛巳司马光言臣蒙圣恩除枢密副使所以屡违诏命不敢祇受者臣先曾上疏言不当设制置三司条例司又尝因经筵侍坐言散青苗钱不便自后朝廷更遣使者四十余人专使之散青苗钱又疑因臣之言激怒建画之臣使行之更力由是闭口不敢复言今行之纔数日中外鼎沸彼言青苗不便者止

论今日之害耳臣所忧者乃十年之后非今日也臣闻先帝尝出内藏库一百万缗助天下常平仓钱谷共及一千余万贯石今无故尽散之他日思常平之法复欲收聚向时钱米得及此数乎臣以谓散青苗钱之害犹小而坏常平法之害犹大也陛下诚能昭然觉悟听纳臣言罢制置三司及追还使者臣虽尽纳官爵但得为天下之民以终余年其幸多矣苟不足采陛下虽引而置诸二府徒使天下指臣为贪荣冒宠之人未审陛下将何所用之

赵抃悔不罢青苗法先是上欲置光西府王安石曰光虽好为异论然其才岂能害政但则是为异论之人立赤帜也光朝夕所与切磋琢磨者乃刘攽刘恕苏辙之徒而已方光之力辞也韩琦在魏急走书文彦博请勉之云主上倚重厚之庶几行道道不行然后去之可也彦博以琦书示光光正色曰古今为此名利所诱亏丧名节者不少矣于是彦博复琦书曰君实作事今人所不可及直当求之古人中也乙未条例司奏尊疏驳韩琦所言皆王安石自为之既而琦又言蒙制置司以臣所言皆为不当臣详观疏驳事件多删去臣元奏切直之语曲为沮难欲望亲览后付中书密院看详及送御史台集百官议如臣言不当甘从窜殛若制置司处置乖方天下必受其弊即乞依臣奏施行上阅琦奏请周礼丧记无过三月等语安石驳此乃赍贷官物非称贷也范镇言自古以来未有天子开货场者王安石曰镇所言陛下若非略见周礼有此则岂得不为愧耻丙申右正言孙觉言切见制置三司条例司画一文字颁行天下晓谕官吏凡有七至于论敛散出入之弊将来陷失人所能知者皆置不论于援引经义以附会先王之法与防微杜渐将以召怨贾祸者臣得极陈之其条有三右正言李常言王安石以文学名世行义得君乃不本仁以出号令考义以理财赋而乃佐陛下为此病民敛怨之术陈升之曾公亮赵抃皆位冠百僚身专大政鼠首厥议曾无执守臣于安石虽有旧故之义苟怀私而不言谁复为朝廷言者中丞吕公着今检会臣累奏早赐施行张戡言天下之论难掩在公在于圣明动必循理无适无莫义之与比昔建议谓使而试行之今已知有害而反罢之是顺天下之心成天下之务也昔非今是何惮改为监察御史里行程颢言明者见于未形智者防于未乱况今日事理显白易知若不因几亟决持之愈坚必貽后悔悔而后改为害已多近日条例司疏驳大臣之奏举劾不奉行之官益沮公议先失众心议其重轻未见其可于是进呈孙觉疏王安石谓觉所言无理读不及终而止上曰人言何至如此安石曰自大臣至台谏皆有异则人言纷纷如此何足怪上曰均输事何以无人言安石曰岂少常平事大臣固不悦但陛下初即位以为善政不敢异论陈升之曰岂可使上下访问羣臣此皆提举官所在张大妄作故致人言耳上又语及程颢疏安石曰颢至中书臣之略谕以方镇沮毁朝廷法令朝廷申明使知法意不得谓之疏驳大臣章奏颢乃言大臣论列事当包含此为害理若不申明法意更不明于天下如此则异议何由恬息上因论及台谏官言不可失人心安石曰所谓得人心者以有义理义理者乃人心之所悦上又论安石令稍修改常平法以合众心安石曰陛下方以道胜流俗与权无异今稍自却即



坐为流俗所胜矣三月上遣刘有方谕旨依旧供职是日光又对于崇政殿因再拜谢上曰卿何为抗命不受光曰臣自知无力于朝廷故不敢受抗命之罪犹小尸禄之罪尤大故也上曰今士大夫汹汹皆是为此言卿为侍从闻之不亨不言于朕耳上曰卿见元勅否光曰不见上曰元勅不令抑勒光曰勅虽不令抑勒而所遣使者皆风令抑勒如开封府界十七县惟陈留姜潜张勅榜县门及四门听民自来请则给之率无一人来请以此观之十六县恐皆不免于抑勒也国子监直讲王汝翼辞条例司检详文字范镇罢知通进银台司初镇言韩琦奏中书自当施行不须下条例司及不当令李常分析封还诏书圣旨谕镇行下数四犹不肯会司马光辞枢密副使上许之镇又封还诏书口下令再送镇行下镇又封还曰陛下自除光为枢密副使士大夫交口相贺称为得人今一旦追还诰勅非惟诏命反复实恐沮光谏论忠计上不许以诏书直付光不复由银台司行下镇言由臣不才一二小臣实与大计用贱凌贵以邪妨正者乎兴利之风日进尚德之风浸衰尤非朝廷之福臣奉职不肖论议无补望允前奏早赐降责故罢右正言秘阁校理李常落职为大常博士通判滑州常言散常平钱流毒四海州县有钱未偿而徒使民入息者上令具州县官吏姓名至五六终不肯具而求罢职故绌上批监察御史里行张戡侵侮柄臣诬罔事实王子韶外要守正之名内怀朋奸之实所入章奏与面奏事前后反复不一并落职知县戡屡言青苗不便最后上疏曰近乞罢制置司及诸路使者并言散青苗取利为害及王安石处事乘谬专为聚敛好胜遂非很愎日甚吕惠卿险薄奸凶尚留君侧而曾公亮陈升之赵抃等心知其非优柔不断观望有避颠危莫扶戡既上疏又诣中书力争词气甚厉公亮俛首不答安石以扇掩面而笑戡怒曰叅政笑戡戡笑叅政之所为岂但戡笑天下谁不笑者陈升之解曰察院不须如此戡顾曰只相公得为无过耶退即家居待罪故遂与子韶同绌侍御史知杂事陈襄同修起居注罢知杂事襄累奏乞罢青苗法既而有旨召襄试制诰于中书襄以言辞不就试乞补外王安石请用于集贤殿修撰陝西转运使命下上批别进呈而改是命

程颢金书镇宁军节度判官颢既罢御史恳辞京西故也颢与王安石厚善条例司奏遣入使颢在遣中一日与王安石语安石之子雱言曰梟韩琦富弼之头于市则新法行矣颢正色曰方与叅政论国事子弟何与颢自此与安石不合及诏举中丞吕公着以颢应诏安石尚喜颢助己而天下益苦新法乞罢青苗钱去提举官安石大失望颢亦以言不听请罢上曰人言何以纷纷如此安石曰此辈小人若附吕公着行其志则天下之利皆归之故纷纷不止也五月新除宣徽使判大名府欧阳修观文学士知蔡州先是修自歷官至两府凡有建明词旨坚确故安石言其可任大事及安石辅政多所更张同列无合者修时判青州安石曰上进之使判太原意在引之执政以同新天下之法修固辞方上章论青苗非是济阙直放债取利中书言修擅上散诏特不问罪修即表谢语益侵安石言有曰特多喜于新奇则独思守拙众方兴于功利则苟欲循常至于军旅之间机宜之务则又非所学素不经心盖以病悴之衰躯持昏耄乖违之见任素非所学之事

一有败阙虽戮臣身不足塞责又言所宜必辞者三所难安者一安石见之不悦奏从其请遂有是命司马光言修表中戒小人之遂非效君子之改过二语手书知之其意有在矣范镇乞致仕胡宗愈通判真州二月知永兴军司马光知许州光在永兴宣抚司请增修城壁虽内郡不被边亦增修如边郡光奏罢之又请添军马于长安河中汾州光言岁凶民艰食惧无以供亿乞罢添屯不许光之言不用遂乞判西京留守司御史台不报又上章曰臣之不才最出羣臣之下先见不如吕诲公直不如范纯仁程颢敢言不如苏轼孔文仲勇决不如范镇伏望陛下圣恩裁处其罪若臣罪与范镇同即乞依范镇例致仕若罪重于镇或窜或诛所不敢逃诏光移知许州令过阙上殿或曰陛下不能用光言必不来上曰未论用其言与否如光者常在左右人主自可无过矣光乞辞许固请留台久之乃从其请光自是遂绝口不复论新法

先是富弼判亳州方行青苗息钱法弼以为此法行则财聚于上民散于下且富民不愿请者俱贫民后不复得故持之不行而提举常平仓赵济劾弼以大臣格新法法术当自贵近始若置不问无以令天下章下本州岛诏狱邓綰又劾之连逮甚众未决会除刘摯监察御史里行摯语家人曰趣装无为安居计即上疏论亳州狱起不正疏奏上欣然开纳至是狱具通判唐誾签判萧傅及徐公衮石夷庚永成等七县令佐合十六人各冲替而弼亦责四年五月提举崇福宫吕诲致仕诲言臣本无宿疾偶值医者用术乖方殊不知脉候有虚实阴阳有逆顺讼察有标本治疗有先后妄投汤剂率情任意差之指下祸延四支漫成风痺遂艰行步非祇悼■〈足炎〉盭之苦又将虞心腹之变势已及此为之奈何虽然一身之危固未足恤其如九族之托良以为忧是思逃禄以偷生不俟引年而还政盖以身疾谕朝廷也诲病亟手书属司马光为墓铭光往省之则目且瞑光呼曰更有以见属乎诲张目强视曰天下事尚可为君实勉之遂卒六月刘摯言臣切以为今天下有二人之论有安常习故乐于无事之论有变古更法喜于敢为之论二论各立一彼一此时以此为进退则人以此为去就臣尝求二者之意盖皆有所是亦皆有所非乐无事者以为守祖宗成法独可以因其所据旧而补其偏以至于治此其所得也至昧则苟简怠惰便思胶习而不知变通之权此其所失也喜有为者以为法之道窘不大变化则不足以通物而成务此其所以是也至凿者则作为聪明弃理任智轻肆独用强民以从事此其所非也二势如此事无归趋臣谓此风不可浸长东汉党锢有唐朋党之事盖始于此后摯尝面对上问识王安石耶安石称卿器识摯曰臣东北人少孤力学不识安石

甲戌富弼判汝州弼先许给假就西京养疾于是弼辞汝州乞依先奏上不许弼自赴汝州仍以老病昏塞凡新法文字乞免签书止令通判以下施行夏四月端明殿学士兼翰林侍读学士判西京留守司御史台司马光疏曰臣伏读诏书喜极以泣昔成汤六事自责今陛下以四事求谏圣人所为异世同符皆诏书所言即日之深患陛下既已知之羣臣夫复何云方今朝廷阙政其大者有六而已一曰广散青苗钱使民负债日重而

县官无所得二曰免上户之役敛下户之钱以养浮浪之人三曰置市易司与细民争利而实耗散官物四曰中国未知而侵扰边隅得少失多五曰团结保甲教习凶器以疲困农民六曰信狂狡之人妄兴功利劳民费财若其它琐琐米盐之事皆不足以为陛下道也舍其大而言其细舍其急而言其缓外有献替之迹内怀附会之心是奸邪之尤者臣不敢为也知青州滕甫上疏言新法害民者陛下既已知之矣但一下手诏应熙宁二年以来新法有不便者悉罢则民气和而天意解矣上尝与二王击球戏赌王带顛曰若臣胜不用王带只乞罢青苗市易上不悦八年十月富弼言臣近日忽闻时宣大赦出于非常又闻别降手诏许中外臣僚直言朝廷之阙失满城氓庶欢呼鼓舞喧于道路声彻幽远推是而往则天下之人无不慰悦矣臣再详手诏乃陛下亲笔非学士所作至累年灾异如山摧地震旱荒之类前后包括一一归咎于己词旨哀痛深切明白忠义之士读之莫不感泣故星变不旋踵而灭去臣愿陛下尽取臣奏不遗孤贱万几之暇一一亲阅择其众说所合者断在不惑立赐施行践虚心以改之词应天文尤大之变使泽及普率急若置邮则人心悦服天道助顺天人相应立致太平岂复有灾眚出见而上骇圣虑哉张方平新法行已六年事之利害非一二可数为天地心天地之变人心实为之故和气不应灾异荐作故其事必有未叶于民者矣法既未叶事虽必改若又惮改人将不堪此臣所以为陛下痛心疾首一夕而九兴也况今习俗奔竞偷敝成风交党相倾利害相轧攻讦起于庙堂辨讼兴于台阁非所以昭圣化也毁誉私于好恶赏罚偏于爱憎非所以正王度也士大夫习尚如此有为国家伏节死义临艰虞而不易其操者欤人各有心激之则发吉人之辞寡君子讷于言外若不足其中诚也利口捷给外若有余其中伪也惟贤鉴精察之故能广视听于扶同之外究得失于几微之先揽其权纲执其柄罇夫事有失于前者不可不悔患有在于后者不可不惧如救焚溺势不可缓缓则无及于救矣上皆优容之吕公着言陛下自即位以来早朝晏罢励精庶务其规模盖宏远矣然临朝愿治为日已久在廷之士益乖刺而不和中立敢言者罹谗而放逐阿谀附势者引类而升进郡县烦扰民不安生上下相蒙左右前后莫敢正言夫事之邪正贤不肖盖素定也今则不然前日举之以为天下之至贤后日逐之以为天下之极恶前后纷纷玩黷圣德者盖不一矣其于人才既反复而不常则于政事亦乖戾而不审断可知也陛下独不察乎况于一二人者方其未进用之前天下固已知其奸邪小人也但取其一时附会故极力推进此所以累陛下则哲之明也臣今所言亦非谓今日法令皆不可行也陛下诚能开广聪明延纳正直公听并观尽天下之议事之善者固当存其未善者则镌损之苟为非便不为已行而惮改言有可取不以异议而见废如此则不劳陛下神明不惊众人耳目而庶政自理百姓安然后可以足兵食御外侮矣

太平治迹统类卷十四

●钦定四库全书

太平治迹统类卷十五



（宋）彭百川 撰

神宗经制西夏

赵元昊死谅祚立十九年其年秋率众三万来酬熟户赵明围大顺城官兵与赵明击之谅祚中流矢败走朝廷命西京左藏库副使何次公赉诏问以入寇之故且用鄜延经略使陆洸言令塞下止冬衣服银绢使者谅祚闻绝其赐予气大沮会上即位谅祚即驰表谢罪上赦其罪答以优诏且遣供备库使高遵裕押大行皇帝遗留物赐之谅祚亦遣使进助山陵于是上批去岁降诏问罪夏国而界首作裨量使臣往来折难最为辛勤事既宁息以其名闻于是延州西路都巡检杨定进一官仍擢为阁门通事舍人权知保安军枢密察乃言夏国既进表谢罪词理恭顺乞诏沿边城寨守疆场无得生事诏从之居两月种諤复掩纳威明山取绥州四方兵衅复始于此名山本熟户九岁为元昊所据长为银夏绥三州监军其帐在绥州之侧领小使二十余人牙头吏史屈子者狡猾为众贷谅祚息钱累岁不能偿时大饥谅祚数黠兵民疲敝苦之屈子乃说诸小帅密谋内附又名山之弟夷山前已先降为熟户諤因夷山以诱名山之弟前已先降以来名山俱不知也諤即奏言谅祚累月用兵人情离贰尝欲登横山族帐尽过兴州人有怀土重迁之意矣故首领威明山者结绥银州人数万共谋归顺乞因天时人心许令化上诏转运使薛向诣阙询之诏陆洸召諤赴司审议并使向还会议于延州洸曰数万之众舍地来降情伪未可知且欲安所置之召諤问状遂与薛向同议奏曰威明山兵力诚能据横山而効顺于我因以刺史世封之使自为保障则中国之利若名山不能出此弃其地而徙之众来无实利加我而使我轻绝夏人以启边隙非计也上复召本路掌机宜张穆之问甚详穆之言事可必成可移洸知秦州诏令以观未行而諤所遣熟户韩轻持蜡书往与屈子期者已归报諤即夜发兵驰赴绥州折断世来会直抵名山帐名山大惊援鎗欲斗夷山呼之曰兄已约降何为如是其姊识其声曰汝为谁曰夷山也姊曰何以为验夷山示之手无一指姊曰是也名山曰我何尝纳降夷山曰兄已受种使金盃名山曰金盃何在文喜方以金盃进屈子且胁之曰宋兵十万至矣名山投鎗大笑不得已乃降諤遂据绥州洸大骇劾諤擅兴洸等代去至鄜州复有诏止洸同计边事洸驰入见面陈利害请以玺书慰谕夏国弃还绥州正种諤之罪当是时文彦博为枢密使亦以为谅祚称臣奉贡今袭取其地无名请归之会韩琦初罢相判相州上乃勅琦永兴军陝西四路经略使度其可受可却以闻琦至陝言可受彦博以朝旨诘之曰若受之则当馈之以粮戍之以兵有急当救之此二者俱有备乎琦对不必馈戍及救彼自以当谅祚即移书鄜延令无给粮追还戍兵若谅祚攻威明山勿救也知延州郭逵以为不可琦使经略使干官刘航往督之逵固执不从曰如此则降户无以自存俱溃去矣乃奏诣绥州筑城置兵戍之转运使所费凡六百万缗杨定者左右卖国尝受谅祚金银甚厚为沿边都巡检私出塞见谅祚表其子仲通尝往来谅祚所朝廷初未知也及諤据绥州谅祚已定费已故因议推杨诱杀之并执仲通以去上谓彦博曰杨定为夏人所杀于朝廷之体如何彦博对曰此谅

祚犯顺曲在彼置令延州移牒诘问如朝贡不入即严设边备絶和市以困之然未可深讨也邵亢以天下才殫力屈未可用兵宜谕以边臣无生事因抚存其人民若不从命然后兵出益有名条其事上手诏报亢曰比览来奏允符朕意盖中国民力乃是大事兵兴之后不无科率人心一摇安危所系朕以渺微承五圣大器日惧不克永惟受托寄之重故前者咨询公欲求良画且赫然大国制临天下边境负恩皆为常事今则自我轻动先违信又引兵深入夺其城邑若为契丹计者则曰夏国未失藩臣之礼而南朝遽收复其地则我燕幽之境孰谓大朝无意取之哉以此言之二寇之心不期自合也朕又所系忧者也其时谩既以擅兴被劾者率多罪谩惟是张穆之谩为有奇功朝廷察穆之言过实意穆之与薛向表里成谩之事以误边计乃罢穆之令永兴听旨又罢向责知绛州而庆州懷安镇都监任懷正环州定边寨巡检李容初不禀经略司节度止憑薛向牒即会兵纳降法当斩以该德音薄责之夺懷正一官容两官并免勒停种释罪赠杨定宫苑使禄其三子仲容仲爽仲襄既而谅祚以中国岁饥战又数败乃复以铁琅玕錡杀杨定者伪六宅使李崇贵右侍禁韩道喜将以献而谅祚死秉常嗣立议遣告哀使以杨定之死莫肯为使者薛宗道有罪强之来宗道甚惧及境朝廷遣刘航问其所以为使之意宗道曰告哀尔无他也京师至乃命新陝西使韩缜就都亭西驿告宗道贼杨定等事宗道李崇贵韩道喜三人已禁錮俟朝旨至即拘送及陈秉常与其母悔过惟命是听之意于是议定复欲乘此获塞门安远之地邵亢以为幸人之丧不可请以绥州易之亢之请与彦博之请合诏缜与宗道议缜与宗道朝廷欲以绥州还夏国宗道喜曰如此则感朝廷之大恩因令缜语宗道还我安远塞门二寨宗道曰苟能绥请献安远塞门寨基缜曰其田上何如宗道曰安有遗人之衣而留领袂乎缜信之入奏上令复喻立恐嗣主幼未能戢蕃部他日或来犯边今为夏国画长策度彼亲实保事酋领亦必三五人欲尽自朝廷除官仍割岁赐五万数充俸给所贵助国同心効顺弹制蕃部仍候李崇贵等至方可行吊慰之礼乃赐秉常诏曰惟尔先父保有西陲忽览讣音良深軫念眷言荼毒情何可任勉励孝忠用副存抚迨诸亲信之列亦同慰谕之怀令薛宗道等宣谕未几宗道奉表入贡且繫送李崇贵韩道喜与仲通俱至答前所宣谕则云不知于是独留崇贵等而却回宗道表并其物崇贵至京师乃发杨定私见谅祚受金等事推问仲通与崇贵所言俱符诏夺杨定私见谅祚受金等事推问仲通与崇贵所言仲雍仲爽仲襄并勒停淮南编管崇贵免决止刺面配洪州道喜编管庐州而已既而宗道复来缜因责宗道曰君在西驿时尝以二寨诺我今更易言何也宗道由是获罪不复来御史中丞吕海上奏曰臣窃以收复绥州将及一年始闻朝廷议还其城归罪种谩讲寻旧好用安边患中外之人皆以为是今又闻留绥州以固横山之地及东与西人商量以绥易安远塞门等处彼既不纳和解无成是必主议者不一有所反复重失远人之心为时生事必矣臣闻昔刘平曾献取洪宥之策种世衡有复横山之意而后保安军宋迪言招横山之民知延州程戡欲纳轻赋之地当时执政深言其说迪因得职司任使勘时昏老安能为之所以言者知不可行而

有所安也果中奸谋寻以节钺宠之勘因保荐扬传此策皆出于传也以至薛向献攻取二策曰先举曰浅攻先举者乘凉祚黑闇意在掩其不备浅攻者止遣上丁入贼界平荡河南近种諤在青间城乃招诱威明山等众因其荒歉乘彼虚乏攘取绥州及是先举浅攻之策也献言者但喜功名而邀禄利不思困边疆而成后患朝廷一时信纳亦未思真皇李至叶灵夏之议当时岂不能坚守盖重惜生民之命借如曰众人谋尽复山外壤土因降人以居其地立酋豪以领其族不免增大军马以为外托飞挽刍粟以供军饷犖致金帛歲备赏赉必无一毫一杪入于公上损不资之费而事不给之用诚可惜也如邻府困乏一路利害可知矣今传闻薛宗道不复至刘航亦不遣前议既罢边患已成数路时有贼马边奏甚急调食寝广羽书交至使车旁午人心怖骇罔知涯涘臣所痛惜者凉祚前有缺礼圣君蒙覆未尝问罪及其无事种諤幸彼有灾因之伐丧不仁之甚曲皆在我典型未正何以示天下今乘绥州去留望朝廷早为定断谋臣料敌必无遗算然所识有远近持说有异同揣摩迎合之论不可不察也毋俾玩寇以失机会乃臣区区之见也又奏曰臣窃闻以绥州易安遠塞门谋之未就献议者谓绥城势不可弃弃之则示弱无以壮国威果如是臣计料之边人献议遂臣种諤之事且以孤城之内全籍官军戍守新附之民宁免糒粮供给经路安冲当更增添堡寨转饷之费力役之劳自是无复窘是见其害而未见其利也自起无名得此空迭彼国之民怨深骨髓方值凶歉未能举事人壮马肥必思报怨我兵百战百胜未足掩前举之失兵势小衄人心若何臣恐绥城未及而他城已有可虞也臣尝观边民谈说日寻干戈乃其幸也所以知献此议者必边人矣为天下谋者不专事一面与小戎开一朝廷之间隙絕三纪之信誓他有强敌劝我举动疑心一启何以支吾必不惜生灵之命竭天下之力收复灵夏何施不可顾事体轻重宜审措置惟析圣虑与大臣熟议其当否无貽后悔已而夏王复遣都啰重进言来曰主上以孝治天下而更教夏国以臣叛君何哉朝廷乃命更不分赐物但还二寨重进凡三返议不合更遣旺明鄂特以誓书来言谨奉诏以二易绥州乃诏秉常俟誓表来上乃以誓诏赐之又诏边臣毋辄生事继遂册之为夏国王秉常既受册郭逵乃遣其掌机宜文字赵高交二寨定地界羌言朝廷原所欲者二寨尔地界非本约也上曰若不得地但得此二墟安用之诏高赴阙既到因言绥州与之亦用兵边备未可弛也前此王安石亦为上言佞可知边事者以为绥州城据险可惜至是不复以绥州易二寨遂改绥州为绥德城其后秉常又遣使来请如旧约许不许明年秋秉常乃举兵三十万大寇环庆

韩绛宣抚陝西

熙宁二年工部郎中李复主知庆州专杀喜功闹讹之役贼兵十万复圭合蕃汉兵才三千遣李信刘甫种咏分将之按以阵图约日接战信等如教未至贼营贼兵大至与战多所妄失退守荔原堡复圭急收所付阵图劾信等违节制种咏瘐死李信刘甫俱剑斩之人以为冤而朝廷未之知也王安石言于上复圭斩信等甚当上曰文彦博冯京俱以为不然已而复圭益出兵夜趋和市俘掳其老弱数百论功告捷又发兵夜袭金汤



杀其老弱亦数百人西人大仇愤三年八月戊午上批泾原等路谍报西人黠集国人七十以下十五以上将入寇安石曰人岂无邻敌如何十五以上七十以下尽来而不忧邻敌窃其国乎若果尔则是西人无谋亦不足畏苻坚举国南戍为东晋所败东晋非能败苻坚驱率举国之人既不乐行则自溃而败也以臣料之或西人张虚声使我边塞聚兵费粮草则陕西困则无以待西贼而使我受其实弊也是月辛巳夏人果倾国大入攻围大顺城柔远寨荔原堡淮安镇东谷寨乐业镇兵多者号二十万少者二万围或六七日一二日与官军日夜接战高敏战榆林郭庆魏庆宗等战乐业俱死之于是朝廷议遣重臣为宣抚使韩绛时为叅知政事请行安石曰绛于边事未尝更歷臣宜往绛曰不可朝廷方赖安石安石曰乃韩绛尔安石又言西战不足惮以顺讨逆以众攻寡以小敌大以陛下明圣当十岁孤儿胜负之形已决矣上曰绛与安石宜无适莫其为朝廷所赖一也卒不许安石而遣绛于是知杂御史谢景温奏曰西羌扰边环尘城堡皆被其害缘复圭邀功生事致一路之人空受涂炭窃闻复圭自统兵以来数行剽掠偏师二十余出遂使夏人怨愤举国内侵士卒死伤边民流离皆复圭所致昨诏鞫于河中府既又闻贷其罪如此即朝廷之法不行边臣得以自恣为生民害非细事也夫王者之师信义为本向使复圭虽有克捷之功而不信义犹不足取况轻敌损威伤财害民如此之甚乎乞下宣抚使韩绛体量致寇之因考核伤夷之数重行黜责以惊边藩乃谪复圭为保静军节度副使十二月丁卯拜韩绛为特换金紫光禄大夫依前行尚书吏部侍郎同中书门下平章事昭文馆大学士初绛之行也文彦博恐绛无功并任其责奏请为画一以附绛而略无发兵约束安石亦请不预边事而讨西方略一以委绛

绛至则选蕃兵为七军以种古任怀政周永清种谔向宝景思立种谊分领之绛驻延州命种谔尽节制诸将兵城罗元燕达城抚宁吕公弼城荒堆于是贼众十万围抚宁三匝折继世拥重兵驻浮圖莫敢纵兵种谔将召燕达战悸不能下笔顾运判李南公流涕不已遂追继世兵还方议战守而抚宁城已陷将士千人俱歿人阅秦惘然曰近遣至啰兀以来见所筑殊不坚但一土墙围尔固已忧之今果亡千人边城举动后宜深戒荒惟寻亦罢弃贼又急攻啰兀绛命诸路出师制众州兵再出遂作乱上深以用兵为忧文彦博曰朝廷施为务合人心以静众为先凡事当兼众论不宜有所偏听陛下即位以来励精求治而人情未安盖更张之过也上曰三代圣王之法固已有弊国家承平百年安得不小有更张王安石曰朝廷但求害民者去之有何不可若百事隳頽如西晋之风兹益乱也呉充曰朝廷举事每欲便民而州县奉行之吏多不能体陛下之意或成劳扰至于救弊亦以渐上颔之彦博又曰行交子不便上曰行交子诚非不得已若素有财用则自不须如此彦博又言祖宗法制具在但有废坠不举之处不须更张以失人心上曰更张法制于士大夫诚自不悦然于百姓何所不便彦博曰与士大夫治天下非与百姓治天下也上曰士大夫岂尽以更张为非亦自有以为当更张者安石曰法制具在财用宜不乏中国宜强今皆不然即未可谓之法制具在也彦博曰此行要人推行尔安石曰如

赵子凡在府界案一王愷近臣乃以为刻薄小人不当獎用上下相扇为苟且不欲奉公类多如此则谁肯推行法制者已而上问执政以啰兀存弃安石曰不须筑堡则存而守之无害上曰如欲守固当筑堡则致寇今抚宁新陷士气阻却乃于边界中作堡又必致寇以沮怯之众当力争之寇则其生变必矣上曰如此当不复计惜已费财用弃之而已然见兵三千人在彼为可虑积粮草多为可惜遂诏弃啰兀又出内德音曰朕德不明听任失当外勤师旅内耗黎元秦晋之郊并罹困扰使人至此咎在朕躬其推恤隱之恩以昭悔过之义应陝西河东路罪人除却谋改斗已杀人至十恶不赦外余死罪下减一等徒已下释之两路禁军并与持支民间因军事科从者其议量重轻蠲减将来租税亡歿军士义勇强壮蕃部等委经略安抚司速具奏闻当行优恤命官及诸军校将蕃官弓箭手人员当优与追赠子孙无骨肉在本处者给官敛送归其家其不可辨识者墓祭之两路文武官应副军期有劳者保奏以闻两路进士礼部下三举御试两举并与免解于乎劳民致怨非朝廷之本谋克己施仁冀方隅之少息更赖黎献共图隳功安石等上表待罪上释之绛亦上章略云臣近乞面奏边事欲禀议攻守大计伏覩德音责躬悔过已谓听任失当则臣虽复言必不见用臣见于缘路待罪望早赐黜责臣一身去就了不足惜所惜边防大事陛下如此主张臣竭赤诚而为报国浮议所摇猝然挠罢不得毕其始谋自今孰敢奋身当责以抗敌其偷安窃食之人坐视臣辈被谤蒙耻进退无路自必以为得计也奏至已贬罢坐依前吏部侍郎知邓州兼西南路安抚使上议责种谔与复圭同罪安石曰复圭罪薄西事之兴自绥德始亦谔之罪也况误韩绛而败壞两路谔为罪首乃责谔授汝州团练副使潭州安置月余再责贺州别驾其后李复圭稍进用乃求赏向时麾下偏裨御史盛陶劾复圭临边轻敌败事其大略曰贼兵已围大顺诸垒方追集邠宁等兵处置乖方故陷郭庆魏庆宗于乐业陷高敏于榆林庆州属羌荡灭无几正兵义勇死伤不可胜数寘之典法万死犹轻朝廷全其首领止令安置议者至今惜之陛下寬赦听还近职使复圭稍知廉耻当俯伏引咎以谢覃恩乃敢具奏乞赏打劫蕃复向时麾下偏裨文过饰非侥幸万一岂典刑独行于李信刘甫而废于复圭乎乞置之于散地以叶公议上语陶曰卿知李信刘甫所受剑否复圭当受陶曰陛下前日不诛复圭今日思之不能无悔复圭在朝又将谋帅臣恐陛下后日之悔有甚于今上曰向者止是不知今朕已尽知之自有处分乃诏永兴军路提点刑狱周良孺根究以闻复圭遂罢判流内院铨仍令良孺兴知庆州楚建中同根究后良孺建中以复圭节制陈图来上上乃黜复圭知曹州复圭将行对上有怨怼语曰二十年前已之曹州今日羞见其妻子乃羞见曹州吏民乎复圭无以对复圭既到任以谢表上复盛言已无罪放斥复盛陶所劾罚铜千觔云

### 种谔建议大举

元丰四年四月权郟延路马步军副都总管第一将谔奏近课报西夏国母屡劝秉常不行汉礼秉常不从有梁相公者与其叔父亦相继劝之既而秉常为李将军所激怒

欲谋杀叔母与梁相公其言颇露二人共谋作燕令召秉常饮常醉起于后园被害妻子及从者近百人即继遭屠戮臣窃谓西夏贼杀君长此上下叛亡之变诚天亡之时也正宜来此之时大兴王师以问其罪仍愿陛下假臣郾延九将汉蕃人马之外量益正兵选陛下亲信中贵人为监兵同行文武将佐许臣自辟置之裹数十日之粮甲以趋乘其君长未定仓卒之间大兵直捣兴灵覆其巢穴则河南河北可以传檄而定谔又上言臣非于今月庚申奏夏国秉常为贼臣所杀乞朝廷兴师问罪今既知秉常兵马见聚于所居木寨国母及梁相公于国母巢穴自木寨至国母巢穴约五里今已绝河梁南北人马不通梁相公者已出银牌点集未知从与不从臣奏乞乘其君长未定国人离乱之际兴王师招讨且兵尚神达机不可后况西人叛乱邻国孰不动心契丹自数年来岁常三四以拜礼佛塔为名欲假道兴州而意在吞并其国西人平时已尝患之况今国内有乱若闻中国弃而不顾或备而迟留万一契丹乘此举兵吞并易于反掌矣若西夏果为契丹所并则异日必为大患于中国故今此事系朝廷为与不为决与不决尔所谓楚胜汉得之则胜汉今西夏疆场若归中国则契丹孤绝彼势既孤则为我所图矣兵法曰先发者制人后发者制于人愿陛下留神早运圣算此千载一时之会陛下成万世大勲祇在今日矣五月环庆路经略使俞允上言西戎跳梁已久自仁宗朝欲平荡之未得其策近者或曰李靖有言兵贵神速机不可失惟疾雷不及掩耳乃可成功臣料今之议者不断欲先招纳羌人此策若行其机必露使贼得为备贼若先动为害不细康定覆车今日可戒昔李靖破突厥止用锐兵三千盖谋当行之果所以胜也臣平时守边惟慕羊祜及其伐国志为李靖而已经营于此已三年矣元丰初蔡确既排吴充罢相王珪为充党欲并逐之珪畏确引为执政时王珪独相久上厌之珪不悟确机警觉上意有异一日密谓珪曰上于公厚薄何如珪曰无他确曰上久欲劾灵州患无任责者公能任责则相位可保也珪喜谢之适江东运判何琬有违法事上语珪欲遣官按治珪以告检正俞光光以告琬琬上章自辨上曰何琬事惟语卿琬何由知之珪以漏语退朝甚忧召俞光光问之光对以实珪曰与君俱得罪矣即上表贺曰臣遣昌祚进攻已得其城有诏先得灵州以节度使赏之遵裕怒昌祚先至即遣李临安鼎持檄檄昌祚曰已遣王永昌入城招降可勿杀昌祚叹曰城不足下脱朝廷谓我争功奈何遂按甲翌日还庆军次南州平距城三十里遇贼接战斩首千余级昌祚提选锋数千骑赴之未至而贼已退遂见遵裕坐昌祚帐外移时既见问城下如何昌祚曰比欲攻城以幕府在后前日摩多之战余众退东关若乘我师之锐先攻破之城必下遵裕曰吾夜以万人负橐积垒下迟明城可得怒未解檄昌祚以泾原师付姚辟郾不敢当遵裕禁昌裕毋得擅攻自以环庆兵攻之时军中悉无攻具亦无知其法者遵裕旋令采木造之俱细小朴拙不可用又欲以军法斩昌祚共解救之昌祚忧患成疾泾原军师咸愤怒转运判官范纯粹谓遵裕两军不协恐生他变力劝遵裕诣昌祚营问疾以和解之遵裕又使谕城上人曰何不急降城上人曰我未曾战何谓降也围至十八日不能下夏人决七级渠以灌我师水至斩炮为梁以济追骑至转战累日



至韦州为贼所乘一军俱溃灵州失利朝廷不闻问上忧之诏王中正曰环庆泾原之师见攻灵夏未破贼兵遶出大军之背扼绝粮道本路绝无援兵即今道路隔绝不可不虑令王中正将所部兵马除已过河更不追还于延州简不随种諤出界兵及河东兵共三万人以上速自环州洪德寨入至韦州以北如道路通快贼兵败走灵州已有可破之势即换在彼久役兵员回接转饷或粮馈阙即应援两路之师迤■〈迤里〉退归务在审量仍速报军前且诏遵裕曰环庆泾原大兵久顿灵州城下粮道艰阻如已收复灵州即分遣将兵开道路或猝未可破即同泾原兵从环州兵迤■〈迤里〉移寨并边别议措置回师之际务在部分严整其左右贼马须痛杀戮已令王中正部领大军接更在审度机便施行又诏沈括曰闻贼会十二监军司兵卒于灵武内外拒捍官军缘庆渭之师暴露日久士饥力疲须得外来王兵为助逐救掇贼马通活粮道未论攻城利害且全两路之师整阵南归已为上计今种諤以回军并寨分诸路于保安军及营下城寨歇泊朝廷已事遣使人厚赐犒赉必可鼓奋士气旋便思用宜速谕种諤来德靖驻扎潜移诸将并付西路休息饱给饭食候使人至犒赐讫接续举军西去环州洪德路应援两道大军并力杀逐见屯贼马兵未会而转运司奏曰泾原环度两路进兵攻灵州不下两值大风夜寒冻死及杀伤士卒不少灵州绕城旧有黄河分水大渠三重及沟洫纵横贯注所水溉田约二千里前大军经过渠皆干涸自庚子贼决河水渠渐盈溢寨地卑下势将奔浸高遵裕已于辛丑领大军离城下即有贼马出没邀截至午过一渠人马涉水至酉再过大渠虽有小桥人马壅并亦须涉水其后泾原兵遇夜止在渠北与中军隔渠下寨壬寅贼追及后军接战两渠间水浸及寒冻人马颇有死者申时至南州下营遵裕以泾原搬运粮草金帛至南州为贼兵抄掠几尽环庆再遣夫粮及境亦以道路艰难馈运不接见领军全通道应接粮草遵裕亦奏曰臣领大军径趋灵会合两路兵自丁亥并力攻击缘灵州城广阔守御备具近城贼兵数万不少日久与诸将分头竭力且攻且战虽屡获首领然坚城未下庚子贼决黄河水浸营难以驻留两路转运司无计置一月粮草令大兵出界一月以上羌人于清远军韦州鸣砂川烽火平以来出兵邀击粮草驿递不通彭逊兵护泾原折运粮草为贼抄掠诸军乏食士有饥色今若不统领大兵先讨除抄掠之寇使道通通快然后攻取即恐官军坐致疲敝加以冬寒日甚别致生事臣与两路总管将副等议定兵通路迎接粮草已而遵裕请入朝别议攻讨诏不许将将漕者亦力言遵谕不可复任边寄其奏曰伏闻朝廷诏遵裕领环庆泾原两路兵退归并边别议措置今见遵裕志虑昏浅动失事机喜怒轻肆赏罚谬滥有功将佐多遭摧沮士心不服昨深入贼境全不肯痛行讨荡仍节制将士遇贼接战限定步数不许追击有过所限遂遭廷夺欲行军法缘西贼战斗兵势稍力必即退遁既不肯乘势追击于理无复大捷以致贼势猖獗了无成功今若再委遵裕别议措置恐终未能上副朝廷责望之意又奏大兵攻灵州半月顿经寒冻自离灵州日有贼兵追袭为贼杀伤十过二三士卒乃敢攘夺公私之物至剥取军员衣服生埋掩之自去巾帟辫髮诈为蕃兵追夺财物军储什物弃毁满野多烧

兜鍪以造饭枪杆弩椿箭筈排衙之类皆以充薪所持兵刃则以采柴木无不钝缺凡此皆属军政本司不当侵预不敢施行若密奏则缄默之罪恐难逃遁诏夺遵裕岷州团练使为西上合门使知坊州泾原路兵初出界正兵及番汉弓箭手共万一千六十人马五千七百八十三疋及入寨止万三千四十八人马三千一百九十五疋而已李宪领熙河兼秦凤建大将旗鼓节制诸军至西市新城遇贼破之驻女遮道袭逐斩获降龛博结嘉等二十二族收复兰州城之请建为帅府以李浩安抚知兼州事遣归顺首领巴凌格攻萨布宗城驻军未发诏宪诸路兵朝夕直趋兴灵荡平夏贼栋戩亦称欲往灵州破青乘此机会协力深入扑灭巢穴若兴灵道阻即过河取凉州毋得止遣偏裨以往又诏宪兰州驻军踰十日矣虽兴版筑委官可办不须留连大军今总两路番汉兵夫十余万入贼境百余里即止正犯画一约束宜部诸将乘时奋功勿蹈迟疑自贻悔咎继以粮运不办诏击漕臣马由等更命赵济胡宗哲供亿宪留浩守兰州总兵东上破贼于高州石硖进至屈吴山复破之下营打啰川城招纳酋豪郢城四降注家等族首领趋天都山焚南佐府库至满丁川击破统军威明山虏获甚众次葫芦河而南王中正将河东兵六万民夫荷粮者亦六万余人九月甲午发鄜州纔数里一日白草平即眷奏乞入边境晋屯九日不进遣士卒往来取刍粮于麟州十月乙卯始白草平引兵西行三十里至鸦州谷止丙辰西至四鹄峰以阴雾复留一日是日行不过四十余里丙寅度无定河而行地多湿人畜往往陷不得出晚至横山下神堆泽始遇谔两军相距数里谔先上言乞授王中正节制会谔出寨攻米脂斩首八千获马及牛羊橐驼器甲万万计令介讹遇以米脂降得番部万四千二十一人天子多其功许之明日诏书至谔不复见中正引兵先趋夏州时河东夫见鄜延夫言此去绥德城甚近两日中亡者二十余人河转运使又奏提举常平仓赵成主随军粮饷凡所须索不行文书但遣人口传指挥而已公岳等以口语无所凭从容白中正云太尉所指挥事多恐将命者有所忘误乞记之纸笔自后以片纸书之公岳等问中正军境应备几日粮中正以为鄜延受我节制前与鄜延军彼粮皆我有也乃书片纸云止可备半月粮公岳等恐中道乏绝阴更备一月粮及谔既得诏不受中正节制鄜延粮不可复得人马渐乏食乃遣官属引民夫千余人发番人所窖藏仅得千余石庚午夏至州番将索九思前已遇种谔而弃城遁去谔斩首捕掳千七百人降附六百五十至是中正驻军于城东士卒无所得俱愤悒思战诸将俱言于中正曰鄜延军先行所获甚多我军出境近二旬且食尽矣何以复命于天子请袭夏州聊可借口中正从之癸酉至宥州城中有民五百余家遂屠之斩首百余级者十余人获马牛百六十羊二千九百军于城东二日杀所得马牛羊以充食甲戌凡内将官张真知府折克行引兵二千余人发窖谷遇敌骑千余以战败之斩首九百余终丙子至牛心亭食尽丁丑至奈王井遇鄜延掌机宜景思义得其粮遂引兵趋保安军顺宁寨兵夫冻馁僵卧于道来众以刀剔其肉食之谔起夏州而石州监军司亦遁去收其兵籍案牒得窖粟饷军还次李家平三军食尽亦俱号泣溃去沈括以闻上路缘理出不得已须当急且招安卿可速具朝旨出榜

云闻战士止是不禁饥寒逃归其可随所在城寨权送纳器甲请给粮卿仍一面令城寨安抚司依榜受纳给十日粮听归所属节次具招抚数以闻十一月丙午诏曰据种諤奏已移军并塞兵马暴露日久宜令种諤部领还本路全养士气缮治器甲葺补衣装俟稍近春暖再出讨其本路士兵各归元札驻州军城寨蕃兵并汉蕃弓箭手等各归元住处开封府界京东西将兵分擘于近重有粮草军州屯泊其运粮夫皆散于种諤下将佐各随军宿泊又诏沈括曰本路行营之师自出境以来逢贼大小战斗未赏伤沮迄今保全南归并寨其士卒适当凝寒之际加之常抱饥馁其于勤劳忠荩可嘉甚矣若不稍遂休息以待将来之用则气力必须衰堕伤其壮勇之心况今边事未有期程缘边要地刍粟深宜乘时预有爱惜卿等疾速将诸将军马节次分屯其元系沿边者即量留防守其余移置求平已下州寨非紧急拟用去就食仍俟使人到犒设抚谕赉赐卿可责转运司官编排紬绢各六七万贯正已上准备喝赐兵乃罢归延州上令中正諤俱趋灵州兴州中正不习军事入边境望空而行无卿遵斥堠性畏怯所至逗遛恐虑知其营栅之处夜二更即令军中灭火后军饭且熟即行士卒食乏多病又禁军中有鸿臠三千食之无还者及食尽士卒愤然流言当先杀王昭宣及赵庄二运使乃溃归中正颇闻之乃于军中扬言必竭力前进死而后已而阴令走马承受奏转运使粮运不继故不能进军今且于正节制故粮乏上怒令械公岳等于隰州狱治其罪公岳等乃奏臣等在麟府本具四十日粮王中正令臣上备半月粮片纸为验臣等阴备八日糗粮今出塞二十余日不得不乏上乃命械之出外合疑中正恐公岳复有所言甚惧乃还朝过隰州谓公岳等曰二君勿忧保无他已而公岳等各降一官职事皆如故李稷主鄜延粮饷民夫亦苦于折运多散走稷不能禁遣吏斩三百余人又自新斩九十余人虽多杀戮卒以粮运乏绝諤兵遂溃杀当以乏军兴上论批鄜延路转运使李稷应副军粮乏阙乖方及累奏诞妄致行营士卒乏食逃溃若不差人代领其职付吏正治其罪则有误国事不细遂降两官为转运判官而御史王祖道论其罪恶曰稷督夫粮出界令依阵法务崇虚文不恤事实民夫固不知有伍行部令之法所辖官吏又非所部分乱离扰即肆杀戮不能禁止况夫队常去大军十余里间即遇贼兵不知何以捍御方大兵未行以十万坐食之夫顿于五龙川者十比及出界粮食已乏逃亡者半乃妄言寒苦所致以觐免乏军之罪顷出界往回未尝有大雨雪稷之欺罔明甚始稷具图来上部伍行列指掌可观及其推行紊乱一一不如所言议者以稷惟事作威不知恤众自安定堡折运至无定河一日斩数十人故众溃弃粮而去今稷虽夺官得全首领已幸岂可复领将戍任以按察诏下沈括体量以闻其后上语执政曰昨陝西相有帅期李稷奏运粮夫已备及帅行夫数甚不足盖稷所奏文具耳无其实也稷所言多欺罔几误朝廷大事稷吕惠卿所荐文物甚似惠卿可诛好大言无诚实外以刚直实极污邪稷之随諤军也威势甚盛一日早入军营军士鸣鼓声诺諤尚卧帐中未兴諤怪之出对稷呼鼓角将问曰军中几帅曰太尉耳曰帅未升帐輒为转运粮草官鸣鼓声诺何也借汝之头以代运使者叱出斩之稷仓皇引去怖甚不能上马自



此不敢入谔军及永乐城陷或言穆以虐酷乘乱为官军所杀云初河东发民夫十一万中正计粮数止六万余皆待命于保德既而朝旨令余夫运粮自鄜州出踵中正军凡四万余人遣晋州将军訾虎将兵八千护送之虎等奏兵少夫多不足护送乞益兵出塞及又不知中正所在会赵高领河东转运亦言中正不更事为谔所轻信妄举师出逾月略无功绪訾虎一军夫粮足备委之鄜州度其本谋必非持久既不敢直趋巢穴而乃旁请鄜州度其本谋乃以粮尽为解今李稷上奏窥测朝廷况随军役徒可使折运路昌衡在鄜延馈饷足以给之今徒役已散复集必难如期乃罢之至是天子诏曰昨朝廷大举本意直捣兴灵覆贼巢穴不为浅攻但取横山而已以地形观之自西路保安军顺宁寨趋兴灵至近昨种谔等出界自东路绥德城二十二日方至白盐池而归师八日已入塞门不委王中正种谔所议进兵何因舍直就迂会兵夏州虚占日月劳顿士马横费军粮不能成功仰具析以闻于是种谔降受文州刺史王中正降授嘉州团练使沈括授均州团练副使随州安置时大举伐西夏种谔帅师入银夏等州而不能有李宪仅得兰州逗挠不进高遵裕又自灵败还上知师老民困即下诏曰据前军走马承受言经略司差定溪蕃兵马前去银州防守事勘会本州岛虽名为州而城守之具百无一有既非可制贼死命之所又非为进攻巢穴之渐徒糜军马守之安用显是全不较计向去得失确的利害止欲成就闻托虚名况士卒又罹冻馁人心厌怠之际尤宜乘时休息以待将来成计大用可急移文种谔仰除有守具去处差人把守外余一切放归诸城寨就粮草去处渴泊且下诏谕民更不调夫

### 李宪再举取灵武

初李宪将师浅攻得兰州筑为帅府以镇洮为列郡诏宪据军前事力修治为骑兵之所并力修治骑兵以粮饷不继船筏未备为言及泾原环庆师老于灵州趋宪赴授又不能往既而诸路师溃而归兵罢上以宪兰州犹有功同知枢密院孙固奏曰兵法期而后至者斩况诸将皆赴而宪独不行虽得兰会罪不可赦不听但问擅还之由宪以馈饷不接为词上释不诛使图末效宪乃上奏曰昨诸路之师各以一道出界兵势既分贼已熟见虚实将来再举须合诸道兵攻其必救使之莫测若并兵一道则有数者之利如仍旧分路则利悉为害臣今之策须于泾原会合并攻自熙宁寨进置堡障直抵鸣沙城以为驻兵之地如此则灵州不攻自拔河外贼巢必可扑灭遂陈进五利云审度事机须图再举遂以目覩利害画为此策墨不能自陈乞许臣赴阙面受成算上得奏大喜由是决意再举时元丰四年也诏河东转运司自泾原环庆择便路取灵州西旁筑城堡约十五处置守具积粮草明年以李宪权泾原路经略使兼经制熙河节制秦凤路陕西诸路经略使兼经制熙河节制京东六千人京西三千人河北八千人河东五十人淮南六千人并令都水监刷黄汴河清及客军共万三千人隶之又招纳栋戡阿里库果庄及禹藏花麻等宪奏进兵出塞筑立堡障及制贼方略乞从中裁诏不许宪又言五路军马会合之地远近不齐不可一一择日虽拟七月辛丑中军起发为准乞下司天监详定宪又奏将

来随军粮食转运司经制胶柱须索浩大虽倾關中事力佐以北路金谷亦未易应办已自计置米五十万石干粮二千万斤自从本司运至出塞于是鄜延路总管曲珍出界至金汤遇贼焚荡族帐七百斩首千级珍又令遣将城葭芦寨至罗兀城相直背罔川全军夜惊而丰州屯驻神銳兵千余人修葭芦寨至府州百胜寨王安等百余人鼓众擅还时谍者言夏国母自三月初点集河内西梁府罗歷界甘肃瓜沙十人发九人欲诸路入寇三万余骑侵犯淮南镇而神木堡兵首领皆穿头选募血战之士上戒勅诸将且促进兵时已支司农新钱又盐钞各二百万缗内藏库银三十万两中书奏陝西边束未息欲广调军需上曰秦居關中止以一方士力尚能并一九州岛今天下之什倍于秦远取东南财赋以贍關中更得名将练兵则何为而不可顾未有其人耳因谓执政曰康定中西鄙用兵契丹乘间有要请

### 徐禧等筑永乐城

元丰五年夏五月鄜延路经略安抚沈括经略副使种谔等上言准朝旨条具制贼方略仍令画一具所乞城山界本路正当可为之时今具大意臣等歷观前世本路边徼与中国隔限者利害全在沙漠若彼率众度漠入寇则彼先困我度漠往攻则我先困然而西戎常能为边患者以漠南有山界之粟可食山界之民可使有山界之水草险固可守我师度漠以北则溃羸粮载野野次突漠力疲粮窘利于速战不幸坚城未拔大河未渡食尽而退必为所乘此势之必然也所以兴灵之民晏然高枕而我缘边城寨未尝解严者地利使然也至若能使漠南无粟可食无民可使无水草险固可守彼若羸粮疲师絕漠而南顿兵砂磧仰攻山界之坚城此自可以开關延敌以逸待劳去则追击惜力治约之势在我而委敌以空野坚城之大利又山界既归于我则所出之粟可以养精兵数万得边之牧地可以蕃息战马盐地可以来西方之商旅铁冶可以益兵器置钱监以省山南之漕运彼之所亡者如此我之所得者如此而又絕利市罢岁赐驱河南之民聚食于河外彼将何以自贍更使之赂契丹结栋戢乃所以坐困之也山界既城则下瞰灵武不过数程纵使坚守必有时而懈缘边修战备积军食明斥堠待其弛备发洮河之舟以塞大河下横山之卒捣其不意此一举可覆也兼梁氏与萌讹首为悖乱使一国之民肝脑涂地彼宁不猜怨独以兵威劫束势不得动耳急之则并力缓之则自相圖此曹操所以破袁尚也其当措置事候得朝旨别具条奏又言昨条具制贼方略非谓展托边面而已蓋欲穷因贼势窥其腹心须当尽据山界若占据山界则漠南更无点集之地彼若入寇须自漠北成军自来非大军不可如此当先择险要之地立坚城宿重兵以为家计今案视寨北古乌延正据山界北垠旧依山作垒可屯士马东望夏州且八十里西望宥州不过四十里下瞰平夏当要冲土地膏腴依山为城形势险固欲乞移宥州地平难守兼在沙磧土无所出先于华池油平筑堡以接兵势川路稍寬以通车运聚积粮草器具事事有备并力乌延先补山城全力筑平城此地膏美去盐地不遠其北即是牧地他日当为一都会镇压山界屏蔽鄜延其银夏州亦可置盐监铁冶钱监马收困险控扼候乌延

工毕渐次计置仍乞将塞门寨以北石堡背水油平罗韦盐地一带为中路隶宥州米脂浮图葭芦义合吴银州一带为东路隶绥德以金汤长城岭德靖顺宁寨一带为西路隶安军除本路九将外更增置四将以新招土兵分隶缘边八将驻扎边面次边三军置于金明青涧城盐州近里两将在鄜州河中府其缘边八州推盐自卖交钞本为禁止青白盐立法将来青白盐池既归我入州军自不可食解盐乞以盐汔隶本路及转运司可以那移外乞朝廷应副钱万缗厢军五千人工匠千人递为百匹乞于近里州军应副生熟铁五万斤马皮万张车二千乘本司及转运司备义勇保甲万人应副以代禁军有事役者又言朝廷若定钱城守山界既乞起泾原兵马牵制及本路屡捷之后乘势兴修若迟留月日即恐西贼有谋费力平荡于是诏给事中徐禧内侍省押班李舜举往鄜延路同沈括计议先是豫章有进士黄雍者著书千家禧得之因切语为书褒美新法以献王安石安石大赏之时吕惠卿领修撰经义遂牒禧以布衣充检讨已而欲官之安石乃白上曰中书检正官如章惇辈朝廷即当有差除后更用人如不称艰于退绌今欲置人为习学上可其请于是除禧镇南军节度推官中书户房习学公事及安石罢相吕惠卿复荐禧召对垂拱殿除太子中允馆合校勘权监察御史里行禧口辩扬眉奋髯足以移人意安石再相邓绾为御史中丞劾禧党惠卿因纵华亭之狱禧出为荆湖北路转运使禧拜中丞首论绾人材闾茸不可知永兴又荐孔武仲邢恕可以为御史王安礼对上曰武仲与恕岂可为御史张璪曰此两人俱异论者上曰徐禧论事其意渐可见大率怀吕惠卿恩尤欲进异论之人安礼曰事君者不可以贰苟贰焉无所不至禧尚是知县资序陛下拔擢过分宜何以报而怀奸若此上曰禧俱尝有资序自布衣即擢至此禧事惠卿如父禧今日杀身可也岂上论报诏知青州刘庠与绾易而未罢禧中丞其后上复谓安礼等曰君臣之义报施而已古人待我国士故国士报之至于豺狼亦有报施如徐禧者可谓不知报矣安礼曰禧志行如此已为陛下所察莫若明示贬斥使天下之人知陛下好恶所在蒲宗孟曰若只今为给事中恐亦足以惩劝上曰待不悛当有显绌至是与沈括等计议乃言银州故城虽据明堂川无定河之会而城东南已为河水所吞其西北又阻天堑实不如永乐之形势险要已定议自永乐堞声塔平移而右堡乌延至长城岭至六寨自背围川良口孟口罗韦啰泊川至布娘置六堡口寨之大者城围九百步小者五百步一寨用工略万三千其非九百步之寨一百步之堡所能包尽地势则随处宜增展朝廷是其议即日报可七月诏李察差官团结厢军三万人令团结官押付鄜延路听转运使李稷赋功又诏泾原环庆熙河兰会路都大经制司泾原路经略制置司鄜延路见路进城山界须诸路兵为声援令泾原于镇戎定川熙宁高平各置一军委刘昌祚尽护之须兵马三万以上环庆于顺城荔原堡柔远安强寨各驻一将令经略司委近上将领尽护之须兵马二万以上以鄜延路副总管曲珍为副使八月禧舜举括稷将步骑四万及诸路役兵城永乐凡十四日城成承永乐与绥德俱在无定川中永乐北倚山南临无定河三面俱绝崖地诚险要寇骑数来争之俱败去先是寇发国人十丁取九以为兵近三十



万人赍百日粮屯于泾原之北俟官军出寨而击之既闻城永乐即引兵趋鄜延边人来告者前后数十禧等俱不之信且曰彼若即来是吾立功迁官之秋上赐禧等黄旗曰将士立功受赏当倍于米脂禧等恐括分其功乃曰城略已就矣与存中归延安九月乙酉留李稷与曲珍以步兵三万余人护永乐禧括舜举以八千余人还米脂是日永乐遣人告边骑且至丙戌括留屯米脂禧舜举复如永乐丁亥边骑大至曲珍率城中兵陈于崖下水际禧舜举率城中兵陈于崖下水际禧舜举稷植黄旗坐于城上临视之贼自未明引骑过阵前食时未绝前将军高永能曰吾众寡不敌宜及其未阵击之庶几可破禧曰尔何知王师不鼓不成列及已阵而贼众前后无际将士有阻色曲珍白禧曰今众心已摇不可复战战必败请收入城禧曰君为大将奈何遇贼不战先自退邪俄而贼鸣笳于阵贼骑争渡水犯官军先是选军中勇士良马谓之选锋使居阵前未几选锋先败退走蹂践后阵贼骑乘之官军大溃偏将死者数人士卒死及弃甲南走者几半曲珍与残兵万余人入城崖峻径狭骑兵弃马缘崖而上丧马八千余匹贼遂围之城堞俱未备水寨为贼所据城中掘井三丈不及水士卒于是渴死者及过半贼游兵近米脂括退保绥德城永乐孤绝贼攻益急曲珍度城必不可守白徐禧请率众突围而出南走犹胜于坐而待死禧怒曰君已败军又欲弃城耶戊戌夜值大雨城遂陷珍率众数十人踰城走免禧舜举稷阖城俱后初括奏贼兵来逼城见官军整故还上览奏已忧曰括料敌疎矣彼来未战岂有逃退邪必有大将在后已而果然及括以围城事闻上急诏李宪率所步兵赴援又诏括曰永乐为至危急若不斟酌便宜措置则恐误朝廷事愈重今虽发诸路赴救度可齐集须臾十数日卿可相度遣闲人与贼约抽退军马当追回永乐人民结党还地界如委可行即依今指挥若恐益增贼势即勿施行今永乐诸将已失利事出无可奈何卿宜勿惶挠整顿精神措置边事安抚在城人情招集散亡士卒使臣惟是上下一心坚守城池收拾民户焚境委积勿以滋贼凶焰消沮士气所有今日已前累降处分军前可多方募人传达令求便溃围弃城比李宪至延州永乐已陷于是括坐始议城永乐既又应敌乖方责授均州团练副使员外置随州安置徐禧者狂疎喜谈兵常言用此精兵破羸寇左萦右拂直前刺之一步可取三级诸将有献策者輒大笑曰妄语可斩终以此败李舜举知城必陷裂衣襟奏曰臣死无所恨愿朝廷勿轻此贼及城说陷报夜至上早朝当子恸哭宰执不敢仰视上叹息曰永乐之举无一人言其不可者右丞蒲宗孟进曰臣尝言之上正色曰卿何尝有言在内惟吕公着在外惟赵鼎曾言用兵不是好事既又谓宰执曰自今更不用兵与卿等共享太平也先是惠卿在延州首以边事迎合朝廷而已去官沈括继之遂谓讨伐种谔以鄜延之师深入无功高遵裕以环庆之师至军州城下狼狈而还陝西河东骚然困弊天下共望朝廷安息而沈括种谔陈进取之策复讲筑城禧素以边事自任故上遣往经画之既入贼境略不为备寡谋轻敌猝通强寇故败自是后上始知边臣不可信亦厌兵事无意西伐矣

太平治迹统类卷十五

●钦定四库全书

太平治迹统类卷十六

(宋) 彭百川 撰

神宗开熙河

河州大首领辖穆珍者邈川大首领嘉勒斯賚之孙也嘉勒斯賚本西域胡僧李立遵携来吐蕃立文法言是佛种由是吐蕃咸皆信服之吐蕃之俗俱辫髮谓佛为嘉勒谓儿子为斯賚故称嘉勒斯賚初据宗噶尔城以立遵为辅祥符中用立遵策将众十万穿古渭州入寇时曹伟以引进使知秦州领骑卒六千守伏差城闻已过毕利城伟率诸将渡渭逆之遂合战三都谷贼军虽众然器甲殊少在后有所持俱白楸毛连以备劫虏而已伟知其势弱不足畏欲以气凌之自引百骑穿贼阵出其后外高指挥军中鼓噪夹击贼大溃斩首三千级明日视林薄间中伤及投崖死者万计伟威名大振嘉勒氏自此衰弱视中国如神明惕息不敢动立遵归又病死乃徙居邈川更以邈川温布格为辅遣使秦川求内属诏授斯賚宁远大将军爱州刺史以布格为归化将军后布格谋乱斯賚杀之以改莅青唐景佑中授两使留后异时与回鹘岁遣使自兰州入镇戎军以修朝贡朝廷亦命陝西州县特置驿谓之嘉勒氏位及元昊将叛虑嘉勒氏制其后举兵攻兰州诸羌南侵至马衔山筑瓦山会断兰州旧路留兵镇守自此嘉勒氏不能入贡而回鹘亦退保西州元昊遂叛命久为边害朝廷患之议者谓嘉勒氏尚在河湟间又与元昊世仇僥遣使通谕朝廷之意使西戎有后顾之忧则边患少息矣仁宗然之宝元中遂遣屯田员外郎刘涣奉使自古渭州抵青唐城因少邈川都统爵命受之俾持角以攻元昊斯賚谢恩大喜请举兵助中国讨贼自此元昊始病于牵制而嘉勒氏复与中国通矣既而元昊大举袭嘉勒氏而斯賚坚壁鄯州不与战元昊渡水尝植帜以志深浅斯賚潜使人移所植及元昊众溃于志处溺死过半自是数以计败元昊取西凉府而斯賚得斯多淑之众十余万回鹘亦以数万人归之其势遂强于诸羌朝廷命为保顺河西节度使洮凉两州刺史斯賚初娶立遵妹生二子一曰辖正一曰玛尔珍朝廷俱命为团练使自母失宠为尼即俱遁去辖正居河州龕谷生穆珍玛尔珍居宗噶尔城元昊妻以女遂附元昊玛尔珍懦不能制所部温氏亦叛归元昊斯賚再娶乔氏有才色生栋戡年长桀黠遂杀二兄并其众斯賚老国事一以委之秦鳳经略使张方平使人诱栋戡入诱栋戡所并乃励力结部落将雪耻又值其妇翁玛尔斯多沁以罪责于秦州乃归明住坐秦州之境且屡乞河州刺史秦州为奏得敕告然以其居逼边恐后为患乃谕以尔归河州即给付于是穆珍迁于武胜谓巡检程从简曰武胜亦河州界可以给付真命矣从简以候申师司为报偶牙校送斯賚加恩告穆珍乃执牙校语以得刺史告身即放尔归秦州枷从简劾以妄许之罪既而出从简令亲谕之及归穆珍又繫留从简穆珍自知与汉有隙日夜练兵其祖不能禁部族往往归附用其妻弟霞裕勒为谋主与夏人解仇朝廷务懷来卒授以河州刺史治平间斯多死起复栋戡为冠军大将军员外置同正员充保顺军节度使洮州

营内观察处置押蕃落等使上即位加检校太保前此關中士人数言其利害虽张载之年少时亦欲结客取之范仲淹帅延安招置府第但修制科至登进士第其志乃已王安石之子雱年十三得秦州卒言洮河事欢曰此可抚而有也使夏人得之则吾敌强而边受患博矣其后王韶上熙河之策盖取此王韶者始为建昌军帅理叅军时蔡挺提点江西刑狱受知于挺后数岁知庆州诏游西边谓挺且言将应制科欲知西州本末挺遂以前后士大夫之言边事者悉示之其间有向室议洮河一说韶悦之乃为平戎策以献其策曰古者御戎无上策谓戎狄荒忽在要服之外也今河西李氏据两路皆汉唐旧郡在邦域之中所谓痼疽伏疹留滞胁下心腹之患也观其蓄威养锐窃号称制朝夕东向盱眙以窥中国之利此其志非止于来去荒忽利剽劫而已也国家奈何以戎狄待之曾不念子孙百世之后将有戚国内侮之忧也方承平无事四方万里无鸡鸣犬吠之警然贼人犹窥我边邑犯我城郭万一腹心之内有方二三百里水旱四方盗贼者相继当是时贼人之情其可以恩信保耶议者但欲备边固守为不可攻之计殊不知腹心一扰则边守自阙此唐吐番所以陷泾陇也昔拓拔民始居云中宋页允新初居振武当时议者亦不谓其能深入中国为腹心之患也今自绥银宥至于沙肃十四州军之地东西二千余里其又岂特云中振武一城之地耶夫劳中国以事戎狄诚非为国之长策然势有不得已者又安可端坐俟其侵逼哉今欲径举重兵捣其巢穴则国家重生边事纳其诚款则不可先违誓约轻动士众使曲在我也愚以为国家必欲讨平西贼莫若先复河湟则李氏背腹皆受敌表里交击之患不攻而自覆矣今自武威之南古渭州之西皆汉陇西安定金城三郡地所谓隍中大小榆土地肥饶宜五谷者皆在今洮河兰鄯之间汉氏所以开屯田建城邑而臣诸羌者也自唐开元以以后吐蕃侵入尽陷河北即今为羌人所据者已三四百年矣今戡虽在河湟间而沿边诸侯自为种落如穆珍霞裕勒溪巴乌之徒皆与汉界相近在洮河间其种落大者不过一二万小者二三千人皆分离散处不相统一此正可以并合而兼抚之诚能厚以恩信结其宗党使其倾心向慕欣然有归服之意但得大族首领五七人其余小种皆可驱迫而用之矣诸种既服嘉勒氏虽盛其敢傲睨而不归我嘉勒氏既归于我则西河李氏在吾掌股中矣急之可以荡覆其巢穴缓之可以胁制其心腹此所谓见形于彼而收功在此也愚故以谓欲骤亲之则不为吾用急抚之则其心愈离此无异驱虎豹于山林而使之辕阨也令之犹不从召之安可致乎愚以谓此由国家未尝得抚戎狄之术故也夫虎豹之在山林其贪忍残暴惟肉是嗜骤亲之则伤人此固不可以恩信待也然后有善畜养者得而驯扰之至可以驾馭而驱使之无不如意羌戎之人贪爱慕义乐为人用其暴戾又岂甚于虎豹哉观其种性所习虽生梗顽硬难以道御而纯固诚恇易以恩诱患国家未尝得人亲抚之也为今之计莫若择通材明敏之士志虑轩豁能通知其意者朝夕出入于其间往来巡行察其疾苦有生梗顽硬者即稍以恩信绥之使其人皆知上位有爱我之意欣然相劝襁负而归于我矣此抚属羌之策也韶又献和戎六事上命枢密院召问方略以为秦凤路经略安抚司机宜文



字时青唐俞龙珂大族难制议请讨且城之韶乃因按边上从数骑直抵其帐招诱之且留宿以示不疑龙珂遂率其属十二万口来附于是青唐渭源诸族俱纳地周环二千里上嘉龙珂首善拜为西头供奉官龙珂谓押判使曰平生闻包中丞拯朝廷忠臣今既归汉乞赐姓包上如其请遂赐之姓包名顺又诏高遵裕即盐井川建第赐之赏韶为右正言直集贤院建古渭寨为通远军使诏知军事以图武胜是岁熙宁五年也秋七月诏筑乞神平堡而番酋穆尔居玛尔邦山与水巴族相结时入寇诏平兵度行一岭逼之斩首百余级焚其帐洮西震动会穆珍渡河来寇而穆尔复依其声势保集玛尔邦山闰月知德顺军景思立以泾原第六将兵并第一等弓箭手五千骑出南路且分遣诸将一击穆尔一击穆珍韶将大军从东征趋武胜未至则迎击韶贼兵败还走追至其城酋领霞裕勒弃城夜遁唯曲散王阿南阿出降乃城武胜八月以为镇洮军以高遵裕知军事以结吴延珍为礼宾副使镇洮军洮西一带蕃部钤辖赐以器备甚宠延珍者穆珍诸弟也王师讨穆珍于巩令城穆珍败走延珍举其族并大首领李凌戡等出降故命之且诏沿边安抚司晓谕木征限一月降优与官爵不从即多设方略擒讨仍以内殿崇班告一道钱五千缗募人辅送冬以乞神平堡为庆平堡隶镇洮军又以镇洮军为熙州升镇洮军为节度额以熙河洮岷山远通军为一路置马步军都总管经略安抚使所应制置事令经略安抚司详具以闻进王韶为龙图阁待制知熙州兼马步军都总管经略安抚使移高遵裕知通远军兼总管已而霞裕勒归熙州听命以凌戡为右侍禁充结河一带蕃部巡检凌戡此穆珍母党也其明年春景思立引兵由香子城进讨河州力战数合斩不用命者数人军声大振王韶引精兵从之捕斩贼首千余级穆珍遁走生擒其妻子以属吏韶入河州诸羌反袭香子城大掠辎重侍禁田琮战牛精各失利及其子永吉俱死诏急遣苗授救香子败之斩首四千余级守香子钤辖奚起城中兵与苗授合遂进讨牛精诸谷助贼蕃部焚其帐斩千余级过塞不通景思立复引兵通道又斩三千余级尽得所掠获牛羊刍粟不可胜计诏回军复击诸羌而穆珍复入河州韶乃城香子反复遣将渡洮河破康乐城之及城刘家川堡又自领兵破丹诺尔而城之俱成以兵穆珍弟霞乌察急攻陷止不能下去围临江兵不敌熙河番汉部巡检刘惟吉率所部兵赴之力战霞乌察败遂走于是第功行赏以王韶为礼部郎中枢密直学士景思立为东上阁门使河州刺史迁奚起为皇城使刘惟吉为左藏库副使余减年推恩有差遂以思立知河州改苗授知德顺军专管辖泾原正兵弓箭手策应熙河又诏丹诺尔城为定羌城香子城为宁河寨康乐城为康乐寨刘家川堡为当川堡并隶河州思立以河州未城寓行州事于宁河寨夏诏永兴秦凤转运司发壮兵二千付思立城河州又韶躬将士卒往视河州修城羌人谋伏兵南山断官军韶遣王君万等拔之遂川露骨山南入洮河界破穆珍弟布珍觉尽逐山南诸羌时穆珍留结彪守河州而自将锐卒出王师后韶又分为两道遣别将攻河州而自逆穆珍所在大破之穆珍走遂围河州结羌以城降霞乌察布珍觉本令征钦令征等各以城降于是收复宕宜岷洮又城拶南通道川班师韶入覲安石请率百官称贺

上曰此庙堂之谋将帅之功于朕何有安石再三陈请以熙河之功时少比陛下神算前定举无不克祖宗以来每下州郡例俱称贺上犹不许安石曰河州事中外所仍多端称贺则人情释然请俟城毕入庆从之既而毕工于上御紫宸殿王安石率郡臣上表贺上解所服玉带赐安石辞不许方受赐以王韶为端明殿学士兼龙图阁学士右谏议大夫初王韶之围河州也番部开门请降既入景思立夜杀降者二千余人上闻之曰祸莫大于杀已降故思立克河州之功不赏乃以高遵裕为岷州霞乌察布珍董谷俱率朝引见延和殿上谓董谷虽非首领然能于薰罗城先同其母诣景思立前锋请降乃尽以为崇仪副使悉充蕃部钤辖吴叱岷州巴珍觉洮州董谷河州厚遣之当时穆珍虽屡破屡败而栋戡别将青伊结果庄者复数扰河州屡诱胁部族举西山袭取河州采木军士害使臣张普十辈以书抵景思立不能忍包约劝之毋出兵思立不听明年春思立率蕃汉兵六千攻果庄于塔布城思立将中军韩存宝魏奇为前锋王宁策之王存为左助李粲为后殿赵亶策之果庄众二万余分为三以抗官军自辰及未血战十合贼从山下沿沟出围中军王宁战死韩存宝王存亦被围走马承受李元凯死之思立与存宝溃围而出与殿后合思立已三中箭存宝奇及他将亦各重伤于是众议曰日晚兵疲矣宜移阵东坡为营以自固而思立以前锋重伤乃独移屯岭上而戒诸将无得辄动复以百骑血战走蕃兵数千人方追之而殿后兵动不能止前阵欲战者见之俱溃思立且战且退至东岭上与赵亶合官军尚五千余人思立曰我敌以百骑走千余人诸军无助我者军败矣合自剄以谢天子众止之少顷再战数合不能解遂死包约亦战死上闻思立死深以用兵为忧批谕执政曰熙河边事未有安靖之日且湖南广南可诏章惇沈起早务了毕追还兵马并力一方庶不至别贻大患时王韶赴阙还在道闻思立败疾驰而西会兵于熙州以三月丙午度洮翼日破拉戡族于结河川口斩千余级释河州围走果庄等三万余人穆珍窜入（原阙）

### 神宗朝议契丹地界

熙宁七年春契丹遣泛使林牙兴复军节度使萧禧来言代北对境有侵地请遣使分画其书曰切以累朝而下讲好以来互守城规务敦夙契虽境分二国克保于难知而义若一家共思于悠永事如关于违越理须至于敷陈其蔚应朔三州土田一带强二祇自早岁曾遣使人止于旧封俾安铺舍庶南北永标于定限往来悉绝于奸徒洎览举甲輒有侵扰于全属当朝地分或营修伐垒存止或舍居皆是守边之冗员不顾睦邻之大体妄图功寔深越封陲今属省巡遂令按视备究端寔谅难寝停至于缕细之縁由分白之事理已具闻达尽令拆移既未见从故宜申报据侵入当界事理所起铺候之处各差官员同共检点早令毁撤却于久来元定地界再安置外其余边境吏有创生事端委差去使臣到日一就理会如此则岂惟疆场之内不见侵踰兼于信誓之间且无违爽兹寔穩便颛俟准依上许之而难其人执政白遣太常少卿判三司开拆司留忱秘书丞检签书枢密院兵房文字吕大忠即河东理辨之及萧禧曰蔚应朔三州地界俟羌职官就地

头检视定夺雄州外罗城乃嘉佑七年因旧缮葺元计六千余万工至今已三十年纔修五万余工即非创筑城隍有此誓书又非近年事北朝既不欲如此今示和好孰更不令接续增修白沟余亦俟差人检示如有创葺楼子箭窗等并令拆去如有创屯兵级并令抽回朝廷自来约束边臣不令生事如昨来赵用擅入全属北朝地分雄州职官十余人并已停降今来郭业侵入全属南界地分兼先放箭射伤巡人理须应敌况北朝近差巡马一是创生事端其郭庠事并其余细故并循常例别无违越无可施行禧奉诏而退授以誓书书曰辱迁使指来赐丞封厯陈二国之和有若一家之义固知邻保执信符独论边鄙之臣赏越封邮之守欲令移徙以复旧常切惟两朝抚有方宇岂重尺土之利而轻累世之欢况经界之间形势可指方州之内国籍具陈当遣官司各加覆视倘事由夙昔固难徇从或诚有侵踰何吝改正而又每戒强吏令遵誓言所谕创生之事端亦皆境候之细故已令还使具达本因细料英聪洞垂照悉韩缜时为兵部侍郎天章阁待制乃假龙图阁直学士给事中为回谢使忱等入辞对便殿忱曰臣受命以来在枢府考校文据未见本朝有尺寸侵边地且雁门者古名限塞且跬步不可弃业何由委五百里之疆以资敌乎臣既辱使指当以死报之惟陛下主臣之言幸甚上慰之忱已行上手勅曰边理危则忿卿姑如所欲与之忱不奉诏大忠又以父忧去独忱至河东而契丹亦令枢密副使同中书门下平章事萧素枢密直学士梁颖会于境上素颖颇倔强自言当庙坐谓北朝使相有此仪忱不从移文结难一日蕃首引兵万众入代州意焚铺候与官军交射已而素颖径入横都各施帐幔邀忱相见忱不往又欲设次于西陉东谷忱以侵地愈深不许会得国信所言至和中国信使萧德常亦带平章事与馆接使行马坐次悉分宾主乃以此报之于是会于大黄平以宾主见寻诏大忠夺丧与素颖会议凡三四见议不决而指对蔚应朔三州分水岭土垄为界忱大忠即邀素颖行视无土垄乃但云以分水岭为界葢山所至有分水岭概言分水岭为界则异时可以罔取此黠寇之微意也相持既久忱等归报上闻萧禧且复来乃遣中使赐韩琦富弼文彦博曾公亮手诏曰朝廷通好北边凡八十年近岁以来生事弥甚代北之地素有定封而輒造衅端妄来理辨此敕官吏同加按行虽图籍甚明而诡辞不报今横使复至意在必得朕以祖宗盟好之重固将优容寇情无厌势恐未已万一不听何以待之古之大政必询故老卿夙懷忠义厯相三朝虽尔身在外乃心罔不在王室其所以待遇之方密具以陈朕将亲览琦上疏曰臣观近年以来朝廷举事则似不以大敌为恤彼人见形生疑必以我有圖复燕南之意虽闻彼生孱而佞物岂无强梁宗属与夫谋臣策士引先发制人之说造此衅端故屡遣使以争地理界为名观我应之之术尔今日致彼疑有七通高丽取熙河教义勇修军器沿边植柳榆置三十七将军今彼因疑生事但不得不然好进之人不顾国家利害但谓边事将作富贵可图必曰敌势已衰持外示骄慢尔以陛下圣神文武若择将臣领大兵深入敌境则幽蓟之地一举可复此又未之思也今河朔累岁灾伤民力大乏沿边次边州军刍粮不充新选将官皆龯勇寡谋之人义勇保甲新点未经训练若驱重兵顿于坚城之下



粮道不给腹心受敌虽曹彬梁信名德宿将犹以此致岐沟之败也臣愚今为陛下计谓遣使报聘优致礼币且言朝廷向来兴作乃修备之常与北朝道好之久自古所无岂有他意恐为谋者所误尔弼上疏言今杨使再至朝廷违之则兵起而速患顺之则河东斥堠渐蹙臣谓不若一委边臣坚持旧来图籍疆界为据使之尽力交相结难然北寇非不自知理曲盖欲生事遂兴干戈岂是无故自兴寔有以致其来也惟陛下深省熟虑不可独谓敌人造衅背盟也彼若万一入寇事不得已我但严兵以待之来则御之去则备守此自古中国边防之要也若朝廷来忿便欲深入讨击实虑万有一跌其害非细若便与西夏为犄角之势则朝廷宵旰矣文彦博曾公亮则但持不与之论乞选将厉兵以待之彦博之疏曰中国御戎守信为上必以誓书为证彼虽危辞难夺正论公亮言边人之情畏强弱在控制得术耳今者中国所以恃边人者既极包含若其生事不已不使知惧臣恐未易驯服控制之柄无使倒持边人知中国不可窥奸谋亦自息矣是时萧禧至白沟又坚欲交马馱于城北亭非故事朝廷曲从之上批曰萧禧于白沟往凡十日至今未闻起离向宗儒等虽再三报以旧例禧殊未有从顺之义若更迁延深恐寇愈肆强忿或出不逊之言或以巡马拥送南来愈难处置雄州使人约栏又致喧争万一扰攘或伤官吏恐不可收于去岁蔡确接伴已许马馱依常使车例于雄州交割今必难却其请可详度止作朝廷据接伴奏特许依年例作两接交换庶几稍通其情于疆事易为商量又批曰北使久留白沟已经累月自通和好以来无此事朝廷处置实不可缓盖所争者小而所系者重议者若谓恐敌人因此得以占据两属之士是甚不然且北人前后执作证据以为属彼者岂独一事如夏秋二税借他盖馆雄州门侧札立标竿及巡马不住往来之类不待更增交割马馱一节乃可占据况人夫一半已于白沟代还在理委无深害可速议指挥禧至故因书其大指而去且以忱等迁延为言其书曰昨驰一介之轺传议复三州之旧封事已具陈理应深悉期遵誓约各守边陲至如创生事端侵越境土在彼则继有于此则曾微乃者萧禧纔回韩缜继至荐承函翰备认诚惊言有侵逾理须改正斯正见和成之意且无违拒之辞寻命官僚同行检点于文验则甚为显白其铺候则尽合拆移近览所司之奏陈载详兹事之缕细谓刘忱等虽曾会议未见唯依自是及冬以月建日或假他故或饰虚言殊无了绝之言止有迁延之意若匪载凭緘幅遣使人寔虞诡曲以相蒙罔罄端倪而具达更希精览遐亮至懷早遣边各加审视别安戍垒俾返旧常一则庶靡爽于邻馭一则表求敦于世契倘未从擗割仍示稽迟在往复以难停系悠长而岂可微阳戒候善嗇为宜时王安石再入相召执政与忱大忠同对资政殿论难久之上曰凡事俯从尚不肯已今两遣使岂有中辍之理卿等为朝廷惜疆境诚是也然何以弭患大忠进曰遣使相来即与代北之地若有一使曰魏王英弼者来求闕南之地则如何上曰卿何言也大忠曰陛下既以臣言为不然今代北岂可启其渐忱曰大忠之言社稷大计愿陛下熟思之执政之臣大忠不可夺罢悦三司盐铁判官前此大忠乞终丧制奏曰臣与刘忱再会北人于大黄平萧素梁颖词理俱屈虽议论反复执迷不回切原其情技

亦止此为今之计莫若因而困之伏望就除刘忱一本路差遣置地界于代州以萧士元为副来则与之言去则勿问在我则逸在彼则劳岁月之间庶可决议久寓絶塞人情皆非所堪速希成功实恐有害军机事理而臣方在衰疾弃几筵以将使事今者素颖亦必顾惜欢好决无仓卒起衅之端臣之去留似无所系乞听臣罢归以终丧制至是上许之大忠虽得请去然终论奏以地为不许奏曰切以北人窥伺边疆为日久矣始则圣佛谷次则今泉村以至牧羊峰瓦窑坞共侵筑二十九铺今则西起雪山东接双泉求地五百余里蔚应朔三州侵地已经理辨更无可疑惟瓦窑坞共侵筑见与北界商量萧禧未过界时臣先奏论乞朝廷主此定禧议又皆许之今西陲以东皆有明据此地不能固争他处亦以难保切料敌情有可动者一有不可动者五狃于包容侵侮中国今若必校或激怒心此可动者一也岁得金帛与地孰利万一絶好所失则多此不可动者一也敌兵虽众脆弱骄惰应敌者鲜非咸平景德间可比此不可动者二也城池不固器械不精以守必危以战必败此不可动者三也山后之民久苦虐政皆非思中国之心边衅一开必防内变此不可动者四也北人最畏西夏复有达靺之隙果欲长驱岂无牵制之虞此不可动者五也彼主弱而少断母老子孥纵有谋臣恐未得用今者边使再入必未尝先输屈伏之言俟其情意稍开且以胡谷义兴治大石茹越麻谷五寨治平二年侵筑十五铺度山势立界或更增以瓦窑坞如王仅靳宗臣之议则我无屑就之愧彼有可取之名萧禧使还不遂其意万一张大兵势测我浅深乞指挥诸路帅臣但为御计一切勿校遂放命缙乘传诣境上会辽人结絶以闻诏谕萧禧以此归报禧不受命又遣内侍李崇贵诏许以长连城六番镇者治平二年契丹尝置铺其间边人以其见侵毁之后不复来至此计其即旧址置铺而禧犹不从执议如初上不得已议先遣沈括报聘括请可上谓括曰敌情难测设危使人卿何以处之括曰臣以身任之上曰卿忠义固当如此行学一时之安危卿安则边计安礼义自中国出较虚气无补于国切勿为也上又画七事以问中书枢密院曰今遣沈括等行而事当预虑者萧禧未还止之不令过界一也接伴久不至二也过界三五程止之令俟萧禧到三也到敌帐先问来意直俟以分水岭为界方得朝见四也虽得朝见延之穹庐中须令用分水岭为界方得五也使人未许以分水岭为界即领兵拆移铺舍屋徐遣括等持慢书来报云既商量不从已令兵马往彼拆移讫使朝廷知既未是絶好如何为处六也使人至輒苦辱之或授以恶马使颠仆于山谷中或诈为贼潜来伤害既不显中国之意如何为处七也中书枢密院其议应之所宜中书枢密院即条其奏曰切以分水岭既不可萧禧又未肯辞欲通两国之情则泛使不可不遣彼以禧未还而不纳或纳至接伴至不容或有之然且迁延境上以示我无絶好之意于义无伤则彼亦难怪禧之稽留无由发怒若必遣使人以分水岭为界则许与不许且使人之敢专就令屈从岂足为信若不候使还强移铺屋前已计议屈伸在我且为后图本朝与之通好多历年使人之来礼遇甚厚今虽未允所求固无激怒之事若辱使人恐无此理上然之于是以使指授沈括曰本朝边臣见用照证长连城六番岭为界公牒十六道多

是北界声说關口把铺等处捉贼或交趾并在长连城六番岭之北内顺义军重熙二年三月十八日牒称南界送到于山后长连城两界分水岭上收捕贼人张奉还等不合界过准法断讫又顺义军清宁九年十月牒捉到截夺南界代州崞县赤泥交主白户支牛贼人事既指长连城六蕃岭南依旧趾修葺已是曲敦和好今禧更指分水岭为界緣所在山岭水势分流皆谓之分水岭昨萧素等所执证照文字三道除大石义兴治两寨已为此界侵越不经治平年发遣见不以连城为界外其西陁寨执张庆文字据言分水岭上有土垄所据指处即无土垄兼张庆文字指雁门塞地比至界遮敌军十一里今鴈门塞至长连城地界为兼忱等曾牒素等曾牒素等今指定是何山名为分水素等回牒但称沿边山名地里界至南界足可自知岂可移文会问显见元无指定去处今禧所执与素等同全无证据文字欲令沈括等到北朝日将见用照证文字一一闻达北朝又诏曰国家与契丹通好年深终不欲以疆场细故有伤欢好大体既许以治平年葺铺处依旧法葺修务从和会即更不论有无照证若不指定分水处即恐检视之时难为擗拨一李福蛮地许于见闻壕堑处分水岭为界一水峪内义儿马铺并三小铺即移近两以见安新铺山头分水岭为界一则西陁寨地分以第一第二第三第四第五远探白草铺山头分水岭向西接右长城为界一黄嵬山地已经仁宗朝差官与北界官吏于聂再友等已侵耕地外标地立四至讫及大池庙顺义军牒称地里系属宁化军并无可商议二瓦窑坞地前来两界官私商量未了今已指挥韩缜等一就检视擗拨处以分水岭为界且遣使者持报书示禧报书曰两朝犯好六纪于兹事师故常谊存悠比久承使指谕及边陲已约官司皆从卞正当申封圻之旧以需事实之分而介信未通师屯先集侵禁埃戍伤射巡兵举示力争殊非和议至欲当中独坐位特改于臣工设次横都席尤难于宾主数从理屈纔就晤言且地接三川势非一槩輒举西陁之偏说要该诸寨之提封屡考文凭既无据验欲同按视又不准从职用乖违滋成濡滞切意有司之失指曾非与国之本谋兹枉招车再垂函问重加聘币弥见欢惊然论强事之侵尽置公移之显证述廷臣之议独尤病苦之愆期深认事端多非闻达重念合天地神鬼之听共立誓言守祖宗疆土之传各全生聚不啻金缯之巨万肯贪壤地之尺寻特欲辩论使无侵越而行人留馆必于分水以要求枢府授辞期以兴师而移拆岂其历年之信约遂以细故而变渝已按輿圖遥为申画仍令职守共改沟封遐冀英聪洞加照悉禧见报书乃肯辞至是绘图上山分画利害安石言将欲取之必姑与之以笔画其地畛请与之诏如安石议诏曰双井水峪瓦窑坞分画地开壕立堠增置铺屋控扼处并依奏石门子铺如在三小铺外更不拆移见安新铺以东接胡谷寨地元非分画处若北人言及即以此拒之如固争执奏取朝旨其白草铺西接石长城先从北与之议毋得过黄河画地介其石长城以北弓箭手地听割移于是东西弃地五百余里云

太平治迹统类卷十六

●钦定四库全书



## 太平治迹统类卷十七

(宋) 彭百川 撰

### 神宗开南江

熙宁五年闰七月庚戌遣检正中书户部户房公事章惇察访荆湖北路经制荆南事先是辰州布衣张翹与流人李资诣阙献书言辰州之南江古银州地接施黔牂牁世为蛮人向氏舒氏田氏所据也产朱砂水银金布黄■〈虫葛〉良田数万入路无山川之扼若朝廷出偏师压境上臣二人说之可使纳土为郡县书奏朝廷以委广西钤辖刘策既而上语王安石曰刘策所规画甚善策不欲令安石转运司预此上曰诚然安石曰须朝廷精择数人与同此事未几策死因改命惇仍以东作坊使石鉴知辰州使助之及有僧愿成者能为符篆禁呪王雱幼子夜啼用成咒而止雱德之或言蛮人多行南法畏符篆雱即荐之于惇惇至辰州遂遣李资张竑及愿成等入南江谕以朝廷之意资等徧宥无谋褻于蛮妇其酋田元猛者不胜其愤尽缚资等刳斫于柱次至愿成博颊来哀元猛素事佛乃不杀而遣之愿成不以为耻乃更乘大马拥搥以自从称廉访大师犹以入峒之劳得紫衣师号惇知羣蛮终不可以说下也即三路进兵诛荡平之遂置沅州以懿州新城为治所县以卢阳为名又以潭州梅山建安化县得主客万四千八百九户土丁万九千八十九人田二十六万四百三十六畝起税租于是缮筑武阳關硤城寨以控制之又令李诘将取光潜师至飞山振险不能度而还当是时张颢居忧于鼎州目覩其事遂以书抵朝贵言南江杀戮过甚无辜者十有八九以至浮尸塞江下流之人不敢食鱼者数月惇病其说且欲分功以陷之乃上言向者张颢知潭州之益阳县赏建取梅山之议今臣成功乃用颢之议也朝廷赐颢银绢二百而执政独患其异议会颢服阕乃就除为江淮发运使便道之官于是不敢食鱼之说息矣

### 神宗置南平军

熙宁八年十月丙戌诏以渝州南川县铜佛坝为南平军先是南川熟户李光吉王袞梁承秀三族据其地各千家间以威胁诱汉户不从輒屠之没入其田土往往投充客户谓之纳身其税赋里胥代输无敢谁何者招纳亡命数以其徒伪为生獠劫边民官军追捕即入獠人已遁去习以为常厚赂州县民使候伺守令动息乃筑城堡以自固缮修甲兵遠近患之于是夔州路转运判官张洸等相与密议召兵马使冯仪牟简杜安行授以方略使圖之光吉等且于沿边仍军须以待事闻上可之仪等乃以祸福开谕不聽于是进兵穷讨久未得巡检李宗闵顿军穆兰独逢光吉兵与战多所死亡死之居无何遂为仪等所破以三族之地赋民岁得租三万五千石丝绵万六千两有奇遂置荣懿扶欢两砦是岁熙宁四年也然其地西南接乌蛮昆明哥蛮其间种族且数十时为边患于是朝廷补其土人王才进充巡检控扼之其后才进死种族无所统一八年木攀木鬪輩二十余族复数出盗边诏下察访熊本于是董督兵破骆益王本二木鬪輩凡七寨等四国斩首六十六级俘男女百三十三人木鬪翁已下四十八人来降遂尽遣乘传赴阙上引

见以上鬪翁为奉职安稳二为借职木鬪七安李四而下给俸授田有差于是即铜佛坝置军以南平为名盖其地南平獠之故地故也并领荣懿扶欢二寨增置开边通德凡三寨而并废南川县云

### 神宗城茂州

茂州领羈縻九州岛俱蛮自推一人为州将治其众州将常在茂州受处分茂州居羣蛮之中地不过数十里旧无城惟植鹿角蛮人屡以昏夜入茂州剽掠民家六畜及人茂州輒取货于民家遣州将往赎之与之讲和为誓习以为常茂州民甚苦之熙宁八年也田部员外郎李琪知茂州民投牒请筑城勘为奏之乞如民所请筑城绕民居凡八百余步朝廷下成都府路钤辖司度其利害时龙圖阁直学士蔡延庆领都钤辖李琪已罢去而太子中允范百常为之代延庆下百常言其利害朝廷遂令筑之既而蛮酋羣诉于百常称城侵其地乞罢之百常不许诉者不已百常以挺驱去九年三月己卯始兴筑文靜等州羣蛮数百奄至茂州兵纔二百人百常帅之拒击杀数人蛮乃退百常帅民入牙城明日蛮数千人四面大至悉焚鹿角及民庐舍引梯冲攻牙城矢石两下百常帅众乘城拒守至甲申其酋长二人为樞木所杀蛮兵乃退百常帅民城中人不敢出茂州南有箕宗關路通永康军北有陇东路绵州俱为羣蛮所据百常募人间道诣成都又书木牌数百投江中急告求援于是蜀州驻泊都监孙青将数千人自箕宗關入蛮伏兵击之青死而士卒死伤不多又有王供备等将数千人自垄东道入时州蛮请降从者杀其二子蛮怒密告静州等蛮使遮其前自后驱之壅溪上流官军既涉而决之杀溺殆尽于是延庆乞发陝西兵五千求援候兵集自将已往诏延庆为持重毋得轻去成都遂遣内侍押班王中正经制蛮事上亲染条约付之曰可出榜晓谕地接蛮夷州军城寨茂州管下图戩等番部作过已剪灭其胁从番族如能悔过归顺倍加存恤应有合措置事逐路选监司一员按视度其逐处城围大小高低厚薄壕堑深浅阔狭几处受敌缓急侧近人户可与不可容其入保井泉足与不足汲用城壕峡浅之处合与不合增展开浚如合兴修畫图计工料当如何规度计置功大者几年可毕楼櫓守御之备如合增置其材具于何处取用入于何处差发保甲土木丁未经教阅缓急必难使如作番次于巡检县尉下巡防因以劝习武艺有无不便仍节畧开封府界及立路见行保甲上番条约令看详器甲如不精利及有少数于近便州军差官简选以备移用或本处难得即于逐路都作院渐次制造令特行选委其送官毋得以为常事卤莽供报须亲按视及体访利害条析以闻令中书枢密院看详取旨施行既而钤辖司已命百常与诸蛮和誓而中正自以为得旨掩袭五月乃将军数千自箕宗關入恭宕州境乘其无备掩击之斩首数百级卤掠畜产焚其庐殆尽乃复与之和誓七月又袭击之又随而与之和誓乃还故事与蛮和誓蛮先输货谓之抵兵又输求和物官私乃籍所掠人畜财物使归人不在者增其价然输誓牛羊豕棘耒耜各一乃缚剑门于誓场酋豪皆集人人引于剑门下过刺牛羊豕血歃之掘地为坎反缚羗婢置坎违誓者当如此婢及中正和誓初不令输抵兵求和等物亦不索其

所掠自备誓具买羌婢以毡蒙之终宿失去百常坐筑城致寇时追一官勒停然朝廷亦卒城茂州云

### 神宗平下溪州

熙寧九年正月乙卯以下溪刺史彭师晏为礼宾副使师晏盖盘瓠之种所居即汉黔中唐彭水之地其俗阻五溪歷代荒獠不常唐末诸酋分据之地自署刺史而彭氏素有溪州晋天福五年有彭士愁者率羣蛮寇辰锦进围澧州湖南节度使马希范刘勍以步卒五千讨之不能下遂与士愁约和而五州酋豪既来盟乃立五铜柱为之界授士愁静边指挥使金紫光禄大夫检校大保使持节溪州诸军事溪州刺史兼御史大夫上柱国陇西县开国男食邑三百户其后世子孙世袭士愁官爵国初来诣辰州愿比内郡输租赋诏本道按山川地势以图来献卒不许之惟赐以印绶羈縻不絶而已至景德中有彭文庆者来贡方物真宗面赏戒之后有彭儒猛彭文绶彭士漠等继以修贡唯彭士羲者名鷲黠父祖五世袭下溪州刺史诸州将袭承为率蛮酋子孙若嫡侄亲党之当立者具州名闕移辰州州吏保证申钤辖司然后奏朝廷而赐以敕告即望拜阙庭而受恩其州曰上中下溪三州曰龙赐天赐忠顺保静感化永顺六州曰懿安远新给富来宁南顺高十一州每州有押案副使及校吏俱自补置至和二年士义纳其子知上溪州师竇之妻师竇乃与其子师党投辰州告其父之恶且言将有叛谋于是转运司李肃之等共议领兵丁数千人入峒讨伐以师竇为乡导兵既至而仕义遁入它峒不可得官军战死者十六七后蛮獠数侵地不可复制问遣三司副使李参文思副使窦舜卿侍御史朱处约转运使王绰经制招伐领兵问罪仕义乃陈本非有侵轶不顺之状因其子悖逆而有司擅伐无辜愿以二十州旧地复奉贡求以向化既又遣殿中丞雷简夫往议纳款遂以所掠兵丁共五十一人械甲千八百九事并蛮众七百人赴誓場饮血就降而遣师党知龙赐州戒勿杀而荆湖之间遂以无事其后仕义为其子师彩所弑父自称权发遣下溪州事知众不附专为暴虐贼杀不辜旁夺诸州贡物其兄师晏结同巡检彭仕选都指挥周允荣攻围师彩杀之并诛其党田忠财以下三十余人乃纳誓表上其父仕义平生鞍马铠械仍归喏溪地因辰州以闻于是朝廷命师晏袭知下溪州事其所赐予之甚厚诏以所归地为镇溪寨是岁熙宁三年也五年春师晏愿纳马皮白峒来献乞升刺史从之六年冬师晏遂举州内附于是知辰州陶弼部兵夫人下溪州繕修城堡遂置会溪城黔安寨诏晏师而下十有八人赴阙既至乃有是命余补班行有差

### 神宗平交趾

仁宗朝以萧注知邕州居郡数年阴以利啖广源诸蛮密繕甲兵乃露奏曰交趾外奉朝贡中包祸心常思蚕食王土臣今得其腹心知其要害乘此时不取他日有害大哉愿得驰至阙下而陈方畧论者以注且为国生事不省上即位王安石秉政首用王韶取熙河以断西夏右臂又欲取灵武以继大辽右臂又用章惇为察访使以取湖北夔峡之蛮于是献言者谓交趾已为占城所取众不满万亦可计日取乃以注知桂州上问注攻



取之策注辞曰臣昔者意尝在此溪洞之兵一可当十器甲犀利其亲信之人俱可指呼今溪洞非昔日之兵器甲无当时之备腹心之人死亡太半交人生聚教训又十五年矣众不满万恐传者之误也注至桂州自特磨至田陈州酋长远近偕至问其山川曲折老幼存亡甚得其欢心故干德动息必知之然有献平交州者輒火其书沈起独言交州小丑无可取之理安石喜乃罢注归以起知桂州起至则遣官入溪峒点集土兵为保伍授以阵图使岁时隶习诸洞骚然又于融州强置城寨诛杀人以千数又遣边吏薛举诱纳恩情州依善美于省地交人以为言上患之御批付中书曰熙河方用兵未息而沈起又于南方千赏妄作引惹蛮事若不早为平治则必滋长为中国巨患实不可忽宜速议罢起治其擅招纳之罪以安中外于是以刘彝代起彝至复令指使因督盐运之海濱集舟师寓教水战交人与州县贸易一切禁止之交人愈怨望大集兵丁欲谋知邕州苏缄同知之以书抵彝请止保甲罢水运容互易无使交人兴师有名彝不听反移文劾缄沮议又责令不得辄言边事熙宁八年交人果大举众虎八万十一月甲申抵海岸未旬日攻陷钦廉二州破邑之太平永平迁陆古万四寨苏缄闻贼至阅郡兵从厢禁军合二千八百人分布城堞又号召郡人之才勇者授以方畧勒部队使分地自守又悉出官帑及私财示之曰吾兵械素具蓄聚又丰今贼众已薄城下惟坚壁固守以待外援可以坐取全胜若一人举足则羣心动摇大事去矣若辈听吾言当蒙厚赏不听或遁去则并其孥尽剑斩之时大校翟绩阴谋出奔缄使人伏门外梟其首以徇由是上下胁息听命缄复募死士得数百人拏舟邕江与贼逆战斩首三百余级十二月丁酉贼薄城下贼为攻具四百阬城缄为火箭焚其梯冲前后杀伤万五千余城中心益固缄谓救至在刻漏围即解是时遣使请救于彝彝遣都监张守节领三千兵以赴援守节闻贼众十倍逗遛不即行复迂途贵州驻兵康和驿阴观胜负缄又遣■〈虫葛〉丸告急于提点刑狱宋球球得书惊泣以便宜督守节惶怖移军大夹岭回保昆仑關猝遇贼不及阵一军俱覆为贼擒者数百人贼知北军雅善攻城因啖以利使为云梯梯成为缄所焚又为攻壕洞蒙以华布缄伺其既度于穴中纵火焚之贼计尽欲去会有教贼囊土数万傅城山积顷刻高数丈贼众登城城已陷缄犹扶伤卒驰骑苦战力不敌乃曰吾义不死贼手遂归阖门聚家属三十有六人杀之藏于坎纵火自焚贼至求尸俱莫得杀吏卒土丁居民五万余人以百首为积凡三百八十余积并钦廉所杀无虑数万余人并毁其城以填江邕被围凡四十有二日缄愤彝起生事致寇且坐视城覆弗救欲画疏闻上属道梗不通乃榜其罪于市冀闻達朝廷卒无一人之救以至于没缄之没以九年正月庚寅而朝廷未之知也上自闻交人入寇即深咎彝起以石鉴代彝且诏鉴体量彝起以闻已而手诏中书曰沈起昨在广西妄传密受朝廷旨意经畧讨交州又不待诏礼擅委边诏接恩情州依善美及于融宜溪洞强置城寨虚奏言蛮众内附既兴筑果致叛扰杀土丁兵官校以数千今交贼犯顺宜獠内侵使一道生灵横遭屠戮职其致寇罪悉在起了无疑者朕为人父母视此远方无辜之民横遭灾患深所哀悼沈起可贷死削夺在身官爵送恶州军编管命未

行而中书枢密院言刘彝亦相继生事罪不独起乃并命安南招讨司更访其实至是御史蔡承禧以谓钦廉已破邕管既危数郡之民横遭屠害乞行沈起前诏刘彝亦更伸国典十月庚寅诏刑部郎中天章阁待御制集贤院修撰沈起责授检校水部员外郎郢州团练副使随州安置后数日苏缄死事上嗟悼为之不食诏赠缄奉国军节度使谥忠勇赐京城甲第五区乡里上田十顷官其亲族七人初缄子子元为珪州司户参军携家省父将还而贼适至缄私念郡守家屡出城见者以为避贼则人有走心独遣子元还桂而留其孥至是俱死惟子元在诏以子元为西头供奉官阁门祗候夺服充募舟师副将召对便殿上抚谕甚至且曰邕州若非卿父子如钦廉二州贼至而城破乘胜奔突则宾象桂州皆不得保矣昔唐张巡许远以睢阳蔽遮江淮较之卿父未为远过也改授子元殿中丞通判邕州缄既没交谋入寇桂州前锋行数舍或见大兵自北来呼曰苏皇城领兵来报交趾之怨师惧遂引归其后御史中丞邓綰言沈起刘彝虽已降责尚未尽乞治刘彝虽已降责尚未交趾之围巡州也安石言于上曰邕州城坚必不可破上以为然既而城陷上欲召天府会议于天章阁安石曰如此则事愈彰不若只就东府上从之安石忧阻形于言色王韶曰公居此尚尔况居边徼者乎愿少安重以镇物情安石曰使公往能办之乎韶曰若朝廷应副何为不能办安石由是与韶有隙交趾乃为露布榜之衢路自言所部之民亡入中国官吏容受庇匿不遣我诉于管桂不报又遣使泛海诉于广州亦不报我故帅兵追捕亡者而钤辖张守节等辄相邀遮士众奋击应时授首又言桂管点峒丁明言欲见讨伐又言中国作青苗助役之法穷生民我今出师欲相拯济安石见之大怒自作勅榜以报复之方是时赵高知延州命为安南道行营马步军都总管经畧招讨使科秦晋锐兵十万人发军骑总九将军水陆进讨入内押班李宪副之高乃上言朝廷置招讨副使其余军士并须共听节制号令则当归一宪衔之宪语高曰今边事共奏禀御前指挥更不经中书枢密院高对以朝廷兴举大事若不经二府恐类墨勅于事未便宪曰将来若至军中不闻天子之诏当从便宜高与宪由是屡于上前纷辨上问孰可以代宪者高言郭逵着于边事上曰乡锐帅令副之如何高曰为国集事安问正副臣愿为裨赞于是上更用逵为招讨宣抚使高为副兼都大提举粮草高入辞上谕高曰用峒丁之法先须得实利然后可以使人不可以甘言虚词责其郊令如延鄜点教蕃兵若非卿有以制之使轻罪可决重罪可诛违西夏则其祸逵合于兵法畏敌之义则其効命也难矣今卿可选募精劲工人一二千择梟将领之以胁峒丁谕以大兵将至从我者赏不从我者杀若果不从即诛三两族兵威既立先胁右江此等既归顺则攻刘纪巢穴不难也郭逵性吝嗇卿宜谕朝廷不惜赏恐逵好作崖岸不通下情将佐莫敢言卿至彼为言之毋得轻敌高顿首拜诏既行与逵谕论频不合上复驰御戒飭之高初受命以为遥合不若亲见即欲驰至桂林乘兵形未动先抚辑两江峒丁择豪勇者啖以利招徠携贰隳其腹心然后以大兵临之逵不听留思陵州憑祥峒踰七旬高如何知交则始怵于李尚书悸继元之谋干德与其毋怨之而以国听阮洙洙每有懷服意而广源州刘纪甲峒

申景德俱拥强兵横山寨监押成卓故与洙景德相好高欲使卓赍勅榜入贼中招纳逵又不听高竟遣间谕纪纪将其族属请降已而大兵发思陵遂令燕逵先破广源复还永平兴兵会高又以唐源间道距交州十二驿趣利掩击出其不意川涂并进三路致讨势必分溃固争不能得贼遂据富良江列战舰数百艘官军不能济已而粮饷阻绝瘴毒日甚十万之众死亡十九高急分遣将吏伐木治工具机石如雨艨艟被击俱废徐以罢卒致贼设伏击之殪斩数千级没溺死者甚众馘其渠帅交人乃进降表遂班师而逵大惭于玩贼乙亥逵贬为左卫将军西京安置高为右正言直龙图阁知桂州其所得广源州者诏为顺州顺州地岩险岚障特甚自置州而官吏戍兵去者辄死明年秋干德遣使入贡且以顺州为请高请弗与岁戍以三千人十损五六不可守上曰干德犯顺故兴师讨罪逵等不能讨灭垂成而还今顺州荒忽瘴疠之地朝廷得之未为利岂可自驱戍兵投之瘴土一夫不还朕尚悯之况使十损五六耶乃诏罢归所略邕钦廉三州人口当还其地其后交人归所畧二百三十一人遂诏廉州与之是岁元丰七年也自沈起刘彝不能绥御逵人致陷三郡是役也仅得顺州又不可守竟弃之生口十得一而朝廷命徐禧计其费凡费钱帛金银粮草五百一十九万贯疋两石于二广之民自此大困

#### 神宗平归来州蛮竒塔特

泸州之南三十里有纳溪寨寨西南五里有罗苟夷八姓五十余村夷族千户元丰元年纳溪寨居民与罗苟夷竞误欧杀之夷诉于官官为验其寔夷恚愤谓汉杀我人官不偿我骨价又暴露我夷人由是寇边诏西阁上门使涇原路总管韩存宝都大经制夷贼公夷知归徠州竒塔特遣其亲信至纳溪寨率兵助王师存宝报以无用重兵纳能抚遏诸夷擒捕罗苟余党当厚赏竒塔特如约罗苟平存宝卒不与赏竒塔特怒遂率晏州夷六千余突至江安城下责存宝如约江安城守不可得数日乃引去知泸州乔叙使介邀之打誓誓已竒塔特率众复围罗个牟责税不入罗个牟者熊本所团结熟夷也以急来请兵时梓夔路都监王宣守江安即出兵与竒塔特战一军俱没天子闻之诏存宝将兵万五千人讨竒塔特以皇城使姚儿为第十将庄宅使吕真为第二将落苑使咸宁为第三将西京左藏库副使郭振为四将是岁元丰二年也归来州距泸州东南七百里存宝兵既出寨会久雨留屯不进遣人招谕竒塔特有文书服罪请降存宝以闻上悦御批诘之曰竒塔特昨既伤官兵又以害王宣等朝廷遣兵必诛首恶存宝自进兵以来未尝大有斩获今所竒塔特乞降文字未知存宝且欲以计欺贼乘便进讨或果欲受降如计欺贼乃用兵所宜若果欲受降深非朝廷出师之意如乞第尚能蚁聚委存宝多方择利掩杀如贼党逃溃亦选名将搜捕招募若逗遛不能成事必正军法既而军食尽存宝引还天子大怒命知杂御史何正已就按斩存宝亟命吏林广诣军代之广至则合兵三万为前后军日享军士士俱欲为用广先遣间入贼谕以逆顺且索王宣败时死亡士卒于是竒塔特归卒七人送降书而身不至广乃陈师徒于泸水率将吏东向再拜誓以灭贼遂以四年十二月再出击之始军行有二道自纳溪至江门近而险自宁远至乐共回远



而平贼意官军必出江门盛兵距险而大军寔趋乐共贼兵不能支遁去广分兵绕行席帽溪掩江门大破之师次落个网山西南蕃部族降者相继而斗蒲者不至广又遣兵讨之斩首五百级落茹兜山阿徐地部相率守三隘广又分兵腹背攻之斩二千余级得王宣王谨言陷贼时即是月丙午次罗布云竒塔特遣其叔父阿汝诣军门献马请降广从十余卒出军垒以待之竒塔特伏弩士毡裘犹豫不前广即发伏击之贼大奔溃斩阿汝及酋豪二十八人劾三百级获马铠仗及竒塔特父子所授勅告归徕州扬鼐溪有二桥竒塔特弟阿字乘竒塔特马度上桥追兵迫坠水斩之以为竒塔特争其尸以故竒塔特得径下桥跳去竒塔特既失去数将士数万相顾无人色复纵兵追袭会连雨雪甚刁斗无声次老人山山形俱刀剑立次黑崖然桂为薪上鸦飞不到山明年正月始入归徕州州唯茅屋数十分兵搜捕俱无所获所赍食尽得蛮所储粟千余斛馈运不继走马承受麦文炳问广军事当如何广曰已如朝旨荡贼巢穴虽未获元恶亦当班师待罪文炳乃出去年去月所授密诏题云至归徕州乃开至是开之诏云将来大兵深入讨贼期梟获元恶如已能破其巢穴及城守要害虽未能得乞弟万一粮运不继亦听班师军中俱呼万岁曰天子居九重明见万里外遂班师于昱筑乐共城江门寨席帽溪堡降附生夷三万余人其旁近诸蛮后番罗氏鬼主铺永西南石门君长等愿输贡职捷书闻迁广军马都虞候卫州防御使

太平治迹统类卷十七

●钦定四库全书

太平治迹统类卷十八

（宋）彭百川 撰

宣仁垂殿圣政

元丰八年二月癸巳上疾甚迁御福宁殿东阁之西间三省枢密院入问圣体见上于榻前王珪言去冬尝奉圣旨皇子延安郡王来春出阁愿早建东宫凡三奏上顾微肯首而已又乞皇太后权同听政候康复日依旧上亦顾视肯首既退移班东阁皇子及皇后太皇太后朱德妃皆在帘下珪等奏请皇太后权同听政皇太后辞避入内都知张茂则言太后且为国家社稷事大不宜固辞珪等请至于再三皇太后泣许珪进言自去岁上令皇子侍宴羣臣皆尝见之今必更长立乞再瞻覩是月三省枢密院亲王自朔旦至今日由内东门入问候于福宁殿惟是日未复再入先是蔡确谓上复用吕公着及司马则必夺己相乃阴与邢恕谋因与皇太后侄兄州团练使公绘宁州团练使公纪遊上初寝疾恕密闻公绘公纪二人辞不往明日又遣人招至东府确曰宜往见职方邢恕曰家有桃着白花可愈人主疾其说出道藏幸留一观入中庭红桃花也惊曰白华何在恕执二人手曰右相令布腹心上疾未损延安郡王冲幼宜早定议雍曹皆贤王也公绘等惧曰君欲祸我家竟去已而恕反谓雍王颢有觊觎心皇太后将舍延安郡王而立之王珪实主其事与内殿承制致仕王棫共造诬谤棫开封人嘗从高遵裕掌机宜于泾原倾巧

士也故恕因之人知确与珪异素不相能欲借此以陷珪他日亟问确曰上起居比如何确曰疾向安将择日御殿恕微哂曰上疾再作失音直视闻内别有处分首相外为之主公为次相独不知耶一日片纸下以某为嗣则公不知死矣公自度有功德在朝廷乎天下士大夫素归心乎确竦然曰然则计将安在恕曰延安郡王今春出阁上去冬固有成命羣臣莫不知公盍以问疾率同列具入亟于上前白发其端若东宫由公言而早建千秋万岁后公安如泰山矣确深然之恕又曰此事当略设兵备今与平时不同庶可以自表其曲折第告子厚同列勿使知子厚章惇字也确媿谢谓恕曰和叔见子厚具言之惇固凶险即许诺遂与确定议仍约之开封府蔡京以其日领壮兵待变于朝廷谓曰大臣共议建储若有异议者当以壮士斩之是日三省枢密院俱入问疾初亦未敢及建储事既退乃于枢密院南厅共议之确惇屡以语迫珪乘其应对或有差误即以珪为首诛珪口吃连称是字数声徐曰上自有子复何议盖珪实无他志但蓄缩不能先事纳说所以致疑及是出语确惇顾无如珪何寻复入奏得请俱出逢雍王顥及曹王顒于殿门外惇更厉声曰已得旨立延安郡王为皇太子矣奈何顥曰天下幸甚已而禁中安堵如故辅臣等各罢归翼日遂立皇太子确惇京恕邪谋虽不得纵其踪迹诡秘亦莫辨诘各自谓有定策功事从语闻卒为朝廷大祸其寔本恕发之【元丰末建储事诸家异说绍兴史官既别加考定专仿元佑旧文固得本寔矣第恨弗详今采取诸书稍增益之推原后来致祸如彼惨毒夷狄遂入国者盖由王珪任首相不早建白立太子致蔡确章惇蔡京等得乘隙进谤而萌芽则自邢恕发之其令蔡京领劔子入内廷确惇当时变色必有他说餽珪故珪不以为疑然开封之府何与朝廷事屯政坐珪愚闇耳若珪能即拒绝既无疑似之迹则横祸亦何从而来盖疑似之迹当时不过如此耳其后浸淫转加增饰遂自谓有定策功黄履疏高士京书至蔡懋宣和间劄子用诬讪文字诞名御制极矣诚可为痛哭也非建炎初圣主早悟果断明辨则朝廷之事岂有息乎】三月甲午朔执政诣内东门问候皇太后垂帘皇太子立帘外皇太后谕珪等皇太子精俊好学日诵论语七卷略不好弄止是学书自皇帝服药手写佛经三卷祈福因出所写经示珪等书字极端谨珪等拜贺遂宣制立为太子改名煦仍令有司择日备礼册命又诏应军国事并皇太子权同处分候康复日依旧本刻执政再入问圣体进呈立皇太子例降赦皇太后谕珪等皇太子立大事已定天下事更在卿等用心珪等言朝廷法度纪纲完具臣等敢不悉心奉行自此执政日再入【旧纪书甲午立延安郡王侑皇太子改赐名集诏国军事皇太后权同处分新纪同哲宗立为皇子旧录诬谤绍兴史臣已具下明文字甚多曾布手记亦曰神宗与子宣仁立孙本无间隙事已素定而奸邪诬罔尽以为蔡确章惇建策之功史官已删去从政江端友上书皇帝陛下臣伏覩宣仁圣烈皇后当元丰末垂帘听政保佑哲宗皇帝起司马光为宰相天下归心焉九年之间朝廷清明海内又安人到于今称之为大公直正之道仁民爱物之心可以近配仁宗至于力行祖宗正事抑绝外家私恩当是时耆老盛德之士田野至愚之人皆有复见女中尧舜之语其功德巍巍如此天下歌

诵如彼而一邢恕称造无根之语以为诬议使后世疑焉如日月之明而浮灵蔽之臣不胜痛恨】丁酉皇太后遣勾当御药院梁从政问王珪等欲以温州僧道亲前年所进龙寿丹进皇帝卿等议其可否珪等言今疾势如此医工束手无如之何尚冀此药灵异万一有效因以进御然亦无及也初元丰五年秋上不豫道亲诣尚书自陈前年在雁荡上岩间有一老人自上而下与道亲语付药一丸其大如弹曰尔速入京以进皇帝此药以万歳胜膏熬成可以金盃玉钵研之日三服三日九服服此可保九九之数药名龙寿丹道亲得之数月未行再于山林遇之仍趣其行比至都已闻上不豫依老人语不敢隐蔽尚书省异之不敢受其状后因奏事言及之上命从政取其状并药及问所欲道亲言老人但戒进药勿言乞拯济孤穷禁天下勿捕龟又乞太岁本命四立日慎酒药此外无所须也上遣从政至雁荡山以烧香为名访之无所见至是皇太后遣人于睿思殿求得之药与道亲二状皆上手自封题其言九九上即位至十八年又云四立日慎酒药上以立春日得疾云戊戌上崩于福宁殿宰相王珪读遗制哲宗即位尊太后为太皇太后皇后为皇太后德妃朱氏为皇太妃应军国事并太皇太后权同处分依章献明肃皇后故事如向来典礼有所阙失命有司更加讨论庚子以宰臣王珪为山陵使尊皇太后为太皇太后德妃朱氏为太妃辛丑元丰八年三月八日羣臣诣阙门上表请皇帝听政又诣内东门请太皇太后听政皆批答不从自是表三上从之己酉以皇帝即位分遣三省官奏告天地社稷宗庙内臣分诣诸神祠己卯礼部御史台阁门奏讨论故事详定御殿及垂帘仪每朔望六参皇帝御前殿百官起居三省枢密院奏事应见谢辞班退各令诸内东门进榜子皇帝双日御延和殿垂帘日参官起居太皇太后移班少西起居皇帝并再拜三省枢密院奏诣事三日己上四拜不舞蹈候祔庙毕起居如常仪帘前通事以内侍陛下以阁门军头司引呈公事可以权付有司者续具条奏吏部磨勘奏举人垂帘日引见应谢朝臣僚遇朔望参日不坐并先诣殿门次东门应招赐者并门赐从之丙辰上御迎阳门幄殿同太皇太后垂帘宰臣亲王以下合班起居常札分一十六班是合班以阁门奏请故也己未大中大夫知枢密院事韩缜门下侍郎章惇中书侍郎张璪同知枢密院事安焘并为通议大夫尚书左丞李清臣为大中大夫庚申银青光禄大夫守尚书左仆射兼门下侍郎郇国公王珪为金紫光禄大夫进封岐国公大中大夫守尚书右仆射兼中书侍郎蔡确为通议大夫诏以登位赐致仕前宰相守太师潞国公文彦博前执政宣徽南院使太子少师张方平观文殿学士知河阳冯京观文殿学士提举西京嵩山崇福宫孙固资政殿大学士知扬州吕公着资政殿学士知太原府吕惠卿资政殿学士知濠州蒲宗孟端明殿学士知江宁府王安礼宽衣银带银帛有差初司马光四任提举崇福宫既满不敢赴阙再乞西京留司御史台表上国子监未报会神宗崩光欲入临又避嫌不敢已而得闻观文殿学士孙固资政殿学士韩维皆集阙下时程颢在洛亦劝光行光乃从之卫士见光皆以手加额曰此司马相公也民皆拥光马呼曰公无归洛留相天子活百姓所在数千人聚观之光惧会放辞遂径归太皇太后闻之诘问主曰遣内侍梁惟



简劳光问所当先者光乃上疏曰臣闻周易天地交则为泰不交则为否君父天也臣民地也是故君降心以访问臣竭诚以献替则庶政修治邦家乂安君恶逆耳之言臣营便身之计则下情壅蔽众心离叛自生民以来未有不由斯道者也夫道由岐路近差跬步远失千里今皇帝陛下新临大寶德性高明太皇太后同断万几圣谟允大初发号令不可不慎斯乃治乱之岐途安危之所分也当以要切为先以琐细为后臣窃见近年以来风俗颓弊士大夫以偷安为智以范言正论为狂是致下情蔽而不上通上恩壅而不下达闾阎愁苦痛心疾首而上不得知明主忧勤宵衣旰食而下无所颂公私两困盗贼已烦尤頼上帝垂休歲不大饥祖宗貽谋人无异志不然则天下之势可不为之寒心乎此皆罪在羣臣愚民无知往往归罪先帝此臣所以日夜感愤痛心泣血不顧死亡思有开发于朝廷者也臣以为今日所宜先者莫若明下诏书广开言路不以有官无官之人应有知朝廷阙失及民间苦者并许进寔封状尽情极言仍颁下州县诸路州军于所在要闹处出榜晓諭在京则于鼓院检院投下委主判官画时进入在外则于州军投下委长史即日附递奏闻皆不得取责副本强有抑退其百姓无产业人虑有奸诈即责保知在奏取旨挥放令逐使然后望陛下以听政之暇略赐省览其义理精当者即施下其言而显擢其人其次取其所长舍其所短其狂愚鄙陋无可采者报闻罢去亦不加罪如此则人言日进羣臣无隐陛下虽居九重而四海之事如指诸掌举措施为惟陛下所欲斯乃治安之源太平之本也陛下若以臣言为可取伏乞决自圣意下学士院草诏施行四月又诏元丰六年已前积欠夏秋税租及縁纳钱物并依三月六日赦书指挥特与除放诏曰恭以先皇帝临御四海十有九年夙夜励精建立政事所以惠泽天下传之后世比闻有司奉行法令往往失当或过为烦扰违戾元降诏旨或苟且文具不能布宣寔惠或妄意窥测怠于举职将恐朝廷成法因以隳弛其申諭中外自今以来协心循理奉承诏令以称先帝更易法度惠安元元之心敢有弗钦必底厥罪仍仰御史台察访弹劾以闻资政殿学士大中大夫司马光知潮州承奉郎秘书少监孙觉兼侍讲奉议郎宗正等丞刘次庄为殿中侍御史奉议郎真定府路安抚司勾当公事孙升为监察御史朝奉郎刘摯宣德郎张汝贤为吏部郎中朝奉郎集贤校理梁焘为工部郎中奉议黄庭坚为校书郎诏守太师开府仪同三司潞国公致仕文彦博不许辞免两镇节度诏许枢密院依旧制开便门与中书省相通赴部堂议事辛巳奉议郎职方员外郎邢恕为左司员外郎蔡确初未知恕文彦博之归洛阳恕有诗送行神宗尝对确称为且谓恕又在馆下当迁确曰熙寧变法之初恕有异议不可用神宗不答确退朝即召恕告之恕寻迁著作郎不半歲又迁职方员外郎恕雅善司马光吕公着确爱光及公着必复用遂深交恕意欲因恕以结二人也然恕轻险为确有定策功于是骤迁都司中书省言登极赦书并今月八日朝旨民户欠去年夏秋税租元丰六年已前税租积欠并縁纳钱物倚合税等乞并特除放之诏诸民户欠元丰七年以前常平免役息钱各特免放五分买扑场务佃赁田宅空地出限当罚钱调奉天河防急夫开修京城濠及兴永利夫罚钱役人误给工食钱亦并除

放司马光言疏新法病民此皆羣臣躁于进取误惑先帝使利归于身怨归于上非先帝之本意也又言如保甲免役钱将官三事皆当今之急务厘革所当先者为今之计莫若择其便民益国者存之痛民伤国者悉去之使天下晓然知朝廷有爱民之志吏之苛刻者必变而为忠厚民之离怨者必变而为亲誉德业光荣福祚无穷岂不盛哉况今军国之事太皇太后陛下权同处分是乃母改子之政非子改父之道也何惮而不为哉惟圣明裁察陈所急于二月三十日上言以近歳风俗頽弊士大夫以偷安苟且为智以危言正论为狂致闾阎愁苦而上不得知明主忧勤而下无所诉公私两困盗贼已烦宜下诏书不以有官无官之人有知朝廷阙失及民间疾苦者并许进实封状鼓院检院州军长吏不得抑退其义精当者行其言而显其人狂愚鄙陋者报闻罢去亦不加罪今皇帝陛下新即位太皇太后初垂帘天下之人莫不属目倾耳臣自到西京以来朝夕伏听惟新之政以为必务明四目达四聪以发天下积年愤鬱之志今开言路之诏不闻颁于四方而太府少卿宋彭年言在京不可不并置三衙管军臣僚水部员外郎王谔乞依保马元立条约限均定逐年合买之数又乞令大学增置春秋博士使诸生肄业朝廷以非其本职而言各罚钱三千斤臣忽然闻之怅然失圖愤抑无已臣非私于二人直为朝廷惜治体耳夫阿意箝口容身窃禄此小人之利也威福在己人莫敢言此大臣之利也然民怨于下而不闻国家陆危而不知于陛下有何利哉彼宋彭年王谔臣素不识不知其人为贤为不肖但惜陛下临政之初而二臣首以言事获罪臣恐中外闻之忠臣解体直士挫气欲仕者敛冠藏之欲谏者咋舌相戒则上之聪明犹有所不照下之情伪犹有所不达太平之功尚未可期也今二臣之罚既不可追伏望陛下如臣前奏下诏不以有官无官当职之人皆得进言择其可取者微加旌赏则天下之人闻知朝廷乐闻善言不怠论事无可取者寝而勿问庶几纳忠之人犹肯源源而来也臣禀赋愚戆文学政事皆出人下惟不识忌讳不阿权贵遇事妄言无所顾避以此荷知于累朝见称于众人若亦不得言则无所复用于圣人也上辜太皇太后陛下下问之意下负微臣平生愿忠之心内自痛悼死难瞑目臣久忝便安今朝廷授以名藩义不敢辞见牒本州岛县逡接公文起发赴任及到官之日但勉极疲弩恪勤本职苟力所不逮伏须罪戾不已于是令先过阙入见己亥诏资政殿大学士银青光禄大夫兼侍读吕公着乘传赴阙庚戌金紫光禄大夫守尚书左仆射兼门下侍郎岐国公王珪卒辍视朝五日初赠太尉再赠太师谥曰文恭礼部言当举哀成服诏以大行在殡罢之珪自辅政至宰相凡十六年无所建明守成而已时号为三旨宰相以其上殿进呈云取圣旨上可否讫又云领圣旨退谕禀事者云以得圣旨故也资政殿学士通议大夫司马光为门下侍郎初光知陈州过阙未入对上疏畧曰臣乞下诏广开言路凡有官无官之人并许进实封状乃顾下诸路州军于要闹处榜晓谕鼓院检院州军长吏不得抑退昨奉圣旨令入见及到京蒙降中使以五月五日诏书赐臣看阅臣狂瞽妄言曲荷采纳岂独微臣之幸抑亦天下之幸此乃圣王之先务太平之本原也然臣伏读诏书始末之言固尽善矣中间有云若乃阴有头懷犯非其分或

扇惑机事之重或迎合已行之令上则观望朝廷之意以徼幸希旨下则徇惑流俗以干取虚誉实出于此苟不惩艾必能乱俗害治然则黜罚之行是亦不得已也臣闻明主推心以待其下而无所疑忌忠臣竭诚以事其上而无所畏避故情无不通言无不尽今诏书求谏而逆以六事防之臣以为人臣惟不上言上言则以六事罪之矣伏望圣明于诏书中删去中间一节如臣三月三十日所奏颁布天下使天下之人晓然知陛下务在求谏无拒谏之心各尽所怀不忧黜罚如此则中外之事远近之情如指诸掌既除门下侍郎光又以札子辞免乞对讫赴陈州并请更张新法于是太皇太后遣中使梁维简赐手诏谕令供职曰嗣君年德未尚吾当同处万务所頼方正之士赞佐邦国切要与君商量政事卿又何辞再降诏开言路须卿供职施行光乃受命六月诏河东州军人户见欠和余粮草自三月六日赦书到日元丰七年以前所欠并与除放丙子资政殿学士提举崇福宫韩维知陈州维初赴临阙廷太皇太后降手诏劳问维奏治天下之道不必求高远止在审人情而已识人心不难以己之心推人之情可见矣凡人之情贫则思富苦则思乐劳困则思息郁塞则思通陛下诚能常以利民为本则民富矣常以爱人为心则民乐矣役事之有妨农务者去之则劳困息矣法禁之无益治道者蠲之则郁塞通矣推此广之尽诚心而行之则神孙观陛下之法不待教而自成圣德贤士闻陛下之风不烦谕而事先忠力矣何忧军民不欣戴社稷不安固乎又奏臣近者伏覩传录到朝堂所出榜文开示大信招来羣言皆前代帝王之高致而方今朝廷之急务天下幸甚然臣尚有疑者乃阴有所怀至不得已也七十五字幸非元谕圣旨之本意以增饰而为之者又云若不改正臣恐自今圣聪渐成壅蔽伏望陛下深察此弊而痛絶其端特作圣意批降旨挥令刊去此七十五字只以榜前所云别撰诏文徧颁天下使万方之人豁然知圣人好谏之心披雾而覩青天白日岂不快哉于是起知陈州未行召赴阙遂留经筵是日司马光言臣伏见皇帝陛下初临大寶太皇太后同断万几侧身虚己渴于求谏于五月三日特下诏书大开言路此诚明主之先务太平之本原也窃见中间一节天下见者未达圣心咸以为朝廷虽名求谏实恶人言豫设刑禁有上言者皆可以六事罪之臣愚欲望圣慈下学士院别草诏书除去中间一节务在勤求谏言使之尽忠竭诚无有所讳仍乞徧颁天下在京于尚书省前及马行街出榜在外诸州府军监各于要闹处晓示不以有官无官之内应有知朝廷阙失及民疾苦者许并进实封状言事在京则于登闻鼓院检院投下委主判官画时进入在外于州府军监投下委长史即日付递闻奏不得取责副本强有抑退其百姓无家业人虑有奸诈即令本州岛责保知在奏取旨挥放令遂便有上件实封状其所闻至当者用其言而显其身其是非相半者舍短取长其言无可采事不可行者亦不加罪如此则下情无不通嘉言罔伏聪明周四远海内如指掌矣或虑奏状繁多难以亲览即先条付委三省官看详择其可取者用黄纸签出再进入留置左右以备规戒或乞降付有司施行从之丁亥诏曰朕绍承燕谋获奉宗庙初揽庶政郁于大道夙夜祗畏不敢皇宁惧无以彰先帝之休烈而安辑天下之民永惟古之王者即政之始必明



目达聪以防壅蔽敷求谏言以辅不逮然后物情徧以上闻利泽得以下究诗不云乎访予落止此成王所以求助而羣臣所以进戒上下交儆以遂文武之功朕甚慕焉应中外臣寮及民庶并许实封直言朝政阙失民间疾苦在京于登闻鼓检院投在外于所属州驿置以闻朕将亲览以求其中而施行之司马光凡三奏乞改前诏于是始用其言也吕公着既上十事【十事见辅道哲宗门】太皇太后遣中使梁惟简谕公着曰览卿所奏深有开益备见忠谅良切嘉称当此拯民疾苦更张何者为先更无灭裂具悉以闻复上奏云陛下必欲更修庶政使不惊物听而实利及民莫若任人为急乞广开言路选置台谏登用正人此最为当今急务遂荐【孙觉范纯仁李常刘摯王岩叟蘓辙】太皇太后封公着札子付司马光详所陈有无兼济之才直书当与未当以闻司马光荐【刘摯赵彦若傅尧俞唐淑问范祖禹等六人范纯仁吕大防王岩叟王存孙觉又荐赵君锡李常晏知止范纯礼胡宗愈韩宗道梁焘蘓轼朱光庭蘓辙】知庆州范纯仁应诏言得失【六月二十二日求言范纯仁在庆州此月未能上疏更详】秋七月朝奉大夫范纯礼为户部郎中【六月末司马光之所荐也】吕公着为尚书左丞上言应三省事合进呈取旨者以正前失诏应三省合取旨事及台谏章奏并同进施行庚戌三省枢密院言同差除及进呈文字理须会议者先于都堂会议或遇假及已归东西府厅便门往来聚议从之司马光以近年诸州勘到刦贼但不曾杀人情理可愍者并从宽贷【明难州长者曰元佑初温公当国天下之刑减往时少半非盛德孰能之】司马光言臣伏见陛下诏开言路至今已涉旬月臣僚臣庶上言朝廷阙失民间疾苦仍降出令臣与执政看详其第一次降出三十卷臣谨与诸执政选择其中除无所取及冗长之词外其可取者已用黄纸签出进入乞伏乞陛下取签出更赐详览或留置左右以备规戒或降付有司商议施行如此则忠言日进聪明日广诚生民之厚幸社稷之盛福也其间亦有一事而众人共言者臣亦重复签出盖欲陛下知天下所共患众情所同欲也又言青苗免役保甲保马困民九月辛丑诏吕大防曰卿镇蜀日久西南生民疾苦利害新法有困于民未便者想多闻见卿未到阙宜先以所见条析急递奏来于入内侍省投进无有所隐朝奉郎秘书少监刘摯为侍御史摯言切惟陛下即祚临政之始其所先者宜莫若广言路故臣今就职之日首献其说祖宗以来谏官御史张设员品罕不备足凡在职者皆称谏诤之臣欲望圣慈于谏院增置谏官员数本台六察御史并许言事其所领按察自不废如故所贵共尽忠力交辅圣政朝奉郎蘓轼为礼部郎中监察御史王岩叟上疏言青苗役法保甲之法十分之六七犹在此遂非饰过以欺圣听非至诚为国家去大害复大利者以便百姓为太平长久之策也臣愿陛下奋然独断如听政之初行此数事则天下大乱无事而陛下高枕而卧矣【保甲役法】十月癸酉诏仿六典置谏官其具所置员以闻从刘摯之言也丁丑诏尚书侍郎给舍谏议中丞待制以上各举堪充谏官二员除范纯仁为谏议大夫唐淑问为左司谏朱光庭为右正言蘓辙为司谏范祖禹为正言令三司枢密院同进呈太皇太后问此五人何如执政对曰外望章惇曰故事谏官令两制已上奏举执

政进拟今除自从中出臣不知陛下何以知之得非左右所为此门不可浸启太皇太后曰此皆大臣所荐非左右也后以亲嫌范纯仁改为天章阁待制祖禹为著作佐郎寻复以纯仁兼侍读诏监察御史兼言事殿中御史兼侍事始用吕公着及刘摯之言也诏比者诏令屡下兼以均宽民力便安公私如闻官吏狃习故态不即奉行或致废格使远近之人未尽被惠自今仰悉心奉行监司检察上有违戾即御史台弹奏侍御史刘摯言臣窃谓州县之政废举得失其责宜在监司夫监司之任亦重矣人有一贤不肖则环地数千里休戚系之比蒙圣旨哀念元元取监司罪恶已甚者既去之矣然其余人才颇上驳杂情之未一各怀所私盖其阴有观望者则必习常而慢令以致惠之壅其浅中觊利者则又特矫枉而过正或以其所宜治之事二者不可不察惟得其人庶惩此患臣欲望圣辞详酌河北河东陕西素号剧部向来所用使者出于暴进多非更历民事人微望轻惟自过威刻而下终不服今宜稍复祖宗故事于三路各置转运使用两制臣僚充职以重其任自余诸路亦望推择资任稍高练达民政识治体近中道之人分补监司之任明授之以政令使忠厚安民而不失宽弛肃给应务而不失之浅薄部使者诚如此州县之政随之则先帝之政陛下之恩德庶几下究而与民休息无难矣考察见今之无状者一切澄汰罢之被罢之人苟非有显过宣还其资考别为任使要令不至于失职无聊而已方今先务恐实在兹伏望详酌施行十一月朝议大夫鲜于侁为京东转运使于是司马光语人曰今复以子骏为转运使诚非所宜朝廷欲求东土之弊非子骏不可此一路福星也可以为诸路转运使模范矣又曰安得百子骏布在天下乎侁既至奏罢莱芜利国两盐铁冶又乞海盐依河北通商民大悦又乞止绝高丽朝贡只许就两浙互市不必烦扰朝廷事虽不行然朝廷所以待高丽礼数亦杀于前云司马光言臣切惟陛下富于春秋太皇太后亲临万几事无大小皆委于执政垂拱仰成万一羣臣有所见不同势均力敌莫能相一伏望陛下特留神察审是非若甲是而乙非当舍乙而从甲乙是而甲非当舍甲而从乙如此则羣臣莫敢不服善政日新矣不然陛下虽有求治之心事功无时而成也奉议郎太常丞王觐为右正言觐首上疏论知人安民司马光言臣观今日公私耗竭远近疲弊其原大槩出于用兵先帝深悼其然厌截截谰言思番番良士乃下哀痛之诏息兵富民奄有天下肇承基绪太皇太后同听庶政首戒边吏毋得妄出侵掠俾华夷两安今契丹继好乘常纳贡干德拜章征戎开拓之义皆已息矣则此置提举散青苗免役钱点教保甲置都作院养马置将官市易司封状买坊场茶盐额措置河北余使司皆为虚设陛下幸诏臣民各言疾苦其已至者千有余章未有不以此数事者知其为天下公患众人所共知非臣一人之私言也利害着明皎如日月各言疾苦而羣臣犹习常安故惮言更张虽皆裁损而监司按堵将官具存保甲犹教阅保马犹养饲边州屯戍不减军器造作不休茶盐新额上在差役旧法未复是用兵虽息而公私劳费犹未息也如此因循不知改辙数年之后万一遇水旱大饥盗贼羣起其为国忧患岂敢不尽心哉伏愿陛下断自圣心凡王安石等所立新法果能胜于旧者则存之其余臣民以为不如旧之事

欲乞陛下宣谕执政今因臣民上封事熟议利害进呈以圣鉴裁决而行昔夏遵禹训商用汤法周循文武之典盖创业垂统之主贻厥孙谋后世所宜谨守不可失也若凡百措置率由旧章但使政悉如熙宁之初则民物熙然海内太平更无余事矣议者必曰革弊不可仓卒当徐有如此何异使医治疾而曰勿使遽愈且勿除其根源使尽也其为医者谋则善矣其为疾者谋奚利哉御史刘摯言伏见昨日皇帝陛下太皇太后陛下听治之初惠绥天下去民之所不安至于振淹滞绌贪刻发政施仁无有虚日故近至畿甸远至海隅莫不鼓舞承风倾心以听太平而近者一两月以来政事号令之见于施行者旷然稀阔中外喁喁无所见闻深求其故皆以为执政大臣议论不一之所由致也有阴拱而坐观者有阳合而内睽者有强横以肆制者有忍耻以怀旧者滞事积前相顾而不发故仁泽施于上而不下庶政壅于朝而不行以致文书稽留人情隔塞伏望圣慈详察事变防微杜渐特诏辅臣当务同协恭相倚以信去其贰心以济国事应今来政事之稽迟未决者趣令条上旨则望圣慈发自睿断别白施行以幸天下又言天时乖戾之变欲乞先次许台谏上殿奏事所贵公议人情不至隔塞元佑元年正月壬辰诏曰久愆时雪虑囚系淹留在京委刑部郎中御史开封府界今提点司诸路州军今监司催促结绝先是上封者言切惟时雪未应阴阳不和意者刑狱未至钦恤法令未至宽民宜下诏恤天下刑狱故也右正言朱光庭奏疏言章惇蔡确韩缜等居位恐累圣政甲辰御史王岩叟言今天下之人害莫如青苗免役之法阴困生民莫如茶盐之法流害数路陛下固知之矣且优柔而未断以绝其源此民心之所以犹郁而天意之所以未开也朝中之大奸莫如蔡确之阴邪险刻章惇之谗贼狼戾相为朋比以蔽天聪虐下罔上不忠之迹着于两朝天下之人皆愿逐而去之以致清平而陛下反容而留之此民心之所以犹郁而天意之所以未开也伏望陛下上体天心下观民意奋励勇刚一革大害一去大奸以为宗社无穷之休以为生民莫大之福臣不胜拳拳忠告之至己酉司马光以疾谒告司马光吕公着既迁官光寻以疾谒告是日复有诏放正谢及恭谢光惶恐不敢奉诏乞疾间入谢依减拜旨挥光自是凡十有三旬不能出然奏疏相属五月十三日光乃入对延和殿又移书三省其略曰当今法度所宜最先更张者莫如免役钱不惟刻剥贫民使不聊生又顾得四方无赖浮民使供曰役官不得力为之计莫若尽罢免役钱依旧差役民间息肩者十已七八又曰朝廷今欲整治天下蕪息贫民先须十八路得好监司一两人忠厚晓事爱民忘私使之进贤退不肖兴利除害前日所草监司资格及委官荐举文字不知诸公曾徧见未若如此可行则早告进呈施行又云旱势可惧宜将常平米赈济直至成熟日还纳更不取利息如此始是实惠范景仁当仁宗不豫未有继嗣天下寒心莫敢启口之时独能首建大议以安宗庙社稷章十九除官不拜乞优与推恩又移书枢密院略曰吕大忠言忧寇乍恭乍警由私市公行故也其延庆侵疆有害无利终当与之然今日未可与也俟大忠到官审察事势先奏乞严禁私市不必年岁问彼必曲服遣人来祈请然后朝廷下诏旷然归以侵疆赦其罪戾贡赐往来一切如故此策大善请明日更召见询访



其详河东经略司总领二十余州军边面千余里地接二敌帅府之重孰过于此而以吉甫处之果能称职否渠自乞扬州诸公何不早许之别择老成重厚有胆畧者代之御史所言保甲罢按阅甚当宜从之又手书与公着曰晦叔自结发志学仕而行之端方忠厚天下仰服垂老乃得秉国政平生所蕴不于今日将何俟乎比日以来物论颇议晦叔慎默太过若此际复不廷争事有蹉跌则入彼相矣愿慎旃光诚不敢以忧国为已任然昨日富家之喻已上闻矣光自病已来悉以身付医家惟国家未有所付今日属于晦叔矣二月丁卯诏曰朕绍承圣绪总揽庶政永惟四方万里之远其能使吏称其职而民蒙其泽者以司监得其人故也然非左右侍从之臣各举所知安能尽得天下之才而用哉孔子曰如有所誉者其有所试矣朕将考核能否而进退诛赏为应内外待制大中大夫以上限诏到一月各举曾歷一任知州已上聪明公正所至有名堪充监司者二人委中书籍记遇转运副使提点刑狱有闻选差若到官之后才识昏愚职事堕废荐不按罪喜怒任情即各依本罪大小并举者加惩罚正议大夫守门下侍郎司马光依前官守尚书左仆射兼门下侍郎光方以疾再乞宫观未报而有是命光固辞不许闰二月司马光欲露章举文彦博自代不听诏户部勘会应系诸色欠负窠名数目若干系官本若干系息或罚及逐户以纳过息罚钱数并抛下免役及坊场净利等钱仍以欠户以纳过见今有无当抵物力速具保明以闻从蘓辙甲戌所奏也孙觉言窃见已降制除司马光左仆射中外交庆以为得人然臣见光论役法颇或疎略寻有旨更差韩维等四人等切详定立法推行可以永久矣光之学集行义羣臣莫与比者如更得忠亮笃实才识明敏之人相与左右揆度则万务无不举矣今韩缜人品污下才薄望轻伏望圣慈罢缜相位别赐推选有德有言堪其任者擢以代之诏诸路转运使除河北陝西河东外余路只置一员副使或判官一员其诸路提举官罢从司马光之言也王岩叟又奏两宫垂帘杜絶内外如此甚善盖斜封墨敕不宜于今日有自古事盖出于外人交结宦官女谒遂卖官鬻狱无所不至不可不防微太皇太后曰极是壬寅右司諫蘓辙曰臣闻薄赋敛散蓄聚若以救贫而民安其生久而不胜其富也故臣愿于元丰库或内藏军乞钱二十万贯为招军例物选文武官僚有才干者往河北逐路于保甲中招其强壮精悍者为禁军随其人才以定军分合河北寇贼成羣皆是保甲余党若因之饥饉则变故之作不可复知臣访闻淮南久旱二麦并已枯死官吏未见賑济臣欲乞指挥淮南官司先将所管义仓米数随处賑济兼将常平米减价出卖及取问监司州县因何并不曾申请擘划兼乞体访诸如有似此阙食去处一例施行又奉蠲积欠丙辰右司諫王岩叟右正言朱光庭进对太皇太后曰知卿等公正不由执政用卿朝廷有阙失一一言来太皇太后垂帘官家又年纪小不比神宗时若非台諫公正忠孝及执事得人一人耳目何得尽知天下事谓之执政若不执奏事却要何用台諫官若畏避何以立事卿驳安燾极当极知卿公正非不知安燾不才无公望但以顾托不欲尽去卿等所言多已施行余事休避仇怨安心言事三月右司諫蘓辙论除安燾诰不令给事中书读是时工部尚书孙永为吏部侍郎李常为户部尚

书常文士少吏干或疑其不胜任以问司马光曰使此人掌邦计则天下知朝廷非急于征利贪使望风掎刻之患庶少息也常言诸路吏不达朝廷爱民之意以调凡所以供给县官皆可废弛孟子曰无政事则财用不足赋税课人国政之大者苟或不振何以上佐国用伏望圣慈特下诏令申饬官吏无谓宽民恤物之德方行于上而于赋租课人废弛不治以误大计先是太皇太后遣勾当内东门司梁惟简赐文彦博手诏曰予宫中阅故书得卿神宗时所上亲书章奏见卿议论切于治要至诚忧国忠义可见深用嘉叹卿平时所蕴如此况当兹国难之际想多忧勤予佐助机政斯逾年矣如近者黜陟臣僚因革庶政公议可乎夏国未附御以何术卿之所知贤人堪大任者亟当论荐用副东求所访事可条具闻奏切待至言以补阙失【据元佑密疏彦博此奏以三月十五日上今附本月也】是日文彦博奏堪大任者三人【刘庠苏颂刘奉世】又言困西羌之策考功员外郎林旦为殿中侍御史承议郎韩川权发遣推官上官均并为监察御史中丞刘摯之举也中书舍人蘓軾不行叙复沈起词头命入内押班梁从吉赉诏赐守太师致仕文彦博曰卿践更二府弼亮三朝名闻四海功在天下注想元老渴见仪型宜疾驰驱副我虚懷诏书到日卿可肩輿赴阙并男昭庆居中随侍令河南津置行李先是司马光除左仆射固辞以疾乞召用彦博而已佐之不听及将韩缜太皇太后以御札付光欲如卿所奏除光奏彦博勋德爵齿遠在臣前若以彦博行尚书左仆射臣守右仆射则事体具正太皇太后又批付光曰卿忧国遠虑不为身谋其亦可知今若一旦使彦博名卿之上于予所以待卿之意深未允当卿更思之光又奏曰窃惟彦博光辅四朝勋德着明为太师年八十一臣为京官彦博己为宰相所奏益国体惟陛下幸听太皇太后卒不听及韩缜罢即遣中使召彦博盖用光奏诏诸路灾伤賑济及盗贼公事及转运司兼管其贼盗赏钱许于青苗息钱内支候役法了日奏取指挥左司諫王岩叟言访闻淮南旱甚物价踊贵本路监司殊不留意伏望选官措置诏发运司截留上供米一十万石比市价量減出粿与阙食人户不得过三石其粿到钱起发上京司马光言臣伏覩近降朝旨令户部指挥府界诸路提点刑狱司体量州县人户如委是缺食据现在义仓及常平米穀速行賑济仍叮咛指挥州县多方存恤无致流移失所此诚得安民之要道然所以使流民不移者全在本县令佐得人欲更令提点刑狱司常切体量逐县令佐有能用心存恤缺食人户虽系灾伤并不流移者闻明公优与獎擢其全不用心賑济致令人户多有流移者取勘奏闻乞行停替庶使官吏有所劝沮百姓寔沾圣泽三省进呈依奏右諫议孙觉言淮浙灾伤米穀踊贵虑盗贼因緣而起乞差官体量广行賑济遍下诸路灾伤各以实言如不实者坐之时灾伤转运等司并无奏报及宿毫至甚诏令发转运司体量灾伤州县缺食处仍令宿亳州分析并不申奏灾伤次第及且见今斛斗例冬疾置以闻诏内外待制以上举堪充转运判各二员辛丑诏曰朕惟兰台延阁皆圖書秘记之所藏而校讎论譔位序多阙永惟祖宗乐育贤俊常诏二府荐士置之秘府养其德器以待试用朕甚慕焉执政大臣吾之所重也宜各举文学政事行谊之臣可以充馆阁之选者三人各以名闻朕

将考其才器而甄作之乙卯右司谏蘓辙言伏见淮南旱灾民食踊贵朝廷特令截留上供米三十万石以济其急恤民之深意时所未尝有然臣访闻本路自正月以来义仓常平仓粮斛逐旋赈济约至夏中麦熟稍得给足不意今来旱潦益深夏麦无望而秋成之期远在百日之后虽有前件截留上供米分在一路恐未能徧及饥民访闻发运司约定今年合留代上供外其余粮令只依乞买价尽数支拨于都郡出卖不得收买钱仍先是具若干留代上供若干可以出卖及元买价例申奏所贵米数稍多救接饥馑可支持至秋先是太皇太后遣中使程衍赉御札就赐司马光范纯仁奏乞以文彦博为师臣备顾问可以尊朝廷服四夷朱光庭札子乞尊礼为帝师勿劳以宰相执事所有朱光庭札子三道付卿看详可亲书条具闻奏者光言臣蒙恩推为宰相自知智力浅孱歷事未多故乞陛下以文彦博为侍中行左仆射而臣佐之庶无罪悔今范纯仁朱光庭以为彦博老师臣不可烦以吏事此在陛下裁度若止太师平章军国重事令五日或六日一入朝因至门下中书都堂与诸政商量事合执政就宅谘谋其余常程文书只委仆射已下签书发遣如此亦足以尊大臣优老臣从之司马光辞许乘轿子三日一至都堂聚议恩命中书舍人蘓軾不行张诚一词头范百禄不行李定词头甲寅诏曰朕惟先帝临御以来讲求法度务在寬厚爱物仁民而縉绅之间有不能推原朝廷本意希功揜克或妄生边事或连起狂狱积其源流久乃知弊此羣言所以未息朝廷所以惩革也整飭风俗修明纪纲兹出大恭盖不得已况罪显者已正恶巨者已斥则宜荡涤隱庇阔畧细故岂复究治以累天和夫疾之已甚仲尼不为御众以寬有虞所尚为国之道务全大体应今日已前有涉此事状者一切不问言者勿复弹劾有司毋得施行各俾自新同归美俗布告中外体朕意焉八月左司谏蘓辙言乞择监司庶郡县稍得良吏九月司马光卒【见拾遗门】中丞刘摯言下诏以安反侧非是乞寢诏书以免四方疑惑翰林学士蘓軾荐王巩充节操方正可备献纳科十二月诏依元丰三年诏书更不上尊号除叶康直为直龙圖阁权知秦州曾肇蘓辙再缴还词头曲为皇朝捐躯征进敢辞劳愿扫荡边尘静扶红日上青霄顿不料权奸阻火速遣亟牌召班师旅脱战袍空教父老望旌旄傅尧俞王岩叟同对延和尧俞前对太皇太后曰以卿有才望用卿尧俞拜讫未奏事先问曰今天下政事如何尧俞称善且曰但恐陛下临御日久稍有怠堕如能兢兢业业日谨一日常以大公之德自守则天下无不治左司谏朱光庭言学士院试馆载策题考试官不识大体不忠莫大策题蘓軾文也诏特放罪王岩叟言应州县灾伤人户缺乏粮食许结保借贷并令免息常平穀杀之二年二月诏左司监朱光庭诣河北路与监司一员徧视灾荒按累降指挥措置赈济有未尽未便并得从宜事体稍重即奏禀仍访本路从来如何赈济今流俗多如官吏奉法不处即按劾以闻诏蘓軾撰富弼神道碑以显忠尚德为额其子绍庭请也三月学士蘓軾草太皇太后受册诏诏内外举堪知州者从御史吕陶之言也诏曰朕承祖宗之休获受大统涉道日浅昧于致治每事失中以干阴阳之和乃自冬迄夏旱暵为虐四方之内被灾者广生民嗷嗷无所告劳永惟灾变之来盖不虚发意者朕之



听纳不得于理欤赏罚失当而税赋无节欤民力屈竭而土木营欤抑忠言壅于上闻而德泽不流欤何灾异以之滋至也非克己思过洗心修德其何以答塞天变叶致太和可自今月十一日后避正殿减常膳公卿大夫其勉修厥职共图消复四月诏旱暵为虐苗稼将稿民则何罪究实在予虽侧躬损膳尚虑无以消变而有司乃于此时屡奏受册是欲以隆名盛礼加我是重予之不德也所有将来受册礼宜权停罢仍诏诸路监司分督郡县刑狱以久愆时雨司諫王覲有请也台司諫蕙轍上疏欲乞明降诏书许百官面奏公事以尽羣臣之异同阅人才之贤否庶乎灾患可息五月诏令学士院降勅书奨諭知楚州程之元以淮南賑济数言之元疚心存抚请褒擢故也癸酉吏部侍郎胡宗愈为御史中丞因奏对便殿上问朋党之弊宗愈曰君子义之与比谓小人为奸邪小人指君子为朋党陛下择中立不倚者用之则朋党自清因进君子无党论八月诏赐文彦博吕公着今后入朝凡有拜礼宜并特免卿宜专有为之振畧无益之仪翰林蕙轍奏彦博公着免拜指挥自是朝廷优贤贵老度越古人无可议者但有司合守典礼兼恐彦博公着不敢当不若允其所请若圣恩优其所悯老臣眷养不已遇其朝见问或传宣不拜足以为非常之恩所有不允批答臣未敢撰从之是日太皇太后遣中使赐宰相执政酒果并黄金犀带諭旨云知卿等于边事极劳心故有是赐吕公着告彦博等曰密賚可辞果庄得罪先帝获之诚可庆若便指庙堂之功则将帅闻之过有希望启向去贪功生事之弊不可不熟虑彦博等遂各辞免不许乃受之臣僚言赦令减放民间秋夏二税积欠及坊场败阙课利之类州县不肯依赦令直行放免欲乞御史台体访民间欠负未经行遣及虽以行遣而未尽者乞付吏部重行黜责诏令诸路监司限一月即速依勅结絶开具奏闻十月朱光庭为太常少卿诏运淮南二州所余穀四十万斛賑济京路丁卯诏赐御筵于吕公着私第遣中使赐酒及禁中果寶綬金花环奇珍异十倍常人以御饮噐劝在席饮甚苦惟于公着颇寬皆异恩也壬申诏吕公着等于文臣中择有才行风力廉智边事堪大用者公着奏荐孙固蕙頌李常孙觉赵瞻顾临胡宗愈等七人蕙轍为户部侍郎顾临为给事中十一月孔文仲为中书舍人丰稷为右司諫杨康国为监察御史知枢密院安焘言大雪异常久阴未解细民失职上貽忧念愿令贬黜以塞天戒刘安世为右正言诏罢变卖市易司元丰物从三省请也甲戌蕙轍言臣近面奏圣旨何故屡入文字罗织臣具以疾病之状又蒙宣諭岂以台諫有言故耶兄弟孤立自来进用皆是皇帝与太皇太后主张不因他人今来但安心勿恤人言不用更入文字求去臣退伏思念顷自登州召还至备员中书舍人以前初无人言只道叅议役法及蒙擢为学士后便为朱光度王岩叟贾易韩川赵挺之等攻击不已以至乞郡语言巧加酝酿谓之诽谤未及试院先言任意取文虽圣主知臣无罪然臣窃自惟盖緣赋性刚拙议论不随而宠禄过分地势亲迫故致纷纭亦理之当然也臣只欲坚乞一郡则是辜负圣知上违恩旨欲黜而不乞则是与台諫为敌不避其锋势必不安今既未许请郡臣亦不敢遽去左右只乞解罢学士除臣京师闲慢差遣如秘书监国子监祭酒之类或乞只经筵供职庶免众人侧目可以少

安三月吕公着为司空同平章军国事仍一日三赴经筵二日一朝因至都堂议事吕大防纯仁制蕪轼草也是夕轼对于内东门小殿既承旨太皇太后曰有一事要问内翰前年任何官职轼曰汝州团练副使曰今为何官曰臣备员翰林学士曰何以至此曰遭遇陛下曰不關老身事轼曰必是出自官家曰亦不關官家事轼曰岂大臣荐论耶曰亦不關老臣事轼惊曰臣虽无状必不别有闕请曰久待学士如此是神宗皇帝之意当有饮食而停箸看文字则内人必曰此蕪轼文字也皇帝忽时称曰奇才奇才但未及用学士而上仙耳轼哭失声太皇太后与上左右皆泣已而命坐赐茶曰内翰直须尽心事官家以报先帝知遇轼拜而出撤金莲炬送归院尚书刘摯守中书侍郎王存守尚书左丞胡宗愈为尚书右丞孙觉为御史中丞右司谏刘安世进对太皇太后问近日差除如河安世等曰朝廷用人皆叶輿望惟胡宗愈公议以为未允太后曰且徐观其所为退言宗愈不可居本辖之任乞寝新命授以外官彭汝砺为中书舍人范祖禹为起居舍人五月辞免从傅尧俞为吏部侍郎王觐为右谏议大夫五月翰林蕪轼侍郎蕪辙同廷对欧阳棐为著作郎实录院检讨寻罢黄庭坚四月依旧著作郎御史赵挺之言其奸回有是命王觐论胡宗愈不当落职与外任太皇太后手诏皇帝嗣位于兹四年华夷来同天地并应而皇太妃以恭俭之德鞠育之恩虽册以时奉行而情又疑有未称皇帝有祖宗之奉尊无二上而吾推春秋之义母以子贵其推天下之养以慰人子之心当下礼部太常寺讨论如于典故有褒崇未尽令开具以闻七月丙寅翟思为殿中侍御史从蕪轼等举也诏遇灾伤放税六分已下其带纳欠负即随放税分数催纳若放税七分已上并行倚阁八月王彭年为监察御史从孙觉盛陶举也知齐州王岩叟为起居舍人三年九月侍读蕪轼录述英阁进读寶训之文以进第【辙作轼墓志云尝读宝训因及时事愿言今赏罚不明善恶无所劝沮又黄河势方北流而强之使东夏人寇镇戎杀死几万人帅臣掩蔽不闻朝廷亦不问事事如此恐成衰乱之渐当辅者恨之】李常为御史中丞御史中丞孙觉引疾求罢【九月】十月李常充龙圖阁直学士司马康为著作郎兼侍讲康初免丧即召用之十二月刘攽守中书舍人闰十二月郢州州学教授周橦罢归吏部用刘安世蕪轼言也致仕范镇卒蕪轼上章言太宗殿庭畜马云天下之众非如养马可置之殿庭当广任忠贤以为耳目若忠贤疎遠谄佞在傍则民之疾苦无由上达因陈二世胜广后主隋兵渡江事云近来边将奏报不实此风渐不可长御史李常言蕪轼进读寶训奏边将欺弊事乞根究以正典刑诏户部裁省浮费甲寅太皇太后宣谕辅臣曰今来官冗自宰执以下恩泽皆有减损本家亦须裁定要自上始则均一矣公着曰此盛德之事当究本末以闻已而诏曰官冗之患从来尚矣流弊之极是萃于今以阙计员至相倍蓰苟非裁损入流之数无以澄清取士之源吾今自以渺身卒先天下永惟临御之始常敕有司荫补私亲旧无定限自惟德薄敢配前人已诏家庭之恩止从母后之比今当又损以示必行忠义之士当识此诚各罔内顾之心共成节约之制今后每遇圣节大礼生辰合得亲属恩泽并裁减皇太后皇太妃准此韩忠彦蕪辙奏节用裕民请自宫禁始诏诸路

监司勿荐侍从官以上及帅臣从左司谏韩川请也四年刘安世言谢景温差除不当二月景温除知郢州二月知潞州梁焘为左谏议大夫王子韶为太常少卿刘安世言子韶资性儉佞熙寧士大夫十鑽之称目子韶为衙内钻以其造请公卿之门不惮寒暑也交权要子弟巧于自媒如锥之利乞放还误恩三月刘攽卒右丞胡宗愈知陈州丁亥诏罢春宴刘安世李常以旱灾请从其言也给事中赵君锡奏蘓軾乞外任除知杭州圣恩优渥待之不替而中外之望缺然解体何者軾之文追攀六经蹈藉班马自成一家人之言国朝以来惟杨亿欧阳修及軾数人而已今軾飘然去国则儉人邪党必谓朝廷稍厌直臣奸人且将乘隙浸寻复进实系消长之机軾领遠藩承流牧民亦足发其所存但所施有限所利未广岂若使之在朝用其善言天下蒙福听其说论则圣心开益行其诏令则四方风动奸邪寝谋善类益进伏望收还所除新命复留禁林仍侍经幄以成太平之基四月梁焘对延和殿春夏屡阴不雨皆人主犹豫不断之象愿面诏大臣协忠决疑无留政事方皇帝富于春秋太后保佑圣躬制政帘幄易以蒙蔽愿正纪纲明法度采用忠言讲求仁术坐使明恩实惠徧及四方望皇帝陛下时亲政事将来临御独断练熟机务太皇太后年来中外进呈文字常同商量官家出意裁决皆有圣断焘对曰圣德日新天下幸甚此太后保佑之功也愿官家更进圣学日课经史熟记寶训故事用之集贤校理李德刍为都官员外郎司谏吴安诗言其往在宗正寺凭借安石火焰御史翟思言诏德刍依旧校书郎范祖禹上言正君心【见辅导门】四月李常等俱罢补外坐不言蔡确或不草蔡确责词故出之孙升贾易为殿中侍御史徐州教授程师道候太学正缺日差从左谏议梁焘荐也秋范纯仁罢相坐营救蔡确言之也吴处厚论蔡确事【见第二十八卷】王岩叟为枢密都承旨黄庭坚为集贤校理诏河中凤翔邠经自今并选差守臣从彦博请也诏郡县考课优等人令三省考察任使从梁焘请也诏郡县蘓辙等为贺辽国生辰使九月辛巳诏大享明堂范纯仁知颍昌府诏依大礼令赐物外加赐器币二百五十疋两十月朱光庭为右谏议大夫梁焘为御史中丞刘安世为左谏议大夫韩川为侍御史司马康为左正言兼侍讲川康皆辞免从之十一月孙固知枢密院事刘摯守门下侍郎傅尧俞守中书侍郎己丑太后手诏曰三朝盛礼会见王公羣臣造庭奉觴上寿皇帝临御五载恭以端庄庆集惟新受朝飧吾总机务协助政纲克享治安而每懷抑畏今有司乃欲以天圣故事御会庆殿称贺之顾惟菲凉岂敢比隆于先后其在典法亦当稽合于常观是日皇帝致贺于禁中羣臣奉表于东庑足以显邦家之庆而形孝谨之风何必朝外乃为礼来年正月一日更不御殿受贺上寿候皇帝御殿礼毕百官并内东门拜表前此尚书礼部乃检书天圣章献明肃皇太后元日御会庆殿受皇帝奏贺上寿及宰相百官契丹使以下起居称贺之仪为请故有是诏刘安世范祖禹论禁中求乳母事蘓軾言浙江灾伤十二月谏议大夫刘安世上章言禁中求乳母事云或者之论乃谓陛下稍疎先王之经典浸近后庭之女宠此声流播实损圣德五年春録石介子师中为郊社斋郎从刘摯韩忠彦孙固之请也二月丰稷为起居舍人孙升为侍御史三月杨畏为监察



御史安世光庭力攻之翰林蘓轍言去冬无雪今歲春夏时雨絕少愿陛下举行祖宗故事诏有司罢朝会避正殿损常膳令百官吏民皆得上封事指时政阙失丁巳诏曰朕奉承统业于今五年临御崇高未达庶政夙夜祇承惕厉若涉渊冰常恐德之弗类无以下慰民望上当天心今者冬雪不効春雨弗若逮此孟夏旱灾如焚麦不充食禾未出土歲事凜凜民且狼顾虽祷祝备至神莫之答惟省循自克则灾或可消意者政令寬弛吏或为害而莫之惩欵役赋失当民病于事而莫之察欵忠言有壅而未達贤才有抑而未用欵念之虽动行则未至昭明恐惧之诚意庶几阴阳之不违可自今月二十三日后減常膳不御前殿及将来五月一日罢文德殿视朝上奉东朝深愧帝珍之日闕下临庶尹尤冀嘉言之上闻苟利于人其无不可蘓軾之词也四月范纯仁知延安赵嵩知太原寻易之韩川为中书舍人五月王岩叟为龙圖阁待制枢密都承旨张舜民为殿中侍御使杨康国为监察御史杨畏罢为工部员外刘安世为中书舍人蘓軾为御史中丞朱光庭为给事中刘唐老为右正言司马康为左司諫杨康国为殿中侍御史张舜民辞免贾易为国子司业充殿中侍御史寻又改淮南提点刑狱八月刘摯大防等争吏额事【见党事门】朱光庭改亳州刘安世提举崇福宫皆为邓伯温也次年正月仍为给事中梁焘亦出知郑州范纯仁为给事中王岩叟权知开封府杨康国为左司諫孔仲武兼侍读岑象求为殿中侍御史黄廉为枢密都丞旨殿中侍御史言不当使之居要近蘓轍言太皇太后陛下深处帷幄耳目至少惟有台諫官数人若听执政得自选择不公选正人而用之恐天下安危莫达于前而朝廷之势殆矣惟陛下留神省察徐君平虞策并为监察御史蘓轍邓温伯荐尚书右丞许将知定州以中丞蘓軾言也上官均罢知广德军以均营救许将中丞蘓轍御史岑象求奏也六年春御史孙升为起居舍人蘓軾为吏部尚书杭州召也刘安世为中书舍人寻改枢密丞旨正月刘摯为右仆射兼中书侍郎王岩叟充枢密直学士签书枢密院事蘓轍为中大夫守尚书右丞蘓軾为翰林学士丞旨赵君锡为御史中丞丁未右司諫杨康国奏臣僚弹奏尚书右丞蘓轍不可为执政者其事有六陛下不以为过此恐陛下以轍兄弟并有文学所以眷獎之厚而用轍之坚也陛下岂不知王安石章惇吕惠卿蔡确亦有文学乎而所为如此若谓蘓轍兄弟无文学则非也蹈道则未也其学乃学为仪秦者也其文章务驰骋好作为纵横排闔无安静理致亦类其为人也比王安石则不及当与章惇蔡确吕惠卿相上下其为美丽浮歌侈艳小词则并过之虽轍亦不逮其兄矣兄弟由此故多得名于戚里中贵人之家其学如此安足为陛下谋主体断国论与共熙辑天下之事哉辛亥签书枢密院事王岩叟奏事罢留身曲谢太皇太后谕曰知卿才望故不次用卿便宜尽心以报朝廷岩叟曰臣久去言路不得欵对清光今欲少陈区区幸垂听问何事岩叟曰陛下听政以来纳諫从善凡所更改悉合人心朝廷清明天下安静百姓无怨叹之声此成效也愿信之不疑守而毋失则宗社千万世之福也但愿每于用人之际更加审察盖邪正难辨用之一差治乱所系固有外与众同而中懷异趋不以今日之事为然者惟伺问隙以幸反复此等不可一日容于朝太后

曰此事里面常说与官家因少进曰陛下今日进圣学者正谓要理会邪正二字正人在朝则朝廷安人君无过举则下有平治之理一邪人进朝廷便有不安之象非为一人遂致此也盖其类应之者众蒙蔽人主无由得知不觉养成祸患耳太皇太后甚然之又曰或闻曾有以君子小人参用之说告陛下者果然如此乃误陛下之言不可听君子小人无参用之理圣人惟说君子在内小人在外则成泰小人在内君子在外则成否小人既进君子不与之争进惟自引去君子既去小人竞进则危乱之机也不可不慎愿陛下常用心于此太后曰会得岩叟乃退前知杭州蘓軾言浙西二年水灾蘓湖为甚虽访闻已详而百闻不如一见自下塘路由湖入蘓目覩积水未退伏望圣慈察臣微诚垂愍一方特赐旨挥发运司依元降旨挥除已截拨二十万石外更乞兑拨三十万石与浙西诸州充出余借贷如发运司去年元不收余即乞一面截留上供米五十万石却令发运司将桩钱一百万贯候今年秋熟日收余填还若朝廷不以臣言为然待饥馑疾疫大作方行赈济亦恐不及于事郑雍为右谏议大夫右丞蘓軾押入视事贾易为侍御史叶伸为殿中侍御史伸请补外诏别有差遣安鼎为监察御史姚勔为右正言庚戌迺英进读寶训至除彭乘为起居舍人事龙圖阁直学士前知杭州蘓軾言臣近奉诏书及圣旨不许辞免学士承旨恩命及乞郡事臣已于第三次奉乞除臣杨越陈蔡一郡去讫窃虑区区之诚未能遽回天意须至尽露本心重干天听陛下即位起臣于贬所不及一年备位禁林遭际之异古今无比臣每自惟昆虫草木之微无以报天地生成之德惟有独立不倚知无不言可以少报万一始縁衙前差顾利害与孙永傅尧俞韩维争议因与司马光异论光不以斯怒臣而台谏诸人逆探光意遂与臣为仇臣又素疾程頤之奸未尝假以色词故頤之党人无不侧目自頤等废黜大奸数人而余党尤在要近阴为之地特未发耳小臣周橦乃敢上疏乞用王安石配享以常试朝科橦草芥之微敢建此议必有阴主其事者是以上书逆折其奸锋乞重赐行遣以破小人之谋自此党人尤加忿疾其后又于经筵极论黄河不可回夺利害比上疏争之遂大失执政意积此数事恐别致患祸又縁臂痛目昏所以累求补外俯伏思念自忝禁近三年之间台谏官臣者数四只因发策草麻罗织言语以为谤讟本无疑似自加诬执其间暧昧譖愬陛下不察其无实而不降去者又不知其几何矣若非二圣仁照洞见肝膈则为党人所倾首领不保岂敢望如先帝之赦臣早自出知杭州二年粗免人言中间法外刺配颜章颜益二人盖公私积弊事不获已陛下亦已赦臣而言者不赦论奏不已其意岂谓颜章等哉以此知党人之意未尝一日不在倾臣洗垢求瑕止得此事今者忽蒙圣恩召还擢用又除臣弟辙为执政此二事皆非大臣命意窃计党人必大猜忌磨厉以须势必如此闻命悸恐以福为灾即日上章辞免乞郡行至中路果弟辙为台谏所攻殿出廨宇待罪又蒙陛下委曲照见情状方获保全臣之刚愎众所共知党人猜忌甚于弟辙岂敢以衰病之躯复犯其锋虽自知无罪可言而今之言者岂问是非曲直窃谓人主之待臣子不过公道以相知党人之报怨嫌必为巧发而阴中臣岂敢恃二圣公道之知而傲党人阴中之祸所以不避繁渎自陈入

仕以来进退本末欲陛下以臣危言危行独立不回以犯众怒者所来远矣伏望圣慈察臣至诚特赐旨挥执政检会屡奏只作亲嫌回避早除一郡若朝廷不以臣不才犹欲驱使或除一重难边郡臣不敢辞避报国之心死而后已惟不愿居禁近使党人猜疑别加阴中也六月梁焘知郑州因日食奏言臣闻日者众阳之长人君之象以清明溥照为德而不容侵蔽欺掩今又食五月之朔为变亦甚矣愿陛下思所以消变之理而消变之速莫如修德修德之要莫如进学伏望屏远声色披绎经史宫中清燕熟复前代治乱之要退朝之余经筵之外闲召讲读侍臣咨访论议又奏太后曰日灾之应主弱臣强下凌上替阴侵阳之谓也宜举三务以消之早正宫中之位以为内助愿陛下外饰政事以申主道劝上进学以强君德丙辰吕大防言昨得御前札子以蕬轼撰上清储祥宫碑颂示修宫费用以出自禁中此事近臣知之而外庭鲜有知者因此令中外其知甚便太后宣諭曰上清储祥宫本先帝所建意为皇嗣今来正欲成其愿凡百费用皆本殿收入钱物应制无分毫侵损国用比来有一二言者皆不知也八月范百禄转对言三事云尽祖宗典故效先王陈迹幸太学可以美文明之化采众言可以知天下之事严大祀可以臻上神之佑而致四时之和惟刍蕘不以贱废庶几尘路或有补云赵君锡言蕬轼题诗事太后曰辄将此事诬轼先帝三月上仙轼五月题诗猥云轼别有意似此何可当显是摺拾初贾易言君锡想被易使之韩忠彦曰君锡素无执持王岩叟曰君锡虽无执持亦非助恶之人今罢去士论亦惜其风望进退人太速陛下尤所当慎曰极当慎也须求老成忠彦曰宜择忠厚岩叟曰须得中道者用之乃善闰八月左朝请郎梓州路转运判官董敦逸左朝请郎黄庆基并为监察御史敦逸永丰人辛亥诏曰朕承至尊休德托于王公之上蒙成慈训海内晏安恭惟太皇太后有圣德之徽懿居天下之崇高保佑朕躬功及宗社人神俱归天地并祝稽歳甲还相之次当庆符本始之辰仰赞寿祺用致诚祝昔在神考有奉光献之礼尝以此恳请再三兴言伤财面诚悉罢永惟大德之报方求尊安之禄此苟不圖将何以示孝敬于万方而达至感于神明乎其以元佑七年太皇太后本年歳旦斋在令及天下州军在城僧尼道士女冠一日内在京于中太上清储祥集禧建炎醴泉万寿等六处宫观大相国寺十禅院自正旦日各用僧道开建道场七昼夜宫观罢散

□被露肝胆冒闻圣慈致陛下每有宣諭必以不喜管事为言常欲安静此圣意之本也臣未尝一日不思切惟渊衷远虑深识用臣前言自识时矣乞检会前奏早赐诏旨归断人主以全大功不及言先帝大臣多以材进可稍复用委以别都名藩以全终始壬申起居舍人吕陶言伏覩迩英阁讲读罢臣僚退有顾临吕希哲再留奏事臣不复豫闻窃谓起居之职记人主言动凡讲读官有所奏陈或陛下宣答访闻皆须载録修为信史今乃不得预闻临等所奏深恐于分守未安伏望特降睿旨今后讲读罢有臣僚再留奏请并许记注官侍立所贵操笔不致阙畧从之是月左仆射吕大防以疾恳求罢政太后宣諭曰主上富于春秋相公未可去位更少俟歲月吾亦就东朝矣大防乃不敢复起视事八年二月兵部员外郎崇政殿说书吕希哲为右司諫希哲固辞之蕬轼在迩英见希哲除



命戏谓希哲曰法筵龙象当观第一义希哲退而不应谓范祖禹曰若辞不获命当以杨畏为首时畏方在言路以险诈示任故希哲云耳七月丙子朔观文殿学士大中大夫范纯仁为通议大夫尚书右仆射兼中书侍郎纯仁自至颖昌即入对延和寻有是命纯仁辞至七不允又遣中使促纯仁就位及入谢太后宣谕曰相公且与吕大防范等同心协力又曰人言相公必先进王觐彭汝砺如何纯仁曰此人望陛下早用之他日又谓纯仁曰卿父仲淹可谓忠臣在章献明肃垂帘时惟劝章肃尽母道及仁宗亲政又劝仁宗尽子道可谓忠臣公名望众人所归必能继绍前人纯仁顿首谢曰臣不肖何足当陛下奨劝委任之意然不敢不勉八月丙午辛酉太后有疾上不视事壬戌吕大防范纯仁蘓辙郑雍韩彦忠刘奉世入崇庆殿问圣体大防等言元丰五年神宗皇帝服药常除在京及畿内罪人太皇太后曰莫不消如此大防曰元丰中神宗皇帝自以圣躬服药降此指挥今上为太后于体尤顺上曰依故事前此凡奏事上未尝处分至是上以太皇太后意在谦抑故有此宣谕

太平治迹统类卷十八

●钦定四库全书

太平治迹统类卷十九

（宋）彭百川 撰

宣仁保佑哲宗

元丰八年三月哲宗即位夏四月丁丑资政大学士银青光禄大夫吕公着兼侍读公着时知扬州召用之遵先帝意也【先是神宗谕辅臣曰皇子明年出阁当以公着为师傅至是公着侍经筵】癸未司马光上疏言人君之德三曰仁曰明曰武致治之道三曰任官曰信赏曰必罚其言畧云臣歴观古今之行事竭尽平生思虑质诸圣贤之格言治乱安危存亡之道举在于是不可私易是以区区首为累朝言之不知臣者以为臣进迂阔陈熟之语知臣者以臣为识天下之本原也六月丙子起知陈州韩维赴阙遂留经筵癸未吕公着入见上奏切思人君即位之始宜讲求修德为治之要以正其始然后日就月将学有缉熙于光明新而又新以至于大治用是竭愚诚论圣道槩举十事仰赞聪明一曰畏天二曰爱民三曰修身四曰讲学五曰任贤六曰纳谏七曰薄敛八曰省刑九曰去奢十曰无逸伏望陛下留神垂察如言有可采乞置御座朝夕顾省庶圣德少助万一癸未龙圖阁待制赵彦若兼侍读秘书监傅尧俞兼侍讲先是御史刘摯言陛下绍膺天命传序统业夫以异禀之质夙成之善又上有太皇太后之至仁厚德保护开佑所以成就者备矣然方春秋鼎盛之时在所资养左右前后宜正人与居语默见闻宜正士是接则观讲进读辅道之官可不审择也哉伏见兼侍讲给事中陆佃蔡卞皆新进少年越次暴起论德则未试语望则素轻使在此官众谓非宜请罢兼职以允公议仍望于内外两制以上官内别选经术有行义忠信孝弟淳茂老成之人以充其任于是佃卞皆罢因彦若尧俞有是命诏今月十三日开讲筵进读宝训讲读官日赴资善堂以双日讲读仍

留一员宿直初讲及更旬宰相执政并赴乙亥初御迺英阁诏三省枢密院侍读修注官讲读锡宴于资善堂赉银帛有差元佑元年正月甲戌上御迺英阁侍读韩维进读至天禧有二宫人犯罪法当死真宗皇帝惻然怜之曰此等安知法杀之则不忍舍之无以励众仍使人持去笞而遣之又幸汾阴日见一羊自掷于道左右曰今日尚食杀其羔真宗惨然不乐自是不杀羊羔因奏言此虽小善然推是心以及天下则仁不可胜用也真宗自澶渊却敌之后十有九年不言兵而天下富其源盖出于此外人皆言陛下仁孝发于天性每行见昆虫蝼蚁辄违而过之且敕左右勿践履此亦仁术也臣愿陛下推此心以及百姓则天下幸甚二月甲寅龙图阁待制兼侍读赵彦若为兵部侍郎兼侍读宰相司马光言今讨论经史上自伏羲下至周威烈王略举大要合为二十卷名曰稽古录伏望看详送秘书省正字范祖禹等令缮写上进候读祖宗宝训了日乞取此书进读从之庚午吕公着言伏覩今月十五日以筵讲毕论语赐执政及讲官御讲筵是日上出皇帝御书唐贤律诗分赐臣等各一篇臣次日于延和殿帘前谢蒙太后宣谕皇帝好学在宫中别无行为惟留心典籍天下幸甚伏思陛下睿哲之性出于天纵而内禀慈训日新典学诚以尧舜三代为法则四海不劳而治今来论语终帙进讲尚书二书皆圣人格言为君要道愿陛下念兹在兹以广理德臣职在辅导无能裨补辄于尚书论语及孝经中节取要语共一百段进呈惟取明白切治道者庶便省览或游意笔墨之间以备挥染亦日就月将之一助也他日三省奏事毕太后宣谕公着所进尚书论语要义百篇今日皇帝已依所奏每日书写看览甚有益于学问与写不同也公着以同列者言此圣人经训有补于治日宜亲阅壬申诏讲读官遇不开讲日轮具汉唐故事有益政体者二条进入仍旬一录申三省先是侍读苏颂言国朝典章大抵依唐史史官所记善恶咸备乞诏史官学士采新唐书中臣主所行日进数则以备圣览故有是诏三年二月己丑司谏丰稷为国子司业杨王颢荆王颢尝令成都走马承受官者造锦地衣稷白御史胡宗愈言之愈狐疑未决稷即独劾御史赵■〈山几〉与稷同进对退谓稷曰闻君言使■〈山几〉汗流给事赵君钰曰谏官如是天下必太平不数日稷徙他官五月侍讲范祖禹言陛下即位四年幸赖太后至仁盛德母临天下垂拱无为治内晏然当今之务学问为急陛下今日学与不学系天下他日之治乱又云凡人进学莫不贵于年少之时陛下圣质日长龙德日进数年之后虽欲勤于学问恐不得如今日專也臣切惜此日月愿以学为急天下幸甚四年十二月左谏议刘安世上章言禁中求乳母事云或者之论乃谓陛下稍疎先王之经典亲近后庭之女宠此声流播实损圣德先是范祖禹上疏皇帝曰臣侍经筵于今累年陛下天纵先知圣德纯茂对臣下日日如一未尝稍有差失此天眷皇家保生民社稷宗庙无疆之休也太祖皇帝肇造区夏栴风沐雨削平僭乱为子孙万世之基传太宗至真宗遂致太平仁宗年十三即大位章献明肃太后安定邦家调护圣性四十三年之间德泽深结于民天下至今思慕不忘英宗自藩邸入继大统四海之内同心爱戴先帝励精求治晝宵衣旰食躬勤万事十有九年不幸早弃天下陛下始十年登寶位当此

时人心凜凜忧危万端陛下幸赖太后保佑扶济艰难斥逐凶邪登进忠良诏令所至百姓欢呼年来中外晏然北幕西陲无不顺从皆太皇太后之德也臣不知陛下将何以报之臣切惟陛下所以报之惟在进德爱身而已进德则为万世太平之主爱身则无疾疢不貽太皇太后之忧今羣臣万民之心情正望朝廷如天圣已来惟望法则仁宗而已祖宗天下百三十年如寶器之无缺陛下行纯德备如美玉之无瑕臣切谓陛下保之惜之爱之重之陛下可不爱惜圣体哉陛下好德则贤人动心欲助陛下之德如好色则小人皆动心欲奉陛下之欲而圖一身富贵贤人进则治小人进则乱人君所好一身损益实系天下治乱不可不慎陛下于此将何择焉伏望察臣之心精專一意勉强学问日新德业事亲则思孝居处则思敬动思礼听思诚服用思俭养民思仁使人思恕心则思道视则思正当食则思天下之饥当衣则思天下之寒陛下思此而强学不已以道德为丽仁义为美岂声色可移哉惟抑情欲爱圣体为先则动植之类无不蒙福又上太皇太后曰陛下忧勤必忧天下之本爱养四方之民必先爱一人之身一人之心天下之本也天下安危系于一人之身安则天下俱安天下治乱出于人君一心心正而天下正欲治天下必先安心正天下必先正心此二者当今急务久远之计也尝观司马光言章献明肃太后保护仁宗食必与俱最为有法伏望陛下与皇太后太妃详论此事损圣德无益圣體宜戒飭保傅令一以章献为法深思遠虑察臣狂瞽之言疏皆留中他日吕大防奏事将退太皇太后留大防谓曰刘安世有文字言禁中求乳母事意则甚善但渠不知此非官家所要乃先帝一二小公主尚须饮乳也官家常在老身榻前阁内寝处老身又常究治果无可说与安世言令休入文字大防对曰諫官例不与宰相见太后曰然则将如何止安世文字勿令再入大防曰范祖禹现修实录臣间日过实录院必见祖禹刘安世与之同省臣当以圣旨令祖禹告安世太皇太后因言祖禹亦有疏论列后宫进御事并令大防谕旨及祖禹得大防所谕圣旨即过安世此系德之污隆安世以諫名官安敢緘默大防侍经筵上所亲信又岂得不言祖禹曰固尝言之安世曰宰相所传圣旨盍具奏知万一有为给悔其可追乎安世遂奏云若陛下实未尝为臣之所言犹不废职陛下万一有之则臣进说已是后时虽不敢逊旷官之诛顾亦可补于事惟冀陛下爱身进德清心御欲臣不胜惓惓爱君之至范祖禹奏緣臣二十五日以前未见大防不知已有圣旨更入后来文字今日大防谕乃知臣等所闻外议尽是虚传陛下恕臣狂愚不赐诛责然臣言进德爱身宜常为戒太皇太后保护皇帝安身正心遠虑亦愿勿忘外议虽虚亦足为先事之戒也其后章惇为相上谓惇曰元佑太皇太后道宫嫔在朕左右者二十人皆年长一日觉十人者非素使令顷之十人至十人还复易去十人其去而还者皆色惨沮若方涕泣者朕甚骇不敢问后乃知因刘安世等上疏太皇太后诘之惇与蔡京谋诬元佑大臣尝有废立议指安世祖禹言为根二人遂得罪几死五年春范百禄兼侍讲诏讲读官今后每过经筵退留讲官各一员于迓英奏对正月焘尝奏疏曰大学之道在明明德谓人君有清明之德必由学以发之然后光被四表格于上下以此知天子之尊而能成圣



德必由明德乎陛下受天明命早有万国日就月将学以成性此正其时愿择吉日诏开经筵优接进读劝讲之臣使从容复治乱之事究先王之蕴辨歷代之迹无惜圣问询考圣心晓然日新一日可底大成愿加意勿忘又奏太皇太后曰今皇帝圣年已十五齿亦长矣孔子曰吾十有五而志于学皇帝天禀英异以圣人志学之时稽焉不可不学也愿陛下当三春布德之前正先王授政之始面勉皇帝开经筵召见儒臣谈经读史从容赐对熟复古今宫中选茂俊之人诱掖诵读择谨厚之人辅视兴寝服勤道义为聪明睿智之助疎逯纷华为康宁寿考之资习久乃成自然至于诚意喜书正心乐道终副海内圣神之望不貽宸衷逸豫之忧养成静治为太平之贤主焉二月壬寅迓英阁讲毕无逸篇诏详録所讲义以进今后具讲义次日别进是月范祖禹对迓英阁札子言伏见仁宗皇帝庆厯初七月出御制观文鉴二圖记以示辅臣皇佑元年十一月御崇政召近臣三馆台谏官及宗室观三朝训鉴圖二圖皆常赐臣僚禁中必有本陛下永日观书之暇闲览此圖可以见前代帝王之迹知祖宗创业之难有所劝戒易于记省亦好学不倦之一端也给事中兼侍讲范祖禹上帝学八篇且言三皇之时至质略矣伏羲始开人文神农以下皆有师贤人之德莫大于学在易干之六爻龙德变化皆圣人九二曰见龙在田孔子曰龙德而正中者也由学以聚之问以辨之故天下文明九三曰君子终日干干孔子曰进德修业欲及时也至九五飞龙在天与天地合德日月合明四时合序鬼神合其吉凶先天而天不违后天而奉天时圣人之德莫盛于此由学以致之九二九三皆曰利见大人盖非学不能为大人故尧舜垂衣裳而天下治圣学之效也扬雄曰学之为王者事其已久矣尧舜禹汤文武汲汲仲尼皇皇其已久矣学始于伏羲至于成王易诗所常称者自古治日常少乱日常多推原其本由人君不学也恭惟本朝累圣相承百三十有二年四方无虞中外底宁德泽深厚遠过前世由以道德仁义之治天下人主好学故也陛下广览载籍歷观前世创业守成之君有如祖宗之皆好学者乎由三王至五代治安长久有如本朝百年太平者乎今人爱惜寶器尤恐其伤缺况祖宗百三十余年全盛天下可不务学以守之乎臣闻学则必问问然后为学中庸曰尊德性而道问学致广大而尽精微极高明而道中庸皆所为天下法也尧有衢室之问舜有总章之访动必咨于四岳孔子称舜之大知曰好问仲虺戒汤曰好问则裕学者圣人之先务也问者学之大方也文王询于八虞谘于二虢度于闕天谋于南宫諏于蔡原而访于辛尹重之以周召毕荣所以能成其圣也武王访于箕子成王问于尹佚四圣维之众贤翼之是以为天下之圣君子能守成无失岂有他哉强于学而已今所録八篇上起伏羲下迄神宗惟陛下宪道三皇稽德五帝轨仪三代法象祖宗集羣贤之所行體干道之不息则四海格于泰和万年其永昌矣元佑六年八月签书枢密院事王岩叟言秋气已凉陛下闲燕之中足以留意经史鸡鸣而起大禹惜寸阴愿以舜禹为法上曰朕在禁中尝观书不废也上问王岩叟从谁学对曰从河东宁智先生学其人经明行修后随仕四方无常师有一善则师之上云如此则得师多上问因甚识韩琦对曰因随侍开居北门始识之遂荐辟学官文辟幕

府又随之居相三年具墓乃去臣知琦为详琦亦知臣颇厚教臣事君之道前不希宠后不畏殆左右无所避中间惟诚意而已臣佩以终身上称叹久之七年三月甲寅王岩叟奏曰陛下宫中何以消日上曰并无所好惟是观书岩叟曰大抵圣学要在専勤屏去他事则専久而不倦则勤如此天下幸甚四月己卯礼部侍郎兼侍讲范祖禹曰臣伏见王存端立厚重素有人望前已执政若使进读足以重经筵之选苏轼文章天下第一其名亚于司马光但忌嫉者多此在陛下主张用之耳赵彦若父师民以经行纯懿久侍仁宗书筵彦若德性类其先人博学多闻谳练故事去年为其子得罪其事可谅非有大过不可久弃郑雍自为中书舍人臣尝言其可备讲读自居言职风望愈高今读官有阙之四人者实允众论程頤本末别具论列孔武仲学问该洽讲说明白仁宗时贾昌朝鲁公亮皆知制诰兼讲制今武仲若以中书舍人兼职自如故事吕希哲乃吕公着之子公着尝言此子不欺闇室其人经术履行识者皆谓可备劝讲今已五十四岁希哲是臣妻兄久不敢荐今将去朝廷窃谓言之可以无嫌乞陛下询大臣参考其人吕大临是大防之弟修身好学问如古人臣虽不识熟知之甚久宰相之弟故不敢言陛下素知臣不附执政臣又乞外任故不自疑望陛下记其姓名以备选用呉师仁自布衣以仁义称于士大夫元佑初朝廷特召为学官众论皆谓师仁宜入侍经筵臣前后三荐师仁乞采众论又言臣读国史伏覩仁宗皇帝在位四十二年丰功盛德固不可名言所可见者其事有五畏天爱民奉宗庙好学听谏仁宗行五者天下所以为仁也臣愿陛下留意法象祖宗日新辉光昭示所好以慰答羣生之望读札子毕又言臣观仁宗行事每示人好恶皇佑中杨安国讲直哉史鱼邦有道如矢邦无道如矢君子哉蘧伯玉邦有道则仕邦无道则可卷而怀之仁宗曰蘧伯玉君子矣然不若史鱼之直据孔子之言则史鱼不若蘧伯玉之君子仁宗之言仁君之言也人君惟欲臣下切直故言伯玉不若史鱼以开臣下切直之路由是天下知仁宗好直不好佞此圣人大德也如此之类愿陛下以仁宗为法上然之此辛亥六月辛酉梁焘辞尚书左丞愿于旧臣耆德疎遠之地圖任老成拣拔隽良庶使辅任得人朝廷增重章累入上遣中使趣拜焘曲谢太皇太后曰官家圣德日成正要卿等辅佐焘曰臣不才谬当宠任敢不尽忠如范纯仁韩维辈在外贤德尚多愿陛下留意壬申御迓英阁侍读顾临读寶训癸酉兵部尚书龙圖阁学士苏轼侍读八年正月丁亥上御迓英阁召宰臣执政暨讲读官讲礼毕读寶训顾临读至汉武帝藉提封为上林苑仁宗曰山泽之利当与众共之何用此也丁度对曰臣事陛下此系三月二十年每奉德音未始不本于忧勤此盖祖宗家法尔讲毕吕大防等进曰祖宗家法甚多自三代后惟本朝百三十年中外无事盖由所立家法最善臣请举其略事亲之法事长之法治内之法待外戚之法尚俭之法勤身之法尚德之法寬仁之法至于虚己纳谏不好畋猎不尚玩好不用玉器饮食不贵异味御厨止用羊肉此皆祖宗家法致太平者陛下但尽行家法足以为天下矣上甚然之学士范祖禹言陛下近者郊见天地都城之人瞻望玉色欢呼洋溢皆云陛下克类仁宗臣观天意人心如此实宗社无疆福也恭惟一祖五宗畏天爱

民子孙皆当取法惟仁宗在位最久德泽深结天下陛下上顺天意下顺民心專法仁宗则成康之隆不难治也遂悉集仁宗圣政百七十事编録成书名仁宗训典凡六卷上之学士赵彦直为翰林侍读学士【已下系七年十一月癸巳】三月癸卯翰林学士范祖禹为翰林正学士祖禹力辞不许又力辞兼侍讲学士曰臣伏见仁宗之初孙奭为侍讲学士凡七年乃兼龙圖阁学士冯京避亲除侍读学士后为翰林学士不兼侍读神宗初司马光吕公着以翰林学士兼侍读初不兼学士之职臣叔祖镇每入翰林治平中以侍读学士知陈州神宗召还复为翰林学士亦止兼侍读不带学士臣去岁蒙除禁职圣恩许避亲嫌改授侍读学士今复蒙申前命遂兼旧职是臣因避嫌不朞年得两学士在臣之分夫岂敢安朝廷如不许臣辞免新又以臣久在经筵仍兼职即先依旧例止兼侍讲不带学士则于职事无改而不违典故乃诏以翰林学士兼侍读五月癸未苏轼同吕希哲吴安诗丰稷赵彦若范祖禹顾临上言唐宰相陆贄才本王佐学为帝师臣等欲取奏议稍加校正繕写进呈八月庚午以太皇太后服药放朝叅吕大防等入问太皇太后圣體前此大防等奏每日进呈文字颇烦乞自今细事毋烦省览宣諭太后今日脉息平和延福宫奏章已得吉兆九月癸卯学士兼侍讲范祖禹上言臣伏以天下不幸太皇太后登遐陛下号慕哀毀孝性天成在廷闻者莫不摧陨今将总览庶政延见羣臣四方之民仰耳而听拭目而视乃宋室隆替之本社稷安危之基天命人心去就离合之时呜呼可不慎哉臣等久备讲读职在论思首献言以助万一陛下宜先诚意正心推广圣孝发为德音行为仁政以慰天下生民之望在陛下加意非难致也愿循其本而行之则其末无难然陛下所先者莫如报太皇太后之德仁宗以来三后临朝皆有大功章献明肃之于仁宗慈圣光献之于英宗鞠养扶持勤劳艰难亦未如太皇太后之于陛下也元丰之末神宗寢病不能出号今陛下年始十岁太皇太后内定大策拥立陛下儲位遂定陛下天下乃得之于太皇太后也听政之初诏令所下百姓欢欣鼓舞自古母后多私外家惟太皇太后未尝毫髮假借族人不惟族人而已徐王魏王皆亲子也以朝廷之故疎遠隔絕魏王病既歿然后一往太皇太后疾已革然后徐王得入进退羣臣必随天下之望不以意为喜怒赏罚故至公无私之德虽匹夫匹妇之口亦能道之临朝九年未尝少自娱乐焦劳刻苦以念生民所以如此者岂有他哉凡为赵氏社稷宋室宗庙專心一意保佑陛下也故当其劳苦使陛下享其安逸昔章献明肃时亲党多侥幸濫进仁宗既亲万几不免厘革故小人不能无怨今太皇太后临朝以来左右请求一切拒絕内外肃然盖以朝廷不可无纪纲故身当其怨而使陛下坐收肃清之功陛下如报太皇太后之德莫若循其法度而守之祖宗以来惟以德泽结百姓之心欲四海安静无事仁宗行之四十二年天下至今思之恭惟太皇太后之政事乃仁宗之政事也然仁宗皇帝圣性寬裕不忍拒人内降濫恩其后比比而有惟太皇太后严正至静不可干犯故能斥逐奸邪裁抑侥幸九年如一故虽德泽深厚结于百姓而小人怨者不少矣今必有小人进言曰太皇太后不当改先帝之政逐先帝之臣此离间之言不可不察也当陛下嗣位太皇太后辅政之



际臣民上书者万数皆言政令不便太后因天下人心欲改故欲陛下同改之既改其法则作法之人及主法者有罪当逐陛下欲太后亦以众言而逐之所逐者皆上负先帝下负万民天下所讎疾众庶同欲去者也太皇太后岂有憎爱于其间哉顾不如此天下不安耳惟陛下心察是非斥逖佞人深拒邪说敢有邪惑圣听者宜明正其罪付之典刑痛惩一人以儆羣慝则帖然无事矣陛下若入其语不正其罪恐奸言邪说继进不已万一追报之礼小有不至则于太皇太后圣德无损于陛下有亏必大失天下人心夫小人非为朝廷亦非为先帝皆为其身计也日夜伺候欲逞其憾者久矣今太皇太后新弃天下陛下初揽政事乃小人乘间伺隙之地故当预防之但此等既悞先帝今又悞陛下天下事岂堪小人再破坏耶如臣等所言虽万万无之然不敢不虑于未然或有纖芥流于外则臣等上负陛下不先言之罪矣初苏轼与祖禹约日上章论列轼章已成见祖禹章观毕曰轼愿附名止于臣字下加等字久备劝讲又云久备讲读其余无所增损又曰公之文经世之文也轼于朝廷文字失于过当不若公之言皆可行也后数日祖禹又言陛下承六圣之遗烈守百三十四年之大业天下者祖宗之天下不可一日而怠人民者祖宗之人民不可湏臾而忘百官者祖宗之百官不可私非其人府库者祖宗之府库不可用非其道抑畏儆饬一言一动如祖宗临之在上质之在旁则可以长享天下之奉而不失矣自元丰之末时运艰危先帝早弃天下陛下上嗣位幸先太皇太后以大公至正为心罢王安石吕惠卿等所造新法行祖宗旧政故天下危而复安人心离而复合乃至契丹主亦与其宰相议曰南朝尊行仁宗皇帝事可敕燕蓟留守使边吏约束无生事陛下观外国之情如此则中国人心可知也先太皇太后日夜劳苦以为陛下立太平之基九年已有成效陛下但由此持循成康之隆不难致也愿陛下静守毫髮无所改为诏左右大臣勤心循守祖宗法度陛下躬揽于朝谏诤善道察纳说言邪正是非万事皆了于圣心矣今陛下亲万几小人必欲有所摇动而怀利者亦皆观望愿陛下上念祖宗之艰难太皇太后之勤劳痛心疾首以听用小人为刻骨之戒守元佑之政坚如金石重如山岳山岳可移圣政不可移也金石可变圣心不可变也使谗佞者不得进说观望者亦皆革心则自今以往朝廷清明日胜一日岁胜一岁矣

#### 宣仁议立哲宗皇后

元佑五年五月皇太后宣谕宰臣皇帝春秋甚高将来纳后仪式可讲寻讨论以闻六年四月辛亥三省枢密院同奏事太皇太后宣谕曰为选皇后已百十家极难得可者今得狄谿家似可大防曰好门户太后曰有二事女庶出嫡出嫡悍如须评薄此事不容错也王岩叟谓刘摯曰礼须夫妇所生大防曰不得已无可奈何岩叟曰国家之盛举岂宜作不得已事后二日大防等进通礼问名篇岩叟曰陛下疑之极是摯曰礼须别外祖岩叟曰今礼经既先言夫妇所生方字三代既序外祖陛下试观此是何义意太皇太后曰如此未免别选岩叟又曰此事重要令天下人无可指议乃善大防又曰不知更选定几家乞宣示太皇太后曰只为劝婚难道必早十全及明年太皇太后问狄谿家事大防

犹欲成岩叟力言不可乃止十一月给事中兼侍讲范祖禹上疏太皇太后曰臣伏奉诏旨皇帝纳后六礼令翰林学士御史中丞两省给舍与礼部太常寺等官同共详议臣思此国家大事万世之始福祚所繫风化所先自古圣王重之今陛下宜知者四不可不谨臣谨稽上古叅后世为悉数而诏言之一曰族姓二曰女德三曰隆礼四曰博议臣幸备劝讲其职所在以帝王之事裨益圣德故敢献所闻臣之愚诚惟中宫正位之后四海之内室家相庆则宗社之福也七月乙丑吕大防等言纳后仪注昨两制礼官集议各具所见皆有典据今日恐难尽行臣等寻以叅酌进定进入太皇太后曰前议已曾省览其间有可行不可行者盖取其可不必拘泥古昔大防曰臣以圣谕欲望明示可否然长秋久未建立中外极不遑安不审的中已有定义否外间谓在京臣僚皆取索家状惟高向二族未取大防曰为国家计自当付之公议况自古选后多出勲戚之间汉之阴邓是也而当时不以为嫌望降圣旨下二家依例供进太皇太后曰若是神宗无所不可今若自诏诚亦非便大防等曰今礼物悉备惟太皇太后脱畧小嫌特留圣旨使大婚早定下慰四海之望八月己丑三省进呈纳后六礼仪制太皇太后曰卿等所从已是得中可行大防曰国家大体俗礼难可尽依小有拘忌似可除去太皇太后曰此非小事今若灭裂异时致议论即悔不及昨卿等言取索家状自家未有相当者高家女少合得相又云选后当以贤德为先不在资质固知如此亦似不思大凡人间女子养于闺合贤与不贤人安得知选择之际惟见门阀与人物耳此事亦系人之福力仁宗皇帝选妃光献且入宫中便是当时亦不预知其贤德后来母仪妇道辅佐功烈起絶古今虽圣贤异禀亦由仁宗福德招之岂人力也英宗幼为颍王纳妃拣选迨八十余家最后是太后入见英宗一见便许以今日事势言之岂不由皇太后福德所致大防等曰惟圣意选择早有定义太皇太后曰固夙夜在怀三省枢密院言议到纳后六礼诏从之初议以都亭驿为皇后行第给事中范祖禹言都亭辽使馆舍今纳母后而先居译使之馆非所以观示四方正始之道也乞以内尚书省为行第从之祖禹又言请皇后临轩发册命使奉迎及皇后入内并服衣冕以重大婚之礼不从执政奉事延和语及立后事太皇太后曰又选十余家皆不可召大防曰若门阀不可虽有容色亦难取王岩叟曰须勲德之家乃可服天下心太皇太后家有其家有其人正协天下望不须小以嫌为辞太后曰只为不堪高家亦安有此福大防请召都知押班由阁子中问当许之少顷见冯宗道梁惟简于内东门令奏高公纪女年命乞除付是日执政会崇政殿门宗道惟简来传圣意云本朝未有一家二后嫌于大盛又恐人物不当上意却难成对大防具言之太皇太后因云不堪又密勘得所系甚重于是高氏之门遂塞大防又言诸王家或有人闻蜀国长主之女前疾今已无他太皇太后曰未也又曰王洗不佳大防曰洗固不佳要是长主发出耳七年三月礼部言据太常寺修撰到纳后仪诏依夏四月己未内出制书立故马军虞候眉州防御使赠太尉孟元孙之女为皇后仍令所司择日备册命学士梁燾言臣今月六日当制参承太皇太后手诏立皇后朝廷庆事天下幸观臣敢为两宫之贺因得以献所当言者四事朝廷下旨

讲求迎后典礼甚备诚一代盛事所当次简施行不宜少损使天下明知国家敬重大婚之礼垂法万世一也陛下十二月为皇帝得贤助当多进正人辅圣于外正人多则政事纯一朝廷安静奸邪自消可终无忧者二也合有推恩之人宜出圣意恩德上归三也今大庆事人心所共忻宜有恩需以慰羣情四也四者皆今日急务可济中外欢心简而易行望留宸念四月王岩叟进中宫懿范戊戌上御文德殿发册及命使奉迎皇后己亥百官表贺于东上阁门壬子翰林学士梁焘言太皇太后陛下拥护圣躬夙夜不倦保佑之功永福宗社今选正宫中已得贤淑冬至大礼自当郊见天地上下协应虽政机之烦久劳同听同断人主不可遇时此今日甚盛之举也愿赐处分以彰至圣如臣言为然望面出手诏付大臣施行绍圣三年八月上以孟后失德赐号玉清妙静仙师法名冲真居瑶华宫章惇初成是狱成上谕辅臣曰今日之事诚出于不得已惻怛见于颜色惇等奏曰废太后事也不敢复有开陈愿少宽圣心其后上悔悟尝曰章惇坏我名节元符末皇太后复位号推上遗志而行之也

太平治迹统类卷十九

●钦定四库全书

太平治迹统类卷二十

（宋）彭百川 撰

哲宗委任台谏

元丰八年冬十月监察御史王岩叟言风闻章惇于帘前问陛下御批除谏官事曲折再三语涉轻侮外庭传闻众所共愤谨按差除谏官自属三省无预密院而惇不循所守越职肆言乃敢如此况陛下所除数人皆是天下公议从来愿得以为御史谏官之人惇为大臣既不能荐贤助国见陛下用贤又从而忌嫉之沮抑之臣不知惇何心以事陛下乞行显黜以严臣职以重主威左正言朱光庭言蔡确先帝简拔位至宰相送终之际殊不尽恭又言章惇欺罔肆辨韩缜扶邪冒宠章数上其言甚切初蔡确与章惇邢恕共谋诬罔太后自谓有定策功韩缜怀不平及确为山陵使缜乃于帘前具陈确等奸状由是东朝与外朝备知之【确先罢缜少留意缘发确等奸状故东朝以为忠尔据伯温辨诬】十一月丙午步军都虞侯刘昌祚知渭州御史刘摯言臣切闻宗祖之法不以武人为大帅专制一道必以文臣为经畧以总制之武人为总管领兵马号将官受制出入战守惟所指挥国家承平百二十余年内外无事以其制御边臣得其道也臣切谓祖宗之法不任武人为大帅用意深遽非可浅测如昌祚未为难得诚使卓然过人可以嘱付而祖宗之法由此废矣伏愿选内外文武从官尝守边者使为大帅则祖宗之法常存不废寻诏管军尝多阙额员刘昌祚已差知渭州宜令别取旨差官如已降告即行缴纳御史王岩叟言保甲之害民【见保甲门】刘摯言蹇辅及其子序辰以监事奉使创增卖额江西湖南之民陷罪破产宜各令补外侍御史王岩叟再言章惇过恶请以大不恭论乞付有司治惇罪十二月丙寅侍御史刘摯言宰臣蔡确驕慢臣曾具弹奏自后不闻施行



伏望圣慈以天下为意毋或容养奸恶早发睿断罢确政事以明国宪以安中外壬申侍御史刘摯等言臣近见蔡确既为山陵使回合依故事坚请去位不当贪权固宠不恤公议傲然安处无廉耻之节败陛下风俗坏陛下典章在臣职分或为朝廷争之陛下亦湏体究孤臣孜孜不已攻击权臣亦有何益凡人之情莫不乐安恶危好荣恶辱然臣不避患者诚为君也诚为国家也伏望陛下出臣前后章疏付三省施行早罢确政柄使天下知朝廷不抑忠言以沮公议不容奸臣败风俗坏典章扶持天下名节以励事君则臣等虽死无恨除中书舍人王震为给事中监察御史王岩叟言震特以阿谀附会骤至清近前岁持命西边所至贪猥出使无廉介之誉立朝无端亮之称封驳之任非震所当处寻命震出守侍御史刘摯言近在具状论蔡确违勅废礼骄慢不恭无大臣进退之节乞赐圣断罢其职位未蒙施行确回自山陵即使门下人扬言于众曰确有定策功嗣皇之所倚赖不可一日去上左右恭惟皇帝陛下乃先帝正嗣祖宗之所传次太皇太后陛下之所眷命而四海所以归戴也确等奉承诏命而已何策之定哉昨覃恩受官学士草制于确词中立独高定策之功命下之日识者皆知其过而确遂当之乃夸众以自名贪冒欺罔谓今天下必待已而后安轻视朝廷无辞逊去国之意罪莫大焉伏望罢确任职以安中外贴黄畧确与惇素相亲善今因结朋党欲消磨善人之气沮抑圣政中外谓确与惇不罢善良难存天下终不被仁厚之泽十二月丙午左正言朱光庭奏左仆射蔡确枢密院章惇右仆射韩缜宜去门下侍郎司马光侍御史范纯仁侍读韩维皆公忠正直并宜置左右臣愿圣慈深察臣言特出宸断退三奸于外以清百辟进三贤于内以赞万几则朝纲不紊圣化得行太平之风自兹始矣戊寅侍御史刘摯又言欺罔先帝无所不至今犹在府堂亲近陛下莫不共以为忧又引仁宗听韩琦一言而去王随陈尧佐石中立韩亿四执政为法云今日罢三人不难在陛下一言而已乞臣前后章疏付外施行二月辛未左正言朱光庭奏略云司马光之贤已为陛下信任范纯仁韩维今进在经筵是三臣之贤有志于皋夔周召事业愿陛下进三人以代蔡确章惇韩缜之任甲戌侍御史刘摯言臣累具状弹奏宰相蔡确枢密院章惇乞行罢免至今未闻可否指挥其畧云天下怀私为利者托此三人为魁主天下抱守忠义者皆畏三人不敢自効今陛下能发刚断罢确惇则善人安小人化凡天下奉承诏令更张政事者莫不专志尽力无复疑畏朝廷万世之福利在此一举左正言朱光庭奏乞施行所言蔡确等三人奸邪章疏监察御史王岩叟二请乞早赐指挥降臣前后论奏三奸臣章疏付外施行甲申蔡确言已再具表辞位准旨令臣管勾门下省臣见候辞罢欲望差权官管勾诏差尚书左丞吕公着御史中丞刘摯言蔡确辞位求退其所上表无引咎意有论功之言贪天功欺天下望重行窜逐以正典宪左谏议大夫孙觉言蔡确韩缜非以德进确以治狱士大夫咸以为冤缜以分画边界无故割地遗寇边人怨之切骨伏乞陛下以灾异之故罢免三人别选有德有言众所畏服者使称其大位又奏蔡确已迁出东位宜早赐罢免如确缜二人别择大臣负天下重望有过人之才忠于社稷有死无二者代之以肃正羣臣异同之论乞罢一蔡

确上以安朝廷下以安生民而慰忠臣义士之望臣不胜愤懑忧国爱君之至元佑元年正月侍御史刘摯言职役免役利害王岩叟左正言朱光庭奏疏臣伏见自冬涉春时雪未降倘歲一不稔则民将何赖当睿明在御务青任于辅臣若不别白忠邪何以召迎和气切以确之不恭惇之不忠缜之不耻行事已着明岂可尚容居位以累圣政臣虽曾两具论奏至今未见施行伏望陛下上观天意下察人情任贤勿贰去邪勿疑自然天人叶应善祥来格丰年之应固未为晚王岩叟言新法害民【见宣仁门】庚戌刘摯又四上章言蔡确十罪当罢其职使之外补以答天变以召和气慰公议以新改元之政辛亥朱光庭言方今圣政日新自当风雨时若所未然者盖由忠邪未分此天意有以悟陛下也倘照见奸邪早行睿断则和气致祥固未为晚若蔡确不忠而私章惇不忠而邪韩缜不耻而冒宠是皆不足当大任臣以异常论之愿陛下留神省察以幸天下王岩叟又言蔡确章惇奸邪愿早依前疏所乞施行上答天意下慰人心刘摯又言乞罢确与惇别选德望以司马光范纯仁守正之言置之左右成就陛下善政戊午孙觉言臣切见两汉大灾异罢免宰相者以其责在燮理之地乞依两汉故事罢免蔡确韩缜以警百官二月左正言朱光庭奏略云臣尝论奸邪则蔡确章惇韩缜为之先论忠贤则司马光范纯仁为之先去奸邪任忠贤唯先者为急愿陛下早赐睿断去奸任贤以助天意以召和气丙寅御史刘摯又云确惇矜功肆恶而陛下恐伤前日受遗之小恩而容之便为他日国家之大患伏望圣慈降臣前后疏章付三省早奋刚断罢三人以幸天下丁卯王岩叟又奏确惇佞人之杰天下之人见其论下以弹压四海奸雄之心然后陛下高枕而卧天下无事矣惟裁酌早赐施行闰二月己丑朔右司谏苏辙言臣顷论蔡确韩缜才不足用及多过恶乞赐罢免至今未蒙施行其畧云确等皆碌碌常才无过人之实朝廷将取其德未闻孝弟可称将取其才未闻功业可纪将取其学未闻经术可师徒以媚悦上下坚固宠位陛下何不正確缜之罪上为先帝分谤下慰天下之望朱光庭又上言臣累具章疏退三奸进三贤今日蔡确请去是天下欲去一奸臣矣愿陛下因其自请去之勿疑外有奸臣章惇尚安厥位亦愿陛下早行屏去王岩叟入对极言蔡确阴邪巧佞又论确弟硕奸赃庚寅尚书左仆射兼门下侍郎蔡确依前官充观文殿大学士知陈州从所请也台谏累有章疏论确朝政执不肯正其罪世以为恨右谏议大夫孙觉兼侍讲为给事中觉言切闻有旨除臣给事中覃恩深厚所不敢当然如臣愚贱前后言事不合圣意者不可胜数宜在今日逐之久矣今蒙恩除给事于臣之私极为荣幸然臣前后论缜未蒙施行一日去职使缜得挟怨中伤臣实未知死何日今在可言之地尚可布露本末为陛下言之它日去职怨嫌已成恐如翟思黄降虽欲自辨不可得也伏望收还给事新命使臣且供谏职他日缜去位后别有差遣且不敢辞后十二日诏觉复为谏议大夫觉又言司马光韩缜同相所谓冰炭同器伏望罢缜相位选有德有言堪其任者代之丙申王岩叟上疏欲黜降章惇以满人心以答天意以完陛下清明之政甲辰御史中丞刘摯言户部尚书曾布奸欲乞罢之别移一职以允公议苏辙又上章乞罢韩缜早正典刑以谢天下朱光庭王

覲又上章言韩缜章惇张璪去之不可不速庚戌曾布为龙图阁学士知太原府从刘摯言也御史中丞刘摯言臣昨屡具奏弹知枢密院章惇乞行罢黜未蒙施行谨按惇佻薄险悍无士人之行其不逊无礼非独施之同列至帘陛之前强愎慢肆举止偃蹇专以沮坏善政更无臣子事君之节此士论人情所愤嫉疑惑而不服也又言陛下裁保甲之法惇常议不为是近者改正差役惇又肆横议赖陛下深烛利害主张法意不为邪异所动然议说纷纷阻害黜于聪明者亦已多矣伏望出臣章付外速赐睿断罢惇使外补以全圣政龙图阁待制知开封府蔡京知成德军先是司马光主差役而京用五日限尽改畿县免役之法又私煅断狱为右司谏蕞辙监察御史孙升所论不报又论之其后断隆狱具特罚铜三十斤【此据丁未录】闰二月辛丑诏正议大夫知枢密院事章惇有臣僚言轻薄无行好为俳谐偈语近者再于帘前同辅臣议政动多轻惇全无恭上之礼宜解机务守本官知汝州先是上即位宣仁太后临朝用司马光吕公着更改弊事惇与蔡确俱在位窥伺得失惇犹以为谗侮困光御史中丞刘摯左司谏王岩叟司谏蕞辙左正言朱光庭右正言王覲累章疏其罪恶请黜之未报已而惇复与光于帘前争辩役法至曰一日难以奉陪吃剑太后怒于是摯等益交疏论之遂有是贬【此系丁未录出】乙卯同知枢密院事安焘知枢密院吏部尚书兼侍讲范纯仁为中大夫同知枢密院先是上以安焘旧人乃自同知迁知院而以纯仁补同知之阙命既下而给事中王岩叟封还之以焘不当迁御史刘摯谏议大夫孙觉司谏蕞辙亦言之俱不听命再下而给舍又封还遂不送门下书读由是合台连章争之益苦西省亦抗章同上又不听刘摯极言之纯仁亦累章固辞于是安焘告更不降出纯仁告乃送门下省书读【丁未录】壬申诏安焘坚辞枢密院事特依所请依旧同知院事仍令班左丞李清臣上纯仁告未经给事书读见在阁门可勾取别出录黄告身遍经门下省官施行夏四月戊子朔己丑正议大夫守尚书右仆射兼中书侍郎韩缜为光禄大夫观文殿大学士知颍昌府台谏前后论缜过恶甚众皆留中不出内批缜自以为不材恐妨贤路故乞出视矜功要名而去者缜得进退之体故有迁官之异宜于制词中说此意矜功要名指确惇也初缜与蔡确并相而孙觉蕞辙刘摯朱光庭王覲累章请罢之确既罢去上以司马光为左仆射觉等以为贤不肖不当存国体缜虽不叶人望要湏因其求去而后出之觉等奏曰陛下恩礼大臣虽盛德之事臣等身有言责言苟不效义不可止但恐自此章疏纷纭烦渎圣听于缜愈为不便尔已而缜亦扬言于人以为过寒食当求罢政寻又曰当日神宗小祥既而刘摯等交章攻之益急遂有是命【此据丁未录】乙未诏李宪特降节度观察留后一官提举明道宫王中正特降遥郡团练刺史两官提举太极观并本处居住石得一降为藏库使管勾崇福宫宋用臣降为皇城使差遣如故【系名臣奏议】先是中丞刘摯言窃以陛下临御以来运动政机以时弛张述成先帝制治立法之意使光照天下利兴害除四方鼓舞至于清明朝廷分别邪正斥远奸佞锄去强梗妙虑神断优游闲暇不出于喜怒不见于言色而天下善恶以辨是非以正何其盛欤然此时切怪天地之和气尚或未应忠臣



义士之论尚或未平此其故何也尝为究之盖天下之元恶犹有稽诛天下之大恶犹有漏网而国法犹有未正此中外所以犹未厌也国之失政莫大于使奸恶幸而免今论其大者前日之三四宦官是也臣待罪风宪虽知触权幸言出而患入然臣有言责贪报恩遇何恤乎身之危哉谨为陛下言之王中正元丰四年将王师二十万由河东出界徘徊境上殆半月而后出翱翔疆外顿沙漠而不进公违诏书不赴兴灵会师之约天寒大雪士卒饥冻坐使物故十之九八古之将帅固有无功而还犹当保全师旅归报于国今精兵劲骑一无所施自取狼狽死亾殆尽按之军法宜即显诛中正畧不自责请罪而先帝以天下之量无所谴诃又使赐存予问劳然后中正徐徐求闲局厚俸自佚而去此国法未正者一也李宪之于熙河贪功生事一出欺罔朝廷威福柄令持于其手官吏废置用舍出于其口监司帅臣而下事宪如父兄而宪之颐指气使如奴隶县官财用听其取与内之府库金帛转输万里之外生灵膏血渔敛百端倾之于宪如委诸壑出没吞吐鬼神莫见而一切不会于有司兴灵之役宪首违戒约避会师之期乃顿兵以城兰州遗患今日及永乐之围宪又逗留不急赴援使数十万众肝脑涂地罪恶盈贯不失于总兵一路此国法不正者二也宋用臣奋其私智以事诛求权夺小民衣食之路琐细毫末无所不取使盛朝之政几甚于弊唐阡陌间架榻地之事伤害国体不恤谤讟其出入将命捷若风火务以巧中取悦事无不谐动画密旨故擅作威福侵陵官司冒昧货财更无案籍都城之憔悴商旅所以不行疮痍毒害至今棼然莫理然亦不失享禄于善地此国法不正者三也石得一领皇城司夫有司之有探逻也本欲知军机之密与夫人奸恶之隐匿者而得一以残刻之资为罗织之事纵遣伺察者所在碁布张弮而设网家至而户到以无为有虚为实上之朝士大夫下之富家小人飞语朝上而暮入狴犴矣有司无古人持正之心以为是诏狱成之则有功反则有罪故捶讯惨毒备至无求不得无问不承被其阴害不可胜数于是上下人情惴惴朝夕不敢自保而相顾以目者殆十年俱得一发之今不失厚俸安坐此国法不正者四也是四人者权势震灼中外毒流于民怨归于国宰相执政知不以告于上谏官御史惧不敢论其非幸而圣人在上之时以先帝神武英气镇压其奸不然其祸患岂止若唐之宦官哉以尧之圣不免四凶之在朝至舜起而投之四裔孔子为鲁政七日而诛少正矧然先帝未及诛而以遗陛下陛下以舜之事自任今闻岁刑尚不闻以典刑诏有司未谕也伏乞陛下以臣章附外议正四罪暴之天下而窜殛之以明国宪以服天下谨劾以闻王岩叟言伏观察使知潞州张诚一前为枢密院都承旨有盗发父墓诚一以修墓为名谒告自往因于圻中取其父所系黑犀排方带以归易衬而自腰之与同劫父墓何异族人无不欲朝廷正其罪者方畏诚一怙宠弄权威福在口不敢发耳又生母死岁月已深无故不葬尚委之城北寺中非时未可举贪嗜荣利不肯辍数日之暇耳及六月朱光庭又言诚一邪险诏责诚一授左卫将军分司南京许于本处居住龙图阁学士新知江宁府李定既仕宦之久避其持服明知其母仇氏乃不认及人言乃归过其父左右反复巧为疑词欺心背亲遂若平生无母者熙宁中知制诰

与陈官御史交章论奏有司考核迹状甚明天下无不憎恶而宰相王安石曲法枉道独为主张令按诚一与定大逆不孝天理之所不容人伦之所共弃而各以崇阶贵秩曲领大藩为千里之长其何以顺天理明人伦正朝廷之治厚四方之风伏乞睿明并行放弃勿齿于朝以为天下万世不孝之戒岩叟论诚一及定前后凡三奏殿中侍御史吕陶中丞刘摯等相继皆有章乞明正二人典刑乃诏开封府及京西提刑司限十日根究诚一诣实事状及淮南提刑根究定不持服端的因由仍就便移文问定结罪保明以闻五月己亥右司谏蘓辙言伏见前叅知政事吕惠卿懷张汤之辨诈兼卢杞之奸凶见利忘义黷货无厌王安石初任执政用为心腹安石山野之人强愎傲诞其于吏事宜无所知惠卿指示教导以济其恶青苗助役皆出其手其后又建手实簿法尺椽寸土检括无遗鸡豚狗彘抄札殆遍专用告诉推析毫毛鞭笞天下纸笔翔贵小民烦苦甚于苗役既而惠卿自以赃罪被黜于是力陈边事以中上心在延安变军制杂用番汉上与冯京异论下与蔡延庆力争惟党人徐禧助之遂信其谗背情乱政至今为患永乐之败大将徐禧本惠卿自布衣保荐擢任始终交议遂付边政败声始闻震动宸极驯致不豫实由衅隙一生至今为梗安石之于惠卿有卵翼之恩父师之义方其求进胶固为一更相汲引以欺朝廷及权位既均势力相轧反眼相噬化为仇敌始安石罢相以执政荐惠卿既得位恐安石复用遂起安石李士宁之狱以扼其归安石齐年被召即起迭相攻击惠卿言安石相与为奸发其私书其一曰无使齐年知齐年者冯京也安石京皆生于辛酉故谓齐年先帝犹薄其罪复发其一曰无使上知安石由是得罪夫惠卿与安石出肺肝托妻子平居相结惟恐不深故虽欺君之言见于尺牍不复疑问惠卿方无事已一一收录以备缓急之用一旦争利遂相攻谪不遗余力必致之死此犬彘不为而惠卿为之曾不愧耻况去岁以来朝廷废吴君厚吕嘉闻蹇周辅宋用臣李宪王中正等或以谋利或以黷兵一事害民皆不得逃谴今惠卿身兼众恶自知罪大而欲以闲地自免天下公议未肯赦之然近日言事者之论奏奸邪至于邓綰李定之徒细微毕举而不及惠卿者盖其凶悍猜忌如蝮蝎万一复用睚眦必报是以言者未肯轻发臣不憚死亾献此愚直伏乞陛下断自圣意略正典刑纵未以污铁钻犹当追削官职投畀四裔以御魑魅六月癸巳刘摯言吕惠卿五罪畧云惠卿知其为奸人也方命擅兵天下之大恶也臣恐防微杜渐朝廷不当涵養而不虑也臣位执法职在纠奸伏请以臣章付外议下惠卿罪考古之义依律处分以伸大公之法为奸雄之戒甲午左司谏王岩叟言吕惠卿立心悖逆轻易朝廷故违诏书两次擅兴兵入西界致西人五月以千五百骑犯边供奉官王英战死惠卿为国生事构怨速祸陛下今释不治他日边臣有引惠卿为辞擅兴兵以逞志陛下何以责之此不可不思也伏望陛下奋独断之威正大奸之罪以令四方右司谏蘓辙言吕惠卿赋性凶邪奸恶山积自熙宁以来所为青苗助役市易保甲簿法皆出于惠卿之手至于轻用甲兵兴造大狱凡害民蠹国之事皆发其端至今多日未见施行臣恐国之政刑从此大废伏望检臣前奏付外施行右正言王覲言惠卿妄兴师旅违圣孝之情废格赦敕无人

臣之礼堕祖宗谨始之意开异日边鄙之患侥幸功赏内致疑于兵民外失信于西北亏损国体蠹伤圣政乞早行诛窜以为天下后世不忠之戒六月蕞辙言吕和卿惠卿之弟章惇荐之首为簿法害民之多手实之法过于蹇周辅吴君厚榷盐铁等事独安然不问窃据郎曹实失邦宪伏乞朝廷重行黜责诏和卿权知台州刘摯言中书侍郎张璪天姿倾邪不知忠义立朝行己阿谀柔佞朋附儉人无自立之节其始进以邪说奉王安石其稍退以奸谋附吕惠卿其后随王珪諂蔡确党章惇数人性虽不同而璪能探情变节在左右随合各得其欢心臣曾两次上殿论奏伏望速赐睿断以清仕路以副公论殿中侍御史林旦言崔台符附会安石过失诏知潞州资正殿大学士正议大夫提举崇福宫吕惠卿落职降为中散大夫光禄卿分司南京蕞州居住以谏官蕞辙等言其奸恶及太原府日违登寶位赦出兵西界丙午左司谏王岩叟右正言朱光庭右司谏蕞辙左正言王觐等奏言吕惠卿罪恶奏乞投之四裔辛亥吕惠卿再责授建武军节度副使本州岛安置从谏官四人之所奏也内批付三省吕惠卿罪恶贯盈虽已施行而台谏弹劾不已难居善地可窜逐一遠小处以允公议始惠卿责授光禄卿分司南京蕞州居住中书范百禄草制词有云朕承先帝大烈惧弗克胜而法弊不可以不更张民劳不可以不振德稽其所自法为厉阶右仆射吕公着手简谕百禄云恐彰先帝之失宜删去之百禄如公着论但以人言孔多为说及中书蕞轼草制词曰凶人在位民不奠居司寇失刑士有异论稍正滔天之罪永为垂世之规吕惠卿以斗筲之才挟穿窬之智諂事宰辅同升庙堂乐祸而贪功好兵而喜杀以聚敛为仁义以法律为诗书首建青苗次行助役均输之政自同商贾手实之祸下及鸡豚苟可蠹国以害民率皆攘臂而称首先帝求贤若不及从善若转圜始以帝尧之心姑试伯鯀终然孔子之圣不信宰予发其宿奸谪之辅郡尚疑改过稍畀重权复陈罔上之言继有劾山之贬反复教戒恶心不悛躁轻矫诬德音犹在始与知己共为欺君喜则摩足以相欢怒则反目以相噬连起大狱发其私书党与交攻几半天下奸赃狼籍横被江东至其复用之年始倡西戎之隙妄出新意变乱旧章力引狂生之谋驯致永乐之祸兴言及此流涕何追迨予践阼之初首发安边之诏假我号令成汝诈谋不图涣汗之文止为疑贼之具迷国不道从古罕闻尚稽两观之诛薄示三危之窜国有常典朕不敢私六月甲寅下寬党与之诏先是元丰中邓綰党附安石神宗觉之谓綰赋性奸回自御史中丞斥去上即位复知邓州又徙扬州御史林旦论綰奸邪请废之时范纯仁知枢密院谓既经于先朝今又罪之录人之过太深无以安反侧羣臣咸为宜御史以为不可即日刘摯王觐俱上疏谏上独听纯仁语出内手诏颁下监察御史上官均言下诏寬党与非是是日扬汲落寶文阁待制知黄州崔台符降一官知相州王孝先降一官知濮州先是汲等相维为大理卿持法刻深狱成其意至是为御史论均奏略云邪虐不斥无以戒暴吏侍从不清无以正纪纲刑狱非其人无以安善良愿陛下特行罢黜以合公论于是三人同贬司谏王岩叟又言张璪奸邪又四奏张颀邪佞右正言王觐言臣切见今日差除监司多不叶公议又言中书侍郎张璪面柔而心狠言甘而行险



乞罢其执政癸酉新除中书舍人林希为集贤殿修撰知蕪州先是有旨以希为中书舍人御史刘摯王岩叟劾希党附张璪不可使为中书属官具奏刘摯明日又言之孙升复连章论之遂有是命九月己卯中书侍郎张璪以资政学士知郑州先是谏官御史如王觐孙升王岩叟蕪辙刘摯累章疏璪邪佞请出之上欲退之以礼章不肯下觐等论之不肯已初帘中宣谕岩叟等曰明堂大礼后璪必退至是明堂礼成璪亦引疾请外遂有是命十一月戊寅起居郎蕪轼为起居舍人曾肇并为中书舍人王岩叟凡八上章言曾肇皆不听因乞罢言责亦不听亦以肇非才进也御史吕陶亦言肇之邪险十二月王岩叟入对再论曾肇事曰肇乃奸臣曾布之弟妄言郑州可废为县朝廷遣肇复按可否肇心知非郑之所乐归而实兄之言诳上之听辄以为可废遂废之由肇一言使一州受弊几二十年肇真小人不可用乞落中书舍人令与外任【此系岩叟入对辞】

元佑二年四月壬申朔戊申尚左仆射李清臣以资政殿学士知河阳初御史中丞傅尧俞侍御史王岩叟屡请罢黜清臣清臣亦累表乞补外遂有是命五月壬子诏御史中丞傅尧俞侍御史王岩叟同举监察二人二人等奏臣先准勅举御史遂荐承议郎张舜民居官有补被黜无名乞陛下特赐优容许归言路已未傅尧俞谏议大夫梁焘御史王岩叟司谏朱光庭王觐御史孙升韩川论张舜民不当罢御史累奏不报庚申诏三省枢密院召台谏官等至都堂听诏梁焘同御史与宰相下论久之明日面谕即退居待罪而孙升再劾给事中张问不封驳张舜民罢职事焘责诘之问引咎而已于是批旨付三省曰岩叟等久在言路宜稍选擢焘于禁中诘同列引朋附党宜罢于是用公着言岩叟等皆优迁升焘有是命左仆射吕公着先虑言者将激上意致朝廷有罪直言之失乃奏乞稍与优迁令解言职王岩叟为起居舍人不拜乃除知齐州尚书左丞刘摯言十五日吕公着送示内降批旨罢谏官梁焘等十数人臣切料陛下必以舜民轻言以及元老一失也议者欲慰大臣而罢御史又一失也言者不体圣明优礼故老又一失也今又倏罢谏台恐不止三失七月朝奉郎沈季长为少府少监谏议大夫孔文仲言季长本无学问技能止是王安石门楣鼓唱王氏经义聋昏众学今一旦召从外路副贰等监季长之党布散如蚁一季长进则百季长相继而来不可拒矣左司谏吕陶亦以为言诏罢季长少府少监知秀州御史中丞胡宗愈言杜纯颇辟刻深无学术进不由科第用法徇私乞罢其侍御史执政力为纯辨而中旨令与觐更任宗愈又言纯諂附绛乃出知相州臣寮上言切闻近有指挥建宁军节度副使建州居住吕惠卿许于泰州居住切听朝论人心汹汹不安惠卿操心贪险为性凶邪言论足以鼓扇羣小险横足以胁持上下其执政之时凶人布列中外残党尚未消息闻引置惠卿于江淮之间羣小莫不相庆兼惠卿凶残忍诟贪冒无厌既得近地必须日夜呼召党与力肆营求造作讹言谋害朝政凶人渐长其势可忧欲望朝廷依旧且令建州居住指挥更不施行言者中丞胡宗愈左谏议孔文仲御史王珪司谏韩川也十一月监察御史赵挺之言朱光庭奉使河北而空累年之积又监察御史方蒙言朱光庭奉使一出而空河北措置之财且措置司物料其经营之劳多

矣倘给散有方虽水旱凶荒可为累年之备一饥而散之殆尽乞行黜降以允舆论诏朱光庭具悉以闻三年二月宣德郎正字刘安世为右正言司马光既没太皇太后问吕公着光门下士素所厚善可任台谏者孰当先用吕公着以安世对遂擢（阙页）

### 哲宗弃四寨

元丰八年三月哲宗即位夏人复遣使诣阙陈慰继又进助山陵其十二月乙丑其母薨复来告哀以马驼进诏答之复进奉以谢当是时朝廷追原先帝本意息兵养民而外廷之议谓夏人衰弱不须过为姑息独范纯仁不然上书曰夏国差人诣阙多日未见放回近日探得贼中事宜渐却添屯兵马必是敌情疑沮却欲别生边患伏望以陕西生灵之故地稍从其欲使复常贡庶可罢兵俾西夏复见太平陛下好生之德洽于生灵祖宗社稷享万世之安在陛下一言赐尔尝读汉光武报臧宫马武书良有深诚臣恐陛下欲闻谨录缴进惟圣心采择【诏书曰黄石曰柔能制刚弱能制强柔者德也刚者贼也弱者仁之助也强者怨之手也故曰有德之君以所乐乐人无德之君以所乐乐身乐人者长乐身者亾舍近谋远者劳无功舍远谋近者逸有终逸政多忠臣劳政多乱人故曰务广地者荒务广德者强有其有者安贪人有者残残灭之政虽成必败今国无善政灾变不息百姓皇皇人不自保而远事边外得乎孔子曰吾恐季孙之忧不在颛臾且北庭强而屯田警备传闻常多失实诚能举天下之半以灭大寇岂非大愿苟非其时不如息兵】时纯仁以侍讲召而侍读韩维门下侍郎司马光亦俱劝上以弃地和戎为利维上奏曰先帝时大兴甲兵西讨夏贼以问罪为名收其土地致夏人违失恭顺外国之俗以不报仇怨为耻今国力渐复必来又取若夺去则先帝累师所得一旦失之为可耻若兴师拒战则边隙复开兵连祸结未有已时切思兵不可不息者有三地当弃者有五皇帝春秋尚富太皇太后深居九重岂尝习闻军旅万一寇兵犯边者数至发兵调食应接不暇或以震上心劳圣虑此兵之可息一也自灵川之役永乐之败闕陝凋耗士气未复今若兴大役必有违命而散为盗贼者外虞方作内患又起恐朝廷之忧不在夏国此兵之可息二也绵地千里屯兵数十万必藉沉谋重望之臣为统御忠义拳勇之将当战鬪干事宣力之臣促办粮馈在朝恐未足充此又兵械皆捐弃之余帑庾乏絶此兵之可息三也先帝以秉常受朝廷爵命而国母擅行囚废故发兵问罪今梁氏死秉常复位恭顺有礼若此时复其故地则神宗问罪之名不虚此地可弃之一也朝廷自得熙河岁费缗钱五六百万得兰州又费百万以上得多费广拓地之利亦明矣此地可弃之二也议者以为兰州近夏人巢穴最为形胜亦有要害可以增置城堡弃之非便若欲兴师收复灵夏存文可也若无此意劳人废财奉空虚之地则又添一熙河矣此地可弃之三也辽夏二国婚姻唇齿万一辽国贻书援先帝兴师之意请所失地与之则恩归于彼不与则彰先帝之过边患复兴此地可弃之四也人之所贵者礼义恩信也而其所贱者珠玉锦绣也今厚所贵以薄所贱则吾道尊与其所欲以成吾所不欲则四夷服此地之不可不弃五也七年蕞轼知扬州六月癸丑朔访闻淮浙积欠最多累岁灾荒人民流移相属今淮南

始得一麦浙西未保收成应淮南东西两浙诸路盘查逋负不问旧新有无官本并特与权停一年内已有宽限者即依元降指挥轼之言也辛酉吕大防尚书左丞蕪颂守尚书右仆射兼门下侍郎蕪辙守门下侍郎韩忠彦知枢密院范百禄守中书侍郎梁焘守尚书左丞郑雍为尚书右丞刘奉世枢密直学士签书院事梁焘辞新除太皇太后曰比来朝廷有何缺政焘对今圣德日新天下安静如边防河患内外讲究须博询通习事者校河害为之如边事须问西人河事问河北人参酌又上言刘安世范祖禹宜置诸左右使断国事又言今边事为急范涪治边有功宜先用之又言安焘一日议两制差除执政异同不决吕大防顾焘谓谁可焘曰相公久居朝廷收養人才固多宜自有人惟不以爱憎牵于偏听为朝廷得人为己任此所望于公也大防曰苦乏才焘曰天下何尝乏才但好人不肯求进须在识别分明焘曰公生明则识别自然明矣三省言检会赦文应官吏军民诸色人诸般欠负官身在元丰八年三月六日大赦以前五百贯以下并与除放五百贯以上奏裁差侍从官与户部同点检催督限三年毕诏翰林学士顾临御史中丞李之纯与户部长贰依赦施行仍就本部置司诏环州及诸镇寨守御居民人入保汉番人户等第所借口食内有曾经贼马至处令经畧司并特蠲放具数以闻梁焘言臣昨在翰苑日尝密具札子设醮一座在京外州军自正旦日办食设狱三日并支系省钱嘉与臣民共增吉祷庶几中外均被余禧

元佑元年二月壬戌光奏曰神宗皇帝以秉常为臣下所囚兴兵致讨寇命河外诸将收其边功建米脂义合浮图葭芦吴堡安疆等寨用为己功非国计也此数寨者孤僻单外难以应援田不足耕垦地不足守御中国得之徒分屯兵马坐费刍粮此众人所共知也中国得之无利而敌中失之为害何则深入其境近其腹心常虑中国讨袭是以不肯弃舍一年前敌尝专遣使者诣阙请臣其志止欲求其旧境而已朝廷乃降指挥前云所以兴举甲兵本欲执取罪人救扶幽辱非有意侵取疆地后云止将已得些子边土聊尔示罚岂可更有陈乞还复之理此朝旨首尾已自相违彼既失望愤怒怨怼移文保安军辞理不逊云今来贺正旦人使难议发遣陛下断明皆不遣使人入贺其不臣大矣然而岁四遣使者诣阙臣料敌意有三一者犹冀朝廷赦其罪戾返其侵疆二者阳为恭顺使中国休息伺隙入寇三者其国贫乏使者往来得赐赉之物因为商贩昔卫贰于晋取戚田及卫人既服郟缺曰昔卫不睦故取其地今已睦矣可以归之叛而不讨何以示威服而不柔何以示懷非威非懷何以示德遂归戚田于卫今西人所为如此朝廷既不得拒绝其使又不能开纳与之更始彼此则迎送馆穀去则一无所问日复一日将踰二年臣切意朝廷谓西人势已衰弱故置之度外殊不思数年前王师大举深入将士所过烈于猛火割其疆場屡请不还彼怨毒覬觐之心日夜不忘譬如虎狼垂头熟寝人见其不动狎而侮之以臣虑有二策一者返其侵疆二者禁其私市何谓返其侵疆凡天子即位天下一新涤瑕荡秽小大无遗李继迁俶扰西陲十有余年關中困弊真宗即位赦其大罪割灵夏等数州除其子德明为定难军节度使边鄙安宁者四十年此乃祖宗成法今



乘常罪不大于继迁米脂等寨不多于宁夏陛下诚于踰年改元之际特诏推恩尽赦前罪今后贡献赐予悉如旧章废米脂义合浮圖葭芦吴堡等寨令延庆二州悉加毁撤除省地外原系夏国旧境并以还之其定西城兰州议者或谓本花麻所居赵元昊以女妻之羈縻役属非其本土欲且留为后圖犹似有名至会州尚在化外而经畧司遂称熙河兰会敌尝疑中国更有辟境之心不若改为熙河岷兰经畧司如此则西人忽被意外德音虽禽兽木石亦将感动况其人类岂得不臣议者或曰先帝兴师动众所费千万仅得数寨今无故弃之中国之耻也昔汉元帝弃朱崖议曰朕日夜维思议者之言羞威不行则欲诛之通于时变则忧万民夫万民之饥饿与远蛮之不讨厄孰大焉遂弃之此帝王大度何耻之有万一西人积怨逞凶投闲伺隙兵连祸结如向日继迁元昊虽有米脂千余寨何益乎何谓禁其私市西夏所产不过羊马毡毯其国中用之不尽三面背夷羌鬻之不售惟中国茶彩百货之所自来故其民如婴儿望中国之哺之矣寶庆元年元昊负恩僭乱中国未尝蹈境破军擒贼屠城有其社稷也首尾六年元昊遣使因缘边吏卑辞纳款顿首称臣原其私心未必不贪中国之财思私市之利故旧制官给客人公据方听与西人交易近法禁疎阔边民西人私交易者日夕公行又频遣使商贩中国虽不获岁赐之物而公私无乏得以偃蹇自肆陛下诚能却其使者明敕边吏严禁私市年岁之间公私困弊自谋将来礼必益恭然后责而赦之许通私市然边民与西人交易日久习玩为常一旦禁之其事为难不若前策道大体正万全无失也又奏曰臣于十二日上言乞下诏赦西人之罪还其侵地以安边境至今执政议尚未决若行臣前策可以万全后策有得有失岂可弃上策用下策舍万全而就有失也今民困力穷府库窘乏又新遭大丧山陵纔毕自去年十月以来不雨若万一激怒西人一语不逊并臣前策亦不可行矣执政方谓西人微弱不以为虞固执先禁私市之议臣虽画二策固以还其侵地责之赦之为上策严其私市待其贫困来服赦之为下策所絶私市非立法至严帅臣智勇未可易行不如前策万无一失非前后反复静言庸违也伏望陛下早察二议从其长者既而纯仁到京入对已即诏赴都堂议边事退而奏疏曰臣昨日见罢便蒙三省枢密院召赴都堂访问边事臣外任乍来不暇深虑随问陈对问欲降诏即以解仇释怨罢兵息民为对问欲审察敌情措置事机则以专委使臣为对问弃地可否则以不可便与可换易蕃军民生口为对缘臣不见先朝举兵征讨因依及夏人后来乞和请地并答诏阻絶本末加以臣志虑短浅茫无决论以副所问臣思国家安危所系并二三执政若所见不同陛下深居九重不易裁决今有愚见当密具启陈难形于文字伏望圣慈只作中旨特诏臣上殿赐以燕闲俾得敷陈一二少裨圣明上于是宣问李清臣清臣奏曰臣伏以夏国虽通问使未就职贡顾其深意实为款兵之策观我强弱谓朝廷有厌兵之谕则自弃新疆坐取全胜若依旧固守今秋物力稍全必左右攻劫使接应仓惶纵不袭破营寨使我上下恐动自谋退保臣料外方计必出此昨蒙宣问执政奏议未及切惟边境大事乃辅政之责而上贻圣忧愚臣深负愧惕切见吕大防范纯仁皆在西寨今并在京师其人明审

详练众所共称欲望特降圣问付以笔札条具边计及新立城寨可守可弃果决之策若夏国未服当如何措置向者如何守御以所奏付三省枢密院与司马光所言叅决利害或选遣一人行视边寨亲与逐路守帅定议闻奏庶不悞事如赐俞允乞先密降御批各付吕大防纯仁候有所奏即赐览详酌施行其选遣一人行视就议别乞旨挥贵得边计审量丙子李清臣奏入上即降中使出手诏问纯仁大防曰夏国自神宗皇帝升遐后来遣使吊慰祭奠继以告国母丧进遗物今又遣使入贡谢恩使人北来外示恭顺稍可见也然西人狡猾未测其诚心何如尔如向所得边地虽立建城寨亦虑孤僻不易应援弃之则弱国威守之则终恐戎人在念卿久任西寨深晓边情宜罄嘉谟辅予忧劳可修具边计合如何措置向去如何守御亲书实封闻奏无拘以文纯仁奏曰切见夏国自朝廷用兵以来其近汉之民颇失生业并寨二百余里不敢耕种上下皆欲讲和又自陛下临御圣政鼎新有不便民皆为蠲除诏令一下民间欢呼鼓舞以至印卖传播谓之快活条贯此事实时闻于四夷边上臣僚亦体朝廷之意不纵侵扰夏国以朝廷待之异于昔时所遣使人慰问以探朝廷之意朝廷待其初来之使礼意既厚是以接续肯来至于累次不失恭顺而终未敢复言请地者意为前来朝廷拒之太峻却虑启口之后更失朝廷之意则和好愈难今闻夏人又将到阙若选择押伴臣便与推诚论语因时谈美政及陛下好生恶杀舍己从人之德彼必有对答则西夏之情可见若愿和则可令作押伴臣意度说与自用兵以来甚有陷番官吏军民见在两界若夏国尽纳朝廷却将彼到生口赐还夏国如有边上未便之事亦可因而陈请朝廷必量度应付彼若云前来请地乞贡只是梁氏之意宜在朝廷不允则可答云前来请地乞贡梁氏之意宜朝廷不允今梁氏已死朝廷于国主必无所难彼若别无对答则乞委延州赵高宣布此谕俟其肯还生灵及来请地则可降诏许之亦不须疑其狡猾俟彼将陷番官吏军民押在界上却将向得边地及地寨内外有汉居人属户先次渐令移入近里并勾聚前后彼到夏国生口在界上立定誓表预约日数两相交还如此措置则取舍有名于国势无亏其向得边地虽建立山寨其间实有孤僻不易应援供饷之处留之则戎人必须在念恐致边事难息若却换得陷番生灵不惟无损国体兼和气充塞天地圣德超越古今中国无穷利矣若赵高论不肯换易及换后生诈计别有邀索则朝廷自可絶之严禁边臣坚壁静守任其所为则我直彼曲我逸彼劳彼曲则神人共怒彼劳则虽久不来庭于王道无损交地之际及宣布之时其间或有意度节次更委赵高修上不得落贼奸计臣仓卒畧具大槩仰答圣问如蒙召对尚有口奏事件在陛下择而行之大防奏曰臣识暗才短无补治朝蒙访机事敢倾愚陋诏书所访谨条陈于下诏问夏人狡猾未测其诚心何如臣以为外国自古无信西夏自继迁以来专事谲诈惟御得其道则诈无所施或失其方则骄肆益甚待遇之不可不审臣观今夏之情畧见矣羌人重于酬赆先帝举大兵径入灵武几入其国而不能以数万之众入塞为报永乐诸将僨谋败事使此寇借口然自是王师深入不虞之咎非其本国举兵之成功盖未为美寇之无能为一也自来开边进筑之始寇必力争昨兰州

之城攘斥甚广寇虽再至争不能得去岁冰合不来城既益全敌望亦絕寇之无能为二也比闻秉常孱弱梁氏能用其众今梁死而秉常存亾未可知也若秉常在则内难未已何暇外图虽秉常在亦不足畏今数遣使入朝者蓋欲观望迁延不敢先发示弱臣闻寇使旦夕入朝可使押伴臣僚且以私意问来使今主上嗣位自大辽诸国皆遣使入贺夏国是朝廷蕃臣何故独不至以观其意足采情伪臣向在永兴军日得米脂降羌具道秉常所为使其言可信必不能用其众臣近馆伴北使曾语及夏国遣使入贡北使却问作何人遣使以此观之秉常存亾臣未可知也诏问向者得边虽建立城寨亦虑孤僻不易应援弃之则弱国威守之则终恐戎人在念臣谓新收疆土议者多言可弃蓋思之未熟也诏旨以为弱国威真庙算之遠虑然臣犹谓不止弱国威而已又有取侮于四夷之端焉况兰州定西之地本非夏国封境又其君长尝受朝廷禄秩元昊以来方盗据其延庆城寨则接近汉界一旦既得而弃之未见其可今日措置之宜只可降诏下本路将会州一处更不收取改熙和兰会路为熙州兰州路其兰州及延庆两路新建城寨只据见得地界守御亦可稍安敌情定议和之计矣议者谓城寨兵少则不足出战多则无力供馈臣谓绥兰之地皆并寨每日增招民兵垦辟以足食则馈之费省专事守计少存战兵则骑兵可大减矣其增招民兵辟旷土分守战之策减供馈之费如以为可即乞下臣条断利害且元昊既得甘凉遂窥陇蜀后缘唃氏洮兰中强无以进取今青唐乖乱其势渐分若又失洮兰则他日陇蜀之患不可不为预防诏问边合如何措置向去如何守御臣谓今日边计惟择将帅为先转运为次其它设施皆可取办问国初西患多在环庆太祖皇帝择姚内斌董遵诲以守二州租赋之入兵械之费一切听其自为西人不敢入寇今以四海之民力奉边而不足太祖以二州之租费御戎而有余以此言守御在于得人而已臣谓陕西五路宜择威名忠厚之臣为之统帅其次为将佐又择公正强明之臣为转运使俾各择才能以充佐使之属官边臣专事守计而战救之兵畜于内部平居则散而耕寇至则聚而守且为内郡之兵以援之视寇多寡浅深而必报之无使得志亦不妄动生事守兵虽见利不许战战兵虽见利不得久在边地如此则费省易供守坚而不堕其计纯仁大防议既不同朝廷愈惑惟司马光力持和议奏曰臣先于二月中上言乞因新天子继统下诏赦西人之罪与之更始虽未还侵疆且给岁赐此道大体正万全无失既而执政所见各异沮难迁延屏弃不用臣闻今来西人已有關报遣使诣阙贺登寶位国家若又不下诏开纳万一蓄积怨愤肆其悖心或一骑犯边一语不逊是时虽欲招纳乃是畏其陆梁伤威毁重何耻如之即前策亦不可行矣伏望令三省枢密院将臣所上文字进呈断自圣心勿复有疑又具以进李清臣亦请颁其给赐与司马光论合顷之西人果遣使以土疆为请至日有司马光王岩叟蘓辙俱奏论以为不可不许既而敌使在邸而议犹未决范纯仁书再上刘摯蘓辙亦奏请许之纯仁奏曰臣见前日帘前文彦博等诸执政论疆界事宜时诸臣奏对已多臣有管见不敢久烦圣听欲自别日奏陈臣又病假在家未能如志切虑夏人在庭议论日多谨条列闻奏若以所得土地换易陷蕃生口如



此便可罢兵息民此上策也兰州定西城元是西蕃境土后来属夏国已有景德中誓表更不虏掠西蕃彼虽坚意欲之我亦留之有名余遣边帅宛顺商量我虽未可罢兵彼应未便猖獗此中策也若留寨门吴堡义合而止弃远之可守二三城寨则朝廷与之不足示恩彼得之不足副欲如此兵必不解夷夏未安陛下仁政何由复胜负安危之机邈未可料所得之地不及秦汉万一乃妨陛下尧舜之政且有后忧此下策也惟采择以为万世无疆之福又奏曰臣前议以夏地换陷蕃人口犹虑狡情量遣三五十人以受赐地臣欲乞别许夏国每遣到汉人一名赐地之外更持绢十疋则彼人贪利必肯尽数交换不过捐中国缣帛而换数十人则陛下之德超絶古今感动华夷可为万世之法摯奏曰议者之说臣尝询本末得其为弃地之议者曰往年兴师本以吊民伐罪既取地自利其势必争伤财害民以争非其地势不得不弃因而后弃不如捐空城与之以示恩惠此言是也然难者谓予地息争若虎狼无厌之求得地据险易扰近郡其能保不为患乎为守之议者曰预储设备增募士兵远斥近援何地不守且先帝所得而以与人非此言亦是也然难者谓寇不得地兵不得解日引月长边衅益大其能终保守此地乎故议者非不曲尽事理至弭未然之患如难者所忧虽好谋之人莫敢任责切料朝廷深计远虑未欲遽决亦必以此臣独谓用兵以终守其诚难保他弃地而使不为患臣虽老矣愿保没齿不见边患愿陛下赦其愚使毕其说臣闻向得地在熙河为兰州在鄜延为五寨兰州本西蕃故地五寨本夏有也其地道里迂直产利厚薄所须守兵多寡转饷劳逸皆朝廷所熟究臣不复道而自夏人视为必争之地彼将以誓约为请固请而固不与彼将兽困而鬪借兵戎以逞忿朝廷且有西顾之忧使我师胜臣犹以为非国之利况又杀伤相当成败未可知陛下谅阴之际太皇太后垂帘称制正思与民休息而血战以争尺寸无用之地是以隋侯之珠弹千仞之雀终守其地臣所不敢保也自祖宗以来岁捐金帛数十万遣使修约而二寇稽首顺命者数十百年矣外国好战无厌固天性也然且如此恩利足以羈縻其心故也今乘先帝讨击之威因其屈服旷然推恩归侵地复岁赐丁宁戒敕分弃前患复谨旧约彼虽桀黠睚眦之意既塞其欲当无所发亦将感激退听复如前日何苦动众犯顺自鱼肉其民伐彼之国宁独利乎古之养虎也时其饥饱达其怒心虎或可养况外国乎由此言之弃地息兵非独臣以死保之自祖宗御二边者用此道也愿采议者之言观前日之势而断以此意大计既决其余施行次第在朝廷裁之而已然臣拳拳之愚不敢不尽今请地在彼予地在我是主待客逸待劳也为彼计则急我计则宜从容镇以无事臣切议者皇皇视此地如金汤惟恐不守不然如附赘悬疣惟速去是决异议纷起何其遽迫无大体也今使虽在邸且无遽许以地答以善辞遣之或先岁赐而微示以不爱地之意度其効顺坚决再三然后岁月予之所谓许外国不一而足夫岂晚乎辙曰陛下登极以来夏国虽数遣使而疆场之事不言度其狡心盖知朝廷厌兵故确然不请欲使此议发自朝廷深觉其意而不与情得势穷始来请命若又不允来使徒归一失此机必为后悔彼若点集兵马屯聚境上许之则不为恩不许则衅开无已臣又闻昔取兰

州十五寨地本非先帝坚意先帝始议取灵武内臣李宪畏不敢去遂取兰州先帝始议横山帅臣沈括种谔之徒不遵圣畧遂兵取五寨二者由将不识上意邀功免罪先帝意则不然后元丰六年夏国遣使请罪先帝嘉其恭顺禁敕邊吏禁止侵掠既又遣使谢恩请复疆土先帝仍为旨挥保安军与宥州议立疆界因循未定先帝奄弃万国遂至于今由此言之兰州五寨取之非先帝本心弃之则出先帝微意今不深究本末妄立守议苟不度民力不为国计私己自便非社稷之利也又闻议者或谓弃守皆不免用兵弃则用兵迟守则用兵速迟速之间利害不遠若遂与地恐非得策臣闻圣人应变之机正在迟速之际但使稍缓则吾得算已多昔汉文景之世吴王不朝谋乱天下文帝专务含养加赐几杖恩礼日隆瀆虽藏祸心终不能发及景帝用晁错之谋削其郡县以为削之反不削亦反削则祸疾而小不削则祸反迟而大削书一下七国尽反至使发天下兵遣三十六将仅破之议者若不究利害之浅深较祸福之轻重则文帝近于仁柔景帝近于强毅然而如文帝计祸发既迟可徐为备御稍经岁月变故自生以渐制之势虽有十瀆亦何能为如景帝之计祸发未及旋踵已至兵刃既接社稷之命决于一日虽食晁错之肉何益于事今欲弃之策与文帝同守之策与景帝类臣乞宣諭执政欲弃者理直而祸缓欲守者理曲而祸速曲直迟速孰为利害况皇上妙年母后听断将帅吏兵恩情未接兵交之日谁使効命若羽书沓至胜负纷然临机决断谁任其责惟乞反复深虑早赐裁断无使西戎别致猖狂弃守皆得其便当时执政类俱持议二三久无从一之论独司马光文彦博赵瞻持弃之议甚坚众莫能夺遂定议尽归永乐陷没之人即计口赏帛仍以葭芦米脂等四寨给赐之边使既去御史林旦尚争弃地有十不可奏曰熙宁中种谔取绥德城议者为不可举朝上下不欲弃之独韩琦在陕西坚持不可弃之说先帝从琦言城卒不弃至今士论嘉琦有守而服先帝善断羗夷贪黠侥幸干请要须以议折之使语塞心沮然后有所畏不敢肆狂岂宜先自示弱而苟欲厌其心乎夫以天下之富而惴惴恐三二城寨臣切谓议者之私忧过计也古者敌国争尺寸之地至竭帑廩战而不悔此固不足为法然古今理亦可见且积年经营之功因一请而与之似亦大率易也今俗论往往以贾捐之弃朱厓为口实夫朱厓隔絕大海屡烦遠击为不便今西人所请乃在吴地非隔海也非劳攻取也谬以为比不亦异乎第边臣姑息苟安趣了目前之事幸无近忧不恤遠患又疎遠之人妄意朝廷都弛边备以弃地为说言入上悞圣听反使黠羗得计边民失所可不虑耶况守以困敌与以资敌损益利害明甚不可不察也今西使既还许地与否臣未与知但既待罪言路事无大小皆得论列今事關国体安敢隱默伏望圣慈与决之际更赐审察但遴求边帅精择监司罢不急之官省无名之费选将练兵安熟户辟田野严生事之戒惩幸功之赏何患二三城寨不能贍给庶观望咸絕覬覦奏入上不纳是岁元佑二年也明年春夏人以乘常遗物来贡诏其子干顺为夏国主如明道二年元昊除节度使西平王例册曰皇帝若曰尧建万邦黎民时雍周立五等重译来贡此帝王所同国家成法也咨尔干顺惟我列圣眷乃西陲锡壤建邦卫于王室保姓受氏同于宗

盟恩礼甚渥今尔承胄绪绍兹藩屏而能事上钦肃饬躬靖虔申遣使人来陈方物达于朕听实惟汝嘉是用稽酌典故表显宠名锡以茅土之封加以服乘之数诞颁丕册以绥一方今遣朝奉大夫起居郎直集贤院上骑轻车都尉赐紫金鱼袋刘奉世崇仪副使上骑都尉安喜县开国男食邑三百户崔象先持节册命尔为夏国主永为宋藩辅夫笃于好德自克显光忠于戴君永膺福祉徃祇明命无忝予一人之猷训干顺受册其臣梁乙逋者擅权逆命方以兰州寨门借口不遣谢使不贺坤成其秋遂寇镇戎军苏辙上疏曰臣见西戎自秉常之祸人心离贰梁氏与人多一族分据东西厢兵马势力相敌疑沮日深入寇之谋自此衰息朝廷招纳即服使介相寻臣礼甚至今年夏初始有桀心出兵数万掩袭泾原杀掠弓箭手数千人归复巢穴朝廷方事安众接以君臣之礼加以策命之恩遣使厚赐金币戎狄兽心辄以地界为词不复入谢坤成贺使亦遂不至闻者不愤臣切惟当今之务必先知致寇之端由审行事之得失然后料敌情所在定制敌之长算则羗戎小丑势亦无能为也栋戡世効忠力非诸蕃可比乃者老病其相阿里库擅国事大将果庄及温希新等皆懷不服阿里库欺罔朝廷自称栋戡嗣子朝廷即以节钺付之谋之不臧祸自此起阿里库知失众心虐用威刑而果庄自谓与之比肩一体顾居其下心常不悅夏人乘间折节下士先与阿里库解仇结欢令转说果庄举兵入寇复诱胁人多保忠令寇泾原窃发党与既立羽翼既成是敢狂言以动朝廷向若阿里库来告嗣朝廷遍问星多保忠等以谁实当立若众许阿里库则既立后众必无词若以为不可则分栋戡旧秩以三使额授此三人阿里库侥幸之命果庄无怨望之意则夏人无与为援安能动摇且数年来朝廷厌兵羗中察意亦以自安顷者忽命熙和点集人马大城四關仍去来年当筑龕谷声势既暴寇心不宁举兵自强衅亦由此致寇之端由也先帝因梁氏篡逆举兵诛讨侵攘地界为怨至深计其思报未一日忘也陛下意切怀纳是以连年入贡休民息兵亦非本意矣假令犯顺固必有辞今赐之册命捐金钱二十余万缗以为之礼彼既与我有君臣之分然后可责以忠义之节朝廷此举于义甚长而羗寇无谋遂肆傲桀内则国中士民自知不直必不为用外则中国兵将皆有鬪志易以立功虽弃捐金帛封殖寇仇小人谓之失策而分别曲直以激励将士智者谓之得计此行事之得失也元昊本怀大志长于用兵谅祚天赋凶狂轻用其众然国力小微终以困毙今梁氏又非元昊谅祚之比意谓之圣恭默守成无意用武可肆无厌兰会诸边备益兵练将则羗人心乖本计不过秋冬小小跳梁尝试朝廷而已若朝廷守边无失则款寨请盟本无愧耻若惟务求和则求请百端渐不可忍此敌情之所在也臣恐夏人未知朝廷不憚用兵之意无以折其奸心愿明降诏书榜沿边诸郡大意畧曰夏国自谅祚丧亾先帝举兵吊伐既絶岁赐复禁和市羗人穷守沙漠老少穷饿不能自存朕统御四海闻此一方遂勅诸道禁止侵掠近寨之田始复耕垦既通和市复入贡使者一至赐予不费贩易而归获利无算朕念孤童幼弱部族携贰若非本朝赐之策命假以宠灵何以威服羗豪保有疆土朝士大夫咸谓其心反复必未可知使者将行言犹未已朕有存亡继絶之志断而不疑



故遣使出疆授以礼命金钱币帛相属于道而狼子野心餉而背德不遣谢使不贺坤成朕以君道抚之而不以臣礼报朕将天地所疾将相咸怒朕惟狂谋逆节止其一二奸臣国人何辜当被弑戮是以弭兵安众未议攻讨然逆顺之理不可不明其令沿江诸将飭励兵马广为储峙敢有犯塞即致无赦臣料此命一出羗人愧丧虽未即款服而奸计沮屈无以号令其下诸路兵民知彼曲我直人思致死勇气一发边声百倍求和之请其至必速此倒敌之长算也臣闻朝廷近已添屯兵将增广通储议絶和市使熙河帅臣招来阿里库果庄温希新星多保忠等此兵法所谓上兵伐谋不战而屈人兵然一事似非臣得言者但蒙国恩不敢不尽昔熙宁元佑间行政虽不便民然先帝济之以威事无不举今朝廷行政善矣然刑政不明中外弛堕臣谓宜因事正法以明示天下臣前所言去岁大臣承用阿里库欺罔之奏授以节制此则当时宰相枢密副使苟简无谋之罪也近泾原贼马至者数万杀掠数千斥堠不明备御不及熙河贼退屡月而杀伤焚荡之奏未止此则将帅弛慢不忠朝廷之罪也陛下何不取去岁与议大臣在位去位皆夺一官至于两路将帅随罪行罚以此号令四方庶知畏惮今陛下未能正臣而望西羗畏威不可得矣三省枢密院即请发兵奏曰夏自秉常告丧既予恤其国又封册其子赐与甚厚国中部落老幼欢跃不谓彼强国弱犹有异意风闻干顺不治国事有凌伊特布者擅权立威凡故主近亲及旧任事人多为所害以为居边塞无事则奸谋不成故輒犯边以请地为名不遣贺坤成节谢封册使反复邀乞别怀二三若不加诛无以示威边徼上独以天下为度开其自新遂下诏曰夏国国乱主幼所以犯边及不遣使贺谢皆由强臣凌伊特布等擅权逆命阴有异图即非其主与国人之罪岂可遽兴讨伐使向北之人例遭诛戮宜令诸路帅臣无得先起事端其所发兵马屯次边界如特布等能翻然改图忠事其国効顺朝廷本国王章通贡特许收接与之自新若终犯顺即令诸路乘便深入务在外锄首恶不得滥及无辜内首领素不附乙逋欲自拔来归及乙逋同党有能附顺者听所在以闻其后夏人虽时寇边类不得志始遣使谢封册请以所给四寨易兰州寨门密院进拟回答诏意以为不可许上从其议先以岁赐赐之诏曰夏国主省所奏昨差人赴延州许会将永乐等人口及所还四处寨交换寨门兰州两处地实在朝廷酌中裁决事其悉尔嗣守世封虔修贡职须属罢兵之后继陈复地之言累降诏旨备谕朕志岂谓歷时之久尚稽闻命之行忽覽奏封深亮诚款顾改图之议犹有陈款然争事大之恭实听裁决再惟忠顺殊用叹嘉虽易地之求当一遵于前诏而酌中之请宜别示以优恩除汉蕃土地指挥已明难从换易外所有岁赐据前诏会合候地界了日依旧令推特恩已敕有司更不候地界了当检会依例施行尔其体朝廷恩信之隆谨封疆严守之戒永思绥靖用保悠长至是遂以那逢原而下一百四十九人归于朝廷

太平治迹统类卷二十

wave99 发短消息

加为好友

wave99 当前离线

UID1 帖子42 精华0 积分62 威望0 金钱40 贡献0 阅读权限200 在线时间43  
小时 注册时间2009-5-12 最后登录2010-8-20 管理员

3# 发表于 2009-9-24 18:25 | 只看该作者 踩窝窝 送礼物 问候Ta

### ●钦定四库全书

太平治迹统类卷二十一

(宋) 彭百川 撰

哲宗擒果庄

元佑二年八月以俘获西番果庄青伊结羣臣表贺果庄栋戩之别将也桀黠有智谋所部兵锐数为边患熙宁中诱陷景思立神宗屡诏欲生致之为熙河患二十余年至是朝廷罢兵减陇右戍遂与夏解仇为援夏聚兵天都召十二监军大举果庄遂逐巴珍觉注常家十城洮州收聚老弱辎重秣马厉兵或谓羌轻无备宜命帅臣便宜从事则可系而掳也于是遣监丞游师雄为熙州谕旨刘舜卿即召将议方畧姚兕种谊请分兵两路急装轻赍并洮水而进姚兕洮西领武胜正兵合河州熟户捣讲珠城胁取六通宗族遣人出间道焚河桥絶西援种谊洮东以岷番包顺为前锋由竒龙谷会通远番兵夜济邦金州黎明至洮州城版筑未收一鼓破之获首领九人俘馘数千遂生擒果庄奏闻佥议翼朝称贺知制诰蕪辙奏曰臣闻熙河经畧奏擒果庄宰相欲明日称贺臣愚以为偏师独克固可庆然明日臣谓太速如闻本路出兵准一将方指青唐此乃阿里库巢穴若待三五日必续有奏报贺亦未晚今俘获小丑功成不细赏功劝后固不应轻然朝廷方缉边防整饬骄慢若捷奏朝至举朝夕贺边臣闻之自谓不世竒功或恩礼太过则将骄卒惰后无以使臣愿朝廷镇之以静示以莫测昔谢玄破苻坚书至与客围碁曰儿辈亦遂破贼安亦非矫情盖万国观望事体应尔所有明日称贺乞详酌指挥不听宰臣遂率百官表贺于延和殿诏答之又奏告于永裕陵又宣谕宰执以边事劳赐知枢密范纯仁犀带及黄金三百两辞不受奏曰今西夏猖獗尚闻点兵动众行师主忧臣辱臣当待罪自効岂宜复受异恩伏望圣慈察诚追赐若将来西事平宁臣受赐未晚于是蕪辙献议请诏边臣与果庄约能诛阿里库则许以生还奏曰善用兵者先服其心次屈其力则兵易解而功成若惟力是恃则战胜而寇愈深况不胜乎功成而兵不解况不成乎顷西方用兵累年先帝意在吊伐而贪功生事之臣惟务杀人争地得尺寸地先筑城堡置州县使四夷憎畏谓朝廷专欲得地非欲灭我族类是以并力致死莫有服者今虽朝廷好生而此心未信憎畏未衰心既不服惟有鬪力力屈则胜负未可知也今新获果庄威震遐

方边臣争欲立功以为洮西之地可得正使得之不免筑城堡置屯兵置吏积粟而守之则中国何时息肩乎王韶取熙河全师独克使韶有远虑诛其叛者乃以忠顺即用羌豪而已则今复何所事所以兵连祸结罢弊中国者以郡县其地故也往者不悔而来者又不为戒今又欲取讲珠城曰此要害地不可不取方唐盛时安西都护去长安万里若论要害自西无不可取者使诸羌知中国有进取不已之意则寇深而兵莫解其祸岂可量哉愿陛下深诏边使叛则讨之服则安之自今以往无取尺地无焚庐舍无役老弱如此替年诸羌可传檄而定然朝廷至意虽喻将帅未必从也虽日行文书终恐无益宜驿召陕西转运使一员赴阙面戒使归谕将帅而察其不如谕者又闻朝论谓果庄犯顺当诛然譬之鸟兽不足深责子孙部族犹足陆梁于边全其首以系其心为重质庶获其用此实今之良策切料果庄凶豪老病垂死必不甘困辱为久生计自知不得生归徒使臣子首鼠顾忌不敢复仇必将求死以发众怒即使不然老病怨怒自非久生之道果庄死则其子复仇必欲阿里库合而比交夏人此秦越同舟遇风之势其交必坚而温希新界于阿里库夏人之间地狭势危并亦见并而吾不能救使二盗合三面以窥熙河其患未可一二数也如臣计诏边臣与果庄约若能使部族讨阿里库而纳赵纯忠当放汝生还质之天地示信果庄从则少富贵之使信臣喻至意焉果庄有生还之望不求死计其众必从以彼之众与温希新合讨阿里库必克既克而纳纯忠虽还果庄可无患此必然之势也西羌本夏人世仇而果庄本与阿里库不叶若许生还众必相攻纵未能诛阿里库亦足使二盗相疑不合也昔太史慈与孙策战几杀策策后得慈得不诛放还豫章卒得奇功李愬得吴元济将李佑解缚用之与同卧起卒擒元济非豪杰名将不能此受外事也或谓果庄之获无用近界羌豪力战而得仇怨已深若放还此等必无全理臣谓不然若果庄死中国其众仇必深若生还仇之亦浅此等依中国为援足以自全自古西羌之患惟恐解仇结盟若所在为仇正中国之利无可疑者朝廷亦议留果庄于边以招其子结鄂特促独纯仁请诛之奏朝廷获罪人畏其子弟防其仇嫌而不诛则典刑废矣今存以招其子子必曰吾父之存由我辈我若皆往则父子俱死若复统部族効力伸报则告陵之典乃虚行果庄年七十余囚处异乡死在旦夕既死其子必归怨朝廷虽谕以善终必不信兼解纷问罪人之子深损威重若任疑怪则怨叛有名且果庄自先朝来杀中国蕃汉兵民以千万数日望薰街之戮以决存亡若存养过于有功之人徒使激愤幽明有伤和气又果庄之获本由熙河蕃将怨其害已故使游师雄愤怒请行今冒死而获不得甘心亦恐堕其鬪志况阿里库来求果庄以俟得请然后纳贡若存之近边不惟阿里库未肯纳贡兼其嗣已曰果庄在汉在羌一般今留边厚加奉养恤其羸瘠则正行阿里库之言彼将卖恩于果庄之子何暇复感朝廷哉诛果庄则上伸先帝之怒下正朝廷之法重遐方之畏雪南川之讎增战士之勇且阿里库知朝廷果于诛恶不敢侮慢邀求早肯纳贡此一举数利也有诏果庄易槛车护送大理寺劾治以闻已而到京敕不诛果庄之就擒也阿里库狼狈大恐上章请命平章军国事文彦博欲以果庄见其来使纯仁奏曰昨



文彦博与枢密坚欲令阿里库来使与果庄见欲结鄂特促得知父在审实可以系心臣谓不然果庄是西蕃骑将身系其国轻重未擒之前敢与中国相抗擒后边更狼狈款则要藉果庄灼见然其谢罪之始既以推过本人虽与舜卿蕃字中曾乞放还未敢陈请今若与使相见其心必猜朝廷有意谓归国却湏生心或请放果庄归国如夏国乞还城寨之内至时必湏坚拒嫌怨复生若更于不与间病死则必谓朝廷因其请而杀之尤可为阿里库举兵之名则是今日使见未利适足为他日忧也大国举动使远人难测存足以示恩亾不能生怨今欲悅其子悉使见我之情恐生轻慢之心有亏大体若以大臣之言须至依从乞候将来常贡之使因事渐通消息亦足示陛下容贷之恩果庄擒久彼国絶望故于纳款蕃字之内一切归罪果庄若却使之相见恐复生觊觎之心结鄂特促等既知朝廷显示其父必以得见为期后若不遂其心而死却恐嫌隙再生更乞圣意详察朝廷又欲官果庄纯仁固争曰果庄作过陷歿将帅甚多近日南川之围杀害边人亦众百里地为之一空边人重仇发愤远报偶得被擒获告裕陵阿里库失其强既释先朝之忿又快天下之心陛下曲示至慈特贷其死使族类懷感已是国家权宜今更命之以官事恐过当陛下视民如子赏罚至公今杀匹夫者必就大刑杀众人者乃获爵位不惟刑赏倒置兼恐被害之家冤愤难诉天道人心两皆有违又奏曰切果庄曾授团练使及赐金带尚不顾恩义今一校尉何足以收其心若朝廷要与一官湏俟他日不必太速果庄俘献之日亲授圣旨令招换其子归汉或纳质之时与贷生命果庄不肯寫蕃字招换口称我惟一死如此悖命朝廷尚贷其死已是优恩今与官恐伤信令不听卒授以陪戎校尉月支食粮钱三十缗春冬衣绢十疋冬绵三十两马一疋给刍菽令开封推判官一员提举其后遂遣秦州居住初夏人入寇行半道闻果庄被擒遽还剽掠镇戎无所得数日即遁去蕪轼意其必请和修贡上疏请难之畧曰臣见熙河路奏生擒果庄中外同庆臣愚无知切谓安危之机在于今日若应有道处有术安边息民必自是始故欲先陈前后致寇之由次论当今待敌之要昔先帝用兵累年中国靡弊然夏人困折亦几于亾横山之地沿边七八百里不敢耕者二百余里岁赐既罢和市亦絶彼中匹帛至五十余千老弱转徙牛羊堕坏不可胜数饥羸之余乃始款塞当时执政谋之不深中国厌兵纳使每使赐予贸易无虑得绢五万余疋归鬻其民匹五六千一使所获率不下二十万缗使民饱而思奋又使窥我厌兵欲和以为和战权皆在我以故轻边陲利则进否则复求和无不可者若当时因彼请受不纳其使且诏边臣往返商议所获新疆取舍在我俟其词意屈服然后纳之则彼虽背恩反复亦不至今日之速也彼即有易我意然不得西蕃解仇结好亦未敢动夫阿里库栋戩之贼臣挟契丹公主以杀其君之二妻栋戩死匿丧不发逾年乃诈称嗣子书果庄温希新等名以请于朝当时若且令边臣审问果庄等阿里库当立不当立若朝廷从汝请遂受节钺阿里库真汝主矣汝能如臣栋戩乎若此等无词则是诸羗心服既立之后又能统一都部吾又何求若其不服则衅自彼作爵命未下曲不在吾彼既一国三公则吾分其恩礼各以一近上使额命之果庄等各得所欲宜必无患

当时执政不虑及此省事为安因请便授节钺阿里库自知不当立而忧果庄之讨故欲借力西夏以自重始有解仇结好之谋果庄亦不平朝廷之以贼臣君我也故怒而盗边夏人知诸羌之叛也故起而和之此臣所谓前后致寇之由明主不可不知也元昊本怀大志长于用兵谅祚天赋凶狂轻用其众故为边患歷年后定今梁氏专国素与人不協方内自相图其能以呻吟之余又与中国敌乎料其奸谋盖非元昊谅祚比矣意谓二圣仁恕着于遠迹必无用武之意可肆无厌之求兰会诸城鄜延五寨势胁必从猖狂之后求无不获计不过止此耳今朝廷降诏诸路勅励战守深明逆顺曲直之理此固今之急务而诏中亦许夏人自新臣谓闻之太易纳之太速曾未一战而厌兵欲和意见乎外此复蹈前日之失矣自今闻果庄之诛或渐为款塞之谋必将为恭很相半之辞而继以无厌之求若朝廷复纳其使是战和权皆在敌有求必获不获必叛故臣愿明主断之于中深诏大臣密议诸将若夏人款塞则受词却使然后明勅边臣以夏人受恩不感无故犯顺今虽款塞反复难保若实心改向化当与边臣商议苟词意未甚屈服约束尤甚坚明则且却之以示吾亦不汲汲求和也若心服而来吾虽未纳其使必不至往返商议之间遽复盗边若非心服吾虽荡然开懷待之如旧能必不反复乎今岁泾原之人岂吾待之不至耶是吾兵练士饱斥堠精明敌无大获不过数年必自折困今虽小劳后必坚定此臣所谓当今待敌之要亦明主不可不知也今朝廷息民屈己而臣进言欲难其请不急于和似与圣意异者然古圣贤欲行其意必曲成之未尝径情直行也将欲翕之必姑张之将欲取之必姑予之若权其利害究其所至臣计于边民必久安而固圣意初无少异然朝廷之间似欲以畏事为无事臣切以为过矣夫为国不可生事亦不可畏事其弊相均譬如无病服药与有病不服药皆可杀人夫生事者无病而药也畏事者有病而不药也乃者阿里库之请人知不当与朝廷与之以求无事然事之起乃至于此不几于有病而不药乎今欲遽纳夏使则是病未除而药先止其与能几何臣于侍从之中受恩至深故敢先事而言未几夏人遣使求和

#### 哲宗朝议弃西夏地界

朝廷议割城寨赐夏人易陷蕃生口命鄜延经畧赵高领分画之议于是归永乐陷没一百四十九人高乞依夏请用绥州例二十里为界十里量筑堡铺十里外并为荒闲近黄河者仍河为界朝廷悉从之兰州胜如质孤两堡旧自元丰五年废罢熙河兰岷路经畧范育既修又欲于兰州北过河二十里为界夏人猜阻议不决舍去范纯仁帅太原驰奏曰陛下临御懷柔西方恩德备至册封赐地皆出宸断遂使累年戎马不能犯塞蕃汉生灵全活无数近闻熙河边臣分画北界吝惜久废寨地为要害未欲给赐致其偃蹇不从切恐蕃疑败谋至久事变万一复至猖狂容则亏损国威讨则前车不遠兵连不解劳费无期伏望陛下检会元约朝旨特赐允从遵孟子乐天之言稽虞舜舞干之德天下幸甚又言司马光陈弃寨之策及后来换易生口降赐封册臣实与议昧者多为不然朝廷力行浮议方息今与西夏思臣定体惟分画地界所较不多若去城寨二十里番人无

厌亦可理谕又肯依从臣恐边将贪功生事将城寨二十里外圣恩许给或向来用兵时不曾保据之地指为要害却将筑城占守亏朝廷大信败国家前谋不可不察或谓番人无厌必更邀求以祖宗兵势国力尚因德明归顺赐以数州加国主之号安民息战不以小利玩兵后彼国服从何尝更犯而况今所指利害絶小昔樊哙欲以十万横行匈奴中季布以为面谩武夫边将之言多若此类今可为鉴已而西夏遣使入贺坤成边议复讲御史中丞蘓辙奏曰西夏轻狡屡叛为患莫测诈言商量地界迁延不决舍归本国招之不至边议始谓地界不可复议而贺坤成使当不至矣今日天诱其衷使已及境地界复议如故方其未遽造絶招懷计可复施此中国之利也臣恐朝廷不于今日穷究必俟边患既起而后图之则无及矣闻熙河近修质孤胜如二堡侵夺夏人御庄良田又兰州北过河二十里议筑堡寨夏人因此猜二不受约束其怨毒边臣不信朝廷之言可见矣徒以岁赐厚和市至优勉修臣节其实非德我也使稍有便利岂有帖然不作过哉惟朝廷之于西夏捐金帛裂疆土一无所爱累年于兹矣熙河帅将不原朝廷之心傲求尺寸功赏以害国事深可疾也顷年熙河筑西關城声言次第龕谷果庄疑惧遂举大兵攻扰一路至今未复今既城质孤胜如势必及龕谷夏人惊疑与果庄事同如此则曲在熙河非夏人之罪也夫兰州为患从来遠矣先帝分遣诸将入界李宪取灵武怯不敢入以此塞责自是筑城积兵治械积粟劳费天下千万为计好事之臣因不惜遗力以为金城本汉屯田旧地田极膏腴不患无食不患不耕患无堡障凡西關龕谷质孤胜如过河筑城皆所为保障也从来熙河遣兵侵耕此地皆为夏人所杀况筑堡致寇无疑而朝廷恬不为怪坐启兵端深可惜也夫兰州不耕信遗利矣若夏人背叛其患比不耕何啻百倍故朝廷宜辨利害之轻重有所取舍况兰州边患稍息物价少平比用兵时何止三分之一若忍此劳费磨以岁月俟其夏人微弱决不敢争乃议修筑似为得策不知边臣何苦如此忽忽也若不用臣言臣料夏人久而必叛用兵之后不敢招来劳耻必甚今敌人强则畏之弱则凌之恐非大国之体也时西人虽遣使然且聚兵谋犯塞纯仁复上奏曰臣近入札子为夏国分画地界未定恐边将失信复致用兵所陈利害颇明近伏覩枢密旨挥及诸路關报西人频侵汉境或闻边将乘此希功恐秋凉再患臣夙夜过忧不能緘默伏见陛下与司马光等谋定大患今为边将鄙论沮害遠图前舍已成四寨换易生口以示轻地爱人之德今传闻复留两堡不可守之地再起事端盖今日靳地边臣多于昔年生事党类若不早悟恐蹈前车夏人进贡在庭若所请不至乖悖望赐寬纳或令押伴宣谕所有地界早令分画若边臣未达朝廷诏旨有所不尽特许奏陈朝廷相度旨挥然后严戒边臣分画地界不得亏失大信别起事端虽番性贪婪必亦难生怨叛息民偃革指日可期居无何夏人果引骑五千攻毁质孤胜如二堡而去朝廷以直龙图阁叶康直为寶文阁待制知熙州召还育为侍郎蘓辙谓育措置乖方召还赏罚倒置乞与种谊种朴俱贬又谓亦不可帅熙河奏曰先帝始开熙河本无兰州及李宪违命创筑质孤胜如以侵夏国良田言无质胜兰州亦不可保展转生事尽以边防无事将吏安闲若不创端无以邀



求爵赏此边臣常态自古通患若试诘问理则自穷何者二寨广狭几何新屯兵甲多少夏人若重兵掩袭势必难保既克二城乘胜击兰州则兰州之危何异昔日今不究其实轻用其言以隳大信夏若因此不顺外修朝贡收赐予之利内实作过逞边寨之攻恐二寨地利未足偿此所谓质孤胜如决不可城者此故也先帝绥御西蕃栋戡老而无子赵酬忠其族子也常遣黄履多持金币以纯忠见之是时圣意盖有在矣事既不遂而栋戡遂为阿里库杀阿里库栋戡家奴栋戡之臣如果庄温希新等皆有不服之志实一机会也是时朝廷若因机投隙遣将出兵权纳纯忠则不世之功庶几可立大臣计不出此遽以旄钺宠绥其篡夺之臣使假中国爵命以役属蕃部臣主之势由此不坚自是外修臣节未显叛逆而育等欲于此时复举前策盖亦疎矣谩昔在先朝以轻诈多败少成先帝所薄今谊朴与谩无异谊于顷岁偶以劲兵掩袭果庄以此自负西蕃久作堤防亦无可乘之势况育自到任屡陈此计咫尺蕃界谁则不知臣谓兵果出境必有忧矣兼闻近日擅招青唐蕃部数以千计纳之本无朝旨未有住处却则于彼为叛必被屠戮若据专擅罪名不轻臣不晓朝廷曲庇其意安在若不并行责降恐朝廷之忧未艾也借使阿里库结连夏人同病相恤更出盗边胜负未决此时大臣不敢任责使圣君圣母忧劳帷幄之中虽食议者之肉复何益乎所谓阿里库决不可取者此故也二事皆国安危边臣性命所系祸机之发间不旋踵愿陛下黜此三人外使异域知此狂谋本非圣意易以招懷内使边臣知赏罚尚存不敢妄作此宜速行者也然熙河遭此破壞彼此相疑欲招纳平帖非得良帅未易可也康直须缘权贵节制秦鳳边面至狭号为无事康直前冬无故修城致夏兵压境兵役已集康直惧不兴工妄以地冻请于朝廷役既不成夏兵乃去既无靖重之畧当熙河摇动之秋臣恐陛下西顾之忧未弭也要须徙置佗路更命熟事老将领西河仍赐成勅使知朝廷懷柔遠人不求小利则边患庶几少息矣诏育仍知熙州康直为陕西路都转运使蘓辙愈为不可三上疏争之太皇太后虽以为是大臣每固执辙事中止至是秦鳳路提典游师雄具言西人入寇胜如堡虽有三人中伤缘巡检纪守义执西贼四人及有横控地道由此保全胜如质孤堡巡检王亨不能预为守备诏亨降一官展一期收纪守信特免责罚育谊并特放罪后夏人数犯胜如质孤穿城纵火竟败边议云

### 熙宁元佑议役法变更【淮海文附】

余靖初罢中丞复归翰林成都进士李戒投书于靖献役法大要谓民苦重役不苦重税请增天下田税钱穀各十之一募人充役羨余犹可助经费明公说言于朝幸而施行公私俱富靖辞以去职时韩絳知成都戒献之大以为然入为三司使欲奏行之未几上即位絳乃言害农之弊无过差役余未易遽数望以臣奏下哀痛诏令中外臣庶悉具差役利害以闻辛未诏曰农天下之本也祖宗以来务加恩養下寬恤之令賜蠲复之恩然数年于兹间因水旱颇致流离推其故殆州县差役仍重劳逸不均喜为不急之务以夺时害财故也愁痛之声上干和气深可伤悯令逐路转运司遍牒辖下州军如官吏知

差役利害可以寬減者實封條析以聞委任從台省官集議考驗古制裁定使力役無偏重之害則農者知為生之利有樂業之心矣役法之議實始平治四年也秋七月詔中外臣庶限一月條陳差役利害實封以聞乙丑龍圖閣學士趙抃天章閣待制陳荐同詳定中外臣庶所陳差役利害

熙寧元年五月庚辰同知諫院吳充言陛下今念本務未舉農政不修令臣條奏臣謂鄉役之中衙前為重上等民戶被差曰官吏籍記杯器匕筯皆計貲產定數以應需求勢同漏卮至有家貲已竭逋負未除子孫既沒鄰保猶代是以民間規隱重役土地不敢多耕避戶等骨肉不敢義聚而憚人丁甚者嫁母離親兄弟異籍風俗日壞望敕中書擇臣庶所言利害以時施行及詔令中書及韓絳同王安石制置三司條例與言安石以為善雇法遂決四年五月楊繪言非不知助役之法關差役不均欲平一之然聞干其任者唯務斂多而行峻至天下不盡曉朝廷之意將以為率其剩者官取之不可不言也戊戌東明縣民以縣科助役錢不當相率遮宰相自言凡數百策王安石既說諭令退遂白上曰知東明縣賈藩范仲淹壻好附流俗非上所建立不可用上然之因令究東明事庚子司農等及開封府界提舉常平司奏有畿內百姓未知新法遂見卿大戶言等第出助役錢多願依旧充役詔司農寺令諸縣曉諭如不願納錢之人除從來不當役年月令條認本等役後年月至則赴官充役更不令納錢上初疑官戶助役錢少安石曰官戶坊郭取役錢誠不多然度時止可如此故紛紛言不然在官者作意壞法進為異論坊郭等戶糾眾打鼓截駕遮執政恐陛下不動心楊繪言助役不便陛下沛發旨揮令取問民間之願否而兩行之又指陳繪言為不然上諾之丙午王安石言役錢文字上以為民稅已重坊郭官戶等不湏減稅戶升等第更與少裁無害安石曰今稅斂不為重但兼并侵年多耳上曰此兼并所以宜權安石曰兼并惟古大聖君能之所謂兼并者皆豪傑有力之人議論足動士大夫者也今制法但因人所便未足操制兼并也六月楊繪又言助法難行其說有五民難得錢一也近邊州軍奸細難防二也逐處因稅多少不同三也耆長非人盜賊難止四也專典雇人則失陷官物五也乞議防五害然後著為定制又具錄前後論助役法四奏以自辨且曰臣情狀已具四奏劉摯又言臣近言論助役之害有十今奉聖旨批送曾布札子條件詰難令分析者陛下以臣言為是耶則事盡于前奏可以覆視如以臣言為非耶則貶黜之而已臣言亦不過十害者是不復條陳也然至臣等以職事為言則使分析中外皆知非陛下意乃司農挾寵以護改作大臣誤法以蔽聰明耳今陛下謂天下之勢安耶未安耶治耶未治耶苟未安治則陛下之睿智言動起居躬蹈德禮夙夜精勵而天下未安治也誰致之耶陛下即位以來注意責成以望太平自以為己任得君專政者是也二三年間開合動搖天下无一民一物得所者蓋青苗之議起天下始有聚斂之疑青苗之議未充而均輸法行法方擾而邊鄙之謀動邊鄙之禍未艾而章河之役作章役未平而助役之事興其又求水利也則勞民而無功度田也費大而不效又省并州縣也諸路皆強民以應令又起東西府也則大困其財禁門之側斧斤將一年而未已

其议财也则商贾市井屠贩之人皆召登政事堂其征利也下至歷日而官自行之推此以往不可究言古之贤臣事君之道必驯致有渐待人后成设施皆有次序今数百事交举并作欲岁月变化天下使者旁午牵合于州县小人挟附佐佑于中外至于忠厚老成者摈之为无能狭小猥辩者取之为可用守道忧国谓之流俗败常扰民谓之变通能附己者不次而进之曰擢才不可招者为名而斥之曰行法凡政府谋议措置经画除用进退独一属掾曾布与之论定同列预闻乃在布后奔走乞丐者布门如市孰有系国体而大于此者祖宗旧臣则镌刻鄙弃去者殆尽百年成法则划除废革存者无几岂不怪贤士大夫比歲引去者凡几人矣陛下亦尝察此乎去旧臣则势位无軋己者权可保也去异己者皆可以用门下之人也去旧法则曰今日执御天下者是己所为而陛下又将任以听其伸缩也奏至王安石曰所奏前后今并不分析于是诏绘落翰林学士御史为侍读学士摯落馆阁校勘监察御史里行监衡州监仓后两日以绘知郑州十二月刘蒙知湖阳县初行免役法使者召诸令会议蒙独为不便退而条上利害即投劾去五年十二月给事中李中师前知河南府时朝廷初令民出钱免役中师率先诸州推行富弼告老家居市中师籍其户等令与富民均出钱希司农意旨多取寬剩比他处独重洛人怨之中师厚结中贵庚寅诏入为牧郡使七年诏定州民有卖屋未纳免役钱者令安抚转运司体量其实以闻安石曰百姓卖屋纳役钱臣不能保其如此缘官吏行法必多不均之处然论事有权须问从前差役卖屋赔填者与今孰多孰少即于役法利害灼见六月初免役之法行也民以资产出钱时曲阳县尉吕和卿首较县户之高下役之轻重第为数等令定师李肃之深善之未及行和卿以忧去至是参知政吕惠卿领司农寺乃取和卿议为手实法和卿惠卿弟也乙卯司农言曰五等簿书手所供多隐漏不实熙宁勅但删旧条不立新制即于造簿反无文可守承前建议唯民自供手实许人纠告其法最密贫富无隐诚造簿良法也诏送编修司农列司惠卿又曰免役出钱或未均出于簿法不善按户令手实者人户具丁口田宅之实也嘉佑勅造簿五等用野居民若户长岂能详知其贫富不令自供手实则无隱匿之责安肯自陈又无赏典孰肯纠决此不可用宜仿手实之意使人户自占家业如引落即隱产赏告之法庶得其益既而手实法歲以簿式示民令供而第价为五等隱者许告三分充赏中丞邓綰驳其议谏官范百禄亦论曰造簿手实告匿有赏且令手实之文而未行蓋使人自占必不实告明许讐人为仇怨则礼义廉耻之风衰矣不报既而法行害及鸡豚民不胜病也冬十二月司农寺乞废户长坊正其州县坊郭税赋苗役钱以邻近主户三二十家排成甲次轮置甲头催纳一税一替逐甲置牌籍姓名于替日自相交割县不勾追衙集役使从之

元丰三年二月判司农寺李定等乞开府界诸县乡村第四五等户敷出役钱不听四年六月判司农寺舒亶尝言役法不均责在提举上曰提举未可责也近臣有自陝来者欲尽蠲中下之民朕谓不然夫众擎易举上户民少若中下尽免而取足上户则不均甚矣古谓均无贫朝廷立法但欲均耳更可讲以闻八年八月户部言见准朝旨修完诸



路役书诸色役人多寡或行添减并支酬雇直重轻未均并据逐路相度到事理修入今欲乞将诸路敷出役钱元额于役书内立定合用钱数外所留宽剩不得过二分余所贵稍宽民力从之十月知安福县上官公立献书言免役取民之例从之诏府界诸路耆长壮丁之役并募充【耆长计第三等户长第四等户上应募】等第给钱其旧以保正代耆长催税甲头代户长承帖人代壮丁并罢

元佑元年正月刘挚言助免役之弊以定州安喜一邑为证户部准勅府界诸路耆长壮丁之役并募充等第给雇钱其旧以保正代耆长催税甲头代户长承帖人代壮丁并罢看详所募耆户长若雇募即虑所数支少应募不行兼壮丁旧既系第四等已下旧不出役钱只轮充更不支雇钱亦虑难以雇募兼虑诸路提举所司州县为见今降朝旨并创雇兼虑募却于人上更敷役钱欲乞应府界诸路自有轮差及雇人去处并乞依法如有增损事件亦依役法增损施行又言并废州县虽省役钱以为封桩利然酒税额虚失者不可胜计诏并废州县今诸路转运提点刑狱等司同度合与不合并废以闻先是司马光言陛下诏羣臣民各上封事无有不言免役钱之害者足知公患无疑也臣今愚计莫若直降勅免天下免役钱一切并罢其诸色役人依熙宁元年前旧法人数委县令佐亲揭五等丁产簿定差仍令刑部检会熙宁见行差役条贯刊印颁下诸州尚虑天下役人利害各有不同乞勅外更指挥行开封府界及诸路转运眷下诸州县委县官看详务在役法曲尽其宜司谏蘓辙言司马光乞罢免役钱复差役法请旨依奏施行切观司马光札子条陈差役大事已得允当然其间不免疎畧及小有差悞执政岂有不知若公心共济即合光所请行大意修小节然后行下但畧录札子前坐光名后坐圣旨依奏自今以往必有人借中外异同之论动摇大议愿陛下但观祖宗以来差役法行民有何害近岁既行免役民间之弊耳目厌闻即可行可罢不待思虑而决矣监察御史孙升言陛下即位以来因旧臣正论复行差役旧法其间不无窒碍理当委曲斟酌惟以便安公私为务伏望早降旨挥诸路转运使戒勅诸部咸体朝廷因民所欲惠养元元之意庶祖宗成法早获就绪初章惇言司马光欲罢免役行差役事虽已奉旨依奏臣反复看详其间甚多疎畧大抵光所论事亦多过当惟称下户无不充役今一例纳钱又钱非民间所铸皆出于官上农之家多有不过庄田穀帛牛具桑柘而穀已愈贱此二事最为免役纳钱利害要言然初朝廷自议行免役之时为时所遣使者不体先帝爱民之意成就法意之良今日道是更张修完之时理当审详臣谓不若先具此意申勅转运提举诸州县各令尽心讲求预具利害擘画次第俟朝廷遣使逐路措置则远不过一二年天下役法措置已周及曲尽其宜生民蒙泽上成先帝美利下兴无穷大利与今日草草变革一切苟欲速行之弊利害相远万万又与同列争曰保甲保马法一日不罢一日有害如役法熙宁初以雇代差行之太速故有今弊今复差代雇当详议熟讲而止限五日其弊将益甚矣御史刘挚言今改免役为差役仍是大体已正大害已革譬病患之人病根已去其它当徐调治之而已臣恐上下观望之人指小小事件张皇鼓扇伏望陛下及太皇太后

坚持此意力行无疑勿为异论所动蕪辙言应天下免役钱一切并罢大纲已得允当其节目疎畧未可一一具言全在有司节次修完乃详若不穷究首尾恐既行之后别生诸弊乞朝廷将见在役钱且依旧雇役尽今年而止于今年内催促诸处审议差役确可无弊然后今冬迤■〈这里〉差拨起自来年使乡户一则差役条贯得详既行之后无复人言二则已纳税钱一年雇役民力舒缓进退皆便始司马光奏复差役法既得旨依奏开封府蔡京即用五日限令两县如旧役人数差一千余人充役亟诣东府白光光喜曰使人人如待制何患法不行乎议者谓京但希风旨苟欲媚光非实事也故蕪辙首言【蕪辙疏在前】尚书吕公着札子勘会司马光近建明役法文字其间不无疎畧若博采众议更加公心申明行下必成令章惇上文字虽亦可取然大率出于不平之气专欲求胜早来部堂三省枢密会议章惇安焘大段不通况役法元不属密院若论议不一必是难得平允望陛下详酌或选近臣三数人专切详定奏闻乙亥诏差吕大防孙永范纯仁专一以闻初范纯仁自庆州诏入纯仁素与光亲厚闻光奏复差役法纯仁曰法固不便然亦有不可暴革盖治道惟去太甚者耳乃言于光欲且议缓行先于一州候见其利害可否渐而推之一路庶民不骚扰法可久行光不听纯仁叹曰是又一王介甫矣复拆柬示之曰蒙示奏稿足见公之存心然此法但缓行而熟道则不扰亟行疎畧则扰民公既知纯仁不欲速而示以益坚之利盖欲使知罪而默耳默默何难不止难默亦可赞公使公喜而自容于门下何用犯公怒而喋喋也若果如此纯仁不若少年合介甫求早富贵也何用白首强颜于此媚公求合哉光亦勿听始范百禄言于司马光曰熙宁初百禄为咸平县役法之行罢开封卫前数百人民甚悦后有司求羨余务刻剥为法之害今第减出钱之数以寛民可也光不从又议州县吏因差役求赂从重法加等配流百禄押刑房固执不可且谓乡民被徭役今日执事受赇明日罢役复以财遗人既以重法绳之将见黥面赭衣充塞道路矣光曰微公几为民害遂已之王安石在金陵闻变法不为意及闻罢役法失色曰亦罢至此乎此法终不可罢安石与先帝议之二年乃行无不曲尽后果如其言闰二月诏仍令逐州县出榜许旧来系纳免役钱令吕大防孙永韩维范纯仁进对太皇太后曰役法大事自来出役钱下户不易卿等各宜仔细仍辟属官六员曾歴知县差遣者又令差役法论求见成者许诸色人中陈逐路看详更改闰二月朝旨勿行从刘摯王岩叟朱光庭王觐之言也蕪辙言近奏罢免役钱行差役事大纲已得允当其疎畧差悞有五其一衙前之害熙宁前破败人家甚如兵火天下苦之先帝知之敕荆免役法勾收坊场官自出卖以免役钱雇役人以坊场钱为患难酬獎其二坊郭人户熙宁前有科配之劳新法始与乡人户并出役钱免刺配其法甚便但所出役钱太重未为经久之法乞指挥据见今役钱裁减酌中数目与前项卖坊场钱除支雇衙前及召募非泛纲运外常切桩留准备下项支用其三新法以来减定诸色人皆确合数行之十余年无阙即熙宁前旧法人数冗长虚烦民力其四熙宁散从弓手等役常苦接送极为劳弊其五州县胥吏募雇充役不请雇钱如愿即量支雇仍罢重法亦依前坊郭坊场等钱内支如不

足即差乡户诏送看详役法所刘挚言臣见章惇向以附会安石遂尘政路近陛下改免役复差役人情上下莫不为是而惇欲为非敢建异论沮诋圣政盖宁负朝廷不忍负安石故惇不去不足以安庙朝成善政伏望正惇不忠之罪罢黜之蕪辙言臣近奏蔡京施行差役法故意扰民以败成法又言臣近论列蔡京施行差役中不依圣旨申请防碍事件挟邪壞法章惇与司马光争论役法事【见委任台谏门】三月详定役法所言乞下诸路除衙前外诸色役人只依见用数定差今夏科钱住罢更不起催官户僧道寺观单丁女户出钱助役指挥勿行从之夏四月中书舍人蕪轼详定役法轼言臣见先帝初行役法取寬剩钱不得过三分以备灾伤有司奉行为当通计天下乃十四五然行之十六七年常积而不用至三十余万先帝圣意固自有在愚民因谓以免役为名实欲重敛今太皇太后皇帝陛下所宜追探其意还于役法中散之以塞愚民无知之词兴长世无穷之利今欲尽罢寬剩钱将来无计而系官地数目不多见在钱虽有三十万贯石而兵兴借支几半臣今乞于内帑钱帛中支还兵兴所借钱斛复完三千万贯石止于河北河东陕西备边三路行给由募役法使五七年役减大半农民完富此无穷之利也五月蕪辙言臣四上章言蔡京知开封府推行役法知旧法人数冗长近降旨许州县相度妨碍揭簿定差亦无限日而京违旨差人监勒开祥两县依旧法人数于数日内差拨了当欲扰民以沮成法又言朝廷近罢免役复行差役小民初免役钱鼓舞相庆士大夫因民喜而以为差役一行民无事矣臣愚以为免役害去而差役之弊亦不可不知也今除见议衙前差募未有成法外其余户长弓手散从等役一切定差贪官暴吏私切相贺何者市井之人应役家非富厚生长习见官司虽欲侵那无所措手今耕稼之民性如麋鹿一入州县已自慑怖况家有田业求无不应自非廉吏谁不生心妄意复行差役百扰复加闻诸路此弊已行恐稍经岁月役人困苦必反思免役之便其损圣政不细乞明降诏书戒敕监司长史庶政知朝廷爱惜乡役与神宗朝爱惜雇役无异日前约束官吏侵扰役人条贯使刑部录出榜州县使民知之仍常督察有犯不赦庶民被差役之利而无害天下蒙泽矣七月蕪轼言臣奏乞罢免详定役法圣旨不许轼意差役法必当改不当于雇役实费外多取民钱若无多取民钱亦足利民尝白司马光不然之轼曰昔韩魏公刺陕西义勇公为谏官争之甚力公亦不顾昔闻公道其详岂今日不许轼尽言耶光不悅而罢刘挚言朝廷忘免役之弊下诏改复差役法天下知久矣造法始施仓卒故改而立雇募之议为招募之法而不能成也朝廷患常平之弊并用旧制施行未曾屡月变为青苗法后又诏责首议之臣而敛散之事今行如初此二大事也四方拭目以观盛举而反复二三何以使天下信之臣望熟计出令度可必行而后行则至其终也可及矣伏望降旨挥截自某月日应役人除衙前许招并使院职级弓手截级存留曹司库子之类充役人名外其余如敢尚支雇钱者并以故违条制论罪庶役法早得完就无使小人幸其不成八月蕪辙言御史陈次升奏以役法未定人情荧惑乞勅详定役法所议速定或雇色额及官户寺观单丁女户等敷出役钱则例先次序施行其州县事体不同者候诸州申到定



夺蒙敕批送详定义法所臣看详所奏勒令早定役人合差合雇色额及坊郭官户寺观等合出役钱则例申奏行下令民知定法不敢惶惑又王覲言闻诸路州县有役人数多而乡村等第人户数少役差不足者自今虽次第人户相兼将来年满难得人户承替及虽有人户可作三处番更休充役人处亦是经来年岁不多中户应役既频则力必困议者患之臣谓不然盖助役免役法推行之初天下州郡先会一年雇役及宽剩钱数然后赋于民也赋民者不可无法而且欲均又必会民家业多少为缗钱而筭之其槩曰一州雇役及宽剩岁月钱若干州民家业若干即家钱每贯岁出免役钱若干而钱计足矣法虽如此而民财足不可得实州县又有先集等第人户使各认逐户合纳免役钱数则足岁计矣然后令供通家业而告之曰家业钱每贯当纳免役若干令某岁纳若干即当家业钱若干贯矣彼人户乃具状析家若以合纳免役钱之数则家业得三者又加少也既定钱之多少所谓等第无用而等第之行又不可废苟州县徒用前日不用等第而差役人则人户可应役者至少何足怪耶愚谓欲天下乡村应役人户稍多得以更休不困湏告谕天下郡县使复位等第令颇得实则力均而不足患矣伏惟参酌施行侍御史吕陶言人户贫富高下不均若不频差上户则无以宽中下之家湏相度立法户多处以十二年少处以九年为率分二次总计合役之数均匀定差如有一贯税钱于九年或十二年合差役一次则二贯以上差两次逐次各一人其钱多则又增新差之役然于九年或十二年内三次差役不过五六人谓逐次各差一人即非并差五六人仍令私自雇人祇应乞得此奏付详定夺法所癸未吕陶言昔嘉佑之差役从宽而条禁大畧贪吏滑胥幸农夫之在官锐意侵渔人甚苦之熙宁免役止令出钱官为雇募凡侵渔农夫者一切有禁然有司赦文过重民间钱货遂至乏绝陛下深恤元元复行差役臣谓法不相湏则患有未至既以嘉佑制差之而不以熙宁令禁之虽无近年役钱之劳复有昔日应役之害伏请申命有司严责期年不候诸路役帐齐足疾速裁定以完差役之法王岩叟言役法不便者六条二年十一月尚书李常言熙宁以来变差役之法俾税户悉输费募民间而役之既久而民力敝故复议差法少通古今以成书付户部使推行矣夫四海之广万世之移风俗好恶既殊而上户富安下户匱乏富则以差为病难复均齐匱则以力为宜利久休息不可一法治也辄求差助二法随时上下所宜条叙梗槩若使民而可久也伏望圣慈付之有司加议或上裨圣政之万一三年二月学士兼侍读苏轼言差役之法天下以为未便独台官数人主其议必为不可改磨砺四顾以待言口者故人畏不发耳近闻疎遠小臣张行者力言其弊谏官韩川深诋之至欲重行编窜【张行者述之从孙也言神宗议纳役盖尝谓之助役矣以为若止于助则未能尽免将使后世役亦差亦纳于是便为免役其虑深矣今废而复差上违先帝贻谋下拂元元安志岂曰述事乎易言差役下户一年所废有用数年役者有用数十年复有者其等渐降害愈深殆非圣人哀多益寡天道弛张之义又言臣恐行者以为有心于改法无心便民昨日改之为天下之民无容心于其间可也章疏十上诏监司取戒励以闻乃止】诏差役法内有未便事令王岩

叟韩琦与刘安世同看详具利害以闻先安世言今差役深诏执政固守初议毋徇浮言妄有变易六月蕪辙上疏曰昔嘉佑以前乡差衙前民间常有破产之患熙宁后出卖坊场以雇衙前民间不复知衙前之苦元佑初务于复旧一例复差官收坊场钱民出衙前之费四方惊顾寻知不可施又复雇雇法有所未尽但当随事修完而去年之修复行差役虽存雇法先许得差州县官吏利在起动人户以差役而便差法一行实时差足雇法虽在谁复肯行又熙宁雇役法三年人户并出役钱上户以家业高强出钱无艺下户昔不充役亦遣出故此二等人户不免咨怨中等既自差役今又出钱不多雇法之行最便及元佑罢行雇法上下二等欣跃可知中等则反为害故天下思雇役而厌差役今五年矣此二事宜因弊修法为安民靖国之术者也六年九月郑雍言元佑复差法一经六七年乞朝廷择监司知州召诣三省令亲受朝旨先从一二州召诸县令长采民间役法利害与监司长史叅议名为一州一县法七年九月三省言今检诸路助役不敷每年支止及半致狭乡县分差役频并当职官吏不体朝廷法意务为占吝不切雇募以宽民力今令诸监司州县依下项画一旨挥行一差役人户三等以上户空闲四年等第四等以下户空闲六年如不及逐年限即据所缺役人雇募如本路役钱支不及二分空闲年限不雇外并许役人止三等户贴雇令空闲及四年下三等户并贴雇令空闲及六年本县计逐等合役人户除空闲年各合差若干户充役不足合用若干人定二额差者役满却差人承替雇者有阙募人填阙后来户口升降差雇不齐且依旧额仍限今旨到日令佐据合雇人额行募仍州县先从重役替放先入役之人如无令雇州役便雇县役其州县役若本不足即依近旨差次一等此本等内下户物力及七分以上不以籍为定如次等无及十分只以本等空闲一年一应乡县役人除已雇衙前守分外其轮差已依旧除雇到州县役即未得开落别项声说一官雇者弓手先雇曾充弓手人不足有武勇行止人充役雇者准此一壮丁于本村合差人户依版簿名次实轮充役半年一替除已本等应付他役外如村有四十户差壮丁之人本村丁二人处每年四户轮应十年遍周复始一州路有狭乡役频县分募钱不足申提刑司依条那移助役宽剩钱不足申本司乞支坊场河渡剩钱谓支衙前雇食支酬纲运接送人等钱外剩数据每年合用支酬等用钱数十分为率每年留二分准备衙前等支用钱千贯将剩钱五年留千贯更不桩留又不足申户部依此那移别路逐免剩钱助役钱依旧每年存留一分如见今已有宽剩及自来积钱数自便作五分桩留有支遣即填补一应差军接送系代雇钱役人者以用过军人身分请受岁终令提刑拨还转运司余依旧条一应重役人口合行替放应募依旧在役请雇钱者听一应后募到役须有产税不得募疮赎曾犯刑人及诸工艺人并召有产二人委保人不过旧募钱数一衙前如人户愿依陕西镇戎德顺军熙州衙前法以官田充募者听其官田合出租课即以坊场河渡钱拨还所属诏并依先次施行【元佑于役法留意如此不久复为绍圣所坏甚可惜也】秦少游进议有曰役法之议不决久矣有司阅四方之牒牵制优柔相视而不断者二年虽稍复笔削着为一切之令取济晷月卒未确

定可服人情传万世不弊也所以然者无他士大夫偏独各有系吝不能至公为心耳夫役法者科条品目虽曲折不同不过差免二法而已差役之法虽曰迭任府吏胥徒之士数年一更然捕盗者奔命不遑主藏者备赏无等困仓竭于飞挽资产破于厨传执事患其敝变为免役之法虽曰岁使中外之民悉轮徕直以免身然平括至于室庐检括及于车马哀多以为宽剩厚积以为封桩弊又甚于差役矣盖差役之法不弊免役不作免役之法不弊则今议不兴士大夫用于嘉佑前则以差为是免为非用于熙宁后则以免为得差为失私意摇于中公议遂移于外呜呼岂特二年无定论哉虽十年而不足怪愿诏有司毋牵于故新之论毋徇于差免之名悉取二法可用于今者别为一书谓之元佑役法则嘉佑熙宁之臣皆默然心服矣丁未朱勃言免役之法利害诏送户部看详役法所丁卯中书省言勘会推行差役迄今十年民苦差扰议者前后改移不一终未成一定法诏府界诸路复免役法仍自旨挥到日为始闰四月权荆湖提刑安惇言差役法行九年终未就绪望复熙宁旧法令民均纳役钱诏送户部看详役法所五月张商英言梓州路有职官张行者元佑中上七十疏乞复免役法省符再下转运司取责诚励臣不晓户长部贰辄敢涂塞中外耳目请究其人原情议法罪枢密院言户部看详役所申诸路复免役法未审合否依旧行免役法诏并依熙宁旧勅施行

绍圣三年五月孙谔言免役者一代之法今在官之数与其直果不过民出钱者果无不均之弊耶在官之数元丰多元佑虽省未尝废事也则多不若省散役之人直元丰重元佑虽轻未尝废役也则重不若轻然则元丰不及元佑法欤曰大纲立而不能无损益者众目也数省直轻民出泉者易故法可久也伏望博采羣言无以元丰元佑为间要便于元元无不均之患裁为成书以贻后世则先帝之烈如日月光明矣惟陛下诏二府之臣议焉翰林学士详定重修敕令蔡京言孙谔所言役法臣详谔言以为元丰多而重元佑省而轻多不若省重不若轻则谔谓元丰之法不若元佑明矣而又文其奸言以为随时损益者妄也先帝劳思因时制宜其轻重省多讲之甚熟行之如何而不如元佑乎元佑之人诋讹诬罔忠臣义士所当共嫉而谔于陛下追绍之日故为此言臣切骇之伏望留神加察诏孙谔罢左正言差知广德军

太平治迹统类卷二十一

●钦定四库全书

太平治迹统类卷二十二

(宋) 彭百川 撰

熙宁元佑议论青苗

皇佑五年三月命陕西转运使李叅专制置解盐代范祥也时叅转运五年矣自军兴戍兵苦食不足叅视民缺时令隐度穀麦之入预贷官钱麦熟则偿谓苗钱数年兵食有余后青苗法始诸此

熙宁二年王安石事变更法度九月三司条例司议行青苗法河北转运判官王广



廉督漕陕西奏乞度牒僧数千为本司行青苗法春散秋敛与安石议合至是请先行河北丁卯三司条例司言欲以诸路常广二仓粟贵发贱敛如陕西青苗法仍取民愿庶农不至阙食赴时趋事使兼并无以乘其急从之十一月司马光进读毕上曰朝廷每更一事士大夫汹汹皆为不可光曰朝廷散青苗兹事不便吕惠卿曰光不知此事富室则害民县官为之乃所为利民也光曰昔太宗和采河东粮草以给戍兵至今为膏肓之疾朝廷虽知害民用度不足不能救也臣恐青苗之害亦如河东和采也吕申曰司马光之言可谓至论三月春诏诸散青苗钱无得抑配违者置之法学士范镇言常平仓始于汉之盛时视穀贵贱发敛以便农末最为近古虽唐虞之政无以异也青苗乃唐之衰不足法也且陛下疾富民多取而少取之犹五十步笑百步耳惟乞观天地之便罢青苗之举右正言李常孙觉亦言王广廉近至京师倡言取三分之法又闻制置司欲行于天下乞明诏有司勿以强行仍且试之河北陕西数路广廉初在河北行之民喧然谓不便而广廉入奏称民间欢呼歌颂圣德言者既交攻之朝廷不得已乃降是诏庚申提典开封府界县事吕景言人户见倚合贷粮五十余万石今又散青苗钱十五万贯恐民力不堪诏送条例司召提举官戒谕之先侯叔献屡督景散青苗钱景以畿甸课利无有赢余例司又别以买陕西塩钞钱五千万为青苗钱而景复是奏三年二月朔韩琦言淮南转运及提举常平广惠仓司牒给青苗事臣以国家颁号令立法制必信其言使民受实惠则四方孰不欣服详熙宁二年诏在优民不使兼并乘急以邀倍息皆以为民公家无所利其入谓先王散惠兴利益民之意也今自第一等而下三等以上坊郭户有物业抵留者依青苗例支借是官放息钱与初抑兼并济困乏之意相违欲民信服不可得也且上户见官中户散钱谁不愿从本户夏秋各有税赋又有预买又转运司和买等色纳捐积年倚合借贷麦种钱之类名目甚多今更增纳此一青苗钱自制下一路官吏上下惶惑皆谓若不抑配则上户必不愿请近下户等虽请必难催纳将来必行刑督率及勒干保人等均赔之患大凡兼并放息钱虽取利稍厚缘有逋欠官中不许受事况旧债未偿及半早已续得贷钱兼并者既有本故能相因岁月渐而取之今官贷青苗钱不然湏夏秋随税送纳灾伤及五分以上许科次催还连两科灾伤则必官无本钱接续支給官本因而失陷其害如此更望圣明博访如臣不妄乞尽罢诸路提举官委提典刑狱依常平旧法施行癸亥上亲袖出琦奏示执政曰琦真忠臣在外不忘王室朕初谓可利民不意乃害民如此王安石勃然进困难琦奏曰陛下修常平法所以助民至于收息亦周公遗法也曾公亮言坊郭不当俵钱陈升之曰但恐州县避难索之故抑配上户耳安石曰抑配恐有之然俟此严行绌责则弊自絶先程顥言成都不可置常平安石极以为不可曰臣论此事已数十万陛下尚疑如此事事为异议所惑天下事何可为之曰要湏尽人言翼日安石称疾不出安石视事主青苗议【见安石门】司马光论青苗【见新法门】赵抃悔不罢青苗【见安石门】甲申以韩琦论青苗奏付条例司李常言其尤甚者至使善良备给纳之费虚认贯以转二分之息上阅常奏问如何处置安石曰令分析是何州县如此

公亮升之皆曰谏官风闻言事岂可令分析公亮曰安石但欲令已议论胜耳上卒令常分析已酉韩琦言臣已老病愿罢臣河北使为大名府路安抚使从之实安石怒琦沮之也时陈留亦不敢散钱知县姜潜称疾去官上复趣司马光入见光言宜早收枢密告敕从之三月光移书安石请罢条例司及常平使者四月李定权监察御史里行定素与安石善孙觉归自淮南荐定极口因召至京言青苗之便安石喜遂荐于上乞召对谓曰君上殿当具为上道此及见上果问新法定对如安石所教上批付中书欲用定知谏院曾公亮陈升之以为无此例固争之乃改命不撰李定词头【见官制门】三年十二月开封府判赵瞻知邓州瞻因出使得奏事上问曰卿久为监司乃知青苗法便也对曰青苗唐行之于季世扰攘中掙民财诚便今欲为长久计爱百姓诚不便安石阴使其党俞充诱曰当以御史知杂奉待瞻不应由是不留京师瞻时出使未还也

元佑元年三月朱光庭言臣计天下青苗钱数昨来支俵外见在钱数尚多欲乞将一州见数监司斟酌诸县户口多寡并用收余存留斛■〈豆斗〉凡丰年添价以余小饥减价以糴诏户部指挥诸路提刑相度收余数目以闻夏四月王岩叟言覩圣旨提举官累年积蓄钱穀财物尽桩作常平仓钱物委提刑交割主管依常平仓法措绅议谓朝廷复此法遂免出息二分矣今见四月二十六日勅旨再立常平钱穀给敛出息之法中外莫不复疑朝廷以利为事岂以青苗之法皆主助息以助用耶主于惠养百姓耶主于助用则无可言者主于惠百姓则十六年于今但见百姓日陷困穷而不自知伏望诏有司罢之天下幸甚五月御史上官均言臣愿行闰二月八日诏书罢去青苗复常平平余之法为万世之通利六月蕪辙言青苗害民朝廷所患罢而不尽废而复讲使天下疑朝廷求利此臣之深惜也伏乞追寝近降青苗指挥诏天下青苗自后不复支散王觐言神宗临御之初柄臣建议废常平法散青苗钱缙绅公论咸以为非而主议者持之甚坚先帝圣明乃奋独断令取常平钱斛存留一半此见先帝常平法不可废也伏愿罢青苗依今年二月九日勅行常平法以成先帝之意刘摯言今覩惠卿责降则制词有首建青苗之语夫以建议者为罪则是朝廷知青苗不可行也伏望复行常平以幸天下秋七月蕪辙入言臣近奏乞罢青苗钱乞尽将臣僚前后章疏酌行八月司马光札子乞分等余糴其后王岩叟言臣覩昨降朝旨文虽详而未通四方来者更疑未便乞依旧法不分立三等更不申取本州岛及上司指挥外余勅新降朝旨别行颁降庚寅刘摯言臣近以惠卿责降告词首建青苗之语而青苗法未罢曾具论列不蒙采纳望依今年二月勅文依常平旧法施行王岩叟蕪辙朱光庭王觐言臣等屡奏乞罢青苗皆不蒙付外施行如众论必以罢为是乞早赐断以慰民心如为非乞显行黜责以惩臣等妄狂六月司马光言青苗钱害民极多臣僚上言前后非一今欲遍指挥下诸路提刑司常平钱穀只令州县依旧法趁时糴青苗钱更不支俵旧欠二分息尽皆除放诏从之初纯仁以国用不足建议复青苗钱四月二十六日旨挥蓋纯仁意时光在告不预也已而召谏共言不报光寻具札子乞约束州县抑配者蕪辙又缴奏乞罢之光始大悟力疾入朝对曰近日不知是

何奸邪劝陛下复行此事纯仁失色却立不敢言青苗钱遂罢散岩叟等所称大臣实指纯仁也録黄中书蘓軾奏曰臣见免役之法已尽革去青苗乃独因旧稍加损益欲行月攘一鸡之道熙宁之法本不许抑配今虽复禁其害犹在又官吏无状于给散之际必会酒务设乐卖酒民至有徒手归者每散青苗酒课暴增此臣亲见而为之流涕者也二十年间因欠青苗至卖田宅男女溺水自缢不可胜数朝廷忍复行之欵使斯民快一时之用而不虑日后催纳诚非良法今已行常平余粟之法惠民之外官亦少利何用二分之息以贾无穷之怨臣深惜之欲乞旨挥今后更不给散所请过钱户候丰熟日分作五年十科随二税送纳庶农民息肩以免后世讥议所有上件録黄臣未敢行下十二月臣僚上言朝廷罢俵青苗钱令诸路提刑司委丰熟州县广行收余粟意欲常有蓄储而户部请不收余年计失朝廷養民之意乞诸路运司合余年计并无先次令常平收余从之

### 熙宁元佑议论市易

熙宁五年三月丙午诏曰天下商族物货至京多为兼并之家所困宜出藏库钱帛选官于京师置市易务先是有魏继宗者自称草泽上言京师百货所居市无常价贵贱相倾富能夺贫乃可以为天下于是中书奏在京市易务监官二举提一勾当公事官一许召在京诸行铺牙人充本务行人牙人遇客货不愿卖入官者许务中投卖勾行人与客平价据行人所要物数先支官钱买之并不抑勒若非行人要物价实可收蓄变转亦委官变转收买投时估出卖不过取利故降是诏户部判官吕嘉问提举在京市易务仍赐库钱百万缗为市易本其余用交钞及折博物令三司应副初三司请市易十三条其一云兼并之计较取利有害新法令市易务寛察申三司随置以法御批减去此条余悉可之御史刘孝孙言此则见陛下寛仁爱民之至安石曰孝孙称此为圣政臣谓此乃圣政之阙上曰若但设法倾之即兼并自不为害安石曰若不明立法令但设法相倾即是纸铺孙家所为五月吕嘉问言泥内酒坊等处连三灶岁省柴四十余万推之一县省三十三万斤约诸州岁省柴钱十六万缗先献连三灶法王靖变更三灶法常震并乞充赏诏王靖迁大将灭磨勘五年常震不理选限试国子四门助教仍赐曹州酒坊钱三千缗七月诏在京商税院杂买场杂卖务并隶提举市易务闰七月先是上批付安石闻市易极苛细市人怨谤以为官司浸淫尽收天下之货自作经营可令指挥只依旧继宗元肇画施行安石白上曰陛下所闻有事实乞宣示上曰闻立赏捉人不来买卖安石曰此事尤可知其妄嘉问曰至臣处不知果有此事是臣以聚敛悞陛下当知臣素行若臣不如此即无缘有此事容臣根究勘会别具闻奏冬十一月上谓安石曰市易卖果实有之即大烦细今罢之如何安石曰市易司以民上为官司科买所困下为兼并取息所苦投状乞借官钱出息行仓法供纳官果自立法来贩者比旧皆即得见钱行人比旧官司兼并所费十减七八宫中又得好果实供应比皆逐人所供收及累验事元如此陛下谓伤国体臣谓不然上笑且曰买得果实比旧极佳行人极便行人皆贫宜除放息钱安石曰比旧已各蘓息何須除放息钱六年春枢密文彦博言臣近言市易司遣官监卖果实损国



体敛民怨乞寝罢今涉旬未行凡衣冠家罔利于市缙绅清议尚所不容岂堂堂大国皇皇求利不为物议所非乎安石曰陛下近放百姓贷粮至二百万支十斗全粮给军一岁增费亦数十万缗天下孰不知陛下不殖货利岂所费如此而乃于果实收缗息以规利者乎博所言遂寝不报六月提举在京市易务奏三班借职张吉甫为本界勾当公事辞以见为李清臣指挥使方在降谪一旦舍去义所不安上叹曰十室之邑必有忠信吉甫陈义甚高贤于李清臣远矣可遂其志安石曰始闻吉甫极有干才今所陈乃其私义朝廷取人正当如此初韩绛宣抚清臣从辟会绛无成功被贬清臣自全多毁绛故上薄之七年正月遣李■〈木巳〉相度成都府置市易务利害上问安石纳免役钱如何或云提汤瓶亦令出钱有之乎安石曰且言提汤瓶令出钱必有人陛下何不宣示付所司考实如市易司非吕嘉问孰能守法不避左右近习非为嘉问辨以忤近习且此事臣亲一一经理亦颇劳神正不欲背负所学为天下立法故也上曰士大夫言不便者甚众安石曰士大夫或不快朝政或与近习相表里自古未有令近习如此能兴治功者初嘉问提举市易务挟安石陵慢三司使薛向且数言市易事及曾布向代三司使素知嘉问骄恣懷不能平及闻上数以市易苛细诘责中书意欲更张未得间也是月丁巳上夜降手诏赐布曰闻市易务日近收买货物有违朝廷立法本意可详具奏布对于崇政殿具奏所闻上覽之矍然喜见于色谓安石曰曾布言市易不便知否安石曰知之上曰布言如何安石曰布今上殿必自言遂留身曰市易事布与嘉问不相足布所言既送中书是夜上批问安石恐嘉问实欺罔非布私忿安石具奏明其不然于是诏令与惠卿同根究市易司不便事安石意主嘉问不以布所言为是故使惠卿居其间也布既受诏同惠卿究市易事四月上批可令布惠卿一处取问上复以手札赐布令来对布即具陈行人所诉并疏惠卿奸欺以闻及布对上慰谕久之因曰惠卿诚不可更共事时上意必欲按治安石卒不肯舍惠卿用他官惠卿奏请番覆盖谋变此事也上疑焉故仍付两人五月中书戸房比对市场司事及曾布根究市易违法事诏章惇曾孝寬就军器监置司根究以闻后八日布对延和殿言戸房不同之故上以为然布因言市易已置狱朝夕窜絀自尔必不复望清光上曰卿三司使案所部违法有何罪布曰陛下以为无罪不知中书意若何况臣与惇有隙今以惇治狱其意可见上曰有曾孝寬在事既付狱未必不直上慰劳曰卿不須如此自尔不复请对后八十余日乃贬六月上批提举市司奏二年收息钱九十六万余缗累年朝旨已支九十五万缗可契勘何日月指挥支往何处【新本亦削去此复存之此可为欺】八年吕嘉问兼提举市易司安石言盖自秦以来未有榷制兼并之术臣以为司能榷制兼并理财则令颁与不颁不患无财提举市易司本刘佐韩绛固争以为佐未合与差遣安石曰市司自来举司不須条制且七八万贯场务湏付能者绛固争为如此则废法再拜辞位曰宰相不可为上愕然曰兹小事何必尔绛曰小事尚弗争况大事乎卒罢刘佐绛就位丰二年正月诏市易旧法所人賒钱田宅或金钱抵当者三人保则给之皆出息十分之二过期不纳月罚钱百之二贫人无赖子弟取官货不偿积

息罚愈滋囚系督责徒存虚数都提举市易王居卿建议以田帛抵当者减息无抵当徒相保者不复给自元丰二年正月以前本息外所负罚钱悉免之凡数十万缗负本息者延朞年半众议颇以为愜八年四月又诏在京并西及泗州置货等场并罢中书省今年正月九日赦书内外人户见欠市易钱物并抑所属勘会元賒请本息等钱并已纳见欠数目条具闻奏其息钱当议减放在京至今未见有司依赦以闻诏刘拯等赴御史台置局磨勘欠钱大户放七分小户放全六月诏户部提辖拘催市易钱物准勅除放钱外合纳本钱特与展限三年八月户部状勘诸路自去年推行市易抵当兼勘镇寨市易抵当已准旨更不兴置今相度除诸路州军抵当收息簿可存留外其州县市易及余处一切皆可省罢诏从之【抵当原不罢但罢市易耳】十一月兵部员外叶祖洽奏市易之逋虽有寛期之惠然民力已敝必无从出愿勅有司检察委无可出特放蠲之

元佑元年正月辛丑朝散大夫吕嘉问知淮阳军以孙升言市易法初行嘉问实领其事罔上壤法故有是命闰二月录故左侍禁李公度男适以公度监熙州市易收息缗钱十八万有奇故也诏户部应诸路人户见欠市易钱并与除放蕞辙言蜀中榷茶市易等见委郭槩体量事实而槩并不指言实弊如市易比较收息始因韩玠以灵泉为比务令多取息钱槩以伊叔祖韩缜任仆射不敢体量实状妄言玠不曾以户口比较息钱又代玠巧说附下罔上情理难恕臣乞降旨先罢绌郭槩所有前件事别委官体量施行诏遣郭槩与差遣其卖盐市易事令黄廉先次体量以闻己酉诏市易务见计置下准备外国人使收买之物五万余贯令据见数供卖候行计置令行人依旧供应其元丰四年西驿买卖令市易管认出卖朝旨更不施行又诏应内外监理市官钱在京委太仆寺开封界令提点诸路令转运限一月各索逐户原请官本许以纳过息罚钱充折及官本即便免放并坊场淨利钱依比以纳过罚钱折填淨利外尚欠官本并淨利而业尽及无抵保或正身保人孤贫者权住催理及以前积欠免役钱减一半余分限三年随夏税带纳其今月四日旨挥不施行者从蕞辙奏也七月蕞辙言乞将市易欠数人户通计所纳息罚钱数放已纳及所请官本数目即与除放蒙恩依此施行德泽广及然闻京师下户贫家初从多作诡名请新还旧以此无缘通计息罚故除放之恩多止上户臣近行体问据通直郎监在京市易务宋肇为臣言若截欠二百贯以下户一例除放所放至多事亦均一臣究其说以人所欠皆出利息若将见欠二百贯以下除放钱数不多望乞特与除放或因将来赦书明堂行下或更转行诸路则细民戴德社稷之利不可胜计口内吕嘉问系修创市易害民最深虽已责降尚有民社更乞重甯以谢天下所有宋肇札子三道备録进呈如左八月李常言今常平坊场免役积剩钱共五十余万贯散在各州县贯朽不用初缘泉货流通乃济臣欲乞命有司议于州县各宜平余一司选人领之仿古平余法就直如数公而敛之及其价腾裁数分而出之但无亏原价唯利农桑之民为先庶泉货流通四海蒙福二年三月梁焘奏言风闻朝旨拘收见欠官钱户产切谓不然命令一下民情惊扰甚负陛下安静四方之意也乞降圣旨恩宠此行展限理索以安百姓之心四

月李常言朝廷自元佑来圣政所先慈仁为本爱育为务宜其和人格天嘉应下浹而涉春以来时雨愆候上动圣懷祈禳修省无所不至然小雨虽降终未沾足臣思今日人情尤郁贫弱尚困唯市易一事自恩放除二百贯以来消减亦不多矣昔称三万缗今存四百余缗矣昔称百余万缗今纔二十九余贯矣蠲除者既见不少理索者独为不幸穷困之情未舒臣虑和气因未浹也臣待罪户部凡一钱之金一尺之帛莫不为朝廷爱惜今冀以蠲放为事者诚以上累圣政下扰至和伏望决之不疑奋于独断五月诏应官负缘市易增羨酬獎惟身亾致仕及得减一年以下磨勘人并免吕嘉问追三官展四年磨勘吴安诗追两官贾昌卫追一官三年三月诏罢卖市易司元丰库物从三省之请也十月刘安世言新利路转运判官韩玠元丰中奉使蜀道推行市易法过为苛急至使县官躬使升斗未免凌辱陛下践阼之初尚寬玠为言惨刻朝廷尚以为疑遂委别司体量时玠叔祖縝方为相而提典刑狱郭槩畏避权势不上是奏陛下责其观望先行降黜后维执政玠所犯遂不穷治今遽复所司何所惩戒伏望收新命以允公议八年二月尚书省检会市易欠负已降今年正月朝旨每保五百贯已下依赦除放大姓仍不过三保其该除放人户更不奏裁外其余诸般系官欠钱物有一名少欠敷科名者总计名下逐窠名次数五百贯已下除放奉圣旨每名各随逐次依名数放除不得过三窠名其已该除放人户更不奏裁（阙页）

#### 熙宁元佑议保甲保马变更

熙宁三年十二月乙丑中书言司农寺定九县保甲条制充选官于开封祥符两县团成保甲候成次序以渐及他县从之先是同勾管开封府界常平等事赵子几言近岁寇盗充斥公为民害今欲依旧保甲各立首领使相部辖及捕贼赏格乃下司农寺详定至是增损行之他日上谓王安石曰用募兵与民兵亦无异安石曰役之过苦则变成然募兵多浮浪非良农之比上曰民兵虽善止是妨农事如何安石曰先王以农为兵因乡遂寓军旅今边陲农人则无什伍不知战守之法上曰止是民兵未可待以战守奈何安石曰募兵与民兵无异顾将帅如何耳四年三月上召台府对资政殿文彦博曰保甲用五家为保犹之可也今乃五百家为一大保则其劳扰可知彦博又言祖宗法制具在不湏更张以失人心上曰更张法制于士大夫诚多不悅然于百姓何所不便安石曰法制具在财用宜足中国宜强今皆不然未可谓之法制具在也甲午上批枢密院命教阅而词诉并下提点司按察八月壬寅广南东路驻泊都监杨从先言本路枪手万四千今排保甲若两丁取一得丁二十五万八千若三丁取一得丁十三万四千自少计之犹十倍于枪手愿委路分都监二员分举教阅诏司农寺详定条约以闻其后户自第四等以上有三丁者以一为之每百人为一都五都为一指挥自十一月至次年二月每月轮番阅习每三日一比试事艺高者先次归放李宜之请废保定军口遣官相视而众入军卫乞留额甚哗宜之以为遣官故纵其如此王安石白上曰陛下欲什伍河北民为用若如此不治后不可用世京坐不能禁约故责及之保定军卒不废翰林学士曾布等言近司



农寺兵部检正立法臣等今修成义勇保甲及养马条三卷诏兵部行之七年诏开封府保甲免本身夫役三月诏诸军止令都总管司施行先是诏五路自安抚以下提举诸军义勇保甲岁取旨升黜而知大名府韩绛言诸军责总管司外义勇等事即依今处分有是诏察访使曾孝宽言庆历八年尝诏河北州郭第三等乡村第二等每户养被马一疋以备官买乞检会施行户马法始于此八年司农寺言保甲之法客户五家相近者为小保五小保为大保十大保为都保诸路皆准此行之

元丰二年提举广东常平林颜言今天下家为之保保为之长长为之正岂不容奸而已盖兵食于农藏武士于耕所谓教而后使之道也乃诏广东保甲隶以武士八年夏四月枢密院言保甲两丁之家见教人小弱或久病及除当教人外并第五等以下田不及二十亩者听提举司审验与放免寻五月诏府界三路弓兵保甲未行已前复置六月韩维奏保甲保马之弊伏望详酌施行六月枢密院言访闻近日府界三路团教保甲多因正长骚扰或巡教官指挥苛虐致小人凶暴陵抵犯法逐处提举官多务姑息不喜州县公行致官吏畏避不敢举发监司观望不为按劾欲令府界三路提举保甲司及州县等觉察按劾施行又诏京东西河北陕西河东所养户马近已支价钱马军分目今府界并京东等路养马指挥并罢又诏京东西路保马法无定年限民间易以应办而有司不务循守妄有陈请期限迫急遂至骚扰先帝已尝降手诏诘责约束至今犹不能奉行其两路保马元降年限收买其剩买过数月并先以决年分之数又诏提举京东路保马兼保甲杨景提举京西路保马兼保甲张修并令乘传赴京于三省稟议改废其役诏京东西路保马等级分配诸余数发赴太仆寺其格不应支配即还民户变易纳所给价钱秋七月门下侍郎司马光言保甲使人逐捕盗贼已有指挥县尉及弓兵手级人数并令依保甲以前数优置其保甲不令管捕若使之攻讨四夷则■〈亩犬〉亩白徙教阅虽熟未尝见数与外国战鬪诏书勅边吏不得侵扰外界务在安静保甲的实有何所用农民不堪愁苦如遇明道之蝗康定之旱至和之水则为国大患近者羣盗王冲承保行劫又获鹿县保甲射伤提干孙文以下凌上伏乞断自圣心尽罢诸路保甲保正长使归农巡捕盗贼户长催督赋税其所养保马拣择勾收太仆寺量给价钱如此则开封府界五路之民孰不欢呼鼓舞若以保甲中武艺有成之人可惜使之归即乞逐县依沿边弓箭手法许荫本户田三顷与免二税疏奏蔡确等执奏不行诏保甲枢密院今月六日指挥保马别议立法范纯仁奏初缘保甲子弟蒙指挥并教两日或三日比之自来目数全少然未免往来聚集有妨农务或期约同保私阅为名不肯专一生业官私及父兄终难觉察臣今欲乞应三路教阅保甲计一岁合教日数并就农闲之月分并归农业则官司与父老易为勾管八月诏府界三路保甲自来年正月一日依义勇法太皇太后谕辅臣曰民间保马宜早罢去法有不便于民

元佑议合祭分祭同异

元佑五年五月尚书左丞许将建议当讲祭皇地祇事诏礼部太常寺同共详议当

以闻六月礼部太常言奉诏议皇地祇祠典缘郊祭之礼国之大典乞与尚书侍郎两省及侍从官以上同议从之七年三月礼部言诏同议皇地祇祀典准礼中崔公度状切见累次集议未合将来南郊或别行大礼乞用资政殿学士陈荐议依旧合祭天地并从祀百神所自令决集议公度尝言谨按周颂昊天有成命之序曰昊天有成命郊祀天地也又周礼冬至祀昊天上帝于圜丘夏至祭皇地祇于方丘汉武帝郊祀歌曰上天布施后土成穰穰丰年四时荣皆合祭天地于南郊之辞周颂合祭礼之情也周礼时祭礼之文也今时难行即当依旧合祭并依祖宗旧仪为万世不刊之典礼部又言礼部郎中叶祖洽议愿朝廷复明堂五帝之常祀太常少卿盛陶太常博士张献宋景年议若祀昊天上帝兼祀五帝如旧仪得礼之变与祖宗大享之礼前后相成祀典无阙太常博士朱彦请季秋宗祀明堂以配上帝取合诸经于义为允本部看详若宗祀明堂昊天上帝五方上帝以五方人帝王官从祀得礼之变本部缘未奉明旨未敢集议诏并令侍从官及礼官集议以闻九月先是吏部彭汝砺言准勅同议南郊合祭事是非盖未有定先帝钦若承顺天心罢黜邪说是正太常行之歷年中外禔福圣作明述神明欣慝今何疑而欲更之也改命实非可愿惟朝廷慎之重之反之复之务求至当以称先帝所以尊奉神灵之意于是翰林学士顾临翰林侍讲范祖禹等八人议曰王者父事天母事地皆不可以不亲今三年一郊已非古制而北郊未有亲祠之日若不亲见地祇则尊天而不亲地事父而未事母也伏请合祭天地如祖宗故事范祖禹又言初以天地特祭经有明文然自汉以来不能行之千有余年矣宋兴以来太祖郊四太宗郊五真宗郊九英宗郊二神宗郊三皆合祭不合祭者惟元丰一年郊耳陛下他日果能行北郊之礼然后罢合祭未为失也伏乞圜丘合祭依熙宁十年典礼吏部侍郎范纯礼等二十二人议曰南郊合祭天地不见于经王者亲祠天而地则阙焉亦非典礼神宗皇帝考按古议诏罢合祭元丰六年上祀昊天上帝于圜丘配以太宗又诏亲祠北郊如南郊仪仍命有司修定仪注则于承事神祇礼无违者伏请并依先朝已得诏旨施行孔武仲等又请以孟冬纯阴之月诣北郊亲祠如神州地祇之祭权兵部侍郎杜纯请于苑中设望祠位置燿火于坛所俟躬祠南郊之岁则夏至北郊上公摄事每献举燿火诏拜工部侍郎王钦臣议宜如祖宗故事并祭天地一次申谢丕祝曾肇又言伏以天地合祭非先王之礼学士大夫所共知之论者以罢合祭则天子未有亲见地祇之时夏至亲祀北郊则以五月行礼为难欲因南郊并举地祇之祭此于人事以求自便则可矣以此为亲见地祇之实则未也臣愚切谓合祭不可复亲祠不可废但当斟酌时宜省去繁文末节如亲祠之礼无不可为矣壬辰太皇太后垂帘三省进翰林学士顾临等郊祀议太皇太后曰宜依仁宗先帝故事时吕大防言曰天地之祭自汉以来合分不一唐天寶后惟天子亲祀乃合祭于南郊国朝以来大率三岁一亲郊并祭天地宗庙因行赦宥于天下及赐诸军赏给遂以为常亦不可废虽欲岁岁亲行于本坛反不可得今令诸儒献议欲用礼官前说南郊不设皇地祇位惟祭昊天上帝不为无据但于祖宗权宜之制未见其可蕪颂曰今正南郊乞准故事蕪辙曰

议者持合祭别祭二说各有所据神宗合祭天地今十五年矣皇帝即位今已八年未尝亲见地祇乃朝廷阙典不可不正范百禄言祖宗皆遵故事每遇南郊并合祭天地神宗以为圜丘无祭天地之理遂诏礼官考求典礼元丰南郊止祀昊天上帝配以太祖先帝所废稽古据今未可轻改也甲午禹进呈大防言今日宜为国事勉行权制候将来议定北郊制度及太庙享礼行之未晚百禄言祖宗圜丘合祭皆是循用后代权时之制神宗皇帝元丰六年南郊不合祭地示乃是复行先王典礼太皇太后曰非不知此盖为国是蕪颂蕪辙郑雍皆言合祭天地自汉唐以来常行自古帝王受命之初未尝不郊见天地翌日三省条具所议奏闻诏依令学士降诏戊戌诏国家郊庙时祀祖宗以来命官摄事惟三岁一亲郊则先享清庙冬至合祭天地于圜丘元丰间有司援周制以合祭不应古仪先帝乃诏定亲祠北郊之仪未之及行是岁郊不设皇地祇位而宗庙之享率如权制朕以凉昧嗣承六圣休德鸿绪今兹禋礼奠币上帝裸鬯庙室而地祇天神久未亲祀矧朕方修郊见天地之始其冬至日南郊宜依熙宁十年故事设皇地祇位以严并祝之报俟郊礼毕依前降旨挥集官详议亲祀北郊事及郊祀之岁庙享典礼以闻八年三月翰林侍读学士蕪轼上圜丘合祭六议畧曰臣恭覩陛下近者至日亲祀郊庙神祇享答实蒙休应然则圜丘合祭允当天地之心不宜复有改更臣窃惟议者欲变祖宗之旧冬至祀天夏至祀地盖以为用周礼也请言周礼以今礼之别古者祀天者三坛三帝者一四时迎气者五祭地祇者三飨宗庙者四皆天子亲祭而又朝日夕月四望山川社稷五祀及羣小祀之类亦皆亲祭此周礼也太祖皇帝受天眷命肇造宋室建隆初郊先享宗庙并祀天地自真宗以来三岁一郊必先有事景灵徧享太庙乃祀天地此国朝之礼也夫周之礼亲祭如彼其多岁行之不以为难今之礼亲祭如此其少而三岁一行不以为易其故何也古者天子出入仪物不多其卫甚简自秦汉以来天子仪物日以滋多非复如古之简易也今所行皆非周礼三年一郊非周礼也先郊二日而祭原庙一日而祭太庙非周礼也郊而肆赦非周礼也自后妃以下至文武官皆得荫补亲属非周礼也自宰相宗室以下至百官皆有赐赉非周礼也此皆不改而独于地祇则曰周室不当祭于圜丘此何义也议者必曰今之寒暑与古无异而宣王奋武至以六月出师则夏至之日何为不可祭乎臣将应之曰舜一岁而巡四岳五月方暑而南至衡山十一月方寒而北至恒山亦今之寒暑也后世人主能行之乎所以十二岁一巡者唯不能如舜也夫周已不能行舜之礼而谓今可以行周之礼乎天之寒暑虽同而礼之繁简则异是以有虞氏之礼夏商有所不能行夏商之礼周有所不能用时不同故也宣王以六月出师克纘武功盖非得已且吉父为将王不亲行也今欲定一代之礼为三岁常行之法岂可以六月出师为比乎议者必又曰夏至不能行礼则遣官摄祭祀亦有故事此非臣之所知也周礼大宗伯若王不与则摄位郑氏注曰王有故则代行其祭事贾公彦疏曰有故谓王有疾及哀惨皆是也然则摄事非安吉之礼也后世人主不能岁岁亲祭故命有司行事其所从来久矣若亲郊之歲遣官摄事是无故而用有故之礼也议者必又曰省去繁文末节



则一岁可以再郊将应之曰古者以亲郊为常礼故无繁文今世以亲郊为大礼则繁文有不能省者若帷城幔屋盛夏则有风雨之虞陛下自宫入庙出郊冠通天乘大辂日中百舍百卫兵暴露于道铠甲具装人马喘汗皆非夏至所能堪也王者父事天母事地不可偏也事天则备事地则简是于父母有隆杀也岂得以为繁文末节而一切欲省去乎国家养兵异于前世自唐之时未有军赏犹不能岁岁亲祠天子出郊兵卫不可简省大辂一动必有赏给今三岁一郊倾竭帑藏犹恐不足郊赉之外岂可复加若一年再赏国力将何以给分而与人情岂不失望议者必又曰三年一祀天又三年一祭地此又非臣所知也三年一祀以疎为阔若独祭地而不祭天是因事地而愈疎于天自古未有六年一祀天者如此则典礼愈坏欲复古而背古益远神祇必不顾飨非所以为礼也议者必又曰当郊之岁以十月神州之祭易夏至方泽之祭则可以免方暑举事之患此又非臣之所知也夫所以议此者为欲举从周礼也今以十月易夏至以神州代方泽不知此周礼之经耶抑变礼之权耶若变礼从权而可则合祭圜丘何独不可十月亲祭地十一月亲祭天先地后天古无是礼而一岁再郊军国劳费之患尚未免也议者必又曰当郊之岁夏至祀地祇于方泽上不亲郊而通燿火天子于禁中望祀此又非臣之所知也书之望秩周礼之四望春秋之三望皆谓山川在境内而不在四郊者故远望而祭也今所在之处俛则见地而云望祭是为京师不见地乎此六议者合祭可否之决也夫分祭天地决非今世之所能行议者不过欲于当郊之岁祀天地宗庙分而为三耳分而为三有三不可夏至之日不可以动大众举大祀一也军赏不可复加二也自有国以来天地宗庙嘉飨此祭累圣相承唯用此礼此乃神祇所歆祖宗所安不可轻动动之则有吉凶祸福不可不虑三也凡此三者臣熟计之无一可行之理伏请从旧为便伏望陛下详覽臣此章则知合祭天地乃是古今正礼本非权宜不独初郊之岁所当施行实为无穷之制不刊之典愿陛下谨守太祖建隆神宗熙宁之礼无更改易郊祀庙享以亿宁上下神祇仍乞下臣此章付有司集议如有异论即湏画一解破臣所陈六议使皆服上合周礼下不为当今军国之患不可袒执更不论当合可与不可施行所贵严祀大典以时定又言臣近奏论圜丘合祭天地非独适时宜亦自然上合三代六经为万世不刊之典然臣不敢必以为是故六议以开异同之端欲望圣旨行下令议者与臣反复诘难尽此六议之是非而取其通者则其论可得而定今奉圣旨但令集议官集议闻奏切虑议者各伸其意不相诘难则是非可否终莫之决臣今欲乞集议之日若所见不同即湏画一难臣六议明着可否之状不得但持一说不相诘难非臣敢自是而求胜也盖亦从长而取通也

【范祖禹传云朝廷从苏轼之请令议者相诘难禹遽白吕大防曰当白朝廷酌其可否行之若使其相诘难必致纷争失体于事何补也大防以为然但令礼官集议而已二先已送集轼又言乞湏相诘难寻又罢集议岂用祖禹之言也】夏四月丁巳诏曰朕闻五帝不相沿乐三王不相袭礼世有损益因时制宜惟我祖宗严奉郊庙当遣官摄事皆考合于前文唯奠王亲祠自裁成于大礼每以三岁对越二仪咸秩百神大赉四海迄先帝

元丰之末讲方丘特祭之仪盖乃补一代之阙文振百王之隆典朕惟菲德嗣守丕基列圣已行谨当遵奉先朝未举惧不克堪是以昔岁仲冬竭诚大礼神祇享答祖考熙宁前诏有司再加集议犹欲咨度诸儒之论稽叅六艺之文然理既不疑事无可议断自朕志恊于金言祇率旧章永为成式令后南郊祭天地依元佑七年例施行仍罢礼官详议诏词范祖禹所草

太平治迹统类卷二十二

●钦定四库全书

太平治迹统类卷二十三

（宋）彭百川 撰

元佑党事始末上

哲宗即位司马温国公光当国悉改熙宁元丰旧事或谓之曰旧臣如章惇吕惠卿等辈皆小人也他日有以父子之义间上则朋党之祸作矣光正色曰天若祚宋必无此事遂改之不疑君子谓光之勇孟轲不如若曰光叅用熙宁旧臣共变其法以絶异时之祸实光所不取也十月同知枢密使安焘乞补外郡不许御史中丞刘摯言臣昨于八月九日曾言神宗皇帝顾命大臣不可尽去宜于张璪等二人而罢璪以安天下留安焘清臣以全国体后蒙圣恩因璪有请进其官职使之外补今闻焘亦复上章臣深虑人情不察以谓先帝弃天下方逾年而受遗之臣一旦尽去转相议论无所不及其于盛德之治不为无损伏望圣明再思顾虑无听焘之去十一月范镇提举崇福宫以镇力辞新命也先是镇会葬永裕陵下蔡京谓镇曰朝廷将起公矣镇变色曰镇以论新法不合得罪先帝一旦弃天下其可因而为利乎及降诏令赴阙镇辞又降诏曰西伯善养二老来归汉室卑辞四臣入侍为我强起无或惮劳镇卒辞之朝廷起镇盖欲授以门下侍郎镇固不欲起又作书问其从孙祖禹亦劝止之镇大喜曰是吾心也凡吾所欲为者司马君实已为之何用复出十二月左司諫朱光庭言学士院试馆职策题有涉讽议朝廷愿正考官之罪又言苏轼尝骂司马光及程颐轼闻而自辨曰臣切闻諫官言近所撰试馆职人策问有涉讽议先朝之语臣退伏思臣之所谓偷与刻者專指今之百官有司及监司守令不能奉行恐致此病于二帝何与焉至于前论周公太公后论文帝宣帝皆是为文引证之常亦无比拟二帝之意况此策问第一第二首邓伯温之词末篇乃臣所撰三首皆臣亲书进入蒙御笔点用第三首臣愚意岂逃圣鉴若有毫髮讽议先朝则臣死有余罪伏愿少回天日之照使臣孤忠不为众口所铄诏追回放罪指挥或言朝廷谓光庭言非是将逐去御史中丞傅尧俞侍御史王嵩叟遂恐逐光庭则所损益大乃各上疏论轼不当置祖宗于议论之间犹未显言其有讥讽意也疏入不报侍御史吕陶言苏轼所撰策题盖设此问以观其合非谓仁宗不如汉文帝神宗不如汉宣帝也朱光庭指以为非亦太甚矣今士大夫皆曰程颐朱光庭有亲而苏轼常戏薄程颐所以光庭为程颐报冤而屡攻苏轼审如所闻则光庭固已失之而苏轼未为得也且轼谓王巩为不知人戏程颐为

不慎言举此二者而罪之则当也指其策问为讥议二圣欲深中以报亲友之私怨诚亦过矣况御史上官均近尝论奏为政之道有宽猛两端大概与苏轼策题同意陛下谓其言可取着为法令颁示天下上官均之奏苏轼之策题二人之言皆是讲明治道一则顺以为成法一则指以为罪何轻重取舍之异哉此士大夫之意不能无惑也臣与苏轼皆蜀人而不避乡曲之嫌极论本末既备位台职而辄纠谏官之失当二罪皆不胜诛然喋喋不敢自默者非独为一苏轼盖为朝廷救朋党之弊也又言明堂降赦臣僚称贺讫两省官欲往奠司马光是时程颐言曰子于是日哭则不歌岂可贺赦纔了却往吊丧坐客有难之曰孔子言哭则不歌即不言歌则不哭今已贺赦了却当往吊丧于礼无害苏轼遂戏程曰此乃狂死市叔孙通所制礼也众皆大笑结冤之端盖自此始轼非无过也

元佑二年正月傅尧俞王嵩叟相继上疏论苏轼不当置祖宗于议论间其意欲以救朱光庭也既皆不报是日二人又上疏论之甲子傅尧俞王嵩叟朱光庭以苏轼撰试馆职策题不当累日章疏今看详得是非讥讽祖宗只是论百官有司奉行有过令执政召逐人面谕更不须弹奏庚午翰林学士苏轼言臣近以试馆职策问为台谏所言臣所不敢深辨盖以自辨而求去是不欲去也今者窃闻圣明已察其实而臣四上章四不允独非朝廷知臣无罪可放臣自知无罪可谢也今言臣者不止三人交章累上不啻数十而圣断确然深明其无罪德音一出天下诵之史册书之臣自闻命以来一食三叹一夕九兴身口相谋未知所死然臣撰策问似实有罪若不实言是欺陛下也臣昔于仁宗朝举制科所进策论及所答圣问大抵皆劝仁宗精明庶政督察百官果断而力行也及事神宗蒙召对访问退而上书数万言大抵皆劝神宗忠恕仁厚含垢纳污屈己以裕人也臣区区不自度量常欲希慕古贤可否相济盖如此也伏覩二圣临御以来圣政日新一出忠厚大率多行仁宗故事天下翕然衔戴恩德固无可议者臣私忧过计常恐百官有司矫枉过直或至于偷而神宗励精核实之政渐致隳坏深虑数年之后致馭吏之法渐宽理财之政渐疎备边之计渐弛则意外之忧有不可胜言者臣窃忧之故辄用意撰上策问实以讥讽今之朝廷及宰相台谏之流陛下览之有以感动圣意庶几兼行二帝忠厚励精之政也台谏若以此言朝廷若以此罪臣则斧钺之诛其甘如荠今乃以为讥讽先朝则亦疎而不近矣愿因臣此言儆策在位天下幸甚若以其狂妄不识忌讳虽赐诛戮死且不朽辛未傅尧俞王嵩叟入对论苏轼策题不当尧俞既读札子竟太皇太后曰此小事不消得如此王嵩叟因于袖取轼所撰策题就帘前指陈未终帘中忽厉声曰更不须看文字也傅尧俞曰爱而知其恶憎而知其善今待轼如此轼骄将何以使之曰使总由台谏官嵩叟曰若台谏所言陛下能尽听纳自足以成陛下之美也台谏何与焉尧俞与嵩叟家居待罪伏俟遣斥甲戌三省进呈傅尧俞王嵩叟论苏轼札子执政有欲降旨明言轼非者太皇太后不听因曰轼与尧俞嵩叟光庭皆逐执事者争以为不可丙子诏苏轼所撰策题即无讥讽祖宗之意又缘自来官司试人亦无将祖宗治体评议者盖学士院失于检会札与学士院令知苏轼王嵩叟朱光庭各疾速依旧供职盖从右仆射



吕公着之议也同知枢密院范纯仁亦言苏轼止是临文偶失恩虑本非有罪而言者未已盖此事或闻因小有言致交相攻讦流弊渐大望圣慈深察向来宣谕之意只乞以朝廷本置諫官盖为辅朝廷阙失及奸臣害政令人臣小过本无邪心諫官不须深论若其引咎求去则云朝廷不欲以小事去言官尔等当共成朝廷之美则必不敢更有他说是日御史孙升奏言中丞傅尧俞侍御史王嵩叟因奏论放罪指挥而陛下疑以为党附諫官而苏轼为无过尧俞嵩叟居家待罪而元老大臣曾无骨鲠之论以别是非而立降札子令供职二人去就是系国体苟放罪指挥留而未下则二人者何颜以出而朝廷之体何从而正臣于此时岂可默默坐视以负陛下耳目纪纲之寄乎伏望圣慈详汉文汉宣彼此轻重之词察尧舜成汤宥过改过之德早出先降放罪指挥以全君臣之美以正朝廷之体则天下幸甚六月甲申承议郎彭汝砺为起居舍人执政有问新旧之政者汝砺曰政无彼此之辨归于是而已朝奉郎权开封府推官张商英为河东提刑商英先上书言三年无改于父之道今先帝陵寝土未干奈何轻议变更又移书苏轼欲作言官或得之以告吕公着公着不悦故出之先是御史杜纯贾易在司諫缘张舜民事劾吕陶上官均陶亦请外补上疏论朋党曰尝观古之圣君贤臣相与圖治能辟众正之路杜羣枉之门功业隆而名声著者其术无他在乎絕朋党之患而已人君不患不能知朋党而患在于不能去朋党臣起自疎遠无左右之助陛下擢于众人之中付以言责之任感慨自任恨无以报万一然臣以谓諫官御史当尊朝廷肃臣下谨名分正纪纲遠比周然后为称职故遇事必言不暇恤已抵牾同列亦既多矣违戾权贵亦已甚矣顷因程颐不严君臣之分故就别殿说书臣以为礼贵防微事宜戒渐名分一僭每生厉阶乃封章论其不可奏方上而陛下已悟其失有旨改正则是颐之妄请不待臣言而陛下已辨也臣于颐素无嫌怨所论奏者乃执事耳非欲沮颐以伸己也同舍缘此反目相视不啻仇讎阴怀睚眦伺隙求报未几张舜民罢台职諫官纷然共议营求亦欲率臣同入文字臣既思虑短暗始欲救之遂诺长貳以为可言既而再思理有不可其后全台具疏力来强臣臣乃谋论舜民之言不可从舜民之罢不当救面从其请不敢雷同及至召起三省宣谕其人各以为耻怀怨愈深意欲使臣不可独逸遂形恶奏上浼圣聪仰赖陛下睿明天纵照见邪隱朋党不攻自破孤臣获全今韩维之客程颐之党犹指舜民之事以攻臣是朋党之势复作而朝廷可欺乃天下之深忧也臣安可隱而不辨而去哉今政令之得失生民之利害必有大于舜民之事者而不先言之乃汲汲言臣者意非他也其一则贾易为程颐报怨也其一则杜纯以此悦韩维也韩缜误神宗之政事韩宗师忝秘阁之除命韩宗儒秽恶之迹郭茂恂赃贪之罪臣累尝弹劾则维之恨臣亦深也彼杜纯者与韩氏为婚姻则纯之言臣以为悦韩维迹状亦明矣至于贾易为程颐之党则士大夫无不知之今二人者不知何辞以罪臣也谓臣已尝出言欲救舜民既而不救有反复之罪乎是不许臣深思而欲臣苟合也谓臣见同官罢职不出力救之为薄于道义乎则事固有轻重理因有取舍不可执一而言也臣之罪止于此而言者源源未絕必欲臣废逐而后止臣深痛朋

党之弊至于斯也伏望陛下哀怜矜照罢臣言职免使纷纭之议烦惑天听臣不胜幸甚又言杜纯至台以来朝廷送刑名公事付台定夺纯独持深议意务在杀与胡宗愈等各论奏近臣阿附之事是也此亦可见其附韩维也贾易既与臣欲牵孔文仲上殿论奏文仲拒之程颐不与文仲往还忽谒文仲盛陈贾易所言之事因以言诱文仲令欲言之文仲深不平其说此朋党可见矣又言新除台官赵挺之乃邢恕妻兄从事程颐因纯荐为御史以纯与颐之故亦必言臣惟陛下幸察易凡五状言吕陶及是陶与均罢言职陶补外而均内徙文仲吕陶言程颐事【见伊川门】六月右司谏贾易知德州自苏轼以策题事为谏官所言而言者多与程颐善颐既交恶其党迭相攻易建言曰云云又言吕陶党助轼兄弟文彦博实主之语侵彦博及范纯仁太皇太后怒欲峻责易吕公着言易所言颇切直惟诋大臣太甚不可处谏列太皇太后曰不责易此亦难作公等自与皇帝议之公着曰不先逐臣则易命不行争久之止罢谏职退公着谓同列曰谏官所论得失未足言颐主上富于春秋异时将进导谏之说以惑上心此时正赖左右力争不可预使人主轻厌言者于是吕大防王存刘摯私相顾叹曰吕公仁者之勇乃至于此二年九月庚寅侍御史王觐奏言苏轼程颐向缘小忿侵结仇怨于是颐轼素相亲善之人亦为之更相诋讦以求胜势若决不两立及至台谏官一年之内章疏纷纷多缘颐轼之故也前日颐败而言者及轼故轼乞补外既降诏不允寻复进经筵而又适当执政大臣有阙士大夫岂得不忧虽臣亦为朝廷忧也轼自立朝以来咎愆不少然轼之文采后进少及陛下若保全轼则且勿大用之庶几使轼不遽及于大悔吝又言飞语有十鬼十物八奸之说大概不过取一二公议所共恶者以实其说余皆端良之士伏望出中诏榜朝堂示大夫不听谗言之意以安士大夫之心十月知怀州贾易责知广德军易罢谏职翰林学士苏轼中书舍人苏辙皆乞外补不许于是辙言易谢表自谓以忠直获罪指言羣臣谗邪罔极朋党滔天上下不交忠良丧沮至引周易履霜坚冰不早辨之言以为戒欲使朝廷原心定罪使行诛戮其间有云苏辙持密命以告人志在朋党而害正臣非台谏凡易所言不敢条析论奏惟有言臣一节理当辨明易虽顷谏官今出守郡不当风闻言事其言臣以密告人伏乞朝廷取问状实如所言有实臣甘伏条典于是御史交章论易人才庸下猥蒙朝廷不次拔擢以为谏官而易谄事程颐默受教戒颐指气使若馿家奴颐于人物少有爱憎易所抗章为毁誉附下罔上背公死党伏望早赐指挥降黜以惩朋党之风诏贾易已罢言职不合于谢上表内指名论事故有是责左丞刘摯言知陈州传尧俞知齐州王嵩叟知潞州梁焘通判虢州张舜民知广德军贾易皆早蒙陛下识擢分任言责志业未伸妖谤横作罢职补外各已数月云云臣愿圣慈特赐睿断召此数十忠正之臣入备任使以慰公议以消奸党幸甚左司员外郎朱光庭为太常少卿光庭旧传云迁太常少卿左正言丁隲论光庭昔为小官曲奉权要推行法令今又剧残苛虐党附程颐倾败善类奉使河北要求名誉并边州郡储蓄一空言虽不行士论快之十一月右仆射吕公着中书侍郎吕大防尚书右丞刘摯右丞王存言孔文仲论朱光庭不当竟寝文仲奏

光庭仍就职监察御史赵挺之奏苏轼专务引纳轻薄虚诞无知市井俳优之人以在门下取其浮浅之甚者加力论荐前日十科乃荐王巩其举自代乃荐黄庭坚二人轻薄无行少有人比王巩虽已斥逐补外庭坚罪恶尤大尚列史局按轼学术全出战国策苏秦张仪纵横揣摩之说近试学士院廖正一馆职乃以王莽袁绍董卓曹操篡汉之术为问此数人者忠臣烈士之所讳忌而未尝道今二圣在上轼代王言专引莽卓袁曹之事及求所以篡国迟速之术此何义也考其设心罪不可赦使轼得志将无所不至矣三年正月侍御史王觐奏苏轼去冬学士院馆职策题自谓借汉以喻今也其借而喻今者乃是王莽曹操等篡国之难易缙绅见之莫不惊骇为轻薄贪好利权不通先王性命道德之意专务战国纵横捭阖之术非偶然过失也若使久在朝廷则必立异妄作以为进取之资巧谋害物以快喜怒之气或未欲深罪轼即宜与一郡稍为轻浮躁竞之戒欧阳棐除著作佐郎实录检讨院官言争论不当以棐为集贤校理权判登闻鼓院右正言刘安世言棐与程颐毕仲游孙抃杨国宝辈交结执政子弟参预密谋号为死党伏望因其辞免追还新命非惟少抑奔竞之风庶亦渐消朋党之祸安世又言乞罢棐馆职以慰正人之望诏著作郎黄庭坚依旧著作佐郎以御史赵挺之论其操行邪秽故有是命右正言刘安世言黄庭坚如赵挺之所言则亏损名教岂可尚居华贯若或无有不加考实则庭坚虚蒙恶声将遂沈废伏望圣慈以谏官所言庭坚事状委监司依公体量以闻庶使枉直昭晰初胡宗愈除尚书右丞右谏议王觐言胡宗愈自为御史中丞论事建言多出私意与苏辙孔仲文各以亲旧相为比周力排不附己者深结同于己者操心颇僻岂可以为执政内批王觐论列不当落谏议大夫与外任差遣吕大防范纯仁等商量云内降指挥未敢行下吕公着吕大防等再论列太皇太后厉声曰若有以门下侍郎为奸甘受之否纯仁等又退而止疏所讦有王觐先降贬责文字臣未敢签书更乞圣心熟虑因录进欧阳修朋党论中书舍人曾肇亦言觐之一身出入内外不足为轻重陛下言路之通塞人情之屈伸在此一举所有王觐三省同奉圣旨差知润州制词未敢修撰庚午承议郎右谏议大夫王觐直龙图阁知润州尚书右丞胡宗愈乞罢政改除门慢差遣诏答曰朕开奖言路通下情虽许风闻尤当核实岂以无根之语轻摇辅政之臣朕方御众以宽退人以礼加之美职付以大邦朕既无负于卿言卿亦何嫌而辞位祇服乃事毋自为疑苏轼之词也御史赵挺之奏愿追改责觐之命杨康国言去年逐张舜民今又罢王觐皆缘论及执政而岁逐谏官望追寝罢觐之命八月刘安世又言宜罢欧阳棐职方员外郎之命黜之外郡使天下知公道之存十月刘安世又论胡宗愈不当进用十二事翰林学士兼侍读苏轼上疏乞郡畧云谏官于意外巧构曲成以积臣罪使臣挠折于十夫之手使陛下投杼于三至之言外廷之人俱晓此意臣不早去必至倾危伏望圣慈念为臣之不易哀臣处此之至难始终保全措之不争之地刘安世又再上章论胡宗愈云匿宰相之姻嫌盗中司之要任蒙蔽人主之听隳废祖宗之法阴结惇确之奸傲幸异日显主轼辙之党公肆诋欺未尝振举纪纲但闻多所朋附又言臣何独自苦力诋大奸上渎圣听下犯



邪党盖臣内顾朽薄了无他长报国之心惟知直道郢州州学教授周穉上书乞用王安石配享刘安世论列翰林苏轼自劾按举穉竟罢归轼又言臣观明圣嗣位以求斥逐小人如吕惠卿蔡确张诚吴居厚崔合符杨汲王孝先何正臣卢秉寒周辅王子京陆师闵赵济中官李宪宋用臣之流或首开边隙兵连祸结或渔利摧财为国敛怨或倡起大狱以倾陷善良其为奸恶未易悉数而王安石实为之首今其人死亡之外虽已退处闲散而其腹心羽翼布在中外怀其私恩冀其得用朝廷近日稍宽此等如李宪乞于近地居住王安礼抗拒蔡确乞放还其地皆即听许崔舍符王孝先之流旋踵进用杨汲亦渐牵复吕惠卿窥见此意故敢乞居苏州此等皆民之大贼国之巨蠹得全首领以为至幸岂可以寻常一眚之臣计日累月洗雪复用哉今既稍宽之后必渐用之如此不已则惠卿蔡确之流必有时而复青苗市易诸法必有时为复今周穉草芥之微敢建此议盖有以启之矣臣数月以来窃闻执政之议多欲薄臣之责而宽穉之罪若果如此则是使今后近臣轻引小人而惠卿之流有以卜朝廷之轻重事關消长忧及治乱伏望特出宸断深诏有司议臣与穉之罪不可轻恕纵朝廷念臣本无邪心止是暗谬亦乞借臣以立法则臣上荷知遇虽云得罪实同被赏闰十二月右正言刘安世论章惇强市民产致朱迎等经户部赴诉伏望选差台臣致狱推劾四年三月戊寅刘安世言自去年四月左司谏韩川同奏胡宗愈奸邪朋党不可大任自后凡十九次上疏条陈未蒙施行次日胡宗愈为资政殿学士知陈州甲申中书侍郎刘摯上书曰恭惟先皇帝以聪明睿智承累世丕平之业思欲力致天下复见三代之盛以汉唐为不足道当时之议以谓非国富则无以为也是王者论治之伟论也当时辅臣如王安石吕惠卿辈不能副先帝委任之意乃奋其私意施为乖谬大失先帝之本旨其富国也则助役青苗变而为聚敛之法其强兵也则保甲保马流而为残扰之政其用人也则进便给轻捷之子以为适时退老成崇厚之人以为无用于于是四海兴议先帝颇知其事故罢退安石等不用继而王珪蔡确之徒尤不能将顺主意踵事增恶而先帝知政事之未便于民者方将改作遽弃天下忠臣义士至今长为先帝惜之者此也及皇帝陛下绍膺大历太皇太后陛下同览万几临统以来法度之久难行者终罢之大臣之害政者更易之正所以述成先帝之盛德美意传之无穷可谓备矣然前者二三大臣之朋党皆失意怏怏自相纳结睥睨正人腹诽新政令布列内外缙绅之间在职之吏不与王安石吕惠卿则与蔡确章惇者率十有五六此臣之所以寝食寒心独为朝廷忧也臣尝深计其术矣不免日夜窥伺间隙异日可以进说则造眩惑之谋又饰奸言以感激圣意摇动政事而已所进之说臣窃料之其大者必为离间之诈此最易入易听祸亦最大不可不防其渐而深察之其次又有二说一曰先朝造法为治皇帝陛下以子继父一旦听臣民之言有所更改其二曰先朝之臣多不任用如蔡确等受顾命有定策之功亦弃于外此二说者人情言之则浅近而易听自义理考之则无所取也是谗间之说伏望皇帝深鉴古事体汉昭之明以辨忠邪使他日奸言异论不可得而入常思太皇太后陛下之言无疑于心无怠于听庶以永承祖宗之业天下幸甚

苏轼以龙图阁学士知杭州从轼也右正言刘安世四具状论王子韶差除不当安世又言御史李常盛陶七事云风宪之地乃有常等王安石蔡确之党人阴持两端寝害正论使渐引其类并居要津则陛下累年忧勤所立之政事必将复坏于羣小之手可不痛哉李常罢斥知邓州坐不言蔡确也舍人彭汝砺依前朝奉郎知滁州坐营蔡确并不草盛陶责辞【此两端在蔡确门】四年六月谏议大夫范祖禹言梁焘确惇之党三不可相左谏议大夫梁焘言范纯仁主张蔡确为党恶不可复畹相位五年三月知亳州邓温伯为翰林学士承旨中书舍人王嵩叟封还词头言温伯傅会元丰草王珪蔡确制词也蓄奸意伏乞收还新命别择贤才夏四月邓温伯兼侍读提举醴泉观温伯告命既出言者论驳不已故有是诏王嵩叟又封还词头奏温伯奸邪事迹猥多不能徧举举陛下所亲见者一事以为明验垂帘之初诏求直言欲以知天下之事温伯草诏阴合奸臣之意阳合陛下之旨名为求言之诏实乃禁言之书使天下无一人敢应诏者迨司马光具以此意陈于陛下别作诏文天下之情使得上达奸邪如此岂可令侍言帝幄预亲近之列乎诏以温伯知南京既而复初命御史梁焘再上章言吕大防又言朋党起而国政倾蒙蔽作而主听壅强悍容而君道失此三者有天下之大患乞留宸虑苏辙为御史中丞言臣闻有官守者不得其官则去有言责者不得其言则去故祖宗朝凡任台谏官而言听则居职不然则黜罢理所必致前后悉然去年台谏论回河不当言既不从而言者皆获美迁今年复论邓温伯不可任翰林言既不究而言者亦并进职不辨是非一皆进擢朝廷负讳言便私之毁臣下被苟简怀利之非风俗渐成士节陵替臣今待罪执法若所言中理望陛下力赐主张行之无吝一有不当亦乞明加黜责以惩妄言侍御史贾易言昔在谏垣论列吕陶因及苏轼今辙为御史中丞臣为属官理合回避诏易为礼部员外郎侍御史孙升言易公忠直谅正色敢言论列邓温伯事朱光庭等皆迁美职易独何罪下迁公议莫不惜直臣之去叹宰执高下其手也御史中丞苏辙言臣窃观元佑以来朝廷更改弊事屏逐羣枉上有忠厚之政下无聚敛之怨天下虽未大治而经今五年中外帖然莫以为非者惟邪奸失职居外日夜窥伺便利求复进职不免百端游说动摇贵近臣愚窃深忧之若陛下不察其实大臣惑其邪说杂进于朝以示广大无所不容之意则冰炭同处必致交争薰莸共器必当遗臭朝廷之患自此始矣臣愿陛下谨守元佑之初政久而弥坚慎用左右之近臣无杂邪正至于在外臣子以恩意待之使嫌隙无自而生爱戴以忘其死则垂拱无为安意为善愈久而愈无患矣时吕大防刘摯言欲引用元丰党人以平旧怨谓之调停太皇太后颇惑之故辙言退复上疏曰臣自延和殿进呈札子论君子小人不可并处朝廷因复口陈其详以渎天听悉不以臣言为非然天威咫尺言辞遽迫有所未尽退伏思念若使邪正并进皆得与闻国事此治乱之几朝廷所以安危也今者政令已孚事势大定议者惑于浮说乃欲招而纳之与之共事欲以此调停其党臣谓此人若进岂徒然而已哉必将残害正人渐复旧事以快私忿人臣被祸盖不足言臣所惜者宗庙朝廷也先帝以来小人执柄二十年矣建立党与布满中外一旦失势希觐者

多创造语言动摇贵近胁之以福诱之以利何所不至臣虽不闻其言槩可料矣闻者若又不加审察遽以为然岂不过甚矣哉诗云无竞维人四方其训之陛下诚以反复异同为忧惟当久任才性忠良识虑明审之士但得四五人常在要地虽未及皋陶伊尹不仁之人知自远矣愿陛下断自圣心不为流言所惑毋使小人一进后有噬脐之悔则天下幸甚疏奏太皇太后命宰执于帘前读之仍宣谕曰苏辙疑吾君臣兼用邪正言极中理宰相从而和之自此兼用邪正之言始衰辙复上疏曰伏见太皇太后陛下皇帝陛下随时主张改革弊事因民所恶屏去小人天下本无异心羣党自作浮议近者德音一发众心涣然正直有依人知所向惟二圣勿移此意则天下谁敢不然臣窃见方今天下虽未大治而祖宗纪纲具在州郡民物粗安若朝廷大臣正己平心无生事邀功之意因弊修法为安民靖国之术则人心自定虽有异党谁不归心向者异同反复之忧益不足虑矣又云如臣等辈犹知其非况于心怀异同志在反复幸政之失有以借口者乎伏乞宣谕执事政有失当改之勿疑法或未完修之无倦民心既得则异议自消八月刘摯为中书侍郎初以吏额房事与仆射吕大防议不合己而摯门下侍郎及台谏共攻大防大防称疾不出摯每于上前开陈吏额本末此皆被减者鼓怨言路风闻过实不足深谴大防他日语人曰使上意晓然不疑刘门下之力居多然而士大夫趋利者交构其间谓大防与摯因是有隙于是造为朋党之论摯语大防曰吾曹心知无他然外论如此非朝廷所宜有愿引避大防曰行有请矣是日奏事毕摯少留奏曰臣久处近列器满必覆愿赐骸骨避贤者路既退连上章出在外第期必得请上遣中使召入对太皇太后曰侍郎未得去须官家亲政然后可去使者数辈趣入视事摯不得已受命未几大防辞位不许及摯迁右仆射与大防同列未几言者争诋之摯寻罢朋党之论遂不可破其本盖自吏额始秋给事中朱光庭御史杨康国言王巩新除不当诏别与差遣中丞苏辙论王巩熙宁初拒安石而不从其用司马光当国而喜其贤而荐为宗正寺丞爱憎之言未可偏信初除刘安世中书舍人不受再上章乞宫观诏从新所请与梁焘朱光庭同皆以邓温伯乞外任也中丞苏辙侍御史孙升三上章殿中侍御史岑象求三上章监察御史徐君平一上章皆论列右丞许将因进拟管军臣僚议论反复意在倾夺前后章疏乞付外施行十二月苏辙又言奏殿中侍御史上官均反复乞罢台职以肃奸宄许将既以言官罢上官均又言辙等合为朋党动摇圣意以疑似不明事逐执政自此人不得安位矣因乞罢言职于是责知广德军苏辙言杜常曾注解吕惠卿千实不字意求媚悦不学无术邪谄好利太常之职乞赐追夺又再上章言王子韶之佞不可用六年春杭州苏轼为吏部尚书二月除承旨弟辙为右丞朱光庭为给事中中丞苏辙言光庭诬杨畏秦观乞追寝成命刘安世为中书舍人后七日改枢密都承旨丰稷权起居舍人将以次补中丞苏辙言稷撰词乖刺乞降受闲慢差遣从之右正言刘唐老左司谏杨康国言王安礼赃污诏落安礼殿学仍知舒州左司谏杨康国言苏辙不可为执政者六事封还尚书右丞画黄后三月初二日押入视事尚书邓温伯卧疾五辞新命也乞补外诏不允王嵩叟劝刘摯可因其



请黜之又移书督大防傅尧俞等摯答曰敢不以身任之不果【吕大防邓温伯】给事中朱光庭言刘定奸恶不可预监司之选黄庭坚为中书舍人韩川言庭坚素无士行诏庭坚仍著作郎癸丑宰相求助台官【杨畏见官制门】六月贾易六状攻吕陶秋翰林学士承旨兼侍读苏轼上疏言臣闻朝廷以安静为福人臣以和睦为忠若喜怒爱憎互相攻击则其初为朋党之说其末乃治乱之机甚可惧也又论贾易党程颐而与之报怨不久必须言臣并及辙朝廷无由安静伏乞因臣亲嫌之请便与一郡以全二圣终始之恩八月贾易言苏辙大谬不应格仁宗顾直极谏之名容其滥进任司谏时妄言浚治壕城发掘骸骨事任中书日与吕陶谋为排陷正直之计用巧得为御史中丞助蜀党与赵鹗与陕西地界逐许将而窃其位轼则幸先帝厌代有归来闻好语之诗策题讥毁言者吕大防之制有民亦劳止之辞比治世于周厉妄以免役为便民而欲行决配税户颜章兄弟之无罪张大浙西灾伤建言兴修水利皆为虚妄浚治西湖筑长堤于湖以事游观伏望特行斥免辛卯执政于帘前进呈具言易疏前后异同之语并签贴原疏进入退复具奏乃诏与易外任后二日知青州赵君锡为贾易劫持言苏轼题诗欣幸先帝上仙轼因上疏下题诗日月云君锡公然欺罔伏乞付外施行稍正国法所贵今后臣子不为仇人无故加以恶逆之罪后君锡亦以此罢中丞先是右正言姚勔言君锡取舍反复郑雍亦言君锡在台中维持两可太皇太后亦言君锡全无执守乃诏复为吏部侍郎寻乞外郡诏为天章阁待诏制知郑州秦观罢秘书正字以贾易言观过失观自请也闰八月甲子执政会议都堂吕大防刘摯欲以李清臣为吏部尚书王嵩叟以非密院所预然必有议论摯曰执政为尚书有何议论曰执政为尚书固不过但恐公取不肯放入耳既而奏可嵩叟谓同列曰必致人言大防亦自以为然録黄过门下省给事中范祖禹封还进呈凡九祖禹执奏如初及大防奏诸部久阙尚书见在人皆资浅未可用须至用前执政上有器勉从之之意辙遂言除李清臣给谏纷然未已今又用宗孟恐不便太皇太后曰奈阙官何辙曰用此二人与用邓温伯无异三人非有大德俱与珪确并进与今日圣政不合今尚书共阙四人若并用此四人使互进党类气势一合非独臣等奈何不得亦恐朝廷难奈何矣朝廷贵安静如此用人台谏安得不言臣恐自此闹矣太皇太后曰不如且静遂卷除自持下范祖禹言清臣应制科目对策依阿大臣不言时政之失韩琦没先帝褒文彦博建储之议同附彦博而抑韩琦韩绛以庆州兵叛贬邓州清臣为属官赉宣抚文字赴阙规自全而毁绛三短以明己不与李璋指使张吉夫辞市易司之奏盖以李璋方在责降一旦舍去义所不安先帝叹曰十室之邑必有忠信小人陈义甚高贤于清臣远矣先帝薄之如此元丰中奉使北边以物帛百千遗中书承受内降吏人吕随为翰林以贿赂阴结堂吏召而用之则天下必曰佞人入朝矣两奏封还除命右正言姚勔亦言清臣阿附时相无大臣节命卒罢十月中丞郑雍御史杨畏对甚久论仆射刘摯及右丞苏辙也雍言摯善牢笼士人不问善恶□□□□□□又具摯党人名姓【三十人】王嵩叟刘安世韩川朱光庭赵君锡梁焘孙升王觐贾易杨康国安鼎张舜民田子谅叶

伸赵挺之盛陶龚原刘概杨国寶杜纯唐适孙谔朱京马辅傅遠庆钱世雄孙路王子韶  
吳立礼右正言姚勔入奏曰摯朋党不公虞策言摯亲戚赵仁恕王巩犯法施行不当甲  
戌摯辙以王巩坐罪皆自劾是日二人伏宣和入对对已押赴都堂戊寅签书枢密院王  
嵩叟奏刘摯苏辙不当罢逐况言者别有所怀未易可测臣不知披肝沥胆事陛下之日  
久者为信耶足一践言路未得其腹心为信耶安知其间朋邪挟私而阴与羣奸为地者  
陛下何不稍缓其事诚加考察将必有所见知臣言之不妄奏入不报太皇太后独遣中  
使赐苏辙诏谕令早入省供职辙再奏乞外任刘摯言臣再具札子陈乞外任伏望圣慈  
复降中使赐诏不允者恩遇未替岂胜犬马感报之情重念臣居位岁久畧无劳能心实  
自知果招弹劾虽在旨陈罪状仰蒙圣明洞赐察照大防既致人言已为累国有又安然  
不去臣实何施面目所以不敢上希睿宠迟迟于进退之际取轻于天下也伏望皇帝陛  
下太皇太后陛下察臣孤危早赐开允除臣一外任差遣上以明朝廷之大公下以全臣  
子之名节等已上论吕大防曰论刘摯已十八章初不因王巩事乃邢恕过京师摯与通  
柬延接章惇子为他日计此何也特与少礼令去太皇太后曰苏辙止荐王巩无他事初  
邢恕赴贬过京摯答恕柬末云为国自爱以俟休复持柬者明监东排岸官茹东济恕舟  
安在东济倾险人也有求于摯弗得取摯简录本送郑雍杨畏二人方劾摯得柬大喜乃  
解释柬语以休复为复子明辟之复谓摯劝恕俟太皇太后他日复辟也又言摯馆章惇  
之子故太皇太后怒面责摯曰公当一心朝廷若章惇之以一仆射与之未必喜也摯皇  
恐不能对壬午摯上奏乞外任奏入不报癸未枢密院奏事己丑嵩叟言昨有短奏具陈  
不知曾经圣览否臣区区不为一刘摯苏辙为陛下惜腹心之人难得去了一个无一个  
也宣谕曰垂帘之初刘摯排斥奸邪殊有功朕极重之乃闻与邢恕柬延接章惇子弟面  
诘之果如此朝廷责人却潜通消息嵩叟曰章惇使刘摯分付宰相亦牢笼不得又宣谕  
曰朕亦不深罪为垂帘初有功但此事不当作尔嵩叟曰言事官未必皆忠直闻杨畏乃  
惠卿面上人知彼用意安在但欲去除陛下腹心之人便是与奸邪开道路耳甲申嵩叟  
又言刘摯真陛下腹心之人也今大奸未死人心危疑朝廷之上与之为敌摯为首焉一  
旦以小愆遂将疎弃天下之心不知妄意陛下之口有所变易谓反与大奸邪报仇前日  
陛下用摯作宰相奸党自然消伏今得罪累日羣邪相顾已复增气苏辙之进与摯大约  
相类皆众人之所系望而奸党日所忌嫉者顾其去就岂不重哉夫奸谋难防自古公患  
莫不因人主意有所动急为倾挤陛下于此不可不察窃闻御史杨畏乃惠卿门人又受  
张璪知遇最深舒亶作中丞举为台官再除御史公议沸腾交章排斥命遂不行自此愤  
疾正人常有报复之意后又因赵君锡无所执持为人所使便再三荐除此职谏官虞策  
亦是张璪面上相知之人常受璪之力为论荐陛下诚将此本末考究还可保其无他意  
否时已有诏鎖学士院草麻制罢摯而嵩叟未知也十一月戊子刘摯罢相麻制过门下  
给事中朱光庭封还言摯有功大臣不当无名而去言者指臣为朋党并被逐不辞故光  
庭与摯俱罢□□御史安鼎知绛州从其请也劾苏辙不当故出十二月翰林学士梁焘

言今日为政之要在于辨邪正之实略云李德裕尝为武宗言曰陛下辨邪正專委任守之以定则朝廷必理此真宰相之言也蓋意不定则奸邪得以乘隙而进惑乱聪明也一移其意则忧患从而起尚何致治之望乎圣心从来知其为正人者固不多也愿记其尽心宣力终始保全勿使小动摇也如有离间毁谤构陷之言此是动摇之计愿陛下自信素知之心守之以定保辨奸邪之说断之以不疑斥其邪人以安正人正人知所归恃以无恐得以奋忠竭节毕身圖报则朝廷之理不难致也贴黄又云欲举羣臣之二三莫若言路用纯一之臣愿陛下用素所知之正人常在言职风采凛凛为中外所敬惮者处以言官之长其心一忠于两宫其言大公于朝廷使四方仰之国势增重奸邪小人望风自然消退大臣小臣肃然守正莫不纯一无烦圣虑矣惟陛下早定圣断意在必行可救今日之弊七年春丁未刘摯改知大名府中丞郑雍御史杨畏殿中侍御史吳立礼俱有言除知郑州諫官论程颐【见伊川门】王嵩叟为端明殿学士知郑州以侍御史杨畏言嵩叟天资至险强愎徇情父子预政货赂公行监察御史黄庆基言嵩叟废法徇私强狠自用父荀龙子横交通货贿窃弄威福而嵩叟遂称疾章再上故有是命八年二月己巳天章阁待制林希除礼部侍郎御史来之邵言希行谊浮薄不可处之侍从三月苏颂罢相以台章论颂稽留制书黄庆基又言范百禄与颂同系中书商议除授不当自合均任其责因言百禄四罪百禄亦乞罢免诏不允己巳黄庆基言近论奏中书侍郎范百禄朋比欺罔狠愎自任援引党与皆其显然事迹昨罢刘摯王岳叟朱光庭孙升韩川王巩而后其党始衰然而洛党虽衰川党复盛百禄之亲戚朋友近远皆在权要陛下可察而知也今因罪状明白早赐罢免以离其党与庶使当路有所惮辛卯中书侍郎范百禄奏蒙赐诏书依旧供职国法有常人言可畏虽恶之明不惑而愚臣之分难安伏望圣慈亟加必罚以杜小人之祸以警在位之臣诏以百禄为太中大夫充资政殿学士知河中府门下侍郎苏辙奏近以御史董敦逸言川人大盛遂具札子及面陈本末蒙德音宣谕深察敦逸之妄以臣言为信臣德望浅薄言者轻相诬罔若非圣明在上心知邪正所在则孤危之踪难以自安窃详敦逸所言谓冯如晦事乃其前状所言之一则其余事不可不辨遂乞一一付外施行复蒙再三宣谕谓其它别无实事惟圣恩深厚知臣愚拙曲加庇护仰涵恩造死生不忘然臣忝备执政知人言臣过失而默然不辨实难安职陛下爱臣之深而不令臣得知敦逸所言臣窃有所未喻也若敦逸所言果中臣病何惜使臣引失以谢朝廷若敦逸所言不实亦使臣畧加别白然后出入左右粗免愧耻如不蒙开允非所以为爱臣也所有敦逸言臣章疏伏乞早赐付外施行敦逸又言川人太盛苏辙范百禄各有奏举主张差除之人惟苏轼为多高丽罪书得旨而后苏轼见拒而罢黄河闸堰之事陛下已降之命苏轼拒而罢窃惟苏颂范百禄以稽留制书朝廷亦已施行若轼与辙岂惟敛恩作福朋党不公又拒违君命语其情犯非颂百禄之比释而不治命令轻矣乙亥苏辙又言董敦逸诬罔伏望早赐施行辛卯敦逸与黄庆基皆罢坐言苏轼辙不当也五月壬辰董敦逸四状言苏辙庆基三状言轼吕大防奏敦逸所言三省皆以为非辙之



罪庆基言轼曰轼昨知颍州日违法令都监置簿拘收赏钱不依条例妄行赏罚及失入丁真配罪见系京西路提刑州司按法取勘子系官吏轼已移扬州又入为兵部尚书矣乃敢越幕申陈致朝廷徇其所请将监月按法公事指挥不得助勘致令迁延该赦考轼之意特欲姑息小人盖庇旧吏以沮坏法令而已轼前知杭州日有百姓颜益受纳官不肯领绢率众人论诉非有大过也轼不遵法令判令刺配虽常自劾蒙朝廷赦轼罪而人臣乃欲恣喜怒而出入人罪原其不遵法令之意盖有轻蔑朝廷之心其不忠之罪大矣轼自进用以来援引党与分布权要附丽者力以荐扬违忤者公行排斥昨荐王巩既除宗正寺丞近荐林豫自东排岸不问资序遂差知通判军前者除张耒为著作郎近者除晁补之为著作佐郎轼力为援引遂至于此至如秦观亦轼之门人也素号猥薄昨除秘书正字既用言者罢矣犹不失为校对黄本书籍是以为奔竞之士趋走其门者如市惟知轼而不知有朝廷也近者高丽人使乞赐书籍此乃祖宗故事且屡尝赐书与之矣轼乃拒违诏旨极言不可及都省批进礼部全吏人上簿固非重责也轼乃盖庇吏人力陈强辨期必胜而后止轼在先朝至为歌诗谤讪朝政有司推治实迹具存众皆以为罪在必死独先帝怜之止上从轻典送黄州安置轼不能感戴厚恩而乃内怀怨望二圣陛下临御之初以轼为中书舍人越因制造公然指斥先帝时事畧无忌惮将欲刺讥先帝以摅平昔之愤尔轼行李之纯除河北都转运使诰有劳来安集之语是以厉王之乱议先帝也轼行苏颂除刑部尚书诰有盗贼多有是以武帝之暴议先帝也轼行刘谊知韶州诰云尔昔为使者亲见民病尽言而不讳阨穷而不闵安知有今日之报乎夫刘谊得罪于先帝自以职在奉行法度有所不至当公论之而乃张皇上书用此罢江西提举安得有尽言乎至于安知有今日之报此语尤不忍闻陛下奉承宗庙当有以显扬先帝之鸿业休德岂欲报先帝得罪之人乎轼行唐义除河北运使诰云朕修赋役之法黜聚敛之臣去薄从忠务以养民夫先帝立法岂不欲养民是指先帝之不能养民也今以为黜聚敛之吏是指先帝用聚敛之吏也轼行贬吕惠卿诰云苟有蠹国以害民率皆攘臂而称首夫先帝立法乃欲与天下同利岂有先帝之圣神英睿冠绝百王如此而乃肯从蠹国害民之谋乎轼所行制造皆在舍人院陛下试取而观之盖有声说述不尽者臣请以常人论之对人之子骂人之父犹且义不胜诛况轼代王言而实诋先帝按之以法当如何哉至如结托常州宜兴县李去盈强买姓曹人抵当田产致其人上下论诉望赐英断上以释先帝之谤议次以正今日之典刑又言曰治天下必先于正朝廷正朝廷必先于破朋党自非明足以察微公足以兼听睿足以独断者未有不为奸邪所蔽也臣近言礼部尚书苏轼已歷疏其所为矣窃见门下侍郎苏辙怀邪徇私援引党与怙势曲法务与其兄相为肘腋以紊乱朝政轼则外许人差遣而公荐之辙则内为之应而引用之按轼与吕陶交结至厚昨者荐陶自代遂除为起居舍人近日中书舍人陈轩缘馆伴高丽人使请赐书籍事轼恶轩之不附己也遂公奏于朝力加排诋意欲轩补外乃迁陶为中书舍人轼知颍州日赵令时为本州岛金判轼与之往还甚密轼乃公荐于朝称其才美访闻

苏辙见议除令时差遣肆其欺罔之罪大国子司业赵挺之为御史日屡言轼不公事迹轼居礼部统藉国子监日务捃摭太学中意欲沮抑挺之使之补外访闻苏轼见议除挺之为转运副使以同列商议未敢进呈太府寺丞文绩以篆字游于轼之门初不以公正史才称也轼既援引辙遂除为福建路转运判官冯如晦为夔州路转运使日按发公事不当见系御史台推治未结絶间辙以川人遂除馆职差知梓州近断勅方下如晦虽以法夺官而差遣与职竟不动也赵高帅郾延日欲弃熙河而不敢献议乃以书抵大臣是时辙为中丞得其书即为论列赖谏官刘唐老疏其交通诬罔之迹谋遂不行前日臣尝言执政不务叶和凡欲行一事除一差遣商量日多不能合甚者几于纷更极伤国体盖辙欲进其党与故众论不肯相从尔轼尝自言陛下称其兄弟孤立以为必不疑也是以敢交结党与而无忌惮又其党言陛下许轼大用以为必见信也是以士大夫莫不争趋其门以图进取上下倡和合为一党牢不可破且人臣事君惟有忠信耳一涉于欺罔则终身不可以诚信委之按辙荐王巩累数百言陛下真以为可用也既而淮南提点刑狱司根究王巩在任日秽恶狼籍实迹具存遂谪为监当而辙亦恬然自若絶不引咎程之邵辙之表弟也昨任夔州路转运判官按知云安军孙拱与之邵互论见系推治未见曲直乃除之邵为都大提举茶事至如轼之罪恶因行制诰公肆刺讥以法论之指斥乘輿罪在不赦而况指斥宗庙乎陛下试观轼辙所为一失控御何所不至于是大防辙奏曰庆基言轼所撰李之纯等六人诰文涉讥毁先帝其间陆师闵诰系范百禄词非轼所撰臣窃观先帝圣意本欲富国强兵鞭挞四夷而一时羣臣将顺太过故事成失当及太皇太后与皇帝临御因民所欲随事救改盖事理当然尔昔汉武帝好用兵重斂伤民昭帝嗣位博采众议多行寝罢明帝尚察屡兴惨狱章帝改之以宽厚故当时天下多悦服未有以为毁谤先帝者也如本朝真宗皇帝即位弛逋欠以厚民财仁宗即位罢修宫观以息民力凡此皆因时施宜以补助先朝阙政亦未闻当时士大夫有以为毁谤先朝者也近日元佑以来言事官有所排击多以毁谤先朝为辞非惟中伤士人兼欲摇动朝廷意极不善若不禁止久遠不便辙又奏兄轼吕惠卿诰非讥毁先帝臣闻先帝末年亦自深悔已行之事但未暇改尔元佑初改正追述先帝美意而已太皇太后曰先帝追悔往事至于泣下当时大臣数人其间极有不善不肯谏止吕大防曰闻永乐败后先帝尝曰两府大臣畧无一人能相劝谏然则一时过举非是先帝本意明矣太皇太后曰此事皇帝宜深知大防曰皇帝圣明必能察照此事于是得旨敦逸庆基并为知军差遣二人既责苏轼以札子自辨曰臣自小年从事以来以刚偏疾恶尽言孤立为累朝人主所知然亦以此见疾于羣小其来久矣自熙宁元丰间为李定舒亶辈所谗及元佑以来光庭挺之贾易皆以诽谤之罪诬臣前后相传專用此术其间有闕臣子之大节不可不辨臣先任中书舍人日适值朝廷窜大奸数人所行诰词皆是元降词头所述罪状非臣私意所敢增损内吕惠卿自前执政责受散官安置诛罚至重当时蒙朝旨节录台谏所言惠卿罪降下既是词头所有则臣安敢减落然臣子之意以为事涉先朝不无所忌故特于诰词

内分别解说令天下晓然知是惠卿之奸而先朝盛德之累至于窜逐之意则已见于先朝其畧曰先帝求贤如不及徙善如转圜始以帝尧之仁姑试伯鯀终焉孔子之圣不信宰予发其宿奸谪之辅郡尚疑改过稍畀重权庆陈罔上之言既有殒山之贬反复教戒悉心不悛躁轻矫诬德音犹在臣之愚意以谓古今如鯀为尧之大臣而不害尧之仁宰予以孔子高弟而不害孔子之圣况再加贬黜深悉其仁皆先朝本意则臣区区之忠言自谓无负矣今庆基乃指以为诽谤指斥不亦矫诬之甚乎其余诰词皆是庆基文致附会以成臣罪如其间有劳来安集之四字乃便云是厉王之乱若一一似此罗织人言则天下之人便不敢开口动笔矣孔子作孝经曰如临深渊如履薄冰此幽王之诗也不知孔子诽谤指斥何人乎此风开于朱光庭盛于赵挺之极于贾易庆基复宗师之臣恐阴中其害渐不可长非独为臣而言也又庆基言臣行陆师闵告词云侵渔百端怨讟而作亦谓之谤讟指斥此词元不是臣行中书案底必有主名可以覆验所谓侵渔怨讟者意亦指言师闵而已何名为谤讟乎又庆基所言臣妄用颍州官钱此事蒙尚书省勘会然所用皆是法外支赏令人告强恶贼人及逐急将还前知州任内公使库所少贫下行人钱物情理如此皆可覆验又庆基所言臣强买常州宜兴县姓曹人田地八年州县方与断还此事元系臣团练副使日罪废之中托亲戚投状依条买得姓曹人一契田土后来姓曹人却来臣处昏赖争夺臣实时牒本路转运司令依公尽理根勘乃使具状申尚书省后来转运司差官勘得姓曹人招服非理昏赖依法决配其依旧合是臣为主牒照会臣愍见小人无知意在得财臣既备侍从不欲与之计较曲直故于招报断遣之后却许姓曹人将元价抽赎仍亦申尚书省及牒本路施行今庆基乃言是本路断还本人显是诬罔今来公案见在户部可以取索案验又庆基所言臣在颍州失入丁真死罪此事已经刑部定夺不是失入却提刑蒋之奇妄有按举公案具在刑部臣窃料庆基所诬臣者非一臣既不能尽知又今来朝廷已知其奸妄黜罢其人臣不当一一辩论但人臣之义以名节为重须至上烦天听也太皇太后令辍谕曰缘近来众人正相招拾且须省事轼乃具札子称谢曰天慈深厚如训子孙委曲保全如爱支体感恩之涕不觉自零伏念臣智短数奇性疎少虑半生犯患垂老困谗非二圣之深知虽百死而何赎伏见东汉孔融才疎意广负气不屈是以遭路粹之冤西晋嵇康才多识寡好善爱人是以遇鍾会之祸当时为之扼腕千古为之流涕臣本无二子之长而兼有古人之短若非陛下至公而行之以恕至仁而照之以明察消长之往来辨利害于疑似则臣已下从二子游久矣岂复有今日哉谨当奉以周旋不敢失坠便须刻骨岂特书绅庶全蝼蚁之躯以报丘山之德六月己未遣勾御药院李倬赉诏赐观文殿大学士太中大夫知颍昌府范纯仁令乘驿赴阙先是侍御史杨畏言外议以苏颂初罢恐必用尚书右丞同知枢密院事二人而已一则天资褊狭非有疎通济务之才且狗已强愎未必无怀恩报怨之意一则品业节操材望之类一切未见可取只缘联姻戚而处本兵中外已籍籍不平况宰相任乎右丞郑雍同知枢密韩忠彦于是闻将以纯仁为右仆射畏又言治天下者赏罚号令而宰相佐



人君出赏罚号令以示至公也纯仁去岁帅太原府令边无状上下失备而贼乘之犯麟州蹂践万里死者数万人方罢帅降官名在谪籍而陛下遽命以为相是赏罚不正而功罪未判以为功则罪籍未除以为罪则未应除召况为相哉陛下命相而赏罚未明何以昭示天下哉自是七疏不报监察御史来之邵言纯仁师事程颐闇狠不才于国无补及纯仁至畏又言纯仁自颍昌被召未入见而张盖过内门为不恭太后皆不听或曰畏与轼俱蜀人前击刘摯苏颂皆阴为辙地太皇太后觉畏之意故复自外召用纯仁畏寻又言辙不可大用苏轼乞越州除知定州上言天下治乱系于下情通塞听政之始当以通下情除壅蔽为急务吕陶论元丰小人【见宣仁门】范祖禹奏章惇不可用【见辅导哲宗门】

太平治迹统类卷二十三

●钦定四库全书

太平治迹统类卷二十四

（宋）彭百川 撰

元佑党事本末下

元佑八年十一月先是吕大防欲用侍御史杨畏为谏议大夫要范纯仁同书名进拟纯仁曰上新听政谏官当用正人畏倾邪不可用大防素称畏敢言且先密约畏助己谓纯仁曰岂以畏常言公邪苏轼时在旁因诵畏弹文纯仁曰纯仁初不知也然除目不敢预闻遂固求避位大防竟超迁畏为礼部侍郎纯仁恐伤大防竟不复争畏寻上疏言神宗皇帝更法立制以垂万世乞赐讲求以成继述之道上即召畏登对询畏以先朝故臣孰可召用者朕皆不能尽知其详具姓名密以闻畏即疏章惇安焘吕惠卿邓温伯李清臣等行义各加品题且密奏书万言具言神宗所以建立法度之意乞召章惇为宰相上皆嘉纳焉十二月己未权给事中吴安诗言章惇除资政殿学士差遣依旧所有录黄未敢书读行下诏依前降指挥

绍圣元年二月丁未户部尚书李清臣守尚书侍郎兵部尚书邓温伯守尚书左丞清臣首倡绍述伯温和之乙亥吕大防知颍昌府后二日改知永兴军大防位宰相踰六年羣怨交归及宣仁圣烈姑祔庙御史来之邵乞先逐大防以破大朋党因疏神宗所简之人章惇安焘吕惠卿等以备进用大防亦求去位上亟从之三月苏辙依前官知汝州先是辙言臣伏见御试策题歷诋近岁行事有欲复熙宁元丰故事之意臣备位执政不敢不言然臣窃料陛下今无此心其必有人妄意陛下牵于父子之恩不复深究是非遠慮安危故劝陛下复行此事所谓小人之爱君取快一时非忠臣之爱君以安社稷为悦者也臣窃惟神宗皇帝以天纵之才大有为之志其所设施度越前古蓋有百世而不可改者矣臣请为陛下指陈其畧奏入不报辙言臣近以御试策题有欲复熙宁元丰政事之意寻具札子论先帝所立政事见今遵行已自非一其间事有过差元佑以来随宜修政以安天下者正是子孙孝敬之人未审陛下以臣言为然否议者谓元丰之事有可复

行而元佑之政有所未便臣愿陛下明诏臣等共商议见其可行而后行审其失而后罢深以生民社稷为意勿为此忽则天下之幸也辙既再具札子上固不悦李清臣邓伯温又先媒孽之及面论上益怒遂责辙曰人臣言事何所害但卿昨奏谓机事不可宣于外宜秘而不出今乃对众开陈但以汉武帝事上比先帝引喻甚失当辙曰汉武帝明主也上曰卿所奏称汉武帝外事四夷内兴宫室立盐鐵榷酤均输之法其意但谓武帝穷兵黩武末年下哀痛之诏此岂明主乎辙恐动趋下殿待罪上声甚厉范纯仁独进曰史称武帝雄才大畧为汉七制之主辙果以比先帝非谤也陛下亲政之初进退大臣当以礼不宜如此急暴上怒稍霁辙举笏谢纯仁曰公佛地位人也归家亟具奏曰今者偶因政事怀有所见辄欲倾尽以报知遇而天资闇冥不达机务论事失当冒犯天威不敢自安伏乞圣慈怜臣不识忌讳出于至愚少宽刑诛特赐屏逐以允公议诏苏辙除端明殿学士知汝州吴安诗以行苏辙制词不当罢起居郎夏四月左朝散郎张商英为正言商英前自开封府推官出为河北西路提点刑狱元佑四年五月改江南西路转运副使又徙淮南踰五年不复召于是始擢谏官故商英攻元佑大臣不遗余力商英常奏疏论风俗曰我神考发明道德之意以作成人材同一风俗大志未集神灵在天宣仁圣烈太后保佑陛下托心腹于辅弼寓视听于台谏而势利之下是非蠹起阿谀附会一旦乌合或上叛君亲之恩或下背师友之训或小合传緘白昼告急或手扇障面交半造门或包苴结私第之欢或伏地修门生之敬于是浮言竞作鄙诈交兴川洛异党秦汶分朋拨而后动谓之平字大而无见谓之青大虽交通相纽谓之八闕阴私架造谓之五鬼谁何门户谓之纳闹抱待具足谓之小鬼舍所亲而去谓之过房失所合而还谓之归宗伺察报探谓之灭门臣愚欲愿陛下以臣此章降手诏戒励揭之朝堂风示四方庶几薄恶之风浸息醇醲之化日孚易曰君子以居贤德善俗其在兹时乎庚戌曾布为翰林学士蔡京权户部尚书黄履为龙圖阁直学士壬子御史虞策言吕惠卿等指陈苏轼作诰词语涉讥讪望劾实施行殿中侍御史来之邵言轼臣先朝久以罪废至元佑擢为中书舍人翰林学士轼凡所作文字讥斥先朝援古况今多引衰世之事以快忿怨之私行吕惠卿制词则曰忿建青苗次行助役均输之政自因商贾手实之祸下及鸡豚苟有蠹国而害民率皆攘臂而称首行吕大防制诏则曰民亦劳止愿闻休息之期撰司马神道碑则曰其退如洛如屈之陂泽凡此之类播在人口者非一当原其所犯明正典刑制诰落端明殿学士兼翰林侍读学士依前左朝奉郎知英州制词中书舍人蔡卞所草也范纯仁言臣方在病假仍乞罢免朝廷之事不合与闻然有未尽之诚上覬少裨圣听窃见全台言苏轼行吕惠卿诰词言涉诅谤伏缘熙宁法度出于谏议之臣又州县奉行之际多有过当轼因行辞之际遂至过诋惠卿令台章览归先朝于事体不便况今来言者多是垂帘时擢居言路之臣当时畏避不即纳忠今日观望始有弹奏若便施行其说亦恐玷垂帘之明圣妨陛下纯孝之至德高士敦昔在成都曾有犯罪来之邵曾任本路监司畧无举发及至太皇上仙高士敦特肯改官来之邵方以前事弹奏又苏轼方执政时曾为人所弹击言

者寻皆黜谪当时台谏畧不辨明及苏辙得罪便云所谪太近吐刚茹柔率多此类使朝廷赏罚过中莫不由此又言吕惠卿上谪时李清臣方为左丞若言涉讪谤清臣岂肯书诰行出今旧臣惟有清臣在此更乞询访不听范祖禹为龙图阁直学士知陝州先是祖禹屡请补外上曰不须入文字执正官有阙明苏辙责改州祖禹再上章请郡不许盖欲以祖禹代辙也既而沮之者甚众祖禹固求出乃有是命虞策言苏轼罪罚未当诏轼降充左丞议郎闰四月戊寅新差提举荆南湖路常平茹东济仍旧通判沧州言者论东济常露刘摯私简以示杨畏险薄无行人所不齿故也甲申安焘转一官为门下侍郎乙酉吕惠卿知苏州刘拯言宣仁常谓宰相曰编修实录官毋任先朝曾责降者盖虑谤书一成不可改追也是时权臣擅政虽差邓温伯陆佃林希曾肇以应宣谕已而遂去以吕公着之壻司马光之门人范祖禹苏轼之门人张来秦观代之至于吕公着常平法失天下心若韩琦因人心如赵鞅举甲以除君侧恶人不知陛下何以待之先帝恐其诬忠以胁君也令词臣明言其故黜知颍州闻公着提举实录曰谓无此语令史官改之请重审阅其间书不以实辄移易增减情涉诬诋以闻乞重行黜责以正国典从之又言苏轼敢以私忿形于诏诰中厚诬丑诋轼于先帝不臣甚矣王德谦愤其诬诋之甚上书言之旋被遣斥以死秦观浮薄小人影附于轼前请轼之罪褫观职任以示天下后世诏苏轼合叙复日不得与叙复秦观落馆阁校勘添差监处州茶盐酒务左正言上官均言臣窃见宰相吕大防天姿强很怀邪逆国常与御史中丞苏辙阴相依附同恶相济伏愿陛下察究本末出自睿断特加施行以明示朝廷好恶判别忠邪以正纲纪然后朝廷尊而天下安此国家先务惟陛下畹神采择五月章惇请责弃地议臣司马光文彦博而下凡十一人张商英请责降合祭议臣章惇擅政恶闻上官均异论罢其言职己未侍郎杨畏为吏部侍郎吕大防既超迁畏礼部侍郎畏知大防当去章惇必复用时惇居苏州有张横者惇妻之侄也惇方丧其妻横往吊畏先托横致意云畏度事势轻重因吕大防苏辙以逐刘摯梁焘辈又欲并逐大防及辙二人觉知遽罢畏言职畏迹在元佑心在熙宁元丰首为公阔路者及惇赴召百官郊迎畏独请间畏自陈述语多质大防有直省官闻之叹曰杨侍郎前日谄事吕相公亦如今日见章相公也惇信其言故有还迁畏吏部六月御史黄履言吕大防刘摯梁焘当垂帘日俱为柄臣焘先鼓唱邪言吴居厚继陈诗注刘安世等遂共攻之执政既主于中仍役蔡确岭外累遇恩沛不令生还家有慈亲终不可得见死非其罪中外愤叹自陛下躬临机务洞照奸诬浸复擢官于泉壤窃谓遭横逆者既伸忠愤力排陷者未正典刑宜加显黜以允公议左司谏翟思言吕大防等擅作威福相与诬窜吕惠卿蔡确乞各正罪犯至今未闻施行窃以治道莫要于辨忠邪莫先于明赏罚忠虽见赏而邪不加罚则无以消伏奸慝望出睿断以慰公议左正言上官均言近具札子论奏前宰相吕大防苏辙擅操国柄不畏公议引用柔邪之臣如李之纯擢为御史中丞杨畏虞策来之邵等皆任为谏官御史是四人者倾险柔邪嗜利无耻其所弹击者皆受吕大防苏辙密谕或附会风旨以济其欲窃覩陛下自亲机务收还权柄其大防辙党



人十去其七八然杨畏等六人尚居清要未快士论伏望陛下察考吕大防苏辙擅权欺君之罪推究杨畏等朋邪害正趋时倾覆之恶谴责黜免正典刑以示天下右正言张商英言先皇帝盛德大业超絶今古而厌代之后司马光吕大防吕公着刘摯又援引朋党以行机议至如罢免役法则曰有揭簿定差四字下诏求直言则专赏讪谤之人置诉理雪罪犯则尽自熙宁元年以后弃渠阳州县则甘言猥语无所不至凡详定局之所建明中书省之所勘会户部之所行遣言官之所论列词臣之所告命指摘扶剔鄙薄嗤笑当垂帘之际内臣之得志者剪除陛下羽翼于内执政之用事者击逐陛下股肱于外天下之势殆哉岌岌乎望陛下三省禁中检会前后章疏付臣看详签贴奏上陛下与大臣斟酌而可否焉张商英吕惠卿讼蔡确之冤刘极请复蔡确官从之又言吕大防八罪诏吕大防降知随州侍御史来之邵言先皇帝熙宁初属任宰相王安石造立法度以惠泽天下后世司马光入持政柄擢刘摯为侍御史王嵩叟朱光庭引在言路结成党羽宰相自确而下尽力排逐先帝顾命大臣去之畧尽而陛下孤立于上矣先朝法度次第废革先帝二十年积功累行为之一空矣以先朝赏罚为不中理则悉听诉理刘摯罪无轻重率从原减由是先帝擢用之人往往闲废而光之党分布中外矣以先帝财用为得之非义则凡市易贷缗不以本息一切损放如何比积米九百万斛一日散之几尽凡此者出于司马光之意而假以刘摯王嵩叟朱光庭之言方是时先帝陵土未干而光等更唱迭和划革扫除忠臣义士熟视而吞声无敢谁何光与嵩叟光庭相继死亡独刘摯未殒灭者此实天所以遗陛下今刘摯尚以观文殿学士外领藩镇久稽天诛士论斯郁望暴摯之罪明正典刑上以伸先帝之志下以塞缙绅之望刘摯落学士知黄州御史周秩言摯责怒故也苏辙降知袁州轼惠州安置御史来之邵言轼讥斥先朝故也乙酉中书舍人林希言吏部送到吏部侍郎王钦臣可授竇文阁侍御知制庐州词头按钦臣资性险邪本缘傅会宰相吕大防以致进用大防皆抑而不行大奸方斥余党改窜遂肃清仕路钦臣岂可加以侍从职又付之方面之寄所有制词臣未敢撰进诏王钦臣除集贤殿修撰知和州监察御史刘拯言吕希哲学术无闻出于奏补岂能为陛下发明道德之蕴伏望为官择人别与差遣林希言吕希哲出知怀州左司谏翟思言吕大防刘摯苏轼苏辙以讪谤先朝变乱法度擅作威福褫职夺官谪守方州安置岭表中外闻命举皆欣快然司马光吕公着首事发端虽已终牖下赠官美谥自可追夺王嵩叟与摯同恶相济若假以年当窜远域则赠官与子孙恩泽亦当追夺其合志同事有若文彦博范纯仁其背公死党有若安焘刘安世呉安诗韩川孙升等乞各正典刑右正言张商英言宣仁圣烈皇后奉承顾命保佑陛下惟仁旧居深宫惟亲帷慈政事惟公惟惠何常预知吕惠卿擅兴兵甲蔡确贪天之功作诗讪谤等事言臣本以惠卿与司马光争经义有隙构其事以媚光人虑蔡确异时再用必欲杀之以灭口出危语激怒帘箔表里相济行其奸言殛确于新州窜惠卿于建州夫以太皇太后之公平慈惠而羣臣乃导为淫刑滥罚贬死宰相使此曹易地而立于吕武之朝则何所不至哉乞检会禁中臣僚草疏吕惠卿蔡确本家进状集

台省官杂议如事出谗构则诬告反坐邦有常刑夫元恶有臣无君亦已甚矣擢其髮而数之不可胜诛陛下虽欲置而不行如宗庙法令何如天下后世何商英又言梁焘范祖禹吳安诗刘安世刘唐老孙升韩川等当元佑初中伤无罪合行窜责焘知鄂州安世知南安军安诗监兖州酒税川知坊州升知房州三省言昨提举修实录吕大防奏仁宗皇帝实录今已成书欲望依例除定本外将见在草沓各一本与提举实录官以备照证外余依前降指挥焚毁元佑六年十月十一日朝旨依诏令吕大防范祖禹将所得草沓封角差得力人管押递铺送赴修国史院送纳如有传写到别本亦同封角送纳或转写与他人即令自陈如辄隱留当行重贬责周秩言恐实录诬罔诸书传后故也三省以周秩所上三章进呈其一曰臣自待罪言职闻奸人邪说久矣其害于政事者有五陛下亲政以来天下之人莫不鼓舞而怀不自安惟元佑死党三十余人而已刘摯恶党已为大防轼辙之党排斥出外今在朝廷者絕微矣惟大防恶党半已出外半犹在京其禁中者近日稍稍逐去其在朝廷者方且日夜经营造谤害事今陛下欲修先帝大业若不尽去恶党则必作奸谋起事端中伤陛下信任之人去草必尽其根勿使滋蔓进读秩章上曰此是何言也宫官有何不可为执政所言亲王私于权臣此尤非也使徐王闻之且不自安如秩趣操甚狂言不中理若置之言职朝廷无安静之理其罢黜之执政初欲换省官上曰与外任遂以守广德军谏官张商英言吕希纯于元佑中常缴驳词头不当及附会吕大防苏轼事上曰去冬以宫中阙人使令因召旧人数辈此可击外廷利害而范祖禹丰稷文及甫并有章疏陈古今祸福以动朕听希纯等又缴奏争之何乃尔已安焘对曰闻文及甫辈上书亦为人所使上曰必苏辙也会中书舍人林希言吕希纯常草宣仁圣烈皇后族人近官诰有曰昔我祖妣正位宸极其言失当及变乱祭祀礼文荐牙盘食等数事乃夺希纯寶文阁待制知亳州如故三省言范纯仁韩维朋附司马光长纵羣凶毀讪先帝变乱法度以肆不逞之心内范纯仁仍首建弃地之议滋养边患诏纯仁特降一官为通议大夫差遣如故韩维已致仕特置不问台御史中丞黄履言前宰相司马光垂帘初朝廷如光执政当时士论翕然称之以谓光真能弼成圣德上报先帝不谓光深藏很戾追忿先朝凡事所行皆为是非夫法令法因革固缘时宜岂有一代宪章俱无可取归过于昔劫誉于身此而可容孰为赴者昔唐太宗以封伦稔恶身后始彰美谥赠官尚加追夺伏望以今仿古详酌施行商英又言乞重行刘摯等罪又言王存吕大防为公着志神道碑诬谤宗庙乞并行法御史周秩言司马光视先帝如讎谥曰文正非所以劝后世当正谥号之美恶以惩后世秩又言吕公着不能救正司马光但为子孙急于富贵不避嫌疑而居之及大防刘摯苏轼苏辙皆公着所引为国大奸陛下若不照其奸罪以明天下则公着所处皆为国朝故事以引后世大臣僭窃之祸又言吕大防刘摯苏轼皆落职为知州缘臣奏论大防等所为皆大奸恶今朝廷但薄责而已臣愚以为陛下必欲薄责之则不当以其所论事为罪名若录其私营不法则其罪不可胜数且摯与辙讥斥不减于轼大防又用轼之所谋所言而得罪轻于苏轼天下必以为非诏司马光吕公着各追所

赠官并谥及追所赐神道碑额王嵩叟所赠官亦同追夺知随州吕大防降知黄州刘摯知兖州苏辙知筠州梁焘鄂州居住刘安世南安军居住初章惇用蔡卞议光及公着皆当发冢斲棺三省同进呈许将独不言惇等退上留将问曰卿不言何也将曰发冢斲棺恐非盛事上曰朕以为无益公家遂寝其奏第令斥去碑文秩又言秦观罪重责轻人言未允处州监当右正言张商英言伏闻吕大防降官知随州内臣陈衍降官监当按衍乃陛下家奴敢与宰臣学士交通干预大政诏陈衍傲很不恭威行宫省遇事専肆多不闻奏同类畏之莫敢指目据其罪恶当伏重诛姑示寛仁未欲寘之极典可追毁出身以来文字除名勒停送白州编管仍抑所在官司差得力人转押前去戊午诏曰送往事居是必全责于臣子藏怒宿怨岂宜上及于君亲朕继体之初宣仁圣烈皇后以大母之尊权同听览仁心诚意専在保佑朕躬自以帘帷之间闻见不能周及故不次以用大臣推心以委政事非独倚任耆艾所冀恢昭圣功司马光吕公着忘累朝之大恩怀平时之■〈角央〉望幸国家之变故逞朋党之奸邪引吕大防刘摯等或并自要涂擢司宰事或迭居言路代掌训词或封驳东台或劝请经幄于左右前后皆尔所亲于时赏罚恩威惟其所出周旋欺蔽表里同符宗庙神灵恣行讪谤朝廷号令辄肆纷更有首信偏词轻改役法开诉理之局使有罪者侥幸下疾苦之诏诱羣小之言诬横斂则滥蠲苟免之逋诬厚藏则妄耗常平之积崇声律而薄经术任穿凿而紊官仪弃境土则谬谓和戎弛兵备则归过黷武城隍保民而罢增浚器械资用而缀缮完凡属经纶一皆废黜人才漓混莫辨于品流党与纵横迭分于胜负务快乘时之愤都忘托国之谋方利亮闇之不言殊非慈闈之本意十年同恶四海吞声敌计得行边方受害昔周王受命召公维辟国之师江右虽微兴宗有易代之叹天下后世其谓朕何朕临朝弗庄视古有愧况复疎遠贱士昧死而献言忠义旧臣交章而抗论迹甚着明法安可私其司马光吕公着吕大防刘摯等各已等第行遣责降讫噫优礼近司朕欲曲全于体貌自奸明宪尔今复遁于诛夷至于射利之徒胁肩成市益从申黻俾革回邪推予不忍之仁开示自新之路除已行遣责降人数外其余一切不问议者亦勿复言有所见行取会实录修撰官已下及弃废渠阳寨人自依别勅处分咨尔羣工明听朕命时司马光等既贬上谓刑惟厥中故降是诏右正言张商英言文彦博皆负国恩伏请检详本末推考是非诏台諫之职义当论列然博年及耄期四朝旧相先皇待遇恩礼至厚宜加阔畧以优老臣可特置不问户部尚书蔡京言神宗皇帝熙宁之初将欲有为于天下得王安石而任之于是置条例司选天下英才设官分职参讲其事兴利补弊功烈昭著元佑以来天下用度浸以匱竭美意良法尽遭诋诬在于今日正当参酌旧例考合得宜以称陛下追述先帝之意以成足国裕民之效然事之可兴者方且毛举岂臣单力所能胜任伏望圣慈检会熙宁中置条例司故事上自朝廷大臣下选通达世务之贤共同考究庶几成一代之业以诏万世其后用是置局修整命张康国邓洵武看详利害事八月诏丁忧人范纯粹降一官知延安府以御史郭知章论其在元佑间尝献议弃安强葭芦呉堡米脂等寨故有是命九月翰林学士蔡卞林



希言先帝日歷自熙宁三年三月已后至三年终系元佑中秘书省官孔武仲黄庭坚司马康修纂自熙宁四年已后至七年终范祖禹修纂而黄庭坚司马康范祖禹又皆系修先帝实录官闻所书止与昨修先帝实录相为表里用意增损多失事实缘修国史院已得旨重修先帝实录所有昨来范祖禹等所进日歷臣等伏乞一就看详改正务尽事实使后世考官无所疑惑从之冬十月张商英言愿陛下无忘大臣擅权时章惇无忘汝州时安焘无忘颍昌时李清臣曾布无忘河阳时曾布云臣所不晓或陛下常有绪言上云无之但商英言事多如此过尔十一月御史郭知章黄庆基奏乞贬修神宗实录官甲午三省同进呈台谏官前后章疏言国史院所修先帝实录类多附会奸言诋斥熙宁以来政事乞赐重行窜黜诏祖禹责授武安军节度副使永州安置赵彦若责授安远军节度副使澧州安置黄庭坚责授涪州别驾黔州安置中丞黄履御史翟思左司谏张商英论具修神宗实录官诬毁先帝为臣不忠二年春正月戊戌左司谏张商英言伏见吏部侍郎杨畏反复迹状前后明白不为公论所与遑遑求为自安之计凡立朝之士稍与己情不通者即指为刘摯党人阴行离间如彭汝砺黄裳叶涛之徒是也议者言来之邵所入章疏稍成文理者皆畏代为方今补坏修废肇开端绪而畏不尽革适足为害欲望圣明考言询行进退施行诏吕大防追夺两官赵彦若范祖禹陆佃曾肇林希并追夺一官除林希在职日浅外曾肇与小郡知州陆佃候服阙与小郡知州黄庭坚特追一官常安民言陆佃亦与修书罪同罚异愿考正其罪曾布具札子言毁废先朝法度之人既已黜逐则前日之良法善政当次第讲求增损施行而国论未常及又言政事非得人不能举若但以私爱憎喜怒为意则人才必难进今既不能公选人才则政事何从而举若不稍复可行之法度则是先朝政事不可行若不可行则毁废之人何以得罪上矍然布因言令使役法已行然成书方上而议论无所折衷蔡京王右忠侍从之选然两人所见多不同执政又未通晓其下官属日相纷争众议施恐未易了昨初降役法但云依元丰八年见行条约行则已曲尽及章惇欲立异本去年秋科纳钱遂展至今年五月役人多已替放又却令候今年放罢只失此两科役钱仅八百余万今臣书既上议论不一将来施行必有不便于人情者元佑所行止谓于人情不便今若不便于人情又何以异二月三省具陆佃元修苏利涉等传进呈乃诏曰陆佃乡田诸生致身禁从擢御史事多歷岁时俯仰顺从媵阿泯默曲徇羣奸之意苟幸一身之安尔谓有所建明固未尝争论而去谓尔同为讥讪则于今藁不存进退之间风节无取虽言章沓至众弗与容然罪疑惟轻古有成训姑褫延阁用厌师言勉自省循以称矜贷可落龙圖阁待制依前左朝请郎吕大防再降一官从御史刘拯之言也乙亥给事中黄裳言史院一事乃吕大防倡为之罪不当在祖禹庭坚之下岂可轻恕降授大中大夫分司南京安州居住刘拯又论曾肇陆佃等罪责知滁州三月范纯仁知陈州邢恕知青州八月诏吕大防不得引用期数赦恩叙复九月壬寅范纯仁在陈州闻之忧愤累日斋戒上奏畧曰窃见吕大防等窜谪江湖已更年祀未蒙恩旨久困拘囚其人或年齿衰残或素萦疾病不谙水土血气枯衰骨月分离举

目无告将恐溘先朝露客死异乡不惟上轸圣怀亦恐有伤和气仰惟陛下圣心仁厚天纵高明法大舜之用中建皇极而在宥每颁赦令不问罪辜至于绞斩重囚髡黥徒隶咸蒙赦宥亦许放移岂有股肱近臣簪履旧物肯忘轸恻常俾流离但虑一二执政之臣责其往事嫉之太甚启迪之际不为详陈若非宸衷独断圣虑详思灼见本根绝其萌渐屏猜嫌之迹特垂旷荡之恩皆因大礼赦文遂令逐便居住使得自新改过免为羈旅之莹魂奏疏三上批范纯仁立异邀名落职知随州壬戌诏御史常安民立心凶险处性颇邪置之要路诚非所宜可罢职与监当差遣安民又上言今大臣为绍述之说者其皆实借此名以报复私怨一时朋附之流从而和之遂令已甚张商英元佑时上吕公着诗求进其言谀佞无耻士大夫皆传笑之及为谏官则上疏乞毁司马光吕公着神道碑周秩在元佑间为太常博士亲定司马光谥为文正及近为言则上疏论司马光吕公着乞斲棺鞭尸陛下察此辈之言果出于公论乎故凡劝陛下绍述先帝者皆欲托先帝以行奸谋谓他事难以惑陛下若闻先帝则易感动故欲快私仇陷良善者须假此以移陛下之意不可不察今权臣恣横朋党满朝言官未尝一言及之惟知论元佑旧事力攻已去臣僚臣荷陛下提拔不敢负恩摧枯拉朽之事臣实耻为之举朝嫉臣诬陷非一臣赋性愚直恐终不能胜朋党之论愿乞外任以避之上开慰而已御史董敦逸奏安民常称二苏文章之士负天下重望不当弹击此乃二苏之党诏罢御史与知军章惇批诏语送吏部与监当冬十月章惇之贬斥元佑旧臣皆以白帖子行遣安焘李清臣与惇争论不已上亦疑惇惇甚恐雍私语惇曰用白帖子有王安石故事惇大喜取其案牒白上惇遂安议谓雍欲以此结惇也然雍竟罢黜十二月知青州邢恕试礼部侍郎孙谔言杨畏反复落职仍知河中府二年正月御史陈次升言绍圣元年七月十九日责降吕大防等勅牒榜节次云至于射利之徒胁肩成市盍从之士俾革回邪除已行责降人其余一切不问议论亦勿复言近者切见汪浹李重等送吏部与合入差追以元佑所献文字得罪则前件勅牒殆成虚文将何以取信于天下今又闻差官编排元佑臣僚章疏命令如此何以示信于人乎所有编排章疏指挥合行寝罢五月孙谔论役法有妨绍述【见绍述门】六月曾布言常立谄王安石而毁先帝情更可诛陈瓘所以忤卞只陛下但以安石為準绳罗织士类此最为害政况安石之所是勿与先帝不同者非一岂有但以安石为据卞以此得怒而士类莫不以瓘之言为是六月吕大防进职知秦州以元佑中间持边议故也八月丙子诏王嵩叟吕大防等所得恩例及举官并罢梁焘依旧鄂州居住刘世安依旧南安军居住范祖禹责授昭州别驾贺州安置刘世安英州安置因四年上疏论哲宗求乳母事也诏姚勔求不磨勘给事中蹇序辰言其附会诋訾先帝也十二月蔡京辨不附司马光改役之罪【见役法门】四年春诏应绍圣二年十二月十五日类姓名责降人宫观居住及勒停安置分司散官子孙弟侄各不得任本州岛邻州内子孙仍并与次迁远路分合入差遣已授未赴并见在任人并罢庚戌李清臣出知河中府王存致仕恩例只与一名言者指存元佑初论事附会故也三省言司马光吕公着倡为奸谋诋毁先帝

变更法度罪恶至深及凶党同恶相济首尾附会之人偶缘今已身死不及明正典刑亡殁之后尚且优以恩数罪罚未称轻重不伦若谓其已死不问使后世乱臣贼子何以创艾至于告老谢事亦宜少示惩戒沮制畧曰司空吕公着盗窃虚名躐持宰柄谤毁前烈变乱旧章虽窜殛不及其生而惩戒可垂于后可特追贬建武军节度副使仆射司马光阴结中人骤窃宰柄变更良法诋毁先朝潜怀睥睨之邪计欲快倾摇之二心使子孙谬荷国家之厚恩何以为臣子之大戒虽逃显戮当置散司可特贬清海军节度副使故王崑叟厚诬先帝愚弄朕躬力赞邪谋阴怀异志罪恶暴着神鬼得而诛之虽示小惩未协公议可追贬雷州别驾诏赵瞻傅尧俞夺所赠官韩维孙固范百禄胡宗愈遗表恩例各与两人余悉除夺诏张兢辰罢官以蔡京言其谄事吕大防苏辙故也又诏赵瞻傅尧俞谥诰并追夺三省言近降指挥以司马光等诋先帝变更法度各加追贬谨按吕大防刘摯梁焘苏辙为臣不忠罪与光等朝廷虽常惩戒罚不称愆范纯仁又自因别过落职于本罪未尝畧正典刑生死异法无以垂示万世吕大防制畧曰朋奸擅国责有余辜造讪欺天理不可赦其加显黜以正明刑可责授舒州团练副使循州安置刘摯制畧曰向由邪路力附党魁倡和奸谋毁黜先烈不踰数载窃缘宰司公论未平责轻罪重可责授鼎州团练副使新州安置苏辙制畧曰操倾侧孽臣之心挟纵横策士之计始与兄轼肆为诋讟晚同相光协济险恶朕顾瞻岩庙企望裕陵义不敢私恩难以贷可责授化州别驾雷州安置梁焘制畧曰向附凶渠擢在谏职排陷旧弼诋诬先朝荐引羣凶毁弃成法虽从薄责未称明刑可责授雷州别驾化州安置范纯仁制畧曰立异以邀名匿情而趋利议称亲则构诬于宗祖言变法则归过于先朝欺君以助邪谋弃地以开边隙阴连羣枉协济凶渠迄用攀援遂尸宰辅仅从薄谴久追严诛苟其究免于终身何以示惩于后世可责授武安军节度副使永州安置已上令所在差官伴送前去经过军州交替刘奉世制畧曰曩以小官附会奸党凶险狡狴莫与汝齐有司失刑众论未允可落职分司南京郴州居住韩维制畧曰爰自初政实登近司首赞邪谋厚诬先烈以抑兼并为繁禁以振贫厄为利心恣引亲私助成奸慝比从薄责实拂公言可落职特授左朝议大夫致仕王覲制畧曰资赋金回善于原借附会奸党毁訾先朝挤陷良善变乱法度可落职依前分司东京通州居住韩川孙升吕陶制畧曰顷大奸旧恶相济擅朝而尔挟忿悁为之死党巧诋法度以遂更变之谋歷排忠良以虚顾托之罪积心至此议罪谓何可各依前官分司南京川随州居住升陝州居住范纯礼赵君锡马默制畧曰顷在初政常跻近班怀藉势乘权之心起背公死党之计傅会邪说専为悦谀无以照奸公论甚郁可各落职依前官纯礼蔡州居住君锡本处居住默单州居住顾临制畧曰附会凶党力被荐论顷缘洞察于奸谋不使超跻于近列迨司留钥复结罪阉虽因人言常从贬秩责轻罪重众不谓宜可落职依前官管勾洪州玉隆观饶州居住范纯粹制畧曰倾邪险诋出于天资反复导谀忘其父志弟兄唱和协助凶奸变先朝拓土之功成一时蹙国之议失刑既久公论未平可落职依前官管勾江州太平观均州居住孔武仲制畧曰附会奸党躐处要班逮于



亲政之初敢为怙终之计失刑既久公论未平可落职依前官管勾洪州玉隆观池州居住王汾制畧曰早以凡才滥居儒馆元佑之际附会诋欺众论喧阗罪状明白可落职依前官致仕王钦臣张来制畧曰尔因缘奸险躐起要班挟持说谋鼓扇凶焰王钦臣可落职管勾江州太平观信州居住来可落职添差监黄州酒务吕希哲吕希纯吕希绩等制曰方其父在则假国威灵为己阉阅及大防用事则密援凶党贾鬻利权并以庸才因致美职宜悉从于贬秩或仍裨于分司庶无轻重失当之刑及夫幸免失刑之士希哲分司和州居住希纯分司金州居住希绩光州居住姚勔制畧曰向附凶邪为出死力沮害良善助成奸谋可依前官分司衢州居住吴安诗制畧曰顷者羣凶聚慝继踵擅朝尔以朋邪窃处谏列鼓扇凶焰附会邪谋逞宿憾以挤劳旧之臣构险语以吐倾摇之议虽常加于薄责尤未正于严刑可责授濮州团练副使连州安置晁补之落职添监处州盐酒知齐州贾易海州盐税程颐放归田里钱勰杨畏并逐人永不叙复郴州编管秦观移送横州朱光庭追贬郴州别驾孙觉赵高李之绳杜纯并追职及遗表恩例李周追贬已上责词皆叶涛所草也初吕大忠既以所得于上大防可复相见之语告惇及还至渭州因为通判潘适具言适叹曰公失言矣必为深悔大忠寻加职请纳职名量移大防不许于是大防再责循州或曰循州再责上语实激之盖章惇等疑上意欲复进用元佑人故也三年甲申文彦博制畧曰色厉而荏行伪而坚备公师于三朝更将相者四纪忘我大德肆其忿心初迷国以怀谗终朋奸而背善以理财裕民之政为暴刻聚敛之利以经天纬地之勲为寇攘草窃之计有臣若此于义可乎于戏明罚正刑永为垂世之戒彰善瘅恶上慰在天之灵可特授太子太保依前潞国公致仕张茂先梁惟简谭宸赵约内人樊氏并责降闰三月丙戌诏文彦博诸子并解官侍养司马康追夺赠官丁亥诏再责降韩川道州安置孙升汀州安置诏韩忠彦降授充资政殿学士知定州蹇序辰言其元佑初附会奸恶也诏苏轼撰上清储祥宫碑令赵京撰并书壬辰诏责王隐王觐孔文仲鲜于侁吴处厚等郑雍坐谤先朝落职知定州二月又改郑州安焘落观文殿大学士依前官坐蔡京蹇序辰言其奸叶涛坐论安焘不当落职知光州甲辰诏惠州安置苏轼责授琼州别驾昌化军安置范祖禹移送宾州安世移送高州安置诏毁抹吕惠卿责官诏词以惠卿请也三月壬辰中书舍人同修国史院蹇序辰言朝廷前日追正司马光等前恶明其罪罚以告中外考言观事踪迹诡秘不可备究至其章疏文字散在有司不乘时取索编类岁久沦失或邪党交构有藏毁弃之弊欲望选官将贬责奸臣言行士状编类以示天下后世之大戒从之差给事中徐铎及序辰四月己亥循州安置吕大防卒于虔州辛丑故吕公着追贬昌平军司户参军故司马光追贬朱崖军司户参军壬寅诏范纯仁王嵩叟司马光吕公着赵高等恩例并追夺并给还因吏部刑部有请也中丞黄履奏乞究王珪罪诏王珪遗表恩例并行追夺珪追贬万安军司户参军五月陈衍男慥梁维简并籍没物业亲戚厚善之人并行责降辛未舍人蹇序辰不草吴居厚告词因言居厚元佑被责本无赃私至绍圣亲政始复收用议者尚以前事为言臣若苟随流俗则示怀利朋奸无

以塞区区之忠所深虑者累先帝知人之明违今日绍述之志也望降臣此章与居厚除命行下示好恶以风四方则非独与臣幸甚诏榜示朝堂朕以眇躬获承先构永维休烈盛美欲以昭示万世而顷遭羣奸同逞宿憾兴讹造讪力肆诋排政事人材废毁殆尽夙夜悼惧靡敢或遑思与卿士大夫共承厥志庶几德业传布无穷念今在廷之臣鲜知事君之义从乡原以为善士造虚誉以进无能以容私合党相先以奉法守公为干才智胜任则鬪茸共嫉趋向既正则叵测深仇端亮劲挺有特立之操者不见容于众人媵阿回遁持两可之说者必得名于流俗沈溺忘返者险薄可羞乃阴怀私恩显废公议以奸臣所斥逐为当罪所变更为得宜以先帝所造立为不然所褒擢为非当借喻余党幸复甄收务令旧章未能淳一扇为是非不定之论欲开善否更用之端漫托小人之道于难知之中以疑天下之听于未孚之际幸时事之中变庶人心之翕从每怀及兹良用慨叹朕察言观事灼见邪心欲正典刑当伸儆戒继自今日尔其新之式惩厥愆毕趋于正示以好恶非曰苟然其或怙终必罚无赦咨尔在位尚克敬承秋七月诏许舒州团练副使循州安置吕大防归葬始大防卒于处州上闻大防何以至处州及其家请归葬即许之议者由是知痛贬元佑党人皆非上本意也辛未蔡谓奏臣见文及甫常与邢恕书大逆不道诏蔡京章惇即同文馆究问九月壬子诏曰中外臣僚等并许直言朝政缺失朕亲览虚心以改庶几以消天下之变焉乙卯诏曰朕以眇躬获保宗庙恭典神天翼翼小心罔敢预怠惟恐不德以上干干象今彗出西方灾谴为大天垂变异朕实惧焉用是损膳避朝求言辍燕其敷恩霈荡宥囚辜庶消复于妖祥以导迎于善气可大赦天下于戏遇灾而惧勅命惟几尚赖公卿悉心辅政交修不逮同底于平谿尔多方咸体朕意庚申彗犯天市垣帝座十一月刘奉世兄弟责降中丞邢恕言其倾害顾命大臣故也丁丑诏程颐涪州编管坐与司马光同恶相济也化州安置安焘卒十二月新州安置刘摯卒诏责授黔州别驾涪州安置黄庭坚移戎州安置以避使者亲嫌也

元符元年二月蔡京等究治同文馆狱卒不得其要领乃更遣升卿及必岭外谋尽杀元佑党人时刘摯梁焘已前死朝廷尤未知也时董必诏差为河北东西路察访使吕升卿为河北漕三月诏陈衍特处死初章惇蔡卞恐元佑旧臣一旦复起日夜与邢恕思所以排陷之计既再追贬吕公着司马光又责吕大防刘摯梁焘范祖禹刘安世等过岭意犹未嫌仍用黄履疏高英追贬王珪皆诬以圖危上穷其言浸及宣仁圣烈皇后上颇亦惑之最后起同文馆狱将悉诛元佑旧臣内结宦者郝随为助專媒孽垂帘时事建言欲追废宣仁圣烈张士良者前窜雷州惇卞逮迎诏欲使证宣仁圣烈果有废立意及士良至既以旧御药告并列鼎鑊刀锯置前谓之曰言有即还旧官无则死士良仰天叹曰太后不可诬天地神明不可欺也乞就戮京惇无如之何得以陈衍罪状塞诏宣仁圣烈废立之议由是得息而惇卞终不肯释元佑旧臣京惇进呈摯等事上曰元佑人果如此乎京惇曰诚有是心然反形未具上曰摯等已责遐方朕遵祖宗遗意未尝戮大臣其释勿治癸酉三省提举荆湖南路常平等事董必奏体量到知雷州朝请郎张逢同本州岛

官吏至门首接见苏辙次日为会召辙在监司行衙安泊又令僦进纳太庙斋郎吴国鉴宅逢每月率一两次移厨管待差白直七人借事本州岛海康县令陈谔差杂直追呼工匠等应付吴国鉴修宅又勒居民折退篱脚阔开小巷通行人马以避辙门巷及借手力等事诏苏辙移循州安置张逢特勒停陈谔特冲替本路提点刑狱梁子美既与苏辙系亲姻之家不申明回避并其余监司失觉察各罚金三十斤夏四月诏化州安置梁焘卒不许归葬家属令昭州居住林希出知亳州邢恕出知汝州以希私积怨愤志在中伤恕阴怀怨憎妄意进用故并黜之五月诏刘摯梁焘诸子并勒停永不收叙以文及甫等所供逐人已亡不及考验明正典刑故也六月中丞安惇言乞朝廷委官将元佑中理诉所一宗公案看详如故改正即乞申请得罪之意复依元断施行诏蹇序辰安惇看详语言于先朝不顺者职位姓名别具以闻序辰先有是命上难之于是惇复进白蔡卞劝章惇使必行令序辰与惇徐铎同主其事自后缘诉理被祸者凡七八百人序辰及惇实启之七月三省言蔡京第三奏文及甫所发刘摯有司马昭之心及其党附之人废其子孙伏闻刘摯梁焘已有处分其余显官之人未有指挥章惇安焘郑雍并特放罢三省言刘摯等党人王嵩叟前后论事包藏祸心最为凶悖范祖禹刘安世朱光庭仍累疏诬罔圣德阴畜邪谋虽各行遣累据臣僚上言乞赐施行诏范祖禹移化州安置安世移梅州安置王嵩叟范祖禹刘安世朱光庭诸子并勒停永不收叙九月庚戌追官停勒横州编管秦观特除名永不收叙移送雷州编管以附会司马光等同恶相济也吕大防诸子并勒停御史邓裴乞依范祖禹等例也看详诉理所言光州司法参军监安上门郑侠上书讪谤朝廷并王安国非毁兄安石等罪名元佑元年除雪不当诏元佑指挥更不施行并令改正郑侠勒停英州编管永不量移十月看详诉理所元佑臣僚上言乞为诉理所日限所有衙冤之人皆得洗雪可推广圣恩收召和气按所言于先朝不顺诏王觐特责授鼎州团练丰州安置甲午范祖禹卒化州张敦礼责降坐元佑间言退蔡确相司马光有五得也欧阳裴落职与合入差遣朋附元佑大臣也十一月三省言元丰末元佑中王巩累上书议论朝政表里奸臣张保源累上书议论朝政附会奸臣诏巩追毁出身告勅全州编管保源勒停峡州居住三年正月庚申知大名府韩忠彦致事王存各降一官中丞安惇官二人奏雪谢景初语言不顺故有是命二月乙未曾布言章惇蔡卞施行元佑人众论皆为过当然岂为诋訾先朝大抵多怨报耳丙午孙谔诏与合入遣与元佑诉理有衙冤饮恨之语御史左肤言其追恨先帝万死有余三月己未中丞安惇言元佑案牒凡千余人元断轻重一一当罪所有元看详官刘摯等管勾文字叶伸苏加朱裔等罪迹显著义不容宥诏有司具逐人所到月日审理察情犯施行诏叶伸降三官苏加等勒停辛酉萧世宗为吏部员外郎张行为户部员外郎世宗在元佑中上书论青苗免役便民复行免凡四十章故也四月顾临卒知桂州程节员外郎谭揆荆湖提刑梁子美各降官坐昌化军使张中役兵修驛以舍苏轼察访董必劾节不觉察有是命唐领坐借舟船载新州安置刘摯骨月诏领先冲替下淮南仍取劾以闻【领时知楚州】黄隱责南安军安置作



元佑时附奸党也五月新知韶州孔文仲责惠州别驾英州安置坐元佑上书谤讪先朝政事知泸州王献可降一官罢任坐元佑上书议论朝政故有是命梁和林大节王佑陈嘉言系梁惟简等亲戚并与远小监当差遣戊辰诏陈次升坐元佑中任御史日所上章奏诋毁先政朕常含容其过庶使自新畀以练职复敢狃习故态观望言事可罢职令监全州酒税七月韶六曹诸司应元丰人耳四月以来废毁先帝法度申请并着所任官名姓编类成册内三省如有毁匿罪赏并依编章疏已得朝旨用尚书蹇序辰宣德郎李积中之言也九月丁未诏立贤妃刘氏为皇后先是将立皇后内出皇太后手诏曰非此人其谁可当翰林学士蒋之奇载其语于白麻故有亮非斯人谁可为后之语其后皇太后临朝以瑶华无辜被废追治元符立后之因语之奇进所奉手诏验其字画乃刘友端所书他日曾布问惇作元佑手诏是刘友端书皇太后未尝见闻何也惇遽曰是惇进入内是时章惇专制造内侍郝随以固权宠刘友端助之三人凶狡相济故长乐手札惇撰定进入友端矫制书云宫禁事秘人莫得而辨也通判毕渐言元佑中诸路所立碑记刻纪述等并令毁碎从之甲子右正言邹浩上疏谏立皇后之失疏奏诏浩言多狂妄除名勒停新州编管闰九月贾易邵州安置以易在元佑中常任谏台羽翼权臣诬谤先猷有是命十月文及甫落职知均州十一月乙亥翰林学士蒋之奇知开封吕嘉问权吏部叶祖洽并落职出守王回除名勒停坐与谏官邹浩语言交通田衍王琳岑域吴礼李友谅并特追一官勒停白时中岑穰张廷坚毕渐蔡蹈张琳范致虚各冲替陈举朱绂傅楫胡安远范致君各特追一官勒停蒋球特冲替叶丞王溥勒停坐以银钱遗浩且致简叙别也吕希绩降授朝请郎分司南京随州居住三年徽宗即位遣使劳问范纯仁于永州召韩忠彦为吏部尚书李清臣为礼部时绍圣党人在朝用事人怀异意上一日谓徐绩曰卿鯁直朕所倚頼绩因论择相之难上曰已诏范纯仁韩忠彦绩顿首贺曰得其人矣二月辛酉诏复邹浩为宣德郎监袁州酒税癸亥诏永州安置范纯仁为左中散大夫分司南京邓州居住吕希纯唐州居住王觐和州居住韩川随州居住刘奉世光州居住唐义口安州居住吴安诗澧州居住吕希哲随州居住吕希绩衡州居住吕陶任便居住苏轼移永州安置刘安世移衡州秦观移英州程颐移峡州杨畏知襄州王古知润州王钦臣知襄州范纯仁知亳州范纯粹知相州张来通判黄州晁补之签书武宁军判官勾当公事王隠监江州酒税黄庭坚鄂州监税贾易监舒州茶盐酒三月甲午以龚史为殿中侍御史邹浩为右正言陈瓘为左正言叙英州安置孔文仲编管昭州汪衍编管封州余爽编管金州王巩峡州居住张保源并复官乙未以上官均为秘书少监孙谔为右司谏癸巳以郑雍逸为左班殿直以韩忠彦为右仆射李清臣为门下侍郎蒋之奇同知枢密院事时中外拭目新政上意用中道合异论以忠彦重厚和平首命为相乙卯叙复元佑大臣诏曰朕即位以来哀士大夫失职者众虽稍收复未厌朕心兹者天佑予家挺生上国奄有六庆资及多方解网辜恤何事曰终范纯仁提举嵩山崇福宫许归颍昌刘奉世明道宫许归陈州王觐崇福宫韩川太平宫吕希纯鸿庆宫吴安诗崇福宫唐又闲鸿庆宫并

任便居住王钦臣知颖昌吕陶张耒刘当时并与知州吕希哲希绩贾易与小郡刘唐老黄隱堂除知军晁补之与通判黄庭坚金判苏轼移永州辙移衡州郑侠放逐便初御史中丞安惇言邹浩不可用恐形迹先朝上曰先朝大事中丞不言浩敢言用之何伤至于陈瓘言浩尽忠惇居风宪默而坐视其愧已多况论其非乎诏罢惇知潭州五月先是台官龚史陈瓘任伯雨皆言尚书左丞蔡卞过恶史曰卞为安石之壻妄谓尽得其学以欺朝廷而一时嗜利者助成其说今乃参预政机清议沸腾重黜之以慰天下瓘曰章惇前日所为皆卞教之卞以继述神考为名以纂绍安石为主立私门之所存以为国是夺祖宗之大美以归私史又曰惇迹易明卞心难见春秋责意则难见之罪安所逃乎伯雨曰卞之恶有过于惇如诬罔宣仁圣烈保佑之功傅致元佑皇后疑似之罪安惇作理诉所而士大夫得罪者八百三十家蹇序辰编排章疏而语已被罪者数千人先帝亲政六年未尝有失独此数事皆卞为之一日上曰台谏攻卞已十余章卞乃请辞遂知江宁府戊子陈瓘言绍圣再修神宗实录史官夺宗庙之美以归故臣建掌书之官以尊私史所有绍圣神宗实录愿诏史臣别行删修诏令三省参对进呈左仆射韩忠彦白上以元佑生者已被恩而死者殊未甄复此当出自上意而曾肇亦言陛下即位废逐皆还生者蒙恩惠已厚惟是游魂枯骨尚未被澤乞出自宸衷明诏叙复乃诏元臣故老尚在贬中愍泽之颁岂容独后太子少保文彦博司马光等三十三人并还其官六月左正言陈瓘言邢恕顷诬司马光刘摯梁焘王嵩叟等皆有奸谋家族几致覆灭公议不容久矣宜定其罪于是韩忠彦请改撰司马光等告命上曰但于贬恕告词中载此意则天下皆知之矣制曰忠谗辨则内外肃是非公则劝沮行尔操心倾危雅意附会造为非语上累宣仁既匪亲闻又无证佐究其所自皆出不根使光公着被凶悖之名蒙殛窜之罪欺天误国职尔之由矧彼于此二人实门下士借誉引重恩义非轻一旦翻然遽为讎敌挤弃下石数为虚言可落职罢知荆南责授少府监分司西京均州居住九月侍御史陈次升言左仆射章惇自登揆路任私言公奉使山陵错置乖缪中丞丰稷御史陈师锡言惇当国七年窃持威福天下勇于害贤敢于杀人大事包藏阴谋发为异议陈瓘言章惇独相八年迷国误朝罪不可掩奉使失职事干泰陵又云助尊私史则至于薄神考矜伐己功则至于诬宣仁乐于用兵大开边隙陝西之民怨矣而进筑不已内府之财竭矣而辇运不休杀张悦以箝众口广邹浩之狱以絶言路于是惇乞罢政辛未知越州初中丞丰稷入对学士承旨蔡京于殿陛间揖稷曰天子自外服诏公为中司今日必有高论稷正色答曰行自知之至是与侍御史陈师锡共言京卞兄弟同恶迷国误朝乞正典刑不报甲申蔡卞提举杭州洞霄宫太平州居住张商英落职知随州范鎰落职知滁州坐附权要乙丑先是陈佑论张瓘门下李清臣言哲宗天姿仁孝每对臣下有爱人之言任章惇为相不置次辅惇为性残刻开导上意者莫非残忍杀伐之事有伤和气水旱连年自古大臣少惇比者宜行殛诛以慰民望乃诏责惇为散官潭州安置然议者以清臣为反复迎合云丙申蔡京永兴军御史言其外结后族内事阉人交缔东朝忧刑天颜貽社稷患为天下祸林

希出知福州叶祖洽徐铎并落职御史言其助悖为恶也己未诏曰永惟神考新一代之典型以遗后人间者任事之臣用意或过朕所不取为政用人朕无彼此之间斟酌损益惟义所在嘉与有位共图康功以成继述之美自今有曲学偏见妄意改作规营国事当与众弃之辛酉左仆射韩忠彦性柔懦天下事多决于右仆射曾布乃议元佑绍圣均为有失欲以大公至正消释朋党十一月诏以来年改元建中靖国以新除贾易为谏议大夫左司谏邹浩为起居舍人蔡京知江宁郭知章为永兴军苏轼成都玉局观苏辙提举太平宫任便居住黄庭坚知叙州刘安世知郓州侍御史陈次升龚夬再言蔡京奸恶诏京落端明殿学士提举洞霄宫辛巳御史陈次升言哲宗皇帝责任宰执是时蔡卞各位政府肆行奸谋巧计施行凶焰益炽巧弄赏罚専暴恩讎编类章疏中伤士人或投之远或陷之深羣毒流于天下实不忍闻时人目为笑面夜义众所共知也又右正言张廷坚亦言卞之奸恶诏卞他所居住建中靖国元年左正言任伯雨言章惇久擅朝柄迷国罔上毒流缙绅向帘前异议赖太皇后睿知先定故奸谋不行思之可为寒心诏惇责雷州司户六月尚书左丞范纯礼初奏近见朝廷是元丰而非元佑元丰之政尽出先帝规模宜无不善然官吏奉行未一一皆如法意故民虽受赐亦或被害元佑之治其初执政者虽小有润色亦多先帝法度今议论之官有不得志于元佑者以此借口动陛下之心尔未必皆为国事盖乘时以邀利者也又言自古天下治乱顾用人何如尔今畧陈祖宗用人之要秋七月初朝廷稍变熙丰政事而范致虚上言言不当变且言臣读陛下泰陵诗其卒章曰周绍裕陵尊陛下孝悌之本心也臣愿陛下守此而已上亟召见曰朕行不次用卿除左正言会有诏修史官取元佑绍圣实录依公参详务不失实甲子范致虚言神宗一代信史缺然未立元佑之书先朝以其诋诬遂废弗用绍圣之书今朝以其掩蔽复别论撰夫为史而至于纷更何以传信臣谓非绍圣无以察正元佑诋毁非今日无以察正绍圣之掩蔽臣愿陛下诏飭史官书成而笔削不公皆以轻重坐之元佑诋诬已系先朝考正行遣外绍圣掩蔽理合条具昭示天下后世以陛下孝思之意诏送国史院七月陈瓘奏臣常乞别修神宗实录以成一代之典而不闻施行盖绍圣史臣今为宰相故也不报时瓘权给事中右仆射曾布将荐之即日或以告瓘瓘曰吾与布议事不合是以官爵相饵也若受其荐进而复与异同则公义私恩两有愧矣至是瓘诣政事堂以书见布极论之畧曰尊私史而压宗庙缘边费而壞先政此二者合下之过也瓘所撰日録辨一篇所谓尊私史而压宗庙可见矣臣近守无为军知天下根本之财皆运于西边因述国用须知所为缘边费而坏先政者可见矣遂以副本纳布布谓瓘所论为元佑寡见浅闻之说又曰虽有卜书布亦不动瓘遂申三省乞劾妄言之罪早行窜黜宰相曾布云瓘责臣等尊私史压宗庙缘边费坏先政其罪是上令责瓘左仆射韩忠彦右丞陆佃曰瓘之言诚过若责之则更以此得名曾布尚能容瓘八月乙卯以瓘知秦州冬十月门下侍郎李清臣与仆射曾布有隙每于上前互相訾毁谏官论布过失上以陈佑与清臣交结欲黜布而援清臣将罢佑谏官江公望遽言陛下临御以来易三言官逐七谏臣非天下期



望今佑言宰相过失自其职也岂可便谓有他意哉上甚善之至是布使讽公望若能言清臣以谏议大夫相处公望弗应白其言于上并言朋党同异之弊而御史彭汝霖遂承布风旨累论清臣之奸又初议建景灵西宫清臣常谏止之及宫成清臣渐见疎斥求有以自固清臣奏西宫之成都人欢喜之不答至是清臣不自安且再为汝霖所劾乙未罢知大名府壬午三省奏事讫右仆射曾布独留进呈内降起居郎邓洵武爱莫助之圖其说以为陛下方绍述先志羣臣无助之者其圖如史书年表列为旁通分为左右自宰相执政侍从台谏郎官馆阁分为七隔左曰绍述右曰元佑左序助绍述者宰相执政官温益一人而已其余每隔三四人如赵挺之范致虚王能用之徒是也右序举朝辅相公卿百执事皆在其间至百余人又于左序班立一项用小贴子揭去布密稟揭子臣僚姓名上曰洵武言非相蔡京不可与卿同故揭去布云洵武所陈既与臣所见不同自当不与议乞纳不明日遂改付温益益欣然奉行乞籍记异论之人于是上决意用京矣崇宁元年朱肱上书言事又进所上宰相书曰比年日蚀者三地震者一此虽治世不免然四月正阳之月而河东上郡地震仅旬其异为甚不知公何以弭之刘寿公门人也而已为御史公有过举爵可言乎如上官均丰稷贾易邹浩皆相继外补彼数公者其出入用舍足以治乱公为太宰而正人相继以去此所以日蚀地震也绍圣间章惇蔡卞奸谀相济其恶不可殫数而最大者四公在枢府坐视默然不为无过若以西府不当与议则侍从臣皆与论思况执政乎再贬元佑大臣范纯仁能言之公未尝救也废元佑皇后龚史能言之公未尝救也策元符皇后邹浩能言之公未尝救也置谏官于死地黄履能言之公未尝救也此惇恶之最大而公无半助之功今公又当主意之重而必当遇灾而惧然后可以弭天变闻善而迁然后可以求直言肱所望于公者如此诏付三省肱服从弟也江津人赵谗者少敏给绍圣初擢甲科教授成都因章惇逐元佑大臣不合人心欲起兵据蜀与所亲何夔王师直贾时成及日者罗京等同谋会上登极赦到谗谓夔等曰章惇必败天下既安人心难动前议愿勿出口遂入京除太学博士而党中有钩郡者发其谋狱且当族戊戌诏皆诛死夏五月曾布每于上前韩忠彦且植党以倾之布弟肇以书戒之曰吾兄方得君正当引用正人扶助王道以杜絶惇卞复起之萌而数月以来所谓善人者相继去朝其在内者置之闲地而所进用以为辅臣从官台谏往往皆前日事惇卞者一旦兄势稍不如今日之盛必首引惇卞果至未暇恤其它曾氏之祸其可逃哉王古王觐丰稷贾易皆可与谋愿兄虚心克己与之议论但使正人聚于本朝自然小人道消矣布不从至是谏官呉材王能用助布之说党论复起善类皆窜斥呉材之力为多己巳呉材王能用辈上章排元佑党人未止独谏议大夫彭汝霖与御史邹余郭熙其论以为元佑人罪状有绍圣贬籍具在昨元符末叙复太优如自朝廷检举裁减则数日可毕不须候弹章人大指名然后行之徒使人言纷纷不已顾谕执政大臣原轻重之情定大小之罪上稟圣裁于是右仆射曾布用其说悉具姓名以进诏复责降元佑党人司马光吕公着文彦博吕大防梁焘范纯仁刘摯王嵩叟王存傅尧俞郑雍以下各以差夺其官惟韩

维孙固以神考潜邸人特免丙子诏元佑党人各已削秩自今无所复敢言者亦勿复言秋八月曾布罢相去位戊子超拜蔡京为右仆射中外大骇八月己亥籍元佑及元符末宰相司马光侍从苏轼余官秦观以下凡百有二十人二年正月知枢密院蔡卞追讎元符之末言者疏已恶罪而任伯雨论其欲追废宣仁一事尤为切至乃上疏自辩以伯雨为首于是三省检伯雨等所奏乙酉分贬邹浩陈瓘龚史等十人于诸州独伯雨远谪昌化军四月时有诏毁苏轼所刊东坡集而言者又以谓程颐入山著书恐及朝政乃诏颐除名令监司察所著书九月诏天下监司长史右各立元佑奸党碑【详见党碑内】四年五月除党人父子兄弟之禁五年春甲辰以吴居厚为门下侍郎刘逵为中书侍郎于是逵首劝上碎元佑党碑寛上书系籍人禁及罢蔡京所造乙巳诏中外直言阙政时禁中夜半遣黄门至朝堂毁石刻翌日京见之厉声曰石可毁名不可灭上谓詹丕逵曰闻中外言刘逵不可用法度不可变蔡京不可罢朕得之忧惕不寐丕逵曰京误国陛下可知逵何不可用上曰如碎党人石刻寛上书系籍人禁皆逵为朕当论时政之失

宣和七年六月时元佑党人既尽惟直秘阁刘安世岿然独存名誉益重戊午安世卒先是苏轼评元佑人物曰器之真铁汉

太平治迹统类卷二十四

●钦定四库全书

太平治迹统类卷二十五

（宋）彭百川 撰

程颐出处本末

元佑元年闰二月丁巳以乡贡进士程颐为通直郎汝州团练推官充西京国子监教授以门下侍郎司马光尚书左丞吕公着及西京留守韩维荐其学术故有是命团练推官西京国子监教授程颐为承奉郎秘书省校书郎先是王嵩叟奏曰臣闻孔子曰举逸民天下之民归心焉臣以谓举之易也而禄之难禄之易也而尽其用难非待之有礼处之有方则不可得而禄矣不可得而禄不可得而尽其用矣伏见西京国子监教授程颐学极圣人之精微行全君子之纯粹早与其兄颢俱以德称名显于时陛下方欲用而颢卒贤士大夫无不相与咨嗟以为朝廷之恨今者幸陛下复起颐而用之臣愿陛下加所以待之之礼择所以处之之方而使高贤得为陛下尽其用则所得不独颐一人而已四海潜光隱德之士皆将相招而为朝廷出矣愚臣区区欲广陛下之美者其诚心如此惟圣主留意幸甚丙辰左司谏王嵩叟右正言朱光庭进对太皇太后曰卿累荐程颐今已除宣德郎来日待行出文字召对又曰差除若是它有人望不惜它合得人望自然无信语掩人口不得门下侍郎司马光言今月二十一日中使陈衍奉宣圣旨问臣来日程颐上殿若奏对有取升以何职不可入经筵当以何名目臣窃惟程颐本以布衣守道不仕昨朝廷除幕职官西京教授颐曾辞及朝廷诏赴阙除宣德郎秘书郎颐又辞卑官在经筵者惟有崇政殿说书若以新再除官充崇德殿说书足以超擢但颐坚辞不敢受耳

更乞圣意裁度辛巳宣德郎秘书郎程颐为通直郎崇政殿说书颐既上殿即以经筵命之颐面辞不许而具奏曰臣以知人则哲尧帝所难虽陛下圣览之明然臣分获进对于顷刻间陛下见其何者遽加擢任臣未敢以辞只乞臣再上殿进札子三道言经筵事所言或是则陛下用臣为不误臣之受命为无愧所言或非是其才不足用也因可听其辞避札子其一曰臣伏以皇帝陛下春秋之富虽睿圣之资得于天禀而辅养之道不可不至所谓辅养之道非谓诰诏以言过而后谏也在涵养熏陶而已大率一日之中接贤士大夫之时多亲寺人宫女之时少自然气质变化德器成就乞朝廷慎选贤德之士以待劝讲讲既罢常留二人直日一人直宿以备访问窃闻间日一开经筵讲读数行羣官列侍俨然而退情意畧不相接如此则责辅养之功难矣今主上幼冲太皇太后慈爱亦未便乞频出但时见讲官久则自然习熟大抵与近习处久熟则生褻易与贤士大夫处久熟则生爱敬此所以养成圣德为宗社生灵之福天下之事无急于此其二曰伏惟太皇太后陛下聪明睿知超越前古皇帝陛下春秋之富辅养之道当法先王臣以为傅德义者在乎防见闻之非节嗜好之过保身体者在乎适起居之宜存畏慎之心臣欲乞皇帝陛下左右扶持祇应宫人内臣并选年四十五以上厚重小心之人服用器玩皆须质朴一应华巧奢丽之物不得至于上前要在奢丽之物不接于目浅近之言不入于耳及乞择内臣十人充经筵祇应以伺候皇帝起居凡动息必使经筵官知有剪桐之戏则随事箴规违持辅养之方则应谏正调护圣躬莫过于此其三曰窃见经筵臣僚侍者坐而讲者独立于礼为悖欲乞今后特令坐讲不惟义理为顺以表主上尊儒重道之意窃闻经讲官在御傍以手指书所以不坐别欲令一人指书讲官稍远御案坐讲意朝廷循沿旧体只以经筵为一美事臣以为天下重任惟宰相与经筵天下治乱系宰相君德成就责经筵由此言之安得不以为重御史中丞刘摯言臣伏覩制命以布衣程颐为通直郎崇政殿说书者恭以尊儒重道振举遗逸使天下归心固圣朝之所宜为也以汝州推官西京教授起之颐既力辞不从而赴召陛下又以宣德秘书郎待之程颐既至未即受命而陛下赐之延对又官之以通籍置之以经筵盖颐之逊不已而陛下恩命每有加焉臣恐颐于出处辞受之际义有难安者也伏望陛下审真伪重名器闻颐方辞恩制乞降指挥依颐所乞成就其节止授以初命之官既使得以禄养其亲又使受之有义免于似是之谤而后日见其可用进擢盖未晚颐卒留经筵摯所言不用颐每以师道自居其侍讲色甚庄言多讽谏颐闻帝尝在宫中盥而避蚁因讲毕请曰有是乎帝曰甚恐伤之耳颐曰推此心以及四海帝王之要道也帝称善八月癸卯通直郎充崇政殿说书程颐兼权判登闻鼓院颐再辞之诏不带职官充侍读侍讲崇政殿说书其请奉依职官事例支见钱颐在讲筵尝质钱使或疑未得禄问之乃自供职后不曾请俸寻许户部户部索前任厯子颐言颐食藁菜无前任厯子其意以朝廷得士当廩人继粟庖人继肉也即今户部自为出厯子户部初欲折支执政谓馆阁官皆请见钱岂有经筵反折支又检例缘久无崇政殿说书故户部只欲与折支之始给见钱添职钱见四月壬午二年三月崇政殿说书



程颐上疏曰伏念臣草莱贱士蒙陛下擢置劝讲之列夙夜毕精竭思所以补报万一昨去年六月中尝有奏言辅主之事已踰年不蒙施行一事臣不敢一一再言止此事最切者复为陛下陈之臣前之言于延和殿讲读太皇太后曰每遇事政稀简圣体康和时至帘下亲讲官进说不惟省察人主进业于陛下圣德未必无补兼讲官辅导之间事意不少有当奏禀便得上闻臣今思之太皇太后双日垂帘前问当主上进待次第讲说所至如何开益使天下知陛下于辅养人主之道用意如此也愿陛下圣明不以臣之微贱而忽其言察臣区区之心又上疏曰臣近言迩英热乞移就宽处如无别稳便处只乞就崇政殿延和殿窃闻给事中顾临有言以延和讲读为不可臣本为迩英渐热恐于圣体非宜今闻修展迩英苟得宽凉则臣志愿遂矣臣料临之意不过谓讲官不可坐于殿上以尊君为说尔夫殿上讲说义理之正慕古者所当行也臣不暇远引只以本朝政事言之太祖皇帝召王昭素讲易真宗令崔颐正讲尚书邢昺讲春秋皆在殿上当时仍是坐讲立讲之仪只始于明肃太后之意此乃祖宗尊儒重道之甚美岂独子孙所当为法万世帝王所当法也而临以为非临谓讲官不可坐殿上则昭素布衣之士其不可更甚矣迩英讲读只有仁宗时亦从便尔非是避正殿若避殿上则不应置崇政说书之职虽以殿名设职不必须在本殿说书然亦必不肯于不可讲说之处置说书官也若主上信以为然所损岂不甚大二年八月辛巳朝奉郎右司谏贾易知怀州自苏轼以策题事为台谏官所言而言者多与程颐善颐既交恶其党迭相攻易建言请并逐二人又言吕陶党助轼兄弟而文彦博实主之语侵彦博及范纯仁太皇太后怒欲峻责易吕公着言易所言颇切直惟诋大臣为太甚第不可复处谏列尔太皇太后曰不责贾易此亦难作公等自与皇帝议之公着曰不先逐臣则易命不行争久之乃止罢谏职既退公着谓同列曰谏官所论得失未足言颐主上方富于春秋异时将进道谏之说以惑上心者当此之时正赖左右力争不可预使人主轻厌言者也于是吕大防刘摯王存私相顾而叹曰吕公着仁者之勇乃至于此通直郎崇政殿说书程颐罢经筵权同管勾西京国子监左谏议大夫孔文仲言颐人品纒污天资险巧贪黩请求原无乡曲之誉奔走交结常在公卿之门不独交口褒美又至连章论奏一见而除朝籍再见而升经筵臣顷任起居舍人屡侍讲席观颐陈说全无发明上德未有嗜好而常启以无近酒色上意未有信向而常开以勿用小人岂惟劝导以所不为实亦矫欺以所无有如陛下因咳嗽罢及御迩英学士以下侍讲读者六七人颐官最小乃越次独候问圣体横僭过甚并无职分臣居京师近二年颐未尝过臣门臣比除台谏官即来访臣先谈贾易之贤又贺与易同官遂语及吕陶事曰吕陶曾补司谏命已久阁今闻复下何也如此则贾明叔必不安职矣明叔者指贾易字也臣答曰何以言之颐曰明叔近有文字攻陶之罪已数日矣今陶设为司谏明叔畏义知耻者也言既不行其辞去决矣公能坐视明叔之去乎臣曰将如之何颐曰此事在公也公之责重也推颐之言必是与陶有隙久欲讽臣攻陶助易也伏望论颐罪倘未诛戮且当放还田里以示典刑御史中丞胡宗愈亦言先帝聚士以学教人以经三舍科

条固已精密且一切旧因深斥颐短谓不宜使在朝廷先是赴讲会上疮疹不坐已累日退诣宰相问曰上不御殿知否曰不知曰二圣临朝上不御殿太皇太后不当独坐且上疾而宰相弗知可为寒心翌日吕公着等以颐言奏遂诣问疾上不悦放黜之颐因五上章乞纳官归田里不报又乞致仕亦不报新西京转运副使吕陶改梓州路陶初有西京之命即引嫌辞避复上疏曰朝廷以太平无事尊贤重道用程颐于山林之下而任以劝讲之职侍太子之侧而访以道义则非礼勿动非礼勿言可也今乃讲读之际往往内侍密语非其体也向者皇帝陛下偶因发嗽未御讲筵颐乃申请乞今后须得闕报亦骇中外之听不知义也详定学制疎繆无取礼部逐一驳正三省至今依违未决议者疵之此愿陛下知之者三也【颐轼忿争事见绍述门】五年正月太师平章军国重事文彦博言大中大夫致仕程珦身亡一子颐素蕴学行尝为迺英讲官今其父亡窘于丧事伏望特赐矜悯优其赐恤知河南府韩缜翰林学士承旨苏颂等相继有请诏赐绢三百疋下所属葬日量行应副七年三月丁亥三省进呈程颐服闋欲除馆职判登闻鼓院太皇太后不许入以为直秘阁判西京国子监初颐在经筵归其门者甚众而苏轼在翰林亦多附之者遂有洛党蜀党之论二党道不同互相非毁颐竟罢去及进呈除目苏辙遽曰颐入朝恐不肯静太皇太后纳其言故颐不复得召乙巳殿中侍御史吴立礼言臣窃见丁忧服闋人通直郎程颐除授直秘阁判西京国子监进职无名颂骇士论按颐当元佑初用大臣论荐如除幕职官充西京教授意卑小官初乃固辞及朝廷再以通直郎崇政殿说书召之即欣然受命盖其志在躁进故辞卑居尊速冀显达方其起自布衣劝讲帷幄拣拔进用可谓不次矣不能安循命理圖报厚恩而怙势要权日走执政谏官御史之门以游说为事业肆其喜怒妄以进退人物为己任盖其言伪而辩学非而博足以鼓动搢绅欺惑当世备位经筵辄敢以师臣自处欲求坐讲是时谏官孔文仲上章斥其狂妄果不能逃陛下知人之明即行显黜前谪之西京欲致之退思自省今既免丧除服还其旧任足矣一旦宠擢无名优进儒馆之职将何以惩戒妄人耸动多士况更直秘阁先朝故事必宿儒旧德处之使颐冒居此职众论所以不平也伏望少垂天听察其狂妄无补圣世罢去职名以厌公议夏四月丙寅殿中侍御史吴立礼言臣程颐进职无名曾具状论列未蒙施行今窃见颐上表辞免观其辞语畧不引咎自讼乃敢要君乞归田里人臣狼戾公无忌惮未见有如此者按颐素履非正狂妄躁进言其内行则娶甥以为妻论其沽名则素隱而行怪以游说为事业以捭阖为功能邪说诡羣足以乱政兼颐昨以罪谴谪曾未满秩即丁父忧朝廷因其除服免丧躡进儒馆之职可谓异恩即上章求避不以宠渥逾分恳辞优命而乃望望不足自欲归就田里夫人臣进退固有大义苟无意禄仕自当求致王事以礼而去未闻去就轻易率尔要君苟不明正典刑何以惩诫在位侍讲范祖禹奏臣伏见元佑之初陛下召程颐对便殿自布衣除通直郎充崇政殿说书天下之士皆谓得人虽真宗之时种放亦不过如此也孔子曰举一人天下莫不归心者何也为善于幽隱者知其必不废也陛下用颐实为希阔之美事纔及岁余即以人言罢之颐之

经术行谊天下共知司马光吕公着与相知二十余年然后举之此二人者非为欺罔以误圣听也颐在经筵初望皇帝陛下进学语实繁多顾草茅之人一旦入朝与人相接不为关防未习朝廷事体迂阔则固有之又谓颐欲以故旧倾大臣台谏官王岩叟朱光庭贾易皆素推服颐之经术故不知者指为颐党颐匹夫也有何权势动人而倾大臣役台谏自古处士入朝必有过人之能致太平之术故其责实常重至于不贤者则直以处士为矫讦为沽激为钓名又处士多不次得美官故其憎疾常多夫以贤者责望之事而慎择经筵之官如颐之贤乃足以辅导圣学至如臣辈叨备讲职实非敢望颐也臣久欲为一言怀之累年犹豫不果使颐受诬罔之谤于公正之朝臣每思之不无恨也今臣已乞去职若复召颐劝讲必有补圣明臣虽终老在外无所憾矣五月癸未监察御史董敦逸言见左通直郎直秘阁程颐辞免职名表谢云不用则已获罪明时不能取信于上又有道大难容名高毁甚之语怨躁轻狂不敢缕数臣按颐起自草泽劝讲经筵狂浅迂疎妄自尊大当时有所建议人皆以为笑而又奔走公卿之门动摇言路陛下圣明察其疎缪止令罢职亦朝廷之宽恩也颐近因丧服除朝廷以职名加之舆论沸腾皆云虚授今颐犹不自揆肆为狂名至引孟子伊尹以为比又自谓得儒者进退之义惑众慢上无甚于此伏望朝廷追寝新命以叶公论丙戌诏程颐许辞直秘阁权判西京国子监差管勾崇福宫颐初表言昨臣被责命出为外官夙夜靡皇惟是内省始蒙招致之礼旋为黜逐之人将何颜以立朝当自劾而引去至于五请而后听岂可力辨以求申遂且从容以须替罢未至任满遽丁家艰思无忝于所生惟坚持于素节未终丧制已降除书上体眷恩内深愧惧伏念臣志存守道识昧随时俗所忌憎动招谤毁昨蒙擢任既以人言而被黜为朝廷羞矣今复授以职任适足重为朝廷羞无所益于明时徒取笑于后世伏望圣慈矜察愚诚追寝恩命臣昨因丁忧既已去官今来所降告命不敢祇受已于河南府寄纳伏望朝廷检会前来五次奏陈特降旨挥许归田里诏不许颐又言伏念臣力学有年以身任道惟知耕食以求志不希利达以干时陛下诏起臣于草野之中面授臣以讲说之职臣窃思之以讲学待人主苟得致人主以尧舜禹汤之道则天下享唐虞夏商之治儒者逢时孰过于此于是幡然有许国之心在职岁余凡夙夜毕精竭虑盖非徒为虚辞解释文义惟欲积其诚意感通圣心度交发志之孚方进沃心之论实觐不传之学复明于今日作圣之效逮继于先王自二年春秋来臣每进说陛下尝肯首应臣臣知陛下圣资乐诚自以为千载之遇也不思道大则难容节孤者易蹶入朝见嫉世俗之常态名高毁甚史册之明言如臣至愚岂免众口不能取信于上而欲为继古之事成希世之功人皆知其难也臣何狂简敢尔觐幸宜其获罪明时见嗟公论志既求于事道义当敢于为臣屡恳请而未从俄遭忧而罢去衔恤既终于丧制退休当遂于初心岂舍王哉忠恋之诚维至不得已也去就之义当然自惟衰迈之体躯得就安闲之散地信今传后更有望于残年行道致君甘息心于圣世岂期矜贷尚俾甄升恩虽甚隆义则难处前日朝廷不知其不肖使之劝学人主不用则亦已矣若复无耻以苟禄位孟子所谓是为垄断儒者进退



当如是乎臣非苟自重实惧上累圣明使天下后世谓朝廷特起之士乃贪利苟得之人甚可羞也况朝廷平臣无可受之理敢冒万死上还恩命伏乞检会臣前后之奏特赐指挥既有崇福之命颐即承领敕牒但称疾不拜假之百日亟寻医讫不就职【余见党事门】

### 苏轼立朝大槩

苏轼字子瞻老苏先生洵之长子也嘉佑二年中进士第时欧阳修考试礼部疾时文之诡异思有以救之梅圣俞与其事得公论刑赏以示文忠文忠惊喜以为异人欲以冠多士疑门下曾子固所为置之第二以书谢诸公文忠见书以书语圣俞曰老夫当避此人放出一头地士闻之始哗不厌久乃信服六年试中制科初父洵来游京师翰林欧阳修一见大称叹以其所献文着于朝由是名动京师士争诵其文时王安石名始盛党与倾一时修亦善之劝洵与安石游安石亦愿交于洵洵曰吾知其人矣是不近人情鲜不为天下患作辨奸论以刺之文既出安石始衔洵至是轼中制科安石问吕公着见苏轼制策否公著称之安石曰全类战国文章若安石为考官必黜之故安石修英宗实录亦言洵有战国纵横之学【丁未录】英宗在藩闻公名位即欲以故唐事召入翰林授知制诰韩琦曰苏轼远大之器也他日自当为天下用在朝廷培养之今骤用之适足以累之也上曰知制诰未可与修注可乎琦曰近例当召试上曰未知其能否故试如苏轼有不能邪琦言不可乃试而命之及试二论入三等得直史馆他日欧阳修具以告轼轼曰韩公所以相待乃古所谓君子爱人以德也【师友谈记】三年洵以修礼书成方奏未报而卒赐其家银百两绢百疋轼辞所赐求赠官从之赐光禄寺丞轼丁忧服除时熙宁三年也【长编】王安石用事多所建立公与安石议论素异既还朝置之官诰院时朝廷议更科举上疑为轼议既上【轼议详见科举门】上览之曰得轼议朕意释然矣即日召见问何以助朕轼曰臣窃意陛下求治太急听言太广进人太锐陛下安静以待物之来上竦然曰卿三言朕当熟思之安石之党滋不悦命摄开封推官欲多以事困之公决断精敏声闻益远会上元买浙灯轼密疏奏即有旨罢【论举子举合事详见科举门】自是论事愈力发策上书安石愈恨【事见安石门】轼有外弟与之不叶安石召之问轼过失其人言向丁忧贩私盐苏木等事安石大喜未有以发也会举谏官范镇以轼应诏谢景温恐轼为谏官攻介甫之短故力排之【景温言轼事见安石门】公未尝一言自辨乞外任避之通判杭州时行新法轼于其间尝曰法以便民民赖以安徙知密州【论手实法事见纷更门】知徐州是岁河决曹村泛于梁山泊溢于南清河城南两上环绕吕梁自步抱之汇于城下城将败轼庐于城上过家不入卒全城以闻又请筑堤以虞水再至徐州人至今思之徙知湖州以谢表上有陛下知其愚不适时难以追陪新进察其老不生事或能牧养小民表闻而御史何正言舒亶以为语涉谤讥又售于市得轼所为诗文悉疏上之时有朱寿昌者少不知母所在弃官求之既得朝士以诗美之轼诗有云感君离合我酸辛此事今无古或闻之语李定深以为恨定不服母丧轼以为不

孝后定为御史继言轼作诗讪上有诏下李定推治闻奏至遣官逮赴御史狱必欲寘之死张文定范文忠上疏救上不报天下知不免矣锻炼久之不决弟辙上疏祈哀乞纳在身官以赎其罪又不报时宰臣吴充见上曰魏武帝何如人上曰何足道充曰陛下以尧舜为法薄魏武固宜魏武猜忌如此而能容祢衡陛下法尧舜而不容苏轼何也上曰朕无他意止令对狱核是非尔行释之矣直舍人院王安礼亦乘间进曰自古大度之主不以语言罪人轼文士本以才自奋谓爵位可立取顾碌碌如此然其中不能无■〈角央〉望今日一旦寘于法恐后世谓不能容臣愿陛下无庸竟其狱上亦自怜之深然其说曰朕固不深谴特欲申言者路尔即为卿贯之安礼安石弟也已而轼自狱中作诗寄辙诗曰圣主如天万物春小臣愚闇自忘身百年未老先偿债十口无归要累人是处清山可藏骨他年雨夜恐伤神与君世世为兄弟更结来生未有因诗闻上览之促其狱庚申轼坐贬黄州安置驸马王洙停职苏辙王巩并责外州监税受轼诗文黜罚者自太子少师张方平以下二十三人公至黄州幅巾芒履与田父野老相从溪谷之间筑室东坡自号东坡居士七年春责授黄州团练轼移汝州轼言汝州无田产徙居常州从之元丰中轼系狱御史上本无意深罪之宰相王珪进呈忽言轼于陛下有不臣意上改容曰不至是也卿何以知之珪因举轼桧诗根到九泉无曲处世间惟有蛰龙知之句对曰陛下飞龙在天轼以为不知己而求之于地下蛰龙非不臣而何上曰诗人之词安可如此彼自咏桧何预朕事珪语口塞章惇从旁解之曰龙者非独人君人臣俱可言上曰荀氏八龙孔明卧龙岂但皆人君也耶遂薄其罪黄州安置然上每怜之日语执政曰国史大事朕意欲俾苏轼成之执政有难色上曰非轼则用巩后巩亦不副上意上复有旨起轼以本官知江州明日改承议郎江州太平观又明日命格不下于是出手札徙轼汝州有苏轼黜居思咎阅岁滋深人才实难不忍终弃之语轼即上表谢前北京师盛传轼已白日仙去上对左丞蒲宗孟叹惜久之故轼表有疾病连年人皆相传为已死饥寒并日臣亦自厌其余生之句士大夫知上卒喜之也会晏驾不果用八年哲宗即位复朝奉郎知登州至登五日召为礼部郎中时朝廷缘先帝意即欲用为起居舍人公力辞见宰相蔡持正自言持正曰公徊翔久矣朝中无出公右者公固辞元佑元年入侍延和三年迁中书舍人温公议改免役为差法【见役法门】公见之政事堂条陈其不可温公忿然轼曰昔韩魏公刺陝西义勇公为谏官争之甚力魏公不乐公亦不顾昔闻公道其详岂今日作相不许轼尽言耶君实笑而止公知言不用乞补外君实始怒有逐公意会君实病卒台谏希合其意求公瑕疵不得则因缘熙宁谤讪之说以病公自是不安于朝寻除翰林学士二年复除侍读每进读至治乱盛衰未尝不反复开导三年宣仁言神宗停筮看苏轼文字【事见宣仁门】苏轼读宝训雍熙淳化间【见宣仁门】十月苏轼上疏乞郡畧云近以右臂不仁两目昏暗坚乞一郡伏蒙圣慈降诏不允臣与故相司马光虽贤愚不同交契最厚光既太用臣亦骤迁在于人情岂肯异论但以光所建差役一事臣实以为未便不免力争而台谏诸人皆希合光意以求进用及光既没妄意陛下主光之言结党

横身以排异议其后范百禄与韩维争议刑名谏官吕陶又论维専权臣与此两人是实知旧因此韩氏之党一例疾指为川党臣二年之中四遭口语发策草麻谓之诽谤臣不早去必至倾危乞检会前奏施行常侍上读祖宗训因及时事公言及赏罚不明夏人寇镇戎杀掠几万人帅臣掩蔽不以闻恐浸成衰乱之兆当局者恨之公知不容乞外任四年知杭州时谏官言宰相蔡持正生安州作诗事公言朝廷欲薄其罪则于皇帝孝治为不足若深罪则于太皇太后仁政为少累宜皇帝降勅置狱逮治而太皇太后内出手诏赦之则仁孝两得宣仁后心善公言而不能用杭州适值岁旱公请于朝免上供米三之一米不翔贵复得赐度僧牒易米以救饥明年即减价糴常平米民遂免大旱之厄又为汤剂治病活者甚众修李泌六井以便民开湖筑堤通南北以便行者植芙蓉杨柳于上杭人名之曰苏公堤六年召入为翰林承旨公为常州日常人为公买田公有山寺归来闻好语之句会神考晏驾言者谓公闻讳而喜乞加深谴然诗刻有日朝廷知言者之妄寻逐公惧乞外补得颍州郡有宿贼尹遇杀捕盗吏兵非一公召汝阴尉李直方谓曰能擒此贼当力言于朝廷以行优赏直方退分命弓手访捕直方有母九十泣别而行手戟刺而获之然小不应格推赏不及公请以年劳朝请郎为直方赏卒不从七年徙扬州未阅岁以召还寻迁礼部兼端明殿翰林侍读两学士【高丽来朝见绍述门】临事必以正乞守郡自劾八年二月上疏言近岁法令始有五穀力胜税钱使商贾不行农末皆病百世之下书之青纪臣窃为圣世病之数日又再言云此事中于天圣附令乃仁宗一代盛德之事陛下欲祖述成庙须行其实方可动民五月同范祖禹并上言唐宰相陆贄才本王佐学为帝师臣等欲取奏议稍加校正缮寫进呈董敦逸黄庆基言轼兄弟不当罢【见绍述门】六月乞知越州不允除知定州兵久不治军政太弛将吏不识上下之分公命举旧典元帅常服坐帐中将吏戎服奔走事讫无敢慢者定人言自韩魏公去不见此礼至今矣时方例废旧人公坐草责降官制词言者诬以谤讪绍圣元年遂以本官知英州未至安置惠州公谪惠州以少子过自随瘴疠所侵蛮蜒所侮胷中泊然无所芥蒂人无贤愚皆得欢心又率众为桥以济病涉惠人爱敬之三年言者以流窜为未足四年安置昌化军昌化非人所居公食芋饮水看书以为乐时从父老游亦无间也公平生笃于孝友见善称之如不及见不善斥之如恐不尽见义勇为而不顾其害用此数困于世元符三年大赦得还复朝请郎提举成都玉局观居从其便归毘陵病暑着小冠被半臂坐船中夹岸千万人随观之其为人爱慕如此

靖国元年秋告老以本官致仕遂以不起未终旬日独以诸子侍侧曰吾生无恶无哭泣以怛化问以后事湛然而逝讣闻吴越之民相与哭于市君子相吊于家四方无贤愚皆咨嗟出涕太学之士数百人相率饭僧惠林佛舍以哭李象为之疏文曰德尊一代名满五朝道大不容才高为累惟功能之盖世致忌媚之如仇久蹭蹬于禁林不遇故去遂飘零于瘴海卒老于行方幸赐环忽闻亡鉴识所未识罔不蠹伤闻所未闻吾将安放皇天后土知一生忠义之心名山大川还千古英灵之气系斯文之兴废与吾道之盛衰



兹乃公议之共忧非独门人之私议建炎初有旨赠资政殿学士録其后干道六年知眉州何耆仲请于朝賚旨特赐谥文忠未几又特赠公太师

### 蔡确新州之行

哲宗皇帝元佑二年二月诏观文殿学士知陈州蔡确落职守本官知亳州以御史中丞傅尧俞等劾奏确位居宰相窃弄威福故纵其弟养成奸赃故也王岩叟等言确【见元佑台官论事门】二年二月新知亳州蔡确知安州台官有言故也知蔡确复观学士知邓州四年二月知邓州蔡确为观学士知邓州确落职再及一期故有是命确在邓州尝上章陈乞颖昌府以便私计左正言刘安世言确所陈虽未知可否之报而缙绅之议率皆不平敢具金言上达天听按确奸邪阴险盗据宰席不能正身率下宣示教化而纵其弟硕招权纳赂赃污狼藉有司论罪当以大辟陛下特加宽贷止送韶州编管确本同居众谓预闻其事朝廷既不穷治惟以失教责之削其罪名出临偏郡仅能周岁易守南阳当时议者以为牵复太速出至贬所未及逾年确遽上言乞令内徙陛下屈天下之法移置黄州自请边镇臣窃谓确所以敢萌意外之望益肆无厌之求者盖见近臣□□是以先用其弟量移之请尝试朝廷既不能沮可其奏确遂敢凌蔑公议轻侮朝廷虽屡蒙非常之恩复托亲老愿移大藩盖有以启之也伏望圣慈明勅三省确奏以正国体夏四月先是朝散郎□□伏见朝廷牵复知邓州蔡确观文殿学士此则朝廷念旧推恩无复于确矣然确谪安州不自循省包蓄怨怒实有负于朝廷而朝廷不知也故在安州时作夏中登车盖亭絶句十篇内五篇皆涉讥讪而二篇讥讪尤甚上及君亲非所宜言臣谨一一笺释使义理明白知臣之不忘其诗云风摇熟果时闻落雨折幽花亦自香叶底出巢黄口闹波间逐畔小鱼忙此一篇只是讥刺昨来言事者及朝廷近日擢用臣僚亦不曾谤及君亲矫矫名臣郝觚山忠言直节上元间钓台羌没知何处叹息思公俯碧湾右此一篇讥谤朝廷情理切害臣今笺释按唐郝处俊仕高宗时高宗欲逊位武后处俊谏不宜持国与人由是事沮臣观太皇太后听政尽用章献明肃故事而主上奉事太母莫非尽极孝道太母保佑慈爱而蔡确责守安州便怀怨恨公肆讥谤今之处世而思处俊其意何也又最后一篇云喧豧六月浩无津行见沙洲东两滨如带溪流何足道沉沉沧海会扬尘海有扬尘人寿几何非佳语车盖亭诗公事无多客亦稀朱衣小吏不便随溪潭直上虚庭里卧展柴桑处士诗一川佳景疎帘外四面风凉曲槛头绿野平流来遠棹青天自雨起灵湫静中自足胜炎蒸入眼兼无俗物憎何处机心惊白鸟谁人怒剑逐青蝇处厚又奏非为蔡确安州诗讥讪朝廷上及君亲遂有状缴奏窃虑确有分析称所思郝处俊不为此事臣今以旧唐书考之处俊所进见者数事惟此事在上元三年即上元间也故确诗云忠言直节上元间正思此也吴安诗为右司谏上疏论确训后二日进呈吴安诗疏太皇太后宣谕安诗论确讥讪却不见确文字勘会得吴处厚缴奏乃是通封只作常程便降付尚书省令再进入要看遂同后疏进入寻复降出时左谏议大夫梁焘右正言刘安世各已两上疏壬子进呈安世等疏诏令蔡确仍令知安州钱景阳

缴奏确元题诗大夫梁焘又疏论蔡确讪罪状明白令确分析诏安州限三日趣其报朝廷既用呉处厚言今中丞李常侍御史盛陶亦各上疏意乃佑确实欲罪处厚而不敢正言之先是左谏议大夫梁焘右司谏呉安诗右正言刘安世共奏早来臣焘臣安诗延和殿奏对具陈蔡确怨谤君亲情理切害因曾禀言路更有何人论列伏蒙宣谕惟卿等及刘安世外他人别无章疏臣等不谓御史当可言之地并不纠劾又虑奸党变乱公议别有奏陈恐开告讦之路臣等尚虑御史台知臣等已有论奏备礼一言以塞外议若果如此则其包藏奸状益更明白陛下留臣等此奏候蔡确事毕明正其罪五月观文殿学士知邓州蔡确言臣僚上言臣在安州作诗涉讪讠诏臣开具因依奏闻一言谪降安州包蓄怨心形于篇什此是臣僚横加诬罔激怒朝廷而实不知往年弟硕坐事由臣愚昧失于教察上表待罪乞行诛责上荷圣恩委曲保全止落职移知安州天地之德至大至厚臣日夜感谢未知何以圖报且喜且慍不以义者小人之事也臣虽愚陋亦粗闻事君行己之大方况又当感而怨岂人情哉臣前年在步州其所居西北隅有一旧亭名为车蓋瞰陨溪对曰北山公事罢后休息其上耳目所接偶有小诗数首并无一句一字辄及时事其辞浅近读便可晓臣僚却于诗外方笺释横见诬罔谓有微意如此则是凡人开口不及某事而皆可以某事罪之曰有微意也臣旧郝处俊钓台因叹其忠直见于诗句臣僚谓臣讪谤君亲此一节中伤臣最为深切又指臣使东海扬尘故事按神仙传言大海中扬尘此是神仙麻姑王方平之语也又言古今诗句用此事者稍多只如近年苏轼作坤成节大宴数语亦云采得蟠桃归献寿蓬莱清浅半桑田蓋祝寿之辞犹用之何得谓臣用此故事为非佳句先是安焘尝与同列曰海变桑田事苏轼亦尝用作圣节乐语于是确果以轼为言众皆疑焘实密风之也长编有言辛巳诏蔡确责授左中散大夫守光禄卿分司南京起居舍人权中书舍人王嵩叟行蔡确责辞曰人臣之义莫重于爱君天下之诛无先于讠上确奸回无惮险诋不疑以舞文巧诋为身谋以附下罔上为相业先帝与子何云定策之功太母立孙乃敢贪天之力阴结朋邪之助显为众正之仇日者宠荣充满于冢司赃贿贯盈于季弟坐观奢靡之无度不问贪饕之所从阳若不知潜与为地朕既屈邦宪以贷卿万死又抑人言而置卿两全曾不反思尚兹归怨形于指斥播在歌诗托深意以厚诬包祸心而莫测味思人之作见切愤于权宜览观水之章知乐逢于变故夫岂沾沾之多易蓋皆怏怏之余言尚以列卿俸分留务聊着为臣之戒用严垂世之规往服寬恩罔貽尤悔呉处厚常从蔡确为山陵司掌笺奏官处厚欲确以馆职荐已而确不荐用由此怨确故缴进确诗士大夫固多嫉确然亦不直处厚云蔡确既责左谏议大夫梁焘左司谏呉安诗右正言刘安世以为责轻御史中丞傅尧俞侍御史朱光庭相继论列安世言臣窃闻朝廷以蔡确为光禄卿分司南京者臣按确尝位宰相辅政无状弟硕赃污罪恶贯盈确本同居谓预其事陛下既不穷治又贷硕死仍免决配惟令编管确以失教为名止从薄责朝廷之恩亦已极矣而确不知圖报犹怨望作诗什辄敢讪讠罪状显著法所不赦而今来责命太轻未厌輿议非惟失祖宗之意亦恐伤陛下孝

治之风伏望圣明更加详虑早加窜殛以慰人望右谏议大夫范祖禹言确之罪恶天下不容莫逃公议伏乞处以典刑更赐重窜初辅臣以帘前共议再责蔡确独纯仁与王存以为不可纯仁曰方今圣明宜务宽厚不可以语言文字之间暧昧不明之过诛窜大臣今日举动宜与将来为法式此事甚不可开端也又引尚书所言小人怨汝詈汝则皇自敬德厥愆曰朕之愆允若时不啻不敢含怒之说丁亥诏蔡确责授英州别驾新州安置给递马发遣沿路州军差丞务郎已上官及量差人伴送出去逐州交割如无丞务已上即差本路职官吕大防及刘摯等初以确母老不欲令过岭太皇太后曰山可移此州不可移大防等遂不敢言既于帘前画可而退范纯仁复留身揖王存进说以为不宜置确死地太皇太后不听纯仁退谓大防曰此路荆棘七八十年矣奈何开之吾侪正恐亦不免耳权中书舍人王嵩叟行确责词云圣人察言以观行要在去凶春秋原议而定诛贵乎当罪义之所在朕不敢私蔡确象恭滔天怀谗迷国同林甫之深阻固不易窥甚卢

■〈木巳〉之奸邪信其难辨忠义痛心于四海善良侧目于两朝家积之殃昧而不知已求之祸大而莫测阴遣腹心之党自称社稷之臣期惑众人邀福幸赖神夺之鉴天诱其衷使以不道之言发于缘情之作险意潜惊于众听丑词明播于公庭虽朕德之所招顾母慈之何负昨奉圣训稍从宽科而公议沸腾予心惻怛末丧朋邪之气只伤慈孝之风优施笑君犹行夹谷之戮驩毘党恶尚有崇山之诛宜正典刑以威奸慝假再生于东市保余息于南荒不独成朝廷今日之安盖将为国家无穷之计且非体遂行已而范纯仁亦不言刘摯曰明日当于帘前论之然彦臣等乞无改命他日太皇太后御延和殿宣谕三省曰前日责降蔡确外议如何宰臣吕大防等曰确积恶久矣今来罪状不堪须合如此施行惟是确之朋党必有不乐者又宣谕曰确罪前后不一昨终以先朝旧相因其自请备朝廷礼数令其外任辄怀怨望自谓有定策大功意欲他日复来妄说事端眩惑皇帝以为身谋皇帝是神宗长子子继父业其分当然昨神宗服药既久曾因宰执等对时吾尝以皇帝所写佛经宣示其时众中止是首相王珪因奏延安郡王当为皇太子余人无语安焘其时见确有何策立功劳若是确他日复来欺罔上下岂不为朝廷之害恐皇帝制御此人不得所以不避奸邪之怨因其自取如此行遣盖为社稷也五月大夫梁焘言今月二十四日有本取公事同右正言刘安世延和殿进呈蒙太皇太后宣谕近日行遣蔡确只为官家及社稷不为自家卿等言事尽忠太皇太后与官家总知今后常如此者又曰臣僚初时甚好纔到富贵便须改节焘遂复奏曰小人但务奸邪以保富贵朝廷亦可保其富贵太皇太后曰如能以正道始终所得富贵更是长久御史中丞傅尧俞侍御史朱光庭言邢恕乃蔡确死交其奸状众所共知确既贬窜其徒不无反侧若重责恕其它一切置之则天下服而众心安矣是日诏丁忧人前朝奉郎直龙图阁邢恕服阙日落职在城盐食兼酒税务中书舍人郑雍行责词曰言行坚伪王者之所必诛圣人之所不赦邢恕诵古训典服儒衣冠不师孔孟之言專鼓仪秦之舌假善类如市凶人既窜余焰未消盖正典刑以清丑孽汝之自贻伊戚其又何辞焉吾于屈法申恩可谓无



负矣往服寬典尚蓋尔愆先是恕自襄州移汝州專抵邓州见蔡确相与谋所造定策事后移河阳司马康始除丧赴阙恕特招康道河阳因言确有大功不可掩劝康作书称确为他日全身保家之计康与恕同年登科又以恕出其父光门下信之不疑作书如恕言留恕本意必得康书者蓋以谓司马光之子云尔则确定策事可取信于世不疑既而梁焘自潞州以大夫召焘已道温县入朝恕使人要焘出河阳焘与恕有旧既至恕连日夜定策论确且康与确书为证焘不悦及当言路会吳处厚奏确诗焘遂与刘安世等共请诛确既贬窜恕亦坐责康初欲从恕邵雍之子伯温谓康曰公休除丧未见君不宜枉道先见朋友康纯直不意恕欺已且曰已诺之矣伯温曰恕倾巧或以事要公休公休若从之则必为异日之悔矣及焘等论确恕罪亦指康书诏令康分析康乃悔之初蔡确之贬新州也邵伯温曰公卿大夫当知蔡确奸邪投之死地何惜然尝为宰相当以宰相待之范忠宣有文正余风欲薄其罪确死南荒岂独有伤国体哉刘摯等疾恶已甚貽后日缙绅之利忠直虽有余不无过也吳处厚以前宰相诗为讥谤非所以厚风俗罪之可也蔡确故大臣不问以愧其心朝廷当罪治确及其贪妄定策之功使诬罔之迹晓然以诏天下后世罪其造谋者可也呜呼圣初亦贤者有为之时也而用章惇之凶暴蔡卞之奸邪一时轻躁险薄之徒皆进使宣仁被谤哲宗致疑离间骨肉悲夫六年夏五月先是蔡确母胡氏进状及诉于尚书省乞量移确三省至宣州年月进呈太皇太后不许确独许迁惠卿吕大防刘摯本与确为地方乃不知本谋傅尧俞窃语王嵩叟曰吉甫得胡氏力八月两宫幸李端愿宅临奠既还蔡确母胡氏呼太皇万岁臣妾有表卫士取而去是日丁酉也翌日三省进呈胡氏马前状太皇太后宣谕曰确不为渠吟诗谤讟只为此人于社稷不利若社稷时之福确当便死此事公辈亦须与挂意摯曰只为见吕惠卿一年量移便来攀例苏辙曰惠卿量移时未有刑部三年之法太皇太后曰更说甚法大防曰乞令开封府发遣从之既而摯语大防作小贴附录黄奏初云早来帘前议欲开封府发遣恐致喧渎且令告示诏可给事中朱光庭还录黄言确罪恶比于四凶四凶既窜岂有复还之理乃以刑部常法预先告示理极不可遂寝前诏也而执政又聚都堂议欲用光庭论驳告示摯曰告示何者再三迟疑傅尧俞曰告示不行大防又曰适以奏知摯曰难为坐圣旨告示只本房告示遂令刑房批帖子告示更不复坐圣旨既而复降黄录过门给事中虽欲再论列不可得矣

绍圣三年九月中书舍人叶祖洽言臣尝论前日受遗之臣朝廷所当崇报今故相确虽蒙朝廷牵复官职然其所得恩数与平时辅相无异近时司马光吕公着等皆以安逸歿于府第恩礼隆厚賻赠优渥而确以常与受遗之列为元佑人所嫉流离贬斥卒死岭南诸子居忧婚嫁未了服除之后私用尤窘伏望圣慈加隆宠数使忠义之士闻之感动诏特赐确本家宅一区

契丹女真用兵始末

女真国本肃慎氏东汉谓之挹娄元魏谓之勿吉隋唐谓之靺鞨五代始号女真太

祖时屡修贡太宗时上言契丹怒其朝贡置兵绝其路请兵伐之上降诏口口不为出师大中祥符后绝不与中国通元丰中常降诏高丽令来市马无至者女真有数种江之南为熟女真北为生女真生女真之族尤繁而安班者长也孙曰英格子曰阿固达为人沈毅有大志初契丹国旧为盗捕之获潜奔女真国命英格图之迁延数月漫云已诛绝契丹进其父子官自是阴怀异志力农积粟练兵牧马多金珠赂契丹权贵十余年未以发也是年英格死阿固达立政和四年契丹虐女真捕海东青求珠女真不胜求而叛时政和二年春辽主延禧如混同江钓鱼故事女真国主千里内皆会酒酣延禧使诸部歌舞为乐阿固达不从禧欲诛之枢密萧奉先曰小人何知杀之伤向化心阿固达既归疑契丹知意后呼之不至矣夏初命童贯为辽国生辰蔡京曰遣以宦官是无人矣贯使辽燕人马植密邀于路为言取燕之策贯挟以归奏赐姓名赵良嗣后辽数移檄索之贯讳不与平燕议自此始十二月女真阿固达率诸部叛辽弟乌奇迈尼玛哈乌舍为谋主尼楚赫伊喇罗索栋摩等为将辽主不以介意遣高寿任统渤海军讨之大败复以萧似先帅军五千余屯出河女真掩其未阵袭之似先兵溃追杀百里延禧自两败召宰相张琳吴庸付兵十万使讨之奉先不知兵琳庸御众无法数月尽为女真所陷遂有轻契丹心矣五年春辽攻契丹黄龙府陷之辽主亲征车骑亘百里分路进发期必灭女真女真大惧阿固达哭谓众曰始与汝曹起兵苦契丹之暴欲自立国尔今天祚亲至非人人效死莫敢当也不若杀我以降诸酋皆拜曰事至此当誓死一战辽军深入女真乘契丹未阵二面急攻延禧大败女真乘胜遂并渤海辽阳所管州五十里六年夏初知雄州和洗奏契丹为女真所败燕亦叛董才斩监军首来献上意欲兴师枢密邓洵武曰南北通好久矣今信叛边言而败百年之盟不可上大悟八月契丹女真相持上欲复燕云御札委洪中孚经畧中孚上言契丹通好百余年女真踈远不可深知七年夏朝廷方谋复燕以韩粹彦知中山府粹彦陛辞曰国家奄有四海安用是一弹丸土上亦不之罪建隆以来女真常至登州买马故道犹存有汉儿高药师者常隶怨军见契丹乱由间道来奔八年辽燕王淳将讨怨而女真至淳与遇阵未合而溃延禧在京闻报震惧私谓左右曰女真必来吾与宋为兄弟夏为舅甥何惧哉八月女真趋辽中京延禧恐其袭已迁云中辽东人杨朴劝女真称皇帝以王姓以文名以国产金故称大金改元天辅皆从之重和二年春女真使李善庆入国门诏蔡京童贯谕以夹攻取燕之意

宣和元年六月高丽国忽上奏以其王病求医上命择二良医往岁余方遣归奏馆二医甚勤谓曰高丽小国世荷国恩不敢忘闻天子用兵辽人实兄弟国苟存之尤足为中国捍边女真深沈不可测也愿告之天子早为备之二年九月女真使至议与中国分地及岁赐十月马政等达金主阿固达帐前议久不决彼以南朝无兵备若我灭契丹据燕与宋为邻徐议未迟惟尼玛哈云南朝四面被边无兵何以正国未可轻之于是持书来略云前书所约夹攻而许燕京今更欲西京请就便计度阿固达初不认已许西京或云赵良嗣向云已许盖诳朝廷实为祸本云辽将余覩叛归女真四年三月金攻陷辽中

京延禧率兵五千奔云中留燕王淳守国遂入夹山怨军谋立淳淳不得已即位将下诏复幽燕故地遣童贯勒兵巡边四月贯至雄州分西兵两路种师道总东路兵屯范村敌亟来攻凡驻十二日敌战甚力二人以贼势尚炽议还军六月退保雄州是日敌兵大至城下敌使王介儒至曰女真背初约亦南朝所知者也舍此不图结密迩之邻基他日之祸可乎贯遣叅议官刘韜与介儒议再修和好上闻之诏班师八月金人取云中未报师期忽闻童贯举兵趋燕地南朝径取燕守關则岁赂不可得遂遣臣持书来上待之甚厚时常胜军管押郭药师有意归朝召所部曰天祚失国女政不纲宋天子重兵压境此男子取金印之时于是万国响应遣奉表以涿易二州降受之军大振伪太后萧氏惧遣臣萧容表称藩乞捐旧币复旧好宋昭上书亟言辽不可攻金不可邻异日金人决先败盟为中国患乞斩首谋赵良嗣等学士任谅贻时相书谕耶律氏不当灭絶因陞对郭药师必放人初为狂冬十月改燕山府九州岛为郡宣抚司刘延庆统大军与郭药师自雄州新城又遣刘光祖杨可世出安肃军趋易州遂会涿州时兵众五十万驻芦沟河药师入燕城契丹兵尚众药师屡败烧营而退众军溃自熙宁所积军实扫地尽矣初童贯蔡京再举取燕不下惧获罪密遣客王环由飞狐路捣阿固达令围之遂分三道进军契丹闻阿固達至弃關而遁赵良嗣等至金国军前谕燕租赋五年上许银绢代赋二月良嗣再使金书畧曰本朝与贵国通好每曲从所欲今代税之物悉如来谕阿固达大喜遂议归云中三月遣使杨璞以誓书及燕京六州来归四月丙申至雄州庚子贯攸帅师入燕先曰交割后曰抚定燕之金帛子女职官民户为金人席卷而东朝廷捐岁币数万得空地而已庚戌曲赦河东北燕云路初尼玛哈止欲割涿易阿固达曰海上盟勿忘也我死汝则为之金书初不及西京朝廷信良嗣等诬谓金人诚归云中故曲赦河北东及燕云山后兵端之始也五月阿固达卒弟乌奇迈立燕人张穀任辽为节度使知平州事知国必亡籍丁壮练兵为备金既下燕穀以平州来附八月河北转运吕颐浩奏燕山之势难守虽穷天下之力竭天下之财必无人善其后十一月张穀遣弟通欵朝廷授秦宁军节度使世袭平州时外廷莫知其端良嗣力争不可恐必招女真之兵不从金人知之千骑袭破平州得所赐穀诏穀挺身走燕弟怀御笔又为金得自是归曲朝廷六年六月诏曰自燕云之复两河京东累经调发民力已弊不假诸路其何以济其措置调夫徧率天下得二十万而怨结四海矣七年春辽主窜入阴山时闻尼玛哈归国率众南来为金所败又畏中国乃谋奔西夏未至金人擒之时边隙已开北人冯忠信知夏人与女真有入寇之约窃书以驰告边臣以闻虽赏以官不敕武备时河东奏尼玛哈至云中经营南寇初金既得辽主即谋南侵连遣三使且覘道路使不疑会义胜军叛甚言中虚实由是刘彦宗等劝尼玛哈言南朝可图因粮就兵可也尼玛哈决意入寇十一月童贯至太原九月诏令宣抚遣马扩使尼玛哈至境严军以待首议立后事曰今当力辨是非吾遣人如宣司矣使至太原倨甚曰速割东河河北大河为界贯闻束手无策亟遁还韜里雅布军已压境郭药师率官军迎降张令徽遁还金知蔡靖吕颐浩等置军中以行尼玛哈军犯朔武



义胜军开门献城金人至武州汉儿内应遂失朔武长驱至代遂陷代州安抚使史抗迎战死之至忻州忻守贺权开门张乐迎之时上恭谢毕始出敌犯界密报宰执又与匿之癸丑童贯太原遽回中外泮然如此边事作矣初祖宗以梁门遂城为安肃保信军自童贯等即得燕山谓二县在内也废之移军营毁楼至诏复为军敌已大入尼玛哈引矣围太原干张孝纯副总管王亶婴城固守提举郑■〈言包〉自城中出传诸郡始筑城点丁为守御计金人围中山府己未下诏畧曰望四海勤王之师宣二边御敌之畧其草泽异才有能出奇计或使疆外任以不次尤异者以将相待之应中外并许直言李弥大谏上毋亲征且召四辅及诸道兵入卫又择精兵良将假道高丽以捣女真之虚不报诏师道为河东北制置使何权副之上将谋内禅先召宰执书传位东宫字庚申擢敏章诏传位皇太子自称道君退居旧宫

太平治迹统类卷二十五

●钦定四库全书

太平治迹统类卷二十六

（宋）彭百川 撰

祖宗圣学【范祖禹帝学附】

建隆元年正月幸国子监二月又幸诏加饰祠宇及塑绘先圣先贤先儒之像帝亲制文宣王兖国公二赞三年六月以右谏议大夫崔頌判国子监始聚生徒讲学或遣中使以酒果赐之因谓侍臣曰今武臣欲尽令读书习于为治之道帝召宗正丞赵孚对后殿令讲周易谓左右曰孚讲说精博亦可赏也四年四月丁亥幸国子监

开宝元年知制诰李穆荐王昭素召见便殿赐坐令讲易干卦因访以民间事昭素所言诚实无隐帝嘉之帝自开宝以后好读书尝叹曰宰相须用读书人赵普为相帝尝劝以读书帝读尚书因叹四凶之罪止从投窜何近代法网之密耶

太平兴国八年以听政之暇日阅经史求人以备顾问始用著作佐郎吕文仲为侍读每出经史即召文仲读之帝语宰相曰史馆所修太平总类自今日进三卷朕当亲览宋琪曰陛下好古不倦观书为乐然日阅三卷恐至罢倦帝曰朕性喜读书开卷有益每见前代兴废以为鉴戒虽未能尽记然未闻未见之事固已多矣此书千卷朕欲一年读徧因思好学之士读万卷书亦不为难

端拱元年八月幸国子监即召李觉令对御讲说尝讲易之泰卦从臣皆列坐觉因述天地感通君臣相应之旨帝甚悦赐帛百疋明日谓宰相曰昨听说泰卦文理深奥足为君臣鉴戒朕与卿等当遵守勿怠

淳化五年十一月幸国子监召直讲孙奭讲尚书判监李正执经讲尧典一篇未毕遽令讲说命三篇帝曰尚书王言治世之道说命居最文王得太公高宗得傅说皆贤相也复讲至事不师古匪说攸闻之句曰诚哉是言何高宗之时而有贤相如此嘉叹久之

真宗皇帝

真宗崇尚文雅自出阁后专以讲学属词为乐禁中游息之所皆贮图书置笔砚及即位每召诸王府侍讲邢昺及国子监直讲孙奭等更侍讲说质问经义久而方罢

咸平元年正月命择官详正经籍因访明达经义者参知政事李至曰国学讲书崔颐正博通诸经尤善诵读帝曰朕心中无事甚乐听书常求其人尤不易得翌日召颐正讲尚书于景福殿又于苑中讲大禹谟自是日令赴御书院侍对

三年七月以兵部侍郎杨徽之户部侍郎夏峤并为翰林侍读学士国子祭酒邢昺为翰林侍讲学士翰林侍读吕文仲为翰林侍读学士初唐开元中置侍读其后有翰林侍讲学士五代以来四方多事时君右武不暇向学故此职久废太宗崇尚儒术听政之暇观书为乐殆至宵分手不释卷由是命文仲为翰林侍读寓直禁中以备顾问然名秩未崇帝聪明稽古奉承先志首置此职择耆儒旧德以充其选班秩次翰林学士禄赐如之设直庐于秘阁侍读更直侍讲长上日给尚食珍膳夜则迭宿帝尝谓侍臣曰朕听政未尝虚度时日择颐编简素所耽玩但古圣奥旨有未晓处不免废忘昨置侍讲侍读学士自今令监馆阁书籍中使日具当宿官名进入朕欲召见访问自是多召对询访或至中夜焉帝御便殿命翰林侍讲学士邢昺讲左氏春秋侍读预焉五日讲春秋毕邢昺曰春秋一经少有人听多或中辍帝曰勤学有益最胜他事且深资政理无如经言朕听政之余唯文是乐讲论经艺以日系时宁有倦耶景德四年三月召近臣观书玉宸殿即帝偃息之所茵帟皆黄绢为之无文彩之饰聚书八千余卷帝曰此惟正经正史累校定者小说他书不置于此盖俯近禁中最便观览国家搜访图书其数渐广臣僚家有聚书者朕先借其目参校所少并令抄补所得甚多信非时平不能备帝宴饯侍讲学士邢昺于龙图阁上持礼记中庸篇昺指为天下国家有九经之语因讲述大学序修身尊贤之理皆有伦贯坐者耸听帝甚嘉纳

大中祥符元年十一月幸曲阜谒文宣王庙帝曰唐明皇褒先圣为王朕欲追谥为帝可乎或言宣父周之陪臣周止称王不当加以帝号遂止增美名帝命王旦选儒学之士旦荐崇文院检讨冯元帝召见命讲易泰卦元进说曰地天为泰者以天地之气交也君道至尊臣道至卑惟上下相与则可以辅相天地财成万物帝甚悦赐元绯章服称旦善择才

天禧元年二月诏太子中允直龙图阁冯元讲易于宣和门之北阁侍制预焉自是听政之暇遂以为常太宗时邢昺常纂札选以献其后帝阅书禁中得其本作赞以示近臣曰朕在东宫昺为侍讲尝徧讲九经书亦有三五过或十余过者唯尚书凡十四讲盖先帝慈旨勉励每旦听书食讫习射使与兄弟朝夕同处所习文武二事尔帝虽政务烦剧亦中夕披阅条其舛互纒悉穷究诸儒疲于应对为文务求不杂制述尤多中外书奏歌颂无不重复省览暑月或衣单絺流汗浹体而详览不辍文史政事之外无他玩好帝读经史择其可以为后世法者着正说五十篇其后仁宗御经筵命侍臣日读一篇

仁宗皇帝

大中祥符八年十二月封寿春郡王九年正月命尚书户部郎中直昭文馆张士逊户部员外郎直史馆崔遵度并为王友二月诏以郡王学堂为资善堂真宗赐王歌凡七轴曰劝学曰修身曰懷俭约曰慎所好曰恤黎民曰勿矜伐曰守文八月立为皇太子参知政事李迪枢密直学士王昕并兼太子宾客真宗作元良箴以赐太子有殿侍张迪者给事左右太子曰是可与宾客同名耶方览尚书至协于克一遂令更名克一真宗知之甚悦

干兴元年二月即皇帝位三月赐辅臣飞白书各一轴帝未尝为飞白书一日试书体遒劲有如夙习因以分赐焉戊寅诏曰朕仰承先训肇纘庆基思与忠贤日勤听览至于宵旰非敢怠遑虽每属于清闲亦靡闕于暇逸当延侍从讲习艺文勉徇嘉谋用依来请双日不视事亦当宣召侍臣便殿以阅经史冀不废学也只日亦召侍臣讲读【见庄献垂帘问】

天圣二年六月乙未赐尚书工部郎中直龙圖阁冯宗元三品服以讲孝经彻章也时帝方向学召宗元入讲故赐之

四年五月召辅臣观宋绶等读唐书帝因曰朕览旧史每见功臣罕能保其始终王曾曰寂等及祸良以功成而不退也翰林侍读宋绶请解三班以专讲劝皇太后命择前后文字可以资孝养补政治者以备帝览遂录孝经论语要言及唐太宗所撰帝范明皇朝臣僚所献圣典君臣政理论上之

五年四月辛卯赐新及第人闻喜燕于琼林苑遣中使赐御诗及中庸篇各一轴初帝欲赐中庸篇命中书录本既上乃令张知白进读至修身治人之道必使反复陈之十月乙酉兼修国史王曾言唐史官吴兢于正史实录外录太宗与羣臣对问之语为贞观政要今欲采太祖太宗真宗实录日歷时政记起居注其间事迹不入正史者别为一书从之明道元年二月吕夷简上三朝宝训三十卷即王曾所请也崇政殿置说书【见官制门】置迩英延仪二阁【官制门】置天章阁置侍讲【官制门】读正说谨罚论深文峻法非善政【论治门】读正说养民论户口丰耗【户口门】御迩英读正说春秋【论治门】八月诏两制检阅唐书君臣事迹近于治道者日录一两条上之以翰林学士苏绅言唐宪宗尝令近臣具前代得失之迹绘图以备观览也

二年二月召御史中丞贾昌朝侍讲迩英阁故事台丞无在经筵者常以昌朝长于讲说特召之赵师民上疏论延讲诵事【论治门】赐杨安国赵师民品服【见论治门】迩英阁出御书十三轴凡三十五事【论治门】丁度上迩英阁圣问【论治门】讲诸国风以为鉴戒【论治门】三月讲诗匪风谁能烹鱼溉之釜鬻帝曰治大国若烹小鲜义与此同丁度曰烹鱼烦则碎治民烦则散非圣学高遠何以见古人求治之意乎读汉书论高祖从諫【论治门】

十一月甲午讲诗角弓篇帝曰幽王不亲九族以至于亾又曰书云九族既睦平章百姓此帝尧之盛德也朕甚慕之丁度在经筵帝每呼学士而不名尝问度著龟事度对





视祿【论治门】读太史公传【论治门】龙圖阁直学士兼侍讲钱象先善讲说语约而义明帝间有顾问必依经以对因讽谕政事遂及时务有启迪劝纳之益前后留侍十五年特被恩礼每乞外官辄不许既去必见思而复召故事讲官分日迭进象先已得请知蔡州帝以象先行有日令独彻所讲秩于是同列罢进者十日帝尝诏讲官凡经传所载逆乱之事直言无讳

治平元年帝谓韩琦曰凡事之行患于渐久而怠废况为学之道尤戒中止宗室之幼者仍须本位尊长常加率励庶不懈惰可召舍人谕此意作诏戒勉之帝既命增置宗室学官因谓宗室数倍于前而宗正司事亦滋多乃增置同知大宗正事一员以宗惠为之而降是诏【余并见辅导英宗门】

嘉佑二年五月始听讲读于东宫天资好学寻绎请问有至日昃内侍言恐饥当食上曰听读方乐岂觉饥耶英宗以上读书太多常遣内寺正止之

治平四年正月上即位九月壬寅御史中丞司马光为翰林学士兼侍读学士先是光言张方平不当参知政事至是又言臣言果是则方平当罢若其非是则臣当远贬上手诏光得卿奏反谓因前日论方平不当故有是命此乃卿思之误非朕本意也朕以卿经术行义为世所推今将开延英之集比得卿朝夕讨论敷陈治道以箴遗阙故命进读资治通鉴此朕之意皎然易见也况命卿之旨在二十六日登对前苟朕以言事罪卿岂复迁卿美职必谅朕诚更勿横俟对日朕亦当谕旨十月己酉初御迓英阁召侍臣讲读经史退上独留吕公着谓曰朕以司马光道德学问欲常劝讲左右非谓其言事也甲寅司马光初读资治通鉴上亲制序面赐光令候书成日写入又赐颖邸旧书二千四百一卷

熙宁元年四月庚申翰林学士兼侍讲吕公着王安石等言切寻故事侍讲者皆赐坐自干兴以后讲者始立而侍者皆坐听臣等窃以为侍者可使立而讲者当赐坐乞付礼官考议诏太常礼院详定以闻后韩维力约胡宗愈等言臣侍君侧古今之常或赐之坐盖出优礼祖宗以来多赐坐者以其敷畅经义所以明先王之道道之所在礼则加异太祖开宝中李穆荐王昭素于朝召对便殿赐坐令讲易干卦太宗端拱中幸国子监外辇将出顾见讲坐因召学官李觉讲说觉曰陛下六飞在御臣何敢辄升高坐太宗为之降辇令有司张帘幕设别坐李觉讲易之泰卦令列侍之臣回还列坐执经而讲者顾使独立于前则事体轻重诚为未安臣等以为宜如天禧旧制以彰陛下稽古重道之意判太常寺龚鼎臣苏颂周孟阳同知太常礼院王汾刘攽韩忠彦言臣等窃谓侍从之官见于天子若赐之坐有所顾问犹当避席立语况执经人主之前本欲便于指陈则立讲为宜若谓传道近于为师则今侍讲解说旧儒章句之学耳非有师之实岂可专席安坐以自取重也今朝廷班制以侍讲居侍读之下祖宗命官之本意重轻可知矣今若使侍讲辄坐其侍读当从之若亦许之坐则侍从之臣每有进说皆当坐矣且干兴以来侍臣立讲历仁宗英宗两朝行之且十五年岂可以一旦为有司之失而轻议变更今人主之待

侍臣繇始见以及毕讲皆赐之坐其尊德重道固已厚于三公矣尚何加焉其讲官侍立伏请仍旧初孙奭坐讲仁宗尚幼跋案以听之奭因请立讲论者不以为是王安石兼侍讲请复干兴以前故事使预听者亦立坐之日少而侍立之日多于是公着等遂同建明已而众议同上以问曾公亮公亮但称臣侍仁宗书筵亦立后安石因讲赐留上面谕曰卿当讲日可坐安石不敢坐遂已

二年十一月司马光读资治通鉴汉纪至曹参代萧何为相国一遵何故规因言参以无事镇抚海内得守成之道故孝惠高后时天下晏然衣食滋殖上曰使汉常守萧何之法久而不变可乎光曰何独汉也夫道者万世无弊夏商周之子孙可以常守禹汤文武之法虽至今存可也武王克商曰乃反商政政由旧虽周亦用商政也书曰毋作聪明乱旧章然则祖宗旧法何可变也汉武帝用张汤之言取高帝法纷更之盗贼半天下宣帝用高帝旧法但择良二千石使治民而天下大治元帝初立颇改宣帝之政丞相衡上疏言臣窃恨国家释乐成之业虚为此纷纷也陛下视宣帝元帝之为政谁则为优荀卿曰有治人无治法故为治在得人不可变也上曰人与法亦相表里耳光曰苟得其人则无患法之不善不得其人虽有善法失先后之施矣故当急于求人而缓于立法也壬午吕惠卿讲咸有一德因言法不可不变先王之法有一岁一变者正月始和置于象魏是也有五岁一变者五载一巡守考制度于诸侯是也有一世一变者刑罚世轻世重是也有百世不变者父慈子孝兄友弟恭是也前日司马光言能守萧何之法则治变之则乱臣窃以为不然惠帝除三族罪妖言令挟书律文帝除杀孥令安得谓之不变哉武帝以穷兵黩武贪淫厚敛而盗贼起宣帝以综核名实而天下治元帝以任用恭显杀萧望之而汉道衰皆非由变法与不变法也夫法弊则必变安得坐视其弊而不变耶书所谓无作聪明乱旧章者谓实非聪明而强作之非谓旧章不可变也光之措意盖不徒然必以国家近日多更张旧政因此规讽又以臣制置三司条例及看详中书条例故发此论也臣愿陛下深察光言苟光言为是则当从之若光言为非陛下亦当播告之修不逆厥指召光诘问令议论归一上召光前谓曰卿闻吕惠卿之言乎惠卿之言如何光对曰惠卿之言有是有非惠卿言汉惠文武宣元治乱之体是也其言先王之法有一岁一变五岁一变一世一变则非也正月始和置于象魏者乃旧章也非一岁一变也亦犹州长党正族师于四孟月朔属民而读邦法也岂得为时变月变耶天子恐诸侯变礼易乐故五载一巡守有变乱旧章者则削黜之非五载一变法也刑罚世轻世重者盖新国乱国平国随时而用非一世一变也且治天下譬如居室弊则修之非大坏不更造必得良匠又得美材今二者皆无有臣恐风雨之不庇也讲筵之官皆在此乞陛下问之三司使掌天下财不材而黜可也不可使两府侵其事今为制置三司条例司何也宰相以道佐人主安用例苟用例而已则胥史足矣今为看详中书条例司何也惠卿曰司马光备位侍从见朝廷事有未便即当论列有官守者不得其言则去岂可但已光曰前者诏书责侍从之臣言事臣尝上疏指陈得失如制置条例司之类尽在其中未审得进达圣听否上曰见



之光曰然则臣不为不言也至于言不用不去此则臣之罪也惠卿责臣实当其罪也臣不敢逃上曰相与共讲是非耳何至乃尔司马光与吕惠卿论青苗害民上曰朝廷每更一事举朝士大夫汹汹皆以为不可又不能指名其不便者果何事也

三年四月癸未司马光读资治通鉴汉贾山上疏言秦始皇居灭絕之中不自知因言从谏之美拒谏之祸又见青苗门读张释之论嗇夫利口光曰孔子称恶利口之覆邦家夫利口何至覆邦家盖其人能以是为非以非为是而君从其言是则邦家之覆诚不难矣时惠卿在坐光专以此斥之

十年十月讲周礼

元丰元年三月辛巳御迺英殿沈季长讲周礼八法上曰或言邦治或言官治何也季长对毕上曰然壬午侍讲学士吕公着极论治体至三皇无为之道释老虚寂之理公着问上曰此道高遠尧舜能知之乎上曰尧舜岂不知公着曰尧舜虽知之然常以知人安民为难此所以为尧舜也上又论唐太宗公着曰太宗所以能成王业者以其能屈己从谏耳上临御日久羣臣畏上威严莫敢进规至是闻公着论竦然敬纳之

七年十二月戊辰端明殿学士司马光上资治通鉴五代纪三十余卷资治通鉴自治平三年置局编终五代史毕至是书成计二百九十四卷目录考异各三十卷上谕辅臣曰前代未尝有此书过荀悅汉纪遠矣辅臣请观之遂命付三省仍令速进入以光为资政殿学士降诏獎谕

哲宗皇帝

元丰八年十二月诏讲读官赴资善堂【保佑哲宗门】

元佑元年二月进读宝训【保佑哲宗门】三月诏讲读官更不轮资善堂直宿【直宿不见起何年】讲臣直宿讲臣赐坐立讲坐讲延和殿讲读【已上并见伊川出寇门】夏四月先是中书省景佑二年置迺英延英二阁以设讲筵延英阁在崇政殿之西南吕欲令管勾讲筵所经度如得寬凉以备夏讲诏修内司画圖进入九月甲子赐宰臣执政经筵官宴于东宫上亲书唐人诗分赐之以讲论语终篇也乙丑吕公着以下谢赐宴御书太皇太后曰皇帝天资聰敏宫中惟好学而圣性易成昨日所赐欲卿等知尔吕公着进论语孝经中要语百篇【宣仁门】范祖禹劝哲宗以学为急【保佑哲宗门】苏轼侍读言今日迺英进读宝训及雍熙淳化事太宗每见雨雪应时辄喜今日水旱荐至雨雪非时窃谓陛下身修而政未修其弊在监司守令不得其人四年三月吏部尚书兼侍讲苏颂等奏臣等撰汉唐故事得旨分门编修成册进呈诏迺英要览为名梁焘劝哲宗读宝训【见宣仁门】十月癸丑上御迺英阁召讲读官讲三朝宝训终侍讲苏颂等奏曰陛下勤求治道仰法祖宗臣等每愧荒疎不能发明上资圣览上遣内侍宣答曰祖宗治道兹有本原逮此终命篇悉资开发颂等稽首称谢十二月刘安世言伏自前月末闻传圣旨权罢讲筵是时兴龙节意谓将有宴享所以暂辍迺英之幸用成庆礼今复半月别无政事亦非有前岁大雪苦寒之故而劝讲之臣久不得望见清光臣固疑之矣

近者民间喧传禁中见求乳母考之颇有实状伏望圣慈为宗庙社稷之大计清闲之燕频御经筵仍引近臣与之论议前古治乱之要当今政事之宜俾悉开陈以助圣学范祖禹劝勤学以远声色梁焘请开经筵诏录讲义【己上并保佑哲宗门】

五年四月诏讲读官今后每遇经筵退留讲读官各一员于迓英奏对仁宗鉴古观文二圖【保佑哲宗门】八月刘唐老言大学一篇论入德之序诏经筵之臣训释此书上进以备观览从之

六年二月讲筵所言奉旨进汉唐故事及史记事其间可观事迹多记少録请稽古录节次进呈以代汉唐故事三月吕大防奏仁宗所书三十六事请令圖写置坐隅以备观览从之八月吕大防乞写仁宗时阁记注一本进入以备圣览从之其后诏国史院修写进入十二月开封府火翌日执政于讲筵奏曰火通夕传报必惊动上曰迫近原庙极可惧执政退相与欢叹曰言词雅驯殊有裕陵之风

七年三月王岩叟奏曰陛下宫中何以消日上曰惟是读书岩叟又曰圣人之学要在专勤屏去他事谓之专久而不倦谓之勤如此天下幸甚读宝训【哲宗门】五月范祖禹按讲筵故事讲官讲经读史右令同进读汉唐书即是讲官兼读史乞专令读史从之

绍圣元年六月罢讲礼记七月诏令后进读用新唐书曾布请也

四年十月迓英读宝训上谓蔡京曰宝训内事多系实录不须进京曰王安石有日录乞行进上曰宫中自有本

徽宗皇帝

崇宁五年三月诏蔡卞深得王安之学宜在迓英留为侍读

祖宗制科取人

建隆二年九月癸未复置书判拔萃科【国史书八月今九月盖八月始条其可施行实九月也】

干德元年复试应拔萃科田可封等【见科举门】二年正月诏举贤良方正等三科【见科举门】四月试贤良颖贄【见科举门】四年六月庚寅上亲试制举人姜涉等于紫云楼下从容谓翰林学士承旨陶谷等曰则天一女主耳虽刑罚枉滥而终不杀狄仁杰所以能享国者良此由也因论前代帝王得失日晡乃罢涉等所试文理疎畧不应策问并赐酒食遣之应百篇举赵昌言【见科举门太平兴国五年】

至道三年秋七月吏部郎中直集贤院田锡应诏上疏其二云制举科目不可具陈畧举可设者有贤良方正能直言极谏科才识兼茂明于体用科道侔伊吕科才比管乐科传道经典达于教化科详明正术可以理人科文堪经邦科武足安边科臣伏覩太祖朝曾设制科示时勅限三千字以上成字数既多书写不易赐食之后就试以来既对天颜岂无兢惧又值日晚固不遑宁虽有经邦之谋岂能周悉设有安边之策靡暇敷陈今若设此科条但以汉时公孙弘董仲舒所试则往复问答既尽见其才谋品藻甄升信无

违其器业此设制科其利二也

太宗至道三年九月右正言直史馆孙何献五议其四言复制科曰唐室参古今之制取天下英俊其试礼部则进士明经解诂句读声病偶对者也制举则贤良体用等科财成制度寅亮经纶者也国家廓土辟宇立太平之基然制科未复清途美宦惟进士明经递迁以升岂不念林壑非常之士有违弃乎台谏所进之人有僭滥乎奖应制科林陶【见科举门】

真宗咸平四年四月辛未上御殿试制举人命翰林宋白等充考官得秘书丞查道进士陈钺入第四等推官王曙入次等八月己酉复试制举人得成安簿丁逊舒州推官孙仅秘书丞何亮推官孙暨入第四等亮为太常博士暨为寺丞

景德二年甲子诏复置贤良方正能直言极谏科博通文典达于教化才识兼茂明于体用武足安边洞识韬畧运筹决胜军谋宏远才任边寄等科令尚书吏部传告诸路许文武羣臣草泽隐逸之士来应委中书门下先加考试以器业可观具名闻奏时上谓寇準曰方今文武多士岂无才识优异未升进者耶至于将帅之任尤难其人前代试以制策观其能否用求材实亦为国之远图也因出唐朝制科之目采其六用之一年策试钱易石待问四月试贤良方正著作佐郎陈絳溧水县令史良丹县簿夏竦先是上谓宰相曰比设此科欲才识兼优若但考文义则积学者方能中选苟有济时之用安知策问经义时务命两制上策问择而用焉六月右正言陈彭年请条制贡部复宏辞科来经术士十月以前鄆县簿高志宁者为理评事志宁明经中科请应试洞韬畧科且求日试三千字既而不能成上察其历官无过特命迁秩

祥符元年夏中书试贤良方正能直言极谏草泽刘若冲周启明才识兼茂明于体用大理寺丞吕夷简草泽许申等诏以申等虽敏贍可赏而理道未精不副召对若冲启明申并许应举仍免取解夷简优与亲民差使时上封者言两汉举贤良多因兵荒灾异所以询访阙失令东封西祀受瑞建封不当复设此科于是悉罢吏部科同

仁宗天圣七年闰二月诏曰朕开数路以详延天下之士而制举独久置不设意吾豪杰或以故见遗也其复置此科于此稍增损旧名曰贤良方正能直言极谏科博通文典明于教化科才识兼茂明于体用科详明吏理可使从政科识洞韬畧运筹决胜科军谋宏远材堪边寄科凡以待京朝官之被举及应选者又置书判拔萃科以待选人之应者又置高蹈邱园科沈沦草泽科茂材异等科以待布衣之被举应举者又置武举以待方畧武勇之士其法皆先上艺业于有司较之然后试秘阁中格然后天子亲策之若武举则阅其衡射焉初盛度建言于真宗请设四科以取士曰经术之上若典刑备举则政教流行请设博通坟典达于教化科尧试臣以事不置以言语笔札求人审官期于适用请设才识兼茂明于体用科今戎警未除调边劳戍必资良帅以集事功请设军谋宏远堪任将帅科狱讼之繁民命所系若推按失实则枉情伤生请设明晓法律能按章覆问科



景德二年遂置六科盖缘度之议也时度方责洪州密诏度撰策目驰驿以进及议封禅吏部科目皆废夏竦既执政建议复制举广置科目以收遗才上从之更采度前议降是诏十二月以知制诰李仲容判礼部故事茂材异等高蹈邱园沈沦草泽三科所上策论先委礼部考覆以闻乃得试时值史馆康孝基判礼部定富弼等十人词理皆优上意其品藻未精改命仲容而以孝基为同判仍取弼策论覆校之弼河南人

天圣八年春正月诏应制科自今听随礼部贡举施行六月御崇政殿试书判拔萃及武举人戊申以宣州司理余靖为将作监丞知海阳推官尹洙为武胜节度掌书记知河阳县武举人张建侯等十二人乙亥命学士宋绶冯元为初考制策官翰林张得象御史中丞王随覆考知制诰右中丞盐铁副使鞠咏编排自是御试制科人率如此例丙午策试贤良方正能直言极谏太常博士成都何咏茂材异等富弼二人所对策并及第四等丁丑以咏为祠部员外郎同判永兴军赐五品服弼为将作监丞知长水县

景佑元年正月罢书判拔萃科更不御试自今幕职州县官经三品以上非缘边及川广福建者并许应贤良方正直言极谏六科其升朝官至太常博士以及进士诸科取解而被黜者毋得应茂材等三科及武举用制诰李叔之言也试书判拔萃四人【毛询吴盛张考孙李淳】

八年六月己酉策试贤良方正直言极谏太常博士苏绅才识兼茂明于体用大理丞吴育茂材异等张方平育通判湖州绅通判洪州方平知昆山县六月诏寓制科人自今张幕次于殿庑仍令大官给食武举人以别日试时知制诰宋郊言贤良与武举人杂试非所以待天下特起之士诏从其请书判拔萃四人【邱升张龕谕孙伯王林意】言者谓此科乃有司铨品之式今御轩亲试非称其年春遂罢【登科记】

四年夏丁未诏学士院自今制策登科人并试策论各一道时将作监丞富弼献所为文命试馆职弼以不能为试赋辞上特令试策论因有是诏弼寻授太子中允直集贤院六月乙丑诏详明吏理可使从政洞识韬畧运筹决胜军谋宏远才任边寄三科各为策题贤良方正等四科同策题七月壬戌策试贤良方正能直言极谏科二人【田况又张方平】茂材异等邵亢亢以与张士逊连姻报罢实录云亢策字数少不合格今从亢本传亢墓铭亦云范仲淹荐应贤良方正科除建康军节度推官会有欲中伤宰相密言亢与连姻命遂中格人莫知其然盖宰相士逊之子娶邵氏偶与亢同姓士逊既不能辨亢亦无言而出

庆历二年八月策试才识兼茂明于体用科殿中丞钱明逸对策入四等以为太常博士通判庐州易之子也

六年六月叅知政事吴育与宰相贾昌朝不相能监察御史唐询既怨育遂希昌朝意上奏曰贤良方正直言极谏茂材异等科由汉涉唐皆不常置若天见灾异政有阙失则诏在位荐之本朝稽用旧文讫真宗世三建此科陛下即位增科为六令两省若少卿监以上奏举后又止用贤良茂材三科随进士科设之迩年率不任保用之官皆自名科

目且贤良方正茂材异等名号至美使举而为之犹曰近古即自颀其美顾所未闻又有经亲试前集有司而所出论目全用经史名数及对诏策不过条别义例稽合注解至于强记博闻虚辞泛说而已若辅国本陈治道则未见其有补也初应诏纔数人后乃至十余人今殆至三十余人一中此科曾未累岁悉至显官虽非其人例不可抑疏上帝刊其名付中书育奏疏驳之曰三代以来取士之盛莫若汉唐汉文帝上元五年诏举贤良文学之士上亲策之则有若晁错者出焉是非有灾异而举也武帝建元元年诏举贤良方正直言极谏之士元光元年诏贤良对策则有若董仲舒公孙弘者出焉所举者非因灾异但策中语或及者亦陈事之一端尔唐开元二年六月甲子制其有茂材异等咸令自举是年设直言极谏科逮宪宗元和间制科尤盛有若元稹白居易皆特出之才观当日策目所访者皇王之要道邦家之大务可以覆视固不可专于灾异也陛下自复制科于兹累年随贡举而开疏数适中若必俟灾谴然后诏举非惟失设科本意且尤不可者有三一则使夫贤旧滞淹之士待灾异而进非所以养廉耻也二则平居不询造形乃问非所以惧谴灾也三则轻改信令示天下无渴士之心非所以广贤路也且汉唐所立孝廉及进士等科皆每岁常选故制举随时而开今礼部进士数年一举因以制举随之则事适其宜何害于时须此纷易况灾异之出不常厥期或弥年所无则制举奚设或比岁而有则于事不烦既不因乎天灾又不随乎贡部而曰非时诏举浩无端倪乃是遂废此科刍蕘稍询则言路有寄弥年不举则礼意都忘今无故而更张使遗材绝望其伤国体多矣乞陛下下臣奏两制详定上是其言不复下两制即诏礼部自今制科随进士贡举其着为令仍须迯臣论荐毋得自举上因谕辅臣曰彼上言者乞从内批以行今乃知欺罔也育又奏曰阴邪沮事正当明辨人臣言涉机密欲归德于君或入告谋猷成国之美此类可以刊名付外制策天下公共废置可以明述岂宜阴为沮革欲自上行此正奸罔所为非睿听昭察则挟邪蠹国何所不为愿出姓名按劾以明国法育本由制策进上数称贤以为得人故询力排诋意在育不在制科也皇佑元年秋甲申策试贤良方正能直言极谏殿中丞吴奎奎所对入四等以为太常博士通判陈州

五年八月辛酉试贤良方正能直言极谏太常寺太祝赵彦若试武举人彦若所对疎阔下有司考不中等而罢之先是制举就秘阁试者十八人有司独取彦若于是被黜去议者谓宰相陈执中不由科第以进故阴讽有司独专抑儒士非彦若实不能也

嘉佑二年六月赵彦若制策不入等阅四月遂无应科者上曰岂朕待之不至耶丁巳诏朝廷设制科以取天下美异之士尝以推恩过厚而难其选故所取不过三二人甚非所以广详延之路也其令两制以上同议之既而抃等言太常博士以下至选人草泽人应制科者并听待制以上奏举无得自陈内草泽人亦许本路转运使奏举其试文浅陋及履行不如所学并坐举者其进用差次不得引旧例超擢从之八月癸亥试贤良方正能直言极谏秘书丞王彰材识兼茂明于体用明州推官夏噩彰对不入等噩入第四等授光禄寺丞噩磨勘当迁著作佐郎宰臣富弼嫌而裁之

嘉佑十年十二月先是朝议以科举既数则高第之人倍众其擢任恩典宜损于故诏中书门下裁定丁丑诏曰朕惟国之取才士之待举不可旷而冗也故立间岁之期以励其勤约贡举之数以精其选着为定式申勅有司而高第之人日常不次而用若循旧比终至滥官甚无谓也自今制科入第三等与进士第一除大理评事签书两使幕职官事代还升通判再任满试馆职制科入第四等与进士第二第三除内使幕职官代还改次等京官制科入第四等与进士入第四第五除试御知县代还迁两使职官鑠斤人视此若夫高材异行施于有政而功状较然者当以茂恩擢焉自是骤显者鲜而所得人才及其风迹比旧亦寢衰乙未御崇政殿策试才识兼茂明于体用科明州观察使推官陈舜俞贤良方正直言极谏旌德县尉钱藻汪辅之舜俞藻所对策并入第四等授舜俞著作佐郎签书忠正军印度使判官事藻试校书郎无为军判官辅之亦入等监察御史里行沈起言其无行罢之辅之躁忿因以书谏让富弼曰公为宰相但奉行台谏风旨而已天下何赖焉弼不能答

六年八月乙亥御崇政殿策试贤良方正直言极谏著作佐郎王介福昌簿苏轼澠池主簿苏辙轼入第三等介第四等辙第四等次以轼为大理评事签书鳳翔判官介为秘书丞知静海县辙为商州军事推官【余见论治门云二苏才识兼茂明于体用得辙第四等司马光与镇同议镇难之者先初为第一等也】

八年六月诏令岁制科人著作佐郎赵嵩等十七人权罢将来科场赴秘阁就试高安仁人也

英宗治平二年秋甲戌以制科入等范百禄为秘书丞升上一任前和州县令李清臣为著作佐郎百禄所对策言濮王宜诏有司勿议推尊之事百禄镇从子清臣安阳人韩琦妻以其兄之子欧阳修奇其文以为似苏轼及试秘阁试文至中书未发也修迎语曰考官不置清臣第一则缪矣发视果第一时同发策者四人或谓清臣当以五行传对所谓灾异当得清臣曰此汉儒说以某异应某事清臣不能知民间得无疾痛不乐可上者乎因言天地之大譬之于人腹心肺腑有所攻塞则五官不宁民人生聚天地之腹心肺腑也日月辰宿天地之五官也善人天地之异者不止其异上民之疾痛不乐者而已清臣竟不入等

四年二月御史蒋之奇奏弹钱明逸奸邪在仁宗朝附贾昌朝等陷杜衍范仲淹尹洙石介之徒朝廷一空天下同疾况文辞纰缪贪赋有闻岂可与昌朝同居禁苑同知諫院傅卞亦言执政召明逸示以章疏使自引疾上他日谓吴奎曰钱明逸不解作文字何因中大科奎言应举亦系侥幸一日之间未见其善其人可知也

熙宁三年九月御崇政殿策贤良方正又策试武举人诏策贤良方正等科太常博士通判蜀州吕陶升一任与堂除太庙斋郎张绘堂除判司主簿或尉前台州司户参军孔文仲令流内铨告示发赴华州团练推官本任陶等皆中选而文仲策初在第三等手诏制科诵字号卷详观其条对大抵意尚流俗而后是非又毁薄时政援正先王之经而



辄失义理可再进呈而诵字号乃文仲试卷也于是上读文仲试卷至专任德上曰德刑不可偏然救世亦有时而偏用又用三德是也安石又论文仲以为如范百禄以非濮王事合考官取高等尔于是冯京意助文仲上不听故有是命十二月戊辰三班院言殿直雷珣乞试六韬孙吴兵书十道仍试骑射中选诏免袒使权边塞监押巡检代还依武举人例王珪班使臣乞试兵书自珣始秘阁考试所言应科陈彦古所试六论不识题及字数皆不足準式不考自试制科以来空疎未有如彦古者由是制科亦罢

七年五月辛亥中书门下言策试制举并以经术时务今进士以罢辞赋所试事业即与制举无异其贤良方正等科目欲乞并行停罢从之先是中书条例所乞罢制举冯京曰汉唐以来豪杰多自此出行之已久不须停废上曰天下事可罢而不可急如此者甚众此恐未遑改革吕惠卿曰制科止于记诵非义理之学也哲宗孙觉苏辙彭汝砺张续考试应贤良方正能直言极谏科举人丁卯上御集英殿试贤良方正直言极谏科谢惊已已赐惊进士出身除初筭职官左正言刘世安言臣伏自朝廷近复制科秘阁所试之人皆不应格陛下方务进人材不欲并行黜落曲收谢惊以为天下学士之劝而惊廷试之策往往不能奉承请问率意妄言固多疎略有司考核即不入等陛下特赐进士出身擢为辅郡幕职圣恩优异极踰涯分臣亦上体朝廷之意不敢别有论列而近见惊申尚书省辞免新命状乃云所有勅告未敢抵授以抵为祇以受为授虚薄寡闻一至于此昔唐之省中有伏猎侍郎为严推之所讥而罢今陛下当右文之代初复制举岂容有抵授贤良乎伏望陛下惩其浅陋稍正误恩追寝惊进士出身以塞公议

七年五月癸巳诏秘阁试制科论题于九经兼正史孟子扬子荀子国语并注内出其义注内毋得出题六年九月丁酉三省言御试应贤良方正能直言极谏科制策知泸州合江县王普河中司理司马樵眉山布衣王当

绍圣元年八月三省进呈秘书省考试致应贤良方正直言极谏科陈旸第四人赵天启考中第二上谓章惇曰赵天启尝上书极太妄朕始欲令羁管恐阻塞言路至是在选中特旨落下九月御集英试科举人庚戌三省同进呈考试制科张咸吴侑陈旸三人中第三等推恩上曰前日观所试策何异进士先朝尝罢此科何时复置郭知章等对曰先朝初御试进士策即罢制科元佑二年复置诚无所补初举得谢惊次举得王当司马樵等闻极疎谬上曰极不成义理李清臣对曰在汉亦不设科遇选获异材或因灾异策问大事即临时召上曰今已复进士殿试策此科既无异进士策其文理有过于此者郑雍对曰顾其人何如尔然自古多言时政阙失上曰今进士亦可言时政阙失因诏罢制科【南渡已来见后集】

累朝任用逸民

太祖开宝三年三月以处士王昭素为国子博士致仕昭素少笃学有志行市物随索即偿或辞则曰亟受之不然将为妄语人矣由是人不敢欺方治室积木墙壁间有盗为木所碍不得入昭素觉之尽室所有掷于外谓盗曰急来窃去恐捕者至盗惭而遁由

是邑中无盗着易论三十余篇上闻其名召见便殿已七十余上问曰何以不仕致相见晚访以民事所言无隐上益嘉之又问治世养身之术对曰莫若爱民寡欲上爱其语书之屏几求去故有是命

太宗雍熙元年冬十月上之即位也召华山隐士陈抟入见于是复至上益加礼重谓宰相宋琪曰抟独言其身不干世利所谓方外之士也在华山已四十余年自言经五代乱离幸天下承平故来朝觐与之语甚可听因遣使送至中书琪等从容问抟曰先王得玄默修养之道可以化乎对曰抟山野之人于时无用亦不知神仙黄白之事吐纳之理无术可传于人假令白日上升亦何益于世主上龙颜彦异有天人之表博达今古深究治乱真有道之主也正是君臣叶心同德兴化致治之秋勤行修炼无出于此琪等表上其言上益喜赐号希夷先生有司增葺所居台观上屡与属和诗什数月乃遣还

淳化元年秋八月朔诏征终南山隐士种放辞以疾不至放七岁能属文沈默高洁与其母偕隐豹林谷中讲习为业学者多从之得束修一以奉母母亦乐道薄滋味善辟谷会陕西转运使宋维翰言放才行诏使征之其母恚曰常劝汝勿聚徒讲学身既隐矣何用文为果为人知不得安处我将弃汝深入穷山矣放遂称疾不起其母取笔砚焚之与放转居穷僻人迹罕至上喜其高尚诏不能屈岁时存问以钱三万赐之不夺其志

咸平二年春二月己酉秘书监杨徽之荐著作佐郎通判泰州戚纶文学纯谨可在儒馆三月甲寅以纶为秘阁校理纶父同文隐居教授学者不遠千里而至登科者凡五十六人徽之与门人追号同文曰坚志先生

四年三月兵部尚书张齐贤条上种放操行孝谨愿以备贤良方正之举

淳化五年上谓韩丕曰卿早在嵩阳当时流辈颇有遗逸否丕以田朴对上召朴对于便殿不愿仕进上赐束帛官其子

五年秋遣使賚赏诏书就终南山召放赴阙赐绢十万先是判永兴军府张齐贤复条上放操行请加旌赏臣前在中书亲奉先帝德音欲行不次之泽臣缘未知本末不敢奏陈今为太守始熟其为人故也戊申种放以幅巾入见于崇政殿上与语询以民政边事放曰明王之治爱民而已惟徐而化之余皆谦逊上即日授左司谏直昭文馆赐冠带袍笏馆于都亭驿大官供膳上谓宰相曰放亦有就禄仕意且言迹孤朕论以俟升班列必见朝廷清肃排摈之事无敢为者赏一人可劝天下矣己酉种放表辞恩命不许让居数月复召见赐绯衣象笏等物及御制五言诗又赐昭庆坊第一区加帐什物银器五十两钱三十万种谢日赐酒食于学士院光宠之盛近所未有也

六年三月左司谏直昭文馆种放再表乞暂归故山诏许之丙午特诏授起居舍人将行宴钱于龙圖阁又诏三馆秘阁官宴钱于琼林苑上赐七言诗三章在坐皆赋

景德二年夏四月以起居舍人昭文馆种放为右谏议大夫放谢病乞游嵩山诏许之仍命南河守臣常加存抚召对赐宴钱赋诗钱行恩礼甚厚

四年冬十月种放复自终南山来朝召之也上谓辅臣曰放比高尚其事询访多有

可采朝廷虽加爵秩而未能大用即物议未厌遣内侍賈诏赐放畧曰抑宜体兹眷遇罄乃诚明叙经国之大猷述致君之遠略尽致茂绩以沃朕心副凉德之倚毗塞外朝之聽观乃司枢务庶几或至公放上表固让

大中祥符二年夏四月种放得告归乡里是日召见宴饌于龙圖阁上作诗赐放命羣臣皆賦日制辟杜鎬辞以素不属文诏令引名臣归山故事鎬因诵北山移文其意盖讥放也

三年春正月种放归终南山有使来自秦雍者得放答陈尧叟诗五章以闻上嘉纳之谓宰相言放隐居力学尝言古今殊时不当背时效古此最近于理乃诏放赴阙放表乞賜告上许之诏答云倘再召勿复辞也放为弟汝求官即秘书省正字同判太常礼院

五月辛酉賜泰山隐士秦卞号贞素先生放还山卞自言百三十岁上召至京与语多言五代事亦无他术但能服食致长年尔

四年二月上作西岳赞仙掌诗召见华山隐士郑隐敷水隐士李宁賜号曰贞晦先生隐自言始以经术为业遇道士传辟穀鍊气之法修习颇验遂居华山之王力岩二十余年冬夏常衣裘十分于药术老而不衰每以药施人人于金帛多拒之上賜御诗并药茶束帛隐辞所賚不受

七年邢惇隐居不出王曾荐召问治道惇不答止除许州助教惇归家乡人不知有官及卒勅与废纸同束之梁间

八年河南府言工部侍郎种放卒上甚嗟悼亲制文遣内侍致祭护丧归终南山贈工部尚书录其后世雍学究出身先是讥放循默者上闻之谓辅臣曰放为朕言事甚众但外庭不知耳因出所上时议十三篇其目曰议道议德议用议器议文议武议制议度议教化议赏罚议官司议军国议狱讼议征赋议邪正放将卒急取前后章疏藁焚之服道士衣召诸生会饮与诀酒数行而卒李洎隐中条山不仕魏野居陕终日吟咏皆有道之士上以礼聘之皆不起

仁宗天圣二年五月己亥賜杭州隐士林逋粟帛两浙运使言逋有节行居西湖二十年未尝入城故也六年冬丁卯賜故杭州处士林逋谥曰和靖先生仍賜其家米五十万帛五十疋逋临终賦诗有茂陵他日求遺稿尤喜曾无封禅书之句既卒州以闻上嗟惜之故有是賜初逋客临江李谿方举进士未有知者逋谓人曰此公辅器也及逋卒谿适为州守为素服与其门人临七日葬之刻遺句纳圻中

康定元年春庚子賜永兴军草泽高恠号安业处士恠季兴四世孙幼能属文通经史百家之说从种放隐终南山与张尧许勃号南山三友会诏举沈沦草泽知长安寇準闻其名荐之辞不起景佑初录国初侯王后恠推其弟及范雍建京兆府学召恠讲授诸生席间常数十百人至是杜衍乞賜以处士号从之诏州县常时礼遇给良田百畝后文彦博言恠经术该通有高世之行可励风俗賜第一区

庆历元年丙午陈州布衣郭京为大理评事陝西都部署司参谋军事京少任侠不



事家业平居好言兵范仲淹漆宗谅荐之上召见特命官建州布衣徐复赐号江海处士初复游京师举进士不中退而学易通流衍卦气法自筮知无禄遂忘进取意游淮扬间以学易为事数年益通阴阳天文地理遁甲占射诸家之说他日听其乡人林洪范说诗且言诗之所用于乐者忽若有得因以声气求之遂悟大畧于七音十二律清浊次序及钟磬侈夺匏竹高下制度皆洞达上方留意于乐诏天下求知乐者大臣荐胡瑗瑗作钟磬大变古法复笑曰圣人寓器以声今不先求其声而更其器其可用乎后瑗制作皆不效范仲淹过润州见复问曰今以衍卦占之四夷无变异乎复言西方当用兵推其日月后无少差于是与郭京俱召见帝问天时人事复对曰以京房易卦推之今年所配年月日当小过也刚失位而不中其在强其德乎帝又问变故与前世何若复对曰如唐德宗居奉天时帝怒曰何至此复曰君德有不同陛下无深虑也帝问何故复曰德宗性忌刻好功利欲以兵伏天下其德与凶运会俱奔走失国仅乃能免陛下恭俭仁恕不难屈己容纳西羌之变起自元昊陛下不得已应之虽兵连不解而神人知非陛下本心时与德宗同德与之异卦气虽不得无他也不久定矣帝称善又问明年主何卦复曰干卦用事说至九五画而止帝又问京师前年黑风何所应复曰其兆在内预王丧其应命为大理寺评事因以疾辞乃赐号处士补其子发试校书郎复性高洁处世未尝自异后居杭州十数年卒二年冬甲子以泰山处士孙复为试校书郎国子监直讲复平阳人举进士不中退居泰山学春秋着尊王发微十二篇大约本于陆淳而增新意石介有名山东自介而下皆以先生事复年四十不娶李迪知其贤以其弟之子妻之复初犹豫石介与诸弟谓公卿不下士久矣今丞相不以先生贫贱欲托以子宜因以成丞相之贤名复乃听孔道辅闻复之贤就见之介执杖屡立侍复左右升降拜则扶之其往谢亦然介既为学官语人曰孙先生非隐者也于是范仲淹富弼皆言复有经术宜在朝廷故召用之

五年春赐润州草泽邵炼号冲素处士知州王琪荐炼守道邱园素有节行故也炼上表固辞许之

皇佑三年秋甲寅赐陕州草泽魏闲清逸处士闲野子世有隐德知州李昭遘上其行义故有是赐

四年五月丙午太常丞致仕代渊为祠部员外郎渊导江人性简洁事亲以孝闻尝举进士甲科得清水簿叹曰禄不及亲何所为即还家教授坐席常满王拱辰安抚两川遗书欲起之托疾不往见杨日岩知益州又荐之遂致仕谢絶诸生着周易旨要佛老杂说十篇于是翰林学士田况上其书诏优加两官渊晚年日菜食巾褐山水间自号虚一子长吏岁时致问澹然与对畧不及私

嘉佑二年夏六月以汝州龙山孔收为校书郎致仕绛州稷山韩退为安逸处士翰林学士承旨孙抃荐收退有行义也

三年春正月以福州进士陈烈为安州司户参军烈性介僻笃于孝友庆厯初预乡荐黜于礼部遂不复践场屋从学者常数百人天章阁待制曹颖叔知福州荐之授试校

书郎本州岛州学教授于是翰林学士欧阳修又荐之故有是命烈皆辞不受

四年十一月以河南处士邵雍为将作监主簿本府以遗逸荐故有是命后再命为颍州团练推官皆辞疾不起是月赐东州草泽何羣安逸处士益州草泽章警冲退处士转运使言其有行义也羣西充人嗜古学激扬论议虽业进士非其好庆厯中石介在太学四方诸生来学者数千人羣亦自蜀至方讲官会诸生讲介曰生等知何羣乎羣曰思为仁义而已不知饥寒之切己也众皆往仰之介因馆羣于其家使弟子推以为学长羣愈自刻励著书数十篇与人言今之士语言脱易举止惰肆者其衣冠不如古之严因请复古衣冠又上书言三代取士皆本于乡里而先行义后世专以文辞中害甚者莫甚于赋请罢去介赞美之会谏官御史亦言以赋取士无益治道下两制议皆以为进士科始隋厯唐数百年将相多出此不为不得人且祖宗行之已久不可废也羣闻其说不行乃竭其平生所为赋八百篇焚之讲官视羣赋既多且工以不自惜黜太学羣径归遂不复举进士

五年夏己亥颍州进士常秩为试将作监主簿本州岛州学教授翰林学士胡宿言其文行闻于乡里也秩临汝人常举进士不中退居陋巷二十余年为学有心得尤长于春秋学者常以孙复所学问秩秩曰此商君法尔步过六尺与弃灰于道有诛不近人情甚矣【皇佑二年赐束帛】秋甲子詹山进士苏洵为试校书郎年二十七始发愤为学岁余举进士又举茂材异等皆不中悉焚其常所为文闭户益读书遂通六经百家之说下笔顷刻数千言嘉佑初与其二子轼辙至京师翰林学士欧阳修上其所著权书衡论机策二十二篇宰相韩琦善之召试舍人院再以疾辞本路运使赵抃等白荐其行义推于乡里而修又言洵既不肯就试乞除一官故有是命

六年六月庚申赐草泽章友直银百两绢百疋以篆国子监石经成除将作监主簿不理选限辞不就故有是赐友直建安人得象之族也得象为相常欲官之友直谢去终身不仕

神宗治平四年秋七月太学助教刘易赐号安退处士仍赐粟帛易州人性刚介博学好古韩琦知定州书上所著春秋论授试太学助教并州学说书不能屈志仕进寓居虢州卢氏晚习辟谷至是赐处士号

熙宁四年夏将作监主簿常秩初不肯仕世以为必退者也至是宰臣王安石更令秩在闾阎见所下诏独以为是被召遂起

十年九月己酉赠颍州团练推官邵雍秘书省著作郎赐帛以知河南府贾昌衡言雍行义闻于乡里乞加恤也宰相吴充请于上赐谥曰康节雍初与常秩同召雍竟辞不起士大夫高之

太平治迹统类卷二十六

●钦定四库全书

太平治迹统类卷二十七

(宋) 彭百川 撰

祖宗科举取人

建隆元年安次扈蒙权知贡举庚寅奏进士合格十九人【杨砺同立舜】二年权知贡举竦仪奏进士合格十一人【张去华等】三年知贡举王着奏合格进士七十五人【马适等】九月复置书判拔萃科四年知贡举仪薛居正奏合格进士八人【苏德祥等】

干德元年九月丙子诏礼部贡举人自今朝臣不得更发公荐违者重寘其罪故事每岁知举官将赴贡院台阁近臣得保荐文艺者号曰公荐然去取不能无私至是禁止闻十二月丁卯召翰林学士中书舍人于内殿覆试吏部试中应拔萃科【田可封孙迈宋白曹利用】上临轩观之试毕称旨以利用为右拾遗田为著作郎各赐袭衣犀带利用加锡鞍勒马

二年正月诏曰先以所置贤能方正能直言极谏经学优深可为师法详娴吏治达于教化等三科并委州府解送吏部试论三道限三千字以上自曩及今未有应者得非抱倜傥者耻肩于常调懷说言者难动于有司必欲兴自朕躬乎继今不限内外职官前资见任布衣黄衣并许诣阁门投牒自荐朕当亲试焉三月知贡举陶谷奏合格进士八人【李景阳等】四月贤良科一人博州判官颍贇策试称旨故也

三年知贡举卢多逊奏合格进士六人【刘察等】

四年王佑知贡举言进士合格者六人诸科几人上恐其有遗才复令于不中选人内取优长者策而升之【李肃毕士安等】

开宝元年王佑知贡举奏进士合格者十人陶谷子邴名在第六翌日入谢上谓左右曰闻谷不能训子安能登第因下诏曰造士之选匪树私恩世禄之家宜敦素业如开党与颇苦切吹文衡公器岂有私滥自今举人凡闕食禄之家具析以闻当令覆试【陶邴覆试复登第】二年知贡举赵逢奏进士合格七人【是月亲征逢随军转运使取士或在行宫当考安德裕柴成务王猷可董循张绅陶邴系元年所得士】三年三月壬寅诏礼部贡院阅贡士诸科十五举以上曾终场者以名闻甲辰得司马浦等六十三人庚戌复取未经场人四十三人并赐出身诏自今勿以为例知贡举扈蒙擢进士合格者八人【张拱王诜张茂直等】四年卢多逊知贡举奏进士合格者十人【刘寅卫价刘琼等】五年扈蒙知贡举奏合格进士安守亮等十一人诸科二十人诣讲武殿上以进士武济川材质最陋绌之济川乃学士李昉乡人昉知贡举上不悦会徐士廉诉昉用情取舍非当上以问学士卢多逊曰颇亦闻之上令贡院籍下第人姓名三百六十人癸酉召见择一百九十五人宋準以下及士廉各赐纸札引试命御史李莹等为考官乙亥上亲阅得进士二十六人士廉与焉皆赐及第又赐準钱二十万以张宴会责昉为太常少卿考官杨可法等皆坐责自兹殿试为例程宋准贾源范翔郭成范张素左贞索箱李巨源武济川裴询黄相是年重试宋准贾源范翔郭成范张素左贞裴询李巨源董箱刘总田



宝之柳毗刘洗任载宋玄庆徐士廉安肃赵白贞梁谊吕镑王住王文范赵世南王利用王渭五经四人开元礼七人三礼三十八人三传二十六人三史三人学究十八人夏四月诏诸州考试官令长吏僚属有才学公正者充知贡举与考试同看详议卷定其通否即驳放不得优假虚名至终场中禁私荐属科人募告者其赏有差举人勒还本贯重役永不得入科场八月丁卯王佑知贡举知制诰扈蒙左补阙梁周翰秘书丞雷德骧并权同知贡举权同贡举始此戊辰上御讲武殿覆试王佑等所奏合格举人王式等因语之曰向登科名给多为势家所取塞孤贫之路甚无谓也今朕躬亲临试尽革畴昔之弊式等皆顿首谢于是内出赋题得进士王嗣宗以下三十人诸科三十四人江南进士林松雷说试不中格以其间道来归并赐三传出身王侶宗王式刘克荷拔萃科干德二年四人建隆三年复置选人限格未至者各取本州岛解至吏部试判二条分五等放选利用等吏部试中诏翰林学士于内殿复试帝临观之赐袭衣金带干兴元年宋若谷以下六十五人天圣三年林异以下四人六年常禹锡以下八十三人

九年萧■〈亻 璽〉以下三十人

太宗

太平兴国二年正月上初即位以封疆至远吏员益众思广振淹滞以资其间阙顾谓侍臣曰朕欲博求俊义于科场中非敢望拔十得五止得一二亦可为致治之具尔礼部上所试合格人名上御讲武殿出赋题覆试依次用韵命翰林学士李昉扈蒙定其优劣得河南吕蒙正王相李至张宏张齐贤王化基王沔温仲舒一百九十人并赐及第余并赐出身凡五百人皆先赐绿袍靴笏赐宴开宝寺上自为诗一章赐之唐时礼部发榜之后醪饮今曲江号闻喜宴五代于名园佛舍中周显德中官主之上命中使典领供帐甚盛第一第二等进士并九经授将作监丞大理寺评事通判诸州同出身及诸科并送吏部免选优等注拟初资职事则同簿尉宠章殊异历代所未有也薛居正等言取人太多用人太骤上欲兴文教抑武事弗听及蒙正等辞乃召令升殿谕之曰吏治所有不便于民者疾置以闻仍赐钱二十万或曰太祖之幸西京也洛阳张齐贤献下并汾富民封建敦孝举贤太学籍田选良吏惩奸谨刑十策太祖召见便坐问之齐贤以手画地条陈太祖善其四齐贤坚执其余皆善太祖怒令卫士曳出及还语上曰我幸西京惟得一张齐贤我不欲遂官爵之汝异时可收以自辅也于是齐贤举进士上决欲置之高等有司第其名适在数十人后上不悦乃诏进士尽第二等及九经凡一百三十人悉与超除盖为贤故也

三年八月上先诏权罢贡举恐场屋间有留滞者乃诏诸州去年已得解者除三礼三传学究外余并以秋集礼部九月上御讲武殿覆试合格礼部人进入加论一道余人得无滥进者乎己巳诏自今诸科并令量定人数相参引试分科隔坐命官巡察监门谨视出入有以文字往复与吏为奸者寘之于法私以经义相教者斥出科场互保与知亦连坐进士倍加研覆贡举人勿以曾经御试不考而荐始令试官亲戚别试者凡九十八

人又罢进士试帖经上御崇政殿覆试礼部贡举人得进士须城梁颢百七十九人庚申得诸科三百一十八人并唱名及第唱名自此始据登科记宰相李昉之子宗谔叅知政事吕蒙正之从弟蒙亨监赃使王明明之子扶度支使许仲宣子问举进士试皆入等上曰此并势家与孤寒竞进纵以艺升人亦谓朕为有私也皆罢之青州人王从善应五经举始踰冠自言通诵五经通注上历举本经试之其诵如流特赐九经及第面赐绿袍银带钱二万时左右献言尚有遗材壬戌复试又得进士上元洪湛等七十六人癸亥得诸经科三百二人并赐及第夏四月丙子复置明法科分周易尚书各为一科以论语孝经尔雅三小经毛诗专为一科明法亦附三小经进士九经以下更不习法书又以鏊厅求试者率多缪滥令诸道州府自今择材学优等而历官无过者乃举之仍先奏俟报【甲科梁颢年八十二作状元张惟明裴湛钱若水陈允省元熙乙科吕防李昉任中正闻丘陵令丙科赵安仁陈彭年凌策宋惟善陈昭庆四等崔度】

端拱元年夏四月丙申先是翰林学士礼部侍郎宋白知贡举放进士程宿以下二十八人诸科一百人榜既出谤议蜂起或击登闻鼓求别试上意其遗材壬寅诏下第人覆试于崇政殿得进士马国祥以下及诸科凡七百人令枢密院用白纸为牒赐之以试中为目令权知诸县簿尉谓枢密副使张宏曰朕自即位以来亲选贡士大者为栋梁小者为榱桷今封疆万里人无弃材日思孜孜庶臻理学卿与蒙正曩者颇为大臣所沮非朕独断则不及此宏顿首谢曰凡三掌贡士所取如苏易简王禹偁辈皆知名而罢黜者众因致谤议时知制造李沆亦同知贡举谤议独不及【程宿省王元扶陈尧佐石成之诸科卢范以下八十余人】上既擢马国祥等犹恐遗材复命左右正言王世则等召下第进士及诸科于武成王庙重试得合格进士数百人丁丑上覆试诗赋又拔进士叶齐以下三十一人诸科八十九人并赐及第【叶齐江拯赵準等】

雍熙二年三月先是翰林学士知贡举苏易简等用亲试壬寅上御崇政殿试合格举人得进士闻中【陈尧叟知白曾会姚揆苏奂赵楨张智盛度等】一百八十六人赐宴令两制三馆文臣皆预赐尧叟等箴一首勉以修身谨行稽古服官之意十二月上谓宰相曰国家取士历级而升下位韬晦才行多矣当勿以此为限庶朕急贤之志因言为人臣者治平之代功效难见若乱世则止用其才不顾其行如陈平韩信顷刻能立功业当治平则无所施其谋畧故孔子四科以德行为长又言下位卑秩不可谓无良士大凡孔子含章守道难进易退不求闻达故常患其不能知也吕蒙正曰迭试事任则能否洞分上曰性之善恶何由知之蒙正曰人之为善终不能掩久则弥着至于为恶亦然苟暂闻善恶或涉爱憎恐误任使必久而察之则赏罚无滥上善其言

淳化三年三月上御崇政殿覆试合格进士先是胡旦苏易简王世则梁颢陈尧叟皆以试先成擢上第由是士争习浮华尚敏速或一刻数诗或一日十赋将作监丞莆田陈靖上疏请糊名考校以革其弊上嘉纳之于是召三馆文学之士始令糊名考校定其优劣以分第缀内出卮言日出赋题试者骇异不能措词相率叩殿槛上请会稽钱易时

年十七日未中所试三题皆就言者指其轻俊特黜之得【孙何省元宋台符路振王钦若丁度张士逊王曙薛奎等】以下凡三百二人并赐及第上谕之曰尔等各负志业中我廷选効官之外更励精文翰勿坠前功也何等旅拜称谢辛丑覆试诸科就宴锡御制诗三首进士孙何而下四人皆授将作监丞大理评事通判诸州余及诸科授职事州县官入谢于长春殿上谓宰相曰天下至广藉羣材共治之今岁登科第又千余人皆朕所选择此等但能自检情美替而归则驯政亨衢未可测也时诏刻礼记儒行篇赐大臣及百官受任于外者并赐何等令为座右之诫初内殿策士赐诗至尧叟易以箴至何则诗箴并赐时论荣之

咸平元年翰林杨砺等受诏知贡举请对上召坐诏之曰贡举重任当务选推寒俊精求艺实以副朕心砺建隆初榜首及第二月壬辰诏礼部贡院考试毕日録合格人姓名以闻当议降敕发榜赐及第如覆试有滥谬知举官重行朝典戊戌诏以久停贡举颇滞时材令礼部取合格人内进士放孙仅等五十人诸科百五十人来岁不得为例旧制国子监开封举人有与发解官亲戚者止两司更互考试不应涉私是秋特选官别试钱若水等覆考进士试卷故事京府解十人已上谓之等甲非文业优赡有名称者不处时以高辅尧为首钱易次之易颇为流辈所推许辄不平遂上书指陈发解官所试官朽索取六马赋又论诗策题意涉讥讪又进士百十人诣府讼荐送不公辅尧亦投牒逊避请以易为首开封府以闻故有是命仍令两制议所讼题时翰林学士承旨宋白深佑易考官度支员外郎冯拯力言易士行不可冠天府多士上以士流纷竞不可启其端且欲镇压浮俗乃诏止拯罢两制议及覆考止令若水等有文行兼著者一人为首乃以孙暨等为第一辅尧第二易第三余并如初易初以轻俊被黜既而太宗与苏易简论当时文人且叹不与李白同时易简言易能为歌诗殆不下李白太宗大喜曰果如是吾当以白衣召至禁林会盗起岭南事乃止

二年正月乙丑命礼部尚书温仲舒知贡举御史中丞张咏知制诰张颉同知贡举刑部员外郎董龟正王步同考试及封印卷首仍当日入院礼部贡院封印试卷自此始癸亥诏今岁举人至众仍依例恐有遗落可增及七十人诸科增一百八十人礼部寻以孙暨等一百五十人名闻内诸科一举六人特黜去之余并赐及第五月诏天下贡举人应三举者今岁并免取解其余依例举送必求才艺不使遗贤当俟奏名朕亲临试

三年二月学士王旦等三人同知贡举三月甲午上御崇政殿亲试命翰林学士承旨宋白等于殿后西阁考覆国子监博士雷悦著作佐郎梅询封印卷首亲览入等赐【陈尧复周企李社二甲吕夷简三甲任布四甲羌遵五甲石待问何宗朝等】四百九人及第赐宴日以御诗褒美之上凡三日临轩初无倦怠之色所擢凡千八百五人其中有自晋天福中随计较艺之详推恩之大近代所未有也四月赐应制举人林陶同进士出身陶就试学士院不及格上方欲采俊茂故特獎之

五年三月上亲试礼部举人得进士益都王曾以下三十八人九经诸科百八十人



并赐及第【王曾省元王随韩亿章得象等】先是贡举人集都下者万四千五百六十二命吏部陈恕知贡举恕所取士甚多以王曾为首及是糊名考授曾复中甲科时议称之十一月河阳判官张之白上疏其言科举之弊畧云圣人居守文之运将致清化源在乎正儒术古之学者简而有限今之学者其书无涯其道非一是故学弥多性弥乱今进士之科大为时所进用其选也殊其待也厚进士之学者经史子集也有司之取者诗赋策论也是故五常六艺之意不遑探讨其所习泛滥而无着非徒不得专一又使害主其中何谓其然且羣书之中真伪相半乱圣人之微言者多背大道之宗旨者非一若使习而成功得不揉淳粹之性荡中正之气其为吏也安能分挈治柄使教令黜陟哉况夫儒者之术不以广记隐奥为博学不以善攻奇巧为能文若使明行制令大立程序每至命题考试不必使出于典章之外参以正史至于诸子之意必须辅于经合于道者取之过此并斥而不用然后先策论后诗赋责治道之大体舍声病之小疵如是则使夫进士之流知其所习之书简而有限知其所学之文正而有要不施禁防而非圣之书自委弃于世矣不加赏典而化成之文自兴行于世矣上览而嘉之召试舍人院除右正言

景德二年三月甲寅上亲试礼部奏名举人得进士李迪以下二百四十六人第为五等上谓宰相曰昨亲阅考官所定试卷意其入下等太多即别加详考往往合格比缘入试多士糊名校覆在于公当而考官不知朕意过抑等第欲自明絶私甚无谓也迪所试最优李谿亦有可观闻其幼年母为父所弃在舅氏谿日夕号泣求还其母乃致絶荤茹祷祈又能刻苦为学自取名级亦可嘉也以迪为将作监丞谿及夏侯鳞为大理评事通判诸州进士第一等为试校书郎先是迪与贾边皆有名场屋及礼部奏名而二人皆不与考官取其文观之迪赋落韵边论当仁不让于师文义与注疏异特奏令就御试叅政王旦议落韵者失于详审舍李迪李谿刘滋王矩注疏而立异论辄不可许恐士子从今放荡无所準的遂取迪而舍边当时朝论大率如此夏四月枢密直学士刘师道责授忠武行军司马知制诰陈尧叟单州团练副使先是师道弟正道举进士礼部奏名将廷试近制糊名考校尧叟为考官教正道于卷中密为私号正道既上第或告其事诏落名永不预奏庚申上亲试士百人得进士范昭等五十一人余赐出身特奏名进士李正辞论文武先后以为文者本乎静武者本乎动动以止乱而至乎静则先后可知上嘉其近理将擢上第会有言尝犯杖遂补三班奉职抚州进士晏殊年十四大名府进士姜益年十二皆以俊秀闻乃召试殊试诗赋各一首益试诗六首殊行文敏甚上乃叹赏宰相寇准以殊江左人欲抑之而进益上曰朝廷取士惟才是求四海一家岂限遐迩如张九龄何尝以僻陋弃乃赐殊进士出身益同学究出身后一日复召殊试诗赋殊言赋尝所私习上益爱其淳直改试他题既成上曰善擢秘书省正字秘阁读书翰林学士晁迥等上考进士新格诏颁行之初陈彭年以进士轻俊喜谤主司宋白知贡举恶其为人黜落之彭年憾然于是更定条制多意白旧事而设闕防所取不复拣择文行止校一日之艺虽杜絶请托然真甲等者或非人望自彭年始也

大中祥符元年夏上亲试进士命李宗谔等八人为考官谕宗谔等务在精详勿遗贤俊赐进士姚晔等及第先是谢恩方令释褐是日特赐绿袍靴笏以晔等三人为将作监丞大理寺评事过判诸州四五为两使推官六人以下为试衔知县余为簿尉【姚晔祖士衡郑向杜衍】先是监察御史张士逊为贡院监门官时贡举初用糊名之法士逊白主司有亲戚在进士中明日当引试愿出以避嫌主司不答士逊乃自言引去上是之记名于御屏乃诏自今举人典试官有亲嫌者皆移试别项

二年六月上御崇政殿服勤词学经明行修人第为五等赐进士梁固等及第固灏之子也以灏遗荫赐进士出身服除诣登闻让前命愿赴乡举从之

四年十二月先是汾阴赦书举服勤词学经明行修之士如东封例惟不重考丙子上御殿亲试进士叩殿槛请示诗赋论题所出上令录示之方令试赋论中不得用小臣儒有字又以冬日景短罢常务不决即令引试内新定条制举人内试卷内臣收之先付编排官去其乡贯状以字号第之付弥封缮录校勘用御书印方付考官定等讫又封弥送覆考官再定编排官阅其同异未同者再考之如复不同即以相近为定始取乡贯状字号合之乃第其姓名差次并试卷以闻遂临轩唱第赐进士【张师德丁度程琳等】三十一人及第汾阴路多上文章庚辰诏以约州叅军许洞推官解旦等九人姓名附中书言旦及进士范本陈矩词学可采授著作佐郎本赐及第矩赐出身

五年壬子上谓宰相曰闻贡院试诸科举人皆解衣阅视虑其挟藏书册有失取士之体宜令正之先是直史馆刘锴请依本并同保人殿一举是岁诸科以挟书扶出者十八人并同保九十三人而十二人当奏名有司以闻上特令赴殿试乃诏礼部别加裁定罢同保殿举之制诏录诸州军试题进内上将试进士虑其重复故自是用为常例己丑上亲试礼部合格贡举人殿之廊宇分列位次署其名氏仍揭于榜使不得迁易始模印试题以赐官给纸起草得进士【徐奭明镐徐杲王咨孔道张演】一百二十六人五月戊辰诏礼部权止今年贡举

七年秋丙子诏自今差发解知举等授勅讫即令阁门祇候一人引送鑱宿不得与僚友交言违者合门弹奏如所乘马未至即以廐马给之因王曾受诏与试举与学士利瓦伊偶语合门使魏昭亮意曾受维请托奏之因有是诏【曾以妻临产属维以家事】上御景福殿试亳州南京路服勤词学经明行修举人得进士林宥张观等二十二人赐及第除官如西封例上谓宰相曰近年举人文艺颇精孤贫得路然为主司亦大有不易徇请求则害公绝荐托则获谤王旦曰今郡县至广人数亦多必须临轩亲试至于南省解发亦朝廷特为主张则虽贵戚主司亦难以集事

八年六月以童子蔡伯希为秘书省正字其父龟从为校书郎以龟从善于教子召试中书而命之伯希四岁诵诗百余篇初开封府解服勤词学进士二十人为下第者刘溉所讼其十三人以寓贯皆奔窜潜匿有司追捕王旦奏曰陛下比降恩诏搜罗才俊今反变为囚系有伤风教且科举之设本待贤德此辈操行如此望特出宸断以惩薄俗上

曰此盖当时不曾晓谕致此过误其寓贯者当并释罪漑付外州拘管既而御史高弁上言漑讼事得实被责太过上以问旦旦曰漑讼未必非必据款乃俟其得解则讼缙绅之蠹贼朝廷黜其无行谏官所宜乐闻弁妄形奏对由是言之向非圣断明哲辨举子误犯则须连坐府县御史糾弹甚无取也上览诸道贡举之人减于常年因曰外郡官吏未体朕心比者诏累下但戒其徇私尔若能精择寒俊虽多何害是岁方置誊録院令封弥印官封印所试卷付之集书吏録诸司供帐内内侍二人监焉命京官校正用两京奉使印讫复送印院始送知考官考校丙子诏礼部贡院进士六举诸科凡举以上有不合格并许奏名戊戌赵安仁上合格之人姓名上谓宰相曰今岁举场似少谤议安仁等乃对朕亦以此语之矣王旦曰条式备具可守而行至公无私其实由此癸卯上御殿覆试多所黜落又疑所加抹者未当命宰相阅视之旦曰考官过为艰难公在其中矣于是得进士【蔡齐王举正等】四十九人乙卯科【龐籍范仲淹李若谷等】三百八十人余诸科并赐及第同出身除官如元年之制齐等考定上顾问王旦等曰有知姓名者否皆曰人无知者真所谓搜求寒俊也故事当赐第一新喻人萧贯与齐并见齐仪状秀伟举止端重上意已属之知枢密院寇准又言南方下国人不宜冠多士齐乃居第一上喜谓准曰得人矣特诏金吾给士驺出两节传呼因以为例准性自矜尤恶南人轻巧既出谓同列曰又与中原夺得一状元齐胶西人四月赐进士杨伟及第贾昌朝同出身大礼之初贡举人呈诗颂者甚众近臣详考惟伟及昌期可采故召试学士院而命之

天禧元年冬前江州瑞昌县主簿刘若冲进所业命试舍人院以策论稍优特加两资先是若冲建议自今召试者并请试策至是用其议而命之

二年秋诏自今试琐厅举人所在长吏先考艺业合格即得取解如至礼部不及格当停见任其前后举送长吏并重寘其罪

三年三月翰林学士钱惟演等四人同知贡举诸路贡举人郭稹等见于崇政殿稹冒緦丧殿三举同保并殿一举时有司欲脱王洙问洙曰果保稹否不然可易也洙曰保之不愿易也乃与稹俱罢

三月上亲试礼部奏名贡举人作诗赐考校官令皇子书示宰相得进士王整以下及第【程戡常禹锡孙堪】除官如前例

干道元年夏壬寅以光禄寺丞尉氏马季良家本茶商刘美女婿也于是召试馆职太后遣内侍赐食促令早了主试者分为作之

仁宗科举取士

天圣二年春正月甲午诏礼部贡院开封府国子监及别头各增置点检试卷封弥巡铺监门官有差癸卯命御史刘筠等同知贡举二月乙丑上谓王钦若曰久罢贡举虑遗天下贤士宜令礼部贡院精加校试将来放进士特增置二百人诸科三百五十人三月礼部上合格进士姓名诏翰林晏殊学士冯元编排等第乙巳赐宋郊叶清臣郑戡等及第郊与弟祁俱以辞赋得名礼部奏祁名第三太后不欲弟先兄乃推郊第一祁第十



刘筠得清臣所对策擢第二国朝以策擢高第自清臣始夏四月庚辰以特奏名进士李道宗等诸科王播等为将作监主簿及诸州长史文学参军道宗等皆年止五十常应六举王播年止六十常应八举上因谓大臣曰此虽举业非工然闵其白首无成故甄录之第一甲【叶清臣郑戩高若讷曾公亮宋祁】二甲【余靖宋成尹洙胡宿】第一人为通判德车结旌赋【采侯诗】

三年八月辛亥知益州薛田言本州岛解发举人自张咏以来例给馆券至京师今得三司移文以责吏人偿所给官物恐非朝廷之意上曰汉贡士皆郡国续食今独不能行之远方耶其令悉免之

四年五月己卯诏礼部贡举人实应三举诸科五举并免取解诏增西川广南东西路诸州军进士解额有差又诏命官锁厅应举自今更不试所业乙第者免责罚古制先于所属选官考试所业方听取解至礼部程文不工勒停不及格赎罚至是上欲开诱进士之路近臣叅定而降是诏下第免责景佑元年四月又有诏盖此专指【下第者彼又及不得解者】冬十月乙酉诏进士诸科曾经先朝御试而今不预荐者许就省试

五年春己未诏礼部贡院比进士以诗赋定去留学者或广声律而不得骋其才其以策论兼考之诸科毋得离析经注以辨问因辛酉御崇政殿试礼部奏名进士仍命翰林学士宋绶以下三十六人为封弥誊录考覆详定编排官如旧制乙丑赐进士王尧臣等及第三百三十七人【韩琦赵槩包拯吴育陈举亮文彦博二甲刘观王翼圣有谟烈赋南风之熏诗执政如金玉论】夏癸酉试特奏名及诸科赐同出身寻下诏戒谕诸道举人宜奋励文学毋坐视日月以望恩泽

七年闰五月己未朔诏礼部贡举庚申诏曰朕试天下之士以言观其趋向而比来流风之弊至于附会小说磔裂前言竟为浮夸靡曼之文无益治道非所以望于诸生也礼部其申饬学者以明先王之道有合朕意焉

八年春丙寅命资政殿学士晏殊同知礼部贡举三月御崇政殿亲试进士王拱辰等二百四十九人并赐及第【刘沆孙材蔡襄田况石介欧阳修二甲田师锡元絳刘元俞孙甫唐介尹原】上三名并签判八月学士晏殊言唐明经并试策问参其所习以校材识今专取记诵请终试策一篇诏近臣议可否咸以诸科非素习议乃止

明道二年秋七月乙亥诏诸州自今考试举人并封弥卷首仍委运司于所部求才学若公勤者为考试监门封弥官冬十月上谕内臣曰近岁进士所习诗赋多浮华而学古者或不得以自进宜令有司兼以策论取之景佑元年春诏曰朕念天下士乡学益繁而取人之路尚狭或匿迹田里白首而不得进其令南省就试进士诸科十取其二进士五举年五十诸科六举年六十常经殿试进士三举诸科五举预先朝御试试不合格句輒黜皆以名闻自此率以为常三月戊寅试礼部奏名进士张唐卿以下并赐及第【张唐卿杨察石询有吴秘林槩张来杨靖蔡挺苏舜钦柳二友石亚之石元之叶适柳三接刘安世】

四年春甲寅诏礼部贡院自今年三月一日申请贡举其举人到省以十一月十五为限先是贾昌朝言举人有亲戚仕在本州及侍父祖远官本州二千里宜敕运司选官类试以十率之取三人诏两制议丁度言贡举古制以五月一日申请十月二十五日上召于省若二千里移试不及愿稍宽其期一如昌朝说故降是诏自是诸路始有别头试六月丙申诏开封及国子监及别头试自今弥封誊录如礼部左司谏韩琦之请也十月己未章得象言开封进士章仲昌臣乡里疎属冥无艺业近闻讼诉发解不公事请牒归其家从之时锁厅应举人特多开封投牒者百十国子监及诸州不在及出榜宰相陈尧佐之子博古为解元参政韩亿子孙四人无落者故嘲谤羣起然殿中侍御史萧定基直集贤院韩琦吴育王拱辰实司试事非有所私也

宝元元年春试礼部奏名进士三百十人及第赐诸科四百十四人及第并出身特奏名被恩赐者又九百八十四人琼林宴初试太学篇【吕臻祖无择石杨伏王屏司马光吕大临范镇吕晦吴中伏吴充陈执中】先是上以开封所解进士陈博古等嘲谤籍籍诏博古并韩亿四子并两家门下士范镇家静试卷皆勿考镇成都静眉山人考官奏请镇固有文久驰名场屋非附两家之势而乃得听考而降其等级镇礼部奏名为第一故事第一人赐第未有第二甲者虽近下犹升之吴育欧阳修殿庭唱第上三人亦抗声自陈镇乃默然至第七十九人乃拜出退就列无一言众以是贤之礼部第一人在第二甲自镇始初薛奎知益州还朝与镇俱或问奎入蜀所得奎曰得一伟人当以文字名世

二年十一月壬辰诏礼部自今诗赋论题并以注疏所解揭示之不许上请或题目有疑当请者仍不得近帘闰十一月锁厅别试

庆历二年丁巳命翰林聂冠卿权知贡举初学士李淑侍经筵询以进士诗赋策论先后俾以故事对淑退而奏曰唐调露二年刘思立为考功员外以进士止试策灭裂不见其学请帖经以观其学试杂文以观其材自此沿以为常至永隆二年进士试杂文通文律者始试策天宝十一年进士试一大经能通试文赋又通而后试策五条皆通为中等第建中二年赵赞试以时务策五首箴论表赞各一首以代诗赋太和二年试帖经畧问大义取精通者次试论议各一首八年礼部试以帖经口义次试策五道问经义者三问时务者二自后变易而以诗赋第一场论二场策三场帖经第四场今陛下欲求理道不以雕篆为贵得取士之方矣然考官以所试分考不能通加评较而每场有退落士之中否系于幸不幸耳愿约古制先策次论次赋次帖经墨义而敕有司并试四场通较工拙毋以一场得失为去留诏有司议稍施行焉一日知制诰富弼言国家沿隋唐取士之制景德来为法尤密言省试有三长殿试有三短不容私诗赋策论才能可见两月余研究泛取不择三篇不能尽人考究不服乃罢十月又言殿试始于武后不足法辛巳诏罢殿试翰林王尧臣同修起居注梁适皆以祖宗故事不可遽废越三日诏殿试如初三月赐进士杨寘等三百三十七人及第寘登第初试国子监礼部皆第一及是帝临轩启封见姓名喜动于色谓大臣曰杨寘也公卿相贺为得人授将作监丞通判颍州【杨寘韩

绛王珪陈洙王安石吕公着苏颂传尧俞吕夏卿】三年八月上擢任范仲淹责以太平仲淹条奏十事三曰精贡举畧曰外郡发解进士本乡举里选之式必先考其履行然后取以艺业今乃不求履行惟以词藻墨义取之加用弥封不见名姓大非里选之本意也又南省考试举人一场试诗赋一场试策人皆精意尽其所能复考较日久实出舛谬及御试之日诗赋文论共为二场既声病所拘意思不逮或音韵中一字有差生平苦率实时揜逐如音韵不失有末学浅近俯拾科第既乡举之处不考履行御试之日更拘声病以此士人进退多言命运而不言行业明君在上固当使人以行业进乃言命运者是善恶不分而归于天也岂国家之美事哉臣请复位外郡发解条约须是履行无恶艺业及等者方得解荐更不封弥试卷南省考试之人已经本乡询考履行更须封弥试卷艺业定夺高下乞入进御前选官覆考复位高下乞然后开看明年施行南省所定高下内高下合同姓名偶有高下更不移改若等不同人数必少却加封弥更宜两地参较然后御前放榜此为至当内三人以上即于高等人中选择圣意宣放其考校进士以策论高词赋次者为优等策论平词赋优者为次等诸科经旨通者为优等墨义通者为次等已上进士诸科并以优等及第者放选注官次等及第者守本科选限自唐以来及第人皆守选限国家以收复诸国郡邑之人其新及第人权与放选注官今来选人壅塞宜有改革又足以劝学使知圣人治身之道则国家得人百姓受赐

四年春范仲淹等意欲复古劝学常言兴学校本行实诏近臣议于是翰林宋祁御史王拱辰知制造张方平欧阳修侍御史梅挚侍讲曾公亮王洙右正言孙甫监察御史刘湜【此乃李清臣史藁】合奏曰伏奉诏有曰取士当求其实用人当尽其才今教不本于学校士不察于乡里则不能核名实有司束以声病学者専于记诵则不足尽人才此乃议者所共为言也谨参考众说取其便于今者莫若使士皆土著而教之于学校然后州县察其履行则学者修饬矣故为设立学舍保荐举送之法夫上之所好下之所向今先策论则文词者留心于治乱简程序则闾博者得以驰骋矣取大义则执经者不专于记诵矣其诗赋之未能肄者杂用今体经术之未能亟通者尚如旧科则中常之人皆可勉及矣此所以尽人之才者也故为先策论过落用诗赋考式问诸科大义之法此数者其大要也其州县封弥誊录进士诸科帖经之类皆苛细而无益一切罢之法行则申之以赏罚如此养士有本取才不乏为治之本也乙亥诏曰儒者通天地人之理明古今治乱之原可谓博矣然学者不得骋其说而有司务先声病章句以拘牵之则吾豪俊奇伟之士何以奋焉士有纯明茂材之美而无文学作成之法其饬身立节者使与不肖之人杂而并进则无文德敏行之才可以见焉此取士之甚弊而学者自以为患亦尝屡以为言比今详酌仍令政事府参定皆谓本学校以教之然后可求其行实先策论则辨理者得尽其说简程序则闾博者可见其才至于经术之家稍增新制兼行古法以勉中人烦法细文一皆罢去明其赏罚俾各劝焉如此则待人之意周取人之意大夫遇人以薄者不可责其厚也今朕建学兴善以尊士大夫之行而更制革弊以尽学者之才教育之



方勤亦至矣有司其务严训导精察举以称朕意学者其进德修业不失其时凡所科条可为永式其令曰州若县皆立学本道使者以属部官为教授三年而代选于吏员不定取于乡里宿业有道德者三年无私遣以名闻士须在学习业三百日乃听预秋试旧常充试者百日而止亲老无嫌特取保任听学于家而令试于州者相保任所禁有七曰隐忧匿服曰尝犯刑责曰行亏孝弟有状可指曰明触宪法而经赎罚或不经赎罚而有害乡党曰籍非本土假户冒名曰祖父犯十恶四等以上罪曰工商杂类或尝为僧道皆不得预进士试三场先策次论次诗通考为去取而罢帖经墨义又以旧制用词赋声病偶切立为考式一字违忤已在绌落使博识之士临文拘忌俯就规检美文善意郁而不伸如白居易性习相近远赋独孤绶放驯象赋皆当时试礼部对偶之外自有意义可观宜详仿唐体使驰骋于其间士子通经术愿对大义者试十道以晓析意义为通五通为中格三史科取其明史意而文理可采者明法科试断案假立甲乙罪合律令如法意文理优为上等

五年此即仲淹十事之三也丙子诏礼部贡院增天下解额总诸州军凡增三百五十九人诏遂为定额

庆历六年赐进士五百四十四人出身【贾黯谢仲弓田育王存赵瞻孙园熊本】

皇佑元年三月进士冯京以下四百九十八人【冯京沈遘以有官不得为第一遂降次名钱公辅李育文同毛国华吴申吕大防范百禄孙几】盖軫象天地赋日昃不暇食诗天听君人之言论二年十一月诏自今诸省元得申奏及遣念书童子赴阙

寶元元年六月戊寅罢天下举念书童子可考

五年三月辛酉赐进士郑獬等五百二十人及第二百人出身一百五十人同出身【獬安陆人也杨绘圆丘象天赋律听军声诗乐与人心论滕甫杨美蒲宗孟李无党李清臣吕陶李定蒲宗闵杨古客钱藻】秋戊子诏礼部贡院自今诸科举人并以四通为合格凡经止问大义不须注疏全备其九经场数并各减一场仍不问兼经又诏试官亲嫌令府监互相送若两处俱有亲嫌即送别头

嘉佑二年春正月翰林学士欧阳修权知贡举先是进士益相习为奇僻钩章棘句寢失浑厚修深疾之遂痛加裁抑乃严禁挟书者及试榜出时所推誉皆不在选器薄之士候修晨朝羣聚呵斥之至街司逻吏不能止或为祭欧阳修文投其家卒不能求其主名置于法然文体自是亦少变

丁亥赐进士章衡等二百六十三人及第一百二十六人同出身是岁进士与殿试者始皆不落【李复圭纪闻云是春以进士辱欧阳修之故殿试及第不落一人当考民监赋鸾刀诗重巽申命论章衡窦卞郑雍吕惠卿蒋之奇苏轼曾肇朱光庭曾布宋希史元道王韶梁焘苏惟贤苏辙刘元喻】十二月先是上封者言四年一贡举四方士子客京师以待试者六七千人一有喧噪其徒众多势莫之禁且中下之士往往废学数年才学之士不幸有故一不聽诏沉沦十数年或累举滞晋遂至困穷老死者甚众以此毁行

冒法干进者不可胜数宜间岁一贡中分旧数而荐之王洙侍讲周礼至三年大比大考州里以赞乡大夫废兴帝曰古者选士如此今经四五岁一下诏故士有抑而不得进者为今之计孰若裁其数而屡举下有司议乃合奏曰间岁之法无害有利不足疑戊申自今间岁贡举进士诸科悉解旧额之半进士增试时务三条诸科增试大义十条又别置明经科其试法凡明两经或三经五经者各问墨义大义十条两经通八三经通六五经通五为合格兼问论语孝经十条分八场出身与进士等以礼记春秋左氏传为大经毛诗周礼仪礼为中经周易尚书谷梁传公羊传为小经其习礼记为大经者许以周礼仪礼为中经习春秋左传者许以谷梁传公羊传为小经旧制说书举合罢之其不还乡里而寓户他州以应选者严其法每秋试自县令佐奏行义保任之上于州长贰复审察得实然后上本道使者类式已保任而后有缺行则州县皆坐罪若省试而文纰谬坐元考官又用孙抃奏诸州解试额多而中程少不必足额

八年夏诏科场旧条皆先朝所定宜一切无易时礼部贡院言四年宋祁等定贡举新制会明年诏下且听须后举施行今秋试有期缘新制诸州军发解但令本处官属保明行实其封弥誊录一切罢窃见外解送举人自未封弥誊录以前多采虚誉苟试官别无请托亦先取本州岛曾经荐送旧人其新人百不取一封弥以后考官不见姓名即须实考文艺稍合至公又新制进士先试策三道次试论次试诗赋先考策论定去留然后与诗赋通定高下然举人每至尚书省不下五七千人及临轩覆较止及数百人盖诗赋以声病杂犯易去留若专取策论必难升黜盖诗赋虽名小巧且须题命事若记问该富则辞理自精策论虽有间敷对多挟他说对不及五通尽黜之即与原了解额不敷若精麓毕收则滥进殊广所以自祖宗以来未能猝更其制兼闻举人经史疑义可以出策论题目凡四十条谓之经史质疑至于时务亦抄撮其要浮伪滋甚若为考试又旧制以词赋声病剽切之类立为考式今特许仿唐人赋体及赋不限联数不限字数且古今文章务先体要古未必悉是今未必悉非常规唐人体式诗赋与本朝所取名人辞艺亦工拙相半俗儒是古非今不为通论自三朝以来国子监生诗赋即以汗漫无体为高策论即以激讦肆意为工中外相传愈远愈滥非惟渐误后来省试其合格能几何人伏以祖宗以来得人不少考较文艺固有规程不须变更以长浮薄请如旧制故降是诏五年三月己卯下诏贡院所试诗赋经又并如旧制本志以为杨察建是议而实录但上封者言新制不便不出主名八年四月丙子又下诏乃其贡院申请即本志所书杨察初议弘按察权判贡院初建此议当五年三月既已施行八年四月贡院复有申请其议则实察五月所建者但不知此时察仍判贡院或已罢尔今两存之仍于此年依实录不出察主名本志又于此诏后书张方平知举请下诏辞赋新体拔方平以六年二月知贡本志误矣初诏外州发解到省差官覆考盖虑因此或致折退寒士故也

四年五月进士一百六十五人【尧舜性之赋求遗书于天下诗易简得天心之理论刘挥胡宗愈安焘刘摯章惇蔡确】二月庚寅诏礼部贡院曾经御试五举诸科六举

进士省试六举诸科七举年五十以上者具以名闻

六年四月进士一百八十三人【士者通天地人赋天德清明诗水几于道论王俊民黄履刘奉世贾易江术孔文仲韩忠彦王安礼张焘】八年三月赐进士许将等一百二十七人及第六人同出身诸科二百四十七人及第同出身【许将范祖禹孔武仲沈括吕陶】治平元年五月己巳礼部奏乡贡进士李加言等伯父为道士而死请比外继降服大功九月许其应举天圣七年置武举皇佑元年诏罢之嘉佑八年密院奏以为文武二选所關治乱不可阙一与其任用不学无术之人临时不知应变以挠师律不若素习韬畧颇闲义训之事缓急驱策可以折冲况今朝廷所用人稍有声称多由武举而得则此举不可废明矣即诏两制详议所集举业及较试取中推恩之数两制议请随进士等科开设许在京管军及正在横行使副知杂及三院御史谏官并转运判官提刑三路知军州及路分总管钤辖各奏举一人试及武艺优者与殿直三班奉职殿直三班差使策不中而武艺絶伦者取旨学士贾黯又奏请如明经之制于太公韬畧孙吴司马诸兵法及经史言兵事者设为问目能用己意或引前人注释辞理明畅及因所问自陈方畧可施行者为通从之而令每开举则兵部至岁中具所举人名数以闻明年三月命馆职两人与判兵部同试策一道命马军司试弓马武艺具所试等籍送试官叅校合格以名闻至八月则命官与判兵部同试策于秘阁命直学士以上及正任或横行使一人与军头司试弓马武艺以所试等第籍送秘阁试官叅考合格者以名闻九月丁卯遂诏复置武学【盖嘉佑八年始议治平元年九月议定乃降诏其降诏因縁密院建请非治平元年九月方建请也】

英宗

治平二年二月赐进士彭汝砺等三百六十一人及第出身汝砺等三人授初等幕职官如咸平年例【彭汝砺章粲张商英舒亶孔平仲孙渐】四年进士三百五十人四等自此三岁一举【许安世宋级那思黄庭坚】司马光权知贡举三年冬十月丁亥诏曰先帝以士久不贡则怠于学而豪杰者不进故下间岁之令冀以得人而自更法以来其弊浸长何则里选之牒仍故而郡国之取减半计偕之籍屡上而道途之劳良苦朕甚闵焉其令礼部三岁一贡举天下解额于未行间岁之法纪前率四分取三分礼部奏名进士以三百为额明经诸科不得过进士之数【举志云自是恩典不增而贡举缓士得休息官以不烦矣今前去】权知贡举司马光上言所考试合格进士许安世以下三百五人分四等明经诸科二百一十一人三等诏进士第一第二第三等赐同出身明经诸科第一第二第三人并为防御团练推官其余注官守选如例

神宗

熙宁三年知贡举王珪上合格进士陆佃等先是知贡举吕公着在贡院中密上言天子临轩策士而用诗赋非举贤求治意乞出自宸衷以谕访治道己亥上御集英殿进士初就席有司犹给礼部韵及试题出乃策问也上顾辅臣曰对策亦何以尽人才然愈



于用诗赋取人尔既而遂赐叶祖洽【司马光目錄曰时韩维吕惠卿初考附者皆在高等言直者多在下等宋敏求刘放覆考及之吴充陈襄从初考祖洽考祖宗多因循苟且之政建隆下革而新之初考为三等中允等奏泛与者吕公泽苏轼编排上官均第一祖洽二佃第五程尧佐奏名第三以陆佃知新法故易第二为第五焉是岁进士二人直诋时病皆在下开封范越一不知名】

四年二月丁巳朔颁学校贡举新制先是王安石谓更学校贡举之法诏两制三馆议之司马光时为翰林学士即应诏上议直史馆苏轼亦议曰准敕讲求学校贡举利害令臣等各具议状闻奏者右臣伏以得人之道在于知人知人之法在于责实使君相有知人之明朝廷有责实之政则胥吏皂隶未尝无人而况于学校贡举乎虽因今之法臣以为有余使君相无知人之明朝廷无责实之政则虽侍从常患无人况学校贡举乎虽复古之制臣以为未足时有可否物有废兴方其所安虽暴君不能废及其既厌虽圣人不能复故风俗之变法制随之譬如江河之徙移顺其所欲行而治之则易为功强其所欲而复之则难为力使三代圣人复生于今其选举贤才亦必有道矣何必由学旧法行之百年治乱兴衰初不由此陛下视祖宗之世贡举之法与今为孰精言语文章与今为孰优所得文武长才与今为孰多天下之士与今为孰辨较此四者短长之议决矣今议者所欲变改不过数端或曰乡举德行而畧文章或曰专取策论而罢诗赋或欲举唐室故事兼采誉望而罢封弥或欲罢经生朴学不用帖墨而考大义此数者皆知其一不知其二者也臣愿陛下明敕有司试之以法言取之以实学博通经术者虽才不废稍涉浮诞者虽工必黜则风俗稍厚学术近正庶几得忠实之士不至蹈衰季之风则天下幸甚议上上曰吾固疑此得苏轼议意释然矣然是卒除声律专意经义罢明经及诸科立新制如安石请其新制曰中书言今贡举新制进士罢诗赋各专治诗书易周礼礼记一经兼以论语孟子每试四场初本经次兼经并大义十道务通义理不须尽用注疏次论一道次时务策取诸科解名增解进士以熙宁二年解明经数为率如举人数多于熙宁二年即每十人更取诸科额一人诸科额不及三人者听依旧每二十人如十人法礼部奏名于诸科解额取十分之三增进士额京东陝西河北河东京西进士开封国子监诸路尝应诸科改应是进士者别作一项考校其诸科取到今数并充进士奏名将来科场诸科宜令依旧应举候经一次科场除旧人外不得应诸科举五路先置学官中书选择逐路各三五人虽未仕有经术行谊者亦许权教授给下县主簿尉俸愿应举者亦听候满三年有五人奏举堂除本州岛判司主簿尉俸依旧兼授即经术行谊卓然为士人所推服者除官充教授其余州军并令两制两省馆阁台谏官僚属荐举见任京朝官选人有学行可为人师者中书体量堂除遂落官令兼本州岛教授诸州进士不及二百人处转运司并邻近三两州考试仍各用本州岛解额殿试策一道限千字以上分五等第一等第二等赐及第第三等第四等同出身第五等同学究出身

六年正月知举曾布上合格进士邵刚等己酉乃御集英殿策试遂赐余中【李夷

行陈唐管师仁管师渐】等四百人及第出身【是年罢诗赋赐期集钱三十贯】

九年三月辛酉御集英殿策试遂赐徐铎以下四百三十人及第出身馆第五请依旧赐进士出身无以同学究耻之不从馆后再言卒从之初命馆知举时专以经取士前史兴亡治乱之迹举者莫得习馆于策问悉访史学至是奏进士张口等合格号为得人事已馆入对上曰卿以史学问矫学者可谓举其偏矣【徐铎李克非邵徇武杨洵刘勃邓洵仁安律】

元丰二年春丁亥诏以经义论试宗室二月辛未知举许将上合格进士朱浚明等庚辰御集英殿策试遂赐【时彦陈瓘朱浚明晁补之家彬张康国】等三百四十八人及第出身是【时免试刑法】五年二月知举李清臣上合格进士刘槩等壬辰御集英殿策试遂赐黄裳【刘案张驯李西美余深邹浩三石解冯解程美杨晦禾杨庭杰】等五百九十人及第出身槩开封人裳剑浦人也裳初考下等上亲擢为第一考官苏颂等各罚金

八年丁亥三省言礼部贡院火试卷三分不收一分欲令礼部别鑿试从之三月兵部侍郎许将给事中兼侍讲陆佃秘书省监孙觉并权知贡举以遗火再试也夏四月己巳诏再试进士及诸科武举人罢今年御试内应直赴殿试者以前举省试等第名次编排在今来止奏名之下不曾赴省试者即与正奏名进士同场别号试策一道五月乙未礼部言贡院以合格进士郑奕江屿刘正夫太史章犯高兖王讳驳放丙申太皇太后曰此举人亦未通知特与收録蔡确曰法当黜以事初过误恕之足彰盛德乃听例依附榜末诏科场推恩依治平四年故事正奏名进士诸科吏部给优牒特奏名中书给勅告优熙宁中悉罢今复之丙申赐刘【逵徐处仁谢良佐白时中郑居中薛昂丘常孙渐刘洵仁王袞侯蒙刘正夫宋鼎】等五百七十五人并释褐武举进士并赐袍笏银带逵隋州人【是年状元本焦蹈蹈卒】

### 哲宗

元佑元年闰二月尚书省言礼部以掌贡举为职伏见朝廷用经术试科盖欲人知义理学探原本近岁以来承学者多闻见浅陋辞格卑弱其意在于治经者专守一家之畧去诸儒传记之说为文者唯务解释而不知声律体要之学深虞人才不继而适用之言从此遂熄欲乞朝廷于取士之法更裁之又礼部言乞置春秋博士及进士专为一经又侍御史刘摯言伏见国朝以来取士设科循用唐制进士所试诗赋论策行之百余岁号为得人熙宁初神宗皇帝崇尚儒术训发义理以新人才谓章句颇碎大道乃罢诗赋试以经义臣愚欲乞试法复诗赋与经义兼用之进士第一场试经义第二场试诗赋第三场论第四场策经义以观其学诗赋以观其文论以观其识策以观其才前二场为去留后二场为名次又言近制明法举人试以律令刑统大义及断案谓之杂科明法登科者吏部将司法员阙先次差注在进士及第人之上臣以为宜有更张欲乞杂科明法并加论语孝经大义登科之额裁减其半及注官之日并科依日资次所贵从事于法者稍

不逮义而士之流不失其分伏望圣慈裁酌如赐开允即乞今年降诏并自元佑五年秋试为始诏礼部与两省学士待制御史台国子司业集议闻奏所有将来科场俱依旧法施行三月司马光言伏覩朝廷科场制度奉圣旨令礼部与两省学士待制御史台国子监司业集议闻奏臣窃有所见不敢以不闻凡取士之道当以德行为先文学为后文学之中又当以经术为先辞采为后神宗皇帝悉罢诗赋及经学诸科专以经义论策试进士此乃革历代之积弊复先王之令典盖王安石不当以一家私学欲盖掩先儒令天下学官讲解及科场程序同己者取异己者黜又黜春秋而进孟子废六艺而尊百家加之但考校文学不勉励德行此其失也今国家大义科场之法欲尽善美以臣所见莫若于先朝成法合明经进士为一科立周易尚书诗周礼仪礼礼记春秋孝经论语为九经令天下学官依注疏讲说学士博观诸家自择短长各从所好春秋止用左传其公羊谷梁陆淳等说并为诸家孟子止为诸子更不试大义应举者聽自專习三经已上多少随意皆须习孝经论语于家状前坐习某经臣愚所见如此伏乞以臣所奏及礼部等官所议榜国子监门及徧下诸州有州学处榜学门令举人限一月内考状指定何法为善仰本州岛附递以闻候到京齐足更委其它执政看详叅酌从长施行先是光以奏藁示范纯仁纯仁答曰孟子恐不可轻犹黜六经之春秋矣更乞裁度光欣纳之左司諫王岩叟奏臣切为庠序所以萃羣材而乐育之以定其志业发其名誉优游舒徐以待科举也不必科举之外别开进举之名多岐以支离其心而激其争端使利害得失日夕战于胸中损育德养道之悖意非所以笃教化育人才也臣愚乞鉴已然之弊罢三舍法开先生弟子不相见之禁学士大夫以不疑讲解之余上以公私试第其高下如昔时自足以獎材气而属风声使多士欣欣于从学则上庠而复有雍容乐易之美为四方矜式矣乞下礼部及司业博士共议右司諫苏辙言臣伏见礼部会议科场欲复诗赋议上未决而左仆射司马光言乞以九经取士及朝官以下保任举人为经明行修之科至今多日二议并未施行臣切惟来年秋试自今以往岁月无几而议不时决传闻四方者知朝廷有此异论无所适从不免疑惑慙乱臣欲乞先降指挥明言来年科场一切如旧但所对经义兼取注疏及诸家议论或出己见不專用王氏之学仍罢律义令天下举人知有定论一意为学以待选试然后徐议元佑二年以后科举式未为晚也从先建言者谓專用诗赋尽黜经义太学生改业者十四五监察御史上官均言义术以理为主诗赋以文为工以理者于言为实而所根者本以文者于言为华而所逐者末先帝革去数百年之弊不为不难而议者不计本末乃欲袭前日诗赋之弊未见为得也愿陛下详审而聽行之又言请令学者各占三经习以论孟不必專用新义试策二道一问历代一访时务禁用释典不得專据庄老比于專用诗赋使学者弊精神于无用之文得失固相遠矣章三上又为六说以辟言者其后诗赋与经义讫并用云诏每遇科举诏下令文官升朝以上赃罪及无私罪重者于应进士举人不拘路公系有服亲各奏举经明行修一名候将来发解及南省名内每人名下注经明行修字至殿试唱名各升一甲姓名如历官后犯正入己赃及进



犯名教者断讫收坐举主并依举选人转京官减一等先是司马光言昨已有朝旨来年科场且依旧法施行窃闻近有圣旨其进士经义并兼用注疏及诸家之说仍罢律义先次施行臣窃思朝廷之意盖为举人经义之体专习王氏新学人务起而集之臣所乞置经明行修科者欲使举人趋向去科场敦尚行义不专取文学所以美教化厚风俗此于经义之体尤有切要宜使举人预知欲乞亦降朝旨先次施行况与进士旧法两不相妨从之十一月三省奏立经义词赋两科下议从之

元佑三年四月丁未诏制科之设旧矣自西汉之世始诏有司详求俊茂亲临采问受其条对故天下魁伟絶特之才守经自重之士得以并进而说言正论益以闻上自斯以来历世用之逮乎祖宗以神圣文武继继承承设六科之选策三道之正以纲维天下贤俊百余年间号称得人先皇帝兴学校崇教术以作新人才变天下之俗故科目之设有所未遑今天下之士多通于经术而知所学矣宜复制策之科以求拔俗之才裨于治道今复制贤良方正能直言极谏科自今年为始令尚书侍郎两省谏议大夫以上御史中丞学士待制各举一人不拘已仕未仕以学行俱优堪备策问者充仍具辞业进余依旧制十一月庚申三省奏检会元佑元年闰二月二十二日指挥将来科场且依旧法施行四月十二日指挥仍罢律义六月十二日指挥将来科场程序不得用字说并用古今诸儒之说或已见即不许引用申韩释氏之书考试官不得于老列庄子内出题举经明行修人京东京西河北陝西路各五人淮南江南江东江西福建河东两浙成都府路各四人荆湖南广东西梓州路各二人荆河北夔州利州路各一人委州县当职官同保状任申监司监司再加考察依上项人数闻奏仍于发解前牒报本州岛充本州岛解额赴省无其人则阙上件逐次朝旨并已施行外今欲依项下一考试进士分为四场第一场试本经义二道论语或孟子义一道第二场试律赋一首律诗一首第三场论一首第四场问子史时务策三道以四场通定去留高下一新科明法依旧试断案三道刑统义五道添论语义二道孝经义一道分为五场仍俟元佑五年秋试施行其诸路举到经明行修之人如省试不合格即未得黜落别作一项奏取指挥从之三年二月监察御史赵挺之言贡举用三经新义取人近十二年今闻外议以为苏轼之文意在矫革若见引用新义决欲黜落请礼部贡院将举人引用新义注疏文理通行考校诏送贡院照会又诏殿试经义诗赋并试策一道从挺之请也【吕公着家传云初公着在仁宗朝尝请进士先策论神宗初又献议以经术取士及知熙宁三年贡举遂密告临轩专用策试未几公着以言青苗等事得罪去至是时廷试执政之以熙宁复策之初进士叶祖洽议讥祖宗自后对策者讯前朝以阿当世因以为策问可废当复诗赋论三题公着曰天子临轩发策延四方贡士询以治道岂非近古良法耶至于对者之是非邪正则考官去取尔乃复旧试策】三月丁巳御集英殿试进士戊午试特奏及武举进士庚申试诸科及特奏名人癸亥试武举进士射艺于崇政殿推恩补官十有五人诏罢及考校祖宗免亲试法【日録云宗室自熙宁后稍知向学故科举之进士少寛乃分考以为别异始知勇向至是

罢去】己巳赐进士李常宁刘寿章援杨彭史愿史通范致虚费贡等二十四人及第一百九十有六人出身一百八十有八人同出身内宗室子湜为承务郎令畊为承奉郎诸科明经七十有三人各赐本科及第出身同出身有差庚午赐特进奏名进士经明行修王邻臣等同五经三礼学究出身假承务郎京府助教诸州文学助教右班殿直三班奉职借职差使凡五百三十有二人甲戌增新释褐进士钱百万酒三百壶为期集费六月庚辰诏将来一次科场如有未习诗赋举人许依旧法取应解发合格人不得过解额三分之一一解二人者均取即有零分及解额一人者并通取文理优长之人十月傅尧俞等准元佑三年九月九日敕中书省臣僚上言将来殿试宜即用祖宗试三题之法并乞赐论语中外之士九月九日三省同奉圣旨令尚书侍郎学士待制两省御史台官国子监长贰疾速详议闻奏臣等伏以天子亲策贡举自汉以来未之有改唐之进士虽试诗赋然惟有司奏行而已国朝开宝六年太祖始召进士亲试于廷当时公卿不知建明易以策问而唯诗赋之用因沿着令莫之能改神宗皇帝以为非天子临轩所以延见贡士询求治道之体熙宁三年始改策迄于元丰五年赐策问臣等以谓学校教诸生州郡发解礼部考贡今已悉用诗赋足以审其辞所有御前进士宜一依先帝故事试策合于体于古为允十一月中书舍人彭汝砺言臣准礼部牒奉旨令两省两制同共看详修立到考校诗赋并格式闻奏臣伏念先皇帝受天明命悼道之郁滞奋于独断初用经术造士以革数百余年之弊士知本且向方而议者独病辞章之不工欲踵隋唐之弊法狎玩经说蠹道真学者疑之不知取士臣考于心验于古叅于今反复曲折终未见其可臣愚以为今学校选举宜一用元丰条约令经明行修贤良方正之科而稍加损益焉盖亦庶几矣如诗赋决当寝罢臣涉道浅陋不欲以偏辞独见拂众人之所同是否朝廷已行之法必未能改为更乞下学士大夫详议可否以求其中庶几是非好恶有所归一闰十二月御史中丞李常侍御史盛陶殿中侍御史翟暨监察御史赵挺之王彭年言臣等近者累次论奏乞以经义别为一科今与诗赋科并行均取者盖以见行科场诏条将来一次科场如有未习诗赋举人许依旧法取应解发合格人不得过解额三分之一以此观之则是朝廷更无用经术设科取人之理止以旧人未习诗赋且于将来一次科场量以分数收取而欲阴消之故也臣等所以区区者非特为旧习经义举人顿然失业为言且以上之好恶不可不谨以义理论之则以经术劝士为先声律为后以教化言之则通经术者为利博事声律者为害大窃今闻太学生与四方之士观望朝廷意旨皆不复治经旨凡于义理之书一皆斥而不谈博士所讲与其父兄之训不复更及高逯羣居切磨惟以论声韵调平侧事属对较比拟以轻巧靡丽为务此臣等所以虑道术日衰以就废絶将复如唐末五代时学士智识浅陋此有志之士固多太息而流涕也臣等今采之舆议欲以经义诗赋各设为科一经义进士科欲试四场经义六道每经二道欲以易书诗春秋礼记周礼内第一场各出题一道第二场各出题一道又许占对三经以古今注疏及已见所长文理通赡者为合格不得如旧日止记诵一家之义第二场试经义五道每经一

道共五道第三场试论一首第四场试策三道并问子史时务一诗赋进士科试四场第一场试诗赋各一首第二场试经义四道出题同第一场人许占对一经试本经三道论语孟子一道第三场试论一首第四场试策三道并问子史时务右伏望圣慈深惟国家教化之大陶冶人物之重四海执经之士十八万人仰候令之所向诏以臣等愚言付之有司如或不谬特降指挥不胜幸甚明年四月八日诏应进士不兼诗赋人许依旧法取应增治一经增减试一场常等此奏乞存留经义一科并行均取岂朝廷果尝欲废经义科乎四年夏四月礼部言经义诗赋进士听习一经第一场试本经义二道论语或孟子义一道第二场赋及律诗一首第三场论一首第四场子史时务策二道经义进士并习两经以诗礼记周礼左氏春秋为大经周易公羊谷梁仪礼为中经愿习二大经者听即不得偏占两中经其治左氏春秋者不得以公羊谷梁为中经第一场试本经义三道论语义一道第二场试本经义三道孟子义一道余如向令并以四场通定高下去留不以人数多寡各取五分即令分额及元额解一人者听取辞理优长之人从之【初八日并十九日新纪戊午立试进士四场法】二年十一月十二日已立四场法已未诏元佑二年前诸科举人改应新科明年法听取应外自今更不许致其获冒应人仍增旧赏从礼部刑部请也十二月礼部言诸路申请贡举敕经义兼试诗赋进士及经义进士解额各取立分切虑两科者不齐拘定五分则似未尽乞行拘取看详进士两科试法不一举人互有轻重难易之论兼试人数不定则解额难以均当终非通法不可久行诏来年科场以试毕举人分数均取后一次科场其不兼试诗赋人解额并依元佑三年六月五日所降朝旨如未习诗赋人许依旧法取应合格人不得过额十分之一已后并依元佑二年十二月十一日敕命考试进士分为四场试本经义二道论语或孟子义一道第二场试律赋一首律诗一首第三场试论一首第四场问子史时务策三道以四场通定去留高下内仍减时务策一道五年十一月右正言刘唐老言请治经举人以大义定去留词赋而兼经义者以诗赋定去留并以策论定高下仍依旧分经考从之殿中侍御史上官均言自祖宗以来固欲兼用诗赋未闻专以诗赋去留也而言者以为治平以前词赋取士则去留主以词赋熙宁以后经术取士则去留主以经术又以为元不分轻重考校故当时定四场取之制不亦过欤言者以为主司已自有四场通定之文所主不一各随习尚互为升黜臣以为学者所习各有所长四场程文各有优劣惟所主不一取其优长故无遗才虽各随习尚互为升黜又何害耶今就专以词赋去取若赋不合格则经义策论虽精深闳贍不可复取如此则博学能文之士所失多矣伏望依元佑二年条制以四场通定去留高下庶几无失人之弊六年春正月己巳翰林学士知制诰兼侍讲范百禄权知贡举诏五路进士及诸科明法人就试终场零分不满十人许解一人仍取文理优长以尚书省言通利军等处将终场十人以下零数添解一人不应元佑贡举故有是诏己巳集英殿试礼部奏名进士庚午策试正奏名进士及武举壬申试明经诸科律科并诸科特奏名人壬午御集英殿赐进士诸科冯涓以下及第出身同出身假承务郎文学等



【冯涓朱绂张庭坚吴时蒲于之孙曾杨绾苏廸孙廸孙渐杜湛施访侯刚李税刘千之】总六百有二人涓闾中人也癸未赐特奏名进士诸科刘泌以下同出身假承务郎京府助教文学州助教三百二十二人武举进士贾君文等三十三人乙酉延和殿太皇太后宣谕曰今岁御试考校定后两日方唱名于内中大禁非便其令自今后具考试次第旋定唱名日壬寅给事中范祖禹言左谏议大夫郑雍奏贡举条程文经义每道不得过五百字策不过二分虽合格并降一等今辞旨优长者往往过数用旧制自发解至御试文字并不以过数为限广收闳博之儒以副诏科之意令礼部详定闻奏窃谓对策不当立限众所共知理无可疑不必更令礼部详定乞并用旧制诏今后对策过二分更不降等惟经依前降指挥祖禹又封还以为不可其后卒亦不能行也七年夏四月甲寅左正言姚勔言先帝表章圣学一用经行取士欲以大道于变斯文然议者以为师用一家之说习以成弊不能贯通是以前日明诏复用诗赋此固陛下开广育材之路求贤取士之深意也然臣切见举士自复诗赋以来于今五六年颇未能工者就询其由来良亦有说盖今贡举之法习诗赋者仍试经义既学者期于必得则务咨兼通至有司责其俱优则必无尽善若用意散漫则俱不精倘能徧及必有一短臣欲望朝廷并以诗赋经义各为一科随所试人数多少均为取士之格如此则永远可行而学者专精一艺易见成就惟陛下裁择又云四月二日敕臣寮上言近覩科场限制字条制不便再具论列乞今后赋论策经义并不限字数今已得旨策过二分更不降等而赋论经义未蒙指挥臣之愚以谓朝廷以言取士而禁其多言未应古义且非圣朝取士之良法往时开封举人路授倡受长赋几千言但为浮辞不求典要当时能文者往往效之得张方平摈斥其文遂正嘉佑初刘知几辈喜为怪僻句得欧阳修革去而其风复雅但系主司之风化耳今朝廷立法不问其文之澆淳而校其字之多寡责其不及犹有劝惩禁其多文殊无义理伏望朝廷更赐详酌诏诗赋论二分并不降等其经义文理优长者准此五月癸巳诏秘阁试制科论题于九经兼正史孟子扬子荀子国语并注内出其正义内毋得出题六月甲子置广文馆解礼部状近准都省批状勘会开封府遇科场岁多有四方举人冒贯畿县户名取应及太学生员依条须在举及一年方预就试其间有未及一年之人亦不免有寄贯取应之弊检会旧制国子监取应举人先于广文馆补试给牒取应今欲复置广文馆生员送礼部看详立法申尚书省礼部检校贡举敕进士解额开封府一百人国子生四十人其诸科依旧条开封府二百四十人本部昨已曾乞将诸科量留四十人解额外其余二百人并开封进士及国子生共为三百四十人发解广文馆生员今再行看详开封府进士解额一百人即乞依旧外将本府诸科二百人并国子生四十人共二百四十人解额并拨属广文馆以补中生员每十人发解一人从之八年二月御史中丞李之纯言比岁朝廷十科取士之令盖已行之累年近臣所荐者多而拔用甚少乞委辅臣详择稍能进任其智勇过人可备将帅科多是武臣推举其类必有可用之人宜加考察三月庚子中书省言进士御试答策多系在外准备之文工拙不甚相远难于考校祖宗旧制御试

进士诗赋论三题施行已远前后得人不少今朝廷见行文字多系声律对偶非学问该洽不能成章若朝廷不复行祖宗三题旧法则学者未知朝廷所向检书已降指挥将来一次科场如有未习诗赋举人许于旧法取应解发合格人不得过解额三分之一以后并兼试诗赋诏来年御试将诗赋举人复试三题经义举人且令试策后复全试三题其杂犯举人未得黜落别作一项闻奏五月癸卯礼部尚书苏轼言伏见元佑贡举敕诸诗赋论题于子史书出如于经书出而不犯见试举人所治之经者听今令相度欲乞诗赋题许于九经孝经论语子史并九经论语注中杂出史不避见试举人所治之经但须于所给印纸题目下备录上下全文并注疏不得漏落则本经与举人所记均一更无可避兼足以示朝廷待士之意本只以工拙为去取不以不全之文掩其所不知以为进退于忠厚之风不为无补诏依奏今来一次科场未得出制度题目

绍圣元年春正月戊子礼部言诸州军就试进士及千人以上差点检试卷官二员每增五百人添一员人数虽多不过六员从之丁酉蔡安特言贡举勅五百人以上差点检官一员千人以上差二员既举试官分定考试又独力点检试卷实恐力有不逮若不犯试卷为合格止坐点检官独试官无责必不加意考校显见条约交互未为均便欲乞除在京外于贡举敕内改点检官为考试官字所贵五百人以上添官考校同心合议彘定去留士无遗滥从之三月丁丑诏今次御试举人依旧试策庚辰监察御史郭知章言复元丰上舍推恩之例以广乐育之盛德诏太学合格上舍生上等推恩免省试每次科场不得过二人仍附春榜人数乙酉上御集英殿进士策复词赋之选而士不加能劝常平之官而农不加富可雇可募之说杂而役法病或东或北之论异而河患滋赐土以柔远也而羌夷之侵未弭弛利以便民也而商贾之路不通至于吏员猥多兵备阙缺饥谨荐至寇盗尚蕃此其故何也夫可则行否则革惟当之为贵人亦何必为子大夫其悉意陈之毋隐中书侍郎李清臣之词也乙未三省言拟到武举人推恩策入优等上三人与右班殿直四人以下与三班奉职减三年磨勘武艺绝伦更减二年磨勘上舍更减二年磨勘不入等与三班差使减年磨勘有差从之丁酉上御集英殿赐进士【毕渐唐寅赵莞堂刘艺王孝迪程畬杨皓唐恪吕颐浩张纲李天任】渐等以下通礼诸科经律及第出身者六百人时初官取考答策者多主元佑杨畏覆考专取主熙宁元丰者故渐为之首四月壬申殿中侍御史许亮采言罢十科贡士法从之三年秋七月乙卯国子司业龚原言将来科场只令依古专治一经从之四年春正月知贡举给事中徐铎起居郎沈铢同知贡举【蔡蹈言给事权官附月末】二月庚辰诏罢春秋【古本云诏罢春秋科先帝以经术进士而春秋不设科以鲁史亡有不可考士不能通故也元佑又设今罢之新录辨云不设春秋科举王安石偏见私意也】闰二月己酉御集英殿礼部奏名进士【叶梦得程经杨鸣忠何昌言谢克家吕天惠】三月甲子御集英殿放奏特名进士及诸科并武举人内谢师古本贯郁林州陈汉奇本贯高州诏以远人各赐绢二十疋李惟岳以高年赐绢一十疋是日未启封者三人程文至第四人展读千百字曾布与蔡卞

俱云文字显不如第三人恐不须读启封乃章惇之子特也至第五人宣谕云对策言先朝法度当损益可降布曰事有适于时变于人情固当损益恐无可降之理使先帝在位至今有可增损亦当随宜损益翰林学士承旨蔡京进曰先帝则当损益陛下方绍述先志不当损益布曰恐无此理上顾卞曰如何卞曰不知如何损益京曰但言事合损益者不可不损益布曰如此乃是卞亦默然上曰更不须降然卒降第七人及启封则李元膺乃察之子也布又曰第二人方天若程文中言元佑大臣当一切诛杀又言子弟当禁锢资产当籍没而不籍没古今政事无此义理此奸人附会之言不足取上曰只是敢言布曰此有所凭恃非敢言也天若乃蔡京门客上曰不知布曰前发榜一日章惇问臣曾谕否布曰不闻惇曰有一举人论元佑人当诛上甚称之既而林希为臣言此天若及于放榜惇亦对蔡卞言惇知此必天若卷子臣曰恐是惇曰何恐之有决知是天若也上乃曰惇何以知布曰非天若不敢尔惇所以知之况京乎林希曰天若在京家安下布曰惇每言人臣不敢欺罔此诚至论陛下深居九重若谷人臣欺罔何所不至如天若欺罔孰大于此上颔之天若兴化军人也

元符元年冬十月壬辰三省考试所试宗室文字合格者八人诏各迁秩内士■〈日东〉仍赐进士出身三年三月己丑知举徐铎上合格进士庚寅诏贡院就放李釜【范致明张邦昌孙宗监孙安国黄潜善毛友童王安中孙博等】以下五百五十人及第出身釜大名人也

建中靖国元年二月都水监丞李夷行乞复诗赋科与经义并行彭汝霖劾夷行非所宜言且云若不惩戒则议欲坏神宗法度者将接踵而起左仆射韩忠彦收其章不行汝霖又言陛下方以继志述事为治专用经术取士而夷行狂瞽妄说佯不明降指挥则天下不知禁夷行遂罚金崇宁元年七月辛亥诏进士勿治春秋

### 徽宗

崇宁二年三月知举安惇上合格进士李阶等丁亥御集英殿策试初赐霍端友蔡佃宇文粹中王赏彭俊民杨时汪藻王次翁王庚刘湜史汝士任稼孟庚任居实汪伯彦张守等以下三百三十八人及第出身端友武进人阶深之子而陈瓘甥也时特奏名安忱对策言使富人之子阶魁南宫多士无以示天下遂夺阶出身而赐忱第惇兄也又黄定等十八人皆上书上临轩召谓之曰卿等攻朕短可也神宗哲宗何负于卿等亦并黜之三年十一月甲戌幸太学及辟雍司业吴綱蒋静各迁一秩官论定学之士郑南程振朱丁叶祖义汪至平林徽芝等十六人学官推恩有差南侯官人也四年九月乙卯御崇政殿赐上舍生俞栗胡邦彦朱胜非杨迈等以下三十五人及第出身■〈鹵上木下，欠代义〉江宁人也冬十月丙辰置诸路提举学事官罗靖杂记曰崇宁三年罢科举三年岁贡法成三舍天下教养人为士二千一百余员为屋九万二千余楹费钱三百四十万余缗米五十五万余石五年三月辛丑知举朱谔上合格进士吴侗等癸卯御集英殿策试遂赐蔡嶷唐绶杨郁胜庾刘亮李南强苏元老胡世将王韶刘观帅内冯熙载王



钩宋辂吴渭杨广李光徐锐杜充赵鼎等以下六百七十六人及第出身侂乌程人疑开封人也十一月己丑大司成薛昂言武士之制未备请仿文士为升贡之法乙巳诏从之大观元年六月癸酉御集英殿赐上舍生李邦彦段拂等以下二十九人及第邦彦河内人也初懷州教授眉山任諒试诸生邦彦每中优第至是果第一諒尝作新学记上重其文有旨取以入上曰文士也遂擢提举夔路学事二年知举余深上合格上舍生戊寅御集英殿赐王侯以下十三人及第侯成都人也三年三月庚戌御集英殿策试赐贾安宅杨浑唐重聂山史直之孙高李沆文彦奇孙痛史祖道任颖宇文黄中史旗李天民史与权以下六百八十五人及第出身安宅乌程人也先是中书侍郎林摠唱进士第姓甄而呼坚名盎而呼快于是中丞石公弼论摠不学无术传笑中外夏四月戊寅罢摠知滁州四年三月先是知举王图南上合格上舍生丙寅御集英殿赐刘日新以下十五人及第日新丽水人也

政和二年二月壬子知举蔡薨上合格进士路允迪等三月己巳御集英殿策试遂赐莫侔程洵武万俟卨李从史易用唐允彰张乘宋昌史与权王纯仁石有中余尧佐师与史机孙延宋朝英杨师锡王资孙坦程林吕天觉王升许允等以下七百一十人及第出身允迪应天人侔余杭人也初御史李章言作诗害经术自陶潜至李杜皆遭讥诋诏送勅更立法宰臣何执中遂禁人习诗赋至是侔榜不赐御诗而赐箴未几知枢密院吴居厚侍御筵进诗改为口号后圣作屡出土大夫亦不复守禁矣二年二月壬子知举俞■〈鹵上木下，欠代义〉上合格上舍生癸酉上御集英殿赐陈公辅胡松年胡兴义等以下十九人及第公辅天台人也四月二日庚戌知举张克公上合格上舍生丁巳御崇政殿赐张纲蔡居中汪万顷以下十七人及第纲金坛人也初克公与同知举霍端友宇文粹中皆太师蔡京所不喜者时中丞蒋猷劾贡院必有违法邀名之事下开封尹王韶体量得知举联名书晓示一事以为邀名而门下侍郎余深言晓示书名以结两学之心此风不可长克公因以札自辨上言祖宗朝有三元今张纲有四元克公等又奏纲凡五魁多士及是唱名侍立上以为得人知举官有赏于是深语塞而猷亦色变焉五年二月知举王黼上合格贡士傅崧卿等三月己卯御集英殿策试遂赐何■〈鹵上木下，欠代义〉马守傅中行秦桧宇文袁纯郭封吕大受贺允中史渠田孝孙等以下六百七十人及第出身崧卿山阴人■〈鹵上木下，欠代义〉仙井人也六年三月壬寅知举慕容达上合格上舍生癸丑御崇政殿赐臧瑀以下十一人及第瑀鄱阳人也七年三月甲辰知举蒋猷上合格上舍生庚戌御集英殿赐景彻以下十二人及第彻永康人也八年二月己卯知举陆德先上合格进士何大圭等三月戊戌御集英殿策试有司考加王楷在第一上不欲令魁多士遂赐王昂周天衢周望孙之才杨裕师成石粹中汤朋举任銳师庚程敦临史似史充张俊等以下七百八十人出身大圭晋陵人昂开封人也

宣和元年三月己未知举陆德先上合格上舍生程文高下失当乃别求升降辛未御崇政殿赐王俊义以下五十四人及第俊义海陵人二年二月知举王孝通上合格上

舍生程文三月壬寅诏贡院所定不伦乙夜亲览次其高下遂御崇政殿赐祖秀实以下三十一人及第秀实蒲城人也二年二月乙酉诏罢三舍并诸路提举学事官【蔡攸史■〈日上析下〉曰宣和三年二月诏罢辟雍而取士以科举之目者梁师成之言也时王取为左相用事而师成从中重权以相表里因取天下贍学钱始言作余本谓若封桩者事定悉归应奉司为伎淫巧实本旨云】癸巳知举赵野上合格进士宋齐愈等三月丁未御集英殿策试遂赐何涣宋齐愈范宗羽杨楚材史藻席益陈康伯何知柔杨环文之奇朱雒杨羽衡杨师心杜軫冯舜臣史度师敏功等以下六百三十人及第出身时有二士对策甚直初考陆德先辈欲重致其罪而详定官李邦彦见而奇之奏乞圣裁遂置甲乙科乃刘宁止范宗尹齐愈临邛人涣永康人宗尹邓城人也四年二月癸巳初贡院点检除朝廷选外余聴知举奉辟既久遂成私举已诏罢奏辟至是言者谓春秋铨试今尚奏辟亦合依贡院法丙辰诏从之五年三月词学兼茂科选人秦桧循一资桧江宁人六年闰二月知举宇文粹中上合格进士杨椿等庚子御集英殿策试遂赐沈海周执羔王翼杨允恭柯柏熊沈灼文涛常一王椿时衍之郭由中孙宗鉴史光阎安祺朱倬李就孙廷扬程驥史寅郑克苏钦唐迪孙伯达樊汝霖鸿时行赵沂杨时牟国才范游史和骏魏发等八百人及第【以贡士人众特添省额一百人赐御制诗】椿眉山人晦钱塘人文通孙也时内侍梁师成交通宾客招赇贿士人纳钱数千缗即令赴廷试以献颂上书为名而官之至百余人及唱第之日侍于上前奏请升降皆出其口其小史储宏者亦登第而执廝养之役如初七年上舍三人元盥黄应南王师亮等并赐同出身【建炎以后不録并在后集】

太平治迹统类卷二十七

●钦定四库全书

太平治迹统类卷二十八

(宋) 彭百川 撰

用度损益【钱币茶酒用附】

太祖

干德三年春三月自唐天寶以来方镇屯重兵多以赋入自贍名曰留使留州其上供殊鲜五代方镇益强率令部曲主场院厚敛以自利其属三司者补大吏临之输额之外辄入己或私名曰奉贡用冀恩赏太祖即位犹循前制牧守来朝皆有贡奉及赵普为相劝上革去其弊是月申命诸州度支经费外凡金帛以助军费送都下勿得占留【去年已有此诏故云申命】时方镇阙帅稍命文臣权知所在场院间遣京朝官廷臣监临又置转运使通判条禁文簿渐为精密由是利归公上而外权削矣国初赋悉入左藏库及取荆湖下西蜀储积充羨上顾左右曰军旅之事当预为之备不可临事厚敛于民乃于讲武殿后别为内库以贮金帛号曰封桩库凡岁终用度赢余之数皆入焉

太宗

太平兴国二年春正月命礼部员外郎贾黄中左补阙程能左赞善大夫冯瓚分掌左藏三库先是货泉与金帛通掌岁久储蓄盈羨如命分之上初即位幸左藏库视其储积语宰相曰此金帛如山用何能尽先帝每焦心劳虑以经费为念何可过用于是分左藏北库为内藏库并以讲武殿后封桩库属焉改封桩库为景福库初太祖别置封桩库常密谓近臣曰石晋苟利于己割幽蓟以赂契丹使一方之人独限外境朕甚悯之欲俟斯库所蓄满三五十万即遣使于契丹约苟能归我土地民庶即当尽此金帛充其赎直如曰不可朕将散滞财募勇士俾图攻取尔会晏驾不果四年二月诏曰出纳之吝谓之有司倘规致于羨余必深务于掊克苟非倍纳民租私减军食亦何以致之宜追复其事勿复颁行除官所定耗外严加止絶八年十二月直史馆田锡上疏言筦榷货财网利太密酒曲之利但要增盈商税之利但求出剩然国家军兵数广支用处多课利不得不如此征收筦榷不得不如此较穷尽取财之利莫甚于兹开宝元年十一月诏诸州通判粮官至任并须躬自检阅账籍官物不得但凭主史管认文状主库吏每二年一易从淮南转运使苏晓之请也三年冬十月上览桂阳监岁入白金数谓宰相曰山泽之利虽多颇闻采纳不易十一月乙巳诏减旧额三分之一以宽民力端拱元年十二月直史馆罗处约上疏曰臣累日以来趋朝之暇或于卿士之内预闻时政之言皆曰圣上以三司之中邦计所属簿书既广纲条实烦将革未善之规冀计酌中之道切闻省中上言欲置十二员判官兼领其职贵各司其局允协厥中臣伏以三司之制非古也盖唐朝中叶之后兵寇相仍河朔不王军旅未弭以赋调筦榷之所出故自尚书省分三司以董之然国用所须朝廷急务使僚吏之属倚注尤深或重其任以处之优其禄以委之龟勉从事者姑务其因循尽瘁事国者或至于睚眦因循则无补于国睚眦则不叶于时或浅近之人用指瑕为心计深识之士以多可为身谋蠹蔽相沿为日久矣今若十二员判官之说亦从权救弊之一端也然而圣朝之政臻乎治平当效稽古之规以为垂世之法以臣管窥莫若复尚书省故事其尚书丞郎正郎员外郎主事令史之属请依六典旧仪以今三司钱物粟帛筦榷度支之事均在二十四司如此则各有司存可以责其集事今则仓部金部安能知储廩帑藏之盈虚司田司川孰能知屯役河渠之远近有名无实积习生弊况此复都省之事下臣犹能念知其可复况陛下聪明信智乎今三司勾院即尚书省此部元为勾覆之司知内外经费陛下若欲复之则制度尽在迨及九等三监多为冗长之司虽有其官不复其职伏望陛下当治平之日建垂久之规不烦更差使臣别置公署如此则名正而言顺言顺而事成省其冗员则息其经费二年九月自河北用兵切于馈饷始令商人输刍粮塞下酌地之远近而优为其直执交券至京师偿以缗钱或移文江淮给茶盐谓之折中有言商人所输多弊滥者因罢之岁损国用殆百万计冬十月癸酉复令折中仓听商人输粟京师而请茶盐于江浙

淳化二年秋七月己亥上谓三司使李惟清等曰夫货财所以济用度或取之不以其道违朕惠养庶民之意岂能召和气乎当共务均节无致厚敛【见圣政门】三年十



二月分左藏库为左右藏各二库右藏受之左藏给之俟右藏既盈即复以给曰钱曰金银曰疋帛凡六库更为给受明年仍废右藏分为四库曰钱曰金银曰丝绵曰生色疋帛杂色疋帛四年春二月朝廷自克平诸国财力雄富然聚兵京师外州无留财天下支用悉出于三司故费浸多上孜孜庶务或亲裁处必以爱民惜费为本

真宗

至道元年召三司孔目官李溥等条上三司利害七十一事中书参考其四十四事可令遂着于籍其十九事令陈恕等议定而后行之癸亥上语及三司因谓侍臣曰朕岂不知以崇高自任耶但为救世养民所以钱谷细务亦自用心区分朕若不用心则事如何整顿也

至道三年是岁收谷二千一百七十一万七十余硕钱四百六十五万余贯

咸平元年十一月上初命三司具中外钱谷大数以闻盐铁使陈恕久而不进上命辅臣诘之恕曰天子富于春秋若知府库充羨恐生侈心故不敢进也上闻而善之【见真宗圣政门】四年二月甲子三司都催欠司引对逋负官物人上亲辨问凡七日释二千六百余人蠲所负官物二百六十余万已经督纳而非礼者以内库钱还之身歿者给其家五年二月癸酉诏比司帑库者多收羨余以为课积盖出纳之际有所重轻此可责而不可奖也宜令有司严加戒飭无使复然九月庚戌盐铁使王嗣宗曰常蒙陛下宣諭朕不合管钱谷细务然所忧者为天下生民耳方今国家经费甚烦赋入渐少虽陛下勤俭之德冠于先古其如冗食尚多耗蠹犹广更宜庶事减节不然则用度不足复重扰于民耳上曰朕所忧者正此耳六年六月先是三司各置使局不相总统彼此自求允济以促办为务至于出纳移用均会有无则专吝封执动相违失或交摭利病以邀功希进哗者且闻于上颇烦亲决文符互出莫知适从丁亥始并盐铁度支之部为一使复置盐铁户部度支副使非奏事即有所更张则止署按检余皆本部副使判官主之三司副使自是始预内朝【据林特传附见】以吏部侍郎陈恕为尚书左丞知开封府恕在三司前后踰十数年究其利病条例多所改创其徙他官也常荐寇準可用及準至三司即检其前后新改创事类为方册其晓諭榜帖即以新板别书賫詣恕第请署恕一一为署之不复辞準拜谢去故三司多循恕旧实自此始也景德二年五月己巳时承平日久掌财赋者法禁愈密悉笼取遗利凡较课以租额前界处年增之榷务连岁有羨余三司即取多收为额上不候朝旨或致掎克癸酉诏增额或奏裁四年八月己酉三司盐铁副使林特刘承珪李溥等以议茶法岁课增溢迁官先是有司上岁课元年用旧法得五百六十九万贯二千用新法得四百一十万贯二年得二百八十五万贯特等言所增益官本少而有利乃实也所亏虚钱耳于是特等皆迁秩仍下诏三司行新法毋得輒有改更冬十月自干德开寶以来用兵及水旱賑给庆赐赏賚有司计度支所阙者必稽其数以贷于内藏俟课赋有余即偿之淳化后天下岁贷有至三百万者屡岁不能偿则除其籍于是上命陈彭年撰内藏库记述其事出以示王旦等曰此库止为计司备经费耳计司有阙

必取于民苟非节用何以获济

大中祥符元年李士衡以本路钱助祀事【见天书门】三年春正月己未河北转运使李士衡言本路诸军岁给帛七十万当春时民多匱乏常假贷于豪右方纳税租又偿逋欠以故工机之利愈薄请官预给帛钱俾及期辄送民既获利官亦足用诏從之仍令优与其直其后遂推其法于天下七月甲寅上阅元和国计簿三司使丁谓进曰今府库充物仓库盈衍上曰民俗康阜诚赖天地祖宗降祥而国储有备亦自计司宣力也四年九月丙子三司盐铁副使林特上祀汾阴庆赐例册上因谓宰相曰外道所给比往年南郊乃多十余万盖募兵太广尔其间老疾不任事者当令简阅之王旦曰言事者称民间小歉及游手者皆宜募置军籍然一例军门何由复业不若尽归田农有利自致滋殖也丁巳上以江南淮南接壤而盐酒之价不等令三司与江淮制置发运使李溥规定以闻有司执言虑失岁课上曰苟便于民何顾岁入也五年春正月乙酉并州上刍粟之数可给四五年上曰河东仍岁丰穰储峙尤广自今诸路稔岁宜以时积谷为凶年之备六年冬十月丁卯三司借内藏库钱五十万以备祭祀赏给七年春二月戊辰三司假内藏库钱五十万贯三月庚申三司借内藏库绫十五万疋八年五月辛卯河北转运使李士衡等言管内诸军准备支用外有钱四十万贯绢五千疋丝三千两布二十万疋请悉以上供优诏褒之其钱帛令本路贮积更勿辇致九年夏四月丁亥陝西转运副使张象中言安邑解县两池见贮盐三千二百七十六斤总计之三亿八千八百八十二万八千九百二十八斤计直二千一百七十六万一千八百缗切虑尚有遗利望行条约上曰厚地阜财此亦至矣若过求增羨必有时而阙不许也丁未李溥言饶池江枕四州钱盐每岁共铸钱一百二十万贯用铜四百五十三万斤四盐及产铜州军见管铜共百五十二万一千二百余斤又信州铅山等处铜穴自咸平初兴发商旅竞集官场岁买五六十万斤采取既多其数止及二三百斤望酌中定额淮南江浙荆湖制置发运使李溥以岁满再任溥自言江淮岁入查视旧额增五百七十余万斤己未河北转运使李士衡献助南郊绢布六十万疋钱二十万贯每有大礼士衡必以所部供军物为贡计司检勘其数实多矣故是奏件析之有诏嘉獎因谓辅臣曰士衡应猝有材然事忽畧故人往往以虚诞目之然朝廷所须随大小即办亦其所长也乙酉权三司马元方言来春大礼于内藏库假赏赐物准奉祀例内有杂色疋帛内藏库言咸平景德以来南郊悉不支拨虑他时为例王旦月初降御札令内藏给诸军赏赐时元方言职士岂无经度其赏赐止依旧借内帑金万两银三十万两钱七十万贯细绢一百万疋余则三司规画上曰元方在三司谤议甚多何也旦等曰元方尽心公家然性褊急而寡思虑同僚异议多以丑言诋之此所以贾怨也九月李士衡等言河北南郊赏军细绢绵承前并自经运送今本部所积颇多望许充给赏诏天雄军相衡贝博等州物帛依旧输内藏库自余从之十一月甲辰三司言诸州商贾飞钱欲罢来年官布缁绢偿乏诏发内藏钱二十万缗以给其费

天禧元年三月庚戌陝西转运使司段惟几言所部岁给诸军衣绢二百万皆自川

陝鞏輸而至今請以羨數七十萬上供詔令所在別庫貯之九月上出三司使馬元方所上歲供入財用數以示李迪時歲仍旱蝗上憂不給問曰何以濟費迪曰祖宗初置內藏欲辦兵復西北故土及以支凶荒今邊無他費陛下用此以佐國用則賦斂寬民不勞矣出金帛數百萬借三司迪曰天子于財則無內外願詔賜三司以顯示德澤何必曰借二年夏四月三司假內藏錢二十萬貫秋七月丁卯三司借內藏錢五十萬貫上作寬財利論賜士衡又出內藏錢二百萬貫以助經費士衡因請刻御制于本廳從之九月丁卯詔賜錢綿三司假內藏銀十萬兩冬十二月所收租稅比至道末谷增二百七十萬八千餘貫絹減萬餘疋絁紬減九萬二千餘疋布增五十萬六千餘疋錢減五萬五千餘兩茶增一百一十七萬八千餘斤至道中兩京諸州收榷酒歲課銅錢一百二十一萬四千餘貫鐵錢一百五十六萬五千餘貫川賣曲錢四十八萬貫天禧末榷課銅錢七百七十九萬六千餘貫鐵錢增一百三十五萬四千餘貫賣曲錢增二十九萬一千貫鬧市渡津等稅中獲錢四百萬貫天禧末增八百四萬貫

### 仁宗

天聖元年正月丙寅朔詔改元自宋興而吳蜀江南荆湖南粵皆富強相繼附太祖太宗因其蓄藏守不能軒輊為輕重論者或謂邊余賈以見錢恐京府藏不足以繼爭言不便朝廷下書責計置司因令碩等行視諮乃條上利害畧云推行新法功緒已見積年侵蠹之源一朝閉塞商賈利于復故欲有動搖愿力行之無為流言所易于是詔有司榜諭商賈以推行不變之意賜典吏銀絹有差八月李諮等既條上茶法利害朝廷推行令者犹言不便辛未命學士孫奭等再加詳定十一月孫奭等言商人貼射則善茶皆入商人其入官者皆粗惡不好故人莫肯售又奸人倚貼射為名強市強販侵奪官利弊不可不除請罷貼射法官復給本錢市茶而商人入錢以售茶者宜復之減諸科率庚辰詔從奭等議自是河北入中復用三說舊法給東南緡錢者以京師榷貨務償之四年六月罷永興秦坊等州新醋務初陝西運司言醋有微利已置務榷之請推其法于天下王曾曰榷酒蓋出于前代不得已若又榷醋則甚矣故罷之冬出內帑緡錢二十萬下京西路余軍儲六年抑采金之利【四月二日】六月乙酉出內庫緡錢二十萬下京西運司余軍儲鹽課淨羨七年三月甲申上封事者言天下茶鹽課亏請更其法帝以問寇瑊曰議者未知其要爾河北入中兵食皆仰給于商旅若官盡其利則商旅不行而邊民困于饋運矣法豈可數更上然之因謂輔臣曰茶鹽民所食強設法以禁之致犯者眾但緣經費尚廣未能弛之又安可數更其法也秦州鹽課亏緡數十萬事連十一州詔殿中丞薛奎往按之還奏三司發鈔稽緩非諸州因言鹽法所以足軍費非政所宜行若不得已令商人轉貿流通獨關收其征則上下皆利孰與設重禁雍闕之為民病有詔悉除所負八年春有上書言縣官榷鹽得利而為害傳兩池積鹽【陝西解安邑】為阜其上生木合抱數莫可校請通商平估以售寬民力乃詔盛度王隨議更其制隨與權三司使胡則畫通商五利上之丙申詔曰鹽池之利民食所資申命近臣詳立寬制特弛煩禁以惠黎元其罷



三京二十八州榷法听商贾入钱若金银京师榷货物交盐两池或云上书王景也景尝言池盐之利建通商之策大臣言其不便太后欲行之或以为县必多所耗太后曰弃数十万亦可耗之何害大臣不敢复言故命盛度等与三司详利害卒行景策有盐池之民皆感圣恩自是商贾流行岁课入官耗矣九年夏四月辛巳三司请在京榷货务入茶盐钱岁以百八十万三千缙建州茶市以三十万斤真州转般茶岁以二百五十纲为定额建州茶五百斤余从之

明道元年十二月议解盐法二年八月三司自言籍田后继有赏资用度不足请假于内藏库庚申出缙钱百万赐之谓宰相曰国家钱本无内外盖以助经费耳士系对曰不然有司未免侵渔百姓也十一月甲辰以京师饥出库绢二十万下三司代本路上供之数王随陈商人易盐五利

景佑元年以王随盛度定解池盐法以增剩各偿一子官五月程琳为三司使尤谨出入禁中有所取覆奏罢之内侍表言其颞琳闻之自直于帝曰三司财赋皆朝廷有也臣为陛下惜尔于臣何有帝然之壬申出内藏钱一百万赐三司秋天下常平仓置已久领于司农寺壬子始诏诸路运使与州长吏举所部官専主常平钱粟既而淮南运使吴遵路言本路下二百五十万而常平钱粟纔四十余万岁饥不足以掇恤愿自经画增为百万他毋得移用许之二年冬上封事者言诸路岁以缙钱输京师致四方钱重而货轻丁卯诏江东市紬绢福建广东广西并市银上供淮南湖北两浙输缙钱如故计三十万三年三月权判户部勾院叶清臣请弛茶课以岁所课均赋郭乡村人户诏三司与评定所相度以闻皆以为不可行及嘉佑四年卒行之是月李谿等谓罢河北入中虚估以实钱偿刍粟茶如天圣之制又罢保任符验之法初孙奭等虽增商人入钱之数而犹以为利导故竞市虚估之券以射厚利而入钱者少县官日以侵削至是谿等请视天圣三年入钱数第损一千有奇入中增直视天圣元年数第加三百诏皆可之【陝西入中愿得茶者钱十万在所给券赴东南受茶十一万一千茶商利之争欲售陝西券故中入钱京师请禁止皆施行】谿复言奭等变法岁损利不可胜计且以天圣九年至景佑二年较之五年之间河北缘边十六州军入中虚费缙钱五百六十八万今一旦复用旧法恐豪商不便依托权势以动朝廷请先期申命于是帝为下诏戒勅而县官滥费自此少矣四年正月壬午命侍御史知杂事姚仲孙同详定茶法请自今商人买茶每一百贯见钱四分金银折纳从之甲午内藏库主者言岁出缙钱六十万以助三司始于天禧三年十二月时诏书切戒三司毋得复有假贷自明道二年距今纔四年所借钱帛凡九百十七万三千有余请以天禧诏书申勅之奏可

寶元元年上封事者言变茶法岁辇京师银绢易刍粟于河北配扰居民内虚府库以困商旅非便丙辰命张观程戡韩琦与三司别议之秋七月详定茶法所张观等请入钱京师以售真州等四务十三场茶直十万者又视景佑三年数损之为钱六万七千入中河北愿售茶者又损一千而诏又第损二千于是入钱京师止为钱六万五千入中河

北为钱六万四千而已

康定元年九月龙图阁直学士起居舍人权三司使郑戩同知枢密院事戩在三司纔半载复转运使考课格分别殿最又勾较三司出入得羨钱四百万缗庚子出内帑钱绢一百万下三司助经费十二月出内库绢一百万下三司助边丙戌诏司农等以常平钱百万缗助三司给经费自景佑末不许移用常平数年间有余积矣而兵食不足故降是诏馆阁校勘欧阳修上书言便宜三事其三曰榷商贾兴利广则上难専必与下民共之然后流通而不滞然为今议者方欲夺商之利归与公上而専之故夺商之谋益深则为国之利益损则一岁之间但云变法之未当夫欲十分之利皆归于公至亏少十不得三不若与商共之常得其五也夫大商之能蓄其货者岂其锱铢躬自鬻于市哉必有贩夫小贾就而分之贩夫小贾无利则不为故大商不妬小贾之利者恃其货博虽取利少货行流速则积少而为多也今为大国者有无穷不竭之货反妬大商之分其利宁使无用而积为朽壤何哉故大商之善为术者不惜其利而诱贩夫国之善为术者不惜其利而诱大商此与商贾共利取少致多之术也戊申通判河中皮仲容知商州兼提点采铜铸钱事仲容常建议铸大钱一当十既下两制及三司议其事谓可权行以助边实于是叶清臣从仲容议铸当十钱学士承旨丁度奏汉五铢钱唐开元及国朝钱法轻重大小最为折中此钱恐难革其私铸三司使叶清臣言新茶法为适中请择明习财利之臣别行课校上以号令数更民听眩惑乃诏即三司裁定务优贩者然卒无所变也初明道二年复用天禧旧制听商人入钱粟京师及淮浙江南荆湖州军易盐及景佑二年三司言诸路博易无利乃罢之而入京师无故是岁又诏商人入粟与陝西并愿受东南盐者加数予之会河北谷贱三司因请内地诸州行三说法募人入中且以东南盐代京师实钱诏余至二十万石止

庆历元年秋乙卯以榷盐铁判官萧承基户部勾院王琪并提计度江南东西荆湖南北路盐酒公事琪言天禧以荆湖盐估高诏斤减三钱或二钱自后入内浸损请复旧许之令诏江饶池三州铸铁钱三百万缗以备陝西诸费丙辰以京城谷贵发廩粟一百万斛减价出粟以济贫民二年六月甲戌出内库银一百万两緡绢各一万疋下三司以给边费三年己未翰林学士兼龙图阁学士兵部员外郎王尧臣户部郎中权三司使尧臣始受命言于上曰今国与民皆弊矣陛下任臣如何因请自择僚吏上纳其言尧臣果以治办闻是岁尧臣取陝西河东三路未用兵前及用兵后岁出入财帛之数会计以闻寶元元年未用兵三路出入钱帛粮草陝西入一千九百七十八万出一千一百五十一万河北入二千一十四万出一千八百二十三万河东入一千三十八万出八百五十九万用兵后陝西入三千三百九十万出三千三百六十三万河北入三千七百四十五万出二千五百五十二万河东入一千一百七十六万出二千三百三万又计京畿出入金帛寶元元年入一千九百五十万出二千一百八十五万是岁郊祠故出入之数视常岁为多庆历二年入二千九百二十七万出三千六百一十七万有奇数皆不与焉以此推

之军兴之费广矣庚申盐铁判官吕绍宁为淮南转运使至淮南亟上羨钱十万谏官欧阳修请却所上钱并治绍宁以戒奸吏刻剥五月淮江岁漕不给京师之军储大臣以为忧枢密副使范仲淹言国子博士许玄可独倚任辛未擢充江西两浙荆湖制置判官元曰以六路七十二州之粟足京师者吾不信也至则濒江州县留三月粮余悉发之远近以次相补引千余艘转漕而西未几京师勅三司官吏曰经国以财为本而三司纪纲不振久矣今边隅未靖用度甚广军资所急民力重困其务叶心营职无或因循以踵前弊六月甲辰诏曰议者多言天下茶盐■〈樊，石代大〉铁铜坑冶之有遗利朕惧开掙克之政常抑而不宣然尚虑有过取而伤民者转运司其谕所部官吏条上利害以闻初议欲弛茶盐之禁及减商税既而范仲淹以为茶盐商税之入但分减商贾之利尔于商贾未甚有害也今国用未省不取之于山泽必取之商贾今为计莫若先省国用国用有余当先宽赋役后及商贾弛禁非所当先也其议遂寝八月己亥出内库紬绢二百万下三司助经费用韩琦之言也六年春正月戊子知制诰王尧臣罢三司使为羣牧使尧臣主计凡三年前使姚仲孙借内藏钱数百万久不能偿尧臣悉按籍偿之而军国之费犹沛然有余盖未尝加赋于民也益梓夔三路转运使皆乞增盐并课岁可为钱十余万尧臣因不敢从上问其说对曰庸蜀僻远恩泽鲜及而贡入常倍民力由此困朝廷既未有恤之而又牟利焉是重困也虽有小利必有大损矣上善其对然权幸塞路多因裁抑京师数为飞语上一切不问而尧臣为之自若已而言于上曰臣之术止于是矣且臣母老愿解三司既罢顾慰劳之尧臣顿首曰非臣之能惟陛下信臣尔五月减邛州盐并岁额缗钱一百万论者谓岁损县官钱二万余缗秋七月三司使王拱辰言太祖时兵十三万太宗时十八万章圣时十八万今又倍之兵精在众冗散坐食非计也三司虽总财用大计而事实在外请诸道帅臣并任其责乙未诏大名府夏竦知并州郑戩知永兴军程琳并兼本路计置粮草事从拱辰之言也右谏议大夫权御史中丞张方平为翰林学士权三司使言自开宝以来河北盐听人贸易官收其算岁为额钱十五万缗上书者常请禁榷以收遗利余靖时为谏官丞言自用兵以来河北之民检点义勇壮士及诸色科率数年之间未得休息臣常痛燕蓟之地陷于边人陷百年而民忘南顾之心以戎地之法大率简易盐曲俱贱科役不烦故也昔者太祖皇帝时推恩意以惠河朔故许通盐商止令收税今若一旦榷绝价必腾踊民苟怀怨悔将何及其议遂寝【方平言再榷政事见圣政门】七年三司使张方平言勘会陝西用兵以来内外所增置禁军八百六十余指挥约四十有余万人通人员长行用中等例每人约料钱五百月粮两石五斗春令衣紬绢六疋绵十三两随衣钱三千计每年共支料钱二百四十万缗粮一千二百万石准例共折米计七百二十万石紬绢二百四十万疋绵四百八十万两随衣钱二百二十万缗每次南郊赏给六十万缗内马军一百二十余指挥若马数全足计六万有余疋每支草一千五百一十二万束料一百五十一万二千石其系三路保捷振武宣毅武卫清边蕃落等指挥并本道土兵连营仰给约二十余万人此屯驻戍兵当四十万又自庆历二年以



后增添给送西北银绢内外文武冗官日更增广以此三司经用弗贍若据国家天下之广岁入之数自古无此之多也然有司调度交见匱乏直以支费数广不量入以为出所致尔请举一事而言则他可以类知也景佑中天下预买紬绢一百九十万疋去年至买三百万疋诸路转运司率多诉者有司末如之何议者徒知茶盐诸课利之法弊而不知弊之所由臣详求其故法实不弊势使然尔置兵有策则边费可省则兼并之民不能观时缓急以侵利权而有司制其轻重矣太祖皇帝所蓄兵不及十五万太宗蓄兵亦不过四十万先皇咸平中备边贼御北寇搜募战士至五十万人及契丹请和祥符以后稍清弛汰马牧地给耕民边将占兵自固者辄罢之至于寶元几四十年可谓久安矣向因夏戎阻命始藉民兵俄命剩之以补军籍遂于陕西河北京东京西增置保捷武卫宣毅等军既而又置宣毅于江淮荆湖福建等路凡内外增置禁军约四十二万余人通三朝旧兵义勇州郡厢军诸小分剩员等不列于数连营之士日增南亩之民日减迩来七年之间民力大困生民之膏泽竭尽国家之府库空虚而此冗兵狃于姑息寢骄以炽渐成厉阶然且上下恬然不图营救惟恐招置之不多也盖财计盈虚时事安危系诸兵而已矣臣近约度今年在京支计前已进呈只是準拟常呈用度圆融变转仅以有备过此以往若更因之以横费加之以饥饉虽有智者亦难以善其后矣伏望令中书枢密院检会臣前奏审加详议早为之所犹须效在累年缓则益不及矣八年初陕西军兴移用不足知商州皮仲容康定元年十二月始建议来洛南县红峯山号州青水冶青铜置阜民朱阳二监以铸既而陕西都运使张奎【元年正月奎为陕西漕】知永兴军范雍【元年雍知永兴兼漕】请铸大钱与小钱兼行大钱一当小钱十奎等又请因普州积铁铸小钱元年九月及奎徙河东二年十月又铸大铁钱于晋泽二州亦以一当十以助關中军费未几三司奏罢河东铸鐵钱而陕西复来仪州竹夹岭黄铜置博济监铸大钱【实録在四年】朝廷因勅江南铸大铜钱而池江号饶州又铸小钱悉鞏至關中数州钱杂行大约大铜钱三百铸十大铜钱一以故民间盗铸者众钱文大乱物价翔踊公私患之知并州郑戩请河东鐵钱以二当铜钱一行一年又以三当一或以五当一罢官炉日铸但行旧钱朝廷尝遣鱼周询欧阳修分察两路钱利害是月学士张方平宋祁御史中丞杨察与三司使叶清臣先上陕西钱议请以江南议商州大铜钱一当小钱三又言奸人所以不铸小钱者以大铜钱得利厚而官不必禁若铸大钱无利又将铸小鐵钱如陕西亦以三当一且罢官所置炉朝廷皆施行自是奸人稍无利犹未能絶滥其后诏商州罢铸青黄铜钱皇佑二年二月又令陕西大铜钱皆当二嘉佑四年三月盗铸乃止然令数变兵民耗于资用类多咨怨久之始定九月癸亥三司言韶州天兴场铜大发岁采二十五万斤请置监铸诏以为永兴监丁亥屯田员外郎范祥提点陕西路刑狱兼制置解盐祥先请变两路盐法诏祥乘传陕西与都转运使共议时庆厯四年春也已而议不合祥亦遭丧去及是祥复申前议故有是命使自榷行其法公私以为便云十二月丙子诏三司河北沿边州军客人入中粮草改行四说法每以百贯为率在京支钱三十贯香药象牙十

五贯在外支盐十五贯茶四十贯初权发遣鐵判官董沔言切以今之天下亦端拱淳化之天下今之赋税不加耗于前者废三说之法尔请行三说法以救财用困乏之弊下三司议三司言请如沔议沔平阴人也

皇佑元年冬十月壬戌遣户部副使工部员外郎包拯与陕西运司议盐法始范祥议改盐法论者争言其不便朝廷独以为利委祥推行之拯既受命即言臣前在陕西备知盐法自庆历二年范宗杰建禁榷之议公私烦扰嗟怨之声盈于道路前后臣僚乞复旧法通商以救關中雕弊有司执奏议终不行昨因范祥再有请起兼叶清臣曾知永兴见其为患遂乞依祥擘画复用通商旧法此乃于国有利于民无害臣详细范祥所奏事宜颇甚明白且国家富有天下当以恤民为本今虽财用微窘亦持经久之计岂忍争数十万缗不能更延一二千以责成效信取横议复所弊法俾關中生灵何以措其手足及拯至陕西主祥议又言财用所以窘乏盖自西事以来三路并仰给三司是所入有限而出无限安得不窘乏也方今边防无事亦当以国家大计为先若不銳意而遠图之臣恐日削月朘为害不浅万一小有警急何以取济但令三路各自足用则帑廩何患不实拯又言景德庆历天下财赋岁出入数二年春正月壬子命翰林学士承旨王安臣入内都知王守忠右司諫陈旭与三司使较天下每岁出入之数以闻【四年正月以闻】自康定元年陕西募人入中并边刍粟始加数给东南盐而河北稍用三说法亦以东南盐代京师所给缗钱数足止及庆历三年三司又请又康定元年法募人入中乃诏入中陕西河东者持券至京师偿以钱及金帛各半有不願受金帛者与香药茶盐至八年河北行四说法盐惟其所欲而东南盐利特厚商贾不願受金帛者愿得盐至八年河北行四说法盐居其一而并边刍粟皆有虚估腾踊至数倍募至京师反为商贾所抑盐百八斤旧售钱十万至是止六万商人以钱估券取盐不复入钱京师帑藏益乏于是诏三司详定王尧臣等请复入钱京师法视旧数增与盐而并边入中先得券受盐者河东陕西入刍粟直钱十万止给盐直七万河北又损为六万五千且令入钱十万于京师乃听兼给谓之为对贴自是入钱京师稍复故八月知諫院陈旭言阮逸常建言作钱葆饰以翠羽且藉以鹿皮欲与钱兼行且钱币为用天下之大命也其轻重有与物适均乃能下流而不穷昔张汤为武帝巧制皮币取讥后世阮逸譎怪尤甚岂可用之后世开奸诈之心哉上然之十一月壬辰赐淮南江浙荆南制置发运使金部员外郎许元进士出身上谓执政曰发运使总领六路十八州军其财货调用币谷粟岁千百万宜得其人而久任之今许元累上章求解朕思之不若獎勵以尽其才故特有是诏三年二月诏三司河北入中粮草复行见钱法初四说法止于并边诸州而内地诸州有司盖未尝行请即以康定元年诏书从事自是三说四说法并行于河北未几茶法复壞刍粟之人大率虚估居其十之八公私两失其利请复见钱法上可之仍一用景佑三年约策又惧好事者之横议庚子下诏略云自今有依前事为议者并须究知厥理审可施行若其事上而验问无状寘之重罚初用董沔议河北便余沿边行三说法内郡行四说法国子博士监榷货务薛向言祖

宗之法塞丁入粟三司出茶盐香药象牙之物称其直号三说都内郡则运司以常赋充今改用四说是岁常倍出中都钱而茶盐香药象牙之物出多而用有极则贱价而不售官私两失其利寻下其议议者共主沔议向又作编年书述祖宗以来河北三说及指现钱利害书奏不报不三岁榷货物积交引钱七百万贯未有以偿而山场榷务茶江淮盐中都香药等物富商争以财算而三边之余不行朝廷始用王尧臣详定为检阅文字乃黜沔补外郡而复见钱法且委向置场支榷货务积交引钱以救其弊诏擢向大藩十二月先是包拯还自陕西见复见近降勅命陕西盐且依范祥擘划通商放行此诚国家大利而中外臣僚不详本末时有横议所赖朝廷特典主张兼祥见充本路提刑与运司每常公事往来或至违异必恐不能叶心以济深属不便欲望圣慈特许就除祥为本路运副只理提刑资序所贵擘划盐会详新法比较旧法二年给增钱五十一万六千贯有零望允臣所奏庶沿边军储足备三司使田况亦请久任祥使專其事己亥范祥为陕西转运副使仍赐金紫以宠之二年春王尧臣等较庆历皇佑四年总天下财赋出入凡金帛丝纩薪刍之类皆在其数参较耗登皇佑四年入中亿二千六百二十五万一千九百六十四而所出无余为书一卷丙辰上之诏送三司取一岁中数以为定式【二年正月受命】二月兵部郎中傅永为户部副使庆历末永自梓州漕移陕西时關中用折十鐵钱盜铸不可胜纪公私患之永献策请变钱法至境问民所乏貸以种钱粮令麦熟虽償而薄取其息民大悦永亟檄州县凡散三百八十万緡大钱息尽乃以闻已而朝廷变法遂下令以小鐵钱三折大铁钱一民出不意破产失业自经死者甚众而盜铸亦衰止所貸得麦四十万斛商人入余于边而受钱于中都岁五百万緡时江北奏乞钱朝廷未有以给永言诸道仓廩实请以所当受钱畀之上嗟赏自康定用兵陕华以西移输于边民力大困永令输本部而转钱以输边余儲亦无乏王尧臣详定课积上其事乃賜市之岁可謂遣利五十万以为然委茂则任其事范鎮言内藏榷貸务同是国家之物岂有榷貸榷务固欲滯商人算財而令内藏乘賤以买之与民爭利伤体壞法上諾鎮言遽罢之自皇佑二年改用見钱法而京師積錢少不能支入中之費帝出内庫錢帛百萬以賜三司久之入中者寢多京師帑藏益乏商人持券以俟動稱歲旬月則至損其直以售于畜費之家故言利者欲革之朝廷既行即止然自此凡并边虛估之弊复起皇佑四年壬戌三月出緡十萬七月錢三十萬緡十萬五年七月錢十萬緡三十萬緡十萬今年六月絀緡五十萬緡錢三十萬官兵吏支費用時命官裁節无所建明嘉佑元年秋端明殿學士兼龍圖閣學士吏部知益州張方平為三司西鄙用兵西蜀多所調發方平還自益州奏免橫賦四十萬貫正及邛州鑄錢十萬蜀人便之又画漕運十四策方平始主計京師有三年糧馬粟倍至是仅足一歲糧減半宰相富弼讀方平奏上前書漏盡十刻侍衛皆跛倚上太息稱善弼曰此國家大本非常奏也悉如所舉施行退謂方平曰自慶歷以來公論食貨詳矣朝廷每有所益必以公奏議為本凡除主計未嘗不先公也其后未期年而京師有五年之蓄二年十一月置江淮南荆湖制置司勾當公事鹽運一員初三司言商旅于



榷货入见钱策东南盐岁课四百万缗诸路搬运不足而课益亏请选官置司以主之

【欧阳有奏可考】三年春壬辰复以度支员外郎范祥制置解盐从三司使张方平及御史中丞包拯之言也祥自庆历八年十月制置解盐皇佑四年五月坐他罪责去祥始言岁入缗钱可得二百三十万后不能下皇佑三年入缗钱三百二十一万四年二百十五万以四年数视庆历六年增六十八万视七年增二十万旧岁出榷货缗钱庆历二年六百四十七万六年四百八十万至是榷货务钱不复出其后岁入虽赢缩不常至五年犹及百七十八万至和元年百六十九万其后遂以元年入钱为岁课定率量入计出可助边费十之八九并边复听入刍粟以当实钱而虚估之弊增长券直亦从而贱岁损官课无虑百万故方平及拯复用祥祥既受命请重禁入刍粟者其券已在嘉佑以前每券别使输钱一千然后予盐又言商人持券若盐粥京师皆亏失本钱钱请置官京师蓄钱二十万缗以待商人至者券若盐估钱则官为之售券纸六十盐席十千毋得增损所以平其市估使不得为轻重诏以都盐院盐官兼领之自是稍复祥旧云四年春二月始命韩绛陈旭吕景初即三司置局议弛茶禁其十月三司言宜约至和之后一岁之次以为得悉钱均赋茶户民资其买卖所在收算请边官询察利害以闻诏遣王靖等分行六路及还皆言如三司议便已已诏曰古者山泽之利与民共之故民足于下而君裕于上国家无事刑法以清自唐建中始有茶禁上下规例垂三百年如闻比来为患益甚民被诛求之困情所不忍于是江湖之间幅员数千里为陷窳以害吾民也朕心惻然念此久矣间遣使往就之问驩然皆愿弛其禁岁入之课以时上官一二近臣条析其状朕犹若慊然又于岁输裁减其课使得饶阜以相为生划去禁条俾通商利历世之弊一旦以除着为常经弗复更制损上益下以休吾民尚虑喜于立异之人缘而为奸之党妄陈议奏以惑官司必寘明刑无或有贷初所遣官既议弛禁因以三司岁课均赋茶户凡为缗钱六十三万有奇使输县比输茶时其出几倍朝廷难之为损其半岁输缗钱三十三万八千有奇谓之租钱与诸路本钱悉储以待边余自是惟腊茶禁如旧余茶徧行天下矣癸卯诏曰闻陝西民间多滥铸大钱以至市易不通其以见行当三大钱并当小铁钱之二本路官员已支三月俸者即计其数贴支是议者欲变大铁钱当一提点祠部员外郎集贤校理陆洸言民间贵小铜钱大鐵钱他日一当三犹轻之今令与小钱均直则大钱必废请以一当二此则公私所损无几商贾可以通行兼盗铸无赢则必自止诏行之自是盗铸乃止然令数变兵民耗于资用类多咨怨久之始定五年三月己巳诏书既弛茶禁论者犹谓朝廷忘于使人欲省刑法其意良善然茶户困于输钱而商贾利薄贩粥者少州县征税日蹙经费不充知制诰刘敞学士欧阳修颇论其弊以为商贾不行税额不登且乏国用三害也修以为弛禁有一利而害有五时朝廷方排众论而行敞等虽言不听也六年夏权三司使包拯为给事中拯在三司凡诸管库供上物用皆科率外郡积以困民拯特和市民得无扰吏负钱帛在縲继间辄逃去械其妻子皆释之司马光言财利在养其本原【见谋国远畧门】秋丁丑命翰林吴奎王瓘同详定茶法初江湖漕盐既杂恶

又官估高故百姓利食私盐而并海之民以鱼盐为业由是为盗贼者众庆历中广东运使李敷王由等请运广州盐于南雄州以给虔吉江南运司初以为非便其后户部判官周湛等八人复请运广盐入虔州江西亦谓自具本钱取之皇佑五年始诏屯田员外施元长乘驿会江西广东运司议利害至和初元长与运使阎询元绛皆如湛议而发运使许元以为不可三司是元言遂止或又请官置铺运广盐至虔州或请榷虔州官盐价以平其直朝廷尝遣职方员外郎黄炳乘驿会所属盐司议继命点提铸钱沈扶覆视炳欲损所增官估斤为钱四十以十县五等户夏税率百钱令余盐三斤随夏税入偿官置五都仓贮盐募盐铺户入钱二州赴五仓受盐还三州贸易朝廷卒从炳扶等策然岁才增余六十余万斤先是蔡挺知南安常条奏利害至是擢挺江西提刑兼制置使挺增淮南漕盐新纲为十二纲扶新选江西漕船团为十纲以三班使臣命之有取通秦楚都仓盐纲三十五艘至州乃发输官有余则以畀漕州吏卒官复以平半价取之由是减侵盗之弊盐价遂差又损余价岁课视旧额增三百余万斤乃罢扶等所率余盐随夏税入者盗贩者稍畏缩朝廷以挺为能留之

英宗

治平二年国赋内外入一亿一千余万出一亿二千余万诸路积一亿一万而京师无与焉九月庚辰三司使韩绛上治平会计录六卷

神宗

熙宁元年三月上谓文彦博等曰当今理财最为急务养兵备边府库不可不丰大臣宜共留意节用因称太宗朝一老宫人尚在为朕言宗祖用财甚约尚有侍御乞增俸命给十千辄薄所赐太宗曰朕昔为供奉官俸止十千此数尚足贍家耳敢以为少耶遂幽囚至死五月丙寅命司马光滕甫同看裁减国制度仍取庆历二年数比见今支费有不同者闕折以闻光等对言国家所以用不足者在于用度太奢赏罚不节宗室繁多官职冗滥军旅不精此五者非愚臣一朝一夕所能裁减若但欲依庆历二年裁减制度比见今费数此止当其三司供析其与不同立可尽见明日即罢减裁局但下三司供析而已二年正月丁亥上谓辅臣曰近见内藏库藉文具而已财货出入畧无闕防前出龟脑真珠粥于榷货务数年不输钱亦不勾考常闻太宗时内藏财货每千计用一牙籤记之名物不同所用钱色亦异他人莫能晓也常匣而置之御阁以参验帐籍中定数晚年常出钱示真宗曰善保此足矣今守内藏臣皆不晓帐籍闕防之法当更择人领之勾当御药院李舜举代其不职者九月条例司言银铜坑冶之物皆上供而费出诸路故转运司莫肯为课入滋失今既假发运司以钱货听移用六路之财则东西南经费皆当责办请令发运司兼提举九路银铜铅锡坑冶市舶等事从之薛向罗应提举三年六月上批薛向等所总东南诸财利创事之始实藉诸处官吏逯迯应接乃可集办近虽累指挥如向等奏辞官吏并听与应副置均输即许辟官属【二年七月】十月辛丑遣发运司管勾运盐刘忱同陕西转运使相度本路兴置铸钱监利害以闻以发运使薛向等请出上

供钱帛二十万贯回买岑水场铜铅四百余万斤运至陕西增铸百万缗以备边计也其后刘忱等所奏至多与向议协同乃诏行之四年二月戊辰上对辅臣曰向来茶法之弊文彦博曰非茶法弊也盖昔年用兵西北调边食急用茶偿之其数既多茶不售则所在委积故虚钱多而壞法也王安石曰榷茶所获利已多矣吴充曰仁宗朝茶法甚弊时岁犹得九十余万缗亦不为少茶因用兵而壞彦博之言是矣五年四月壬子诏环庆路盐池去年亏钱五十五万缗令转运使及制置解盐司具析以闻上曰盐酒之法既未可弛即须严禁王安石曰陛下虽致治如唐虞时盐酒法亦不须弛若欲推利于民惟须农而已未作不禁更能害农非尧舜之政也九月丙午朔权三司使薛向言延庆秦渭等九州岛旧皆有折博务召商人入刍粟钱帛偿以解盐岁收缗钱一百六十六万今割秦之古渭寨以为通遠军兼新城镇洮军皆未有储积以待缓急从之七年四月上曰古者什一而税足矣今取财百端不可为少安石曰古非特什一之税而已市有泉府之官山林川泽有虞衡之官有歛市总布质布廛布之类甚众關市有征而货有不由關者举其货罚其人古之取财非但什一而已今之税亦非重于先王之时但不均又兼并为患六月上谓辅臣曰天下财用朝廷若少留意则所省不可胜计昨日检并军营今会计减军员十将以下三千余人除二节特支及兼将外一岁可省钱四十五万缗米四十万石绢紬二十万疋布三万端草二百万束若每事如此及诸路转运使得人更令久任使之经画财其可胜用哉九月癸丑提举永兴秦鳳路交子来迪制置永兴秦鳳路交子是时關中钱法弊永兴军路安抚使吴中复请以钱四十买缺恶钱一斤则民间转專行省抚大钱少不足用请以所买恶钱悉改铸大钱而民间所行私大钱一以小铜钱买而更铸之永兴军路转运使皮公弼请尽买恶钱且每行置钱鐵相易秦鳳路转运使熊本言买恶钱及禁旧通行大钱铜钱相易皆非便于是诏逐司度利害以闻冬十月庚辰诏三司置会计司以宰臣韩绛为提举先是绛奏三司总天下财赋其入之数并无总要考校盈虚之法欲选官置司以天下户口人丁税赋及场务坑冶河渡房廊之类租额年课及一路谷出入之数去其重复注籍岁比较增号及具废置名件钱物羨余横费等数使有无相济如此则国计朝廷可以省议论政事足寬民力仍乞令降提而三司使章惇亦言天下财赋帐籍汗漫无以察其耗登之数请选置才士删修为策每年校其增亏以考验诸路当职之官能否得以升黜故有是命八年三月丁酉诏秦鳳路等处转运司度所铸大鐵钱数及充交子本钱外不须广铸委熊本总制营办六月三司使章惇言河东永利两监盐岁课旧额二十万缗自许商人并边中粮草增饶给钞支商人得钞千钱纔售四百县官暗失钱数铺已获利不费又私盐不禁岁课日减纔十万四千余缗若计粮草虚估官纔得钱三万余缗视旧亏十之八今若依解盐利募商人入钱请买或官自鬻仍严禁私贩岁课必大增羨余緣边粮草却用见钱余买诏河东转运使范子奇赵子几相度详具条约以闻鬻祠庙【见圣政门】十年禁羨余【见圣政门】六月上恐民间用大钱则富民藏小钱又恐四方闻行两等钱以为穷窘乃欲罢行折二钱安石罢之上欲复用两宫竟



不用折二钱故折二钱未尝入禁中侍御史周尹言近来钱币不一今欲望将折二钱更不别行故铸亦不须拣选自今后只作一文使用

元丰元年十二月上每愤北境被侵慨然有复幽燕之志即景福殿库聚金帛为兵费是年始更库名制诗以揭之曰五季失图遗患孔炽艺祖造邦思有惩艾爰设内府期以募士曾孙保之敢忘厥志凡三十库后积羨赢又揭以诗曰每虔夕惕心妄意遵洪业顾予不武姿何以成戎捷三年正月经制熙河路边防财用言置司以来实收利入元丰元年四十一万四千六百二十六万贯石二年六十八万四千九十九贯石羣牧司收废监租课等钱百十六万缗有奇十二月知邠州王孝先上屯田当田司熙宁七年至十年费钱十五万五千四百余缗五年诏户部右曹于京东等十二路发常平钱八百万缗输元丰库左藏内藏外又有元丰库杂储诸司羨余钱六年三月吴居厚言自置盐税司近二十年商人负正赋税钱七万六千余乃倍税十五万二千余缗皆周革提举失于拘榷乞辛卯诏自今擘划创立课利岁每收万缗迁一资十二月自熙宁初始变矾法岁课所入元年为钱三万六千四百缗有奇并增者五岁乃取熙宁六年中数足以一十八万三千一百缗有奇为新额至元丰六年增至三十七万七千九百缗而为军矾万民自鬻置场售之岁课一百五十万斤用本钱万八千缗至治平至元丰数无增追云七年十二月天下免役计缗钱一千八百七十二万九千三百场务钱五百五万九千谷石帛疋九十七万六千六百五十七

哲宗

元佑元年三月户部言乞罢榷醋之禁从之二月诏户部黄口兼按察四川路茶法刘摯上言乞大减岁市之额稍增近直之价削纳茶无名之钱以充养园户以革欺幸苏辙言孟蜀窃据始有榷茶法艺祖罢之淳化间王小波李顺因贩茶失业遂为大盗近来李稷引陆师闵共事增额于成都府置都茶场许以金银诸货所博遂以折博为名遣公人牙人搔扰民间无复宁岁今乞朝廷罢放榷法使小民自作交易但取税钱而已四月上官均言财用出于一司则有无多寡得以相通近闻内藏卖逵年缗帛止二三百文每缗须近二千合所卖之直十只一二此有司之罪臣乞欲令户部大府等于内藏诸库得加检察而转资其岁久之货币八月户部请支拨余便司钱二十万贯应付河北余买从之王岩叟对曰青苗困民之法数年后民将自足国用亦足朱光庭亦进曰百姓足君孰与不足岩叟又曰陛下若忧不足恐小人窥伺妄献功利之说十二月诏诸路元丰七年已前坊场免役宽剩钱许留一半余置场和买可变转物货其物货逐旋起发于元丰库送纳三年正月改封桩钱物库为元佑库隶尚书省左右司三月诏改元丰元佑库为元丰南北库增南库官一员闰十二月韩忠彦苏辙韩宗道等言本部近编成元佑会计录大抵一岁天下所收钱谷金帛等物未足以支一岁之出臣等今日欲取朝廷费用钱物详加裁节多不致于伤财少不致于害事六年九月诏自元佑六年每岁于内藏库支缗钱五十万赴元丰库桩管补助沿边军需

绍圣元年正月以元丰库钱十万缗七万应宣仁皇后山陵之费七月蔡京上理财之术言取会诸路元佑财利名额其所费减可与不可各具条奏立为成法十一月户部言诸路上供钱帛多欠不足章惇曰自元佑以来司马光等务散府库姑息小民以致财用匱乏上曰利法弛壞而讲求之

元符元年上以内库银缗二百疋两赴逐路经畧司准边事内库阙银以缗七十万疋贴支寿原路乞降度牒五十付本司为备边之费诏从其请二年秋七月上谓曾布曰陕西钱轻欲变法郑雍欲给钞安泾以为不可曰钱法不可轻变今幸有钞法可以救贵之弊使物价平盐课盐鐵钱重民不食贵盐公私之利不一何为不行而乃欲变钱法乎上然之三年十一月户部言天下坊场三万一千余处总一界一千一百余万每岁以一百万入内帑助邦国用而败折逋欠或破产不能偿乞修立良法从之

徽宗

政和三年六月尚书省言自创新法盐钞方及一年已收息钱□□余万贯若不支散自无地可着盐课之盛至是极矣

宣和二年时盐法已壞王黼命州县设限立额给钞敷给与人户如一户给十钞其后遂至计口而给家至户扰虽婴儿不免

太平治迹统类卷二十八

●钦定四库全书

太平治迹统类卷二十九

（宋）彭百川

撰官制沿革上

太祖

建隆二年闰二月殿前都检点慕容延钊罢为山南西道节度使侍卫亲军都指挥使韩令坤罢为成德节度使自是殿前都检点遂不复除授三年二月甲午诏今自五日内殿起居百官以次转对并须指陈时政得失朝廷急务或刑狱冤滥百姓疾苦若咸采访以闻仍须直书其事不在广有牵引事關急切许非时诣上章奏不得须候次对乙亥诏翰林学士班位宜在诸曹侍郎之下官至丞郎在常侍之上至尚书依本班故事翰林学士侍从亲密不在外朝每五日起居班于宰相之下会宴即坐一品之前合班在尚书之上于是陶谷以礼部尚书为学士承旨而同列李昉等官止列曹郎中谷乃因事建白而降此诏是实表异轍昉等也壬午有司上复位合班仪制升六曹侍郎在给舍上郎中在补阙上员外郎在拾遗上节度在六曹侍郎上中书侍郎下故事北省官为侍从班五品押南省四品八品押南省五品节度使在诸司二品下于是改焉冬十月以枢密副使兵部侍郎赵普为检校太保充枢密使不带正官自普始也又以宣徽北院使李处耘为宣徽南院使处耘前自扬州还老幼遮道泣涕累日不得去十一月癸巳诏中书门下每县复置县尉在主簿之下俸禄与主簿同凡盜賊斗讼先委镇将者诏县令及尉使复领

其事自万户至千户各置弓手有差五代以来节度使补署亲随为镇将与县令抗礼凡公事専达于镇将州县吏失职自是还统于县镇将所主不及乡村但市郭而已从枢密使赵普之言也

干德元年六月诏自今台省六品诸司五品登朝第二任方得补荫五府少尹不在即限下四月己酉始命刑部侍郎贾玘等通判湖南诸州六月庚戌命大理正奚屿知馆陶县御史王佑知魏县杨应梦知永济屯田员外郎于继徽知临清县常参官知县自玘始也二年春上以选人食货者众诏吏部流内铨听四时参选仍命学士承旨陶谷等本司重详定循资格及四时参选条宰相范质王溥魏仁浦等再表求退戊子以质为太子太傅溥为太子太保仁浦为仆射皆罢政事先是见天子必命坐有大政事必商议之常从容赐茶而退自余号令除拜刑赏废置但入熟状画可降出即行之唐及五代皆不改其制犹有坐而论道之遗意质等以先朝旧臣稍存形迹且惮上英武每事辄具札子进呈退批所得圣旨而同列署字以志之常言于上曰如此则尽禀承之方免妄误之失矣上从之由是奏御浸多或至所悞赐茶之礼寻废固弗暇于坐论矣后遂为定式盖自质等始也庚寅以枢密使赵普为门下侍郎平章事集贤院大学士宣徽北院使判三司上党李崇矩为检校太尉充枢密院使上既除普及崇矩乃无宰相署勅上时在资福殿普因入奏其事上曰卿但进勅朕为卿署字可乎普曰此有司事非帝王所行也乃始问翰林学士讲求故事陶谷建议以为自古辅臣未尝虚位惟唐太和中甘露事后数日无宰相时左仆射令狐楚奉行制书今尚书亦南省长官可以署勅窦仪曰谷所陈非承平令典不足援据今皇弟尹开封府同平章事即宰相之任也上从仪言壬寅勅赵普监修国史先是宰相监职皆内降制处分今正用勅非旧制也国朝承唐五代之后命宰相分镇三馆首相为昭文馆大学士窦仪等上新定四时三选条从之上欲为赵普置副而难其名称召翰林学士承旨陶谷问曰下丞相一等者何官对曰唐有参知机务参知政事乙丑以枢密直学士兵部侍郎薛居正吕余庆并本官参知政事不宣制不押班不知印不升政事堂令居正就宣徽使听事上殿廷别设専位于宰相后勅尾署衔降宰相数字月俸杂给皆半之盖上市意未欲令居正等与普齐也史臣李沆等曰按唐故事裴寂为仆射参知政事杜衍为御史大夫参知政事魏征为秘书监参议朝政萧瑀为特进参知政事刘洎为黄门侍郎参知政事刘幽求为中书舍人参知机务然并宰相之任也又高宗常欲用郭侍举参知政事既而谓崔知温曰侍举等历任尚浅未可与卿等同名列遂令于中书门下同承受进止平章事以此言之平章事亚于参知政事矣今谷不能远引汉御史大夫亚相政事为对反以参知政事为丞相下一等谷失之矣议者惜之六月御史台太常礼院奏东宫三事臣一品仆射二品若百官上表未知何人为首诏两制议之戊辰翰林学士窦仪等奏仆射师长百僚东宫三师臣子之官当以仆射为首从之口月庚寅中书门下上重详定翰林学士承旨陶谷所议少尹幕职官参选条件从之自是铨选渐有伦矣甲午令藩镇毋以初官为掌记书务须歴两任有文学者乃许奏辟诏吏部南曹



自今常调赴集选人取歷任多课绩而无阙失其人才可副升擢者具名送中书门下引验以闻当与量才甄獎上虑铨衡止凭资歷英俊或沈于下僚故也四年八月壬寅诏以宪府绳奸天官选吏秋曹决狱俱谓难才理宜优异应御史台吏部铨南曹刑部大理寺自知杂侍御史郎吏少卿以下本司莅事满三岁者迁其秩御史中丞尚书侍郎大理卿别议旌赏其奏补归司勤留官令史府史各减一选冬自平湖南诸州皆置通判既非副貳又非属官故常与长吏忿争常曰我监州也朝廷使我来监汝长吏举动必为所制或者言其太甚宜稍抑损之乙未诏诸州通判毋得怙权徇私各与长吏联署文移方许行下五年春正月庚寅朔御干元殿受朝升节度使班在龙墀内金吾将军上故事节度使不带平章事者皆位在卿监下于是特改焉冬十月癸酉度支判官候涉言三司凡二十四案盐鐵主其六户部主其四其余皆度支主之自荆湖西蜀之平事务益众上欲令三司均主其诏三司权官张统分判度支案事

开寶元年八月辛酉令合格选人到京者即赴集不必限四时及成次甲南曹铨司门下三省处磨勘注拟并点检谢词等共给一月限南曹八日铨司十五日门下省七日着为式冬十一月癸巳诏天下县令佐自今检苗定税部后差夫铃辖征科区分刑狱凡關事务贵在公平如有违踰并宜论诉或令佐不相纠举诉吏民诉得实者赏之有差二年十一月戊辰诏中书舍人李昉兵部员外郎知制诰卢多逊分直学士院自昉及多逊始也三年秋七月诏曰吏员猥多难以求其治俸禄鲜薄未可责以廉与其员冗而重费不若省官而益俸西川管内州县官宜以户口为率差减其员旧俸月增给五千诸州满二万户者依旧设曹官三员户不满二万止置録事参军司法参军各一员司法兼司户不满万止置司法司户各一员司户兼録事参军户不满五千止置司户一员兼司法及録事参军事县千户以上依旧置令尉主簿凡三员户不满千止置令尉各一员县令兼主簿事不满四百止置主簿县尉以主簿兼知县事不满二百止置主簿兼令尉事五年八月丙申命同知广州潘美尹崇珂并兼岭南转运使王明为副使太子中允许九言为判官转运判官自九言始也九年二月庚戌以宣徽南院使义成节度使曹彬为枢密使领忠武节度使枢密领节度使自彬始山南东道节度使潘美为宣徽北院使节度使领宣徽自美始赏江南之功也彬归自江南诣合门进榜子云奉勅差往江南勾当公事回时人嘉其不伐始彬之行上许彬以使相为赏及还语彬曰今方隅尚有未服者汝为使相品位极矣肯复力战耶且徐之更为我取太原因密赐钱五十万彬怏怏而退至家见布钱满室乃叹曰好官亦不过多得钱耳何必使相也上爱惜爵位不妄与人类如此凡以检校官兼中书令侍中同平章事者并谓之使相唐制皆署勅五代以来不预政事朝会亲王则分班余官则缀本官正衙见谢则押班凡定制度除授者勅尾存其衔而不置则注使字八月壬戌以枢密副使楚昭辅右卫大将军判三司王仁瞻分领宣徽南北院使自后宣徽使缺即命枢密副使兼领院事十一月以太子少詹事杨说率更令徐铉并直学士太子中允张洎直舍人院直舍人院自洎始十二月丁巳以枢密直学士左正议

大夫贾琰为三司副使三司置副使自琰始

太宗

太平兴国二年三月太祖晏驾诏翰林学士户部侍郎李昉兼判太常寺昉归语其子宗谔等曰堂吏不知典故岂有为丞郎而判寺乎若言判事自丞以下皆可判也何假别命官乎唐朝丞郎兼判他局者甚多或官高则言判某官事或官次则言知某官事或未即真则言权知某官事惟太常卿尤为重任未闻可总而判之必朝廷以为不才当言权知太常卿事可矣然近者窦仪判大理寺权领判国子监此盖失之久矣宗谔因问凡制勅所出必伺宰相今言堂吏不知典故何也昉曰命官判事宰相必不经心惟堂吏攀近判使押字尔昉又言自太祖临御以来百司吏艰于选补后进者多不习故事由是台省旧规渐成废坠云二年初置文思院四年春正月癸巳以枢密院直学士石熙载签署院事仍赐宅一区签署枢密院自熙载始九月户部郎中侯涉为谏议大夫权御史中丞权中丞自涉始十一月以河北转运使司丞王在田为陆路判官【依实录知古本传云转运使名自知古始必有一误】十二月诏改司寇参军为司理参军以司寇院为司理院令于选部中选历任清白能折狱辨讼者为之又置判官一员委诸州于牙校中择有干局晓法律高贤者为之给以月俸如旧马步判官之例寻又诏诸州察司理参军有不明推鞠者致刑狱淹滞具名以闻蔽匿不举者罪之五年春正月庚寅以礼部侍郎程羽为文明殿大学士立于枢密院副使之下文明殿学士即端明殿学士也国初虽改殿名而学士领职如故于是并改焉文明殿学士自羽始七年春以给事中侯涉右正谏大夫王明同判三司同判三司自涉明始丙寅以兵部员外郎宋琪通判开封府京府通判自琪始夏四月甲子翰林副使杨守一为东上合门使充枢密都承旨加都字自守一始冬十月唐藩镇皆置邸京师以大将领之国朝则署人为进奏官上以事颇迟缓简择得一百五人补进奏官每人掌二州或三州置都进奏院令供奉官张文燦领之八年三月分三司为三部盐鐵王明度支陈从信户部郝正各置使时政奏记御【见太宗圣政门】

雍熙元年五月以将作监丞李元吉等为堂后官赐银绯任京官堂后官始此七月庚子改匭为思谏检校丙申冤匭为申明检北通玄匭为昭贤检仍令谏院依旧差谏官一员主判十一月唐旧制有鱼袋国初其制多缺至是许升朝服绯绿及二十年者赐绯紫内出鱼袋以赐之服紫饰以金服绯以银三年六月乙巳屯田郎中知制造大名府赵昌遣观察使郑蒙乘驿诣阙上书请斩败将曹彬等上览奏嘉叹优诏褒之寻召拜御史中丞知制造正为中丞始此四年二月丁未右补阙知制造范杲家贫负人息数百万母兄晞常为兴元尹弃官居京兆能殖货家累巨万性尤吝啬未尝分故旧亲戚有人从长安至者给果曰少尹不复惜财物挥金无算矣杲闻之大喜因请出守给养兄上可其奏壬子授工部郎中知京兆府知制造出领外藩自杲始三月庚辰诏天下知州通判先给御前印纸令书课绩自令并条其事迹罢官日上中书考校文人换武秩【见契丹门】

端拱元年春正月丙子上以补阙拾遗任当献纳时多循默失建官本意欲新立名

使各修其职事二月乙未改左右补阙为左右司谏左右拾遗为左右正言近制宰相子起家即授水部员外郎加朝散吕蒙正固让止授六品京官自是为例八月以梁正辞等五人并为将作监丞充当中书堂后官堂吏校选人授京官始此冬十月特置四厢都指挥使以右谏议大夫樊知古为河北东西路都转运使都转运使自知古始

淳化元年正月旧制勳官自上柱国至武骑尉凡十二等五代时初叙勳即授柱国诏京师幕职州县官始武骑尉朝官始骑都尉歷级而升二月己酉诏自今游宴宣召直馆其集贤秘阁校理等并令预会先是上宴射苑中三馆学士悉预李宗谔任集贤校理合门吏拒之不得入宗谔献诗述其事故有是诏国家因唐制建昭文史馆集贤院于禁中昭文集贤置大学士直学士史馆置修监国史修撰直馆昭文亦置直馆集贤又有修撰校理之职名数虽异而职务畧同合门拒校理不得预宴盖吏之失也三月上以寺监副二品秩素高旧制自郎吏迁受颇闻缙绅之流以台阁自许目为散地欲振起之至是除郎中十余人为卿监八月列秘合次于三馆以直史馆吕佑之分直昭文馆以和■〈山蒙〉直集贤先是但有直史馆于是始备三馆之职十二月羣臣升殿奏事者可其奏皆得转达于有司颇容巧佞右正言直史馆谢泌请自今政事送中书机事枢密院财货送三司覆奏而后行诏从之遂着为定制中外所上书疏如之二年王化墓为御史中丞常慕范滂为人献清澄五畧一曰复尚书省曰国家立制动必法天并建官職以尊王室且尚书上应天象对临紫垣六卿拟喉舌之官郎吏应星象之位斯实干文昭著政事具明今省曹之名未称朝廷之盛夫三司使额乃近代权制判官推官勾当开折磨勘凭由理欠孔目官勾押前行后行皆州县官司吏局之名也臣今请废三司止于尚书省设六尚书分掌其事废判官推官设郎官分掌二十四司及左右司公事使人掌一司废孔目勾押前行后行为都司主事令史书令史废勾院开折磨勘凭由理欠等各归此部及左右司如此即事益精详且尽去其州县职局鄙俚之名也六卿如阙本官即选名其二十四司公事若烦简不同望下本官属叅酌其类均而行之口月己丑是月命翰林学士贾黄中苏易简干当差遣院李沆同判吏部流内铨学士领外司自此始也九月甲辰以枢密副使张逊知枢密院事温仲舒寇準同知院事知院事之名自此始逊仲舒準仍并带副使自后或以正官或校检官为之秩与副使同冬十月翰林学士承旨苏易简续翰林学士卷以献上嘉纳之赐诗一章又飞白书玉堂之署上曰永为翰林中美事易简曰自有翰林未有今日之乐十一月丙申上以入阁旧图承五代草创之后礼容不备于是命史馆修撰杨徽之等讨论故事引别为新图十二月丙申朔遂行其礼于文德殿右谏议大夫张洎既与徽之等同撰定新仪又独奏疏曰切以今之干元殿即唐之含元殿也在周为外朝在唐为大朝冬至元日立全仗朝万国在此殿也今之文德殿即唐之宣政殿也在周为中朝在汉为前殿在唐为正衙凡朔望起居及册拜妃后皇子王公大臣对四夷君长试制策举人在此殿也今之崇德即唐之紫宸殿也在周为内朝在汉为宣室在唐为上合即双日常朝之殿也东晋太极殿在东西合门唐制紫宸上合法此制也且人



君恭己南面向名紫微皇屋至尊至重故巡幸则有大驾法从之盛御前有勾陈羽卫之严故虽双日常朝亦须立仗前代谓之入合仪者盖双日御紫宸上合之时先于宣政殿前立黄麾金吾仗俟勘契毕唤仗即自东西合门入故谓之入合今朝廷且以文德正衙权宜为上合甚非宪度况国家丕承正统宇内治平凡百宪悉从损益惟视朝之礼尚属因循切见长春殿正与文德殿南北相对伏请改创此殿以为上合作双日立仗视朝之所其崇德崇政殿即唐之延英殿是也为双日常时听断之所庶乎临御之式允协前经今立论乃以入合仪注为朝廷非常之礼甚无谓也臣今按中书门下御史台为三司谓侍从供奉之官今起居日侍从官先入殿庭东西立定俟正班入一侍起居其侍从官东西列拜甚失北面朝谒之仪请准旧仪侍从官先入起居毕分行侍立于丹墀之下谓之蛾眉班然后宰相率正班入起居雅合于礼臣又闻古之王者躬勤庶政其临朝之时数视政事之繁简初五日一朝景云初始修故事于贞观殿自天寶兵兴之后四方多故肃宗而下咸只日临朝双日不坐其只日或遇大寒盛暑阴霾泥泞亦放百官起居双日宰相当奏事实时特开延英召对或蛮夷入贡勲臣归朝亦特开紫宸引见陛下自临大寶十有五年未尝一日不鸡鸣而起听天下之政虽刚健不息固天德之常然而游焉息焉亦圣人之大训若君父焦劳于上臣子缄默于下不能引大体以争则忠亮之心有所不至矣臣欲望陛下依前代旧规只日视朝双日不坐其只日遇天寒盛暑阴霾泥泞亦放百官起居其双日于干德崇政两殿召对宰臣常参官以下及非时蛮夷入贡勲臣归朝亦特上合引见并请准前代故事处分奏入不报三年夏四月命盐铁判官翰华直昭文馆三司属官兼直馆始此五月甲午御文德前殿百官入合旧制入合惟殿中省细仗随两省供奉官先入陈于庭上以为仪卫太简命有司更设黄麾仗仍旧从新制也五月置理检院命钱若水领之复唐制也秋七月置三司都勾院命谏议张秘判之冬十月上虑中外官吏清浊混淆莫能甄别壬午命户部侍郎王沔度支副使杜泌秘书丞王仲华同知京朝官考之吏部侍郎张宏户部副使高象先膳部员外范正词同知幕职州县官考课号曰磨勘院又命左赞善大夫口廷式与枢密都承旨赵镕李永同较三班院殿最以功过四年夏五月丁未废京朝官差遣院令审官院总之学士钱若水枢密直学士刘昌言同知审官院考覆功过以定升降又以判流内铨翰林学士承旨苏易简虞部员外郎知制诰王旦等同兼考课院凡常调选人流内铨主之奏章举及历任有殿最考课院主之并吏员而省司局议者咸以为当从易简之请也戊申诏罢盐铁度支户部等使三司但置使一员属吏并从旧贯从殿中丞马应昌之议也以盐铁使魏羽判三司秋八月丙申朔通进银台司旧隶枢密院使凡内外奏覆文字必關二司然后进御内则内官及枢密院吏掌之外则尚书两省掌之其数以下有司或行或否得緣而为奸禁中莫知外司无纠举之职枢密直学士向敏中初自岭南召还即上言通进银台司受遠方疏多不报恐失事宜请别置局署命官專位校其簿籍以防壅遏上嘉纳之癸酉诏以宣徽北院听事为通进银台司命敏中及张咏同知二司公事凡内外章奏案牒谨视其出入而勾稽

焉月一奏课事无大小不敢有所留滞矣发勅司旧隶中书寻令银台司兼领之九月以给事中封驳隶通进银台司应诏勅并令枢密直学士向敏中张咏详酌可否行下诏审官院自今京朝官未历州县者不得任知州通判从翰林学士承旨苏易简之请也五年夏四月丙戌右谏议大夫史馆修撰张秘言伏覩圣朝编年谓之曰纪惟纪报状畧叙勅文至于圣政嘉言皇猷美事羣臣之忠邪善恶庶务之沿革弛张汗简无闻国经曷纪请置起居院修左右史之职以纪录为起居注与时政记逐月编送史馆以备修日历上览而嘉纳之乃置起居院于禁中命起居舍人史馆修撰梁周翰掌起居郎事秘省承直昭文馆李宗谔掌起居舍人事丁酉掌起居郎事梁周翰言请自今崇德殿崇政殿皇帝宣谕之言侍臣论列之事望依旧中书修为时政记其枢密院事涉机密令本院编纂各至月终送史馆自余百司凡于封拜除改沿革制置之事悉条报本院以备编修令郎与舍人分直崇政殿以记言动别无起居注每月先进御后降付史馆起居注进御自周翰始也六月甲辰诏翰林学士枢密直学士今自叙立班位依旧在承郎之上诏三司总计使及诸道判官各给御前印纸自八月立书劳绩岁终校其优劣以申黜陟以殿中丞丁頔言守本官复充堂后官堂吏自唐至汉周率自京有司以有文才能书札行正廉干者抽补分掌诸房公事年深即授检校少卿监同正将军至国初赵普在中书奏令检校诸曹郎中自迩以来屡惩其贪而数恶其党故参用士人有科第历外官者至是复秩以朝籍盖矫昔之枉也八月癸巳诏改内班为黄门以崇仪副使兼内班左都知窦神兴充并宅使兼黄门左都班知内管领诸司使始此

至道元年正月始命员外郎孙贻为皇侄皇孙教授时中书言旧制太子有侍读后改为奉诸王讲读请以教授为名从之八月癸巳初置左春坊谒者命左清道率府副率祥符王继英兼领之然谒者本内侍之职而太子有通事舍人掌宣传导引之事不名谒者又十率品秩颇崇非趋走左右者所宜为盖执政之失也二年夏四月甲申上谓宰相曰膏粱之族官勲固以崇贵子孙仕宦者多至四五人每覃庆中书皆授摄官未几即补正员不数年遂通闺籍此甚弊政亟宜革之乙未诏自今止赐同举士究出身依例赴集选闰七月并三司理欠司【见太宗圣政门】三年夏四月乙未朔尊皇后为皇太后赦天下常赦所不原者咸赦除之制曰先朝庶政尽有成规务在遵行不敢失坠然而纂图伊始惧德弗明所宜拔茂异之才开谏诤之路抚绥寡鹄思复疲羸庶几延宗社之鸿休召天地之和气京朝官衣绯绿及二十年并与改服色听未升朝亦听叙赐绯紫自此始六月罢度支盐铁户部副使八月周莹为宣徽北院使自后不复置此职先是宣徽位在枢密副上莹表请居下从之后祥符九年诏参政枢副宣徽并先后为序至熙宁二年郭逵序位于参政枢副下九月丙子御史王齐上疏陈十四畧云官多则事烦吏多则民残欲事不繁莫若省官欲民皆安莫若省吏天下所以未格清静者由官吏多之故也又云官多俸薄不若俸厚而官少若尽去冗食复其全俸则二人之俸可以周一人之用衣食既足廉耻自兴又曰铨选之门徒有其名莫着其实有殿者虽加厚罚有最者莫见明扬

或骤遇其宽恩则不限其功过靡逢慰荐则终困于徒劳又曰贡举不严则权势争前而孤贫难进必欲均之莫若皇朝三品及见任之武升朝官子孙弟侄荐名于两监而未升朝官子弟及白屋之士荐名于州郡然后升于礼部第其可否亦两分之则权势异途孤贫自进矣

### 真宗

咸平元年春正月癸酉始令诸王府记室翊善侍读等官分兼南北宅始此当详考时南北宅又有伴读然无定员七月戊午置翰林侍读学士以杨徽之夏侯峤吕文仲为之置翰林侍讲学士以邢昺为之初太宗命文仲为翰林侍读寓读禁中以备顾问然名秩未崇上奉承先志特建此职择老儒旧德以充其选班秩次翰林学士禄赐如之八月右司谏直史馆孙何上疏曰六卿分职邦家之大柄也故周之会府汉之尚书立庶政之根本百司之纲纪令仆率其属丞郎中分其行二十四司灿然星拱郎中员外判其曹主书令史丞其事四海九州岛之大若网在纲有吏部焉辨考绩而育人材有兵部焉谨纪律而诛强暴有礼部焉祀神祇而选贤俊有工部焉营宫室而修堤防六职举而天下之事备矣二年六月令秘书省正字邵焕于秘阁读书从其请也秘阁读书自焕始十一月废理检院天圣七年二月复之以御史中丞王曙为之从夏竦之议也三年十一月令常参官转对如故事诏曰间者深诏朝伦大开言路而箝结相尚启沃无闻岂朕意之未孚耶庶官狃于因循耶今顺考旧规递进请议凡朕躬过失时政有违教令之阙遗人情壅遏并可条上毋或缄藏言近讦者亦可优容文不工者许其直致其未预次对官听封奏以闻四年三月壬午以太常博士孙近为监察御史从新制也知全州陈彭年上疏言五事其四曰行公举云为邦之道莫切于求贤求贤之方莫先于公举然堤防不峻则滥进之路兴宪纲稍严则明扬之典废期臻多士在振宏纲臣请依唐朝故事新授常参官朝谢日并进扶状举官自代各随所长且言其状或以文学或以吏能或以强明或以清明务在摭实不许饰词佞所谄知无避亲党既经御览即付宰司俟至年冬具名条奏在外者委诸路转运在内者委本司官吏常更审其事以验所举如荐扬既数采听非虚即与量才各加进用其后或不操修行故黷彝章则举主法依科刑以惩缪举或政绩如异课最有加则举主随事旌酬以褒进善赏罚既信清浊自清盖采羣议则人无以私有常规则众皆知劝清源正本其在于兹疏奏诏冯拯陈尧叟参详之拯等上言切详往制常参官及节度观察防御刺史少尹畿赤令并七品以上清望官授讫三日于四方馆上表让一人以自代其表付中书门下每官缺以见举多者量而授之如让表不到委合门御史台纠督以闻并从之壬子审官院初引对京官于崇政殿迁秩有差京朝官磨勘引对自此始九月知封驳司陈恕请铸印诏令取门下省印用之遂改知封驳司兼门下封驳事壬午以国子监校勘前知封驳司刘士玄为大理寺丞南宮侍教南宮北宅有侍教自此始五年春吏部郎中直集贤院田锡在掌银台每览天下章奏有言民饥盗起及诏勅下不便民者悉条奏其事上奏宰臣称锡为得净臣之体夏四月癸酉命田锡以本官兼



侍御史知杂事仍遣中使谕旨曰卿每上章疏所司不敢滞留朕皆一一亲览知杂任朝廷甚难其人故以命卿不妨徐徐撰述或有所见即具奏闻十二月丁丑以宰相吕蒙正李沆并兼门下侍郎旧制三司三公左右仆射平章事并兼两省侍郎先是学士米白梁周翰草二相加恩制书遗忘旧制既而上问白不能对各罚俸一月六年并三司为一使【见用度门】秋七月复并三司勾院为一直史院陈尧咨判之从其请也至祥符九年复分为三部张懷寶等为之

景德二年三月甲寅将作监丞王曾为著作郎直史馆赐绯旧制试文当属舍人学士院宰相寇準雅知曾召试政事堂以起复谏议大夫知制诰晁迥起居舍人知制诰李宗諤在舍人院掌牒御史台不平中丞吕文仲移文诘之宗諤引八事证不相统摄且言中书门下省正言以上皆天子侍从之官立朝叙班不与外司为比故在政衙则与宰相重行而立于通衢则与中丞分路而行常参则师傅入于两省之前朝会则台官次于两省之后地望特峻职业有殊官局之门不相统摄卒如宗諤所言守职者黷之十二月以王钦若为资政殿大学士班在文明殿学士下上怪问之左右以故事对钦若诉于上即日改为资政殿置大学士自此始三年二月丙子权三司使丁谓言唐宇文融置劝农判官今欲别置虑益烦扰而诸州长吏职当劝农乃请少卿监刺史合门使已上知州者并兼管内劝农使余及通判并兼劝农事诸路转运副使并兼本路劝农使诏可劝农使入御自此始夏四月壬辰屯田员外郎谢涛使益州路及还举所部官二十余人宰相以为多涛乃历陈其治状且愿连坐奉使举吏连坐自涛始乙未复诏羣臣转对其在外京朝官内殿崇班已上候得替先具民间利害实封于合门上进方得朝见四年六月戊申上谓辅臣曰近诏谏官御史各令举职言事昨右正言陈彭年请条具贡举制复宏词科采经术士侍御史贾翱使还奏宿州贾绫扰民此皆可采中书宜置籍记之自彭年翱为仍具案覆可行及不可行者岁终以闻若有改转即不待岁终録奏癸巳覆置诸路提点刑狱司先是上出笔记六事指其一谓王旦曰勤恤民隐遴选庶官朕无日不念也所虑四方行察官吏未尽得人一夫受冤即受灾沴今军民事务虽有转运使且地远无由得知先帝常遣朝臣为诸路提点刑狱今可复置仍以使臣副之先命中书密院择官具名进内亲选才能之人引对于长春殿遣之所至專案视刑禁审详案牒常检举催督在繫久者壬申诏开封府推官判官各增置员以狱讼开法为生事户口租赋为熟事分掌之仍加俸给如事有枉抑未尽公理非吏人受财自今并以推官为首八月己酉国子祭酒邢昺以羸老自陈曹州故乡愿给假一归视田里壬子即拜工部尚书知曹州职如故迁班在翰林学士上及行又令近臣祖送设会于宜春苑翰林侍讲学士外使始此

大中祥符二年二月己卯诏龙图阁待制班视知制诰在其下于龙图阁待职户部郎中直昭文馆戚纶工部郎中直史馆陈彭年并兼集贤修撰诏诸路转运副使提刑狱朝臣使臣许荫弟侄孙者从其请三年春正月丙子又诏幕州县官三任六考方得论奏置龙图阁学士以直学士杜镐为之待制陈彭年为直学士戚纶为枢密直学士又诏龙

图阁学士上给俸如之四年五月戊申朔诏曰今宰相官至仆射者并于中书都堂赴上不带平章事者亦于本省赴上令太常礼院崇文院检讨详定仪注先是中书侍郎兼兵部尚书平章事王旦迁右仆射止于本厅受贺宠待辅臣遂命振举旧仪祖宗以来两省御史台须文学优长政治尤异者乃特除拜汾阴肆赦始以叙迁上恐循习非便乃诏自今遵守旧制不得以他官转入五年七月乙酉诏尚书丞郎两省给谏知州府而本部郎中员外郎及两省六品以下官充本路运使副者承前例须申报虽职当统摄方委于事权而官有等差宜明于品级自今知制诰观察使已上知州府处所申转运司状止置按检令通判已下署衙供申如转运使官秩在上者不用此令其后张咏以礼部尚书知升州凡有祠部事皆申公状咏因上言臣官忝六曹祠部乃本行司局而例申公状似未合宜望自今尚书丞郎知州者除申省外其本行曹局上署案检从之丙辰知制诏王曾判大理寺判寺旧用郎官上欲重其任故特命曾使殿谕之曰天下之命繫于狱今以屈卿曾顿首谢仍赐钱三十万因请奏辟僚属遂着为令五年秋九月戊子以吏部尚书知枢密院事王钦若户部尚书知枢密院陈尧叟并依前官加检校太傅同平章事充枢密院使签署枢密院事马知节为副使学士晁迥草制误削去钦若尧叟大官诏各存之遂改制而行儒臣领枢密兼使相自钦若尧叟始冬十月乙未朔诏枢密使带检校官平章事不告引止于本所赞喝时王钦若陈尧叟上言请定常制先是魏仁浦以宰相兼枢密使告引曹彬以枢密使兼相不告引故止用彬例丁巳以知制诰陈尧咨权通判吏部流内铨制选人皆用奏举乃得京官而士本孤寒不为人知者尧咨特为陈其功状而升擢之庚寅龙图阁直学士陈彭年等上新定阁门仪制十卷四方馆仪一卷诏奖之仍各赐金帛右谏议大夫龙图阁直学士陈彭年为翰林学士兼龙图阁学士学士兼职自彭年始六年九月癸卯朱选罚铜二十斤坐擅发驿马与知广州邵晔子令省亲疾而马死故也先是撰制诰兼羣牧使已守藩郡兼领如故于是始解使职自是不复有在外兼领者矣诏龙图阁直学士结衔在本官之上杜镐陈彭年之为是职也职在官下至是陈尧咨建言故更之七年夏四月丙辰朔令有司依新定仪制重画入阁图有唐朝职官悉改之从上阁门使魏昭亮之请也是月中书言文武臣僚年终举到幕职州县官今欲定五人以上同罪保举者替日令吏部流内铨磨勘引对从之兵部尚书寇準为枢密院事同平章事王旦为之也準未告谢命向敏中权发遣枢密院公事自是枢密院皆罢即命宰臣权发遣如敏中例八月甲寅朔置景灵宫使以中书侍郎兼刑部郎中平章事王钦若都大提举抄写校勘馆阁书籍翰林学士陈彭年副焉铸印给之初荣王宫火燔崇文院秘阁所存无几既别外院重写书籍彭年请内降书大选官详定然后抄写命馆阁官及择吏部常选人校勘校毕令判馆阁官详定两制内选官覆检点又请募人以籍鬻于官者验真本酬其直五百卷以上优其赐或艺能可采者别奏候旨前后献书者十九人悉赐出身及补三班得一万八千七百五十四卷彭年参知政事一人兼领然彭年既入中书不复至馆其总领之务但委崇超判馆阁官亦不复關預云八年二月以楚王元佐为天策

上将军兴元牧剑履上殿诏书不名唐及后唐天策上将军并开府时元佐久病特加褒不开府仍给衔在功臣上帝谓宰臣曰楚王加恩兴元府必遣人来重于烦扰宜速止之府牧自此始五月壬辰诏于右掖门外创崇文外院别置三馆书库时宫中严火禁甚峻上以羣臣更直宿寒沍之月饮食非便乃命翰林学士陈彭年检唐故事而修复之九年正月丙辰置会灵观使以参知政事丁谓为之九月庚子以刑部郎中直史馆高绅为史馆修撰同判吏部流内铨实不掌修撰自是领修撰者须两省五品以上乃令掌修撰遂以为例云及明年绅求外任故事修撰不带出复授直昭文馆知越州大理评事崇文院检讨兼国子监直讲冯元为太子中允直龙图阁并赐金紫上作诗二章分赐之直龙图阁自元始序位在本官首

天禧元年春二月丁丑诏别置谏官御史各六员增其月俸不兼他职每月须一员奏事或有急务听非时入对及三年则绌其不胜任者戊寅内外官加恩司徒兼门下侍郎平章事王旦加太保彭王元俨加太保为镇海天平节度使王钦若加右仆射定难节度使赵德明加太傅三公并除双员自旦及元俨始州牧自元佐始三月乙酉著作郎刘煜为右正言时虽别诏置谏官煜首预其选上曰谏官御史之任实难其人当须识朝廷大体达政刑要道言必该理乃为称职尔夏六月丙子右正言鲁宗道上言窃惟亲民之官政事最切未见区别如有民何今审官例差一知州纵毫识以何道推降之铨司平配一县令虽菽麦不分且无由摈斥之今与天下亲民之官以十人论之黷货害政未寘刑章者十有其三清浊混然乃与清为伍任上之知而不能科举者又次焉贵游亲属望风护善不问而言者又次焉是则介然自守约己恕物不谄上不黷下孜孜于民政者十不一二焉欲民之安其可得乎汉宣帝凡拜刺史守相必亲见之考察其言观其能今或未然凡除知州通判京朝官知县候满三五人令大臣具宴见之礼以遣之讯之以言而察其应对观其辞气考其臧否才能者奖之不肖者退之县令则择台阁有风鉴闻望臣僚者遣之能否之间各如其状恐于圣政稍得其宜礼仪院奏详定太尉王旦赴上仪注国朝以来三公不兼宰相无赴上之礼上优宠大臣故特有是命然且终以疾不赴焉九月上与宰相议省吏员向敏中曰太祖太宗朝阁门祇候不过三五员倡导赞谒而已今踰数百而除授未已禄廩至厚名望亦优其间不无滥被升擢者愿赐减损上曰此盖相承为例渐减省之二年春正月己亥尚书右丞兼宗正卿赵安仁为御史中丞尚书右丞兼中丞始此以崇仪使昭州团练使贾宗户部员外郎薛奎并为制置发转运副使郭盛为都监发运司置都监始此夏四月翰林学士利瓦伊罢为户部侍郎集贤院学士初维三兄皆年五十八而卒及是维亦得疾因力辞近职云维疾稍间命知口州集贤院学士出藩自维始十二月工部侍郎参知政事张知白与宰相王钦若论议多相失因称疾辞位丙午罢为刑部侍郎翰林侍读学士知天雄军上赋诗饯之辅臣以杂学士出藩并翰林侍读学士外使皆自知白始【朱敏求春明退朝录云祖宗时宰相罢免惟赵令得使相余多得大官归班参枢亦然天禧中张文节始以侍读学士知天雄军王文康以资政学



士知陕州自庆厯解罢率皆得焉】将作监丞蔡齐为著作郎直集贤院故事第一人及第到任一年即召试齐自兖州通判徙潍州献所为文乃得召试三年五月辛巳监察御史刘平为盐铁判官章颖为度支判官并赐绯鱼于是御史复兼省职十二月宣徽北院使知枢密院检校太尉曹利用吏部尚书参知政事丁谓并为枢密使时辅臣以效恩俱进官故事常为宰相而除枢密使始得仆射乃以谓检校太尉兼本官充使枢密使兼御史大夫自利用谓始去之四年春正月乙丑以华州观察使曹玮为宣徽北院使镇国军留后签书枢密院事签书兼藩镇自此始也丙子改诸路提点刑狱为劝农使副使兼提点刑狱公事仍诏所至取民籍视其差等有不如式者惩革之劝恤农民以时耕垦招集逃散检括漏税凡农田一事已上悉领之仍各赐农田勅一部夏四月凡知制诰着位两省则次给谏南省御史台次丞郎外官则在观察使上云五年春正月己酉学士刘筠见上久疾丁谓浸擅权叹曰奸人用事安可一日居此表外任乃授右谏议大夫知庐州旧制学士罢职多为侍读学士或龙图阁学士筠但除谏议大夫谓沮之也十二月乙巳以内殿崇班皇甫继明同勾管馆秘阁公事【咸平中初命刘崇超监三馆秘阁图籍其后因循与判馆联署掌事时论非之崇超素与王钦若善丁谓为相忌之别用继明以分其权】更号监图籍曰勾当公事自是内臣遂与大学士同职时论愈非之

### 仁宗

干兴元年春正月刑部员外郎直史馆陈从易为荆湖南路转运使从易好学强记为人激直少容喜别白是非多面折人王钦若最善之尝谓人曰数日不见简夫辄忽忽不怿及废居南京丁谓用事人畏之无敢见者从易将欲过之遇汴水旱涸遂告谓曰从易愿使湖外非为贫也以王公在宋就省之尔今汴水涸义不可从他道幸公许少留谓即喜曰王公之门独君知我者留从易权纠察刑狱从易不敢当乃听归馆须汴通乃行馆中侍阁自从易始仁宗即位大赦天下京朝官服绯绿及十五年并与改赐服色以十五年为限登极及用东封西祀例自此始三月鲁宗道判流内铨宗道患铨格烦多厘改之又悉书科条揭于庑选人真宗时选人试身言书判者第推恩上即位亦用前法壬戌诏曰国家思皇政经详核吏治先朝硕义之士或淹常选而以四事程其能朕承统绪循用旧典矚然羣彦来萃是涂乃命从臣精加详考或擢升京秩或序进经筵或锡优资使居使地或假勲阶以示恩宠其令翰林学士李咨与吏部流内铨以成资阙为差拟前懷安军判官宋若谷等六十五人咸迁官改京秩者六人最下者犹注近地成资阙后率以为常中书言旧制翰林医官图琴碁待诏转官止光禄寺丞遇恩但加阶勲而已天禧四年乃迁至中允赞善洗马同正请自今转官勿踰此制唯遇特恩即至国子博士不入少卿监从之吏部流内铨言天下州县官期满而未代者八百员辛丑诏免守选人拟以代之秋七月丙子枢密副使钱惟演旧位王曾曾既入相亦正惟演使名故事枢密使必加检校官惟演但以兵部尚书充使有司失之也十一月学士刘筠为御史中丞先是三院御史言事皆先白中丞筠举旧仪榜三院门令台属各举纠弹之职毋白丞杂知壬辰始

命冯元同判国子监仍诏自今毋差补荫京朝官【国子监旧制用近臣宿典领后以贵游子弟初仕者为之故改】庚戌诏中书官言审官院向以员多缺少三年代者减一年三十月代者减十月请复旧制从之

天圣元年春以陈尧叟知制诰史馆修撰故事知制诰皆先召试于中书尧佐预修真宗实录特免试丁巳诏举谏官御史以名闻天禧初诏两省置谏官御史台置侍御史以下各六员不兼众职月一员奏事其后员缺不补言者及之辛未诏吏部流内铨幕职官知大县缺京朝官故也二年春戊申吏部铨引对选人九人前束录县尉王得说历官寡过书考最多而无保任者上察其孤贫特擢为大理寺丞他日又引对选人有贾积善者十四考无公私过特擢为京官夏集贤校理葛昂张仲尹黄弼陈商范说等乞外任诏并与小处通判太宗朝凡带馆职出皆知州景德后王昱刘奭并以官卑止与通判至是用其例封禅五使辅臣为之向敏中以老不任赞导命王钦若敏中领仪仗使盖失其次第今有中丞换使名非故事也三年诏臣僚奏荫不得奏无服之亲赵湘以孙为子御史李紘请条约之故降是诏直昭文院陈从易等校十代兴亡论字非舛谬而妄加涂窜以为日谏上因览之故从易等及于责夏五月右正言孔延鲁常迁官愿不迁为其父求三品服上曰子为父请可从也乙未以三品服赐孔最王钦若等曰延鲁所陈亦足以厚风俗丙戌诏京朝官磨勘并如景德四年七月勅施行不许中外任及三年以上者虽未到阙听磨勘于是申明旧制更立四年之限景德中诏须见任及三年以上者乃得引对易四年制乃稍益旧制四年御史台自薛奎后中丞缺不补侍御史韩亿独掌台务者踰年辛卯诏馆阁校勘自今毋得增损时枢副张士逊请以其子友直为校理上谓馆阁所以待天下贤才不可私授止令于馆阁读书降是诏五月以知制诰特诏翰林学士夏竦草词十月壬辰诏郎中以上致仕者自与一下官时熊同文请老不愿分司监当止乞禄二子仍着为令同文时为都官郎中五年二月以馆阁校勘王琪签书南京留守判官事校勘无出外者琪为晏书所辞特许之六月诏翰林学士依大中祥符五年故事常一员在院如假故次学士直天圣元年常诏直日出宿以故事双日锁院只日降麻故也至是中书言恐宣召不至故有是诏八年学士承旨杨亿以龙图阁学士刘筠知三入翰林意望两府及为承旨颇不怿常称疾不出或戏之曰服清凉散必愈两府用青凉伞也与杨亿齐名号杨刘六年九月己亥诏近制京朝官三任知县入通判三年入知州自今任内常有五人同罪奏举者减一任七年诏文臣换右职者听任子弟为文资三月壬辰朔诏龙图阁待制以上自今非任剧要毋得奏异姓亲执政多任子于馆阁读书鲁宗道曰馆阁育天下英才岂纨袴子弟得溷恩泽处耶吾子诚约已任京官然终不使恩国恩六月置转运判官与转运使分部巡按庆历三年复置九月丙寅诏阁门自今入内都知押班如昭宣使以上即与客省使等为一班皇城使副以下并在皇城使之前作别亦行太祖都知押班率供奉官为之内中祇应裹头巾衣褐衫而已宰相吕夷简不考故事辄升其班次议者非之八年集贤校理彭乘以亲在蜀求便官诏乘以亲在蜀求便官诏乘以亲在蜀求便官诏乘以亲在蜀求便官

鲜知学者乘为兴学召其子弟为生员教育之俗遂变九年甲戌权度支判官右正言陈执中罢度支判官谏院供职国朝承五代之弊官失其守故官职差遣离而为三今之官职用以定俸入尔而不亲职事谏议大夫司谏正皆须别降勅许赴谏院共职者乃曰谏官

明道元年四月诏近臣非受诏毋得举官乞试馆职其已试而推恩者毋得再求试辛卯以门下省为谏院徙旧省于右掖门之西先朝虽除谏官而实未置院及陈执中为谏官屡请之置谏院自此始二年旧制集贤院学士在京始给俸于是李若谷以集贤院学士知江宁府而自请之壬辰诏在外者亦给遂着为令秋八月丁巳置端明殿学士班翰林资政学士之下以翰林侍读学士兼龙图阁学士宋绶为之太平兴国五年初改端明殿学士为文明殿学士枢密副使之下自程羽李昉后不复除授承明既更命新殿曰端明于是复置学士与文明之职并见而班益降也然讫无拜文明殿学士者绶固辞端明不听请解龙图许之己未张士逊为山南东道节度使同平章事判许州杨崇勳改判陈州初士逊与崇勳俱入告谢士逊乃位崇勳下上问其故士逊对曰臣官仆射而崇勳为使相上因以使相授士逊时士逊已罢政事翰林学士承旨盛度草制当言新除左仆射而误用士逊旧衔有司奉行制书不复追改论者非之一旧制学士以先后序班时狄棐先讽为龙图阁直学士而讽盛气凌棐宰相李迪佑讽特诏讽班棐上论者非之置提刑见论治门

景佑元年正月中书言诸路提点刑狱朝臣使并如旧制给御前印纸以书殿最从之一李俶议入阁仪【见圣政门】癸丑诏御史台置殿中侍御史监察御史里行举三丞以上常厯知县人候二年除史又二年除三司开封府判官从中丞韩亿之请也然唐制亦有侍御史里行令独遣之辛卯御崇政殿西庑召辅臣观讲书罢军头事自是为例秘书丞张宗谊孙沔并为监察御史里行监察御史里行自此始太常博士监察御史里行高若讷为主客员外郎殿中侍御史里行殿中侍御史里行始此乙酉诏阁门祇候自今须尚书员外郎诸司使以上及本路转运使或提点刑狱二员共七人举之方许引对丁卯诏中书提点五房公事及堂后官自今以八员为定制仍参择选人为之己卯宣庆使忠州防御使入内都知蓝继宗为景福殿使景福殿置使自大中祥符五年至今授才三人刘承珪韩守英及继宗也二年正月殿中侍御史里行高若讷言丙戌赦书选人满十二考并磨勘引见今猥进者多请以厯任免赃私及非昏耄者乃听改官仍具与监当一任诏须常有人奏举者方得施行从之壬辰诏选人十二考无举主者特许参选癸丑置迩英延义二阁写尚书无逸篇于屏迩英在迎门之东北向延义在崇政殿之西北向是日御延英阁召辅臣观盛度进读书贾昌朝讲春秋既而赐宴崇政殿六月丁巳诏幕职州县官初任未成考者毋得举奏先是御史知杂事郭勤言睦州团练使柳三变释褐到官才踰月未有善状而知州吕遽荐之盖私之也故降是诏三年正月贾昌朝言臣宰相得侍经禁中陛下每以清闲之燕向学稽古徽言善道取高前圣在双日杳隔严宸时



政记史馆日厯入起居注莫得纂述臣自景佑元年春迄二年冬凡书筵侍臣出处升绌封章奏对燕会赐与皆用存记列为二卷乞送史馆诏以迩英延义二阁记注为名命章得象等接续修纂冬十二月戊申诏宣勅札子非经通进银台司毋得直下诸处初龙图阁直学士李紘领银台司具言宣勅札子皆不经本司封驳之职遂废不举请用内制申明之戊戌诏曰致仕官旧皆给半俸而仕未显者或贫不能自给非所以遇高年养廉耻也自今两省大卿监正刺史阁门使以上致仕给俸如分司官长吏岁时以朕意慰劳之关

四年三月甲戌朔以崇政殿说书司封员外郎直集贤院贾昌朝祠部员外郎崇文殿检讨王宗道屯田员外国子监直讲赵言主客司员外郎国子监直讲王安国兼天章阁侍读预典殿起居北直龙图所班直馆本官之上天章阁置侍读始此己卯各赐勅书獎谕大理评事史馆检讨王洙亦赐马带职京官降勅书始此戊戌翰林学士丁度上所撰国朝时令一卷诏以五月朔入阁因读时令寻复问礼官朔日夏至入阁可否皆言五月朔朝会合唐旧制虽是大祠比冬至圜丘礼或受贺在质明后无嫌然据易象月令及蔡邕有闭闕静事不贺之说郑康成据乐章春秋说夏至有前殿从人能作乐后汉常行其仪今入合读令既属加礼在朔与假本无所碍惟夏至则经义有妨或自圣裁酌用汉法诏以七月朔入阁读令寻又罢王曾罢政命知青州既入谢求改郢州乃下学士院贴发加资政殿大学士判郢州盖仆射典州当云判不当云知翰林学士丁度失之也吏部侍郎知枢密院事王随户部侍郎知郑州陈尧叟并为平章事随加门下侍郎尧佐守本官吕夷简常密荐二人可用故也自薛居正后初相无兼门下侍郎者至是始误草制用不复改

寶元二年八月癸丑翰林侍读学士给事中梅询知许州询以足疾请外补也故事侍读学士无出外者天禧中张知白罢参知政事领本职出知大名府非厯二府而出者自询始冬十二月帝常问参知政事宋庠以唐入阁仪戊辰庠上奏曰夫入阁乃唐只日于紫宸殿受常朝之仪也唐有大内又有大明宫在大内之东北世谓之东内自高宗以后天子多在大明宫之正南门曰丹鳳门内第一殿曰含元殿大朝会则御之对北第二殿曰宣政殿谓之正衙朔望大册拜则御之又对北第三殿曰紫宸殿谓之上阁亦曰内衙只日常朝则御之凡天子坐朝必须立仗于正衙殿或乘輿上御紫宸殿即唤仗自宣政殿两门入是谓东西上阁门也以本朝宫殿视之宣德门唐丹鳳门也大庆殿唐含元殿也文德殿唐宣政殿也紫宸殿唐紫宸殿也今或求入阁本意施于仪典即须先立仗于文德殿之庭如天子止御紫宸殿即唤仗自东西阁门入如此则差与旧仪合但今之诸殿比于唐制南北不相对值为殊耳故后来议论因此未明又案唐自中叶以还双日及非时大臣奏事别开延英殿若今假日御崇政延和是也乃知唐制每遇坐朝日即为入阁而叔世杂乱五朝草创大略之制更从简易正衙立仗因而遂废其后或有行者常人之所罕见乃复谓之盛礼甚不然也今相传入阁图者是官司记常朝之制如阁门有

仪制勅杂坐图之类何足为希阔之事哉况唐开元旧礼本无此制至开宝中诸儒增附新礼始载月朔入阁之仪又以文德殿为上阁差舛尤甚盖当时编撰之士讨求未至太宗朝儒臣张洎亦有论奏颇为精洽或朝廷他日修复正衙立仗欲其两制使豫加商推以正旧制然议者谓殿阁不同旧制难复行之

庆历元年夏左正言孙沔奏太宗初置京朝官考课即今审官院是也凡中外官任咸给印纸历子或功绩可纪清白有守过犯度数举主姓名尽得书之无所遗俾至阙下赴院磨第其等而升黜之此国家激励贤才驱策弩蹇之至术也自从因循咸以磨勘为转官之阶梯也不复有尚功之志节但官三周例迁一级虽数有失亦不退复故士大夫以无过犯为能是使庸愚不肖之人晏然自得不十年间坐致员外郎是以居常则青紫相随应用则玉石难辨苟不更张弊辙必恐寔废政纲臣欲乞今后应京官升朝官并依旧许三周年一次磨勘如明有治绩者即与转官有公私罪者等降黜无功过者且守资如此足以旌别贤愚永着甲令廉勤公干之士闻之必激节愿行者众矣乞更差近上臣僚别定格式亦一时之懿范也又言欲乞今后带职员外正郎止许荫序一名子弟少卿给谏与二人丞郎三人尚书四人仆射已上共五人致仕及物故更各与一人武职等此类官品暨皇亲母后之族及两府大臣亦乞约束人数伏乞特差近上臣僚定其久制以为万世之法纪先是刘德从之妻遂国夫人者吕蒙正之女也常出入内庭或云得幸于上后获谴夺封罢朝谒久之出入如故谏官张方平再以疏论列皆留中既而有诏复封遂国富弼缴还词头封命遂寝唐制唯给事中得封还诏书中书舍人缴还词头盖自弼始也二年戊午诏仆射兼门下侍郎平章事吕夷简判枢密院户部侍郎平章事章得象兼枢密使枢密使晏殊同平章事初富弼建议宰相兼枢密使上曰军国之务当悉归中书枢密非古官然未欲尽废故止令中书同议枢密院事及张方平请废枢密院上乃追用弼议特降制命夷简判院事而得象兼使殊加同平章事为使如故三年虞部员外郎杜杞权发遣度支判官事太常博士燕度权发遣户部判官事仍理本资序毋得差出候三年有劳令三司保明当议升陟之权发遣三司判官始此戊戌诏谏官日赴内朝先是知制造田况上言有唐两朝自谏议大夫以上至拾遗补阙共二十二人每遇宰相奏事谏官随而入有所阙失实时规正其实皆中书门下之属官也今谏议大夫无复职业自司谏正言知谏院皆遗补之任而朝廷责其言如大夫之职而地势不亲位序不正朝廷间与众同进退非所以表显而异其分也臣前在谏院每闻一事皆诸处未闻比及论列或至后时今若令谏官得奉内请则何以日闻朝廷之事矣诏送两省详之学士承旨丁度参详乞今后比直龙图阁及修起居注内令日赴内朝从之先是谏官欧阳修言臣伏见御史台阙近制令两制并中丞轮次举人遂致所举多非其才不能称职臣谓今两制之中奸邪有未能尽去若不更近制则轮次所及势须举人臣欲乞今后只令中丞举人或特选举主伏见朝班中虽有好人多以资考未及今乞不限资考惟择材堪者为之况台中自有里行以待资浅之人仍乞复位举官之法有不称职者连坐举主重为约束以

防伪滥庶几称职可振纪纲今欲特降指挥令举官自京官以上不问差遣次第惟材是举资浅者为里行资深者入三院景佑初置殿中侍御史里行监察御史里行凡四人以三丞以上常历知县人充既而久阙不除于是诏以两人为额【两人为额庆历三年王拱辰举李京包拯或因修此疏】癸未诏自今见任前任两省及夫两省已上官不得陈乞子弟亲戚馆职并读之类进士三人以上一任回无过犯者进许著述召试取优等者充遇馆职阙曾取有两府二人两省三人同罪举充者仍举著述看详试补丁亥诏曰周大司乐掌学政以六艺教国子则官材益本于世胄而今之荫法推恩太广以致疏宗蒙泽稚齿授官未知立身之道从政之方而并偕仕进非所以审政重民也其着为令使夫蒙嗣先禄以笃为后之体支子限年以明入官之重设考课之格立保任之条古不云乎爵禄者天下之砥石人君所以励世而磨钝咨尔庶位体兹意焉范仲淹所陈十二事其一云须子孙年过十五若弟侄须年过二十必五服亲乃得许已常荫而物故者无子孙禄仕听再荫自是任子之恩杀矣然犹未艾也壬辰诏限职田任有定制士有定限吏以职田抵罪比前日稍稀阔焉【此仲淹十事五均公田之议】十二月翰林学士提点在京诸司库务宋祁请增置勾当公事朝臣一员从之提举司勾当公事自祁始也祁初荐太常博士王畴时有官者同提举畴乃辞于中书曰翰林先进畴恐不得事也然以朝士大夫而为阉官所指使则畴实耻之乃更用太常博士张中庸为勾当公事畴博文字中庸蜀人也集贤校理知谏院欧阳修为右正言知制诰初中书召试而修辞不赴特除之四年诏三司丞郎给谏已上御史中丞正卿监岁得举正郎以下朝官不得过三人起居舍人三司副使知杂御史少卿岁得举员外郎以下朝官不得过三人左右司郎中司谏正言三院御史并馆职知谏院天章阁侍讲三司判官并员外以上及正郎见任知州有出身无赃罪者并岁得举太常博士以下朝官不得过二人安抚制置发遣转运判官得举本部内员外郎以下朝官并限人数仍于状内开说其人堪充何任使同罪以闻八月命参政贾昌朝领天下农田范仲淹领刑法事有利害其悉条上初仲淹建议周制三公兼六官之职汉以三公分部六卿唐以宰相分判六曹今中书古天官冢宰也密院古夏官司马也四官散于羣有司无三公兼领之重而二府惟进擢差除循资及议赏罚检用条例而已上不專三公论道之任下不專六卿佐王之职非法治也臣请仿前代以三司司益审官流内铨三班院国子监太常刑部仍行大理羣牧殿前马步军司各委辅臣兼判其事凡创置新规更改前弊官吏黜陟刑法轻重有利害者并从旨臣予夺其体大者二府签议奏裁臣不自领兵赋之职如其无补请先黜降章得象等皆以为不可久之乃降是命卒不果行五年春乙亥复置言事御史以殿中侍御史梅摯监察御史李京为之摯新繁人唐制御史官專言职政天禧初始置言事御史六员其后久不除至是以谏官员不足复除之今御史中丞厅之南有谏官御史厅盖御史得兼众职也二月辛卯诏曰此京朝官因人保任始得序迁朕念廉士或不能自进其罢之时监察御史刘言瑜言近年考课之法清望官五人保任方磨勘适长奔竞非所以养士廉耻也故降是诏磨勘保



任之法实仲淹所建仲淹既绌元瑜希得象旨亟奏罢之兵部员外郎兼御史知杂赵及权判吏部流内铨初铨吏匪员缺与选人为市及奏阙至即榜之吏部榜缺自及始右正言钱明逸言阁门仪制每日上殿不得过三班乞今后谏官有本职事求对虽已有三班外听上殿敷奏从之戊辰以枢密使王贻永兼羣牧制置使自王德用出镇滁州密院不复兼领羣牧置制使及实乃复之余靖奏任子不拘年甲以广常延之典从之八月起居舍人知秦州田况遭父丧辛酉诏起复况固辞又遣内侍持手诏谆谕况不得已乞归葬事杨翟托边事求见泣请终丧上恻然许之帅臣得终丧自况始庚辰罢宰相兼枢密使时昌朝执中言军民之任自古则同唐别任枢臣専主兵务五代始令辅臣亦带使名至国初尚沿旧制干德已后其职遂分是谓两司对持大柄实选材士用讲武经向以關隘未宁兵议须一复兹兼领适合权宜今西夏来庭防边有序当还使印庶叶邦规臣等愿罢兼枢密使即降诏许之又诏枢密院凡军国机要依旧同量议施行十一月枢密院请自今进退管军臣僚极边长吏路分兵马钤辖以上并与宰相同议从其请六年夏四月壬子权御史中丞张方平言天圣景佑中与庆历官吏多寡方领吏部流内铨约在铨选人至以万计五六年间仅成一任又所养非所用仍旧不革恐数年间官滥不胜其弊其中枢密院自用兵以来权宜所置官请先裁罢从之方平又言范仲淹所请裁损弊法其臣僚恩例乞且依制为便若朝廷议论惟是之从不可以人废言也【仲淹时在外】七年春壬子羣牧制置使王贻永言羣牧司先因详定所减罢副使二员都监二员判官一员比来颇致阙事请自今以副使各一员都监判官各二员为定制从之三月河阳三城节度使同平章事判官大名府夏竦依前官充枢密使故事文臣自使相除枢密必纳节还旧官独竦不然【景佑八年王曾自天平节度使检校太尉同平章事为吏部尚书同平章事枢密使】乙未夏竦除平章制下谏官言竦与首相陈执中论议不合不可使共事丁酉贴麻改命己亥赐天章阁待制兼侍讲曾公亮三品服故事待制入谢未始赐服至是上御迺英面赐之仍宣谕曰即讲席赐卿盖所以尊宠儒臣也【公亮起居法当迁制诰以其避昌朝嫌故待制天章】戊午改文明殿学士为紫宸殿学士文明殿禁中已久无学士自程羽李昉后亦不除授而文明出真宗谥故改之用参政宋庠议也初置天章阁直学士位在龙圖直学士之下八年夏翰林侍读学士户部郎中知永兴军叶清臣为翰林学士权三司使咸平末并三部为使官轻者则为权使公事今再领三司当为使而又为权使中书误也自是遂分权使公事为两等初改文明殿学士为紫宸殿学士丁度罢政首以命之御史何郯言紫宸不可为官称五月乙巳诏改旧延英殿为观文殿仍改紫宸学士为观文殿学士班次如旧制癸亥赐王贻永李用和笏金带故事非二府大臣不赐惟张耆在枢密院兼侍中尝赐之

皇佑元年春贾昌朝为观文殿大学士判都省朝会班中书门下视其仪物观文殿置大学士自此始仍诏自今非常为宰相毋得除丁亥监察御史陈旭言三馆职事文儒之官选近时无复故典用人益轻遂为贵遊进取之津要庆历中常有诏旨云今后应见

任前任两省及夫两省以上官并不得陈乞子弟亲戚入馆阁职事然挠于横恩复寝不用美官清秩有国者所以厉世磨钝之具今委以私权贵之家天下寒俊何所勉进朝廷贤才何所教育望申明前勅严为科禁澄汰滥进必清其选使在位者皆得文行充实之人然后举用故事特因燕闲延备访问则于治体不为无益诏臣僚援例奏乞子孙得试者如试中只与转官或出身更不除馆阁【文正裁任子亦详】李若谷卒赠太子太傅后毋得为例以子淑在近侍己丑翰林侍读学士吏部郎中梁适为同羣牧使羣牧使旧止二员彭乘为之适盖员外置壬申观文殿大学士右仆射判都省贾昌朝复为山南东道节度使同平章事判郑州初除兼侍中昌朝固辞之使相旧无中谢之赐自昌朝始二年六月庚午诏举官为县令初提点京西刑狱张易官临满将代并举县令十六人上因谓辅臣曰县令与民最近故朕设保举之法今易所举猥多必以请托故也遂令裁定其数河北等路运使副岁举十二人提刑六人河东等路运使副十人提刑五人两浙使副四人提刑四人夔路使副四人提举三人洛发运制置使副六人府界提刑三人开封府诸州监军各一人仍止举所部官九月辛卯诏明堂礼毕并以袭衣金带器备鞍马赐夏竦王德用程琳李昭亮将相在外遇大礼有赐自此始八月御史知杂何郯知汉州将行上疏有云臣欲乞今后文武臣僚官序合每岁遇干元节得奏荐亲属之人除子孙依旧外替亲候再遇郊许奏一人如此等级裁减一年内可省入官数十人积年而计所省渐多则仕路之冗不澄汰而自清耳朝廷向来已曾更改资荫条制然而亲子孙亦以限年厘革是致人心嗟怨遂即复故臣今所请以荐奏疎数为等降皆缘人情人情于近亲则恩厚于疎属则恩薄今既许近臣依旧制其疎属止以年月为限不尽隔絶酌于众心计亦无怨惟圣明断而行之则官滥之源庶可以塞其边臣及路分各得恩例乞即仍旧如许行乞候遇今秋大享后为始【四年九月厘革旧制其后遂罢圣节奏补或自此始】冬十月甲子宗室八十七人并迁官旧制金吾卫大将军在左右卫大将军之上今有自金吾迁左右卫者盖中书失之也十一月诏后妃之家毋得除二府之职位三年二月权判户部勾院叶清臣言请遣使循行天下知民疾苦察吏能否与太学选置博士许公卿大臣子弟补学生童县令诸科举人取明大义责以义问省流外官无得入仕听武臣终三年之丧罢度僧废读经一业训兵练将谨出令简条约凡九事三月壬申诏开封府曹官赤县丞自今并除新改京官人任满与免远官初令铨司选差人一年无过例改京官岁久改京官者众皆革之【景佑三年三月令铨司差选人充曹官】夏四月御史中丞王举正言河北朝廷根本而雄州又河北咽喉先朝用人如何承矩守边累年官止边郡刺史李允则几二十年亦不过引进使今所用未尽得人而克日待迁使后有功者何勤且言在许州应天府六年更转运使十六人转运使所使察官吏能否与民疾苦而数易如此其能究宣朝廷德泽乎八月戊子诏判吏部南曹羣牧判官今自以朝臣历一任知州馆职一任通判为之即不得干托保荐及陈乞丁丑诏迹英阁讲读官当讲读者立侍敷对余皆赐坐侍于阁下天圣以前讲皆坐侍自景佑以来皆立侍至是帝屡面谕以经

史入讲须详悉询究卿等无乃烦倦否杨安国等进曰不敢至是有诏遂为永制翌日讲读官并奏谢教坊官王世昌陈年劳乞监永济仓门上曰世昌无行检遂罢此职且仓门乃国家储粮出纳之所岂可令此辈主之宜与在京一员令枢密使户部侍郎龔籍以本官为平章事昭文馆大学士监国史籍初入相且独员遽为昭文殿大学士监修国史殊拜非故事也四年五月诏国子直讲自今选通经有行实年四十以上者为之时御史梁旧言近日荐杨忱为学官忱年少轻肆不可用故有是诏忱楷子也九月甲辰诏今后文武臣僚每遇干元节合奏得亲属者除替服依旧外大功亲候遇郊许奏一名小功以下再遇郊许奏一名其每遇郊合得奏亲属者除子孙依旧外其余替亲候再遇郊许奏一名大功已下三遇郊许奏一名从御史中丞王举正与两制台谏等所定夺也二年二月诏太常寺置丞一员以近上知院官兼之專检视乐器即命同知礼院冯浩兼本寺丞太常有丞自此始也御史吴秘言乐器无主职之官而大理有员是为重刑法轻礼乐诏从秘言九月壬辰入内府都知延福宫使武信军留后王守忠为入内侍省都知谏官韩绛言宦官兼判二省国朝未有报御史俞希孟乞令更不除前后省都知不可【一传乞罢内省都知由神道碑其实守忠为两省都知如故】罢三司提举司勾当公事官从宰相陈执中所奏也【康定元年十二月置】

至和元年癸巳延福宫使武信军留后入内侍省都知王守忠罢延福宫为武信留后后毋得援例故事宦官本有真为留后者守忠有东宫旧恩数求之上亦欲与之先是高若讷为枢密使持不可故止及是守忠疾复求为节度使宰相梁适曰宦官无除真刺史者况于真节度使乎上曰朕尝许守忠矣适曰臣今日备位宰相明日除一内官为节度使臣虽死有余责御史中丞孙抃闻之亦奏疏力谏乃罢节度不除犹得真为留后翼日守忠卒吕公弼为枢密直学士知益州先是上每念夷简闻公弼有才书其名于殿柱公弼奏事上目送之语宰相曰公弼甚似其父既召程戡入辅因使公弼代戡公弼固辞乃复授龙图阁直学士同羣牧使权增一员后不为例八月戊午知制诰贾黯乞修起居注官入侍阁中事有可书随即记录从之赐坐于御坐而南诏自今将相迁拜见辞之礼令阁门以故事举行初知制诰韩绛言比年以来多失故事故降是诏秋癸亥起居舍人知制诰吕溱工部郎中知制诰兼侍讲史馆修撰王洙并为翰林学士故事翰林学士六员时杨察赵概杨伟胡宿欧阳修并为学士于是察加承旨溱及洙复同除学士洙盖第七员也壬申侍御史范师道言乞知谏官院及御史知杂如当擢用不许资任深浅并且令任三司副使候扬历三部方改授待制诏自今谏官及知杂御史除改旋取进旨二年十一月乙丑宣徽南院使吴育言臣前判尚书都省见其官司局灿然具存且如有大议论当下众官推定以质所长废不举今推定溢时一会都堂是行其小废其大论者深惜之欲随宜讲旧以渐复之则高拱无为之治可以驯致事下两制详定而言者谓尚书省职局今并入三司及诸司分领事难遽更乃罢之

嘉佑元年夏初龙图阁直学士李东之请定选举补荫之法下两制议孙抃等言今



二府使相宣徽节度使三年荫二人已减旧恩之半余文武官请一岁及三岁当任子者皆倍之内臣毋得过入嫔御皇族约此为法罢南省特奏名百官司入流如吏部格弗听减年或换武遂勅中书枢密院裁定于是诏见在二府使相宣徽节度使御史知杂悉罢大功亲再遇郊荫小功亲郎中带职员外郎初遇郊听荫子孙若再遇郊荫期亲四郊荫大功已下亲初该荫而遇郊荫大功以下亲初该荫二年六十无子听替亲皇族大功以上妻再遇郊亦听替亲科场取士以皇佑四年进士限四百人诸科毋得过其数罢南省特奏名百司入流必如吏部格毋得叙劳减年及换武余并依屡降条约自是减入流每岁毋虑三百员癸卯武康节度使知相州韩琦为工部尚书三司使唐制节度使纳节不降麻本朝丁谓自节度使为参政止舍人院命词今除琦三司使降麻非故事也二年夏四月己巳主客员外郎殿中侍御史里行吴中复为殿中侍御史充言事御史以中丞张升言本台阙言事御史乞除中复故也十二月癸丑诏大臣所举馆职自今令中书籍记姓名候在官员数稍少即选文行为众所推者与试其考校无得假借等第知谏院陈旭有请故也【皇佑元年六月二十六日亦如曾布言】三年春三月辛未翰林欧阳修言侍读最为亲近祖宗时不过一两人今与经筵者十四人侍读十人外议皆云经筵无坐处矣臣既辱在翰林又充史馆修撰太常礼仪秘阁秘书省尚书礼部刊修唐书兼职已多而经筵固不缺人忽蒙除授盖近年学士相承多兼此职朝廷以为成例不惜推恩外议则云学士俸薄特与添请遴选之清职遂同例授之冗员诏不许又言学士待制号为侍从之臣自祖宗以来尤所精择苟非清德美行蔼然众誉高文博士独出一时不得与其选是以选用至艰员数至少官以难得为贵人以得职为荣缙绅之望既隆则朝廷之体益重其后用人颇易员数渐多往时学士待制六七十员近年以来稍吝除拜犹四十余员臣谓爱惜名器不妄授人朝廷已知之为国计者亦宜及今创立经制今惟翰林学士中书舍人知制诰各有定员其余学士待制未有定数欲乞详定前史及国朝故事自观文殿大学士至待制并各立定员数遇有员数阙则精择贤士以充其选苟无其人尚可虚位如允臣所请乞赐详议施行【修疏附从违当考】夏四月癸亥右正言吴及言太宗朝常给三司判官御前印纸厯子令书课绩功业今其制虽存而无考校之法请以自今岁终按功过多寡而升黜之诏以及言录示三司使张方平四年夏四月丙子吏部郎中天章阁待制何郯同知通进银台司兼门下封驳事时封驳职久废郯上言本朝设此司实代给事中之职乞准王曾王嗣宗故事凡有诏勅并由银台司从之五月枢密使田况十上章求去位丙辰罢为尚书右丞提举景灵宫故事枢密使出入皆降麻自皇佑五年高若讷罢始舍人院降制今复失之六月太子中允王陶大理评事舍人院赵彦若国子博士傅卞于潜令孙洙并荐馆阁编校书籍官馆阁编校书籍自此始三馆秘阁凡八员诏及二年者选人京官除馆阁编校勘朝官除校理秋丙申太子中允王陶为监察御史里行初诏中丞韩绛举御史而限以资任屡举不应格于是绛请举里行以陶为之诏可陶辞不受诏强之乃就职十一月乙未天章阁待制钱象先卢士宗右司谏吴及定

夺该恩叙雪人自后每降赦即命官定夺事盖始此五年诏归明人二十五以上许注官徐济自陈八岁归明四十八不得注官因着此条秋宣徽南院使判延州程戡御史吕诲言本朝故事宣徽使非勲戚未尝除拜乞追寝知杂院御史范师道相继论列讫不从六年十一月辛未于潜令编校秘阁书籍孙洙为馆阁校勘从新制也编校二年得补从校自洙始七年夏壬申改命起居舍人知制诰兼侍讲司马光为天章阁待制先是光与吕公着并召试中书光已试而着终辞不除知制诰光乃自言拙于文词本当辞召初疑朝廷不许故龟勉从命继吕公着终辞得请臣始悔恨向者之不辞而妄意朝廷之不许也章九上卒改他官五月仍依本官知諫院

太平治迹统类卷二十九

●钦定四库全书

太平治迹统类卷三十

（宋）彭百川 撰

官制沿革下

神宗

治平四年诏同签书枢密院事郭逵赴阙【职官志云密院旧制无同签书院事者治平末始以郭逵为之太祖平蜀吕余庆以叅政签书院事自是非起幸无以执政守藩至逵以同签书密院事权判渭州上即位王陶言非例召逵归未几罢知郢州】乙巳置寶文阁学士待制着于令其恩赐依旧龙图阁例侍讲吕公着兼寶文阁学士知制诰邵必为寶文殿直学士先是公着与必同編集仁宗御集成藏寶文阁故因授此职乙亥御史张纪言近岁以来百司庶务多禀决于中书臣谓政府不当侵有司之职有司亦不当以细务汨政府若沟洫当决之都水监漕运决之三司其礼乐征伐号令损益自系朝廷议论有司得以奉行诏中书枢密应细务合归有司者条析以闻后中书具三十一事枢密院具六十二事皆归之有司吴申乞内外官以三年为任不得迁移

熙宁元年正月复命武臣提点刑狱官序内外官次自摯始九月中书奏选人俸薄不足以劝廉并增之诏建东西二府东府命宰相居之西府命枢密居之五年二月癸丑侍御史知杂事邓綰为龙图阁待制权御史中丞以待制权中丞自綰始三月富弼致仕仍复节度使同中书门下平章事带使相致仕自弼始中书言礼房修换官法各立条制右职换文资准此七月秘阁校理曾孝寬为起居舍人兼枢密都承旨旧用武臣以文臣兼领自孝寬始诏致仕官给日直二十人甲戌知青州赵抃为资政殿学士知成都府抃在青州踰年京东旱蝗飞及境輒遇风堕水而尽于是上欲移抃知成都或言前执政旧不差知成都王安石曰陛下特命之即差不可乃遣内侍赏赐召见劳之曰前此无自政府复知成都者卿能为朕行乎抃曰陛下宣言即勅命也顾岂有例上大悦六年三月诏提刑司置检法官一人【元丰元年罢六年复置】七年十二月庚辰诏修撰经义所吕陶顾临皆以白衣为修撰经义所检讨至是又以选人入中书习学行检正事中书五房

习学公事自今封三代并妻追封以王厚言王韶妻独亡不与封故也闰四月丙午诏自今知谏院令缀两省班时同知谏院范百禄缀两省班御史台止之百禄上言望诏有司裁为定式故有是诏八年十一月以苏颂干当三班院先是颂言尚书古之天台朝廷万事之本皆由此出仁宗朝大臣常移审官院归吏部三班院归兵部审官院归刑部庶稍近古制当时苟且惮作遂不果行请先置朝臣两员振举纲维俟其有序移审官等三院则南宫故事可举一代典章于是为盛后官制行如其言九年五月诏驸马自今改官及七年取旨【元丰之法始着为令】十年十月辛巳枢密院直学士给事中知定州薛向为工部侍郎即再任向辞所迁官降诏不允【见政刑门】讲官坐立【见学举门】七年新知大名府陈升之知枢密院事自判枢密置知院则当为副使者皆改同知院事若置使则同知院副改为副使于是文彦博吕公弼为使韩絳邵亢为副使上以升之三至西府故稍异其礼乃以为知院事枢密并置使副及知院自此始十二月吕公着言正侍中自国朝以来未曾降授如文彦博贾昌朝以节度枢密兼领至真拜则自范质赵普后惟丁谓冯拯韩琦以受遗宰相故有殊命置条例司【见安石门】二年三月陈襄兼起居舍人范纯仁直集贤院司修起居注上谓修起居注即知制诰欲令谏官兼修注遂用襄及纯仁起居注兼职自襄及纯仁始也十一月司马光请叙百官沿革公卿除拜作一録效汉百官公卿表诏从之诏百官用本资序即正言降一等官权发遣他準此尚书左丞知枢密院事陈升之为礼部尚书平章事集贤殿大学士本朝宰相有以侍郎为之者学士王珪当制以故事言故升之躡迁尚书丙午修定阁门仪制所言垂拱殿曲宴当直翰林学士等直学士并赴坐而翰林学士兼他职者不预盖国初惟有文明翰林枢密直学士故必令当直者以从简便今学士之名甚重皆得赴坐而翰林不当直者乃独不赴考之官制似未齐一乞自今曲宴并聴赴坐从之先是王安石言伏见馆阁一除乃至十人此本所以储公卿之才也陛下试求以为讲官为谏官监司则必知其谁可此患于不亲考试以实故也臣愿陛下察举众人所谓材良而行美可以为公卿召令三馆祇候事有当议者召至中书令且条奏则其人之贤不肖审矣上谓祇候之名不雅令安石别制美名于是用前永安县主簿邢恕为崇文院检书丙子诏自今提刑复差文武于是武臣宰习吏文多不足以察举所部人才及其才或可用为兵官而夺之以为此职皆非因人任使之意故悉罢之人甚以为便三月二日置宗正丞三员以张稚圭为之用王安石之言也丙辰翰林学士司马光知审官院诏自今中书枢密院宣勅札子带圣旨批状除机密外并送银台司封验以知通银台司范镇言门下封驳制校省审章奏纠举违制者三年四月壬申知青州欧阳修为宣徽南院使判太原府宣徽使自皇佑三年着令毋得过二员后富弼以宣徽使并修为三用弼例也知制诰宋敏求言中书李定除权监察御史里行词头伏以御史之官旧职须太常博士经两迁通判去岁骤用京官今又以幕职官便升朝着处纠绳之地臣恐勿循官制之旧未厌众议其词头未敢具草且以疾辞知制诰幕职官为御史里行【李定见安石门】五月癸卯上批近以李定权监察御史里行



知制诰李大临苏颂畧格命不下可并以本司归班先是宋敏求封还定词头诏送别颁官赏命颂辞诏再送舍人院次至大临大临亦封还既而安石进呈举御史新条若不拘职官高下并选人在其间则是秀州判官亦可以权里行不必更改中允也复诏颂依前降指挥撰诰颂执奏如初诏趣直舍人院蔡延庆等就职及责大临等延庆遂草定制既进草上奏乞罢之通进银台司命李定知谏院【见安石门直舍人兴国以后不复除上举旧制除延庆等李定辞】诏增置宫观管勾当或提举官时以诸臣歴监知州有衰老不任职者令与闲局王安石亦欲以处异者故增观员王直温权本路提点刑狱兼提举常平如故提点刑狱兼提举常平自直温始壬子诏罢入阁仪诏国家以两枢内辅赞翊本兵任为重矣而狃于旧制自古职升朝以上必兼择而除授之是以三公府而有司之为非所以寓朕股肱之意也今使臣增员至众非张官置吏以总其事则不足以一文武之法而励中外之材宜以审官东院别置审官西院差知院官两员专领阁门祇候以上置诸司磨勘常程差遣齐恢为知院韩缜同以太常礼院治所为审官西院其院归太常寺置局先是上论及大使臣磨勘及常程差遣欲付之三班王安石与韩絳以为不如置审官西院付之上即令置然未尝与枢密院议也及文彦博等对乃言其不便议者谓絳及安石協谋欲沮彦博且夺其权因建此议然先是大使臣差遣皆属枢密院无先后名次时人亦颇患其不平也八月东上阁门使李评为枢密都承旨承旨旧用阁门使以上或大将军其后专用枢密院吏而更用士人复自此始提举河北路常平等事王广廉言一县之事不以烦简唯令佐三员而主簿县尉所职各异苟事有谬误非所职者虽坐视其弊而莫得救止欲令有司專管勾稽簿书尉專管捕盜依旧外县事并令通管从之九月戊子朔中书言中书统治百官以佐天下政事而所置吏尚仍旧制谓宜高选士人稍依先王设弼置辅之意请检正中书五房公事二员并以朝廷充皇城使端州团练使知恩州李綬为枢密副都承旨用士人自綬始也己亥上命曾布朱温等共考试法官考试法官自此始翰林学士韩维等上文德殿朔望视朝仪以入阁旧图所载裁定增损之诏可二月诏逐路择未仕有经术行义者许权教授给俸选人学可为师者令充教授诏审官院定差知州军人并赴中书密具人堪任即引见取旨条例司言欲令诸路其属州繁剧县分户二万以上增置丞一员以幕职县令人充之四年四月太常博士李实太子中允馆阁校勘刘摯并为监察御史里行故事御史不带馆职充御史自事前执政辞官乃降诏两省降诏自此从向始也

元丰元年大理寺置卿一人少卿二人丞四人三年改国子监直讲为太学博士四月戊申御史台言奉诏复置六察察在京官司今请以吏部及审官东西院三班院等隶吏察户部三司及司农寺等隶兵察礼祠部及太常寺等隶礼察少府将作等隶工察从之庚申诏御史台六察案官二年为一任以所纠劾官稽违失职事多寡为殿最五月癸亥朔擢御史中丞李定请增置台主簿一员检点六察文字从之八月诏文武官无相统摄而官同序位以职职同以服色服色同以资序资序同以改官改官同以出身唐制文

选掌吏部武选兵部主之苏颂言欲文武一归吏部有四选之法九月乙亥详定官制所上以升易官寄禄新格中书令侍中同平章事为开府仪同三司左右仆射为特进吏部尚书为金紫光禄大夫五曹尚书为银青光禄大夫下至承务郎皆以次序改从之十二月甲子诏应迁官除授者并即寄禄官除大两省待制以上至太中大夫余至朝请大夫并通磨勘进士八年十年余一迁所理年月自降指挥日为始其大两省待制以上自通直郎至太中大夫磨勘理三年承务郎以上至朝请大夫理四年自如旧制四年八月罢中书堂选阙归吏部宇文昌言六察行于有司而不行二府是委大纲治节目不报十月诏自今除职事官而寄禄一品者为行下二品者为守下品为试品同者不同行守议十一月庚寅诏中书丁酉开天章阁进品官制除目诏中书检正官开府王震江陵吴雍入记圣语而授震雍左右仍使自书时人荣之既而议中辍诏枢密院置知院同知院而使副签书之名悉罢之先是将改官制议者欲废枢密归兵部上曰祖宗不以兵柄归有司专命官统之互相维制不可废也乃有是诏五年五月诏三公三师宰相执政司开府仪同三司节度使常任宰相者观文殿大学士以上金球文方团带佩鱼观文殿学士节度御史大夫中丞六曹尚书侍郎散骑常侍御仙花带内御史大夫六曹尚书翰林以上及资政殿学士特班翰林学士尚书者仍佩鱼二月旧吏户兵礼刑五房分掌至是厘为三省门下曰吏户礼兵刑工六房皆视其名主行之六曹之事又曰班簿曰开拆曰章奏曰制勅凡十库中书分吏户礼兵刑工班簿开拆制勅皆同门下而无章奏其后又增催驱点检凡十一尚书省分房吏户礼兵刑工开拆催驱制勅库亦同门下而又曰知杂房凡十置吏则有都事主事令史书令史等当官为枢密院旧为兵吏户部四房至是分房曰南北河西曰支差曰在京曰教阅曰广西曰兵籍曰民兵曰吏曰知杂凡十其后又增支马小吏二房而吏民名与三省同诏中书面奉圣旨事别黄纸书令侍郎舍人宣奉行讫录送门下为宣黄受批降若覆请得旨及入状得奏事别以黄纸亦书宣奉行讫录送门下为录黄枢密院准以白纸录送面得旨者为录白批奏得画者为画旨门下受录黄宣黄录白画旨皆留为底癸酉王珪依前官守尚书仆射兼门下侍郎蔡确依前官守尚书右仆射兼中书侍郎戊寅诏六曹尚书依翰林学士例六曹侍郎给事中依直学士例朝谢日不以行守权试并服佩鱼罢职除他官日不带行上尝论苏綽建复官制分为六曹体统如一至是令详定官制所以此意着为式三省言九寺二监分隶六曹欲申明行下上曰不可一寺一监职事或分属六曹岂可专有所隶宜曰九寺二监于六曹随事统属着为令上批自颁行官制以来内外大小诸官及创被差命之人凡有申禀公事日告留滞比之旧日中书稽延数倍众皆有不辨事之忧上以命今称缓语近臣颇悔改官制蔡确等虑上意遂欲罢之乃力陈新官制置禄比旧月省俸钱二万余贯上意遽止六月诏自今事不以大小并中书有取旨门下省覆奏尚书省施行三省同得旨事吏不带三省字是日辅臣有言中书省独取旨事体太重上曰三省体均中书省揆而议之门下省审而覆之尚书省承而行之苟有不当自可论奏不当沿此以乱政体也先是官制行虽依

旧三省之名而莫究其本省设官之初意乃厘中书门下为三各得取旨出命既纷然无统纪至是上一言遂定甲子详定官制所言尚书省左右仆射与左右丞签书盖朝廷以法在所司案法關奏稟候朝命而入主于有司之成务付之执政官所宜代上而任责则人主但闻之而已朝廷以天下事分六曹以治之都督以总之六察以察之六曹失职则都省所在纠察都省失纠则六察所在弹举上下相维各有职守则奏抄书都省执政官于理为当待制迁官以三年至是三年一迁六年三月王拱宸判大名以官制行罢宣徽使故也五月左右司郎中旧以执政分厅时开见白事日暮不徧或事急速又造歷私第设议互异则往返传送事多留壅摯以问吏吏对曰前时郎官愿如此摯乃白执政请都以堂聚时稟事可否面决无传言留壅之弊皆曰唯自是事皆公决上下便之然他郎官不敢问见报见执事私意亦无所授阴不乐者甚众摯罢去郎官复分厅白事如故七月吴雍直龙图阁河北路转运使兼措置余使都司除职自雍始九月起居郎蔡京言旧修起居注官二员不分左右故月轮一员修纂起居郎舍人分隶两省所以备左右史官则左当书动右当书言仍令旧制每月轮修盖其职事未之有别乞即自今起居郎舍人随左右分记言动如允所言其当厘正等事即别具陈从之上幸尚书省驻辇令厅头谓执政曰新省宏壮甚与官制相称王珪等对规摹制作皆出圣谟次至仆射厅又曰新省制作非苟而已卿等宜率励官属勉修职事既又召尚书侍郎以下随其曹问所以掌职事悉因勅曰朕所以待遇责任非轻宜各思自勉尽心职事及传诏尚书省执政官与正服内未仕者一人承务郎六曹都司吏部尚书至员外郎迁禄寄官一等赐吏各有差十二月外郎加勲依宗室法并自武骑尉使由法亦升朝官加勲内殿崇班内常侍赐勲并骑都尉始也上稽古董正治官既复尚书二十四司职事部作新省其规模区处详密曲折并出制旨裁定羣臣承诏督工作壮伟雄盛近世未有也由是三省枢密院位着官仪焕然一新矣七年二月丙戌诏御史台以侍御史知杂事为侍御史不带知杂事以言事为殿中侍御史六察官为监察御史恩数并如知杂事三月庚申诏御史中丞杂压六曹侍郎之上初元丰五年特行官制上于其中自为圖帖定未出先诏辅臣曰官制将行欲取新旧人两用之又曰御史大夫非司马光不可蔡确进曰国势方定愿少迟之王珪亦助确乃已及除光第四任提举崇福宫诏满三十个月即不候替人发来赴阙盖将复用光也

### 哲宗

元丰八年五月诏奉议郎吏部员外郎文及直龙图阁知文州以彦博乞免两镇节度使故有是命郎官除职自及始也七月吕公着言臣伏覩周官三公三少掌论道经邦寅亮天地然皆分治卿职盖进则坐而论道退则作而行之此三代之明法也国朝之制殿奏事止是枢密院两班昨来先帝修定官制凡除授臣僚及兴革废置先中书省取旨次门下省审覆次尚书省施行每省各为一班自元丰五年改官制政柄皆归中书省王珪以左相在门下拱手不复校王安礼每愤愤不平欲正其事而不能也公着被命未授



即为上陈之后遂诏应三省合取旨及台谏章奏并同进施行八月吏部郎中曾肇朝请郎礼部郎官林希兼著作职事官有兼职自此始

元佑元年二月诏起居郎舍人依旧制不分记言动先是起居郎蔡京言礼记虽有左史右史分记言动之文然歷代即无分言动故事但云事为春秋言为尚书今观尚书不免兼言动欲乞依旧制故有是诏闰二月诏自今观文殿学士资政殿大学士曾在执政官准此司马光言乞三司所管钱谷财用事有散在五曹及诸寺监者并乞收归本部如此则利权归一若更选用得人则天下之财庶几可理矣诏立天下钱谷通隶户部法罢诸路提举官【见宣仁门】三月诏职事官许带职其班序杂压依职事官内尚书非学士除者更不带待制官二年加直学士中丞侍郎给舍谏议非待制除者通及一年加待制集贤殿修撰直龙图阁直集贤院直秘阁集贤校已上职今后内外官并许带除职六月诏学士待制除侍郎并带职给谏例不带待制前来一年加待制二年加直学士指挥更勿施行八月苏辙言伏见旧法县尉皆用选人自近岁民贫多盗遂请重法地分县尉并用武夫自改法以来武夫贪暴骚扰乡村复为民人之患访闻凡用武夫县令民悉患之欲乞复令吏部依旧只差选人诏除沿边县尉依旧外余并差选人苏辙又言祖宗之世使相节度不领京师局其奉朝请必改他官或为东宫三司或为诸位大将军太平兴国中以赵普元勳自河阳还朝止为太子少保以向洪张永德之旧并为环卫至今诸道钤辖总管以防团归老者亦诸卫处之盖其遗法也近日李宪以宣州观察使提举明道宫王正中以嘉州团练使提举太极观二人贪墨骄横败军失律罪恶山积虽死有余责圣恩宽贷皆置之善地而又首乱国宪假以使名宜考修制度追还误恩以存旧典十一月王岩叟言中书舍人在近臣中为高选未行官制以前谓之知制诰専行诰辞不预政事自改官制遂为中书属官分押制勅凡国之政令无一不预故中书舍人不独取文学须兼责政事近除刘□称为得人御史吕陶言舍人曾肇操履偏诐艺文浅薄今乃擢居西掖尤骇羣聽夫中书舍人之职职清地峻非他官可拟外则典司诰命以文章议论润色帝猷内则分押诸房以知识才虑参决机政前世推重谓之宰相判官岂可因其序迁辄尔虚授十二月诏少府将坐军器监都水使者今后在七寺少卿之上监丞在台寺主簿之上二年正月以盛侨为国子司业向止一员今增其一侨与黄隱并为之五月诏同知枢密院范纯仁于尚书左右丞理先降除授者立班在上先是神宗正名以官职为次不以除授为先后于是特降新制三年诏自今朝议中散正议光禄银青金紫大夫并置左右十月复置南北院宣徽使仪品恩数如旧制十一月诏左右中散大夫以上十员左右谏议大夫以五十员为额十二月置六曹尚书权官俸赐依六曹侍郎守法叙班在试尚书之下四年十月诏复置外都水使者今河北转运使兼领殿中侍御史孙升言先帝患百司职事不举故建三省六曹以治庶政然人乐因循众习苟且弊随事生苟无按核钩考之术则必至于颓壞又置六察考察六曹行遣稽违及轮御史检点三省簿书差失可谓详且尽矣盖六曹寺监二百四十余案胥吏一千七百余入其它官司二百七十

处内外之事填迭纷纭而旧以察官六员书吏十有四人钩考案核非人人心力强明智术精敏安能周见其故而六曹百司之事不至于颓败者赖有六察以为之警策耳兹所以见先帝规模宏远追踪三代也朝廷近年察官既不补足矣此因浮费所建言更不自本台立法自行减免书吏六人止存八人分治六察吏员既少则所择尤须精审且以八人按察二百余案千有余人胥吏二百余官司而又吏不精所择止欲名存实亡则可矣必欲究六曹之弊成先帝之志则臣虽至愚知其无益也伏乞圣慈详察深惜六察乃先帝救补六曹颓败之志特降指挥下中书省重行立法中外幸甚刘安世言安焘今以仲夏去职密院惟有赵瞻恐不可全然缺官乞依故事令宰相兼枢密范祖禹荐冯京赵高可任八月先是司马康奏其父光遗藁其一乞合中书门下两省为一盖司马与吕公着韩维张璪同具奏曰唐初始合中书门下之职故有同中书门下三品同中书门下平章事其后又置政事堂盖以中书出诏令门下掌封驳日有争论纷纭不决故使两省先于政事堂议定然后奏闻开元中张说奏改政事堂为中书门下自是相承至于国朝莫之能改神宗皇帝以唐自中叶以后官职烦冗名器紊乱欲革而正之诚为至当然但当据今日之事实考前世之讹谬删其重复去其冗长必有此事乃置此官不必一依唐之六典分中书为三省令中书取旨门下覆奏尚书施行凡内降文书及诸处所上奏状申状至门下中书省者大率皆送尚书省下六曹付诸案勘当检寻文字会问事节近则寺监远则州郡一切齐足然后相度事理定夺归着申尚书省送中书取旨中书既得旨送门下省覆奏画可然后翻录下尚书省尚书省复下六曹方得符下诸处以此文字烦冗行遣迂回近者数月远者踰年未能结绝或四方急奏待报或吏民词讼求决皆困于留滞又置门下省欲以封驳中书省录黄枢密院录白恐有未当若令举职则须日有驳正争论纷纭执政大臣遂成不协故自置门下省以来驳议甚少又门下不得直取旨行下虽有驳议必须却送中书省取旨中书或不舍前见复行改易又内批文字及诸处奏请多降付三省同共进呈则门下之官已经商量奏决若覆有驳正则为反复又近日中书文字有急速者往往更不送门下省然门下一官特为虚设徒使吏员倍多文字烦冗无益于事臣等今众共商量欲乞依旧令中书门下通同职业以都堂为政事堂每有政事差除及谏官章奏已有圣旨三省同进呈外其余并令中书门下官同商议签书施行事大则进呈取降敕札事小则直批状指挥一如旧日中书门下故事其二乞令六曹长官古之六卿事之小者岂可令专达臣等商议欲乞今后凡有诏令降行尚书省仆射左右丞签讫亦分付六曹本曹尚书侍郎及本厅郎官次第签讫委本厅郎官讨寻公案会问事节相度道理检详条贯下笔判云今欲何如施行次第通呈侍郎尚书若郎官所判已得允当则侍郎签过判准应奏者直奏上应行下者直行下即未得允当者委侍郎尚书改判事之可否者决于本曹长官其文字分付本厅郎官之时委本曹长官随事大小作限若有稽迟即行纠劾若委的有事故结绝未得者申长官展限吏部尚书如旧日判东西审官院左选侍郎如旧日判流内铨右选侍郎如旧日判三班院户部长官如旧日三司

使刑部如旧日审刑院旧日本司文字止直奏直下今欲令六曹长官准此更不经由仆射左右丞郎更改条法或奏乞特旨谓如刑部刑名疑虑或情理可悯或情重法轻特免停替编配之类或事体浩大或理有可疑非六曹所能决者听诣仆射左右丞咨目或具状申都省委仆射左右丞商议或上殿取旨或头签札子奏闻或入熟状或批判指挥其诸色人词状并只经本曹长官呈过尚书侍郎本厅郎官次第签判押判决一如朝廷降下臣民所上札子次第施行若六曹不为收接及久不结绝或判断不当即令登闻鼓院进状降下尚书省仆射左右丞判付本省不于狱官员看详定夺若显有不当即行纠劾所贵上下相承各有职分行遣简径事务办集十一月三省言寄禄官分左右两等进士出身皆左字余人皆右字诏从之五年九月复置集贤学士苏辙言今日监察御史久缺四员恐非治世之事唐置御史属官皆自举本朝以耳目之官不欲执政用私人以防壅蔽今乞稍改近制今台官次第二任知县人不至执政自用台官六年四月杨畏为殿中侍御史时吕大防刘摯各有异志欲得畏为助赵君锡荐畏实摯风旨也畏卒助大防击摯云六月诏国史院置修撰官二员内长官兼知院事闰八月集贤院学士自官制行不复除至此李周始为之寻诏集贤院学士如曾任权侍郎以上人充者班列在大中大夫上七年十二月诏六察案复置监察御史三员分领先是元丰八年冬减监察二员令殿中侍御史兼领而察官亦许言事至是复之太常言本朝因唐之旧以御史为监察使轮知太常礼院监礼近来以博士为献官遂罢监礼惟御史专视礼事御史缺官则无所督察乞以博士监礼从之八年三月侍讲学士范祖禹为翰林学士祖禹言冯京除侍讲学士后为翰林学士不兼侍读司马光吕公着以翰林学士兼侍读叔祖镇以翰林学士兼侍读皆不兼学士之职臣不期岁得两学士有所未安臣当辞免六月尚书左丞梁焘同醴泉观使故事非宰相不除使乃置同使之名使焘领之

绍圣元年三月来之邵言集贤院学士立班杂压在中散大夫上二年常安民言修立权侍郎迁徙法三省应奏权侍郎自起居郎起居舍人侍御及尝修撰除者满二年取旨除正给舍言寄禄法分左右辖细转法者未尽合行究补乞存此三等分左右禁并废罢从之四月诏职事官罢带职非职官仍旧带易集贤院为殿直院为直秘阁集贤校理三年四月宣徽使因官制废罢以事分隶省寺元佑三年复置并无所治之事诏罢宣徽使四年十二月陈次升为御史章惇蔡卞令颜林致悃曰若相助何患不得美官次升曰知守官而已卿乃为执政风旨耶他日曾布谓上曰次升每事与执政为敌上曰诚无所附丽

元符元年十二月诏元佑复置翰林侍读侍讲学士指挥更不施行

徽宗

大观二年右正言蔡居厚以谏省独员言臣专任言责闻见单寡乞更授两员以广言路五月诏中书舍人谏议大夫制系红犀带不佩鱼

崇宁三年故事起居郎并舍人视外朝则对置若燕朝轮日舍人林摯曰上谓对书



言动不应以内外朝异例从之

政和元年十一月旧制文臣借绯紫皆不佩鱼王诏言监司守位不佩鱼与例无别诏始许佩鱼二年六月复置宫观官及增置县以前减冗员罢故也九月诏以太师太傅太保为三公少师少傅少保为三孤又以左右辅弼太宰少宰易侍中中书令左右仆射之名又诏武选官称以通侍王侍中亮中卫拱卫左武右武大夫至下班祇应以阶易名四年诏武横行增置大夫通旧为十三阶郎亦如之宣和七年诏依元丰制复置尚书令虚而弗除三公但为阶官无得令三省

钦宗

靖康元年诏台谏官当出亲擢不用丞相荐人立为定制罢廉访使者复走马承受十一月依元丰制改太宰少宰复为左右仆射

兵制损益

太祖

建隆二年五月甲戌诏令殿前侍卫司及诸州长史部兵骁勇者升其籍老弱怯懦者去之初置剩员以处退兵十一月周广顺初镇州诸县十户才勇者一人为弓箭手余九人资以器械刍粮是岁诏释之凡一千四百人【此据两朝兵志】三年七月先是云捷军事有伪刻侍卫司印者捕得斩之上曰诸州军比加简练尚如此不逞耶庚辰命搜索悉配海岛于是奸猾敛迹十一月甲子又大阅于西郊上谓近臣曰晋汉以来卫士不下数十万然可用者极宽朕须按籍而阅之去其冗弱又亲校其击刺骑射之艺令悉为精锐故顺时令而讲武焉十二月诏自万户至千户各置弓手有差从赵普言复置县尉故也

干德元年春正月乙卯遣使九人选关西道乡兵付庆州戊午遣卢懷忠毡球使洛阳张继勳染院副使康延泽等帅步骑数千人并赴襄州夏四月庚寅出内府钱募诸军子弟数千人凿池以诸民门下引蔡水注之造楼船百艘选卒号水虎捷习战池中命右武统军承陈照董其役三年八月戊戌朔令天下长吏择本道兵骁勇者籍其名送都下以补禁旅之缺又选强壮卒定为兵样分送诸道其后又以木挺为高下之等给散诸州军委长吏监寺召募教习俟其精练即送都下上每御便殿亲临试之用赵普之言也九月己巳上御讲武殿阅诸道兵得万余人以马军为骁雄为雄武并属侍卫司

开宝四年十一月己未初上择伪蜀亲兵习弓马者百余辈为十班内殿直禀赐优给与御马直等于是郊礼毕行上以御马直扈从特命增给钱人五千而川班内殿直不得如川例乃相率击登闻鼓陈乞上怒遣中书谓之曰朕之所与即为恩泽又安有例哉命斩其妄诉者四十余人余悉配隶许州骁捷军其都校皆决杖降职遂废其班时内臣有左飞龙使李承进者逮事后唐上问曰莊宗以英武定中原享国不久何也承进曰莊宗好畋猎务姑息将士每出次迎郊禁兵卫卒必控马首告儿郎辈寒冷望与捋接莊宗即随其所欲给之如此非一失于禁职而作乱盖威令不行实赏赉无节也上抚髀叹曰

二十年夹河战争取得天下不能用军法约束此辈纵其无厌之求以兹临御诚谓儿戏朕今抚养士卒固不吝惜爵赏苟一有犯吾令惟有剑刑以诛之耳置静江军【见广南门】

### 太宗

太平兴国二年春正月庚辰诏以美名易禁军旧号铁骑曰日骑控鹤曰天武龙骑曰龙卫虎捷曰虎卫九月上属意戎事每罢朝即于便殿或后苑亲阅禁卒取伉健者隶亲军罢软老弱悉分配外州自是藩卫之士益以精强崔翰分布士伍南北绵亘二十里建五色旗以号令将卒望其所举为进退之节每按旗指纵则千乘万骑周旋如一甲兵之盛近代无比上甚悦即遣中使密以金带赐翰谓之曰此朕藩邸时所服者也因谓左右曰若崔翰者必不事晋朝矣盖言晋朝将帅多不得其人军政隳紊故也八年春正月上念征伐劳苦月赐沿边士卒白金军中谓之月头银【曹彬罢因此后上遂无复赐】曹彬以乡民为兵【见契丹门】六月改日骑曰捧日上以契丹入寇遣使诸州选丁壮为义军

淳化五年八月命左右卫各置卒千人上以京师六卫巡警用禁兵非旧制也

至道元年十一月己未阅武于便殿卫士有挽弓及一石五斗者矣二十发而绰有余力因谓近臣曰方今寰宇无事美才间出悉在吾彀中矣又令骑兵步兵数百东西列阵强弩视其进退发矢如一容止中节上曰此殿廷间数百人尔犹兵威可观况堂堂之阵数万列成者三年八月江淮发运使杨允恭捕贩私盐贼三十九人上曰可团为一军以备舟楫之役号曰平河

### 真宗

咸平元年上以御龙直二百余人阅试武艺二年闰三月京西转运副使朱台符上疏曰臣愚以为不任人无以安边不安边无以省兵不省兵无以惜费不惜费无以宽民不宽民无以致治舍此数事虽有智者不能为计矣奏入优诏褒答三年甲子诸军校以次选补多自陈其劳绩马步军都头呼延赞独进曰臣月俸百千所用不及半忝幸多矣自念无以报国不敢望升擢诚恐福过灾生拜赐而退众颇嘉其知分十二月河北河东强壮自五代时瀛霸诸州已有之是岁始诏籍河北民为强壮所在置籍择善射者第补校长听自置马胜甲者蠲其户役寻募其勇敢团结附大军为栅官给铠甲四年九月庚寅诏陕西民家出一丁号保毅军给资粮与正兵分戍守城屡遣御史吴倩与转运使同主其事凡得六万八千七百九十五人其沿边军士先选中者并升为禁军号保捷吴升上言请复古车战之法及车战之利上纳之五年命萧延皓毅命可以捕贼守隘立为广捷军六年三月御史田锡言国家为缺少军兵遂于曹单等州点集乡村强壮之士拣选为兵初令本城防守后乃抽赴京师非曰失信颇属妨农四月先是京师发禁旅于河东其数不足则补以州兵十不得二三至是帅臣请补如旧制于是命张延拣义军一万三千人立为神锐二十四指挥神虎十指挥常加训习以补戍河东之缺九月募近京强壮

补禁卫诏高琼教阅行伍整肃召近臣观之上喜因谓琼曰昨日村民今皆为精兵矣

景德元年秋七月戊子陕西转运使言西面沿边诸州于保义军内拣集成振武军四十指挥上曰数年前贼围灵州诸路请援兵曾无虚日乃议立此军朕询于知兵及详练边事者皆云自立此军边声颇振戎人畏惧不敢为寇矣二年三月安阳人陈贯喜言兵上论三篇大畧言禁旅当以卫京师不当戍边戍边莫若募土人隶本军籍民为定府兵使北兵扞狄西兵扞獯至是知镇戎曹玮言应募为弓箭手者请给以闲田蠲其租春秋耕敛出兵护作诏从之仍置巡检以统之其后河东亦募置四年夏四月辛未上曰比河东召募土人为军以至契丹未平今边防罢警乃诏以见存为定额缺则补之

大中祥符六年诏令江淮习水战于金明池按城立为虎翼水军以太祖神卫水军久废故也干兴元年国朝亲兵摠三司殿前司捧日军天武军马军司龙卫军步军司神卫军谓之上四军军各左右厢厢各三军一军各有指挥使王沂上言二边屯重兵耗国用乞以河北强壮代禁军以节冗兵耕屯田以省国用

### 仁宗

宝元二年闰十二月以西讨元昊夏竦请增置土兵易戍兵东归言东兵五害土兵五利杨偕上言与始终论辨竦议竟屈康定元年吴遵路常建议复民兵于是诏遵路籍河东乡下为备边仍下其法于诸路九月乙丑诏河北河东路强壮陕西京西东路新置弓手皆以三十五人为团置押官四团为都置正副都头各一人五都为指挥使各以阶级伏事年二十系籍六十免取家人或他户代之聽私置弓弩每岁十月后正月前分番上州教阅半月即遣归农或遇归时勾集守城及捕盗日给粮二升岁正月县以籍上州州以籍奏兵部按举不如法者庆历元年二月诏京东西淮南两浙江南东西荆湖南北路招置宣毅军大州两指挥小州一指挥惟陕西仍故号为保捷两河强壮虽别名义勇亦有隶宣毅者初募额外弓手著作佐郎通判睦州张方平奏利害八事方平所议如此然当时不能尽用也四月田况上兵策十策七曰蕃落广銳振武保捷皆是土兵材力伉捷武艺精强战斗常为士卒先自昊贼扰近以来惟土兵踊跃志在争功其如请给甚口不及东军之下者振武料钱五百而五十为折支积岁月一支又皆糜败不堪之物如新添虎翼军目南中选填材质绵弱白云不知战斗见贼恐死闻者皆以为笑朝廷特塞数为民而已若曰添土兵请给事恐难行请遇特支比常优加其数或别定南郊赏例以激其心则其立功必不在东军之后矣八曰沿边屯戍骑兵军额高者无如龙卫闻其有不能被甲上马者况骁胜宣武之类驰走挽弓不过五六斗每教射习望空发箭马前一十二步即以墮地以贼甲之坚纵使能中亦不能入况未能中之请密料边兵益步卒而减骑军但五分得一足矣西北边皆有蕃兵蕃兵者塞下内属诸部落团结以为藩篱之兵也于是王尧臣建言请遣人募首领愿効用者籍姓名并士马之数及千人聽自推其谋勇者一人授以班行及巡检之名使将领出境破荡生户所获财蓄官勿检核得首级及伤者给以赏物仍依本族职名补迁及增俸钱诏如所请十二月韩琦请诸路部署许



置亲兵百五十人钤辖都监各置百人仍日给钱二千冬诏知秦州韩琦常奏本路兵备素少请益军马诏琦详度以点到弓手选其少壮刺手或为保毅弓箭手或别立名额速具利害以闻诏从琦请简峡西弓手悉刺面充保捷指挥是时西邊用兵诸州保教军总六千五百十八人河东河北义勇当庆歷初河北总十八万九千二百三十人河东总七万七千七百七十九人皆简强壮并钞民丁涅手背为之三年九月仁宗开天章阁富弼范仲淹召对陈十事其七修武备请密委两地以京畿在军马约唐之法召募强壮之人使三时务农大省给贍之费一时教战自可防虞外患置万胜军【见安畧门】六年秋七月三司使王拱宸言三朝兵数【见用度门】十年十二月三司使张方平言陕西用兵以来内外所增禁军约四十余万人又言太祖备边所畜兵不及十五万太宗亦不过四十万先是咸平中备西北募士至五十余万因夏戎阻命始籍民兵俄命刺以补军籍凡内外置禁军约四十二万余人通三朝旧兵且百万乡军义勇州郡厢军诸军小分剩员等不列于数八年三月方平条对手诏时政言亲卫之兵臣按周官虎贲士掌守王宫皆士也赵左师触鬻托其子于太后愿补黑衣之缺以卫王宫盖王宫之卫兼用卿大夫之子弟也秦汉宿卫之士选材武必取端愿之士以其近尊不可不审国初宿卫募置游惰无根蒂者乞于诸班中选其年劳久次者东西下班殿侍又有门阀家业者勗立保委之法选取以充殿内之卫又言太祖训齐军法甚严军人不得衣皂但许衣褐其制不得过膝岂有红紫之服葱韭不得入营门岂知鱼肉之味又制更戍之法远妻孥外戍之日多人人少子而衣食易足每月请粮营在城西者即于城东支营在城东者即于城西支不许雇车乘须令以负以劳役之故士卒衣食无外慕安辛苦而易使天圣中上言东西仓互给军食固欲邀求军人不知乃太祖之法今则异矣衣服骄侈所受廩给一身不足所有妻子争得不冻饥岂能不归怨于上耶如帅臣自能节约以身率之则军人庶乎可以存济矣皇佑四年三月包拯建议罢河北屯兵分之河南如谓戍兵不可遽减则训练义勇以壮边备虽小给糒粮每岁不当屯兵一月之费朝廷难之于是复奏分屯事讫不行【拯欲旧沿边州军兵马除防守备留外其屯驻驻泊诸军悉令归营就粮遇有警实时起数不旬日可到】以郭■〈言恣〉所制独辕弩募土兵教之既成经畧使夏安期言其便乃诏置独弩军

嘉佑四年三月有上封事论议义勇爲河北伏兵以为古者农兵一体有事则习于战阵无事则散归甲里以时讲习无待储廩今河北义勇军是也惜其居于列郡但爲守城之备而已朝廷下其章河北帅臣等议曰河北河东皆边塞之地自置义勇州县以时按阅耳目已熟行固无疑诏从之七年六月初自庆歷以来乃总二百二十五万而禁军八十二万视祖宗时募兵浸多至是韩琦请乞量岁入钱帛之数立爲定额诏中书枢密掇其制裁爲定额

英宗

治平元年宰相韩琦建议刺陕西义勇总十五万六千八百七十三人【贾録云十

三万八千四百六十五人】司马光极言其不可琦言今之兵贵先声后实今谅祚方  
■〈舛上马下〉警使陕西骤益二十万兵岂不震惧光曰可以欺之于一时少缓则敌  
知其情宁无惧乎琦不能答复曰君但见庆历间陕西乡兵初刺手背后刺面充正军忧  
今复然耳今已降刺榜与民约永不充军戍边矣吾在此君无忧此语之不信光曰相公  
在此可也万一均逸偃藩他人在此因相公见戍之兵遣使运粮戍边率以为常矣二年  
十二月是岁兵数少损隶籍者犹百十六万三年四月诏河北战兵三十万一千余人陕  
西战兵四十五万九百余人并义勇令本路都总管常加训练时边臣或奏请增兵朝廷  
以为兵数不少故降是诏四年张方平言国计以为冗兵最今日大患计禁军一人岁约  
五十千十万人岁费五百万缗庆历之数此景佑已前增置八百六十余指挥四十余万  
人是岁增费二千万缗也八月殿前马步军司言诸路指挥所管军士不及元额军负数  
多欲自今除三年一次转运负军分依旧外余以实管军立数推定军负额第迁补并通  
管五都从之是总治平之兵一百六万二千而禁军步骑六十六万三千校庆历之籍减  
几十万校开宝之籍增至七十万二千

### 神宗

熙宁元年二月赵高言绥州不可弃劝郭逵招集降羌逵从之运丹州粟以给降羌  
人日三升逵因选其强壮千余人刺为兵余丁皆刺忠勇字使不得逃回丙申枢密使吕  
公弼请以河北义勇每指挥拣少壮人材武艺取旨手刺上等二军之议九月上曰朕尝  
问王存以兵费乃言臣不曾讲兵书因问安石如何省兵安石曰陛下今欲省兵当择边  
将人材以一州令各自精练仍鼓舞其州民使各习勇则兵可省闰十二月上问府兵之  
制曰府兵与租庸调法相须安石曰今上番者即以衣粮给之则无贫富可以入卫出戍  
虽未有租庸调法亦可为也但义勇今既以良民为之即当以礼义奖养又择其乡闾首  
杰为之将校量加奖拔则人自悦服今募兵宿卫乃有积官至刺史防团者移此与彼固  
无不可今募兵出于无赖之人尚可以为军厢主则近臣以上岂可不及此辈此乃先王  
成法社稷之长计也上极以为然上论及边兵已不足以守虽费衣粮然又不可减安石  
曰今若更减则诚无以待缓急不减则财费困国无有已时若不能治兵稍复古制则中  
国决无富强之理上因言义勇可使分为四番出戍吕公弼曰须先省得募兵乃议此安  
石曰计每岁募兵所死亡之数乃以义勇补之可也上因问府兵事安石曰府兵处处可  
为又可令入卫公弼曰韩绛文彦博皆以入卫为难兵部上陕西河北河东二十六郡旧  
籍十五万三千四百益以环庆延州保毅弓箭手三千八百总十五万六千八百为指挥  
三百二十一河北三十三郡旧籍十八万九千二百今籍十八万六千四百为指挥四百  
三十而河东二十郡自字量免户下支移折变别团会教阅依旧日放散并给口食又自  
出伦者听籍候有阙收补从之诏淮南等路委长吏兵官选少壮厢军堪习武艺者依列  
教阅团结量免难工役常留在城以备使四月张田在桂州踰二年朝廷自智高乱遣兵  
戍岭南多病瘴田尽索土丁峒兵教以兵法奏请罢戍兵十二月诏京武卫四十二指

挥并分隶河北总管司先是此军未备河北戍守近岁分屯诸路朝廷将减缘边士兵以省三司馈饷故有是诏二年春正月乙酉枢密院进呈减住营兵数且祖宗朝北戍无警即便罢兵今既讲和而屯兵至多徒耗钱帛韩绛曰朝廷须修法度爱惜财帛乃能休息生灵一人独俭未足成化陈升之曰以议暗消本路乞兵于京东招补亦将有序不数年可见效矣上曰卿等可议以闻枢密院言厢军近以团结教阅武艺欲结威边指挥请受以州军大小定人数自三百人至百人仍改军额淮南曰壮武江南曰雄武荆湖曰静江两浙曰崇节福建曰保节并加教阅二字于军额上从之三年冬十月先是陈升之建议卫兵四十已上不中程曰量减请受从之淮南吕公弼言事体甚大难遽行也曾公亮曰为当有渐王安石曰执政叶心不扇摇人情自无事陈荐言禁兵在京师祖宗之制重内轻外人情安习一旦去国客食江淮非所以安之也宜如旧从之卒罢退庆历后总七万七千为指挥一百五十凡三路义勇之兵总四十二万余三千五百人河东陕西弓箭手数河东七千五百今籍七千陕西十郡并旧寨籍四万六千三百唯秦凤有寨户后义勇浸息联以为保甲云三月诏并龙猛八指挥为六旧三百五十人额今以三百人为额自康定庆历以来诸军间有併废至熙宁初大整军额有就而合者从併省之后部伍齐肃无有名存而实缺者也三年王安石进言义勇教教阅事时士兵有缺诏募三千人旋湊以义勇虽训练以时而未施于征防可按府兵遗法俾之番代诏复问以措置远近分番之法挺即条上以四州义勇分三番番三千人防秋周而复始募士兵岁减量八万硕料钱六千余缗冬春衣布五千疋绵三万七千两诏从之行之诸路冬十月乙酉渭州言职罢保毅应役上令一名纳钱三千令总平凉等县状保毅元置年深多非本户正丁并各贫下乞免纳粮依旧给修诸役初咸平五年因西路用兵遣侍御史吴应与陕西转运使阅沿边民丁壮得六万八千七百人号保毅军至治平中刺陕西义勇乃令环庆路保毅并拨为义勇三年薛向等言两路保毅并于地畝上科差岁久日有租名初无正丁皆是临时众户依地畝合钱雇佣充役宜尽免保毅应役止令输钱少备修城至是民以为不便又令损其数十二月己未内出开封府界及诸路兵更戍之法己巳文彦博等上在京开封府界及京东等路禁军数上亦自内出治平中兵数相参照顾问久之遂照殿前司虎翼除水军一指挥外存六十指挥各以五百人为额总计三万四百人在京增广义勇五指挥共二千人开封府界定六万二千人在京东五万一千二百人两浙四千人江东五千二百人江西六千八百人湖南八千三百人湖北八千三百人福建四千五百人广南东西各一千二百人川陕三路共四千四百人为额其河北以人数尚多须后议之四年二月庚午止批殿前马步军司差发余兵数不多京师本根之重于理非便其治平四年熙宁元年差出之兵可契勘抽回夏四月安石欲变宿卫【见安石门】九月丙戌诏今后广南东路西路士兵抢手邕州洞丁荆湖南北路土丁弩手夔州路义勇军编写成册年终奏知封州邓中玄请以广东未置抢手州县如广惠等五郡皆置从之十一月提点诸路县镇司前言诸县兵级弓手有武艺精者遇按月请如保甲量给赏从之十二月



枢密院诸路厢军额猥多自骑射至牢城其名凡二十三总天下厢兵马步指挥凡八百四十其为兵凡二十二万七千六百二十七人而府界及诸司或因事募兵之额不与焉五年正月先是曾孝宽为王安石言有军士深诋朝廷尤以移併营房为不便或言自连阴如此正是造反时安石具以白上文彦博曰近日朝廷多更张人情汹汹非一安石曰朝廷事合更张岂可因循如併营事亦合如此此辈乃敢纷纭公肆诋毁诚无忌惮至言欲造反悉须审察吴充曰併营事已久人习熟何縁有此近来惟保甲事人情不安【保甲民有为匿名书安石大怒乃出钱五百千以捕为书者□□民有偶语者曰农事方□□而驰我阅武非斩王相我辈不得休息遛者得之付□安石意为匿名书者必此人也使锻炼成狱民不胜擄掠而终不服林希云开封推官乐湜叟在府不及一岁凡论议时事及诟安石者一十余狱】夏五月辛丑命校书王安礼编修三路义勇条贯八月庚子上论太宗时用兵多作大小卷付将帅御其进退不如太祖时王安石曰太祖知将帅情状故能得其心力如言郭进反乃以其人送郭进此知郭进非反也故如此与唐德宗送言李琦反者与琦异矣其后郭进乃为奸人所陷至自杀伤业亦为奸人所陷不得其死将帅尽力者乃如此非中御之失而已冯京曰河北义勇十八万自足何须作弓箭壮安石河北义勇收入户下尽河北有许多地许多人只令十八万人习兵为义勇而不可令尽习兵当如今府界保法修定六年冬戎泸州江安县各置武宁军一指挥以四百人为额上曰并裁军营凡省军员四千余人此十万军之资也若训练既精人得其用不惟胜敌兼亦省财王安石等曰累岁以来陛下选用使臣专令训练间御便殿躬亲试阅赏罚既分者谓之屯驻非戍诸州而隶于总管司谓之驻泊非屯驻驻泊而以余贱留便廩给谓之就粮诸司募者曰役兵诸州募者曰本城厢兵教阅者为教阅厢兵蕃夷内附纠合其人而用之者蕃汉兵什五其民而教之武事曰民兵熙宁元丰之间兵制大备矣【此兵悉首篇新叙今掇取附见】凡禁军俸钱千为上军五百以上为中军以下为下军其赏罚迁叙视此为等其政令掌于枢密院岁以秋月校其艺能而赏劝之熙宁之籍天下禁军凡五十六万八千六百八十八人元丰之籍六十一万二千二百四十三人初上即位总治平之兵一百十六万二千而禁军步骑六十六万三千庆歴之籍增至七十万二千上患冗邦用不继始议减併乃亲制选练修饰武备之法甚众一日顾谓辅臣曰前世为乱者无赖不逞之人艺祖平定天下悉招聚之刺以为兵连营以居什伍相制节以军法厚禄其长使自爱重付以生杀寓威于阶级之间使不得动既无敢为非取其力以卫养良民俾各安田里所以太平之业定而无叛民自古未有及此者艺祖养兵止二十万余诸道十万余使京师之兵足以制诸道则无外乱合诸道之兵足以当京师则无内变内外相制无偏重之患天下承平百有余年盖本于此初上欲省兵王安石对曰拣练募兵而鼓舞三路之民习则兵可省其后遂什伍畿甸之民以为保甲诸路亦可以推行元丰中义勇保甲遂上蕃以代禁卫其巡检县尉司所省募兵亦数万诏缺额弗补者会其利费储之专以待武备之用自后民兵数遂踰募兵而国用之久议欲择民之技武者若

唐府兵番上以宿卫事虽未行其规模宏远矣【此兵志首篇所云姑附见须详考存兵效也】国朝以备战卫为禁军以给徙为厢军各隶其州之本城内总于侍卫司而尚书兵部掌其政令因事立名者各隶于其部又以厢军教阅者为始号厢军禁后皆以为下禁军其给使于诸司者亦各以其事役属焉

熙宁三年诏以禁军分五都法检治厢军其后禁军或降剩员或升阶以备厢军诸路力役之事广浙间诏增募而西京转运司所募多至三万余人陕西减额五千人亦至三万人河朔流民寓京东者如旧制募士教阅以为忠果二十指挥分隶河北总管以除盗恤饥而河北及熙河路修城垒河北所募五千人熙河亦募三千人修京城以废马监军置广固保忠凡十指挥亦五千湖南瑶人平戎泸军兴洮河转漕又皆增置大抵熙宁元丰之间厢军之数视祖宗时益众矣自三代之后凡国家之力役皆调于民故民以劳弊宋有天下悉役厢军凡役作工徒营缮民无与焉故天下民力完固承平百年

哲宗

元佑元年八月诏雄州云翼两指挥依旧存留各以三百人为额二年正月文彦博言厢军旧隶枢密院新制改隶兵部且本府之兵岂可无籍遂诏郡令自进册以其副上枢密仍更互揭贴三年正月诏京西厢军以三万三千五百人为额增粹州克宁厢八百人

绍圣四年十二月置都大兵房枢密院自熙宁始置兵籍然后逐月季揭贴进呈至是立式令承旨司岁终造都籍具诸路见管数以申枢密院自是兵籍可考

元符三年六月枢密言河北增马军广威步军保捷二万余人而在京禁军缺万人令帅司选其愿换在京军分者发副从之

徽宗

崇宁五年枢密院言禁军缺额二十四万近创广勇崇捷崇政十万人尚阙十四万政和三年闰二月先是朝廷下诸路增广保五法以寓军令而京东西路提举官任谅虑迫呼抑配或致民弊乃自披等搜择不越月得甲五十万率先诸路诏加谅直秘阁转一官八年童贯拣伉健少年胜捷军以为亲兵凡九千人

太平治迹统类卷三十